


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

Mahte	1
Markuq	49
Lukaq	80
Yohan	132
Lagyo	172
Romaq	219
1 Korinhtuq	241
2 Korinhtuq	262
Galatiq	276
Ehpesu	284
Hpilipi	291
Kolose	296
1 Htesaloni	301
2 Htesaloni	306
1 Timohti	309
2 Timohti	315
Tituq	319
Hpilemon	322
Hebre	323
Yakuq	339
1 Petruq	345
2 Petruq	351
1 Yohan	355
2 Yohan	361
3 Yohan	362
Yude	363
Shing-rân	365

MAHTE é Gabú Danglù Laiká (The Gospel of Matthew)

Yesuq É Byùxik Shap Kyô É Hkyô

Luk 3:23-38

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaû gi, a-ô mâ é eq rajung za nghut lhê.

² Abraham gi, Isak lé hkû;
Isak gi, Yakup lé hkû;
Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;

Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruhtaq nghut ri.

Obet gi, Yese lé hkû;

⁶ Yese gi, Hkohkâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû;

Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniaq eq yhanggu yhangmâng pé lé hku é nghut ri.

¹² Babelon má shúm dut huí é htâng má,

Yehkoniaq gi, Shalahtila lé hkû;

Shalahtila gi, Zerubabelaq lé hkû;

¹³ Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

¹⁶ Yakup gi, Mariq é yhanglâng Yosep lé hku é nghut ri;

Mariq gi, Hkrisduq gâ é Yesuq lé hku é sù nghut ri.

¹⁷ Haú mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô

Luk 2:1-7

¹⁸ Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep eq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogûng dut bê nghut ri. ¹⁹ Yhâng é yhumsîng hpó Yosep gi, dingmán sù nghut luí, yhang lé byu pé hí má hoq a kâm lhoq hpu nau é yanmai, tsik za lhoq kâng pyám rá dâ ri.

²⁰ Nghut kôlhang, yhang haú su myit nyi é hkûn, yhupmoq má, haú Yhumsîng é mau-mang lagyo gi, yhang lé, lé htoq shit luí, "Dawiq é yhangzo yhangshu Yosep é, haú náng é yhumsîng myhí Mariq lé hâng yù rá hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê. ²¹ Yhang gi, yuqzo rayuq hkû rá nghut luí, nàng gi, zoshâng haú lé, Yesuq nghû myìng myhíng byi ra rá nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù rá sù nghut lhê." ga taí ri.

* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê. † **1:17** Grik dong Hkrisduq gâ é gi, xù but huí Sù gâ é lichyúm nghut mù, Hebre dong Mesaia gâ é eq rajung za nghut lhê.

22 Shí hkyô banshoq gi, Garai Gasâng eq, haû myiqhtoi dông taí é dang lé lhoq dik é nghut ri. 23 Myiqhtoi dang haû gi, "Haû zomyi gyíng gi, zogûng dut luí, yuqzo rayuq hkû râ nghut lhê; Yhâng é myíng lé gi, Emanuelaq ga kó râ nghut lhê."* gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

24 Yosep gi, yhup bûn lo é hkûn, haû Yhumsing é maumang lagyo taí é eq rajung za, Mariq lé, yhangmyi dông yhûm má shuí yù bê nghut ri. 25 Nghut kôhang, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haû lé, yhang gi, Yesuq ga myhíng byî ri.

2

Buihtoq Hkyam Mã É Hpaqchyî Bò Bang

1 Herut hkohkâm up nyi é u lé, Yuda mau mã é Betlehem wà má Yesuq lé hku é nghut ri. Hau htâng, buihtoq hkyam mã é hpaqchyî bò bang gi, Yerusalem wà mó má jé lé kômù, 2 "Haû hku lé lô bê Yudaq byu pé é Hkohkâm gi, hkâmá nghut lhê lhú? Yhâng é kyî lé, buihtoq hkyam mã ngamoq myàng luí, Yhang lé noq râ matú jé lé é nghut lhê." ga luí, myí akô nghut ri.

3 Herut hkohkâm gi, haû hkyô lé wó gyo jáng myit myô nyi ri; hau htoq agó, Yerusalem wà mó mã é lhunglhâng bang le, myit myô bum akô nghut ri. 4 Haû mù luí, yhang gi, byu pé é hkyangjong agyi pé eq tarâ sará pé banshoq lé, ji tsíng yù mù, haû Hkrisduq hkâmá hku lé lô râ nghut é hkyô lé myí ri. 5 Haû hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luí, haû myiqhtoi kâ tô é má,

6 "Yudaq mau mã é Betlehem wà ê, nàng gi, Yudaq mau mã é wà pé má, je tiq sù a nghut;

hkâsu mù gâ le, ngá é Israelaq byu pé lé upzúng râ Zau gi, náng chyáng mai htoq lô râ nghut lhê.* ga bo tô ri." ga tû taí akô.

7 Hau htâng, Herut gi, haû hpaqchyî bò bang lé haq ji yù mù, kyî lé htoq shit é ahkyíng lé, yhangmoq chyáng mai hkyak

wó myí sê yù bê nghut ri. 8 Haû mù, yhang gi, "Nungmoq, zoshâng haû lé rago é ho wú keq. Ngò le, Yhang lé é wó noq râ matú, Yhang lé nungmoq é myâng eq yhang, ngo lé lo shit kyo keq." ga taí luí, haû bang lé Betlehem wà shut nhang kat bê nghut ri.

9 Yhangmoq gi, haû hkohkam é dang lé gyô yu é htâng má, htoq e ló bekô nghut ri. Haû buihtoq hkyam má yhangmoq myang é kyî gi, haû zonú nyi é ahtoq ang ang má ló nô é jé shoq, yhangmoq é hí má e ló byî ri. 10 Yhangmoq gi, kyî haû lé myàng jáng, gyai yhang gabú bum akô nghut ri. 11 Yhangmoq gi, haû yhûm má wang e ló kô é hkûn, zonú eq yhângnu Mariq lé myàng kômù, hkyihput htuq luí, haû zonú lé noqkuq akô; hau htâng, yhangmoq é sutdek pé lé le hpóng luí, hîng, namngón jung loban eq mura* pé lé yù mù, Yhang lé chyunguq byî akô nghut ri. 12 Yhangmoq gi, Herut chyáng a dum taû ló râ matú, yhupmoq má, yhangmoq lé sidiq byî é hui kômù, hkyô gó hkat dông yhangmoq é mau shut taû ló bekô nghut ri.

Egutuuq Ming Shut Hfang E É Hkyô

13 Yhangmoq ló byuq é htâng má, haû Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haû zoshâng eq yhângnu lé, Egutuq ming shut shuí hfang é aq. Ngò, nang lé dum ji yu é ahkyíng jé shoq, haû má nyi nyi keq. Háì mù gâ le, Herut gi, zoshâng haû lé sat râ matú, ho nyi bê nghut ri." ga taí ri.

14 Haû mù, yhang gi, toq luí, myín lé yhang, zôshang me lé shuí chûng mù, Egutuq ming shut e ló bê nghut ri.

15 Yhangmoq gi, Herut shi é jé shoq, haû má nyi nyi akô. Haû gi, "Ngá zo lé, ngò, Egutuq ming mai wut htoq yù bê nghut lhê.* ga, haû Yhumsing eq myiqhtoi dông taí é dang lé lhoq dik é ru nghut lhê.

16 Herut gi, yhang lé, hpaqchyî bò bâng eq mhaû pyâm tô é lé sé jáng, nhikmo-yo bê nghut ri; haû mù, yhang gi, haû hpaqchyî bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayâm mã é wà pé má nyi é, í zân mai a-ô mã

* 1:23 Esai 7:14 * 2:6 Mihka 5:2 * 2:11 Mura gi, chi wó kut jung xù nghut lhê. * 2:15 Hos 11:1

é yuqzo pé banshoq lé, sat pyám nhang ri.
¹⁷Haù gi,
 "Ramaq gâ é jowò má, yón kuq é eq ngau
 garû é htê lé wó gyô ri;
 Rahkelaq gi, yhang zô pé a nyi byuq lo kô é
 yanmai, ngau nyi é eq nhik a wó títg
 dut ri."^{*}
 ga luí, ¹⁸myiqhtoi Yeremiaq dông taí tô é
 dang lé lhoq dik é nghut ri.

Nazaret Wà Má Dum Taù Lo É Hkyô

¹⁹Herut shi byuq é htâng, Egotuq ming
 má, haù Yhumsing é maumang lagyo gi,
 Yosep chyáng yhupmoq dông lé htoq shit
 mù, ²⁰"Toq aq, haù zôshang me lé shuí
 chùng mù, Israelaq ming má taù ló aq;
 hkâsu mù gâ le, haù zoshâng lé sat naù bang
 shi byuq bekô nghut ri." ga taí ri.

²¹Haù mù, Yosep gi, zôshang me lé shuí
 chùng mù, Israelaq ming shut taù ló bê
 nghut ri. ²²Nghut kôlhang, yhang gi, Yuda
 mau má, Arhkela-uq, yhângwa Herut é hkó
 má xoq up nyi é hkyô lé wó gyo jáng, haù
 má a wám ló lo nghut ri. Yhupmoq má sidiq
 byí é huí é eq rajung za, yhang gi, Galile
 mau shut e ló mù, ²³Nazaret gâ é wà má
 ló nyi nyi bê nghut ri. Haù mù, "Yhang lé,
 Nazaret wà byù ga râ nghut lhê." ga luí, haù
 myiqhtoi pé dông taí tô é dang lé lhoq dik é
 nghut ri.

3

Wui-myhup Sará Yohan Shui Hen É Hkyô *Mrk 1:1-8; Luk 3:1-18; Yhn 1:19-28*

¹Haù yoq má, Wui-myhup Sará Yohan
 htoq lô mù, Yuda mau má é yoso má hko
 kyô é gi, ²"Myit lhing keq; hkâsu mù gâ le,
 mauhkúng mingdán gi, chyâng lò bê* nghut
 ri." gâ ri. ³Haù yuq gi,
 "Haù yoso má, byù rayuq garû taí é htê gi,
 'Haù Yhumsing é matú, hkyô hen to keq;
 Yhâng é matú, hkyô lhoq nyhang to
 keq.' gâ ri."^{*}
 ga myiqhtoi Esai-aq taí tô é sù yuq nghut ri.

⁴Yohan gi, gola-uq shomaù èq saí é mebu
 wut mù, yhâng é hpyidum má gi, shokuq
 hpyihit hit ri. Yhâng é zoshuq gi, dinggám
 eq yosô byo-í pé nghut ri. ⁵Yerusalem wà

mó mâ é bang, Yuda mau banshoq mâ é
 bang eq Yodan làng awui ayàm lhunglhang
 mâ é bang gi, yhâng chyáng htoq e bum
 akô. ⁶Yhangmoq gi, yhumsing é mara lé
 yín yû kôluí, yhâng chyáng mai Yodan làng
 má wui-myhup hkâm yu bum akô nghut ri.

⁷Nghut kôlhang, yhang gi, yhang wui-
 myhup hkâm byí é jang má, Hparishe pé
 eq Saduke pé myo myo lé lo nyi kô é lé
 myàng jáng, yhangmoq lé taí é gi, "Duq
 htân lhangmùi amyû pé ê, jé lô râ yubak
 dam mai wó hpanq lut kó sháng gaq ga,
 nungmoq lé ó yuq taí pùn é lhu? ⁸Myit
 lhing hkyô eq gingdán é ashi pé zui keq.
⁹'Ngamoq gi, Abraham é yhangzo yhang-
 shù pé nghut lhê.' nghu luí, yhumsing é i-
 myit unghkaù má hkâlum to kó. Hkâsu mù
 gâ le, ngò, nungmoq lé taí kyo kôlé, Garai
 Gasang gi, luqgok shí pé mai, Abraham é
 matú yhangzô pé wó hpan htoq kat lhê.
¹⁰Ahkuí lhang, Garai Gasang gi, Yhâng é
 wazung lé haù siggâm wang pé má tô to bê
 nghut ri; haù mù, ge é ashi a zuí é agàm
 hkangmó lé gi, htuq lheng pyám mù, myi
 má dú kat pyám râ nghut lhê.

¹¹Ngò gi, nungmoq myit lhing kó sháng
 gaq nghu, wui èq za wui-myhup hkâm byí
 lhê. Nghut kôlhang, ngá htoq má wum-o
 a-tsam je bo é sù rayuq, ngá htâng má jé
 lé lô shirâ nghut luí, ngò gi, Yhâng é hkyi-
 tsung chùng byi râ lhang a gingdán; Yhang
 gi, Chyoiyúng Woi-nyí má le, myi má le,
 nungmoq lé wui-myhup hkâm byi râ nghut
 lhê. ¹²Yhang gi, loq má byò chung to mù,
 guq chyarâng má é guq bùm lé hik sán pyám
 luí, já é guq cham lé gi, guqchyí má tsing
 kat to mù, guqsôm lé kúm gi, hkâ-nhám le
 shi byuq a sê é myi èq nyhê hkyô pyám râ
 nghut lhê." gâ ri.

Yesuq, Wui-myhup Hkâm Yu É Hkyô *Mrk 1:9-11; Luk 3:21-22*

¹³Haù hkún, Yesuq gi, Yohan chyáng
 wui-myhup hkâm yù râ ga, Galile mau
 mai Yodan làng má jé lé lo ri. ¹⁴Nghut
 kôlhang, Yohan gi, "Ngò sheq Náng chyáng
 wui-myhup hkâm yù râ sù ru nghut lhê
 nhing! Náng sheq ngá chyáng lé lo lhê lhu?"
 ga luí, lhom taí hkúm ri.

^{*} 2:17 Yer 31:15 ^{*} 3:2 Mauhkúng mingdán gi, chyâng lò bê gâ é lichyúm gi, Garai up râ ahkying chyâng lò bê gâ é
 nghut lhê. ^{*} 3:3 Esai 40:3

¹⁵ Haú hkûn, Yesuq gi, "Dingmán hkyô banshoq lé, nga-nhúng lhoq dik râ é yan-mai, Ngo lé wui-myhup hkám byi laq." ga tù taí ri. Haú mù, Yohan le, gyo byi bê nghut ri.

¹⁶ Yesuq gi, wui-myhup hkâm yù eq yhang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri. ¹⁷ Haú hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

4

Yesuq, Gúnglaú Huí É Hkyô

Mrk 1:12-13; Luk 4:1-13

¹ Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuí é ri. ² Yesuq gi, zoshuq gám é myi xê nyí myi xê myìn jé jáng, zòmut hui bê nghut ri. ³ Haú hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taí ri.

⁴ Haú jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mungdang hkanmó èq sheq asak duì râ nghut lhê.* ga luí, Chyúmdang má kê tô ri." ga yhang lé tù taí ri.

⁵ Haú hkûn, nat Tsadán gi, Yesuq lé, chyoiyúng myuq* má shuí è mù, noqkuq yhum je myhang é shúhtâng htoq má yap nhang to luí, ⁶ "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le,

'Náng é matú, Garai Gasang gi, Yhâng é maumang lagyô pé lé taí to râ nghut mù,

luqgok má Náng é hkyî a ló htung shoq, yhangmoq é loq èq Nang lé lhom bún yû kó râ nghut lhê.*

ga luí, Chyúmdang má kê tô ri." ga taí ri.

⁷ Nghut kôhang, Yesuq gi, "Haú Yhumsing, nungmoq é Garai Gasang lé, wó chyam wú râ a nghut.* ga luí le,

Chyúmdang má kê tô ri." ga, yhang lé tù taí ri.

⁸ Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pé é hkikhkâm hkyô lé tún shit ri. ⁹ Hau htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taí ri.

¹⁰ Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsing nàng é Garai Gasang lé za, nàng noqkuq dojaú ra râ nghut lhê.* ga luí, Chyúmdang má kê tô ri." ga, yhang lé taí ri.

¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Lô É Hkyô

Mrk 1:14-15; Luk 4:14-15

¹² Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri. ¹³ Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló nyi nyi ri. ¹⁴ Haú gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau mâ é hkyô, Yodan làng yàm, tûngbaù pé nyi é Galile mau é,

¹⁶ mauchut hkaú má nyi nyi é bang, maubó mó lé myàng bê nghut ri;

shî wup hkaú má nyi to bâng é matú, maubó lô bê nghut ri.*

ga kê tô é dang lé lhoq dik râ matú nghut ri.

¹⁷ Haú hkûn mai, Yesuq gi, "Myit lhing keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri. ¹⁹ Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí

* 4:4 Tarâ Pun 8:3 * 4:5 chyoiyúng myuq gi, Yerusalem lé gâ lhê. * 4:6 Hkya-on 91:11-12 * 4:7 Tarâ Pun 6:16 * 4:10 Tarâ Pun 6:13 * 4:16 Esai 9:1-2

ri. ²⁰ Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

²¹ Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaí hkaú má gùn hpo nyi akô. Yhangnhik lé, Yesuq wut kat jáng, ²² yhangnhik gi, radá dâm, yhangnhik é yhângwa eq lhaí haú lé, tô pyâm to kôluí Yesuq htâng cháng bekô nghut ri.

Nò Bang Lé, Yesuq Lhoq Gê Byí É Hkyô
Luk 6:17-19

²³ Yesuq gi, Galile mau ramau gón má htoq ê mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pé chyáng má é nôhpyo ajung jung hui bang eq noli nojàng amyú myú dap bang lé, lhoq gê byí wún ri. ²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nôhpyo ajung jung huí é bang, hkê-nhô jamjaú nyi é bang, nat gang wang júng é bang, mhúngtuq tuq é bang, gùngjum shi é bang lé, shuí lé lô kôluí, Yhang gi, haú bang lé lhoq gê byí ri. ²⁵ Galile mau, Dekapoli,† Yerusalem, Yuda mau eq, Yodan làng tû tap má é byù moq mó gi, Yesuq htâng châng bum akô nghut ri.

5

Hkungsô Wó É Tará
Luk 6:20-23

¹ Yesuq gi, byù moq mó lé myàng jáng, bùm má doq ló luí, ló zung tô ri. Haú hkûn, Yhâng é chángzô pé gi, Yhâng chyáng lé lô kôjáng, ² Yhang nhut hkum hpóng luí, yhangmoq lé mhoqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é mingdán nghut nyi ri.

⁴ Myit iyon huí é bang gi, hkungsô wó nyi ri; hkâsu mù gà le, yhangmoq gi, nhik lhoq tîng é hui kó râ nghut lhê.

† 4:25 Dekapoli gà é gi, Grik đông myuq raxê lé gà lhê.

⁵ I-myt nú-nhâm é bang gi, hkungsô wó nyi ri; hkâsu mù gà le, yhangmoq gi, mingkan lé wó sîng kó râ nghut lhê.

⁶ Dingmán hkyô lé mut shit nyi é bang gi, hkungsô wó nyi ri; hkâsu mù gà le, yhangmoq gi, nhik dik shoq myàng zo kó râ nghut lhê.

⁷ Shogyo nhikmyin myit bo é bang gi, hkungsô wó nyi ri; hkâsu mù gà le, yhangmoq gi, shogyo nhikmyin yu é hui kó râ nghut lhê.

⁸ Myit sansêng é bang gi, hkungsô wó nyi ri; hkâsu mù gà le, yhangmoq gi, Garai Gasang lé myàng kó râ nghut lhê.

⁹ Nguingón hkyô sô xoq byí é bang gi, hkungsô wó nyi ri; hkâsu mù gà le, yhangmoq gi, Garai Gasang é yhangzô pé gà é hui kó râ nghut lhê.

¹⁰ Dingmán hkyô é yanmai zing-ri huí é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é nghut nyi ri.

¹¹ Ngá é yanmai, byu pé èq, nungmoq lé rhoi é, zing-rî é, a teng a mán é đông agè ashop é dang amyú myú taí tso kô é hkûn, nungmoq hkungsô wó nyi ri. ¹² Nguingón gabú nyí keq, hkâsu mù gà le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoí pé lé le, yhangmoq gi, haú đông zing-rî laí lo wú bekô nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidàm htoq má é xo nghut nyi lhê. Nghut kôlhang, xo gi, mán kân byuq jáng, haú lé hai èq dum wó lhoq ngam yù râ lú? Shinggan shut dú pyám mù, byu pé èq nâng pyeq pyâm é mai lai luí, hai akyú le bò râ a nghut lo.

¹⁴ Nungmoq gi, mingkân é maubó nghut akô; bùm htoq má é myuq lé gi, wó nghop to râ a nghut. ¹⁵ Myibung lé tap mù, mûng èq nghop tô é ó a kut wú kó; haú su kut râ malaí, yhúmhkaú má lúng tô é bang yuq hkangmó myoq wó myâng râ matú, tsung-jang má kúm tsung to râ nghut lhê. ¹⁶ Haú eq rajung za, byu pé gi, nungmoq é ge é muzó pé lé byu-myàng luí, mauhkûng htoq

mâ é nungmoq é Îwa lé hkyá-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷ Ngò gi, myiqhtoí pê é dang eq jep é tarâ lé lhoq hpyoq pyám râ matú, jé lé é nghut nhô hkâ-ngâm kó; haú pé lé lhoq dik râ matú sheq jé lé é ru nghut lhê. ¹⁸ Ngò, nungmoq lé teng za taí kôlé, mauhkûng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhú lhang byuq byuq râ a nghut. ¹⁹ Jep é tarâ shí pé mâ é tiq dik é dang rahkun lé lu lai luí, góbang lé le, haú su kut râ matú mhoq byí é sù ó yuq nghut kôle, mauhkûng mingdán má tiq dik sù gâ é hui râ nghut lhê; nghut kôlhang, jep é tarâ shí pé lé châng kut luí, mhoq byi sù kúm gi, mauhkûng mingdán má, hkik sù gâ é hui râ nghut lhê. ²⁰ Ngò, nungmoq lé taí kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó râ a nghut.

Byù Hkâsat

²¹ 'Byù hkâsat, ✧ sat é sù gi, jéyáng é hui râ nghut lhê' ga, hí hpyang lhê é bang lé taí tô é dang, nungmoq wó gyô wú bê nghut lhê. ²² Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang'* ga taí é sù gi, Yudaq byin tú wapdoq má jéyáng é hui râ nghut lhê; 'Byù bam ê' ga wut é sù gi, ngaraí myi eq gingdán nyi ri.

²³ Haú mù, hkungga gyap má, nàng hkungga nhông râ dâ é hkûn, nàng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng, ²⁴ nàng é hkungga lé, haú hkungga gyap hí má tô pyâm to mù, nàng é gumang hpó haú yuq eq hí nguingón hkyô ló yú luí sheq, hkungga lé nhông byi aq.

²⁵ Nang lé yui tsuq sù gi, nang lé tarâ rûng má dé e ló é hkûn, hkyô má ru nghut nyi ashî u lé, yhang eq nguingón hkyô hí hân yù aq. Haú a nghut jáng, haú yuq gi, nang

lé, tarâ agyi chyáng ê ap pyám mù, haú tarâ agyi gi, nang lé htóng hkyô pyám râ matú, htóng suwún hpô é loq má ap pyám râ nghut lhê. ²⁶ Ngò, nang lé teng za taí lé, yuichyîn haú a ban xap xap gi, htóng haú mai nàng wó htoq ló râ a nghut.

Su-myi Sulàng Lú É Hkyô Eq Séng Luí Mhoqshit É Dang

²⁷ 'Su-myi sulàng hkâlú' ✧ gâ é dang lé, nungmoq wó gyo wú bê nghut lhê. ²⁸ Nghut kôle, Ngò, nungmoq lé taí kôlé, myiwe rayuq lé shut nau é myit eq wú é sù gi, yhâng é myit hkaú má, myiwe haú yuq eq su-myi sulàng lú hkyô kut é sù nghut bê. ²⁹ Haú mù, nàng é loqyo myoq eq, nang lé mara kut shut nhang é nghut le gi, haú lé lap choq yú mù, dú pyám aq. Hkâsu mù gâ le, nàng é ragùngdu gón ngaraí ming gyó râ htoq má, nàng é gungsho rajung jung za htên byuq é nghut le gi, nàng é matú je ge ri. ³⁰ Haú eq rajung za, nàng é loqyo loq eq, nang lé mara kut shut nhang é nghut le gi, haú lé hpyit yú mù, dú pyám aq. Hkâsu mù gâ le, nàng é ragùngdu gón ngaraí ming gyó râ htoq má, nàng é gungsho rajung jung za htên byuq é nghut le gi, nàng é matú je ge ri.

Myi Làng Gâng É Hkyô Eq Séng Luí Mhoqshit É Hkyô

Mht 19:9; Mrk 10:11-12; Luk 16:18

³¹ 'Yhumsing é yhangmyi lé kâng é sù gi, lhoq kang laiká byi râ dut lhê.' ✧ gâ é dang joq lhê. ³² Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haú lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê. ³⁴ Nghut kôlhang, Ngò, nungmoq lé taí kôlé, hai eq le hkâdakâm kó: mauhkûng lé lang luí le, hkâdakâm

✧ 5:21 Htoq Ló 20:13

* 5:22 Byù gang gâ é lé, Grik dông "Raka" gâ lhê.

✧ 5:27 Htoq Ló 20:14

✧ 5:31 Tarâ

Pun 24:1

kó; hkâsu mù gâ le, haû gi, Garai Gasâng é zùng tanghkuq nghut lhê; ³⁵ myigùng lé lang luí le, hkâdakâm kó; hkâsu mù gâ le, haû gi, Garaí é hkyî nang jang nghut lhê; Yerusalem lé lang luí le, hkâdakâm kó; hkâsu mù gâ le, haû gi, Hkohkâm mó é myuq nghut lhê. ³⁶ Hau htoq agó, yhumsing é ulhùm eq le, hkâdakâm kó; hkâsu mù gâ le, xâm rahkat lé lhang hpyû shoq noq shoq, nàng wó kut é a nghut. ³⁷ Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haû mai laí é gi, haû agè ashop su chyáng mâ é nghut ri.

Lató Hpuq É Hkyô

Luk 6:29-30

³⁸ 'Myoqjí matú myoqjí xap, zui matú zui xap'☆ gâ é dang lé, nungmoq wó gyô wú bê nghut lhê. ³⁹ Nghut kôlhang, Ngò, nungmoq lé taí kôlé, agè ashop kut é sù lé lató hkâhpuq. Náng é loqyo bowâm má pyuq byi sù lé, loqpaí hkyam le hkâm byi shi aq. ⁴⁰ Byù rayuq yuq, nang lé mara tsuq mù, náng é buzo lé yu pyám byí é nghut jáng, bumó lé le, hkyut byi shi aq. ⁴¹ Byù rayuq yuq, nang lé zik mù, radéng ê nhâng jáng, yhang eq rahá í déng châng ê byi aq. ⁴² Nang lé dung sù lé, byi aq; náng chyáng mai chyí naû sù lé le, nunghtáng hkâlhik pyám.

Gyè Lé Chyitdap Râ É Hkyô

Luk 6:27-28, 32-36

⁴³ 'Náng é chyangnâm mâ é bang lé gi, chyitdap mù, náng é gyè lé gi, a jú kut aq'☆ gâ é dang lé, nungmoq wó gyô wú bê nghut lhê. ⁴⁴ Nghut kôlhang, Ngò, nungmoq lé taí kôlé, nungmoq gi, mauhkûng htoq mâ é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq; ⁴⁵ hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bui tsó byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri. ⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq

bang lhang, haû su kut lhê a nghut kó lú? ⁴⁷ Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbâng htoq má haí wá laklaí râ lú? Tungbaù pé lhang haû su kut lhê a nghut kó lú? ⁴⁸ Haû mù, mauhkûng htoq mâ é nungmoq é Íwâ gumjup é su, nungmoq le gumjup nyi keq.

6

Alu Byí É Hkyô

¹ Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haû su kut é nghut jáng, mauhkûng htoq mâ é nungmoq é Íwâ chyáng mai, chyunghuq wó yû kó râ a nghut.

² Haû mù, haû gegùn labyoq kut bang gi, byu pé eq shigyaú é hui sháng gaq ga, tarajong pé hká, hkyô pé hká kut é su, nàng gi, alu byí é hkûn, tut htê su hkâlhoq htoq. Ngò, nungmoq lé teng za taí kôlé, haû bang gi, yhangmoq é chyunghuq lé hkúm shoq wó yû bekô nghut lhê. ³ Ra châ to bang lé nàng alu byí é hkûn, náng é loqyo loq kut é hkyô lé, loqpaí loq lé lhang hkâsé nhâng. ⁴ Haû hkûn, nàng alu byí é lé, ó a châng sé râ nghut lhê. Haû jáng sheq, ó a sé loshoq kut é hkyô lé myang é sù, náng é Íwâ gi, nang lé chyunghuq shigyaú râ nghut lhê.

Kyûdung É Hkyô

Luk 11:2-4

⁵ Nungmoq kyûdung le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za taí kôlé, haû bang gi, yhangmoq é chyunghuq lé wó yû bekô nghut ri. ⁶ Nghut kôlhang, nàng kyûdung le, náng é gok hkaû má wang ló mù, hkum myhî pyám luí, a byu-myang é náng é Íwâ chyáng dung aq. Haû jáng, ó a byu-myang é lé myàng sù, náng é Íwâ gi, nang lé jeju dum tau byi râ nghut lhê. ⁷ Haû mù, kyûdung le, tungbaù pé su kut luí, dang puq hkâhtau kó; hkâsu mù gâ le, yhangmoq gi, dang hîng chín

☆ 5:38 Htoq Ló 21:24 ☆ 5:43 Nhung 19:18

luí dung jáng sheq, gyo byi nhô ngam akô nghut ri. ⁸ Haú bang su hkâkut kó; hkâsu mù gâ le, nungmoq é Íwa gi, nungmoq rá é hkyô lé, nungmoq a dung shi mai sê to Sû nghut lhê.

⁹ Haú mù, nungmoq kyûdûng le, 'Mauhkûng htoq tsáng myhâng mâ é ngamoq é Áwa ê,

Náng é myìng gi, chyoiyúng nyí sháng gaq,

¹⁰ Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹ Ngamoq nyí wuî rá é zoshuq lé, ngamoq lé hkû-nyí byi laq.

¹² Ngamoq lé shut é bâng é mara lé ngamoq hkyut pyám byí é su,

ngamoq é mara lé le hkyut pyám byi laq.

¹³ Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô.

(Hkâsu mù gâ le, kô dik é up sîng hkyô, a-tsam eq hpungwup shing kang gi, pyat dedu ahtum abyuq Náng chyáng ru joq nyi ri ô! Amen.)*

ngû dung keq. ¹⁴ Supê èq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq mâ é nungmoq é Íwa le, nungmoq lé mara hkyut pyám byi rá nghut lhê. ¹⁵ Nghut kôlhang, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi rá a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tân shit rá matú myoqdong lhoq nyhui shit akô nghut ri. Ngò, nungmoq lé teng za tái kôlé, haú bang gi, yhangmoq é chyunghuq wó yû bekô nghut ri. ¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Íwa za myàng sháng gaq, myoq chî pyám luí, u xû but keq; ¹⁸ haú jáng sheq, ó a sé loshoq kut é hkyô lé

myang é Sû, nungmoq é Íwa gi, nungmoq lé chyunghuq shigyaú rá nghut lhê.

Mauhkûng Htoq Mâ É Sutzè

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byí é myigùng htoq má, nungmoq é matú, sutzè lé hkâhkong to kó. ²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byí é mauhkûng htoq má sheq, nungmoq é matú sutzè hkong to keq. ²¹ Hkâsu mù gâ le, náng é sutzè joq jang má, náng é i-myit le jé nyi rá nghut lhê.

²² Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng mui to rá nghut lhê. ²³ Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyi rá nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htû rá lhâ!

²⁴ Ó yuq nghut kôle, yhumsîng í yuq lé wó dojaú rá a nghut. Hkâsu mù gâ le, yhang gi, rayuq lé a jú kut mù, rayuq lé gi, chyitdap rá nghut lhê; haú a nghut jáng, rayuq lé lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rá a nghut.

Hkâ-myit Chiq Kó

Luk 12:22-31

²⁵ Haú mù luí, Ngò, nungmoq lé tái kôlé, nungmoq é asak matú haí zo haí shuq rá eq nungmoq é gungdû matú haí wut haí tsang rá lé, hkâ-myit chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú? ²⁶ Maulat mâ é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsîng kat to kô é nghut le lháng, mauhkûng htoq mâ é nungmoq é Íwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lhú? ²⁷ Nungmoq má, ó yuq wá, myit chiq é èq,

* **6:13** Chyúmlaika ra-am má, shí túm a bo é nghut lhê.

yhumsing é asak lé radúng kô wó jat yù kó râ lúhú?

²⁸ Haû nghut le nhîng, haî mù, mebû matú myit chiq akô lúhú? Myigùng má yuq tô é htutbó ban pé hkâsu kut kô lo é lé, myit wú keq. Haû pé gi, mù le a zui, hkyîng le a duì kó nghut ri. ²⁹ Nghut kôlhang, Ngò, nungmoq lé taí kyo kôlé, hkohkâm Sholumon hpung kô dik u lé wut é mebu lhang, ban haû rabó lé a hkyit nghut ri. ³⁰ Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su kut hut é nghut le gi, nungmoq lé je riyhang hut râ a nghut kó lúhú? ³¹ Haû mù, 'Haî zo râ lhi?' 'Haî shuq râ lhi?' 'Haî wut râ lhi?' nghû hkâ-myit chiq myhîng kó. ³² Tûngbaù pé kúm gi, haû pé banshoq lé châng hkat ho nyi akô; nghut kôlhang, mauhkûng htoq mâ é nungmoq é Îwa gi, haû pé lé nungmoq râ é hkyô, sé byî nyi lû. ³³ Nghut kôlhang, Yhâng é mingdán eq dingmán hkyô lé hí hô keq, haû jâng, haû pé banshoq, nungmoq lé puq byi râ nghut lû. ³⁴ Haû mù, napmá lû é matú hkâ-myit chiq kó; hkâsu mù gâ le, napmá gi, yhâng é yhang myit chiq râ nghut lû. Hkû-nyí é wuîhke hkyô gi, hkû-nyí é matú gé bê nghut ri.

7

A Jéyáng Râ Hkyô

Luk 6:37-38, 41-42

¹ Nungmoq jéyáng é a hui kó sháng gaq, ó lé le, hkâjéyáng kó. ² Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byî é bung eq, nungmoq lé dum lik byi râ nghut lû.

³ Yhumsing myoq hkaû má lúng tô é siktúm lé lhang a myit wú é nhîng, haî mù luí, nunggu nungmâng é myoqwàng lé myang lû lúhú? ⁴ Yhumsing é myoq má siktúm lûng to luí nhîng, 'Náng myoq má lúng tô é myoqwàng lé, ngò choq pyám byi lé.' nghû luí, náng é gumang hpó lé hkâsu wó taí râ lúhú? ⁵ Gegùn labyoq kut sù ê, náng é myoq má lúng tô é siktúm lé hí choq pyám

aq. Haû jâng sheq, nunggu nungmâng é myoq má wang tô é myoqwàng choq pyám byi râ matú, náng san za myàng râ nghut lû.

⁶ Hkûi pé lé, yunglô é zê hkâbyi kó; waq pé hí má, nungmoq é palhé wuizo lé hkâdú byi kó. Haû su kut jâng, haû bang gi, zê haû pé lé náng pyeq pyám mù, nungmoq lé dum taû ngat lò râ nghut lû.

Dung Keq, Hô Keq, Hkum Má Kok Keq

Luk 11:9-13

⁷ Dung keq, haû jâng, nungmoq lé byi râ nghut lû; hô keq, haû jâng, nungmoq myàng kó râ nghut lû; hkum má kok keq, haû jâng, nungmoq lé hpóng byi râ nghut lû. ⁸ Hkâsu mù gâ le, ó yuq nghut kôlé, dung sù wó râ; hô sù myàng râ; hkum kok sù lé gi, hpóng byi râ nghut lû.

⁹ Nungmoq má, ó yuq wá, yhumsing yhangzo muk dúng le, luqgok byi kó râ lúhú? ¹⁰ Ngozo dúng le, lhangmui* byi kó râ lúhú? ¹¹ Agè ashop é bang nungmoq lhang gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang ge é chyunghuq byi râ nghut lû! ¹² Haû mù, hai hkyô má nghut kôlhang, nungmoq gi, yhumsing ô nau é dông supé lé kut nhâng nau é su, yhangmoq lé le kut byi keq. Haî mù gâ le, haû gi, jep é tarâ eq myiqhtoî pé é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuî e é nghut mù luí, haû dông wàng bang gi, myô akô nghut ri. ¹⁴ Chyap é hkúmdong eq hkyô zo kúm gi, asak hkyô shut shuî e é nghut mù luí, haû lé myang ho é bang gi, shaû akô nghut ri.

Agàm Eq Ashi

Luk 6:43-45

¹⁵ Nungmoq chyáng jé lé lo é myiqhtoî pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang,

* **7:10** Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lû.

myaq zo myaq shuq nau é wamhkuî pé nghut akô. ¹⁶ Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubypap mai tsibiyiq shi, zugâm mai maihpáng-shi wó yu wú akô lhú? ¹⁷ Ge é agàm gi, ge é ashi zui mù, a ge é agàm gi, a ge é ashi za dat zui ri. ¹⁸ Ge é agàm gi, a ge é ashi a wó zui, a ge é agàm le, ge é ashi a wó zui nghut ri. ¹⁹ Ge é ashi a zui é shigâm hkangmó lé gi, htuq pyám mù, myi má dú kat pyám râ nghut lhê. ²⁰ Haú mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

²¹ Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkung mingdán má myang wàng kó râ a nghut; haú mauhkung htoq mâ é Ngá Wa ô nau é dông kut sù za sheq, myang wàng râ nghut lhê. ²² Haú buinyi má, byù myo myo gi, 'Yhumsing ê, Yhumsing ê, Náng é mying mai, ngamoq gi, myiqhtoi le htoi bê; nat gang lé hkat htoq bê; laklai kumlhá ajung jung lé, kut bê a nghut lhú?' ga lui, Ngo lé myi kó râ nghut lhê. ²³ Haú hkûn, Ngò gi, 'Nungmoq lé, Ngò hkâ-nhâm le a sé; agè ashop hkyô kut é bang nungmoq, Ngá chyáng mai gâng ló byuq keq.' nghû, yhangmoq lé san za tû taî kat râ nghut lhê.

Hpaqchyî Bò Sû Eq Ngok Sû

Luk 6:47-49

²⁴ Haú mù, Ngá é dang shí pé lé wó gyô yù lui, châng kut é sù gi, hpaqchyî bò mù, lunghtân htoq má, yhûm saî é sù eq wuí nyi ri. ²⁵ Mau wô, wui je, laidun lò mù, yhûm haú lé lo htung kôhang, yhûm haú gi, a htên byoq byuq râ nghut lhê; hkâsu mù gâ le, yhûm haú gi, lunghtân htoq má tsuq tô é yanmai nghut ri. ²⁶ Nghut kôhang, Ngá é dang lé, wó gyô yù mù, a châng sù gi, semuî-jàng má, yhûm saî é byù ngok eq wuí nyi râ nghut lhê. ²⁷ Mau wô, wui je, laidun wò yup dut lò mù, yhûm haú lé lo htung jáng, yù whuî a mù loshoq htên byoq byuq râ nghut lhê." gâ ri.

²⁸ Yesuq mungdang ban taî é hkûn, shiwa byu pé gi, Yhang mhoqshit é hkyô lé maúhong bum akô; ²⁹ hkâsu mù gâ le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

8

Manggâm Dap É Byù Rayuq

Mrk 1:40-45; Luk 5:12-16

¹ Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri. ² Haú hkûn, manggâm dap é byù rayuq gi, Yhâng é hí má, lé mù, hkyihput htuq lui, "Yhumsing ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taî ri.

³ Yesuq gi, loq lhâm kat mù, haú yuq lé é záng lui, "Ngò dóng lhê, sân-yúng aq hkoi." ga taî kat ri. Haú hkûn jáng, haú yuq é manggâm gi, ge byuq bê nghut ri.

⁴ Haú hkûn, Yesuq gi, "Nàng, shí hkyô ó lé le hkâtaî kyo. Nghut kôhang, náng é gungdu lé, hkyangjong hpô chyáng ló tûn shit mù, yhangmoq é matú saksé dut sháng gaq, Mosheq taî tô é eq rajung za, hkungga ló nhông byi aq." ga haú yuq lé taî kat ri.

Gyezau Hpô É Lumjing Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù, ⁶ "Yhumsing ê, ngá é dui-nhâng zoshâng gi, gùngjum shi é htoq agó, yhûm má gyaí no jamjaû leq tô ri." ga garúm lé dung ri.

⁷ Haú hkûn, Yesuq gi, yhang lé, "Ngò, lé lhoq gê byi râ." ga taî kat ri.

⁸ Gyezau hpó haú, Yhang lé dum tû taî é gi, "Yhumsing ê, Nàng, ngá é laishín-htâng má, lé nang râ lháng ngò má a gingdán. Nàng, dang rahkun za taî kat laq; haú hkûn, ngá é dui-nhâng zoshâng ge ló râ nghut lhê. ⁹ Hkâsu mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shí kut aq!' nghu le, yhang kut lhê." gâ ri.

¹⁰ Yesuq gi, dang haú lé wó gyo jáng, maú byuq lui, Yhâng htâng châng bang lé, "Ngò, nungmoq lé teng za taî kôlé, Israelaq amyû má lháng, shí í lumjing é sù lé, Ngò, rayuq lé le a myàng wú é nghut lhê. ¹¹ Ngò, nungmoq lé taî kôlé, bui-htoq buiwàng hkyam mâ é byu pé myo myo gi, mauhkung mingdán má, Abraham,

Isak, Yakup pé eq rahá, zoshuq poí mó má myang zúng kó râ nghut lhê. ¹² Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui luí, haú jowò má ngaubyi ngaú nhap eq zuì kyik kyik shoq hpuzô nyi bùm bekô râ nghut lhê." ga taí ri.

¹³ Hau htâng, Yesuq gi, gyezau lé, "Ló aq hkoi! Nàng lumjínng é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byì É Hkyô

Mrk 1:29-34; Luk 4:38-41

¹⁴ Yesuq gi, Petruq é yhùm má jé wang e é hkûn, Petruq é yhâng-aumó gyai yhang no leq tô é lé, ê myang ri. ¹⁵ Yesuq gi, yhâng é loq má é záng kat é hkûn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gaí huq bê nghut ri.

¹⁶ Myinhtâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dâng èq hkat htoq pyám mù, nõhpyo huí é bang banshoq lé lhoq gê byì ri. ¹⁷ Haú gi,

"Yhang gi, nga-nhûng é noli nojàng lé yu pyám byi mù, nga-nhûng é noli nojàng lé, wùn waq pyám byi bê nghut ri."*

ga, myiqhtoi Esai-aq taí tô é dang lhoq dik râ matú nghut ri.

Yesuq Htâng Cháng Râ Bang

Luk 9:57-62

¹⁸ Yesuq gi, Yhâng é lhínghkyuq má byù moq mó zup míng nyi é lé myàng jáng, Yhâng é chángzô pé lé, nõng hé hpoq shut gú dap é sháng gâ ri. ¹⁹ Haú hkûn, tarâ sará rayuq gi, lé lô mù, "Sará ê, nõng gi, Nàng hká e le hká cháng râ nghut lhê." ga Yhang lé lé taí ri.

²⁰ Haú jáng, Yesuq gi, "Wamhkuí pé gi, hkyûng wó akô; nghoq pé le, nghoqsut wó akô. Nghut kôlhang, haú Byu Yhangzo gi, u nghê jowò lháng a wó nghut ri." ga lhom taí kat ri.

²¹ Haú hkûn, chángzo rayuq gi, "Yhumsîng ê, nõng wa lé lô yhùm pyám râ ahkáng hí byi shilaq." ga taí kat ri.

²² Nghut kôlhang, Yesuq gi, "Shí bê bang gi, shí bê bang yhangchang yhùm lhum kó sháng gaq, nàng gi, Ngá htâng cháng aq." ga dum taí taí ri.

Laidun Lhoq Zîm É Hkyô

Mrk 4:35-41; Luk 8:22-25

²³ Hau htâng, Yesuq lhai hkaú má wàng mù, Yhâng é chángzô pé le, Yhâng htâng châng wàng bekô nghut ri. ²⁴ Haú hkûn, nõng má byodan-htik laidun mó lò mù, wuìlhêng pé gi, lhai má bat ùm lò bê nghut ri. Nghut kôlhang, Yesuq gi, yhup myhî tô ri. ²⁵ Chángzô pé gi, Yhâng chyáng jé é mù, Yhang lé nhaú pun luí, "Yhumsîng ê, hkyi yù laq ô! Nga-nhúng myup ló nyi ri." ga taí akô.

²⁶ Yhang gi, "Lumjínng myit shaú é bang ê! Haí mù, haú-í gyuq bum akô lhu?" ga taí kat ri. Hau htâng, Yhang gi, toq luí, laidun eq wuìlhêng pé lé tân kat jáng, banshoq zîm byuq bê nghut ri.

²⁷ Byù haú bang gi, maúhong byuq kômù, "Shí yuq gi, hkasú é byù là? Lài eq wuìlhêng pé lháng gi, Yhâng é dang lé gyo byì ri myhi-nhung!" ga luí, rayuq eq rayuq myì lhùm bum akô nghut ri.

Nat Wang Júng Su Nhik Lé, Lhoq Gê Byì É Hkyô

Mrk 5:1-20; Luk 8:26-39

²⁸ Yesuq gi, Gadara byu pé é mau hpoq má jé dap lô jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lháng a wám lai loshoq wuí é su nhik nghut akô. ²⁹ Yhangnhik gi, Yesuq lé, "Garaí Yhangzo ê, Nàng, ngamoq eq haí sêng lhê lhu? Ahkyíng a jé shimá, ngamoq lé zing-ri râ matú jé lé lo é nghut lhê lhu?" ga taí garú akô.

³⁰ Haú mai a lùm wê é jowò má, waq rajùm mó gi, myì dú but zô nyi bum akô nghut ri. ³¹ Nat gâng pé gi, Yesuq lé, "Nàng, ngamoq lé hkat htoq râ nghut jáng, hê waq pé chyáng wàng nhâng laq." ga dúng akô.

³² Yesuq gi, "Htoq ló keq!" ga taí kat ri. Haú mù, yhangmoq gi, htoq lô luí, waq pé chyáng wàng mù, waq haú jùm gi, gampyoq mai nõng hkaú shut òn wàng lô kôluí,

* 8:17 Esai 53:4

wuì hkaû má myup shi byuq bekô nghut ri. ³³ Waq zúng bang gi, myuq hkaû shut hpang din wang ló kômù, dut lai lo é hkyô banshoq lé le, nat gang wang júng huí su nhik hkâsu dut é hkyô lé le, ló tai kyo akô nghut ri. ³⁴ Haû mù, rawa bang gi, Yesuq lé hui râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbán akô nghut ri.

9

Gungjum Shî Sû Lé Lhoq Gê Byî É Hkyô *Mrk 2:1-12; Luk 5:17-26*

¹ Yesuq gi, lhai má wàng mù, yhumsing é wà shut jî dap ló bê nghut ri. ² Byù ram gi, gùngjum shî sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjúng myit lé byu-myàng jáng, haû gùngjum shî sù lé, "Ngá zo ê, nhik hkâ-ngê; náng é yubak mara lé hkyut pyám byi bê." ga tai ri.

³ Haû hkûn, tarâ sará pé ra-am gi, yhangmoq é i-myt hkaû má, "Byù shí yuq gi, Garai Gasang lé rhoi dang tai nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myt hkaû má, haû su agè ashop é dông hai mù myit nyi akô lhú?" ⁵ "Náng é yubak mara lé hkyut pyám byi bê." nghu tai râ eq "Toq lui, hkyô so aq." nghu tai má, hká hkun je tai lui lhé lhú? ⁶ Nghut kôlhang, haû Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhé." ga tai lui, haû gùngjum shî sù lé, "Toq aq, náng é taphkang yu chùng lui, yhûm taù ló aq hkoi." ga tai kat ri. ⁷ Haû mù, haû yuq gi, toq mù, yhûm shut ló byuq bê nghut ri. ⁸ Byù hpûng mó gi, haû hkyô lé myàng kôjáng, gyuq maù kômù, byu pé lé haû su é ahkáng ayá byi tô é Garai Gasang lé hkyá-on kungton bum akô nghut ri.

Mahte lé shuí yu é hkyô *Mrk 2:13-17; Luk 5:27-32*

⁹ Yesuq gi, haû jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga tai

jáng, haû yuq gi, toq lui, Yhâng htâng cháng bê nghut ri.

¹⁰ Yesuq gi, Mahte é yhûm má myin-zang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. ¹¹ Haû lé, Hparishe pé myàng kôjáng, Yhâng é chángzô pé lé, "Nungmoq é sará gi, hai mù lui, kang guq bang eq yubak dap bang eq rahá zo shuq nyi lhé lhú?" ga myi akô.

¹² Yesuq gi, haû su ga kô é lé wó gyo jáng, "Wángzán bang gi, chi sará a ra kó; nòhpyo hui bang za sheq ru râ lhé. ¹³ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhé.'* gá é lichyúm lé mhoq yú keq. Hkâsu mù gá le, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhé." ga tú tai kat ri.

Zoshuq Gám É Eq Sêng É Hkyô *Mrk 2:18-22; Luk 5:33-39*

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhé; nghut kôle, Náng é chángzô pé gi, hai mù a gám kô é lhú?" ga lui, lé myi akô.

¹⁵ Haû mù, Yesuq tú tai é gi, "Bíng pé gi, lusik eq rahá nghut nyi to ashî hkûn, hkâsu ge yón kó râ lhú? Lusik lé, yhangmoq chyáng mai shuí yu pyám é hkying jé râ nghut lhé; haû hkûn kúm gi, yhangmoq zoshuq gám kó râ nghut lhé.

¹⁶ Ó yuq le, mebu xau má pán sik èq a lhaq hpo wú kó; hkâsu mù gá le, pán sik kun byuq jáng, mebu xau le je lhoq cheq pyám râ nghut lhé. ¹⁷ Tsibiyiq wing asik lé le, shokuq htung axau má ó a kat wú kó. Kat é nghut jáng, tsibiyiq wing asik soq htân lui, htung buq goq byuq mù, tsibiyiq wing le yui shun byuq, htung le htên byuq, dut râ nghut lhé. Haû mù, tsibiyiq wing asik lé, shokuq htung sik má kat jáng sheq, haû í júng é a hten râ nghut lhé." gá ri.

Shî Bê Myiwe Zo Eq No É Myiwe Myhi *Mrk 5:21-43; Luk 8:40-56*

* 9:13 Hos 6:6

¹⁸ Yesuq haú su ga taí nyi é hkûn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shi byuq bê. Nghut kôlhang, Nang lé mù, yhâng é ahtoq má loq lé ke byi laq, haú jáng, yhang, asak dum dui lò rá nghut lhê." ga taí ri. ¹⁹ Yesuq gi, toq mù, Yhâng é chángzô pé eq rahá, haú yuq htâng châng e ló akô.

²⁰ Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má é záng kat ri. ²¹ Myiwe myhí haú gi, yhang gúng yhang, "Ngò, Yhâng é buhtâng má é wó záng jáng gi, ge byuq rá nghut lhê." ga, wó myit é yanmai nghut ri.

²² Yesuq gi, lhing wú kat luí, yhang lé myàng jáng, "Ngá zo ê, nhik hkâ-ngê, nang é lumjínng myit gi, nang lé lhoq gê byi bê nghut ri." ga taí ri. Haú hkûn jáng yhang, myiwe myhí haú gi, ge byuq bê nghut ri.

²³ Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, ê myàng mù, ²⁴ yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lhê." ga taí jáng, yhangmoq gi, Yhang lé wuizui kut pyám byí akô. ²⁵ Yesuq gi, byù hpûng lé, shinggan shut htoq ló nhâng mù, Yhang wang ê luí, myiwe zo haú lé loq eq zuí kat jáng, myiwe zo haú gi, dum dui toq lo ri. ²⁶ Haú hkyo é danglù gi, ramau gón yhang jam ló byuq bê nghut ri.

Myoqjit Í Yuq Eq Nhut Jit Sû Rayuq Lé, Lhoq Gê Byí É Hkyô

²⁷ Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dìn uchyang, "Dawiq é Yhangzo ê, ngá-nhik lé shogyô yù laq ô!" ga wut taí akô.

²⁸ Yesuq gi, yhúmkaû má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byí é lé, nungnhik lumjínng akô luq?" ga myí ri.

Haú hkûn, yhangnhik gi, "Lumjínng lhê ô, Yhumsîng ê." ga tû taí akô.

²⁹ Hau htâng, Yhang gi, haú nhik é myoqjí má é záng htung luí, "Nungnhik lumjínng é eq rajung za dut sháng gaq." ga taí ri. ³⁰ Haú mù, yhangnhik gi, myoq wó myàng bekô nghut ri. Yesuq gi, "Shí hkyô, ó lé le hkâse

nhâng kó." ga, yhangnhik lé htân htân sidiq byí ri. ³¹ Nghut kôlhang, yhangnhik gi, haú hkyô lé, haú mau ramau gón yhang taí pyo ló bekô nghut ri.

³² Haú nhik htoq ló nyí kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô. ³³ Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shí su dut é hkyô lé, Israelaq amyû má radàm lháng a myang wú." ga taí bum akô.

³⁴ Nghut kôlhang, Hparishe pé kúm gi, "Nat gâng pé é zaú é wum-o a-tsam eq za, nat gâng pé lé hkat htoq pyâm é nghut ri." ga taí bum akô nghut ri.

Mû Zui Byù Shaú Ri

³⁵ Yesuq gi, myuq pé eq wà pé banshoq má wàng luí, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq noli nojàng hui bang yuq hkanng mó lé, lhoq gê byí wún ri. ³⁶ Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri. ³⁷ Haú mù, Yhang gi, Yhâng é chángzô pé lé, "Kyôshû yù rá myo shoq joq kôlhang, mû zui rá byù gi, shaú nyi ri. ³⁸ Haú mù, haú kyô Yhumsîng lé, Yhâng é kyô yô má, kyô shu byù myo myo nhâng byi rá matú, dung keq." ga taí ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq rá eq, noli nojàng eq nõhpyo ajung jung lé wó lhoq gê rá ahko ahkáng yhangmoq lé byí ri.

² Haú lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; ³ Hpilip eq Barhtolume; Htomaq eq kang guq sù Mahte; Alhpe é yhangzo

Yakuq, Htade, ⁴ Zelutuq* dut é Simun eq, Yesuq lé ap pyám râ sù, Yudaq Iskarut pé nghut akô.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tùngbaù pè chyáng le hkâ-ê kó; Samariq wà rawà má le hkâwâng kó. ⁶ Haù byuq byuq é sau pé su nghut nyi é Israelaq byu pè chyáng sheq ê keq. ⁷ Nungmoq gi, ê mù, 'Mauhkûng mingdán gi, chyáng lò bê nghut ri.' nghu é danglù lé hko kyo keq. ⁸ Nò bang lé lhoq gê byi, shî bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq. ⁹ Nungmoq é hpyihit má, hîng, ngùn eq gyi pé hkâkat chûng kó; ¹⁰ hkyowui é matú, etap, mebu htaí, hkyî-tsung eq dumbáng pé hkâyú chûng kó; hkâsu mù gâ le, mù zui sù gi, zoshuq wó gíng lhê.

¹¹ Hká wâ hká dum má jé wang ló le le, haù mâ é gingdán é byù lé hô mù, haù mai htoq ló é hkûn jé shoq, haù yuq é yhûm má za nyi nyi keq. ¹² Haù yhûm má wang é hkûn, shichyên yù keq. ¹³ Haù yhûm gi, gingdán é nghut jáng, nungmoq shimân byî é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taù lò sháng gaq. ¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jáng, haù yhûm haù wâ mai htoq ló é hkûn, nungmoq é hkyiwa má dap é hpuilhaù lé ko hkyô pyâm to keq. ¹⁵ Ngò, nungmoq lé teng za taí kôlé, tarâ jéyáng é buinyi má, haù wâ gi, Sodom eq Gomoraq myuq htoq má je hpuzo râ nghut lhê. ¹⁶ Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haù mù, lhangmui su hpaqchyî bò luî, hpûngkyui su nú-nhâm nyi keq.

¹⁷ Byu pé lé sidiq keq; hkâsu mù gâ le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê. ¹⁸ Nungmoq gi, Ngá é yanmai, mauzau wuì eq khokkam pé

é hí má shuî jé é hui luî, yhangmoq é hí má le, tûngbaù pè é hí má le, saksé myang hkâm kó râ nghut lhê. ¹⁹ Nghut kôlhâng, nungmoq lé ap pyám kô é hkûn, nungmoq hkâsu taí râ eq haí taí râ lé, hkâ-myt chiq kó. Haù hkûn taí râ dang, nungmoq wó kó râ nghut lhê. ²⁰ Hkâsu mù gâ le, haù gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí râ ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyám nhâng kó râ nghut lhê. ²² Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut kôlhâng, jihtûm jé shoq wó hkam jân nyi é sù gi, hkyi yu é hui râ nghut lhê. ²³ Rawò má zing-ri é hui jáng, rawò shut hpang é keq. Ngò, nungmoq lé teng za taí kôlé, Israelaq byu pè é myuq pé má, nungmoq a ban wang ngap shimá, haù Byu Yhangzo jé râ nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaú râ a nghut. ²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq† ga kô le gi, Yhâng é yhumbyù wuì lé gi, je riyhang nghû kó râ a nghut lhú?

²⁶ Haù mù, yhangmoq lé hkâgyuq kó. A byông htoq loshoq wó zaù nghop tô é haí le a joq râ nghut lhê; a sé loshoq wó haq tô é le, haí a joq râ nghut lhê. ²⁷ Ngò, nungmoq lé mauchut hkaù má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkûng htoq mai taí pyô keq. ²⁸ Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyi keq. ²⁹ Johkyáng í du lé, gyi htingchap rachap èq wó ûng pyâm lhê a nghut kó lhú? Nghut kôlhâng, haù radu lhang, nungmoq é Íwâ é myit eq a nghut jáng, myigùng má wó byit gyó râ

* **10:4** Zelutuq gâ é lichyúm gi, yhumsing zui saí é hkyô má gyai yhang myit lòm shirong é sù lé ga lhê. Haù u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê. † **10:25** Bezebulaq gâ é gi, Tsadán é myíng raja nghut lhê.

a nghut. ³⁰ Nungmoq é ulhum mâ é xâm banshoq lé lhang, nghap to gù nghut lhê. ³¹ Haû mù, hkâgyuq kó; nungmoq gi, haû johkyáng myo myô htoq má lhang gù je bo é bang nghut lhê.

³² Byu pê hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wá é hí má, Ngò lhom yín yû râ nghut lhê. ³³ Byu pê é hí má, Ngo le he-ngik pyâm é sù ó yuq lé nghut kôle, mauhkûng htoq mâ é Ngá Wá é hí má, Ngò he-ngik pyâm râ nghut lhê.

³⁴ Ngo lé, haû myidàm htoq má simsaq hkyô byi râ matú lé lo é sù su hkâ-ngâm kó. Ngò gi, simsaq hkyô byi râ matú lé lo é a nghut, shâm byi râ matú sheq lé lo é ru nghut lhê. † ³⁵ Hkâsu mù gâ le,

'Yuqzo gi, yhangwa eq, byizo gi, yhangnu eq, dumó gi, yhangmhoí eq, byoq lhum kó râ nghut lhê.

³⁶ Yhumsing é yhumbyù wuì gi, yhumsing é gyè taù dut râ nghut lhê. *
gâ tô é matú sheq, Ngò jé lé é ru nghut lhê.

³⁷ Ngo lé chytit é htoq yhumsing é înu îwa lé je chytit é sù ó yuq nghut kôle, Ngá é chángzo kut râ gingdán sù a nghut; Ngo lé chytit é htoq yhumsing é zo wuì lé je chytit é sù ó yuq nghut kôle, Ngá é chángzo kut râ gingdán sù a nghut; ³⁸ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut râ gingdán sù a nghut. ³⁹ Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó râ nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haû Ngo lé nhang kat Sù lé hap yu é sù nghut bê. ⁴¹ Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yû râ nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yû râ nghut lhê. ⁴² Shî, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhang é chyunghuq lé

hkyak myang hkam yù râ za nghut lhê." gâ ri.

11

Yesuq Eq Wui-myhup Sará Yohan

Luk 7:18-35

¹ Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit râ matú eq hko kyo râ matú, haû jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaù má wó gyo jáng, ³ "Nàng gi, haû jé lé lô râ Sù nghut lhê lú? Haû a nghut jáng, ngamoq gi, góyuq lé lán ra shirâ lú?" ga, yhang é chángzô pé lé myí nhang kat ri.

⁴ Yesuq tù taí é gi, "Nungmoq wó gyo wó myang é hkyô, Yohan lé ló taí kyo keq;

⁵ myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gê byi é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

⁷ Yohan é chángzô pé taù ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haí lé hpuq wú râ matú, haû yoso shut e akô lú? Lai eq hik nhûn é jamgàm lé wú râ matú nghut akô lú? ⁸ Haû a nghut jáng, haí lé wú râ matú e akô lú? Nú-nhâm é mebu wut sù lé wú râ matú e akô lú? A nghut. Nú-nhâm é mebu wut bang gi, hkohkâm-wâng pé má sheq rû nyi lhê. ⁹ Haû nghut lé gi, haí lé wú râ matú ê kô é lú? Myiqhtoi rayuq lé lú? Haû kúm nghut ri; Ngò, nungmoq lé taí kôlé, Yohan gi, myiqhtoi htoq lhang gyaú sù nghut lhê. ¹⁰ Haû yuq é hkyô lé, Chyúmdang má kâ tô é gi,

'Wú aq, Náng é hkyô lajang lán râ matú, Ngá é lagyo lé, Náng é hí má Ngò nhang kat râ nghut lhê. *
gâ ri. ¹¹ Ngò, nungmoq lé teng za taí kôlé, myiwe wuì mai hku kat é bang má, Wui-myhup Sará Yohan htoq je kô é rayuq

† 10:34 Yesuq gi, simsaq hkyô byi sù nghut lhê. Nghut kôlhàng, Yhang é yanmai, byu pé mabyoq htoq râ nghut é hkyô lé sé mù, haû su ga taí é nghut lhê. * 10:36 Mihka 7:6 * 11:10 Mal 3:1

lhang a htoq wú shi; nghut kôlhang, Garai Gasâng é mauhkûng mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyi mai ahkuí jé shoq, mauhkûng mingdán gi, lú chýn wang nyi é hui mù, sarhé pé gi, haú lé wó yú bekô nghut ri. ¹³ Hkâsu mù gâ le, Yohan é ahkýng jé shoq, haú myiqhtoí pé banshoq eq tarâ gi, haú hkyô eq séng luí, myiqhtoí htoí to gù nghut lhê. ¹⁴ Nungmoq hap yù nau é nghut jáng, Yohan gi, haú jé lé lô râ ga sù Eliyaq nghut lhê. ¹⁵ Gyô yù râ nohkyap dap sù gi, gyô yù sháng gaq.

¹⁶ Shí ipyat lhê é byu pé lé, Ngò, hai eq taí kê wú râ lú? ¹⁷ Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gó kó; ngamoq, ngaù hkyangsâng kôlhang, nungmoq gi, a ngaù kó.'

ga luí, gai pé má zùng mù, góbang lé wut taí lhum nyi é zoshâng wui eq wui akô. ¹⁸ Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô. ¹⁹ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. Nghut kôlhang, hpaqchyí byéng-yá gi, yhâng é muzó èq saksé tân shit nyi ri." gâ ri.

Myit A Lhîng É Wà Mó Pé Hkyô

Luk 10:13-15

²⁰ Hau htâng, Yesuq gi, laklaí kumlhá pé je myo kut shit bê nghut kôlhang, myit a lhîng é myuq pé lé tân é gi, ²¹ "Kurazin wà mó ê! Nàng dîngnyé wó ri! Bet-saida wà mó ê! Nàng dîngnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut bekô râ nghut lhê. ²² Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê. ²³ Dum mù, Kaperna-um wà nàng ê, nàng gi, mauhkûng jé shoq waq toq é hui râ lú? A nghut, mosumhkung má sheq gyó râ nghut lhê.

✧ 11:14 Mal 4:5

Náng chyáng kut shit é laklaí kumlhá lé, haú Sodom wà má kut shit é ru nghut le gi, myuq haú hkû-nyí jé shoq joq nyi râ nghut lhê. ²⁴ Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." gâ ri.

Ngú Nyí Bâng É Matú Bánno Jang

Luk 10:21-22

²⁵ Haú u lé, Yesuq taí é gi, "Mauhkûng eq myigung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wui lé tân shit bê nghut é yanmai, Ngò, Nang lé hkya-on lhê ô. ²⁶ Nghut bê, Áwa ê, haú gi, Nàng ô nau é hkyô nghut ri.

²⁷ Ngá Wa gi, lhunglhang lé Ngá é loq má ap byí to bê. Haú Zo lé, Áwa mai lai luí ó le a sé; Áwa lé le, haú Zo eq haú Zo mai sé nhâng râ matú hkyin yu é bang mai lai luí ó a sé.

²⁸ Ngú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê. ²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haú hkûn, nungmoq é asak woi-nyí bánno kó râ nghut lhê. ³⁰ Haí mù gâ le, Ngá é kandang gi, waq lui é htoq agó, Ngá é wò le sôm lhê." gâ ri.

12

Bánno Buinyi É Yhumsîng

Mrk 2:23-28; 3:1-6; Luk 6:1-5, 6-11

¹ Haú yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yú mù, zô akô nghut ri. ² Hparishe pé gi, haú lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akô." ga taí kat akô.

³ Haú hkûn, Yesuq tû taí é gi, "Dawiq lhang gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lú? ⁴ Dawiq gi, Garai Gasâng é yhúmhaú má wang é mù, hkyangjông pé mai lai luí, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó

lhub? ⁵ Hau htoq agó, Bánno buinyi má, hkyangjông pé gi, noqkuq yhúmhkaú má Bánno buinyi é tará lé shut kôlhang mara a wó é lé, haú tará laiká má nungmoq a nghap wú kó lhub? ⁶ Ngò, nungmoq lé taí kôlé, haú noqkuq yhúm htoq je ko sú gi, shí má nghut nyi lhê. ⁷ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê'☆ gâ é lichyúm lé nungmoq sé kô é ru nghut le gi, mara a bò bang lé mara hùn kó rá a nghut. ⁸ Hkâsu mù gâ le, haú Byu Yhangzo gi, haú Bánno buinyi é Yhumsing nghut lhê." gâ ri.

⁹ Hau htâng, Yhang gi, haú jowò mai e ló mù, yhangmoq é tarajong má wang e ló ri. ¹⁰ Loq rahkyam ajum shi byuq é byù rayuq le, haú má nyi tô ri. Yhangmoq gi, Yesuq lé, "Bánno buinyi má, nòhpyo lhoq gê byi le, tará wang lhê lhub?" ga myi é dông, Yhang lé mara hùn rá hkyô ho akô nghut ri.

¹¹ Haú hkûn, Yesuq gi, "Nungmoq chyáng má é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó rá lhub? ¹² Byù gi, saú htoq má hpaudap dik é nghut lhê! Haú mù, Bánno buinyi má ge é hkyô kut le, tará wang lhê." ga yhangmoq lé tú taí ri.

¹³ Hau htâng, Yhang gi, haú loq jum shí sú lé, "Náng é loq nyhang kat aq." ga taí kat jáng, haú yuq gi, loq nyhang kat jáng, loq haú gi, a no é loq su ge byuq bê nghut ri. ¹⁴ Hparishe pé kúm gi, htoq ló kômù, Yesuq lé hkâsu kut wó sat pyám rá hkyô lé, chôm hpyê lhúm bum akô nghut ri.

Garai Hkyin Tô É Dui-nhâng Zoshâng

¹⁵ Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nòhpyo hui bang banshoq lé lhoq gê byi lui, ¹⁶ Yhang ó yuq nghut é hkyô lé, a taí byông htoq rá matú, yhangmoq lé taí hkûm tô ri. ¹⁷ Haú gi, myiqhtoi Esai-aq é nhut dông mai taí tô é dang lé lhoq dik rá matú nghut ri. Dang haú pé gi,

¹⁸ "Shí yuq gi, Ngò chyit, Ngò myit nguì lui, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi rá nghut mù,

Yhang gi, tará dingmán é hkyô lé byù myù banshoq pé má taí kyo rá nghut lhê.

¹⁹ Yhang gi, haí a hpuq tú é htoq agó, a garu rá nghut lhê; Yhâng é htê lé, hkyô mó pé má wó gyo rá a nghut.

²⁰ Yhang gi, tará dingmán é hkyô lhoq ung é hkûn jé shoq,

nâng chap pyám bê jàm gàm lé le, lhoq hkyui rá a nghut, myihkau za htoq nyi bê myi lé le, lhoq sat pyám rá a nghut.

²¹ Byù myù chângjup gi, Yhâng é mying má myit myoqbyù kó rá nghut lhê."☆ gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

²² Hau htâng, agè ashop é nat gang wang júng lui, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byi ri; haú mù, haú yuq gi, dang le wó nyô, myoq le wó myâng dut bê nghut ri. ²³ Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga taí bum akô.

²⁴ Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pé é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga taí bum akô nghut ri.

²⁵ Yhangmoq myit nyi é hkyô lé Yesuq sé mù, yhangmoq lé taí é gi, "Hká mingdán nghut kôle, ahkaú má byoq gâng lhúm nyi kô é nghut jáng, htên byoq byuq rá za nghut lhê; haú eq rajung za, myuq ralhum nghut nghut, yhumhtu ralhum nghut nghut, yhangchang byoq lhúm nyi kô é nghut jáng, haú gi, wó gîng nyi rá a nghut.

²⁶ Tsadán gi, Tsadán lé hkat htoq pyám é nghut jáng, yhumsing gûng yhumsing lhoq hpyoq nyi gù bê nghut ri. Haú su nghut jáng, yhâng é mingdán gi, hkâsu kut wó gîng to rá lhub? ²⁷ Haú mù lui, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó

☆ 12:7 Hos 6:6 ☆ 12:21 Esai 42:1-4 * 12:24 Bezebulaq gâ é gi, Tsadán é mying rajà nghut lhê.

yuq é wum-o a-tsam eq hkat htoq pyám kô é nghut lhê lú? Haú su nghut jáng, haú bang gi, nungmoq lé tarâ jéyáng bang dut kó rá nghut lhê. ²⁸ Nghut kôlhang, Ngò gi, Garai Gasâng é Woi-nyí eq nat gâng pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

²⁹ Ó yuq nghut kôle, wum-o bò sù lé hí tuí zing pyám é a nghut le gi, yhâng é yhùm má lú wáng mù, yhâng é sutzè lé hkâsu wó lú yú rá lú? Haú yuq lé hí tuí zing pyám jáng sheq, yhâng é sutzè lé wó lú yú rá nghut lhê.

³⁰ Ngá hkyam shut a dap sù gi, Ngo lé gyè kut sù nghut lhê; Ngò eq rahá a shùm tsing sù gi, lhoq pyo pyám é sù nghut nyi ri. ³¹ Haú mù, Ngò, nungmoq lé taí kôlé, byu pé é yubak mara hkanmó eq Garai Gasang lé rhoi dang taí pyám é lhunglhang gi, mara hkyut byí é wó hui rá nghut lhê. Nghut kôlhang, haú Chyoiyúng Woi-nyí lé rhoi dang taí pyám é gi, mara hkyut byí é hui rá a nghut. ³² Haú Byu Yhangzo lé dang dông shut é sù gi, mara hkyut byí é wó hui rá nghut lhê; nghut kôlhang, haú Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui rá a nghut.

³³ Ashi lé wú luí, agàm lé sé rá nghut é yanmai, agàm lé lhoq gè jáng, ashí le gè rá nghut lhê; agàm lé a lhoq gè jáng, ashí le gè rá a nghut; ³⁴ Duq htân lhangmuí amyú ê, nungmoq gi, agè ashop é bang nghut to kôluí nhing, dang gè hkâsu wó taí kó rá lú? Hkâsu mù gâ le, i-myit unghkaú má byíng mui tô é lé za, nhut mai taí htoq lo é nghut lhê. ³⁵ Ge é sù gi, yhumsing é i-myit unghkaú má é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaú má é agè ashop é sutdò mai, agè ashop é zè pé lé lhoq htoq shit lhê. ³⁶ Ngò, nungmoq lé taí kôlé, byu gi, yhumsing taí kat é akyú a bo é dang pé é matú, tarâ jéyáng é buinyi má taí sân kyo ra kó rá nghut lhê. ³⁷ Hkâsu mù gâ le, yhumsing mara lut rá le, ó le ó taí é dang pé mai; mara byí é hui rá le, ó le ó taí é dang pé mai, nghut rá nghut lhê." gâ ri.

Limik Kumhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tarâ sará pé ra-am gi, "Sará é, ngamoq gi, Nang, limik kumhá kut shit rá lé myàng nau ri." ga Yhang lé dúng akô.

³⁹ Haú mù, Yhang tù taí é gi, "Agè ashop é eq lhum a zuí é ipyat shí gi, limik kumhá dung nyi ri myhi-nhung! Myiqhtoi Yonaq é kumhá mai lai luí, gotú haí le tûn shit rá a nghut. ⁴⁰ Hkâsu mù gâ le, Yonaq gi, ngo mó é wamdau hkaú má sum nyí sum myín lúng é su, haú Byu Yhangzo le, myigùng káng má sum nyí sum myín lúng rá nghut lhê.

⁴¹ Ninewe wà byu wuì gi, Yonaq mungdang hko kyô é hkûn myit lhing kô é nghut mù, tarâ jéyáng é buinyi má, ipyat shí má é bang eq rahá toq lò luí, ipyat shí má é bang lé mara hùn kó rá nghut lhê; haú Yonaq htoq ko sù gi, ahkuí shí má jé nyi to bê. ⁴² Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haú tarâ jéyáng é buinyi má, ipyat shí má é bang eq rahá toq lò luí, ipyat shí má é bang lé mara hùn rá nghut lhê; haú Sholumon htoq ko sù gi, ahkuí shí má jé nyi to bê.

⁴³ Haú agè ashop é nat gi, byu rayuq chyáng mai htoq lò mù, kyuq huí é jowò pé má sô yông e ló luí, no rá jowò hkat ho wú le, a myang hô nghut ri. ⁴⁴ Haú hkûn, yhang gi, 'Ngò nyi lai lo é yhùm má dum taú ló wú rá.' ga taí ri. Yhang dum taú jé ló wú le, yhùm haú lé, ó le a sing yu hpyuq é htoq agó, san za rago dut to lánng é lé ló myang ri.

⁴⁵ Haú jáng, yhang gi, dum taú ê mù, yhâng htoq je wuí é nat nyhit nat lé shuí lò luí, haú má lo wang nyi to bekô. Haú mù, haú yuq é nyi yap sâmlai gi, hí lhê htoq má je wuí lò bê nghut ri; agè ashop é ipyat shí le, haú eq rajung za dut rá nghut lhê." gâ ri.

Yesuq É Yhângnu Eq Yhanggû Pé

Mrk 3:31-35; Luk 8:19-21

⁴⁶ Yesuq, shiwa byu pé lé dang rû nyo nyi ashí hkûn, yhângnu eq yhanggu pé gi, Yhang lé nyò nàu kômù, shinggan má lé yap tô akô nghut ri. ⁴⁷ Haú mù, Yesuq lé, "Náng nu eq nunggu pé gi, Nang lé nyò nàu mù, shinggan má lánng yap bum akô." ga taí kyô akô.

⁴⁸ Haú hkûn, Yhang gi, "Ô pé gi, Ngá nu eq Ngá gu pé nghut akô lhú?" ga tû taí kat ri. ⁴⁹ Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wuì nghut bê. ⁵⁰ Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taí ri.

13

Kyôshi Sân É Dangtú
Mrk 4:1-20; Luk 8:4-15

¹ Haú nyí má yhang, Yesuq gi, yhúm hkaú mai htoq ló mù, wuì nhông yàm má ê zung tô ri. ² Byù hpûng mó gi, Yhâng é lhíng hkyuq má zup zîng lé bûm kô é yanmai, Yhang gi, lhaí hkaú má doq zûng tô ri. Shiwa byu pé kúm gi, gin-gau htoq má yap tô bum akô. ³ Hau htâng, Yhang gi, haú bang lé, dangtú pé dông myo myo taí é má, "Kyô hkyó sù rayuq gi, kyôshi san râ ga htoq e ló ri. ⁴ Yhang, kyôshi sân kat é hkûn, ram gi, hkyô má gyó ang mù, nghoq pê èq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle, ⁶ amyit a wó chin hing é nghut mù, buì htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaú má gyó ang luí, zubyap haú pé kô lò mù, wup pyám ri. ⁸ Ra-am dum nghut jáng, myìhpún bo é jang má gyó ang luí, ashi zuí lo é gi, sân kat é htoq rashô tú, hkyuq xê tú, sum xê tú, myô jat lo é nghut ri. ⁹ Gyô yù râ nohkyap dap sù gi, gyô yù sháng gaq." ga le taí ri.

¹⁰ Haú hkûn, chángzô pé gi, Yhâng chyáng lé mù, "Nàng gi, haí mù, shí bang lé, dangtú dông taí lhê lhú?" ga myí akô.

¹¹ Haú jáng, Yhang tû taí é gi, "Mauhkûng mingdán eq sêng é sê gyo wuì é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a byi shí é nghut lhê. ¹² Wó to sù lé gi, yhang agùn agó wó râ matú, jat byi shirâ nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê. ¹³ Yhangmoq gi, wú to kôlhang, a myàng kó; gyô nyí kôlhang, a wó gyo, a sê gyo kó nghut

é yanmai, yhangmoq lé Ngò dangtú dông taí râ é nghut lhê. ¹⁴ Haú gi,

'Nungmoq gi, wó gyô tô nyí kôlhang, sê gyo kó râ a nghut;
myang tô nyí kôlhang, wú sé kó râ a nghut.

¹⁵ Hkâsu mù gâ le, byù shí bang gi, myit nhikshi jit byuq bê;
yhangmoq é nohkyap gi, a wó gyo kó, myoqjí le chûm byuq bekô nghut ri.

Haú su a nghut le gi, yhangmoq, myoq myàng no gyo mù,
i-myit bun bóng luí, lhíng lò kômù,
Ngò, yhangmoq lé yâ gè byi berâ nghut lhê.✧

gâ é, Esai-aq é myiqhtoi dang lé lhoq dik é nghut ri. ¹⁶ Nghut kôlhang, nungmoq é myoq gi, wó myâng mù, nungmoq é nohkyap gi, wó gyô é yanmai, nungmoq gi, hkungsô wó nyi ri. ¹⁷ Hkâsu mù gâ le, Ngò, nungmoq lé teng za taí kôlé, nungmoq wó myâng, wó gyô é pé lé, myiqhtoi pé eq dingmán bang myo myo gi, myàng nau gyo nau kôlhang, a wó myâng, a wó gyo kó nghut ri.

¹⁸ Ahkuí, kyôshi san sù eq sêng é dangtú é lichyúm lé rago gyô wú keq; ¹⁹ Hkyô má gyó âng é kyôshi gi, mauhkûng mingdán eq sêng é danglù lé wó gyo kôlhang, a sê gyô é yanmai, haú agè ashop sù lé lò mù, yhâng é i-myit hkaú má san kat tô é kyôshi lé, lé yu pyám byí é hui sù lé gá nau é nghut lhê. ²⁰ Luqgok yò pé má gyó âng é kyôshi gi, mungdang lé wó gyo jáng, radá dâm gabú myit eq hap yù kôlhang, ²¹ amyit a wó chin é yanmai, razup zo za yuq mù, mungdang é yanmai, wuìhkê é eq zîng-rí é hui kôjáng, hân hân htak ló byuq é sù lé gá nau é nghut lhê. ²² Zugyóm má gyó âng é kyôshi gi, haú mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuí nghoq jung ngùn hîng zèhkoq èq hup pyám é yanmai, ashi a wó zuí é sù lé gá nau é nghut lhê. ²³ Nghut kôlhang, myìhpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haú yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

✧ 13:15 Esai 6:9-10

Myoqgàm Dangtú

²⁴ Yesuq, yhangmoq lé dangtú dông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq dù ri.

²⁵ Byu pé yhup myhî tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luí, taú lò byuq bê nghut ri.

²⁶ Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

²⁷ Yhumsîng hpô é dui-nhâng zoshâng wuì gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myî kôjáng, ²⁸ haú yhumsîng hpó gi, 'Gumlau gye eq kut é nghut ri.' ga tû taí ri.

Haú jáng, dui-nhâng zoshâng wuì gi, 'Ng-amoq, myoq haú pé lé ê nut pyám râ lé, nàng ô nau ri lhú?' ga myî akô.

²⁹ Haú hkûn, yhang gi, 'Hká nut pyám kó; hkâsu mù gâ le, nungmoq, myoq haú pé lé nut é hkûn, guq gàm pé lé le bo záng nut pyám kó râ nghut lhê. ³⁰ Kyôshu yoq jé shoq rahá yuq to kó sháng gaq; haú hkûn, myoqgàm pé lé hí hkyin tsîng yù mù, nyhê hkyô pyám râ matú hkyom dîng to luí, guq lé kúm gi, shú yù mù, ngá é chyî má tsing kat to râ matú, kyô shu bang lé ngò taí râ nghut lhê.' ga tû taí ri." gâ ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhum dum xoq taí é gi; "Mauhkûng mingdán gi, byù rayuq eq, yhâng hkyâm má hô tô é angshi cham eq wuí ri. ³² Angshi cham haú gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taí é gi, "Mauhkûng mingdán gi, myiwe rayuq eq sungso mún sum bûng má yu nyhó luí, haú pé banshoq lé wó lhoq dau nhang é múnchi eq wuí ri." gâ ri.

✧ 13:35 Hkya-on 78:2

³⁴ Yesuq gi, byù moq mó lé, haú pé banshoq dangtú dông mai chyat taí ri; yhangmoq lé, dangtú a bo é haí lhang a taí wú nghut ri. ³⁵ Haú gi,

"Ngá nhut lé hpóng mù, dangtú dông mai taí râ;

mingkan lé sân-hi hpan é mai zaú tô é hkyô pé lé taí sân kyo râ nghut lhê."✧ ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq lò mù, yhúmhkaú má wang lò ri. Haú hkûn, Yhâng é chángzô pé gi, Yhâng chyáng lé lô kômù, "Yò mâ é myoqgàm dangtú eq sêng é hkyô lé taí sân kyo laq." ga taí akô.

³⁷ Haú jáng, Yhang tû taí é gi, "Ge é kyôshi san sù gi, haú Byu Yhangzo nghut ri. ³⁸ Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haú Tsadán é yhangzô pé nghut akô; ³⁹ haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

⁴⁰ Haú myoqgàm pé lé, nut yù mù, myi má nyhê pyâm é su, haú mingkan htûm é ahkyíng má dut râ nghut lhê. ⁴¹ Haú Byu Yhangzo gi, Yhâng é maumang lagyô pé lé nhâng râ nghut lhê; haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglhang lé, Yhâng é mingdán mai hkyin she htoq yù mù, ⁴² gyúng nyi é myibung hkyûng hkaú má dú kat pyám kó râ nghut lhê; hau má, ngaubyi ngàu nhap eq zùi kyik kyik shoq hpuzô nyi kó râ nghut lhê. ⁴³ Haú hkûn, dîngmán bang gi, yhangmoq Yhângwâ é mingdán má buì su duqbó nyi kó râ nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit eq taú lò luí, yhang wó é banshoq lé ûng pyám mù, yò haú lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó eq wuí ri. ⁴⁶ Yhang gi, gyai hpaû é palhé lé myàng jáng, yhang wó é banshoq lé ló ûng pyám mù, haú lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri. ⁴⁸ Gùn haú má ngozo byíng jáng, ngo kóng bang gi, wui yàm má she htoq yú mù, zung to luí, ge é pé lé gi, ngo-pyap má guq kat yú luí, a ge é pé lé gi, dú pyám akô. ⁴⁹ Haú eq rajung za, mingkan htúm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yú luí, ⁵⁰ ngaubyi ngaù nhap eq zuì kyik kyik shoq hpuzô nyi râ nghut é, gyúng nyi é myibung hkyûng hkaú má dú kat pyám kó râ nghut lhê.

⁵¹ Shí hkyô banshoq lé nungmoq sê gyo bekô lhú?" gâ ri.

Haú hkûn, yhangmoq gi, "Sê gyo bê." ga tû taí akô nghut ri.

⁵² Hau htâng, Yesuq gi, yhangmoq lé, "Mauhkûng mingdán eq séng luí mhoq yú bê é tarâ sará ó nghut kôle, yhang mhoq é hkyô gi, yhumsing é sut-púnglhúng hkaú mai zè sik zè xau lé yu htoq é yhumsing hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang *Mrk 6:1-6; Luk 4:16-30*

⁵³ Yesuq gi, dangtú haú pé lé ban tai jáng, haú jowò mai htoq e ló bê nghut ri.

⁵⁴ Yhang gi, Yhâng é yhummau má jé ló jáng, byu pé lé, yhangmoq é tarajong má mhoqshit ri; haú hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê là?"

⁵⁵ Yhang gi, laksíma hpô é yhangzo a nghut lhú? Yhângnú é myíng gi, Mariq gâ lhê a nghut lhú? Yhanggû pé gi, Yakuq, Yosep, Simun eq Yudaq gâ é bang a nghut kó lhú?

⁵⁶ Yhâng nhammó pé le, nga-nhúng eq rahá nghut nyi lhê a nghut kó lhú? Haú su nghut le nhíng, haú pé banshoq lé, Yhang hkâmai wó yu é nghut lhê là?" ga myí bùm kômù,

⁵⁷ Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhúm má za, myoqdong a lhaq wó wú é nghut lhê." ga tû taí kat ri.

⁵⁸ Yhangmoq lumjíng myit a bò kô é yanmai, Yesuq gi, haú má, laklaí kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô *Mrk 6:14-29; Luk 9:7-9*

¹ Haú hkûn, mauzau Herut gi, Yesuq eq sêng é ludang lé wó gyo jáng, ² yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shí é mai dum dui toq lo é nghut mù, hpungwup a-tsam haú pé lé wó kut é nghut ri." ga taí ri.

³ Herut haú su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yú mù, htóng hkyô pyám é yanmai nghut ri. ⁴ Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byí nyi é yanmai nghut ri. ⁵ Herut gi, Yohan lé sat pyám naú kôhang, mingbyú wui lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyí kô é yanmai nghut ri.

⁶ Nghut kôhang, Herut é hkû ladu hkyúm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù, ⁷ byizo haú lé, yhang haí dung le haí byi râ ga dakam é danggidiq byí ri. ⁸ Byizo haú gi, yhângnu hpaqchyí byí é lé gyô yú mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹ Mauzau hpó gi, myit a ngón dut byuq kôhang, yhang dakam tô é danggidiq é yanmai le, bíng pé é myoqdong lé tê nau é yanmai le, yhang dúng é lé, byi râ matú, ¹⁰ htóng hkaú má lúng tô é Yohan é ulhum lé hpyit râ hkunmó hkyô kat bê nghut ri. ¹¹ Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhângnú chyáng yu ló byí ri. ¹² Haú mù, Yohan é chángzô pé gi, yhâng é mâng lé lé yú luí, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

*Byù Ngo Hkyîng Lé Byi Tsô É Hkyô
Mrk 6:30-44; Luk 9:10-17; Yhn 6:1-14*

¹³ Yesuq gi, haú hkyô lé wó gyo jáng, haú mai lhai ji mù, tsím tsâm é jowò shut Yhang baú e ló ri. Haú lé, byu pé wó gyo bùm kôjáng, wà mó pé mai htoq lé lô kômù, hkyî hkyô Yhâng htâng châng e ló akô nghut ri. ¹⁴ Yesuq gi, lhai mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byi ri.

¹⁵ Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wui kó sháng gaq, yhangmoq lé nhang kat aq hkoi." ga taí akô.

¹⁶ Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

¹⁷ Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

¹⁸ Haú jáng, Yesuq gi, "Yu lò keq." ga tû taí mù, ¹⁹ shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byi ri. Haú chángzô pé gi, shiwa byu pé lé gàm byi akô nghut ri. ²⁰ Yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri. ²¹ Haú má zô é bang gi, myiwe wui eq zoshâng wui lé a nghap lhôm é za, yuqgê baú ngo hkyíng kô bo ri.

*Yesuq, Wui Htoq Má Sô É Hkyô
Mrk 6:45-56; Yhn 6:15-21*

²² Yesuq gi, haú shiwa byu pé lé byo ló nhang nyi é hkûn jáng, chángzô pé lé lhai má wang ji nhâng mù, tû tap shut dap ló lánng nhâng ri. ²³ Shiwa byu pé lé nhang pyâm é htâng má, Yhang gi, kyûdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haú má nyi nyi ri. ²⁴ Haú u lé, lhai gi, gin-gau mai tósmra wê é jowò má jé é hkûn, laí tau mut

é yanmai, wuìheng èq gyai yhang lo bat nhûn é hui zô ri.

²⁵ Htâng napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Haú mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taí garû akô nghut ri.

²⁷ Haú jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

²⁸ Haú hkûn, Petruq gi, "Yhumsîng é, Nàng yhang ru nghut le gi, ngo lé, wui htoq mai sô lé lô nhâng laq." ga taí kat ri.

²⁹ Haú jáng, Yesuq gi, "Lé lô aq." ga tû taí kat ri.

Haú mù, Petruq gi, lhai mai gyó mù, wui htoq mai Yesuq chyáng sô e ló ri. ³⁰ Nghut kôlhâng, yhang gi, laidun htan é lé myang kat jáng, wú gyuq luí, wui má nop ló nyi mù, "Yhumsîng é, ngo lé hkyi yù laq." ga wut garû kat ri.

³¹ Yesuq gi, radá dâm yhâng é loq lhâm kat luí, Petruq lé lánng zing to mù, "Lumjîng myit shau sô é, nàng haí mù úng-âng lhê lhú?" ga taí ri.

³² Yhangnhik, lhai má wàng kôjáng, laidun le zím byuq bê nghut ri. ³³ Hau htâng, haú lhai má lúng tô é bang gi, Yhang lé paí gop mù, "Nàng gi, gè gè yhang, Garaí Gasâng é Yhangzo nghut bê." ga taí akô nghut ri.

³⁴ Yhangmoq gi, gû dap ló kômù, Gene-sarat mau má jé wang ló bekô nghut ri.

³⁵ Haú mau má é bang gi, Yesuq lé wú sé kôjáng, awui ayàm má é bang banshoq lé kyô kat akô. Haú mù, byu pé gi, nòhpyo hui bang lhunglhang lé, shuí lé lô kômù, ³⁶ nòhpyo hui bang lé, Yhâng é bushi htâng má za lhang záng nhâng râ matú dúng tóngbán akô; Yhang lé záng é lhunglhang bang gi, lhoq gê byi é huí bekô nghut ri.

15

*Sansêng É Hkyô Eq A Sansêng É Hkyô
Mrk 7:1-23*

¹ Hau htâng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù, ² "Náng é chángzô pé gi,

haî mù luî, îchyí îwa pê é htûngli lé a cháng kut akô lhú? Yhangmoq gi, loq hí a chí é zang zô akô nghut ri." ga, lé taî akô.

³ Haû jáng, Yesuq tù taî é gi, "Nungmoq gi, haî mù, nungmoq é htûngli é yanmai, Garai Gasâng é hkunmó lé a cháng kô é lhú? ⁴ Hkâsu mù gâ le, Garai Gasang gi, 'Nungmoq é înu îwa lé, hkungga keq.'[☆] ga le, 'Înu îwa lé, nhîng é sù ó yuq nghut kôle, sat pyâm é hui râ lhê.'[☆] ga le, taî tô é nghut lhê. ⁵ Nghut kôlhang, nungmoq taî é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taî é nghut jáng, ⁶ haû yuq gi, yhângwa lé hkungga nó a ra.' gâ akô nghut ri. Haû dông mai, nungmoq gi, nungmoq é htûngli é yanmai, Garai Gasâng é mungdang lé he-ngik pyâm akô nghut ri. ⁷ Gegùn labyoq kut bang ê! Nungmoq eq séng luî, myiqhtoi Esai-aq htoî tô é dang gi, têng ri. ⁸ Myiqhtoi dang haû gi,

'Byù shí bang gi, nhut htoq mai za Ngo lé hkunggâ akô;
yhangmoq é myit nhiklhumi gi, Ngò eq wê gâng nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri;
hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.'[☆]
gâ é nghut lhê." gâ ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luî, "Gyô yù mù, sé lo keq. ¹¹ Nhut má wang lo é haî jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taî ri.

¹² Haû hkûn, haû chángzô pé gi, Yhâng chyáng lé lô kôluî, "Hparishe pé gi, shí hkyô lé wó gyo mù, nhik-yô nyi bùm kô é lé, Nang sê lhê lhú?" ga myi kôjáng,

¹³ Yhang gi, "Mauhking htoq tsáng myhâng mâ é Ngá Wa a hô tô é agàm hkangmó gi, apûn eq roq nut pyâm é hui râ nghut lhê. ¹⁴ Yhangmoq é yanmai, myit hkâ-myô kó; yhangmoq gi, myoqjit bang nghut kôle, myoqjit é bang lé hkyô-u she

é bang nghut akô. Myoqjit yhangchang hkyô-u she lhûm é nghut le gi, í yuq é yhang donghkong má byit gyó kó râ za nghut lhê." ga tù taî ri.

¹⁵ Haû hkûn, Petruq gi, "Ngamoq lé, dangtú hau é lichyúm taî sân kyo laq." ga taî jáng, ¹⁶ Yesuq gi, "Nungmoq, ahkuî le haû-í yhang go nyi ashi kô luq? ¹⁷ Nhut má wang lo é haî jung le, wamdau hkaû má jé wang ló mù, gungdu mai dum htoq ló é nghut lhê. ¹⁸ Nghut kôlhang, nhut mai htoq lo é gi, myit nhiklhumi mai htoq lo é nghut mù, byù lé a sanséng dut nhang ri. ¹⁹ Hkâsu mù gâ le, myit nhiklhumi mai htoq lo é gi, agè ashop é dông myit é hkyô pé, byù sat é hkyô, sumyi sulàng lú hkyô, ashop é dông gungsho zùm yap é hkyô, hkaû é hkyô, a tengmán é saksé hkâm é hkyô, lumù gansang é hkyô pé nghut ri. ²⁰ Haû pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taî ri.

Hkanan Myiwe Myhí Rayuq É Lumjng Myit

Mrk 7:24-30

²¹ Hau htâng, Yesuq gi, haû mai Turuq eq Sidun mau shut htoq e ló bê nghut ri. ²² Haû hkûn, haû mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsing ê, ngo lé shogyô yù laq ô! Ngá byizo gi, nat gang wang jung mù, gyai yhang nò gyin nyi ri." ga taî garû ri.

²³ Nghut kôlhang, Yesuq gi, dang rahkun le a tù taî nghut ri. Haû mù, Yhâng é chángzô pé gi, Yhâng chyáng lé jé kômù, "Myiwe myhí haû lé ló nhang pyám aq; haî mù gâ le, yhang gi, nga-nhông é htâng má châng garû nyi ri." ga taî akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga taî ri.

²⁵ Haû hkûn, myiwe myhí haû gi, Yhâng é hí má lé mù hkyihput htuq luî, "Yhumsing ê, ngo lé garúm yù laq ô!" ga taî ri.

²⁶ Yesuq gi, "Zô wui chyáng mâ é zoshuq lé yù mù, hkuî pé lé byi tsô é jung a nghut." ga tù taî jáng, ²⁷ myiwe myhí haû

gi, "Yhumsîng ê, haû kúm nghut ri; nghut kôhâng, hkuí pé lhang, yhumsîng hpô é zohpoq mai gyó é zang cham zang htâng lé, zô akô mhaí." ga dum taí ri.

²⁸ Haû mù, Yesuq gi, "Myiwe zo ê, náng é lumjîng myit gi, kô nyi ri! Nàng dúng é hkyô lé gyo byi bê nghut lhê." ga tù taí ri. Haú hkún jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô

Mrk 8:1-10

²⁹ Yesuq gi, haú mai htoq ló luí, Galile nhông yàm má ê jé mù, bùm shut doq ló luí, ló zung nyi ri. ³⁰ Haú hkún, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotû myo myo lé shuî lé lô kômù, Yhâng é hkyî wang má lé nyhi to kô é nghut luí, Yhang gi, haú bang lé lhoq gê byi ri. ³¹ Haû shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmút to gû lé, Ngò a nhang kat naù." ga taí ri.

³³ Haú hkún, Yhâng é chángzô pé gi, "Isû é yoso má nhîng, byù shî myhò bang lé luq shoq byi tso râ zoshuq gi, hkarâ é wó râ lhú?" ga myí akô.

³⁴ Yhang gi, "Nungmoq, muk hkâ-myhó long wó akô lhú?" ga tau myi jáng, yhangmoq gi, "Muk nyhit long eq ngo-nú zo rat-suí wó lhê." ga tù taí akô.

³⁵ Haû mù, Yhang gi, byù hpûng lé, myigùng htoq má zùng nhang ri. ³⁶ Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luí, haú chángzô pé lé byi jáng, yhangmoq gi, byù hpûng lé gàm byi akô nghut ri. ³⁷ Yhangmoq lhunghâng bang zô gyí bùm kô é htâng má, haú chángzô pé gi, amyit ahtâng lé nyhit mung byîng shoq wó guq tsîng yu ashî kô nghut ri. ³⁸ Haú hkún

zô é bang má, myiwe wuì eq zoshâng wuì lé a nghap lhôm é za, yuqgè wuì baú myi hkyîng yuq bo ri. ³⁹ Yesuq gi, byù hpûng lé ló nhang pyâm é htâng má, lhaí má wang ji mù, Magadan mau shut dap e ló bê nghut ri.

16

Kumhá Dung Kô É Hkyô

Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng mâ é kumhá kut shit râ matù, dúng akô.

² Haû mù, Yhang gi, yhangmoq lé, "Nungmoq gi, myinhtâng jé jáng, 'Mau hpong râ nghut lhê, hkâsu mù gâ le, mauhkûng ne ri.' ga le, ³ napkyó lé nghut jáng, 'Hkûnyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yû kô é nghut kôhâng, shí ipyat lhê é kumhá lé gi, a sê gam hkoq yû kó nghut ri. ⁴ Agè ashop é eq lhum a zuí é ipyat shí gi, limik kumhá lé ho nyi akô; nghut kôhâng, Yonaq é kumhá mai lai luí, gotû haí le tûn shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É Múnchi

Mrk 8:14-21

⁵ Yhangmoq, nhông hé hpoq shut gû dap ló kô é hkún, haú chángzô pé gi, muk yu chûng râ lé tô-myhí pyâm akô. ⁶ Haú hkún, Yesuq gi, "Hparishe pé eq Saduke pé é múnchi lé, sidiq luí, koi pyâm nyi keq." ga, yhangmoq lé taí kat ri.

⁷ Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

⁸ Yhangmoq haú su taí lhûm nyi kô é lé Yesuq sé jáng, yhangmoq lé, "Lumjîng myit shaû é bang ê, muk a bo é hkyô lé, haí mù taí lhûm nyi akô lhú? ⁹ Ahkuí jé shoq, nungmoq gi, a sê gyo shi kó lhú? Muk ngo lông eq byù ngo hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, ¹⁰ muk nyhit lông eq byu myi hkyîng lé byi tsô é htâng, nungmoq hkâ-myhó mung wó dum guq tsîng yù kô é

lé le, nungmoq a myit bun kó lú? ¹¹ Ngò gi, muk eq séng luí taí é a nghut é lé, nungmoq, hkâsu mù a sê gyo kô é lú? Hparishe pé eq Saduke pé é múnchi lé koi pyám keq nghû taí é ru nghut lhê." ga taí ri. ¹² Haú hkûn sheq, Yhang taí é gi, muk má chung é múnchi lé koi pyám râ matú taí é a nghut e za, Hparishe pé eq Saduke pé é mhogshit hkyô lé koi pyám râ matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô
Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé taí akô lú?" ga myí ri.

¹⁴ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taí akô." ga tû taí kôjáng, ¹⁵ Yhang gi, "Haú jáng, nungmoq gi, Ngo lé ó yuq nghut lhê nghu akô lú?" ga, yhangmoq lé xoq myí ri.

¹⁶ Haú hkûn, Simun Petruq gi, "Nàng gi, rû dui nyi é Garai Gasâng é Yhangzo, Hkrisduq nghut ri." ga tû taí ri.

¹⁷ Haú mù, Yesuq tû taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tûn shit é gi, byù mai a nghut, mauhkûng htoq má nyi é Ngá é Îwa mai tûn shit é ru nghut lhê. ¹⁸ Ngò, nang lé taí lé, nàng gi, Petruq* nghut luí, luqgok shî má, Ngò, Ngá é noqkuq hpúng lé xuq to râ nghut mù, haú moming hkúmdong pé gi, hpúng haú lé wó ûng râ a nghut. ¹⁹ Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi râ nghut lhê." gâ ri. ²⁰ Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûm kat ri.

Yesuq Gi, Yhang Shî Râ Lé Hí Te Taí É Hkyô
Mrk 8:31–9:1; Luk 9:22-27

* **16:18** Grik đông Petruq gâ é gi, luqgok lé gâ é nghut lhê.

²¹ Yesuq gi, Yhang Yerusalem wà mó má ló mù, suwún wuî, hkyangjong agyi pé eq tarâ sará pé é loq má, zing-rí é myo myo hui zo luí, sat pyâm é hui ra râ nghut kôle, sum nyí nghû râ buinyi má, lhoq toq yu é hui râ nghut é hkyô lé, haú hkûn mai, Yhâng é chángzô pé lé taí kyo hi ló bê nghut ri.

²² Haú mù, Petruq gi, Yhang lé rahkyam shut shuí htoq yù mù, "Yhumsing ê, haú hkyô Náng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wú kat mù, Petruq lé, "Tsdán nàng, Ngá chyáng mai hpâng aq! Nàng gi, Garai Gasang eq séng é hkyô lé a myit e za, byù eq séng é hkyô lé za myit é sù nghut mù, Ngá é matú myit leqbat jowò nghut ri." ga taí ri.

²⁴ Hau htâng, Yhang gi, Yhâng é chángzô pé lé, "Ngá htâng cháng naú sù ó yuq nghut kôle, yhumsing gùng yhumsing hengik pyám mù, yhumsing é tapzîng lé waq chùng luí, cháng ra râ nghut lhê. ²⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôhang, Ngá é yanmai, yhumsing é asak sùm pyâm é sù kúm gi, asak wó yù râ nghut lhê. ²⁶ Byù gi, mingkan gón lé wó sing to kôhang, yhumsing é asak woi-nyí sùm byuq é nghut le gi, yhang é matú, hai akyû bò râ lú? Byù gi, yhumsing é asak woi-nyí lé, hai èq wó htaí yù râ lú? ²⁷ Haú Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkangmó lé, yhumsing kut lai bê eq rajung za akyû byi râ nghut lhê. ²⁸ Ngò, nungmoq lé teng za taí kôlé, ahkuí shí má yap to bang ra-am gi, haú Byu Yhangzo, Yhâng é mingdán eq jé lé lo é lé, a myang é za shî kó râ a nghut." ga taí ri.

17

Yesuq, Isâm Htaí Lo É Hkyô
Mrk 9:2-13; Luk 9:28-36

¹ Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chùng mù, yhangmoq baú myhang é bùm ralhum má doq ló akô.

² Haú má, yhangmoq é myoq hí tê má, Yesuq é ihpyô isâm htaî byuq mù, Yhâng é myoqdong gi, buì su duqbó tô é eq, Yhâng é mebu gi, maubó su hpyu zan tô ri. ³ Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dáng nyo lhûm nyi akô.

⁴ Haú mù, Petruq gi, Yesuq lé, "Yhumsîng ê, shí jowò má nga-nhúng nyi le ge ri. Nang ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum saí bá." ga taî ri.

⁵ Petruq dang ru taî nyi ashî le, duqbó é mhut gi, yhangmoq lé htup zíng lô mù, mhut hkaû mai htoq lo é htê gi, "Shí yuq gi, Ngò chiytdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

⁶ Haú su gâ é htê lé, chángzô pé wó gyo kôjáng, yhangmoq gi, gyuq nân mù, myigùng má gop bùm bekô nghut ri. ⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga taî ri. ⁸ Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹ Bùm mai taú gyó lô kô é hkûn, Yesuq gi, "Ahkuí nungmoq myang é hkyô lé, haú Byu Yhangzo shi é mai lhoq dui toq yu é a hui hui gi, ó lé le hkâtaî kyo kó." ga, yhangmoq lé taî hkûm tô ri.

¹⁰ Haú jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myî akô.

¹¹ Haú hkûn, Yesuq gi, "Eliyaq hí lé luí, lhunglhang lé hen lajâng to râ gâ é gi, têng lhê. ¹² Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôlé, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haú eq rajung za, haú Byu Yhangzo le, yhangmoq é loq má hpuzo râ nghut lhê." ga tû taî ri. ¹³ Haú hkûn sheq, Yhang taî nyi é gi, Wui-myhup Sará Yohan eq sêng é hkyô nghut é lé, haú chángzô pé sê gyô akô nghut ri.

Nat Wang Júng Sû Lé Lhoq Gê Byî É Hkyô Mrk 9:14-32; Luk 9:37-45

¹⁴ Yhangmoq, byù moq mó pè chyáng dum taú jé lô kô é hkûn, byù rayuq gi, Yesuq chyáng lé jé mù, hkyihput htuq luí, ¹⁵ "Yhumsîng ê, ngá é yuqzo lé shogyô yù laq; yhang gi, mhúngtuq tuq luí, gyai yhang jamjaû nyi ri. Myihkyóm má le, wui má le, anum num lêng wàng wàng dut nyi ri. ¹⁶ Yhang lé, Náng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga taî ri.

¹⁷ Haú mù, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga tû taî kat ri. ¹⁸ Yesuq gi, nat gang lé tân kat jáng, nat gang haú gi, yuqgè zo haú yuq chyáng mai htoq ló byuq bê nghut mù, haú hkûn jáng, yuqgè zo haú gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haú lé a wó hkat htoq é lhú?" ga, lé myi kôjáng, ²⁰ Yhang gi, "Nungmoq é lumjîng myit shaú é yanmai nghut ri. Ngò, nungmoq lé teng za taí kôlé, nungmoq é lumjîng myit angshi cham í za hkâlhang bò kô é nghut le gi, bùm shî lé, 'Hé shut htot ló aq.' ga taî le, htot râ nghut lhê. Nungmoq a wó kut é haí lhang joq râ a nghut. ²¹ Shí jung gi, kyûdung é eq zoshuq gám é dông za a nghut jáng, a htoq ló é nghut lhê.*" ga dum tû taî ri.

²² Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haú Byu Yhangzo gi, byu pé é loq má ap pyâm é hui zo râ nghut lhê. ²³ Haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyi nghû râ nyí má lhoq dui toq é hui râ nghut lhê." ga taî ri. Haú mù, haú chángzô pé gi, gyai yhang gyô yón nyi bekô nghut ri.

Noqkuq Yhûm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuî bang gi, Petruq chyáng

* **17:21** Chyúmbun shí gi, chyúmding myo myo má a bo é nghut lhê.

lé jé kômù, "Nungmoq é sará gi, noqkuq yhúm hkansê a kat lúhú?" ga myí akô.

²⁵ Petruq gi, "Kat lhê." ga tû taí ri.

Hau htâng, Petruq yhúm hkaú má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pê chyáng mai guq yu akô lúhú? Yhumsing byu pê chyáng mai lúhú? Haú a nghut jáng, góbâng chyáng mai lúhú? Nang, hkâsu wó myit lhê lúhú?" gâ ri.

²⁶ Haú mù, Petruq gi, "Góbâng chyáng mai nghut ri." ga tû taí jáng, Yesuq gi, "Haú su nghut le gi, yhumsing byu pé gi, lut akô nghut ri. ²⁷ Nghut kôlhang, yhangmoq é i-myit a ngón a dut kó sháng gaq, nhông má ê mù, ngo-nhe ê hkyô aq. Sâng-hi wó nhê yu é ngozô é nhut lé lêng há kat jáng, ngùn htingchap rachap lé myàng râ nghut lhê. Haú lé yù mù, Ngá é matú eq náng é matú, yhangmoq lé ló byi aq." ga taí ri.

18

Kô Dik Sû Gi, Ó Yuq Nghut Lhê Lúhú?

Mrk 9:33-37, 42-48; Luk 9:46-48; 17:1-2

¹ Haú hkûn, haú chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lhê lúhú?" ga myí akô.

² Yesuq gi, zoshâng zo rayuq lé wut yù mù, yhangmoq é gung gûng má shap to luí, ³ taí é gi, "Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuí su dut kô é za a nghut jáng, mauhkûng mingdán má hkâ-nhâm le wó wâng kó râ a nghut. ⁴ Haú mù, zoshâng zo shí yuq su, yhumsing é i-myit wó lhoq nyhum é sù ó yuq nghut kôle, mauhkûng mingdán má, kô dik sû nghut ri.

⁵ Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê. ⁶ Nghut kôlhang, Ngo lé lumjìng é zoshâng wuí mâ é rayuq yuq lé, mara kut shut nhang é sù gi, yhâng é lingzing má luqluí long mó tuí hut byi luí, nik é wuimau má, dú hkyô pyâm é huí é nghut le gi, yhâng é matú je gè râ nghut lhê.

⁷ Haú mingkan gi, byu pé lé mara kut shut nhâng jang joq é yanmai, dingnyé wó

ri. Haú mara kut shut nhâng hkyô gi, htoq lugù bê; nghut kôlhang, haú lé lhoq htoq sù gi, dingnyé wó ri. ⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyi hkúm loq hkúm gû dú hkyô pyâm é hui râ htoq má, hkyi loq a hkúm é za, asak wó yu é nghut le gi, náng é matú je ge ri. ⁹ Náng é myoqjí èq, nang lé mara kut shut nhang é nghut le gi, haú lé lap choq yù mù, dú pyám aq; myoqjí í jí dap gû ngaraí myi má dú hkyô pyâm é hui râ htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shí sù é zoshâng zo wuí mâ é rayuq lé lhang a wú tiq râ matú, sidiq nyi keq. Hkâsu mù gâ le, Ngò, nungmoq lé taí kôlé, mauhkûng mâ é yhangmoq é maumang lagyô pé gi, mauhkûng htoq mâ é Ngá Wâ é myoqdong lé, hkâ-nhâm le myang nyi akô. ¹¹ (Hkâsu mù gâ le, haú Byu Yhangzo gi, byuq byuq bê bang lé hkyi yù râ matú, jé lé é nghut lhê.)*

¹² Byù rayuq gi, sau rashô du wó é nghú sháng, sau haú gû mâ é radu byuq byuq é nghut jáng, haú gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi râ lúhú? Haú lé, nungmoq hkâsu wó myit ngam akô lúhú? ¹³ Ngò, nungmoq lé teng za taí kôlé, yhang gi, haú byuq byuq é sau haú lé myang ho é hkûn, a lám byuq é sau gaú xe gaú dû é matú gabú é htoq má, haú dû matú je riyhang gabú ri. ¹⁴ Haú eq rajung za, mauhkûng htoq mâ é nungmoq é Íwa gi, shí tiq bang mâ é rayuq htên byoq byuq râ lé lhang, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tûn shit aq. Yhang, náng é dang lé gyô é nghut jáng, nang gi, gumang rayuq dum wó bê nghut ri. ¹⁶ Nghut kôlhang, yhang, náng é dang lé a gyô é nghut jáng,

* **18:11** Bun zo shí gi, chyúmding myo myo má a bo é nghut lhê. ☆ **18:16** Tarâ Pun 19:15

'Mara hun é hkyô hkangmó lé, saksé í yuq sum yuq lóm jáng, wó lhoq teng sháng gaq.*¹⁶ gâ tô é eq rajung za, nàng, gotû byû ra-í yuq lé shuí chùng aq. ¹⁷ Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpûng é dang lé le a gyô é nghut jáng, yhang lé, a lumjîng é byû rayuq dông le, kang guq sù rayuq dông le sôn pyám aq.

¹⁸ Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkûng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi râ nghut lhê.

¹⁹ Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkûng htoq mâ é Ngá Wa gi, haú nhik lé gyo byi râ nghut lhê. ²⁰ Hkâsu mù gâ le, Ngá myîng lé lang luí, í yuq sum yuq zup zîng é jang hkâmá nghut kôlhang, haú bâng é gyoro má Ngò nyi lhê." gâ ri.

Shogyo Nihkmyin A Sê É Jùn Hpô É Dantú

²¹ Haú hkûn, Petruq gi, Yesuq chyáng huí é mù, "Yhumsîng ê, ngá é gumang, ngo lé mara kut shut é nghut le, yhang lé hkâm-yhó dâm mara hkyut byi ra râ lhú? Nyhit dâm jé shoq hkyut byi ra râ lhí?" ga myí ri.

²² Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lhê.

²³ Mauhkûng mingdán gi, yhumsîng é dui-nhâng zoshâng wui é jihpán lé jep nau é hkohkâm rayuq eq du ri. ²⁴ Yhang gi, jihpán lé jep hi ló é u lé, yhâng chyáng ngùn wan myo myo chyín dap to sù lé shuí lé lo akô.

²⁵ Haú yhumsîng hpó gi, haú yuq chyín a wó xap é yanmai, chyín wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyám râ hkunmó hkyô kat ri.

²⁶ Haú mù, dui-nhâng zoshâng haú yuq gi, yhâng é hí má hkyihput htuq luí, 'Ngo lé myit hîng byi shi laq; banshoq lé, ngò xap râ.' ga dúng tôngbán ri. ²⁷ Haú dui-nhâng zôshang é yhumsîng hpó gi, haú yuq lé wú

shogyo luí, chyín banshoq lhut pyám byi mù, nhang kat ri.

²⁸ Nghut kôlhang, dui-nhâng zoshâng haú gi, htoq ló mù, yhang lé, denari† rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyín hân xap aq!' ga taí ri.

²⁹ Haú hkûn, yhâng é luzúm dui-nhâng zoshâng haú gi, yhâng é hí má hkyihput htuq luí, 'Ngo lé myit hîng byi shi laq; ngò xap râ.' ga dúng tôngbán ri.

³⁰ Nghut kôlhang, yhang gi, a gyo byí e za, yhâng é chyín dum wó xap é hkûn jé shoq, haú yuq lé htóng hkyô pyám nhâng ri. ³¹ Gotû dui-nhâng zoshâng wui gi, haú hkyô lé myàng kôjáng, i-myit wú nô kôluí, yhangmoq é yhumsîng hpó lé, haú hkyô banshoq ló taí kyô akô.

³² Haú mù, haú yhumsîng hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng ê, nàng, ngo lé dúng tôngbán é yanmai, nàng, ngo lé dap é chyín banshoq lé, ngò lhut pyám byi bê nghut lhê mhai. ³³ Haú su é nhîng, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut lhú?' ga taí luí, ³⁴ yhang gi, nhikjum yo mù, yhâng é chyín ban xap é hkûn jé shoq, jamjau hui zo râ matú, yhang lé, htóng suwún pê chyáng ap byi pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le, nungmoq lé haú dông kut râ nghut lhê." gâ ri.

19

Myi Làng Gâng É Hkyô *Mrk 10:1-12*

¹ Yesuq gi, mhoqshit é dang haú pé lé ban taí jáng, Galile mau mai htoq ló mù, Yodan làng tû tap mâ é Yuda mau má é jé ri. ² Byû moq mó gi, Yhâng htâng cháng kô é nghut mù, Yhang gi, haú bang mâ é nòhpyo hui bang lé, haú má lhoq gê byí ri.

† 18:28 Denari rachap gi, ra-nyí lhê é byû rayuq é zuihpau eq wui ri.

³ Haú hkûn, Hparishe pé ra-am gi, Yhâng chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yhangmyi lé lhoq kang pyâm le, tarâ wang lhê lú?" ga myi akô.

⁴ Haú jáng, Yhang tû taí é gi, "A-nham sâng-hi lé, Hpân Sù, 'byu hpan é hkûn, yuqgè eq myiwe lé hpan é nghut lhê.'^{*}

⁵ 'Hau é yanmai, yuqgè gi, yhumsing é înu îwâ chyáng mai htoq luí, yhangmyi eq rahá rading ralhûm za kut nyí mù, yhangnhik gi, gungsho ralhûm za dut byuq kó râ nghut lhê.'^{*} ga kâ tô é lé, nungmoq a nghap wú kó lú? ⁶ Haú mù luí, yhangnhik gi, í yuq a nghut lô e za, rayuq za dut bê nghut ri. Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

⁷ Haú hkûn, yhangmoq gi, "Haú lé nhîng, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, haí mù, Mosheq, hkunmó hkyô tô lhê lú?" ga, Yhang lé dum taú myi akô.

⁸ Haú mù, Yesuq gi, "A-nham sâng-hi mai gi, haú dông a nghut. Nghut kôlhang, nungmoq é myit nhiklhûm htân kô é yanmai, nungmoq é yhangmyi pé lé lhoq kang râ ahkáng, Mosheq byí tô é ru nghut lhê. ⁹ Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kâng pyâm mù, myiwe gotû dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tû taí ri.

¹⁰ Haú hkûn, haú chángzô pé gi, "Myi làng hkyô má haú dông ru nghut le gi, a yu le lháng je ge nyo ri." ga taí akô.

¹¹ Haú mù, Yesuq gi, "Yuq hkangmó gi, dang haú lé wó hap yu é a nghut, wó hkâm râ jeju wó é bang za sheq, wó hap yu é nghut lhê. ¹² Byù ra-am gi, înú unghkaú mai yhang, yuqgè a jé gû hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yù sù gi, hap yù sháng gaq." ga dum taí ri.

*Zoshâng Wuì Eq Yesuq
Mrk 10:13-16; Luk 18:15-17*

¹³ Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haú chángzô pé kúm gi, haú shuí lé lô bang lé lhom tân hkûm akô nghut ri.

¹⁴ Nghut kôlhang, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, haú sù é bâng é mingdán ru nghut lhê." ga taí kat ri.

¹⁵ Yhang gi, zoshâng wui htoq má loq ke shimân byi mù, haú jowò mai htoq lô bê nghut ri.

*Sùt Wó É Zorâm Rayuq É Hkyô
Mrk 10:17-31; Luk 18:18-30*

¹⁶ Byù rayuq gi, Yesuq chyáng lé jé mù, "Sarâ é, ahtum abyuq é asak wó yù râ matú, ge é muzó hai kut ra râ lú?" ga myi ri.

¹⁷ Haú jáng, Yesuq gi, "Ge é hkyô eq séng luí, haí mù Ngo lé myí lhê lú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tarâ pé lé cháng aq." ga tû taí ri.

¹⁸ Haú yuq gi, "Hká gû lé lú?" ga dum myi jáng, Yesuq gi, "'Byù hkâsat, su-myi hkâlú, hkâhkau, a teng a mán é saksé hkâhkám, ¹⁹ nángnu nángwa lé hkungga aq,^{*} ga le, 'náng gûng lé náng chyitdap e su, náng é chyangnâm mâ é bang lé le chyitdap aq.'^{*} ga le bo tô ri." ga taí kat ri.

²⁰ Haú hkûn, zorâm hpó haú gi, "Haú pé banshoq lé, ngò cháng bê nghut lhê; haí kut râ ashí lú?" ga dum taú myi ri.

²¹ Yesuq gi, "Nàng, gumjup sù dut nau le gi, ló mù, nàng wó é sutzè pé lé ùng pyâm luí, myùng bang lé byí pyâm aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." ga tû taí ri.

²² Zorâm hpó haú gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq ló byuq bê nghut ri.

²³ Hau htâng, Yesuq gi, Yhâng é chángzô pé lé, "Ngò, nungmoq lé teng za taí kôlé, sutzè wó bang gi, mauhkûng mingdán wó wâng râ gyai yhang wui ri. ²⁴ Hau htoq agó, Ngò, nungmoq lé taí kôlé, sutzè wó sù rayuq, Garai Gasang é mingdán má wó

wâng rã htoq, gola-uq radu âpno mai wó wang lai rã gi, je lui rã nghut lhê." ga taí ri.

²⁵ Haú chángzô pé gi, haú su gã é lé wó gyo kôjáng, haú ru nghut le gi, ó yuq za hkyi yu é hui rã nghut lhê lú?" ga Yhang lé myí akô nghut ri.

²⁶ Haú hkûn, Yesuq gi, yhangmoq lé wú kat mù, "Haú hkyô lé byu mai gi, wó kut rã a nghut; nghut kôlhang, Garai Gasang gi, lhunglhang lé wó kut é Sũ nghut lhê." ga taí ri.

²⁷ Haú hkûn, Petruq gi, Yhang lé, "Ngamoq gi, wó é gũ lhunglhang lé tô pyâm to lui, Náng htâng cháng bê nghut lhê. Ngamoq, haí wá wó rã nghut lhê lú?" ga myí kat ri.

²⁸ Haú mù, Yesuq tũ taí é gi, "Ngò, nungmoq lé teng za taí kôlé, lhunglhang lé asik dum saí dut nhang é má, haú Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngã htâng châng é bang nungmoq le, hkohkâm-tanghkuq raxe í lhũm htoq má zùng to kômù, Israelaq amyũ raxe í hú lé jéyáng kó rã nghut lhê. ²⁹ Ngã é yanmai, yhumsing é yhũm, nhiktâng wui, ìnu ìwa, zo dù wui eq yò pé rajung jung lé tô pyâm tô é sũ ó yuq nghut kôle, rashô tú akyũ myo jat shoq wó rã nghut é htoq agó, ahtum abyuq é asak le, wó yũ rã nghut lhê. ³⁰ Nghut kôlhang, hí nghut nyi é bang myo myo gi, htâng gyó byuq kó rã nghut mù, htâng gyó nyi bang yuq gi, hí bekô rã nghut lhê.

20

Tsibiyiq Hkyâm Mũ Zui Bang Lé Dangtũ Yu É Hkyô

¹ Hkãsu mù gã le, mauhkũng mingdãn gi, yhumsing é tsibiyiq hkyâm má mũ zui nhang rã langchyang é lũng rã ga, napsũn noq le htoq e ló é hkyâm yhumsing eq du ri. ² Yhang gi, ra-nyí é matũ denari rachap byi rã dông, haú bang eq myit huí yũ mù, yhangmoq lé, yhâng é tsibiyiq hkyâm má nhang hâng kat ri.

³ Napkyó gau hkyíng* kô má, yhang gi, htoq e ló le, hai mũ le a kut é za, gài má yap tô é bang ra-am lé é myang ri. ⁴ Haú mù,

yhang gi, haú bang lé, 'Nungmoq le, ngã é hkyâm má mũ é zui keq; byi âng é ahpau, ngò, nungmoq lé byi rã nghut lhê.' ga taí jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myinhtâng sum hkyíng kô má le, dum htoq é mù, haú eq rajung za langchyang pé é lung kat ri. ⁶ Myinhtâng ngo hkyíng kô má, yhang dum htoq e ló wũ le, góbang ra-am le yap tô bum é lé, é myâng mù, haú bang lé, 'Nungmoq gi, haí le a kut é za, ra-nyí buí haí mù shi má yap tô bum akô lú?' ga myi jáng, ⁷ haú bang gi, 'Ngamoq lé, ó yuq eq le a lũng kô é yanmai nghut lhê.' ga tũ taí akô.

Haú hkûn, yhang gi, 'Nungmoq le, ngã é hkyâm má mũ é zui keq.' ga taí ri.

⁸ Myinhtâng jé jáng, tsibiyiq hkyâm yhumsing gi, yhâng é mũ shuí u sũ lé, 'Haú langchyang pé lé ji yũ mù, je htâng má lung yu é bang mai hí lui, sâng-hi lung yu é bang jé shoq, mũ zui hpau byi aq.' ga taí ri.

⁹ Myinhtâng ngo hkyíng má mũ wàng bang le, denari rachap chap wó yu bum akô. ¹⁰ Haú mù, je hí má mũ wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri. ¹¹ Yhangmoq gi, haú myhó za wó yu bũm kô é yanmai, haú hkyâm yhumsing lé, ¹² 'Shi bang gi, je htâng má mũ lé wâng mù, nayí rahkum za mũ zui kôlhang, nãng gi, ra-nyí buigyũm chap buí htân yò má mũ zui é bang ngamoq eq rajung za byi ri.' ga mara hũn dang taí akô.

¹³ Nghut kôlhang, haú hkyâm yhumsing gi, haú bang má é rayuq lé, 'Buinũm hpó é, ngò, nang lé a tarã é dông kut é a nghut. Denari rachap byi rã nghũ, nãng eq ngò myit huí to bê a nghut lú?' ¹⁴ Nãng wó âng é lé yu chũng mù, ló aq. Je htâng má mũ lé wang é sũ lé le, nang lé byi é myhó, ngò byi nau ri. ¹⁵ Ngã é ngũn lé, ngò kut nau é su a ge kut lú? Ngò, ge é kut le, nãng manôn ri lú?' ga taí ri.

¹⁶ Haú mù lui, htâng gyó nyi bang gi, hí bekô rã nghut mù, hí nghut nyi bang gi, htâng gyó byuq kó rã nghut lhê." gã ri.

* **20:3** Chyũmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.

Yesuq Gi, Yhang Shî Râ Hkyô Lé Dum Tai Ri

Mrk 10:32-34; Luk 18:31-34

¹⁷ Ahkuî, Yesuq gi, Yerusalem wà mó shut doq ló nyi é u lé, haû chángzo raxe í yuq lé, gotû kut wut yù mù, ¹⁸ "Nga-nhúng gi, Yerusalem wà mó shut doq ló nyi lê; haû Byu Yhangzo gi, hkyangjong agyi pé eq tarâ sará pê é loq má ap byî pyâm é hui râ nghut lê; haú bang gi, Yhang lé, shî râ mara byi kó râ nghut é htoq agó, ¹⁹ jóng pyâm é, nhuq bat é eq tapzîng má jén sat pyâm é hui râ matú, haû tûngbaù pê é loq má ap pyâm kó râ nghut lê. Nghut kôlhang, Yhang gi, sum nyí nghû râ buinyi má, lhoq dui toq é dum hui râ nghut lê." ga tai ri.

Zô Nhik Matú Ênu Êq Dung Byî É Hkyô

Mrk 10:35-45

²⁰ Hau htâng má, Zebedi é yhangzô nhik-tang é yhângnu gi, yhangzô nhik eq rahá lé lé lô kômù, rajung dung râ matú, Yesuq é hí má hkyihput htuq nyi ri.

²¹ Haû mù, Yesuq gi, "Nàng, haî ô nau ri lú?" ga yhang lé myi jáng, yhang gi, "Náng é mingdán má, shî ngá zô nhiktâng lé, Náng é loqyò hkyam má rayuq, loqpaî hkyam má rayuq kut, zùng râ ahkáng byi laq." ga tai ri.

²² Haú hkûn, Yesuq gi, "Nungnhik haî dúng nyi é lé, nungnhik a sé kó nghut ri. Ngò shuq râ góm† lé, nungnhik wó shuq kó râ lú?" ga myi jáng, yhangnhik tâng gi, "Wó shuq lê." ga tû tai akô nghut ri.

²³ Haû mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lê. Nghut kôlhang, Ngá é loqyò, loqpaî hkyam má zùng râ ahkáng lé gi, Ngò byî jung a nghut. Jowò haú pé gi, Ngá Wa hen to byi bâng é matú za ru nghut lê." ga tai ri.

²⁴ Gotû chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri. ²⁵ Haû mù, Yesuq gi, yhangmoq banshoq bang lé wut tsîng yù luî, "Tûngbaù pé lé uphkang é ga bang gi, tûngbaù pé lé up zô nyi kô é hkyô lé le, haû eq rajung za, yhangmoq é ming up suwún wuî le, yhumsing é ahkáng ayá lé chùng mù, up zô nyi kô é hkyô lé le, nungmoq sê lê.

²⁶ Nungmoq chyáng gi, haû su a dut kó sháng gaq; haû Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyâm râ matú sheq, jé lé é ru nghut é su, ²⁷ nungmoq má, byù mó dut nau sù ó yuq nghut kôle, nungmoq é dui-nhâng zoshâng dut ra râ nghut lê. ²⁸ Hau htoq agó, nungmoq má ushuq dut nau sù ó yuq nghut kôle, nungmoq é jùn dut ra râ nghut lê." ga tai ri.

Myoqjit Í Yuq Myoq Dum Myang É Hkyô

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má châng e ló bum akô. ³⁰ Haû hkyô yàm má zung tô é myoqjit í yuq gi, Yesuq lai ló nyi é hkyô lé wó gyo kôjáng, "Dawiq é Yhangzo, Yhumsîng ê, ngá-nhik lé shogyô yù laq ô!" ga, wut garû kat akô nghut ri.

³¹ Byù moq mó gi, yhangnhik zîm byuq râ matú tân hkúm kôlhang, yhangnhik gi, "Dawiq é Yhangzo, Yhumsîng ê, ngá-nhik lé shogyô yù laq ô!" ga, je riyhang htê mó èq wut garû kat akô nghut ri.

³² Haû mù, Yesuq gi, yap kat mù, "Ngò, nungnhik lé haî kut byi râ ô nau akô lú?" ga, yhangnhik lé wut myi kat ri.

³³ Haú hkûn, yhangnhik gi, "Yhumsîng ê, ngá-nhik myoq myàng nau ri." ga tû tai akô.

³⁴ Yesuq gi, yhangnhik lé wú shogyo luî, yhangnhik é myoqjí má é záng byi ri. Haú hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

21

Yesuq, Yerusalem Wà Mó Má Wang E Lô É Hkyô

Mrk 11:1-11; Luk 19:28-38; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm mâ é Bethpage wà má jé ló kôjáng, Yesuq gi, chángzo í yuq lé, ² "Nungnhik, hí mâ é wà má é keq; wà haú má, logúng zîng radu lé, logúng zo eq rahá tuî to lánng é lé, ê myàng kó râ nghut lê; haú

† 20:22 Góm gá é gi, Yesuq, jamjau hui râ hkyô eq shî râ hkyô lé, tai nau é nghut lê.

lé hpyi yù mù, Ngá chyáng she lò keq. ³ Byù rayuq yuq, nungnhik lé rajung jung gâ lò jáng, 'Shí í du lé, haù Yhumsing chùng rã ri.' gâ nghù tú tá keq; haù jáng, yhang, radá dâm nhâng byi rã nghut lhê." ga Yesuq tá luí, nhang kat ri.

⁴ Haù gi, myiqhtoi dang lhoq dik rã matú dut lo é nghut ri. ⁵ Myiqhtoi dang haù gi, "Zi-un byizo* lé, shí su nghù keq; 'Wú aq, náng é hkohkâm gi, nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'" ⁶ Haù chángzô nhik gi, e ló mù, Yesuq tá kat é eq rajung za é kut bekô nghut ri. ⁷ Yhangnhik gi, logúng me lé she lò mù, yhangnhik é buhîng pé lé, haù logúng mē é htoq má ke byi kôjáng, Yesuq gi, doq jì ri. ⁸ Byù moq mó mâ é myo myo gi, yhangmoq é buhîng lé, hkyô má hkyut hkang byi akô; ra-am gi, mhanding pé lé zân hkyô yù mù, hkyô má hkang byi akô nghut ri. ⁹ Yhâng é hí má htâng má châng sô nyi bum é bang gi, "Dawiq é Yhangzo gi, hosana† nghut nyi sháng gaq ô!" "Haù Yhumsing é mying mai jé lé lô Sû gi, hkungsô wó nyi sháng gaq ô!" ¹⁰ "Htoq tsáng myhâng má, hosana nghut nyi sháng gaq ô!" ga luí, tá garú bum akô nghut ri.

¹⁰ Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê là?" ga luí, myi lhùm bum akô. ¹¹ Haù hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga tá akô nghut ri.

Yesuq, Noqkuq Yhùm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

¹² Yesuq gi, noqkuq yhùm má wang ê mù, haù mâ é zè ung zè wuì kut nyi é bang banshoq lé, hkat htoq pyám luí, ngùn htaì zo bâng é siboì pé eq hpúngkyui ung zo bâng é tanghkuq pé lé, tu mhuq pyám byi

ri. ¹³ Haù hkûn, Yhang gi, "Ngá yhùm gi, kyûdung yhùm ga rã nghut lhê." ¹⁴ ga kâ to kôhang, nungmoq gi, jowò shí lé 'damyag hkyûng' ¹⁵ kut nyi akô." ga, yhangmoq lé tá ri.

¹⁴ Yesuq, noqkuq yhùm má nyi tô é hkûn, myoqjit bang eq hkyi hten bang Yhâng chyáng lé lô kômù, Yhang gi, haù bang lé lhom lhoq gē byi ri. ¹⁵ Nghut kôhang, hkyangjong agyi pé eq tarã sarã pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhùm má zoshâng wuì garú nyi bùm kô é lé le, myàng kôjáng, wú nhik-yô bum akô nghut ri.

¹⁶ Haù mù, yhangmoq gi, "Zoshâng shí bang haì tá nyi kô é lé, Nàng wó gyô lhê lú?" ga, Yesuq lé myi kôjáng, Yhang gi, "Wó gyô ri. Nungmoq gi,

"Zoshâng wuì eq nyheqnú pē é nhut mai hkyã-on kungtôn rã matú, náng lajâng to bê nghut ri." ¹⁷ ga kâ tô é lé, Chyúmdang má a nghap wú kó lú?" ga yhangmoq lé tá ri.

¹⁷ Hau htâng má, Yhang gi, haù bang lé nyhi to luí, wà hkaù mai htoq ló mù, Behtani wà má ê jé luí, haù myîn, haù má bíng yu ri.

Maihpáng Gâm Nyhuí Kyuq Shi Byuq É Hkyô

Mrk 11:12-14, 20-24

¹⁸ Yhang gi, htang napkyó noq le, Yerusalem wà mó shut dum taù ló é hkûn, hkyô má zòmut hui bê nghut ri. ¹⁹ Haù mù, Yhang gi, hkyô yàm má yuq tô é maihpáng gâm lé myang kat mù, chyáng e wú le, ahaq mai lai luí, haì lé le a myàng nghut ri. Haù mù, Yhang gi, shigâm haù lé, "Nàng má, hkâ-nhám le ashi a zui sháng gaq." ga tá kat ri. Haù hkûn jáng, agàm haù gi, nyhuí kyuq shi ló byuq bê nghut ri.

²⁰ Haù chángzô pé gi, haù lé myàng kôjáng, maú byuq kômù, "Maihpáng gâm shí gi, haì mù haù-í hân nyhuí kyuq shi ló lhê là?" ga myi akô.

* **21:5** Zi-un byizo gâ é lichyúm gi, Yerusalem byu pé gâ é nghut lhê. [†] **21:9** Hebre dang má, hosana gâ é gi, "ahkuì hkyi yù laq" gâ é nghut lhê. Nghut kôhang, bun zo 9 má gi, hkyã-on dang dông chung é nghut lhê. [☆] **21:9** Hkyã-on 118:26 [☆] **21:13** Esai 56:7 [☆] **21:13** Yer 7:11 [☆] **21:16** Hkyã-on 8:2

²¹ Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjínng kô é nghut le gi, maihpáng gâm má Ngò kut é muzó lé, nungmoq wó kut kó rá nghut é htoq agó, bùm shí lé, 'Htot mù, wuimau má ló gyó wâng aq.' ga taí jáng, taí é eq rajung za dut rá nghut lhê. ²² Nungmoq, lumjínng myit èq dung kô é nghut jáng, haí dúng le le wó yú kó rá nghut lhê." ga tú taí ri.

Yesuq É Ahkáng Ayá Lé Myî Chyam É Hkyô

Mrk 11:27-33; Luk 20:1-8

²³ Yesuq gi, noqkuq yhâm wàng hkaû má wang ê mù, mhoqshit nyi é hkûn, hkyangjong agyi pé eq mingbyu é suwún wuî gi, Yhâng chyáng lé jé kômù, "Hai ahko ahkâng èq, Nang, shí pé lé kut nyi lhê lhú? Ahko ahkáng shí, Nang lé ó yuq byî é lhú?" ga myî akô.

²⁴ Haú hkûn, Yesuq gi, "Ngò le, nungmoq lé rajung myî wú kôlé, nungmoq wó tú taí kô é nghut jáng, hai ahko ahkâng èq, Ngò, shí pé kut é hkyô lé taí kyo rá nghut lhê. ²⁵ Yohan byî é baptisma gi, ó yuq é ahko ahkáng mai nghut lhê lhú? Mauhkûng mai lhú? A nghut jáng, byu chyáng mai lhú?" ga taû myî kat ri.

Haú hkûn, yhangmoq, chôm hpyê lhum kô é gi, "'Mauhkûng mai nghut lhê.' nghû, nga-nhúng taí jáng le, 'Haú nghut le nhîng, haí mù, yhang lé a lumjínng kô é lhú?' ga rá nghut; ²⁶ 'Byu chyáng mai nghut lhê.' nghû jáng le, yhangmoq lhunglhâng bang gi, Yohan lé, myiqhtoi rayuq ga lumjínng bùm kô é nghut lhê yanmai, haú bang lé, nga-nhúng gyuq rá lhê nghut.'" gâ akô.

²⁷ Haú mù, yhangmoq gi, Yesuq lé, "Ng-amoq a sé." ga tú taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtú Yu É Hkyô

²⁸ Yesuq xoq taí é gi, "Nungmoq hkâsu wó myit akô lhú? Byù rayuq gi, yuqzo í yuq wó ri. Yhang gi, ko sù yuq chyáng ê mù, 'Ngá zo ê, nàng, hkû-nyí tsibiyiq hkyâm má mù é zui aq.' ga taí jáng, ²⁹ yuqzo haú gi, 'Ngò a

kâm ê.' ga tú taí ri; nghut kôlhâng, htâng má, yhang gi, myit dum lhîng mù, ê bê nghut ri.

³⁰ Hau htâng, yhângwa gi, yhang zo tiq sù yuq chyáng ê mù, rajung za ga ê dum taí jáng, yuqzo haú gi, 'Ê rá, âwa!' ga yín yû kôlhâng, a ê kut ri.

³¹ Haú nhiktâng mâ é hká yuq sheq, yhângwa ô nau é hkyô lé kut sù nghut ri lhú?" gâ ri.

Haú hkûn, yhangmoq gi, "Ko sù nghut ri." ga tú taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhî pé gi, Garai Gasâng é mingdán má, nungmoq a wàng shimá, wang ló nyi bùm kó rá nghut lhê. ³² Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shit kôlhâng, nungmoq gi, yhang lé a jínng kut akô nghut ri; nghut kôlhâng, haú kang guq bang eq shiwa myhî pé gi, yhâng dang lé jínng akô nghut ri. Nungmoq gi, haú hkyô lé myang é nghut kôlhâng, myit a lhîng kô é htoq agó, yhang lé a lumjínng shi kó nghut ri.

Tsibiyiq Hkyâm Saí Bang Lé Dangtú Yu É Hkyô

Mrk 12:1-12; Luk 20:9-19

³³ Gotû dangtú lé gyô wú shi keq; hkyâm yhumsîng rayuq gi, tsibiyiq hkyâm ralhum saí to mù, lhîngkyuq kyâm to luî, tsibiyiq wing pyik htoq rá dongkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri. ³⁴ Kyôshu yoq jé jáng, yhang gi, yhang eq sêng é tsibiyiq shi é yû rá matú, yhâng é dui-nhâng zoshâng wuî lé, haú hkyâm saí zo bâng chyáng nhang kat ri.

³⁵ Haú hkyâm saí zo bang gi, dui-nhâng zoshâng wuî lé, lhom chyup yû kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok èq lhom dú sat pyám, kut akô nghut ri. ³⁶ Hau htâng má, yhang gi, hî dam lhê htoq je myo shoq gotû dui-nhâng zoshâng wuî lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri. ³⁷ Ló htâng má, yhang gi, 'Ngá zo lé gi, yhangmoq

lhom hkungga kó râ nghut lhê.' ga, yhang zo lé, haú bang chyáng nhang kat ri.

³⁸ Nghut kôlhang, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yù râ sù nghut lhê; lé keq, yhang lé sat pyám mù, yhang é silí wunlí lé yu pyám byi sháng.' ga, rayuq eq rayuq taí lhúm bum akô nghut ri. ³⁹ Haú mù, yhangmoq gi, yhang lé, chyup yù luí, hkyâm shinggan shut dú htoq kômù, sat pyám bekô nghut ri.

⁴⁰ Haú mù luí, tsibiyiq hkyâm yhumsing lé jé é hkûn lé, haú hkyâm saí zo bang lé hkâsu kut nhô ngam akô lúhú?" ga Yesuq myí ri.

⁴¹ Haú hkûn, haú hkyangjong agyi pé eq suwún wuî gi, "Haú agè ashop bang lé gi, agè ashop é đông sat pyám râ nghut lhê. Haú tsibiyiq hkyâm lé gi, kyô shu yoq má, yhang é gambùm lé byi râ bang lé, htot ngho byi pyám râ nghut lhê." ga, tû taí akô nghut ri.

⁴² Haú jáng, Yesuq dum taí é gi, "Chyúmdang má, 'Yhúm saí bâng eq hkyin htoq pyâm é luq-gok gi, htungchyûn má é ahkyak dik é luqgok dut bê.

Shí hkyô gi, haú Yhumsing kut é nghut luí, nga-nhung é myoq hí má mauhpo dut bê nghut ri.'*

ga bo tô é lé, nungmoq a nghap wú kó lúhú?

⁴³ Haú mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashi wó zui râ byuhú lé byi pyám râ nghut lhê. ⁴⁴ Luqgok haú má gyó záng é sù gi, gyuí gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." gâ ri.

⁴⁵ Hkyangjong agyi pé eq Hparishe pé gi, haú Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri. ⁴⁶ Haú mù, yhangmoq gi, Yhang lé chyup yù râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

22

*Myiháng Poí Dangtú Pé
Luk 14:15-24*

* 21:42 Hkya-on 118:22-23

¹ Yesuq, dangtú pé đông yhangmoq lé dum taí é gi, ² "Mauhkûng mingdán gi, yhumsing yhangzô é matú myiháng poí hen lajâng to byi é hkohkâm rayuq eq du ri.

³ Hkohkâm hpó haú gi, yhang ji tô é bang, haú poí má lé lô râ matú, yhang é dui-nhang zoshâng wuî lé ê tsing taí nhang ri; nghut kôlhang, haú bang gi, a lé kut akô nghut ri.

⁴ Hau htâng má, yhang gi, gotú dui-nhang zoshâng wuî lé, 'Ngò haí le hen to bê; ngá é no eq xu-myum é gau-nyhaú pé lé sat mù, jung hkangmó rì rì nghut to bê. Myiháng poí má lé lò keq hkoi nghu, haú ji tô é bang lé ê taí keq.' ga pyîng luí, nhang kat ri.

⁵ Nghut kôlhang, haú ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dینگá hkyô shut é byuq bekô nghut ri.

⁶ Ra-am dum nghut jáng, yhang é dui-nhang zoshâng wuî lé lhom chyup yù kômù, nhuq bat luí, sat pyám byi akô nghut ri. ⁷ Haú mù, hkohkâm gi, nhikjum yo luí, yhang é gyezô pé lé, haú byù sat bang lé sat pyám nhang mù, yhangmoq é myuq lé nyhê hkyô pyám nhang ri.

⁸ Hau htâng má, yhang gi, yhang é dui-nhang zoshâng wuî lé, 'Myiháng poí gi, rì rì nghut to bê; nghut kôlhang, haú ji to huí é bang gi, lé râ a gingdán kó nghut ri. ⁹ Haú mù, hkyô kang pé má ê luí, myang é yuq hkangmó lé, poí má lé râ matú é jì keq.' ga taí ri. ¹⁰ Haú jáng, dui-nhang zoshâng haú bang gi, hkyô kang pé má htoq ê luí, myang é byù gè byù gang lhunglhang lé ji tsing yù kô é nghut mù, myiháng poí gi, bing pé zung byíng bùm bê nghut ri.

¹¹ Nghut kôlhang, bing haú bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri. ¹² Haú mù, yhang gi, haú yuq lé, 'Buinùm hpó ê, nàng gi, myiháng poí wàng hking le a wut é nhing, shí má hkâsu kut wang lo é lúhú?' ga myi jáng, haú yuq gi, haí le a dat tû taí lo nghut ri.

¹³ Haú hkûn, hkohkâm hpó gi, yhang é dui-nhang zoshâng wuî lé, 'Yhang é hkyí loq má tui luí, haú ngaubiyi ngaù nhap eq zui kyik kyik shoq hpuzô nyi râ nghut é

shinggan mauchut hkaû má, dú htoq pyám keq.' gâ ri.

¹⁴ Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaú ri." gâ ri.

Kehtaq Lé Kang Kat Byî É Hkyô

Mrk 12:13-17; Luk 20:20-26

¹⁵ Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyî dâ akô nghut ri. ¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é đông mhoqshit é sù nghut é lé le, Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷ Haú mù, hkoséng Kehtaq lé kang kat byî le gi, ge lhê lú? A gè lú? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haí mù, Ngo lé lé chyam wú akô lú? ¹⁹ Kang kat râ ngùn htingchap rachap, Ngo lé byi wú keq." ga taí kat ri. Haú hkûn, yhangmoq gi, denari rachap yù byi akô. ²⁰ Haú mù, Yhang gi, yhangmoq lé, "Shí má, ó yuq é alhô eq masat laiká dap tô ri lú?" ga myi jáng, ²¹ yhangmoq gi, "Kehtaq é nghut ri." ga tû taí akô. Haú mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí kat ri.

²² Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myî Chyam É Hkyô

Mrk 12:18-27; Luk 20:27-40

²³ Haú nyí má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. ²⁴ Yhangmoq myi kô é gi, "Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng

lé, Mosheq taí tô é nghut lhê. ²⁵ Hí hpyang lé, ngamoq chyáng, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri. ²⁶ Haú eq rajung za, Lanong, Lalaq mai Lahkâ jé shoq, chuimó haú lé gon luí, ó le zo dù a dap é za shi ló byuq bùm bekô nghut ri. ²⁷ Ló htáng má, myiwe myhí haú le châng shi ló byuq bê nghut ri. ²⁸ Haú mù luí, haú dum dui toq é buinyi má, myiwe myhí haú gi, haú nhiktâng wui nyhit yuq mâ é hká yuq é yhangmyi nghut râ lú? Hkâsu mù gâ le, yhang gi, haú nhiktâng wui banshoq bâng é yhangmyi dut wú bê sù nghut ri." gâ akô.

²⁹ Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri. ³⁰ Haú dum dui toq é buinyi má gi, myi byi myi yù hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. ³¹ Shi é mai dum dui toq bang eq séng luí, ³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.' ga, nungmoq lé taí tô é lé, nungmoq a nghap wú kó lú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taí ri.

³³ Byù moq mó gi, dang haú wó gyo kôjáng, Yhang mhoqshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô. ³⁵ Yhangmoq má bo é tarâ sarâ rayuq gi, Yesuq lé chyam wú é đông, ³⁶ "Sarâ ê, jep é tarâ má, hká lhum gi, je ahkyak dik lhê lú?" ga myî ri.

³⁷ Haú mù, Yesuq gi, "Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq eq, chyitdap râ lhê.' ga é nghut lhê. ³⁸ Tarâ haú gi, je hí lhum eq je ahkyak dik é lhum nghut lhê.

39 Hau htang lhum le haû eq du é nghut mù, 'Náng gùng lé nàng chyitdap é su, náng é chyangnâm mâ é bang lé le chyitdap aq.'*
gâ é nghut lhê. 40 Tarâ haû í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yhang lé taî kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

41 Hparishe pé zup zîng to kô é hkûn, Yesuq gi, yhangmoq lé, 42 "Nungmoq gi, Hkrisduq eq séng luî hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tû taî akô.

43 Haû mù, Yhang gi, yhangmoq lé, "Haû hkûn, Dawiq gi, Woi-nyí dông mai, Yhang lé, 'Yhumsîng' ga, haî mù wut lhê lhú? Hkâsu mù gâ le, Dawiq taî é gi,

44 'Haû Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq,

Ngá é loqyo hkyam shut zung nyi shi aq." ga taî ri.*

gâ ri. 45 Haû mù, Dawiq yhang lháng, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lhú?" ga taî ri. 46 Haû mù, ó yuq le, dang rahkun lháng a wó tû taî lo kô é nghut mù luî, haû nyí mai, ó yuq lháng Yhang lé dangmyi a wám myi lo kô nghut ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

1 Hau htang, Yesuq gi, byù moq mó eq Yhâng é chángzô pé lé taî é má, 2 "Tarâ sará pé eq Hparishe pé gi, Mosheq é tanghkuq má zung akô. 3 Haû mù, yhangmoq mhoqshit é hkyô chângjup lé, nungmoq châng kut ra kó râ nghut lhê. Nghut kôlhâng, yhangmoq kut é dông gi, hkâkut kó; hkâsu mù gâ le, yhangmoq gi, yhangmoq taî é dông a kut kó nghut ri. 4 Yhangmoq gi, byu pé é goqsân má wòlai ke byi kôlhâng,

yhangmoq yhang gi, wò haû pé lé bo waq râ matú, loqnyhui lháng a kâm lhoq tuî kô nghut ri.

5 Yhangmoq kut é hkyô lhunglháng gi, byu pé myàng râ matú za kut shit é nghut akô; haû chyûmbun bo é showuî-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri; 6 yhangmoq gi, poî pé mâ é réng é jowò pé eq tarajong pé mâ é ahkyak dik é zùng jang pé má, myang zùng râ lé ô nau nyi akô; 7 yhangmoq gi, gai pé má lhom shi-kyâm yù kó râ eq, byu pé mai, yhangmoq lé, 'Rabai'* ga lhom wut kó râ lé ô nau nyi bum akô.

8 Nungmoq kúm gi, 'Rabai' ga wut râ lé hkâ-ô nau kó; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. 9 Haû mù, myidàm htoq má, ó yuq lé le, 'âwa' hkâ-nghú kó; hkâsu mù gâ le, mauhkûng htoq mâ é Íwa rayuq za, nungmoq é Íwa nghut lhê. 10 Hau htoq agó, 'sará' ga wut râ lé, hkâ-ô nau kó; hkâsu mù gâ le, Hkrisduq za, nungmoq é Sará nghut lhê. 11 Nungmoq mâ é je gyaú sù gi, nungmoq é dui-nhâng zoshâng dut râ nghut lhê. 12 Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhûm sù kúm gi, waq toq é hui râ nghut lhê.

13 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pé hí má, mauhkûng mingdán hkyô lé xaû tô akô; nungmoq yhang le a wàng kó, wàng nau nyi bang lé le a wàng nhâng kó nghut ri. 14 (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, chuimó pé é yhûm-yò pé lé hpyoq zo hpyoq shuq é eq kyû hîng hîng dúng shit mhaû é bang nghut akô; haû mù, dam byi é je myo hui zo kó râ nghut lhê.)†

15 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byù rayuq

* 22:39 Nhung 19:18 * 22:44 Hkya-on 110:1 * 23:7 Aramaik dang dông rabai gâ é gi, sará gâ é lichyûm nghut lhê. † 23:14 Chyûmding ra-am má gi, bun zo 14 shí a bo é nghut lhê.

lé nungmoq é noqkuq htông má wó lhoq lhik yû râ matú, myi hkyô, wui hkyô, châng jón wún kômù, wó lhoq lhik yu é sù lé gi, nungmoq su ngaraî byù í tú shuî dut akô nghut ri.

¹⁶ Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhùm lé lang luî dakam é sù gi, haî a ra; noqkuq yhùm mâ é hîng lé lang mù dakam é sù kúm gi, cháng ra bê.' ga lhaq taî akô. ¹⁷ Myoqjit é byù nâ pé ê! Haû hîng eq hîng lé lhoq yúnglhô é noqkuq yhùm gi, hká lhum je ahkyak lhê lú? ¹⁸ Hau htoq agó, nungmoq gi, 'Haû hkungga gyap lé lang luî dakam é sù gi, haî a ra, nghut kôlhang, haû hkungga zè lé lang mù dakam é sù gi, cháng ra bê.' ga le, lhaq taî akô nghut ri. ¹⁹ Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lú? ²⁰ Haû mù, haû hkungga gyap lé lang luî dakam é sù gi, haû hkungga gyap eq hau é ahtoq má ke tô é zè banshoq lé lang luî dakam é sù dut bê nghut ri. ²¹ Noqkuq yhùm lé lang luî dakam é sù gi, haû noqkuq yhùm eq haû má nyi é Sù lé lang luî dakam é sù dut bê nghut ri. ²² Hau htoq agó, mauhkûng lé lang luî dakam é sù gi, Garai Gasâng é tanghkuq eq haû má zung é Sù lé lang luî dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shingtón, bantsaî, hpakkyí pé mâ é xê gambùm ragambùm lé gi, byî nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaî pyâm tô akô nghut ri. Hî lhum lé kut é su, htang lhum lé le kut râ lhê. ²⁴ Hkyô-u she é myoqjit pé ê! Nungmoq, pyup lé gi, jân pyâm kômù, gola-uq lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri. ²⁶ Hparishe myoqjit pé ê! Zo hkoq shuq

góm é ahte lé hí chí yúng pyám keq, haû jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akô; haû pé gi, ahtoq má wú yúng kôlhang, ahkaû má gi, mâng bup showui pé eq achayut é chângjup byíng tô é nghut ri. ²⁸ Haû eq rajung za, nungmoq gi, byu pé hí má, ahtoq pyâm dingmán é su kut shit kôlhang, ahkaû má gi, gegùn labyoq kut é eq agè ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoî pé é lup lé luptsuq tsuq kômù, dingmán bâng é lup pé lé mhón byi kôluî, ³⁰ Ngamoq gi, ngamoq é îchyí îwa pé é ipyat má nyi âng é ru nghut le gi, haû myiqhtoî pé é sui lhoq shun é bang má, ngamoq bo lòm râ a nghut.' ga lhaq taî akô. ³¹ Haû su mù, nungmoq gi, haû myiqhtoî pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri. ³² Haû mù, nungmoq é îchyí îwa pé hi tô é muzó lé, banshoq châng kut pán keq!

³³ Lhangmuî pé ê, duq htân lhangmuî amyû pé ê! Ngaraî mîng é dam byi hkyô mai, hkâsu wó hfang lut kó râ lú? ³⁴ Hau é yanmai, myiqhtoî pé, hpaqchyî bò bang eq chyúm sará pé lé, Ngò, nungmoq chyáng nhang kat râ nghut lhê. Haû bang mâ é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rî wún kó râ nghut lhê. ³⁵ Hau é yanmai, haû dingmán sù Abelaq é sui mai hî luî, noqkuq yhùm eq hkungga gyap gyoro má nungmoq sat pyám é, Berehkiq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê. ³⁶ Ngò, nungmoq lé teng za taî kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoî pé lé sat pyám pyám kut mù, náng chyáng

nhang kat é bang lé luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaù má tsìng lhùng yu é su, nungzô pé lé, Ngò, hkâ-myhó dâm shuí tsìng yù nàù kôlhang, nàng a dóng nghut ri. ³⁸ Wú keq, nungmoq é yhùm gi, nungmoq é matú chamchuyiui dut pyâm to berâ nghut lhê. ³⁹ Hkâsu mù gà le, Ngò, nungmoq lé taí kôlé, 'Yhumsing é myìng mai jé lé lo é Sù gi, hkungsô wó nyí sháng gaq.'* ga, nungmoq a taí taí gi, Ngo lé wó myâng kó rà a nghut lo." gà ri.

24

Ló Htàng Buinyì Má Dut Lò Râ Hkyô

Mrk 13:1-31; Luk 21:5-33

¹ Yesuq gi, noqkuq yhùm mai htoq e ló é u lé, Yhâng é chángzô pé gi, Yhâng é nàm má huí lé lô kômù, haù noqkuq yhum é loqmú pé lé tûn shit akô. ² Haù hkûn, Yesuq gi, yhangmoq lé, "Haù pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok haù pé gi, rachâm htoq racham lhang a kê lhum loshoq, hpyoq hpyi pyâm é hui rà nghut lhê." ga taí ri.

³ Yesuq gi, Tsanlun Bùm má zung tô é hkûn, haù chángzô pé gi, yhangmoq baù Yhâng chyáng lé jé kômù, "Haù hkyô pé gi, hkâ-nhám dut lò rà lú? Nàng gyó lé rà hkûn eq ló htàng buinyì má, hkasù é kumlhá htoq lò rà nghut lhê lú? Ngamoq lé taí kyô wú laq." ga, Yhang lé myí akô.

⁴ Haù hkûn, Yesuq, yhangmoq lé tû taí é gi, "Nungmoq lé, ó yuq èq le a wó shuí nghoq sháng gaq, sidiq nyí keq. ⁵ Hkâsu mù gà le, 'Ngò gi, haù Hkrisduq nghut lhê.' ga, Ngá myìng lé lãng é byù myo myo pô htoq lô mù, byù myo myo lé hkyô shuí nghoq kó rà nghut lhê. ⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó rà nghut lhê; nghut kôlhang, hkâgyuq dàn kó. Haù hkyô pé gi, dut lò rà za nghut lhê; nghut kôlhang, ló htàng é buinyì gi, a nghut shi. ⁷ Byù ra-myû eq ra-myû, mingdán ralhüm eq ralhüm majan zân lhum lò kó rà nghut lhê. Jowò myo myo má, mutmó gyó é pé eq layàng nún é pé dut

lò rà nghut lhê. ⁸ Haù pé gi, wuìhke jamjau hkyô é apûn awang za ru nghut ashí.*

⁹ Haù hkûn, nungmoq gi, zing-rí é eq sat pyâm é hui zo rà matú, ap pyâm é hui kó rà nghut lhê. Byù myû lhunglhâng bang gi, Ngá é yanmai, nungmoq lé a ngui kut kó rà nghut lhê. ¹⁰ Haù u lé, byù myo myo gi, lumjìng myit lé tô pyám kômù, rayuq eq rayuq a ngui lhum dut é htoq agó, rayuq eq rayuq ap pyâm lhum kó rà nghut lhê. ¹¹ Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuí nghoq kó rà nghut lhê. ¹² Agè ashop é hkyô myô jat lo é yanmai, byù myo myô é chyitdap myit gi, kân ló byuq rà nghut lhê; ¹³ nghut kôlhang, jìhtûm jé shoq wó hkam jân nyi é sù gi, hkyi yu é hui rà nghut lhê. ¹⁴ Byù myû banshoq má saksé dut rà matú, haù mingdán eq sêng é gabú danglù lé, mingkan gón má hko kyo rà nghut lhê. Hau htàng má sheq, ló htum buinyì jé rà nghut lhê.

¹⁵ Haù mù luí, myiqhtoi Danielaq dông mai taí tô é eq rajung za, 'haù lhoq hten lhoq hpyoq é acháq achyut hkyô'* gi, chyoiyúng jowò má shap tô é lé, nungmoq myàng kó rà nghut lhê. (Chyúmlaiká nghap sù gi, sê gyo sháng gaq). ¹⁶ Haù hkûn, Yuda mau má nyi é bang gi, bùm pé shut hpanq doq ló kó sháng gaq. ¹⁷ Yhumhkûng htoq má nyi tô é sù gi, yhúm hkaù mâ é zè haí lé le, a ló gyó wang yù lo sháng gaq. ¹⁸ Yò má nyi tô é sù gi, yhâng é buhìng lé a ló taù yu nyi lo sháng gaq. ¹⁹ Haù buinyì pé má, zogûng dut é myiwe eq naù huq ashí nghut é ìnu wuì gi, gyai yhang wuìhke jamjau kó rà nghut lhê. ²⁰ Haù nungmoq hpâng rà buinyì gi, gyoqmyò,* a nghut jáng, Bánno buinyì má a ang rà matú, kyûdûng nyi keq. ²¹ Hkâsu mù gà le, mingkan lé joq é hkûn mai ahkuí jé shoq, hkâ-nhám le a dut wú shí é wuìhke jamjau mó gi, haù buinyì pé má dut lò rà nghut lhê; haù sù é hkyô gi, htàngnùng má hkâ-nhám le dum dut lo rà a nghut. ²² Buinyì haù pé lé lhoq shaù pyâm é za a nghut le gi, ó yuq le asak wó lut rà a nghut; nghut kôlhang, Garai Gasang èq hkyin yù hui bâng é matú gi, buinyì haù pé

* 23:39 Hkya-on 118:26 ✨ 24:8 Esai 19:2 ✨ 24:15 Dan 9:27; 11:31; 12:11 * 24:20 Israelaq mau má gi, gyoqmyò lé hkyô htoq le gyai wuìhke é ahkyìng nghut lhê.

lé, lhoq shaû pyám byi râ nghut lhê. ²³ Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haú a nghut jáng, 'Wú keq, Yhang hê má nyi ri.' ga taí jáng, nungmoq hkâjíng kó. ²⁴ Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklaí kumlhá pé lé kut shit kó râ nghut lhê. ²⁵ Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

²⁶ Haú mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gok hkaú má lúng tô ri.' ga jáng le, hkâjíng kó. ²⁷ Hkâsu mù gâ le, bui htoq hkyam má lhap hpyat é gi, bui wang hkyam má lhang jé shoq duqbó é su, haú Byu Yhangzo jé lé é hkûn le, dut râ nghut lhê. ²⁸ Màng leq é jang má, langdâ pé, lé zîng bùm râ nghut lhê.

²⁹ Buinyi haú pé mâ é wuîhke jamjau lai eq yhang,

'Bui gi, noq byuq mù, lhamó gi, a tsô dut byuq râ nghut lhê;

kyi pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhún é huî bùm kó râ nghut lhê.'[✠]

³⁰ Haú hkûn, haú Byu Yhangzô é kumlhá gi, mauhkûng má htoq shit lô râ nghut mù, myidàm htoq mâ é byù myù lhunglhang gi, yón ngau bùm kó râ nghut lhê. Haú Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó râ nghut lhê. ³¹ Haú htâng má, Yhang gi, Yhâng é maumang lagyô pé lé, tut htê mó èq nhang kat luî, yhangmoq gi, maumyî chyûn myi chyûn eq mauhkûng rahkyam mai, gó hkyam htum shoq mâ é, Yhang hkyin yu tô é bang lé shuí tsîng yù kó râ nghut lhê.

³² Maihpáng gâm lé wú mù, mhoq yù keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ³³ Haú eq rajung za, shí

hkyô banshoq[†] lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sê lo keq. ³⁴ Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé[‡] banshoq dut byuq râ nghut lhê. ³⁵ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

Haú Buinyi Eq Ahkyíng Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyi eq ahkyíng haú lé gi, ó yuq le a sé; mauhkûng htoq mâ é maumang lagyô pé lhang a sé; haú Zo le a sé; haú Íwa za ru sê lhê. ³⁷ Noaq é tsín pyat má dut é su, haú Byu Yhangzo lé lo é hkûn le, dut râ nghut lhê. ³⁸ Hkâsu mù gâ le, dowuî a dîng shí é buinyi pé má, byu pé gi, Noaq, wuî-sanghpo mó hkaú má wang é hkûn jé shoq, zo zo shuq shuq, myi byi myi yù, kut nyi bum akô nghut ri; ³⁹ yhangmoq gi, dowuî dîng lô mù, yhangmoq banshoq lé ùm sat pyâm é hkûn jé shoq, hâi dut lò râ lé, a sé kó dut bùm é su, haú Byu Yhangzo lé lo é hkûn le, dut râ nghut lhê. ⁴⁰ Haú hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut lhê. ⁴¹ Luqluí chôm llang nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to râ nghut lhê.

⁴² Haú su mù, haú nungmoq é Yhumsîng gi, hká nyi jé lé lô râ lé, nungmoq a sê kô é yanmai, sidiq machya nyi keq. ⁴³ Myín hká u má hkau sú jé lé lò râ lé, yhumsîng sê é ru nghut le gi, yhâng é yhûm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. ⁴⁴ Haú mù, nungmoq le rì rì nghut nyi keq; hkâsu mù gâ le, haú Byu Yhangzo gi, a bûn nùng má jé lé lô râ nghut lhê.

⁴⁵ Yhumsîng hpô é dui-nhâng zoshâng wuî lé, uphkâng râ eq ahkyíng jé jáng zoshuq gàm byi râ matú, yhumsîng hpô èq mù nhang tô é, lhumzui luî, hpaqchyí bo é dui-nhâng zoshâng gi, ó yuq nghut râ lúh? ⁴⁶ Yhumsîng hpó dum taú lo é hkûn,

✠ 24:29 Esai 13:10; 34:4 † 24:33 Shí hkyô banshoq gâ é gi, Yesuq jé lé râ hí má dut râ hkyô pé lé taí é nghut lhê.

‡ 24:34 Haú hkyô pé gâ é gi, Yerusalem noqkuq yhûm htên byoq râ lé taí é nghut lhê.

haû su kut nyî láng é dui-nhâng zoshâng gi, hkungsô wó nyî ri. ⁴⁷ Ngò, nungmoq lé teng za taí kôlé, yhumsîng hpó haû gi, yhâng é sutzè banshoq, dui-nhâng zoshâng haû yuq lé ap to râ nghut lhê. ⁴⁸ Nghut kôlhâng, laqmá mù, dui-nhâng zoshâng haû yuq gi, agè ashop sù nghut luî, 'Ngá é yhumsîng hpó jé lô râ gyai myáng ashî.' ga, yhâng é i-mytit unghkaû má myit yù mù, ⁴⁹ gotû dui-nhâng zoshâng luzúm wuî lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi, ⁵⁰ dui-nhâng zoshâng hau é yhumsîng hpó gi, yhang a myitngam tô é buinyi eq yhang a sé tô é ahkyíng má jé lô mù, ⁵¹ yhang lé jap pyám luî, gegùn labyoq kut bang hkâm zô é, ngaubyi ngàu nhap eq zuì kyik kyik shoq hpuzô nyi râ jowò má hkyô pyám râ nghut lhê.

25

Zomyi Raxê Yuq Lé Dangtú Yu É Hkyô

¹ Haû hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê. ² Haû bang má, ngo yuq gi, nhik a gyíng kó; ngo yuq gi, nhik gyíng akô nghut ri. ³ Haû nhik a gyíng é bang gi, myibung yu chûng kôlhâng, xù a yu chûng kó nghut ri. ⁴ Nghut kôlhâng, haû nhik gyíng é bang kúm gi, yhangmoq é myibung lé le, xù bo é bòng lé le yu chung akô nghut ri. ⁵ Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.

⁶ Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garú é htê htoq lo ri.

⁷ Haû hkûn, zomyi haû bang banshoq gi, toq lô mù, yhangmoq é myibung lé hen lajâng akô nghut ri. ⁸ Haû nhik a gyíng bang gi, 'Ngamoq lé, xù ratsuí byi kó laq; hkâsu mù gâ le, ngamoq é myibung shi lô nyi ri.' ga, haû nhik gyíng bâng chyáng dúng akô.

⁹ Haû hkûn, haû nhik gyíng bang gi, 'Nungmoq eq ngamoq é matú ga jáng, luq râ a nghut. Haû mù, nungmoq é matú, xù ung bâng chyáng ê wui yù keq.' ga tû taí kat akô.

¹⁰ Yhangmoq, xù wuî e ló kô é hkûn, lusik gi, jé lé lô mù, haû rì rì hen tô é zomyi wuî gi, yhang eq rahá myiháng poí má wang lô bekô. Hkum le myhî byuq bê nghut ri.

¹¹ Hau htâng má, hau htâng gyó tô é zomyi wuî gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taí akô.

¹² Nghut kôlhâng, haû lusik gi, 'Ngò, nungmoq lé teng za taí kôlé, nungmoq lé ngò a sé.' ga tû taí kat ri.

¹³ Haû mù luî, haû Byu Yhangzo jé lé râ buinyi eq ahkyíng lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

¹⁴ Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wuî lé wut yù luî, yhâng é sutzè lé ap byî to sù eq pung ashî nghut ri. ¹⁵ Yhang gi, yhangmoq é a-tsam má cháng luî, rayuq lé gi, ngùn ngo joí, rayuq lé gi, í joí, htâng rayuq lé gi, rajoí kut byî to mù, byìn we shut htoq lô byuq bê nghut ri.

¹⁶ Ngùn ngo joí wó yù sù gi, haû hkûn jáng htoq lô mù, hpugá gá luî, ngùn ngo joí wó myat yù bê nghut ri. ¹⁷ Haû eq rajung za, ngùn í joí wó yù sù le, í joí wó myat yù bê nghut ri. ¹⁸ Nghut kôlhâng, rajoí za wó yù sù gi, htoq e ló mù, myigùng má du luî, yhâng yhumsîng hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haû bâng é yhumsîng hpó gi, dum taû jé lô mù, yhangmoq é ngùn chyârâng lé, lo jep ri. ²⁰ Ngùn ngo joí wó yù sù gi, amyat ngo joí lé le yu lé lô mù, 'Yhumsîng ê, nàng, ngo lé, ngùn ngo joí ap tô é nghut lhê. Wú aq, amyat ngo joí wó ho jat yù bê.' ga taí ri.

²¹ Haû hkûn, haû yhumsîng hpó gi, 'Arâ! Nghut bê. Nàng gi, kyet é eq lungíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tû taí ri.

²² Haû eq rajung za, í joí wó yù sù le, lé lô mù, 'Yhumsîng ê, nàng, ngo lé ngùn í joí ap

tô é nghut lhê. Wú aq, amyat í joí wó ho jat yù bê.' ga, lé taí ri.

²³ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lumgîng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Nàng yhumsîng hpó é gabú hkyô má bo wang lòm aq hkoi!' ga tú taí ri.

²⁴ Hau htâng, rajoí wó yù sù le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang má é shù yù nau é htoq agó, yhumsîng, kyôshi a sân hkyô tô é jang má é tsîng yù nau sù nghut é lé, ngò sê lhê. ²⁵ Haú mù, ngò gi, gyuq luí, htoq ê mù, náng é ngùn lé, myigùng má ê haq myhup tô é nghut lhê. Wú aq, shí gi, nàng é ngùn nghut lhê.' ga taí ri.

²⁶ Haú mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang má é shù yù nau é eq, yhumsîng, kyôshi a sân hkyô tô é jang má é tsîng yù nau sù nghut é lé, nàng sê to gù nghut le nhîng, ²⁷ ngá é ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lhú?

²⁸ Haú mù, haú ngùn rajoí lé, náng chyáng mai yù luí, raxê joí wó to sù lé, byí pyám nhâng râ nghut lhê. ²⁹ Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê. ³⁰ Haú mù, haú akyû a bo é dui-nhâng zoshâng lé gi, ngaubyi ngaù nhap eq zuì kyik kyik shoq hpuzô nyi râ jowò nghut é, shinggan mauchut hkaú má dú htoq pyám keq.' gâ ri.

Sau Eq Bainám

³¹ Haú Byu Yhangzo gi, Yhâng é hpungwup shingkang mai, maumang lagyo lhunglhang bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq má zùng râ nghut lhê. ³² Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotú tú kut gam hkoq é su, byu pé lé gam hkoq pyám râ nghut lhê. ³³ Yhang gi, sau pé lé, loqyo hkyam shut, bainám pé

lé, loqpaí hkyam shut kut, nyhi to râ nghut lhê.

³⁴ Hau htâng má, haú Hkohkâm gi, Yhâng é loqyo hkyam shut má é bang lé, 'Ngá Wâ chyáng má é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muì mingdán má wang ló keq. ³⁵ Hkâsu mù gâ le, Ngò zòmut é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê; ³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nòhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taí râ nghut lhê.

³⁷ Haú hkûn, haú dingmán bang gi, Yhang lé, 'Yhumsîng ê, Nàng zòmut huí é lé, ngamoq, hkâ-nhám myàng luí, byi tsô wú é lhú? Nàng wuìshit é lé, ngamoq, hkâ-nhám myàng luí, byi huq wú é lhú? ³⁸ Nàng bíng kut wún é lé, ngamoq, hkâ-nhám myàng luí, lhom hkulum wú é lhú? Nàng gùngchîn dut é hkûn, ngamoq, hkâ-nhám byi hut wú é lhú? ³⁹ Nàng nòhpyo huí é lé le, htóng lúng é lé le, ngamoq, hkâ-nhám myàng luí, lé gon lé kum wú é lhú?' ga myi kó râ nghut lhê.

⁴⁰ Haú hkûn, haú hkohkâm gi, 'Ngò, nungmoq lé teng za taí kôlé, shí, Ngá gumang wuì má é je tiq sù lé, nungmoq kut byí é hkyô haí le, Ngo lé kut byí é nghut bê.' ga tú taí râ nghut lhê.

⁴¹ Hau htâng má, Yhang gi, Yhâng é loqpaí hkyam shut má é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq. ⁴² Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó; ⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nòhpyo huí é eq htóng lúng é u lé, nungmoq, Ngo lé a gon kó nghut ri.' ga taí râ nghut lhê.

⁴⁴ Haú hkûn, yhangmoq gi, 'Yhumsîng ê, nàng zòmut wuìshit é, bíng kut wún é,

gùngchîn dut é, nòhpyo huí é eq htóng lúng é lé, ngamoq, hkâ-nhâm myàng luí, a wú gon kut wú é lúhú?" ga taú myí kó râ nghut lhê.

⁴⁵ Haú hkûn, Yhang gi, 'Ngò, nungmoq lé teng za taí kôlé, shí bang má é je tiq sù lé, nungmoq, a kut byí é hkyô haí le, Ngo lé a kut byí é nghut bê.' ga, yhangmoq lé tû taí râ nghut lhê.

⁴⁶ Haú mù luí, haú bang gi, ahtum abyuq mara dam byí é má wang ló kó râ nghut lhê; haú dingmán bang kúm gi, ahtum abyuq é asak má wang ló kó râ nghut lhê." ga Yesuq taí ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haú hkyô pé lé ban taí é htâng má, Yhâng é chángzô pé lé, ² "Nungmoq sê tô é eq rajung za, í nyí lai é htâng má, Lhoqlhai Poí jé râ nghut mù, haú Byu Yhangzo gi, tapzîng má jén sat é hui râ matú, ap pyâm é hui râ nghut lhê." ga taí ri.

³ Haú u lé, hkyangjong agyi pé eq suwún wuî gi, Kayahpaq gâ é hkyangjong mó rayuq é yhumwàng má zup zîng to kômù,

⁴ Yesuq lé haq chyup yû râ eq sat pyám râ hkyô lé, hpyê lhûm bum akô nghut ri.

⁵ Nghut kôlhang, yhangmoq gi, "Byu pé gabyông lò kó abe, poí gyoro má gi, a kut shi sháng." ga, taí lhûm akô nghut ri.

Yesuq, Xû Hut Gyun Huí É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhûm má nyi tô é hkûn, ⁷ myiwe myhí rayuq gi, gyai hpaû é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byí ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haí mù luí, haú lé aha agó kut pyâm lhê lúhú? ⁹ Xû haú lé, ahpaú myo myô eq ûng pyám mù, myùng bang lé byí le ge lhê mhai!" ga taí kat akô.

¹⁰ Yesuq gi, haú hkyô lé sé luí, "Haí mù, myiwe zo haú lé, i-myt lhoq myô nyi akô lúhú? Yhang gi, Ngá é ahtoq má ge é hkyô kut bê nghut ri. ¹¹ Haú myùng bang gi, nungmoq eq rahá hkâ-nhâm le nyi râ nghut

lhê; nghut kôlhang, Ngò gi, nungmoq eq rahá ayang nyi nyi râ sù a nghut. ¹² Yhang, Ngá gûng má namngón xû hut gyûn é gi, Ngá gûng lé yhum râ matú, hen lajâng é hkyô nghut ri. ¹³ Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, taí kyo bekô râ nghut lhê." ga taí kyo ri.

Yesuq Lé, Yudaq Èq Ung Zô Pyâm É Hkyô
Mrk 14:10-11; Luk 22:3-6

¹⁴ Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pé chyáng ê mù, ¹⁵ "Ngò, Yesuq lé nungmoq é loq má ap byí é nghut jáng, nungmoq, ngo lé haí byi kó râ lúhú?" ga myí ri. Haú mù, yhangmoq gi, yhang lé ngùn denggá sum xê chap nghap byí akô. ¹⁶ Haú hkûn mai, Yudaq gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poí sâng-hi nyí má, haú chángzô pé gi, Yesuq chyáng lé lô kômù, "Nàng zo râ Lhoqlhai Poí zoshuq lé, ngamoq hkâmá món to râ lúhú?" ga myí akô.

¹⁸ Haú mù, Yhang gi, "Myuq hkaû shut wang ló mù, byù rayuq chyáng ê luí, haú yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhûm má Lhoqlhai Poí kut râ nghut lhê.' gâ Sará taí ri nghû, ê taí keq." ga pying kat ri. ¹⁹ Haú mù, haú chángzô pé gi, Yesuq pying kat é eq rajung za ê taí kômù, Lhoqlhai Poí lé món to bekô nghut ri.

²⁰ Myinhâng jé lô jáng, Yesuq gi, haú chángzo raxe í yuq eq rahá, zohpoq má zung tô ri. ²¹ Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq má é rayuq sù gi, Ngo lé ap pyám râ nghut lhê." ga taí ri.

²² Haú hkûn, yhangmoq gi, gyai gyô yón kômù, rayuq htâng rayuq, "Yhumsing ê, ngò a nghut hkaí?" ga, Yhang lé chôm myí akô.

²³ Haú hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám râ sù nghut lhê. ²⁴ Haú Byu Yhangzo gi, Yhang eq séng luí kê tô é eq rajung za, shí râ za nghut lhê. Nghut kôlhang, haú Byu Yhangzo lé ap

pyâm é sù gi, dingnyé wó ri; haú yuq gi, a hku lé le lháng, je ge ri." ga dum taí kat ri.

²⁵ Hau htâng, Yhang lé ap pyám rá sù, Yudaq gi, "Rabai ê, ngò a nghut hkaí?" ga myi jáng, Yesuq gi, "Nàng nghut ri." ga tú taí kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

²⁷ Hau htâng, Yhang gi, góm lé le, yù mù, jeju hkya-on luí, yhangmoq lé byi mù, taí é gi, "Nungmoq banshoq bang, shuq keq. ²⁸ Shí gi, yubak mara hkyut pyám byi rá, byù myo myô é matú htoq pyâm é, dangshikaq eq sêng é Ngá sui nghut lhê.

²⁹ Ngò, nungmoq lé taí kôlé, ahkuí mai gi, Ngò, Ngá Wá é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq rá a nghut lo." ga taí ri.

³⁰ Yhangmoq gi, hkya-on mahkôn rahum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Lé, Te Taí É Hkyô

Mrk 14:27-31; Luk 22:31-34; Yhn 13:36-

³¹ Hau htâng má, Yesuq gi, yhangmoq lé, "Nungmoq lhunglhâng bang gi, hkú-myín yhang jáng, Ngá é yanmai, myit lingbat kó rá nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau hpúng má é sau pé gi, lhoq pyo pyâm é hui kó rá nghut lhê.'[✧]

ga kâ tô ri. ³² Nghut kôlhâng, Ngò gi, lhoq dui toq é huí htâng má, Galile mau shut, nungmoq é hí má e ló lánng rá nghut lhê." gâ ri.

³³ Haú hkûn, Petruq gi, "Náng é yanmai, góbang banshoq myit lingbat kôlhâng, ngò gi, hkâ-nhám le myit lingbat rá a nghut." ga tú taí ri.

³⁴ Yesuq gi, "Ngò, nang lé teng za taí lé, hkú-myín yhang jáng, woq a tún shimá, nàng, Ngo lé sum dâm he-ngik pyám rá nghut lhê." ga tú taí ri.

³⁵ Nghut kôlhâng, Petruq gi, "Ngò, Nàng eq rahá shí rá dut kôlhâng, Nang lé ngò he-ngik

pyám rá a nghut." ga saí taí ri. Haú chángzô pé góbang banshoq le, haú su ga châng taí bum akô nghut ri.

Get-samane Gâ É Jowò Má Kyûdûng É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gâ é jowò má é kômù, yhangmoq lé, "Ngò, hé má é mù, kyûdûng nyi é u lé, nungmoq shí má zùng lánng keq." ga taí ri. ³⁷ Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri. ³⁸ Hau htâng, Yhang gi, yhangmoq lé, "Ngò gi, shí rá í yhang myit yón nyi ri; nungmoq gi, Ngò su machyâ luí, shí má lánng nyi keq." ga taí ri.

³⁹ Yesuq gi, haú mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm* shí lé, Ngá chyáng mai lhaí pyám byi laq. Nghut kôlhâng, Ngò ô nau é dông a nghut, Nàng ô nau é dông sheq nghut sháng gaq." ga kyûdûng ri.

⁴⁰ Hau htâng, Yhang gi, Yhâng é chángzô pé chyáng dum taú lo le, yhangmoq yhup myhí to kô é lé lo myàng ri. Haú mù, Yhang gi, Petruq lé, "Nungmoq gi, hkyíng hkum rahkum za lháng, Ngò eq rahá a wó machya nyi kó lhú? ⁴¹ Gunglaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhâng, gungsho gi, wum nyhôm nyi ri." ga taí ri.

⁴² Yhang gi, radàm dum ê mù, "Áwa ê, góm shí lé, Ngò a shuq é a wó lai rá nghut jáng gi, Nàng ô nau é dông nghut sháng gaq hkoí." ga kyû dum dûng ri.

⁴³ Yhang dum taú lo le, yhangmoq gi, myoqkuq lai kô é yanmai, yhup myhí to lánng kô é lé, lo dum myàng ri. ⁴⁴ Haú mù, Yhang gi, yhangmoq lé tô pyâm to mù, sum dâm nghû rá dâm dum ê luí, hí lé dûng é dang lé roq ê dum dûng ri.

⁴⁵ Haú mù, Yhang gi, haú chángzô pé chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lhú? Wú keq! Haú ahkyíng gi, jé bê nghut luí, haú Byu Yhangzo gi, yubak dap

✧ 26:31 Zhk 13:7 * 26:39 Góm gâ é gi, Yesuq, jamjau hui rá hkyô eq shí rá hkyô lé, taí nau é nghut lhê.

bâng é loq má ap pyâm é hui râ nghut bê.
⁴⁶Toq keq! Lô loşáng hkoi! Ngo lé ap pyám
 râ sũ gi, jé lé bê nghut ri." ga taí ri.

Yesuq, Chyup Yũ Huĩ É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dáng nyo nyi ashĩ u lé, haũ
 chángzo raxe í yuq má bo é Yudaq gi, jé lé
 lo ri; haũ hkyangjong agyi pé eq mingbyu
 é suwún wui chyáng mai nhang kat é bang
 nghut é, shâm eq dumbáng pé chung tô é
 byù moq mó le, yhang eq rahá nghut akô.

⁴⁸ Yesuq lé ap pyám râ sũ gi, haũ bang lé,
 "Ngò, bopuq puq é sũ gi, haũ yuq nghut bê;
 Yhang lé chyup yũ keq." ga kumlhá byĩ tô
 ri. ⁴⁹ Yudaq gi, Yesuq chyáng hkyê za ê mù,
 "Rabai ê, wángzán nyi lhê lhú?" ga taí luĩ,
 Yhang lé bopuq puq byĩ ri.

⁵⁰ Haũ hkũn, Yesuq gi, "Buinùm hpó ê,
 nàng kut râ muzó lé kut aq hkoi." ga tũ taí
 kat ri.

Hau htâng, yhangmoq gi, hí shut huĩ é
 luĩ, Yesuq lé chòm zuĩ zing mù, chyup yũ
 bekô nghut ri. ⁵¹ Haũ mù, Yesuq eq rahá
 nyi bang mã é rayuq gi, shâm shê htoq yũ
 mù, hkyangjong mó é dui-nhâng zôshang é
 nohkyap lé pyoq hkyô kat byi bê nghut ri.

⁵² Haũ jáng, Yesuq gi, haũ yuq lé, "Náng
 é shâm lé, xâng pyám aq; hkâsu mù gâ le,
 shâm shê sũ gi, ó yuq nghut kôle, sham èq
 shĩ râ nghut lhê. ⁵³ Ngò gi, Ngá Wa lé dung
 jáng, Yhang gi, radá dâm, maumang lagyo
 dap pé raxe í dap htoq myo shoq nhang
 kat byi râ nghut é lé, nungmoq a sé kó lhú?"

⁵⁴ Nghut kôhang, haũ su nghut é nghut jáng,
 shĩ hkyô dut lò râ nghut lhê ga Chyúmdang
 pé má bò tô é hkyô gi, hkâsu wó dik lò râ
 lhú?" ga taí kat ri.

⁵⁵ Hau htâng, Yhang gi, byù moq lé,
 "Nungmoq gi, damyaq rayuq lé chyup é su,
 Ngo lé chyup râ matú, shâm eq dumbáng pé
 chũng mù, lé lo akô lhú? Ngò gi, nyĩ wuĩ,
 noqkuq yhũm mã zũng mù, mhoqshit nyĩ
 kôhang, nungmoq, Ngo lé a chyup yũ kô é
 nghut lhê. ⁵⁶ Nghut kôhang, shĩ su dut é
 hkyô pé banshoq gi, haũ myiqhtoĩ pé kâ tô
 é hkyô pé lo dik râ matú dut é nghut ri." ga
 taí ri. Haũ hkũn, haũ chángzô pé banshoq
 gi, Yesuq lé tô pyâm to kôluĩ, h pang byo
 byuq bekô nghut ri.

*Yudaq Byĩn Tú Wapdoq Má Jep Huĩ É
 Hkyô*

*Mrk 14:53-65; Luk 22:54-55, 63-71; Yhn
 18:13-14, 19-24*

⁵⁷ Yesuq lé chyup yu é bang gi, haũ
 tarâ sará pé eq suwún wuĩ zup zing nyi
 é jang, hkyangjong mó Kayahpaq é yhũm
 má, Yhang lé shuĩ e akô. ⁵⁸ Petruq gi,
 hkyangjong mó é yhumwàng hkaũ mã
 châng jé wàng shoq, we we mai Yesuq htâng
 châng tô ri. Yhang gi, hkâsu dut lò râ lé
 myàng naũ luĩ, wàng hkaũ mã wang ê mù,
 zũng bang eq rahá zung tô ri.

⁵⁹ Haũ hkyangjong agyi pé eq Yudaq byĩn
 tú wapdoq mã é góbang gi, Yesuq lé sat
 pyám nhâng râ matú, a têng é saksé ho nyi
 akô. ⁶⁰ A têng é saksé myo myo htoq lô
 kôhang, wó sat râ î é saksé a myàng kó
 nghut ri.

Ló htáng mã, byù í yuq gi, lé lô kômù,
⁶¹ "Shĩ yuq gi, 'Ngò gi, haũ Garai Gasâng é
 noqkuq yhũm lé lhoq hten pyám mù, sum
 nyĩ gyoro mã dum wó saĩ lhê,' ga taí sũ
 nghut ri." ga taí akô.

⁶² Haũ hkũn, haũ hkyangjong mó gi, toq
 yap mù, "Nàng, haĩ le a tũ taí luq? Shĩ bang,
 Nang lé mara hun nyi é saksé gi, hká dõng
 nghut lhê lhú?" ga, Yesuq lé myĩ ri. ⁶³ Nghut
 kôhang, Yesuq gi, jit le a ga nyi tô ri.

Haũ mù, hkyangjong mó gi, Yhang lé,
 "Haũ rũ dui nyi é Garai Gasâng é mying lé
 lang luĩ, ngò, Nang lé myĩ wú lé: Nàng gi,
 Garai Gasâng é Yhangzo, Hkrisduq nghut
 lhê luq, ngamoq lé taĩ kyô wú aq." ga taí
 jáng, ⁶⁴ Yesuq gi, "Nàng taĩ é eq rajung za
 nghut lhê. Ngò, nungmoq banshoq lé taĩ
 kôlé, nungmoq gi, ahkuĩ mai htâng hpyang
 mã, haũ Byu Yhangzo gi, a-tsam bo dik Su
 é loqyo hkyam mã zung tô é lé le, mhuthtui
 ji mù, mauhkũng mai lé lo é lé le, nungmoq
 myàng kó râ nghut lhê." ga taí ri.

⁶⁵ Haũ hkũn, hkyangjong mó gi, yhâng
 é bu lé lãng cheq pyám mù, "Yhang gi,
 Garai Gasang lé rhoĩ dang taĩ bê nghut
 ri! Nga-nhũng, hai saksé râ ashĩ lhú?
 Yhang, Garai Gasang lé rhoĩ dang taĩ é lé,
 nungmoq, ahkuĩ wó gyo bekô nghut lhê.
⁶⁶ Nungmoq hkâsu wó myit akô lhú?" ga
 myĩ jáng, yhangmoq gi, "Yhang gi, shĩ gĩng
 sũ nghut lhê." ga tũ taí akô nghut ri.

⁶⁷ Hau htâng má, yhangmoq gi, Yesuq é myoqdong má sôkan byé gyun luí, loqtsup èq htui byí akô nghut ri. Góbang gi, Yhang lé bo-pyuq pyuq byi luí, ⁶⁸ "Hkrisduq Nàng, Nàng lé bat sù ó yuq nghut é lé, myiqhtoi htoí wú aq." ga taí akô.

Yesuq Lé, Petruq He-ngik Pyâm É Hkyô
Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaú má nyi tô é u lé, dui-nhâng zoshâng myhí rayuq gi, yhâng chyáng lé jé mù, "Nàng le, haú Galile byù Yesuq eq rahá nyi sù nghut ri." ga taí ri.

⁷⁰ Nghut kôhang, Petruq gi, haú bang banshoq é hí má yhang, "Nàng haí taí nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haú jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haú má é bang lé taí kat ri.

⁷² Haú hkûn, yhang gi, "Byù haú yuq lé, ngò a sé!" ga dakam é dông he pyâm ri.

⁷³ Hau htâng razup zo má, haú jowò má yap to bang gi, Petruq chyáng huí ê kômù, "Nàng le, haú bang má bò sù yhang nghut ri; náng é danghtê lé sê gyô ri." ga taí akô.

⁷⁴ Haú hkûn, yhang gi, yhanggùng yhang nhing luí, "Haú yuq lé, ngò a sé." ga dakâm dang taí ri.

Haú-u yhang, woq tûn bê nghut ri. ⁷⁵ Haú mù, Petruq gi, "Woq a tûn shi má, nàng, Ngo lé sum dâm he pyâm râ nghut lê." ga, Yesuq, yhang lé taí é dang lé, myit bûn kat mù, shinggan shut htoq ê luí, gyai yhang é ngau ri.

27

Yudaq Juíshi É Hkyô

Mrk 15:1; Luk 23:1-2; Yhn 18:28-32

¹ Napsûn noq le, hkyangjong agyi pé banshoq bang eq mingbyu é suwún wuí gi, Yesuq lé sat pyâm nhâng râ matú chôm myit hpyit yû bekô nghut ri. ² Haú mù, yhangmoq gi, Yhang lé tuí yù luí, shuí htoq é kômù, mauzau Pilat chyáng ê ap byí akô nghut ri.

³ Yesuq lé ap pyâm é sù Yudaq gi, Yesuq lé jéyáng doqđân é hkyô lé myang sé jáng,

nungngham wó mù, haú ngùn sum xê chap lé, hkyangjong agyi pé eq suwún wuí chyáng ló dum taú byí ri. ⁴ Haú mù, yhang gi, "Mara a bò Su é sui lé, ngò ap pyâm bê nghut é yanmai, ngò mara wó bê." ga taí jáng, yhangmoq gi, "Haú hkyô, ngamoq eq haí sêng lê lú? Haú gi, nàng eq sheq ru sêng lê." ga lhom taí kat akô nghut ri.

⁵ Haú mù, Yudaq gi, ngùn haú lé, noqkuq yhúmkaú má dú pyâm to luí, htoq ló mù, yhang gùng yhang ê juíshi byuq bê nghut ri.

⁶ Haú hkyangjong agyi pé gi, ngùn chap haú pé kui yù luí, "Shí gi, sui hpau ngùn nghut lê yanmai, alu sidek má a ge kat." ga taí akô. ⁷ Haú mù, yhangmoq gi, tûngbaù pè é lupdùng kut râ matú, au saí zo su é maumyí lé, ngùn hau èq wuí hpyit yû râ dông, chôm myit hpyit to bekô nghut ri.

⁸ Hau é yanmai, ahkuí jé shoq, haú jowò lé, sui myigùng ga myhîng tô akô nghut ri. ⁹ Haú gi, "Haú Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haú Yhumsîng Garai, ngo lé pying tô é eq rajung za, ¹⁰ haú au saí zo su é maumyí lé, yhangmoq wuí yù bekô nghut ri." ga myiqhtoi Yereimiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô
Mrk 15:2-15; Luk 23:3-5, 13-26; Yhn 18:33-19:16

¹¹ Haú u lé, Yesuq gi, mauzau hpô é hí má yap tô é nghut mù, haú mauzau hpó gi, Yhang lé, "Nàng gi, Yudaq byu pè é hkohkâm nghut lê lú?" ga myi jáng, Yesuq gi, "Nàng taí é eq rajung za nghut lê." ga tû taí ri.

¹² Haú hkyangjong agyi pé eq suwún wuí gi, Yhang lé, mara hûn kôjáng, Yhang gi, haí le a tû taí nghut ri. ¹³ Haú hkûn, Pilat gi, Yhang lé, "Yhangmoq, Nang lé mara hûn saksé haú-í hkâm nyi kô é lé, Nàng a wó gyo lú?" ga saí myí ri. ¹⁴ Nghut kôhang, Yesuq gi, dang rahkun lháng a tû taí é yanmai, haú mauzau hpó gi, gyai maú byuq bê nghut ri.

¹⁵ Haú Lhoqlhai Poí u lé, mingbyû wuí ô nau é má cháng luí, haú mauzau hpó gi, htóng byû rayuq yuq lé nhâng byí é htông joq ri. ¹⁶ Haú u lé, a gè mying htoq é htóng byû, Barabaq ga sù rayuq nyi ri. ¹⁷ Haú mù,

byù moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lhú? Barabaq luq? Haû a nghut jáng, Hkrisduq gâ é Yesuq lé luq?" ga myi ri. ¹⁸ Yhang haû su ga myi é gi, yhangmoq, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri.

¹⁹ Pilat gi, tarâ jéyáng tingnyâng htoq má zung tô ashí hkûn, yhangmyi gi, "Haû mara a bò Sû lé, haî le hkâkut; hkâsu mù gâ le, hkû-nyí za lháng, yhupmoq má, haû yuq é yanmai, ngò tsómra hpuzô pyám bê nghut lhê." ga, yhâng chyáng dang pying kat ri.

²⁰ Nghut kôlhang, haû hkyangjong agyi pé eq suwún wú gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.

²¹ Haû mauzau hpó gi, "Shí í yuq mâ é hká yuq lé, nhâng byi nhâng nau akô lhú?" ga myi jáng, yhangmoq gi, "Barabaq!" ga tû taî akô nghut ri.

²² Haû mù, Pilat gi, "Haû jáng gi, Hkrisduq gâ é Yesuq lé, ngò hkâsu kut râ lhú?" ga dum myi kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taî akô nghut ri.

²³ Nghut kôlhang, yhang gi, "Haî mù luí lhú? Yhang gi, haî mara kut shut bê lhú?" ga dum myi jáng, yhangmoq gi, htê mó eq, "Yhang lé tapzîng má jén sat pyám aq!" ga je riyhang garû lo bum akô nghut ri.

²⁴ Pilat gi, hká dông le a dat kut lô é eq byu pé gabyông lò kô râ nghut é hkyô lé myàng luí, uchyam yù mù, shiwa byu pé hí má loq chí luí, taî é gi, "Shí yuq é sui gi, ngò eq haî a séng; nungmoq eq za ru séng lhê." gâ ri.

²⁵ Haû shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshû pé htoq má joq nyi sháng gaq." ga, dum tû taî kat akô nghut ri.

²⁶ Haû hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byi kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

²⁷ Hau htâng, mauzau hpô é gyezô pé gi, Yesuq lé, mauzau hpô é yhumwàng

mó hkaû má shuí wang ló kômù, Yhâng é lhîngkhyuq má, gyedap gón lé ji tsîng tô akô. ²⁸ Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù, ²⁹ zujanmaú ralhum saî yù kôluí, Yhâng é ulhum má tsung byi akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluí, "Yudaq byu pé é hkohkâm hpó ê! Chyung hîng xê hîng nyi sháng gaq ô!" ga, jihpoi dang taî akô. ³⁰ Yhangmoq gi, Yhang lé sôkan byé gyun luí, Yhâng é loq mai jàm-yang lú yù mù, Yhâng é ulhum má dum bat bat kut akô nghut ri. ³¹ Yhangmoq gi, Yhang lé rhoi jihkyoî ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyâm É Hkyô

Mrk 15:22-32; Luk 23:27-43; Yhn 19:17-27

³² Yhangmoq htoq e ló nyi le, Kuruni myuq byù nghut é Simun ga sù lé myàng kômù, yhang lé, zik luí tapzîng waq nhang akô nghut ri. ³³ Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê. ³⁴ Haû má jé jáng, yhangmoq gi, Yesuq lé, hkô jung eq nyhò tô é tsibiyiq wîng lé byi huq akô; nghut kôlhang, Yhang gi, haû lé chyam wú mù, a shuq byi kut pyâm ri.

³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byi akô.

³⁶ Hau htâng, yhangmoq gi, haû jowò má zung to mù, Yhang lé zúng nyi akô nghut ri.

³⁷ Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kâ tap tô akô. ³⁸ Haû hkûn, Yhang eq rahá, damyaq í yuq lé le, Yhâng é loqpaî hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri. ³⁹ Hkyô sô lai ló é bang gi, nyhap é dông u-ngut ngut mù, taî kô é gi, ⁴⁰ "Noqkuq yhûm lé hpoyô pyám luí, sum nyí gyoro má dum wó saî lhê ga Sû

ê! Nàng, Garai Gasâng é Yhangzo nghut le

gi, Náng gûng nàng hkyi yù luí, tapzîng mai gyó lo wú aq mhai!" ga akô nghut ri.

⁴¹ Haú eq rajung za, hkyangjong agyi pé, tarâ sará pé eq suwún wuî le, Yhang lé rhoi jihkyoî kut mù, taí kô é gi, ⁴² "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! Yhang gi, Israelaq byu pé é hkohkâm nghut lhê lhà! Ngamoq wó lumjîng râ matú, Yhang, tapzîng mai gyó lo wú sháng gaq. ⁴³ Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri. ⁴⁴ Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoi dang taí akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri. ⁴⁶ Myinhtâng sum hkyíng kô má, Yesuq gi, "Eloi, Eloi, lama sabakhtani?" ga, htê mó èq garú kat ri. Hau é lichyúm gi, "Ngá Garai è, Ngá Garai è, Nàng, haí mù, Ngo lé tô pyâm tô lhê lhú?" gâ é nghut ri.✧

⁴⁷ Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

⁴⁸ Haú hkûn jáng, yhangmoq mâ é rayuq gi, din e ló mù, wuîmaù lé è yu ri. Yhang gi, haú lé tsibiyiq wing chyîn má jum yù luí, jàm-yang má tuí tap mù, Yesuq shuq râ matú yhun byi ri. ⁴⁹ Góbang gi, "Yhang lé, Eliyaq, lé hkyi yu lhê laq, nga-nhúng chôm lánng wú sháng." ga taí akô nghut ri.

⁵⁰ Haú hkûn, Yesuq gi, htê mó èq dum garú kat luí, Yhâng é soqkâng byit bê nghut ri.

⁵¹ Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri. ⁵² Lup pé gi, bóng lô mù, shi byuq bê é chyoiyúng

bang myo myo gi, lhoq dui é hui akô. ⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang é luí, byù myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dàn kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

⁵⁵ Myiwe wuî myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô. ⁵⁶ Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhtâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri. ⁵⁸ Yhang gi, Pilat chyáng è mù, Yesuq é gungsôm lé è dung jáng, Pilat gi, yhang lé byi râ matú hkunmó hkyô kat bê nghut ri. ⁵⁹ Yosep gi, gungsôm lé yù mù, pán yúng èq htup yup luí, ⁶⁰ luqgok lé kyûng tô é, yhâng é lup sik hkaú má é kat tô ri. Hau htâng, yhang gi, luphkum má, luqlông èq lhêng chí pyâm to luí, ló byuq bê nghut ri. ⁶¹ Magadalaq wà mâ é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Haú Hên Lajang Buinyi lai é htâng nyi lé, hkyangjong agyi pé eq Hparishe pé gi, Pilat chyáng è mù, ⁶³ "Yhumsîng è, Yhang, asak dui nyi ashí hkûn, 'Sum nyi nghû râ buinyi má, Ngò dum dui toq lô rá.' ga, haú byù mhaú taí é dang lé, ngamoq bûn nyi lhê. ⁶⁴ Haú mù, haú sum nyi nghû râ buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaú yu ló mù, Yhang shi é mai dum dui toq lô bê ga, byu pé lé taí kó râ nghut

✧ 27:46 Hkya-on 22:1 * 27:53 Chyoiyúng myuq gâ é gi, Yerusalem wà mó lé gâ é nghut lhê.

lhê. Shî, lô htâng dàm mhaû é hkyô gi, sâng-hi dàm htoq je wui râ nghut lhê." ga, lé taí akô nghut ri.

⁶⁵ Haú hkûn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tû taí kat ri. ⁶⁶ Haú mù, yhangmoq gi, ê luí, lup lé gau shoq ga, luggok má dizik htung mù, lup zúng byû nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyi lai jáng, rabat é sâng-hi nyi maubó zó má, Magadalaq wà mâ é Mariq eq goyuq Mariq gi, lup má ê wú râ ga, e lô akô.

² Haú hkûn, layàng mó nún lo ri; hkâsu mù gâ le, Yhumsîng Garaí é maumang lagyo rayuq gi, mauhkûng mai gyó lé lô mù, lup má ê luí, haú luqlong lé tu lheng mù, hau ahtoq má zung tô ri. ³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. ⁴ Zúng nyi é bang gi, yhang lé lûm wú gyuq kômù, pyik pyik nân luí, shî gùng su dut bùm bekô nghut ri.

⁵ Haú maumang lagyo gi, myiwe haú nhik lé, "Hkâgyuq kó! Haú tapzîng má jén sat huí é Yesuq lé, nungnhik ho nyi kô é lé, ngò sê lhê. ⁶ Yhang gi, shí má a nyi lo; Yhang taí tô é eq rajung za, lhoq dui toq é huí bê nghut ri. Yhang lé lheq é jowò lé, lé wú keq. ⁷ Haú mù, hân taú lô luí, Yhâng é chángzô pé lé, 'Yhang, shi é mai lhoq dui toq é huí bê nghut ri; nungmoq é hí má, Galile mau shut lô láng berâ. Nungmoq, Yhang lé, haú má lô myâng kó râ nghut lhê.' nghû lô taí kyo keq. Nungnhik lé, ngò taí é lé matsîng chûng keq." ga taí kat ri.

⁸ Haú mù luí, myiwe myhí haú nhik gi, gyuq kôlhang, gyai gabú é myit eq lup mai hân taú lô mù, Yhâng é chángzô pé lé lô taí kyo râ matú, din lô bê nghut ri. ⁹ Haú hkûn, Yesuq gi, radá dâm yhangnhik lé lhom tê mù, "Wángzán nyi kó sháng gaq." ga taí ri. Haú mù, yhangnhik gi, huí ê luí, Yhâng é hkyí má po zîng to mù, Yhang lé noqkuq akô. ¹⁰ Haú hkûn, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e lô keq nghû lô taí kyo keq; haú

má, yhangmoq, Ngo lé myàng kó râ nghut lhê." ga taí kat ri.

Zúng Nyi É Gyezô Pé Taí É Danglù

¹¹ Myiwe haú nhik hkyô má ru nghut nyi ashî le, lup zúng é gyezô pé ra-am gi, myuq hkaú má wang lô mù, dut lai lo é hkyô banshoq lé, haú hkyangjong agyi pé lé lô taí kyo akô nghut ri. ¹² Haú hkyangjong agyi pé gi, suwún wui eq huí lhum luí, hpyê lhûm é htâng má, haú gyezô pé lé, ngùn myo myo tsup byi mù, ¹³ "Myín lé, ngamoq yhup myhî tô é hkûn, Yhâng é chángzô pé lé lô mù, mâng lé, lé hkaú yu lô bekô nghut ri.' nghû taí keq. ¹⁴ Shí hkyô lé, haú mauzau hpó wó gyô é nghut jáng, yhang myit ngón shoq, ngamoq taí râ nghut lhê; haú hkûn, nungmoq gi, hai manghkáng a htoq râ nghut lhê." ga taí kat ri. ¹⁵ Haú mù, gyezô pé gi, ngùn haú pé lé yù luí, yhangmoq lé taí kat é eq rajung za kut bekô nghut ri. Haú su mù, haú hkyô gi, Yudaq byu pé má taí pyo myhîn lô bê nghut mù, ahkuí jé shoq taí nyi bum akô nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶ Hau htâng má, haú chángzo raxe rayuq gi, yhangmoq lé, Yesuq é nhang tô é Galile mau mâ é bùm shut e lô bekô nghut ri. ¹⁷ Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dé jîng kó nghut ri. ¹⁸ Hau htâng, Yesuq gi, yhangmoq chyáng lé lô mù, "Mauhkûng eq myigùng htoq mâ é ahkáng ayá banshoq, Ngo lé byi to bê nghut lhê. ¹⁹ Haú mù, nungmoq gi, htoq é luí, byû myû chângjup lé, Ngá é chángzô pé dut nhâng mù, haú Íwa, Yhangzo, Chyoiyúng Woi-nyí é myìng lang luí, wui-myhup hkâm byi mù, ²⁰ nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htûm é hkûn jé shoq lhang, nungmoq eq rahá ru nghut nyi râ nghut lhê." ga pying tô ri.

MARKUQ é Gabú Danglù Laiká (The Gospel of Mark)

*Yesuq É Matú Hkyô Htong Byî É Hkyô
Mht 3:1-12; Luk 3:1-18; Yhn 1:19-28*

¹ Haú Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haú myiqhtoi Esai-aq laiká má:

"Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê."[☆]

ga luí le,

³ "Haú yoso má, byù rayuq garú taí é htê gi, 'Haú Yhumsing é matú, hkyô hen to keq; Yhâng é matú hkyô lhoq nyhang to keq."[☆]

ga luí le, kê tô é eq rajung za nghut lhê.

⁴ Haú mù, Wui-myhup Sará Yohan gi, yoso hkaú má jé lé luí, wui-myhup hkám byî nyi é eq, yubak mara hkyut pyám byî é hui râ matú myit lhing mù, wui-myhup hkâm yù râ hkyô lé, hko kyô nyi ri. ⁵ Haú hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkâm yu bum akô nghut ri. ⁶ Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri. ⁷ Yhang taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê. ⁸ Ngò gi, nungmoq lé, wui èq za wui-myhup wó hkám byi lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê." gâ ri.

*Yesuq, Wui-myhup Hkâm Yu É Hkyô Eq
Gunlaú Huí É Hkyô*

Mht 3:13-17; 4:1-11; Luk 3:21-22; 4:1-13

⁹ Haú yoq má, Yesuq gi, Galile mau Nazaret wà mai lé jé mù, Yohan chyáng

☆ 1:2 Mal 3:1 ☆ 1:3 Esai 40:3

Yodan làng má wui-myhup hkâm yu ri. ¹⁰ Yesuq gi, wui mai htoq lo é u lé, mauhkúng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri. ¹¹ Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkúng mai danghtê htoq lo ri.

¹² Haú hkûn jáng, Woi-nyí gi, Yhang lé yoso shut wang e ló nhang ri. ¹³ Haú mù, Yhang gi, yoso má myi xê nyí nyi luí, Tsadán èq gunglaú é huí ri; tân jung yosô zè pé le, Yhang eq rahá nghut nyi ri; mau-mang lagyo pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

¹⁴ Yohan htóng gyó é htâng má, Yesuq gi, Galile mau má ló jé mù, ¹⁵ "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhing mù, haú gabú danglù lé lumjíng keq hkoi." ga luí, Garai Gasâng é gabú danglù lé hkô kyo wún ri.

¹⁶ Yesuq gi, Galile nhông yàm mai sô laí ló le, Simun eq yhanggu Andre nhiktâng, nhông má gùn dú nyí kô é lé, myang ri; haú nhik gi, ngozo kóng zo su nhik nghut akô.

¹⁷ Haú mù, Yesuq gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri. ¹⁸ Haú hkûn, yhangnhik gi, radá dâm, gùn pé lé tô pyám to luí, Yhang htâng cháng bekô nghut ri.

¹⁹ Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhaí hkaú má gùn hpo nyi kô é lé, myang ri. ²⁰ Haú hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyâng pé lé, lhaí hkaú má nyhi pyám to kôluí, Yhang htâng cháng bekô nghut ri.

Nat Lé, Yesuq Hkat Htoq Pyám É Hkyô

Luk 4:31-37

²¹ Yhangmoq gi, Kaperna-um wà má e akô; Bánno buinyi nyí jé jáng, Yesuq gi, tarajong má wang è mù, mhogshit hi ló bê

nghut ri. ²² Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri.

²³ Haú u lé, agè ashop é nat wang júng é byù rayuq tarajong má bo lom nyi luí, wut garú kat é gi, ²⁴ "Nazaret wà byù Yesuq é, ngamoq gi, Nàng eq haí sêng lhê lhú? Ngamoq lé lhoq hten râ matú, Nàng jé lé é nghut lhê lhú? Nàng gi, Garai Gasâng é Chyoyúng Sù nghut é lé, ngò sê lhê." gâ ri.

²⁵ Haú hkûn, Yesuq gi, "Hkâjop, yhang chyáng mai htoq ló aq." ga yhang lé tân kat ri. ²⁶ Haú hkûn, agè ashop é nat haú gi, byù haú yuq lé wum kat langhtân nhâng luí, htê mó èq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lhú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byi akô nghut ri." ga luí, taí lhûm bum akô nghut ri. ²⁸ Yesuq eq sêng é ludang gi, Galile mau jam shoq, yang é dông byo myín ló bê nghut ri.

Byù Myo Myo Lé, Yesuq Lhoq Gê Byi É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luí, haú hkûn jáng, Yakuq eq Yohan nhik le mù, Simun eq Andre nhiktâng é yhûm má wang e ló bekô nghut ri. ³⁰ Simûn é yhâng-aumó gi, gyai yhang nò leq tô é nghut mù luí, yhangmoq gi, Yesuq lé haú yuq no é hkyô lhom taí kyô akô nghut ri. ³¹ Haú mù luí, Yesuq gi, yhâng chyáng huí é mù, yhâng é loq má zui luí tu tsung ri; haú hkûn jáng, nò ge byuq luí, yhang gi, yhangmoq lé gai tso gai huq bê nghut ri.

³² Haú nyi buiwang é htâng má, byu pé gi, no é bang eq nat gang wang júng nyi é bang banshoq lé, Yesuq chyáng shuí lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nõhpyo ajung jung huí é bang myo myo lé lhoq gê byi ri; nat gang myo myo lé le, hkat htoq pyâm ri; nghut

kôlhang, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

³⁵ Yesuq gi, htang napkyó mau lháng a bó shimá, toq mù, gaú é jowò rallhum má htoq ê luí, kyú ê dúng ri. ³⁶ Simun eq yhâng é luzúm wuí kúm gi, Yhang lé châng hô kômù, ³⁷ Yhang lé myang hô kôjáng, "Yuq hkangmó gi, Nang lé châng hkat ho nyi akô." ga luí, taí kyô akô nghut ri.

³⁸ Haú hkûn, Yesuq gi, yhangmoq lé, "Awui ayàm má é wà pé má le, ngò, mungdang wó hkô râ matú é sháng, hau é matú ngò lé é ru nghut lhê." ga tû taí ri. ³⁹ Haú mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyâm byi wún ri.

Manggâm Dap Sù Lé, Yesuq Lhoq Gê Byi É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byi râ nghut lhê." ga dung wut ri.

⁴¹ Haú hkûn, Yesuq gi, yhang lé wú shogyo luí, loq lhâm kat mù, haú yuq lé é záng luí, "Ngò dóng lhê, sân-yúng aq hkoi." ga taí ri. ⁴² Haú hkûn jáng, manggâm ana byuq byuq luí, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé gyai yhang sidiq byi mù, radá dâm nhang kat bê nghut ri. ⁴⁵ Nghut kôlhang, haú yuq gi, htoq ló mù, haú hkyô lé je taí pyo myhín ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan má é chamchuyiui dut é jowò má za nyi nyi ri. Nghut kôlhang, byu pé gi, jowò hkangmó mai Yhâng chyáng ru zîng lé nyi bum ashî kó nghut ri.

2

Gùngjum Shî Sû Lé, Yesuq Lhoq Gê Byî É Hkyô

Mht 9:1-8; Luk 5:17-26

¹ Buinyi hkâ-myháng a myáng má, Yesuq gi, Kaperna-um wà má dum wang lò jáng, Yhang yhùm dum taû jé lô bê gâ é hkyô lé, byu pé wó gyô bum akô nghut ri. ² Haû mù, byù myo myo zìng lé lô kôluí, yhùmhkaû má jowò a joq lô é htoq agó, hkumtot má lhang a joq lo nghut ri; Yesuq gi, yhangmoq lé mungdang hko kyô nyi ri. ³ Haû hkûn, byù myi yuq gi, gùngjum shî sù rayuq lé chòm dang waq luí, Yhâng chyáng lé lo akô. ⁴ Yhangmoq gi, byù lùm myô chyîn chyap to mù, byù haû yuq lé Yesuq chyáng a wó shuí jé ê kô é yanmai, Yesuq é u htoq mâ é yhumhkûng lé dong htông yù luí, gùngjum shî sù lé taphkang eq roq hkyô kat akô nghut ri. ⁵ Yesuq gi, yhangmoq é lumjìng myit lé byu-myàng jáng, gùngjum shî sù lé, "Ngá zo ê, náng é yubak mara lé hkyut pyám byi bê." ga taí ri.

⁶ Haû hkûn, tarâ sará pé ra-am gi, haû má zung to kôluí, yhangmoq é i-myt unghkaû má, ⁷ "Byù shí yuq gi, haí mù luí haû su gâ lhê laq? Yhang gi, Garai Gasang lé rhoi dang taí nyi ri; Garai Gasang mai lai luí, ó yuq wá mara wó hkyut byi râ l hú?" ga luí, myit sòn wuí nyi bum akô nghut ri.

⁸ Yesuq gi, yhangmoq é unghkaû má myit wú nyi kô é hkyô lé, radá dâm Yhang é myit mai sé mù, "Nungmoq é i-myt hkaû má, haí mù haû su nghû myit sòn wuí nyi bum akô l hú? ⁹ Haû gùngjum shî sù lé, 'Náng é yubak mara lé hkyut pyám byi bê.' nghû taí é dang eq, 'Toq aq, náng é taphkang lé yù mù, hkyô so aq.' nghû taí râ má, hká hkun je taí lui lhê l hú? ¹⁰ Nghut kôlhang, haû Byu Yhangzo* gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga, yhangmoq lé taí kat ri. ¹¹ Haû htâng, Yhang gi, haû gùngjum shî sù lé, "Ngò, nang lé taí bá, toq aq, náng é taphkang lé yu chùng luí, yhùm taû lò aq hkoí." ga taí ri. ¹² Haû yuq gi, toq mù, yhâng é taphkang lé yu chùng luí, yhangmoq banshoq bang wú tsuq tô é

myoq hí mai sô htoq lò byuq bê nghut ri. Haû é yanmai, yuq hkangmó gi, mauhong bùm kômù, "Isû é hkyô gi, hkâ-nhám lhang a myàng wú shi." ga, Garai Gasang lé hkyaton kungton bum akô nghut ri.

Lewiq (Mahte) Lé Wut Yu É Hkyô

Mht 9:9-13; Luk 5:27-32

¹³ Yesuq gi, nhông yàm má radàm dum htoq e ri. Haû hkûn, byù moq mó gi, Yhâng chyáng jé lé lo bùm kômù, Yhang gi, haû bang lé lhom mhogshit nyi ri. ¹⁴ Yhang gi, sô yông lò nyi é hkûn, kang guq zúm má zung tô é, Alhpe yhangzo Lewiq lé myang kat luí, "Ngá htâng cháng aq." ga taí ri. Haû hkûn, Lewiq gi, toq luí, Yhang htâng cháng bê nghut ri.

¹⁵ Yesuq gi, Lewiq é yhùm má myinzang é zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri.

¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luí, kang guq bang eq yubak dap bang eq rahá zo shuq nyi lhê l hú?" ga myi bum akô nghut ri.

¹⁷ Haû su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chí sará a ra kó, nõhpyo hui bang za sheq ru râ lhê. Haû eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga taí kat ri.

Zoshuq Gám É Eq Sêng É Hkyô

Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Haû mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haí mù a gám kô é l hú?" ga luí, myi akô nghut ri.

¹⁹ Haû hkûn, Yesuq tû taí é gi, "Bíng pé gi, lusik eq rahá nghut nyi tô ashí hkûn,

* **2:10** Byu Yhangzo gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

zoshuq hkâsu wó gám râ lúhú? Yhangmoq gi, lusik eq rahá nghut nyi é u lé, zoshuq gám kó râ a nghut. ²⁰ Nghut kôlhang, lusik lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.

²¹ Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê. ²² Haú eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq râ nghut lhê. Haú mù, tsibiyiq wing asik gi, shokuq htûng sik má za ge kat é nghut lhê.

*Bánno Buinyi É Yhumsîng
Mht 12:1-14; Luk 6:1-11*

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaú mai só lai ló é hkún, Yhâng é chángzô pé gi, kyôshi ratsuí langshap yu akô nghut ri. ²⁴ Haú mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akô lúhú?" ga taí akô.

²⁵ Haú hkún, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq râ tô é hkún, hkâsu kut é hkyô lé, nungmoq hkâ-nhám le a nghap wú kó lúhú? ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúmhkaú má wang é mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tû taí ri.

²⁷ Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. ²⁸ Haú mù, haú Byu Yhangzo gi, haú Bánno buinyi é Yhumsîng lháng nghut lhê." ga xoq taí ri.

3

¹ Yesuq gi, tarajong má radàm dum wang e le, loq raloq ajum shi byuq é byù rayuq nyi to láng ri. ² Haú hkún, haú má nyi tô é bang ra-am gi, Bánno buinyi má, Yesuq mai haú yuq lé lhoq gê byi râ lúhú ga, mara hún

râ matú gyám wú nyi akô nghut ri. ³ Yesuq gi, haú loq jum shí sù lé, "Banshoq bâng é hí má, toq yap shit aq." ga taí kat ri.

⁴ Hau htâng, Yhang gi, haú má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyi râ eq byù sat râ hkyô pé má, hká lhum kut le sheq tarâ wang lhê lúhú?" ga myí kat jáng, yhangmoq kúm gi, jit le a ga kó nghut ri.

⁵ Haú mù, Yhang gi, nhik-yô nau é myit èq haú bang lé lhîng wú mù, yhangmoq myit htan é hkyô lé, wú yón luí, haú loq jum shí sù lé, "Náng é loq nyhang kat aq." ga taí kat jáng, haú yuq gi, loq nyhang kat luí, yhâng é loq gi, shoq za ge byuq bê nghut ri. ⁶ Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhum bum akô nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri. ⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri. ⁹⁻¹⁰ Yesuq gi, byù myo myo lé lhoq gê byi é yanmai, nòhpyo hui to bang gi, Yhang lé wó záng shoq ga, chyîn chyap wang ló bum akô. Byù lúm myo luí, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhaí ralhum hen to nhang ri. ¹¹ Agè ashop é nat pé gi, Yhang lé myàng hkanmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, taí garú akô. ¹² Nghut kôlhang, Yesuq gi, Yhang ó yuq nghut é hkyô lé a taí byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luí, haú bang gi,

Yhâng chyáng jé lé lo bum akô nghut ri. ¹⁴ Haú hkûn, Yesuq gi, byù raxe í yuq lé hkyin yù luí, lagyo ayá byí ri; haú bang gi, Yhang eq rahá nyi rá matú le, mungdang hkô rá matú Yhang nhang htoq kat rá eq, ¹⁵ nat gâng pé lé hkat htoq rá ahko ahkáng wó rá matú le, nghut akô nghut ri. ¹⁶ Haú raxe í yuq gi, Simun (Yesuq mai Petruq ga myìng myhíng byi sù); ¹⁷ Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga myìng myhíng byi ri; hau é lichyúm gi, maugum zô nhik gâ é nghut lhê.); ¹⁸ Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq* dut é Simun eq, ¹⁹ Yhang lé ap pyám rá sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhûm má wang ló le, byù ajùm ayò dum zìng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri. ²¹ Yhâng é yhumbyù wuì gi, haú hkyô lé wó gyo kôjáng, "Yhang, myit a gying lo nghut ri." ga luí, Yhang lé hung shuí yù rá matú, e akô nghut ri.

²² Yerusalem wà mó mai gyó lé lo é tará sará pé gi, "Shí yuq gi, Bezebulaq gâ é nat gâng pé é zau lúng sù nghut ri-nhung! Yhang gi, nat zaú é wum-o a-tsam èq za, nat gâng pé lé hkat htoq pyám é nghut ri." ga taí bum akô nghut ri.

²³ Haú mù luí, Yesuq, yhangmoq lé wut yù mù, dangtú dong taí é gi, "Tsadán gi, Tsadán lé hkâsu kut wó hkat htoq rá lú? ²⁴ Mingdán ralhum gi, ahkaú má byoq gâng lhûm nyi kô é nghut jáng, mingdán haú wó gíng nyi rá a nghut. ²⁵ Yhumhtu ralhum má le, ikun byù yhangchang byoq gâng lhûm nyi é nghut le gi, yhumhtu haú wó gíng nyi rá a nghut. ²⁶ Haú eq rajung za, Tsadán le, yhânggùng yhang lhoq hpyoq luí, gam hkoq nyi é nghut le gi, yhang wó nyi nyi rá a nghut, htùm byuq rá za nghut lhê. ²⁷ Ó yuq nghut kôle, wum-o bò sù lé hí tui zing pyám é a nghut le gi, yhâng é yhûm má lú wâng mù, yhâng é sutzè lé wó lú yù rá a

nghut: Haú yuq lé hí tuí zing pyám jáng sheq, yhâng é sutzè lé wó lú yù rá nghut lhê. ²⁸ Ngò, nungmoq lé teng za taí kôlé, byu pé kut shut é mara banshoq eq rhoi dang taí pyám é pé lé gi, mara wó hkyut pyám byi lhê. ²⁹ Nghut kôlháng, haú Chyoiyúng Woi-nyí lé rhoi dang taí pyám é sù gi, hkâ-nhám le, mara hkyut byi é wó hui rá a nghut; haú yuq gi, ahtum abyuq yubak wó sù nghut nyi ri." gâ ri.

³⁰ Yhang haú su ga taí é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹ Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluí, Yesuq htoq lô rá matú, byù rayuq lé wang taí nhang akô nghut ri. ³² Byù ajùm ayò gi, Yhâng é lhíngkyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naú luí, shinggan má láng bum akô." ga taí kyô akô nghut ri.

³³ Haú hkûn, Yhang gi, "Ó pé gi, Ngá nu eq Ngá gu pé nghut akô lú?" ga myi kat ri.

³⁴ Hau htâng, Yhang gi, Yhâng é lhíngkyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wuì nghut bê! ³⁵ Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

Kyôshi Sân É Dangtú

Mht 13:1-23; Luk 8:4-15

¹ Yesuq gi, nhông yàm má radàm dum mhoqshit hi ló bê nghut ri. Haú hkûn, Yhâng é lhíngkyuq má byù moq mó lûm yán zìng lé lo bùm kô é yanmai, Yhang gi, nhông hkaú má é lhaí má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri. ² Yhang gi, haú bang lé, dangtú pé dông myo myo mhoqshit byi nyi ri; Yhang mhoqshit é má, ³ "Gyo wú keq! Kyô hkyó sù rayuq gi, kyôshi san rá gâ htoq e ló ri. ⁴ Yhang, kyôshi sân

* **3:18** Zelutuq gâ é lichyúm gi, yhumsíng zui sai é hkyô má gyai yhang myit lòm shirong é sù lé gâ lhê. Haú u lé, Israelaq byu pé gi, mingdán luthkyô wó rá matú shikut nyi é hpúng bang lé, Zelutuq gâ lhê.

kat é hkûn, ra-am gi, hkyô má gyó ang mù, nghoq pê èq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle, ⁶ amyit a wó chîn hing é nghut mù, bui htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaû má gyó ang lui, zubyap haú pé kô lò mù, wup pyám é yanmai, ashi a wó zui nghut ri. ⁸ Nghut kôlhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

⁹ Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

¹⁰ Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myi akô. ¹¹ Haú hkûn, Yhang, yhangmoq lé taí kyô é gi, "Garai Gasâng é mingdán eq sêng é sê gyo wuí é hkyô lé sé gyo râ ahko ahkáng, nungmoq lé byi to lugù nghut bê. Nghut kôlhang, góbâng é matú gi, jung hkangmó lé dangtú dông chyat taí é nghut lhê. ¹² Haú mù lui,

"Yhangmoq gi, myang nyi kôlhang, a wú sé kó, gyô nyi kôlhang, a sê gyo kó;

sé wú sê gyo kô é ru nghut le gi, lhing taú lò mù, mara hkyut pyám byi é hui kó râ nghut lhê!✧

gâ ri." ga tô ri.

¹³ Hau htâng, Yhang, yhangmoq lé dum xoq taí é gi, "Nungmoq, dangtú shi lé a sê gyo kô é nghut le gi, gotú dangtú pé lé hkâsu kut ung sê gyo kó râ lú? ¹⁴ Yò mù zui sù san kat é kyôshi gi, mungdang nghut lhê. ¹⁵ Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mâ é mungdang lé lé yù pyám byi ri. ¹⁶ Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit èq hap yù akô. ¹⁷ Nghut kôlhang, yhangmoq gi, amyit a wó chîn é yanmai, razup zo za yuq kômù, mungdang é yanmai, wuihke é eq zing-rí é pé hui kôjáng, hân hân htak lô byuq kó râ nghut lhê. ¹⁸ Dum ra-am nghut

jáng, zugyóm hkaû má gyó âng é kyôshi eq wuí akô; yhangmoq gi, mungdang lé wó gyô yù kôlhang, ¹⁹ shi ipyat lhê é myit wui myit hke hkyô, hkyô shui nghoq jung ngùn hing zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup pyám é yanmai, ashi a wó zui dut kó râ nghut lhê. ²⁰ Ra-am kúm gi, myihpún bo é jang má gyó âng é kyôshi eq wuí akô; yhangmoq gi, haú mungdang lé gyô yù mù, lhom yù lui, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

Myibung Htân É Hkyô

Luk 8:16-18

²¹ Yesuq, yhangmoq lé xoq taí é gi, "Nungmoq gi, myibung lé yù mù, tsung-jang má a tsung e za, mung èq nghop tô é, a nghut jáng, yhupchong ô má tsung tô é, ó yuq wá kut wú akô lú? ²² Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ nghut lhê. ²³ Gyô yù râ nohkyap dap sù ó yuq nghut kôle, gyô yù sháng gaq." gâ ri.

²⁴ Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byi é bung èq, nungmoq lé dum lik byi râ nghut lhê; hau htoq lhang myo shoq wó kó râ nghut lhê.

²⁵ Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

Kyôshi Yuq Kô Lo É Dangtú

²⁶ Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷ Byù haú yuq gi, myín lé yhup tô é nghut nghut, nyi lé toq lo é nghut nghut, kyôshi gi, zui htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri. ²⁸ Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù lui, ashi zui shoq kut é nghut lhê. ²⁹ Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

Angshi Cham Lé Dangtú Yu É Hkyô
Mht 13:31-32; Luk 13:18-19

³⁰ Yesuq dum xoq taí é gi, "Garai Gasâng é mingdán lé, hai èq lhoq whuí wú râ lúhú? Haí jung dangtú yù mù, shit wú râ lúhú?"

³¹ Garai Gasâng é mingdán gi, angshi cham eq wuí ri. Angshi cham haú gi, myigùng má hô é kyômyui jí pé má je tiq é nghut lhê. ³² Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishûm hkaú má, maulat nghoq zô pé lé wó zung nô nyi é nghut lhê." gâ ri.

³³ Haú sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴ Yhang gi, yhangmoq lé, dangtú a bo é haí lhang a taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkgangmó é lichyúm lé taí sân kyô ri.

Laidun Mó Lé, Yesuq Lhoq Zîm Pyâm É Hkyô

Mht 8:23-27; Luk 8:22-25

³⁵ Haú nyí, myinhâng lé, Yesuq gi, Yhâng é chángzô pé lé, "Nga-nhung nhông hé hpoq shut dap e ló sháng." ga taí ri. ³⁶ Haú hkûn, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gû dap ló bekô; gotú lhai pé le, yhangmoq eq rahá bo gû dap ló akô nghut ri. ³⁷ Haú u lé, laidun mó jé lô mù, wuìlhêng hta toq lô luí, lhai má lo bat hâng é yanmai, wuì byíng lô bê nghut ri. ³⁸ Haú hkûn, Yesuq gi, lhai hâng má uhkuq hkuq mù yhup myhî tô ri; haú chángzô pé gi, Yhang lé nhaú pun luí "Sarâ ê, nga-nhung myup shi ló râ dut é lé, nàng a chiq byi lúhú?" ga taí akô nghut ri.

³⁹ Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haú laidun num ló byuq luí, banshoq zîm byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Haí mù, haú-i gyuq bum akô lúhú? Nungmoq gi, lumjîng myit a bò shi kó lúhú?" ga taí ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkasû é byù nghut lhê làhà? Lài eq wuìlhêng pé lhang gi, Yhâng

é dang lé gyo byî ri-nhung!" ga luí, rayuq eq rayuq myí lhum bum akô nghut ri.

5

Nat Gang Hkat Htoq Pyâm É Hkyô
Mht 8:28-34; Luk 8:26-39

¹ Yhangmoq gi, nhông hé hpoq mâ é Gerase byu pé é mau má jé dap e ló akô. ² Yesuq lhai mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri. ³ Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuí èq lhang a wó tuí zing wú kó nghut ri. ⁴ Hkâsu mù gâ le, adàm dàm, yhâng é loq eq hkyî má shamtoq-tuí èq tuí tô wú kôlhang, yhang gi, loq mâ é shamtoq-tui pé lé lhang hpyit pyâm pyâm kut mù, hkyî mâ é shamtoq kyum lé lhoq hkyop pyâm pyâm kut ri. Yhang lé, ó yuq èq le a wó hkuq yù kó nghut ri. ⁵ Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dùn cheq wún ri.

⁶ Yhang gi, Yesuq lé, we mai myang kat jáng, din e ló mù, Yhâng é hí má hkyihput htuq ngop luí, ⁷ htê mó èq, "Myhang htâng é Garaí Yhangzo Yesuq é! Nàng gi, ngò eq haí sêng lhê lúhú? Nàng gi, ngo lé a zing-ri râ matú, Garai Gasâng hí má danggidiq byi laq." ga taí garú ri. ⁸ Haí mù gâ le, Yesuq gi, yhang lé, "Agè ashop é nat nàng ê, byù shí yuq chyáng mai htoq ló aq." ga taí kat é yanmai nghut ri.

⁹ Hau htâng, Yesuq gi, "Náng myîng haí gâ lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gâ lhê." ga tû taí ri. ¹⁰ Hau htâng, yhang gi, haú jowò mai yhangmoq lé a kôn pyâm râ matú, Yesuq lé dum dung dung kut nyi ri.

¹¹ Haú u lé, waq rajùm mó gi, bùm yàm má dù but zô nyi bum akô nghut ri. ¹² Haú mù luí, nat gâng pé gi, "Ngamoq lé, waq pé chyáng nhang kat luí, yhangmoq chyáng wàng nhâng laq." ga luí, Yesuq lé dung akô.

¹³ Haú hkûn, Yesuq gi, yhangmoq lé ahkáng byî kat jáng, haú agè ashop é nat pé gi, haú yuq chyáng mai htoq ló kôluí, waq pé chyáng wang ló byuq bekô nghut ri. Haú mù, haú í hkyîng kô bo é waq hpúng gi,

gampyoq mai nhông hkaû shut rut din yán wang ló kôluí, myup shi byuq bekô nghut ri.

¹⁴ Waq zúng bang gi, h pang din wang ló kômù, myuq hkaû mâ é bang eq awui ayàm mâ é bang lé, haú hkyô ló shit kyo kô é yanmai, byù haú bang gi, dut lai lò bê hkyô lé, ê htoq wú akô nghut ri. ¹⁵ Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luí, byù gè rayuq su zung to láng é lé myàng kômù, gyuq dan bùm bekô nghut ri. ¹⁶ Haú hkyô lé myang é bang gi, nat gâng pé wang júng sù eq waq pê chyáng hkâsu dut é hkyô, góbang lé taí kyo akô nghut ri. ¹⁷ Hau htâng, byu pé gi, Yesuq lé yhangmoq é mau mai htoq ló byuq râ matú, chôm dúng tóngbán akô nghut ri.

¹⁸ Yesuq lhai hkaû má wang ló é u lé, haú nat gâng pé wang júng lai lò bê sù gi, Yesuq htâng cháng râ matú, Yesuq lé dung tóngbán ri. ¹⁹ Nghut kôhang, Yesuq gi, yhang lé ahkáng a byi e za, "Nàng, yhùm shut sheq ló mù, haú Yhumsing, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, nàng é yhumbyù buinùm ji-myi wui lé ló taí kyo aq." ga taí kat ri. ²⁰ Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli* mau bang lé ló taí kyô ri. Haú hkûn, wó gyô é bang banshoq gi, mauhong bum akô nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

²¹ Yesuq gi, lhai ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lìnhghkyuq má lé zing bum akô nghut ri; ²² haú hkûn, Ya-iruaq gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyi wang má paí gop to mù, ²³ "Ngá zo byizo gi, kâng byit ló nyi ri; yhang ge lò mù asak dum dui shi sháng gaq, nàng lé mù, yhâng é ahtoq má loq lé ke byi laq." ga, wum kat dúng tóngbán nyi ri. ²⁴ Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyin chyap wún bum akô.

* 5:20 Dekapoli gâ é gi, Grik đông myuq raxê lé gâ lhê.

²⁵ Haú hkûn, raxe í zân suí yui nyi é myiwe myhi rayuq le haú hpúng má bo tô ri. ²⁶ Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôhang, ge é hkyô a joq é htoq agó, je lhang wuîhke lò ri. ²⁷ Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, Yhâng é bu má é záng kat ri. ²⁸ Haí mù luí gâ le, yhang gi, "Ngò, Yhang é bu má za lhang é wó záng é nghut le gi, ge byuq râ nghut lhê." ga wó myit é yanmai, haú su kut é nghut ri. ²⁹ Haú hkûn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lhú?" ga myi kat ri.

³¹ Haú hkûn, Yhâng é chángzô pé gi, "Náng é lìnhghkyuq má byù ajùm ayò chyin chyap nyi é lé, myang to luí nhing, 'Ngo lé, ó yuq záng bê lhú?' nghu myi lhê lhú?" ga tú taí kat akô.

³² Nghut kôhang, Yesuq gi, Yhang lé lé záng sù lé myàng râ matú, ho lhing wú nyi ashí nghut ri. ³³ Haú hkûn, myiwe myhi haú gi, yhâng chyáng hkâsu dut lai lò bê hkyô lé sê é yanmai, Yesuq é hí má lé mù, gyuq nán é eq Yhang é hkyi wang má ngóm gop to luí, yhâng chyáng dut lai lò bê hkyô banshoq lé taí kyô ri. ³⁴ Haú mù, Yesuq gi, myiwe myhi haú lé, "Byizo é, nàng é lumjín myit gi, nàng lé lhoq gè byi bê nghut ri; nàng é nòhpyo ge byuq bê nghut ri; ngón za ló aq hkoi!" ga taí ri.

³⁵ Yesuq gi, dang ru taí nyi ashí hkûn, tarajong má up sù Ya-iruaq é yhùm mai byù ra-am jé lé mù, "Nang é byizo gi, shi byuq bê; haí mù luí, haú sará lé lhoq hkyik nyi lhê lhú?" ga luí, lé taí kat akô.

³⁶ Yesuq gi, haú bang taí é dang lé gyô lhai pyám mù, "Hkâgyuq, za lumjín aq." ga, haú tarajong má up sù lé taí kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri. ³⁸ Yhangmoq, haú tarajong má

up sù é yhùm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. ³⁹ Yhang gi, yhúmhaú shut wang ló mù, haú bang lé, "Haí mù, yón ngau gabyông nyi bum akô lú? Haú zoshâng gi, shi byuq é a nghut, yhup myhî tô é sheq ru nghut lhê." ga taí ri. ⁴⁰ Nghut kôlhang, yhangmoq gi, Yhang lé wuizui kut pyám byí akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lheq tô é gok má wang e akô nghut ri. ⁴¹ Yesuq gi, myiwe zo hau é loq má zuí to mù, "Talihta ku-mi" (haú é lichyúm gi, "Myiwe zo ê, ngò, nang lé taí bá, toq aq." gâ é nghut lhê.) ga taí ri. ⁴² Myiwe zo haú gi, haú hkûn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yhang maú byuq bùm bekô nghut ri. ⁴³ Yhang gi, haú hkyô ó lé le a sé nhâng râ matú, yhangmoq lé taí hkúm kat luí, myiwe zo haú lé, zô jung byi tso râ matú le, yhangmoq lé taí ri.

6

Yhumsing Wà Má Myoqdong A Wó É Hkyô

Mht 13:53-58; Luk 4:16-30

¹ Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri. ² Bánno buinyì jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasû é wá nghut mù luí, laklaí kumlhá lé lháng kut lhê laq? ³ Shí yuq gi, Mariq é yhangzo, laksíma hpó nghut lhê, a nghut lú? Yhang gi, Yakuq, Yose, Yudaq, Simun pé é yhangmang nghut lhê, a nghut lú? Yhâng nhammó pé le, nga-nhúng eq rahá nghut nyi lhê, a nghut kó lú?" ga luí, Yhang lé myit a ngón dut bùm bekô nghut ri.

⁴ Yesuq, yhangmoq lé taí é gi, "Myiqhtoi rayuq gi, yhumsing é yhum mau, yhâng é buinùm ji-myi wuì eq yhumsing é yhùm má

za, myoqdong a lhaq wó wú é nghut lhê." gâ ri. ⁵ Yhang gi, nò byù ra-am lé loq ke byi mù, lhoq gè byí é mai lai luí, gotú laklaí kumlhá haí le, haú má a wó kut shit nghut ri. ⁶ Haú mù, Yesuq gi, yhangmoq lumjǐng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yù mù, agè ashop é nat pé lé ùng râ a-tsam byi luí, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotú haí le, hkâyú chùng kó; ⁹ hkyî-tsung kúm gi, tsúng chùng keq; nghut kôlhang, bu í dung hkâwut chùng kó. ¹⁰ Hká má nghut kôlhang, rayhùm yhùm má nungmoq wang bíng kô é nghut le gi, haú wá mai dum htoq ló é buinyì jé shoq, haú yhùm má za nyi nyi keq. ¹¹ Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyám to mù, haú jowò mai htoq ló keq." gâ ri.

¹² Haú mù, yhangmoq gi, htoq e ló luí, myit lhing râ é hkyô, byu pé lé hkô kyô akô.

¹³ Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xù but byi luí, lhoq ge byí akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

¹⁴ Yesuq é myìng hù lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luí, taí bum akô nghut ri.

¹⁵ Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoí pé su, myiqhtoí rayuq nghut ri." gâ ri.

¹⁶ Herut kúm gi, haú lé wó gyo jáng, "Ngò, ulhum hpyit pyám byí é Yohan gi, shi é mai dum dui toq bu-nhung!" ga taí ri.

¹⁷ Herut gi, yhanggu Hpilip é yhangmyi Herudiaq lé hâng yu pyám é hkyô é yanmai, Yohan lé chyup tuí yù nhâng mù, htóng hkyô pyám nhang wú é sù nghut lhê.

¹⁸ Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luí, taí byí nyi é yanmai nghut ri. ¹⁹ Haú mù, Herudiaq gi, Yohan lé gyai a jú dut byuq luí, sat pyám naú kôlhâng, a wó sat dut nyi ri. ²⁰ Haí mù gâ le, Herut gi, Yohan, dingmán chyoiyung é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhâng, yhang taí é dang pé lé ru gyô nau nyi ashí nghut ri.

²¹ Nghut kôlhâng, Herut gi, yhâng é hkû ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyi gi, Herudiaq é matú, buinyi gè dut bê nghut ri.

²² Herudiaq é yhangzo byizo gi, wang lé lô mù, gó shit é hkûn, Herut eq yhâng é bing pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haí nghut kôle, dung aq, ngò nàng lé byi râ nghut lhê." ga, dakam é danggidiq byí ri. ²³ Hau htoq agó, yhang gi, myiwe zo haú lé, "Nàng dung é haí nghut kôle, ngò byi râ; ngá é mingdán rawuí gû lháng, byi râ nghut lhê." ga, dakam é danggidiq byí ri.

²⁴ Haú hkûn, myiwe zo haú gi, htoq lô mù, yhâng nu lé, "Haí dúng le gè râ laq?" ga myi jáng, yhângnu gi, "Wui-myhup Sará Yohan é ulhum dung aq." ga tû taí kat ri.

²⁵ Myiwe zo haú gi, radá dâm hân hân wang lô mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

²⁶ Haú su gâ jáng, hkohkâm gi, myit gyai yhang a ngón dut byuq kôlhâng, yhang

dakam tô é danggidiq é yanmai le, bing pé é myoqdong lé tê nau é yanmai le, myiwe zo haú taí é dang lé a kâm he pyám lo nghut ri. ²⁷ Haú mù, hkohkâm gi, zúng é gyezo rayuq lé, Yohan é ulhum é hpyit lô râ matú, radá dâm hkunmó hkyó mù nhang kat ri. Haú mù, haú yuq gi, htóng hkaú má é luí, Yohan é ulhum lé, é hpyit mù, ²⁸ bó má kat luí, myiwe zo haú lé lo byí ri; myiwe zo haú gi, ulhum haú lé, yhângnu chyáng yu ló byí ri. ²⁹ Yohan é chángzô pé gi, haú hkyô lé wó gyo kôjáng, yhâng é mâng lé lé yù luí, lup má ló myhup pyám bekô nghut ri.

*Byù Ngo Hkyîng Lé Byi Tsô É Hkyô
Mht 14:13-21; Luk 9:10-17; Yhn 6:1-14*

³⁰ Lagyo pé gi, Yesuq chyáng dum jé zing lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taí kyô akô nghut ri. ³¹ Hau htâng, byù myo myo gi, yhangmoq chyáng htoq htoq wàng wàng kut nyi kô é yanmai, yhangmoq gi, zang zo ahkyíng lháng a wó kó nghut ri. Haú mù, Yesuq gi, chángzô pé lé, "Nga-nhúng, tsím tsâm é jowò ralhúm má é mù, é nô yù sháng." ga taí ri.

³² Haú mù, yhangmoq gi, yhangmoq baú lhai racham má ji mù, tsím tsâm é jowò shut e ló akô nghut ri. ³³ Nghut kôlhâng, yhangmoq e ló é lé châng myang é bang myo myo gi, yhangmoq lé wú sé kôluí, wà hkangmó mai hkyí hkyô châng din é kômù, yhangmoq é hí má jé to lág akô nghut ri.

³⁴ Yesuq gi, lhai mai gyó dap ló é hkûn, byù moq mó nyi to lág lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byí hi ló bê nghut ri.

³⁵ Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê; ³⁶ yhangmoq gi, awui ayàm má é yhúm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoi." ga taí akô nghut ri.

³⁷ Haú hkûn, Yhang gi, "Nungmoq, yhangmoq lé rajung jung byi tso keq." ga tû taí jáng, yhangmoq gi, "Shí myhó é bang zo râ matú, ngamoq gi, é luí, denari* í sho

* 6:37 Denari rachap gi, byù rayuq é ra-nyí lhê é zuihpau eq wuí ri.

èq muk ê wuî byi ra râ luq?" ga dum taû myî akô nghut ri.

³⁸ Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myî ri. Haû mù, yhangmoq gi, myang hô jáng, "Muk ngo long eq ngozo í du wó lhê." ga, dum tû taî akô nghut ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zùng nhâng râ matú, Yhâng é chángzô pé lé taî kat ri. ⁴⁰ Haû mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri. ⁴¹ Yesuq gi, haû muk ngo long eq ngozo í du lé yù mù, mauhkûng shut tu wú to luî, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi râ matú, Yhâng é chángzô pé lé byî ri. Ngozo í du lé le, Yhang yù mù, banshoq bang lé gàm byî ri. ⁴² Yhangmoq banshoq bang gi, zô gyî bùm bekô nghut ri. ⁴³ Hau htâng, haû chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashî kó nghut ri. ⁴⁴ Haú hkûn, zô é bang gi, yuqgè wuî baú lháng, byù du ngo hkyíng nghut ri.

*Yesuq, Wuî Htoq Má Sô É Hkyô
Mht 14:22-33; Yhn 6:15-21*

⁴⁵ Yesuq gi, haû shiwa byu pé lé byo ló nhang nyi é hkûn jáng, Yhâng é chángzô pé lé lhaî má wang ji nhâng mù, tû tap mã é Bet-saida wà mó shut dap ló láng nhang ri. ⁴⁶ Yhangmoq lé shi-kyâm kat é htâng, Yhang gi, kyûdung râ ga, Yhang baú bùm shut doq e ló bê nghut ri.

⁴⁷ Buigyum htâng, lhaî gi, nhông gùng má jé tô é u lé, Yesuq gi, Yhang baú za myî htoq má nyi tô ashî nghut ri. ⁴⁸ Lai tau mut é yanmai, haû chángzô pé gi, lhaî lhu wuîhkê nyi kô é lé, Yesuq myang ri. Napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luî, yhangmoq é nàm mai lai ló râ dâ ri. ⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garû bum akô nghut ri. ⁵⁰ Hkâsu mù gâ le, yhangmoq banshoq bang gi, Yhang lé

myàng kôluî, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyi keq." gâ ri.

⁵¹ Hau htâng, Yhang gi, lhaî htoq má yhangmoq eq rahá ê doq ji jáng, lai gi, zím byuq bê nghut ri; haû mù, yhangmoq gi, gyai yhang mauhong byuq bùm bekô nghut ri.

⁵² Hkâsu mù gâ lé, yhangmoq gi, muk gam é laklai kumlhá eq séng luî a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gû dap ló kômù, Genesarat mau má jé wang lò jáng, lhaî lé haú má ló shap tô akô nghut ri. ⁵⁴ Yhangmoq lhaî mai gyó é hkûn jáng, byu pé gi, Yesuq lé lhom wú sê akô nghut ri. ⁵⁵ Haû mù, yhangmoq gi, haú mau ramau gón má din jón mù, nò bang lé taphkang mai waq luî, Yesuq nyi rí gâ é jowò hkangmó má, shuí lé lo bum akô nghut ri. ⁵⁶ Yesuq jé é wà hkangmó, myuq hkangmó, awui ayàm mã é wà hkangmó pé má, yhangmoq gi, nò byù lé gai pé má lé lheq to kôluî, Yhâng é bushi htâng má za lháng, haú bang lé byi záng nhâng râ matú, Yhang lé dũng tôngbán akô.

Yhang lé záng é lhunglhâng bang gi, lhoq gè byî é huî akô nghut ri.

7

*A Sanséng Dut Nhang É Hkyô Pé
Mht 15:1-20*

¹ Haû Hparishe pé eq tarâ sará pé ram gi, Yerusalem wà mó mai jé lé lô kômù, Yesuq é nàm má lé zup zíng bum akô. ² Haú hkûn, Yhâng é chángzô pé ra-am gi, htungli dông a chî pyâm é, a sanséng é loq èq zo shuq nyi kô é lé, yhangmoq myang akô nghut ri. ³ (Hparishe pé eq Yudaq byù banshoq bang gi, yhangmoq é îchyí îwâ pé é htungli lé châng é bang nghut lhê mù luî, loq hí a chî é gi, haî le a zô wú kó nghut ri. ⁴ Yhangmoq gi, gai pé mai taû lò jáng le, gùng hí a chî pyâm é, zojung a zo kó nghut é htoq agó, góm pé, hkoq pé, gyi chônkon pé lé chí é htungli gotú pé lé le, châng akô nghut ri.)

⁵ Haû mù, Hparishe pé eq tarâ sará pé gi, Yesuq lé, "Náng é chángzô pé gi, haî mù luî, îchyí îwâ pé é htungli lé a châng e za, a

sansêng é loq eq zo shuq nyi akô lú?" ga myí akô.

⁶ Haú hkûn, Yesuq gi, yhangmoq lé, "Gegùn labyoq kut bang ê, nungmoq eq séng luí myiqhtoi Esai-aq htoí tô é dang má, 'Byù shí bang gi, nhut htoq mai za Ngo lé hkunggâ akô; yhangmoq é myit nhikhum gi, Ngò eq wê gâng nyi akô.

⁷ Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.'*

ga kâ tô é gi, têng ri. ⁸ Nungmoq gi, Garai Gasang tô tô é hkunmó lé tô pyám luí, byu é htungli lé za, myhik zing tô akô nghut ri." ga luí tû taí ri.

⁹ Hau htâng, Yhang xoq taí é gi, "Nungmoq gi, yhumsing é htungli lé za cháng râ matú, Garai Gasâng é hkunmó lé he-ngik pyâm é má, hpaqchyí gyaí bo akô nghut ri.

¹⁰ Hkâsu mù gâ le, Mosheq gi, 'Nungmoq é înu îwa lé, hkungga keq.'* ga le, 'Înu îwa lé, nhîng é sù ó yuq nghut kôle, sat pyâm é hui râ lhê.'* ga le, kâ tô é nghut lhê.

¹¹ Nghut kôlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunhuq) nghut lhê gá nhang akô.

¹² Haú mù, haú yuq lé, yhângnu yhângwâ é matú, haí a kut byi nhâng lô é dông dut bê nghut ri. ¹³ Haú dông mai, nungmoq gi, nungmoq chung gyó lo é htungli é yanmai, Garai Gasâng é mungdang lé he-ngik pyâm akô; haú sù é hkyô myo myo lé le, nungmoq kut akô nghut ri." gâ ri.

¹⁴ Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keq;

¹⁵ Shinggan mai wang lo é haí jung le, byù lé a sanséng dut nhang é a nghut, nghut kôlhang, byu é unghkaú mai htoq lo é zè kúm gi, byù lé a sanséng dut nhang lhê." gâ ri. ¹⁶ (Gyo râ nohkyap dap é sù gi, gyô yù sháng gaq.)" ga taí ri.*

¹⁷ Yhang gi, byù moq mó mai htoq lo mù, yhúmkaú má jé wang lo é hkûn, Yhâng

é chángzô pé gi, dangtú haú eq séng luí, Yhang lé lhom myí akô nghut ri. ¹⁸ Haú mù, Yhang gi, yhangmoq lé, "Nungmoq gi, haú-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lú? ¹⁹ Hkâsu mù gâ lé, haú gi, byu é myit nhikhum hkaú má wang lo é a nghut e za, wamdau hkaú má sheq wang lo é nghut mù, shinggan shut dum lhoq htoq pyâm é nghut lhê." ga taí ri. (Yhang isu ga taí é gi, zoshuq lhunglhang sanséng lhê gá nau é dông nghut ri.)

²⁰ Hau htoq agó, Yhang xoq taí é gi, "Byù mai htoq lo é haí jung le, byù lé a sanséng nhâng wó dut é nghut lhê. ²¹ Hkâsu mù gâ lé, ahkaú mai htoq lo é gi, byu pé é myit mai htoq lo é nghut mù, agè ashop é dông myit é hkyô pé, ashop é dông gungsho zùm yap é hkyô, hkaú é hkyô, byù sat é hkyô, su-myi sulàng lú hkyô, ²² myoqnoq é hkyô, agè ashop é hkyô, mhaú zô é hkyô, achaq achyut zùm yap lhúm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; ²³ Agè ashop é hkyô shí pé banshoq gi, byu é unghkaú mai htoq lo é nghut mù, byù lé a sanséng dut nhang ri." gâ ri.

Tungbau Myiwe Myhi Rayuq É Lumjing Myit

Mht 15:21-28

²⁴ Yesuq gi, haú jowò mai htoq lo mù, Turuq eq Sidun maukyo shut e ló luí, yhúm ralhum má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri. ²⁵ Haú mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyô wang má lé paí gop to luí, ²⁶ yhang zô chyáng mai nat gang lé hkat htoq pyám byi râ matú, Yhang lé dúng tôngbán ri. Myiwe haú gi, Suru-Hpiniki mau mâ é Grik byuhú nghut ri.

²⁷ Yesuq gi, "Zo wui† hí zô gyi kó sháng gaq; haí mù gâ le, zô wui chyáng mâ é

* 7:7 Esai 29:13 ✦ 7:10 Htoq Ló 20:12 ✦ 7:10 Htoq Ló 21:17 * 7:16 Bun zo shí gi, Chyúmlaiká ra-am má bo lhê, ra-am má a bò. † 7:27 Zo wui gâ é gi, Yudaq byu pé lé gâ é nghut lhê. ‡ 7:27 Hkuí pé gâ é gi, tungbau pé lé gâ é nghut lhê.

zoshuq lé yù mù, hkuî pé[‡] lé byi tsô é jung a nghut." ga yhang lé taî kyô ri.

²⁸ Haú hkûn, yhang gi, "Yhumsîng ê! Haú kúm nghut ri; nghut kôlhang, siboî ô mâ é hkuî lhang, zô wui é zô myhit shuq htâng lé, ge zo lhê a nghut lú?" ga dum tû taî ri.

²⁹ Haú mù, Yesuq gi, yhang lé, "Nàng tû taî é dang hau é yanmai, ló lo aq hkoi; haú nat gang gi, nung zô chyáng mai htoq ló byuq bê nghut ri." ga taî kat ri.

³⁰ Myiwe myhí haú gi, yhûm má dum taú jé lo é hkûn, yhang zo chong htoq má leq to lánq é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sû Lé Lhoq Gé Byî É Hkyô

³¹ Yesuq gi, Turuq mau mai dum htoq ló mù, Sidun mai sô laî ló luí, Dekapoli mau hkaú dông laî byit mù, Galile nhông shut gyó jé ló ri. ³² Haú hkûn, byù ra-am gi, nojit é eq dang a hkyang é byù rayuq lé, Yhâng chyáng shuî lé lô kômù, haú yuq é ahtoq má loq ke byi râ matú, Yhang lé dúng tóngbán akô nghut ri.

³³ Yesuq gi, haú yuq lé baú za byù hpúng mai shuî htoq yù mù, yhâng é nohkyûng má loqnyhui htaú háng byi luí, sôkan byé tik yù mù, haú yuq é shô má htau byî ri. ³⁴ Hau htâng, Yhang gi, mauhkûng shut tu wú mù, soq mó shê luí, "Ehpahta!" (Lichyúm gi, "Bóng aq hkoi!") ga luí, haú yuq lé taî kat ri. ³⁵ Haú hkûn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haú hkyô ó lé le a taî kyo râ matú, yhangmoq lé hkúm kôlhang, yhangmoq gi, je hkúm le, je taî pyo akô nghut ri. ³⁷ Byu pé gi, gyai yhang mauhong byuq bùm kôluí, "Yhang gi, hai lé le, ge é dông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, taî bum akô nghut ri.

8

Byù Myi Hkyîng Lé Byi Tsô É Hkyô

Mht 15:32-39

¹ Haú yoq má, gotû byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé

wut yù mù, ² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, hai le a myàng zo kó nghut ri.

³ Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmut gû yhûm shut nhang kat é nghut le gi, hkyolat má mutyut yut é ló hui kó râ nghut lhê." ga taî ri.

⁴ Haú hkûn, Yhâng é chángzô pé gi, Yhang lé, "Ísu é yoso má nhîng, shî myhông bang lé luq shoq byi tso râ zoshuq gi, hkâmá é yù râ lú?" ga taî akô.

⁵ Yesuq gi, "Nungmoq, muk hkâ-myhông long wó akô lú?" ga taú myi jáng, yhangmoq gi, "Nyhit long." ga, dum tû taî akô nghut ri.

⁶ Haú mù, Yhang gi, byù hpúng lé myigùng htoq má zùng nhang to luí, muk haú nyhit long lé yù mù, jeju ban hkya-on jáng, myhik hpé luí, haú bang lé gàm byi râ matú, Yhâng é chángzô pé lé byî kat ri; haú mù, yhangmoq gi, haú bang lé gàm byî akô nghut ri. ⁷ Yhangmoq gi, ngo-nú zo ratsuî le wó akô nghut ri; haú mù, Yhang gi, ngozo haú pé é matú jeju hkya-on luí, chángzô pé lé dum gàm byî nhang ri. ⁸ Yuq hkangmó zô gyî bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsîng yu ashî kó nghut ri. ⁹ Zô é bang gi, byù myi hkyîng kô nghut ri; Yesuq gi, haú bang lé, nhang kat luí, ¹⁰ Yhâng é chángzô pé eq rahá, lhai má wang ji mù, Dalamanuhta mau má ê jé akô nghut ri.

¹¹ Hparishe pé gi, lé mù, Yesuq eq dang htîng htîng lhûm akô; hau htoq agó, yhangmoq gi, mauhkûng mâ é kumlhá lé dúng é dông, Yhang lé chyam wú akô nghut ri.

¹² Yesuq gi, myit nò-kying kying luí, yhangmoq lé taî é gi, "Hai mù luí, shí ipyat lhê é byu pé gi, limik kumlhá dúng akô lú? Ngò teng za taî kôlé, shí ipyat mâ é bang lé, hai kumlhá le tûn shit râ a nghut." gâ ri. ¹³ Hau htâng, Yhang gi, yhangmoq lé pyâm to mù, lhai má dum taú wang ló luí, tû tap shut gû dap e ló bê nghut ri.

Hparishe Pé Eq Herut É Múnchi

Mht 16:5-12

¹⁴ Haú chángzô pé gi, muk yu chûng râ lé tô-myhî pyám kôluí, lhai hkaú má muk

ralong za ru wó akô nghut ri. ¹⁵ Yesuq gi, yhangmoq lé, "Nungmoq gi, Hparishe pé eq Herut é múnchi* lé, sidiq luí, koi pyâm nyí keq." ga taí ri.

¹⁶ Haú hkûn, yhangmoq gi, "Nga-nhûng chyáng muk a bo é yanmai, haú su ga taí é nghut ri." ga luí, rayuq eq rayuq taí lhûm bum akô nghut ri.

¹⁷ Haú su ga taí lhûm nyí kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù taí lhûm nyí akô lhú? Ahkuí jé shoq, nungmoq gi, a byu-myàng, a sê gyo shi kó lhú? Nungmoq é myit nhiklhum gi, ru htan nyi ashí kó lhú? ¹⁸ Myoq dap to kôluí nhîng, a myàng kó lhú? Nohkyap dap to kôluí nhîng, a wó gyo kó lhú? ¹⁹ Ngò, muk ngo long lé myhik hpé mù, byù ngo hkyîng lé byi tsô é hkûn, zô myhit shuq htâng lé, nungmoq hkâ-myhó mung wó guq tsîng yu é lé, bun ashí kó lhú?" ga myí jáng, yhangmoq gi, "Raxe í mung." ga tú taí akô.

²⁰ Dum, Yesuq gi, "Ngò, muk nyhit long lé myhik hpé mù, byù myí hkyîng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsîng yù kô é lhú?" ga myí jáng, yhangmoq gi, "Nyhit mung." ga dum tú taí akô.

²¹ Haú hkûn, Yesuq gi, "Haú nghut le nhîng, ahkuí le, a sê gyo shi kó lhú?" ga, yhangmoq lé myí ri.

Myoqjit Sû Rayuq Lé Lhoq Gê Byí É Hkyô

²² Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi râ matú, dîng tóngbán akô.

²³ Yesuq gi, myoqjit sû haú yuq é loq lé zui mù, wà shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myí kat ri.

²⁴ Haú jáng, yhang gi, tu wú kat luí, "Byu pé gi, sîkgâm su dut luí, hkyô sô wún é lé, ngò myang ri." ga taí ri.

²⁵ Hau htâng, Yesuq gi, haú yuq é myoq má Yhâng é loq dum ke byí ri; haú hkûn, haú yuq é myoq gi, bóng lô mù, ge byuq luí,

haí lé le san za myàng bê nghut ri. ²⁶ Yesuq gi, haú yuq lé, "Wà hkaú má hkâwang ló lo." ga taí luí, yhâng é yhûm shut ló nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi wà mó awui ayàm má é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lhú?" ga myí ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akô." ga, Yhang lé tú taí akô.

²⁹ Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myí jáng, Petruq gi, "Nàng gi, Hkrisduq† nghut ri." ga tú taí ri.

³⁰ Yesuq gi, haú hkyô ó lé le a taí kyo râ matú, yhangmoq lé taí hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rî é myo myo hui zo luí, suwún wú, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyí má, dum dui toq râ nghut lhê." gâ ri.

³² Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yù mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, yhumsing é tapzîng lé waq chûng luí, cháng ra râ nghut lhê. ³⁵ Hkâsu mù gâ le,

* **8:15** Shí má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê. † **8:29** Grik dong Hkrisduq gâ é gi, xû but hui Sù gâ é lichyûm nghut mù, Hebre dong "Mesaia" gâ é eq rajung za nghut lhê.

yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai le, haù gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê. ³⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyû bò râ lúhú? ³⁷ Byù gi, yhumsing é asak woi-nyí lé, hai èq wó htaí yù râ lúhú? ³⁸ Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyâm é sù ó yuq lé le, haù Byu Yhangzo gi, Yhang Wâ é hpungwup shingkan bo é èq, haù chyoyúng maumang lagyô pé eq rahá jé lé é hkûn, hoq pyám râ nghut lhê."☆ gâ ri.

9

¹ Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó râ a nghut." ga taí ri.

Yesuq É Ihpyô Isâm Htaí Lo É Hkyô
Mht 17:1-13; Luk 9:28-36

² Hkyuq nyí lai htâng má, Yesuq gi, Petruq lé le, Yakuq eq Yohan lé le, shuí chùng mù, yhangmoq baú myhang é bùm ralhum má doq ló akô; haù hkûn, yhangmoq é myoq hí tê má, Yesuq é ihpyô isâm htaí lo ri. ³ Hau htoq agó, Yhang é mebu gi, wik wik duq hpyu zan lo ri; myidàm htoq má, ó yuq le haù-í hpyû shoq a wó xaù hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dâng nyo lhùm nyi akô.

⁵ Haù mù, Petruq gi, Yesuq lé, "Rabai ê, shí jowò má nga-nhúng nyi le ge ri; haù mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí ri. ⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haí taí râ le a sé mù, haù su gâ é nghut ri.

⁷ Hau htâng, mhut htoq lô luí, yhangmoq lé htup zing lô mù, mhut hkaù mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang é dang gyo keq." gâ ri.

☆ 8:38 Yer 3:8; Ezk 23:37; Hos 2:2-10

⁸ Haù hkûn jâng, chángzô pé gi, lhinghkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taù gyó lô kô é hkûn, Yesuq gi, haù Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo râ matú taí hkúm tô ri. ¹⁰ Chángzô pé gi, dang haù lé myit má kat to kôluí, "Shi é mai dum dui toq râ." gâ é lichyúm lé, rayuq eq rayuq myí lhùm bum akô nghut ri.

¹¹ Hau htâng, yhangmoq gi, "Eliyaq hí lé ra râ nghut lhê ga, tarâ sará pé haí mù taí kô é lúhú?" ga, Yesuq lé myí akô.

¹² Haù hkûn, Yesuq gi, "Eliyaq hí jé lé é gi, teng bê nghut luí, lhunglhang lé dum lajâng tô é nghut ri. Nghut kôlhang, haù Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to ashí, a nghut kó lúhú? ¹³ Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tû taí ri.

Nat Dap É Yuqgè Zo Rayuq Lé Lhoq Gé
Byi É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pê chyáng dum taù jé lô kô é hkûn, haù bâng é lhinghkyuq má byù moq mó zing lé é lé le, tarâ sará pé, haù bang eq dang htíng htíng lhùm nyi kô é lé le, myang akô. ¹⁵ Haù má nyi tô é lhunglhang bang gi, Yesuq lé myang kat é eq, maú byuq kôluí, din ê mù, ê shi-kyâm akô nghut ri.

¹⁶ Haù hkûn, Yesuq gi, yhangmoq lé, "Nungmoq gi, yhangmoq eq haí lé dang htíng htíng lhùm nyi akô lúhú?" ga myí ri.

¹⁷ Byù hpúng hkaù mâ é rayuq tû taí kat é gi, "Sarâ ê! Nhut jit nhang é nat wang júng tô é ngá é yuqzo lé, Náng chyáng shuí lé lo lhê. ¹⁸ Nat haù gi, yhang chyáng wàng hkangmó, yhang lé myí htoq má lhoq leqbat nhang ri; haù mù, yhang gi, nhut mai guttsú htoq lhê, zui kyik kyik lhê, langhtan lo lhê, dut ri; hau é yanmai, nat haù lé hkat

htoq pyám byi râ matú, Náng é chángzô pé lé dúng wú kôhang, yhangmoq a wó dut kó nghut ri." gâ ri.

¹⁹ Haú hkûn, Yesuq gi, "Lumjínng myit a bo é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lú? Yuqgè zo haú lé, Ngá chyáng shuí lé lô keq." ga taí kat ri.

²⁰ Haú mù, yhangmoq gi, yuqgè zo haú lé shuí lé lo akô; nat haú gi, Yesuq lé myang kat é eq yhang, yuqgè zo haú lé langhtân nhang ri; yuqgè zo haú gi, myigùng má lêng leq luí goleng leng mù, nhut mai tsû-myup htoq nyi ri.

²¹ Haú hkûn, Yesuq gi, yhangwa lé, "Yhang, isu dut é hkâ-myháng myáng bê lú?" ga myi jáng, yhang wa gi, "Zoshâng hkûn mai nghut bê. ²² Nat haú gi, yhang lé lhoq sat pyám naú mù, myi má le, wui má le, anum num lêng wàng nhang wú bê nghut lhê; nghut kôhang, Nàng, rajung jung wó kut byi é nghut le gi, ngá hpe lé shogyo yù laq, garúm yù laq." ga tú taí ri.

²³ Yesuq gi, "Nàng, wó kut byi é nghut le gi, 'nghû, haí mù taí lhê lú? Lumjínng myit bò su é matú gi, haí le wó dut lhê." ga, yhang lé taí ri.

²⁴ Haú zôshang é yhangwa gi, radá dâm, "Ngò lumjínng lhê; nghut kôhang, ngá é lumjínng myit gi, shaú ashí nghut é yanmai garúm yù laq." ga taí garú ri.

²⁵ Yesuq gi, byù hpúng din zîng lé lô kô é lé, myàng jáng, haú agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhang chyáng mai htoq lô aq; hkâ-nhám le, yhang chyáng hkâdum wàng lo." ga tân kat ri.

²⁶ Haú hkûn, nat haú gi, garu mù, zoshâng haú lé wum kat langhtân nhang luí, htoq lô byuq bê. Zoshâng haú gi, shí mâng gùng su dut byuq é yanmai, byù myo myo gi, "Yhang shí bê nghut ri." ga taí akô. ²⁷ Nghut kôhang, Yesuq gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

²⁸ Yesuq, yhúmkaú má wang ló é htâng, Yhâng é chángzô pé gi, "Ngamoq gi, haí mù, nat haú lé a wó hkat htoq é lú?" ga, tsik za Yhang lé myi akô.

²⁹ Yesuq gi, "Haú jung nat lé gi, kyûdùng é dông za a nghut jáng, wó hkat htoq râ a nghut." ga, yhangmoq lé tú taí ri.

³⁰ Yhangmoq gi, haú jowò mai htoq ló mù, Galile mau mai laí ló akô; nghut kôhang, Yesuq gi, ó lé le a sé nhâng naú nghut ri. ³¹ Haí mù gâ le, Yhang gi, "Haú Byu Yhangzo gi, byu pé é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôhang, Yhang gi, shi é htâng sum nyi nghû râ nyi má, dum dui toq râ nghut lhê." ga, Yhâng é chángzô pé lé mhoqshit byi nyi é yanmai nghut ri. ³² Yhâng é chángzô pé gi, dang haú lé a sê gyo kôhang, Yhâng chyáng a wám myi kó nghut ri.

*Kô Dik Sû Gi, Ó Yuq Nghut Lhê Lú?
Mht 18:1-5; Luk 9:46-48*

³³ Yhangmoq gi, Kaperna-um wà má jé e akô nghut ri. Yesuq gi, yhúmkaú má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lú?" ga myi ri. ³⁴ Nghut kôhang, yhangmoq gi, zim za nyi tô akô; hkâsu mù gâ le, ko dik sû gi, ó yuq nghut lhê nghû é hkyô lé, hkyolat má, yhangmoq dang chyin chyin lhum kô é yanmai nghut ri.

³⁵ Yesuq gi, zùng mù, haú chángzo raxe í yuq lé, wut yù luí, "Kô dik naú sû ó yuq nghut kôle, tiq dik sû eq banshoq bâng é dui-nhâng zoshâng dut ra râ nghut lhê." ga taí ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gung má shap to luí, dum bún yù mù, yhangmoq lé taí é gi, ³⁷ "Shí sû é zoshâng lé, Ngá é myiing mai hap yu é sû ó yuq nghut kôle, Ngo lé hap yu é sû nghut bê; Ngo lé hap yu é sû ó yuq nghut kôle, Ngo lé za hap yu é a nghut, Ngo lé nhang kat é Sû lé hap yu é le nghut lhê." gâ ri.

*Nga-nhúng Lé Gyè A Kut É Sû Gi, Nga-nhúng É Hkyam Shut Nghut Lhê Gâ É Hkyô
Luk 9:49-50*

³⁸ Haú hkûn, Yohan gi, "Sarâ ê! Náng é myiing lang luí, nat gâng pé lé hkat pyám byi wún é byù rayuq lé, ngamoq myang ri. Yhang gi, nga-nhúng chyáng a lòm sû nghut

é yanmai, yhang lé ngamoq hkûm pyâm é nghut lhê." ga taí ri.

³⁹ Yesuq kúm gi, "Yhang lé hkâhkúm kó; Ngá myîng lé lang luí, laklai kumlhá kut é sù gi, razup za má, Ngò eq séng luí, a ge é hkyô pé lé taí râ a nghut; ⁴⁰ Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê. ⁴¹ Ngò, nungmoq lé teng za taí kôlé, nungmoq gi, Hkrisduq eq séng é bang nghut lhê gâ é yanmai, ngá é myîng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô
Mht 18:6-9; Luk 17:1-2

⁴² Ngo lé lumjîng é zoshâng wuì má é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má é dú hkyó pyâm é huí é nghut lé gi, yhang é matú je gè râ nghut lhê. ⁴³ Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri. ⁴⁴ (Haú ngaraí ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.)* ⁴⁵ Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyi í hkyi dap luí, hkâ-nhám le, myiduq a dat shum é ngaraí ming má dú hkyô pyâm é hui râ htoq má, hkyi rahkyi za dap luí, ahtum abyuq é asak wó râ shut wang le gi, náng é matú je ge ri. ⁴⁶ (Haú ngaraí ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.) ⁴⁷ Náng é myoqjí èq, nang lé mara kut shut nhang é nghut le gi, haú lé lap choq pyám aq; myoqjí í jí dap gú, ngaraí ming má dú hkyô pyâm é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.

⁴⁸ (Haú ngaraí ming gi, 'yhangmoq lé hkê nyi é luq le a shî, myiduq lé a shûm' é jowò nghut lhê.)*

⁴⁹ Hkâsu mù gâ le, hkungga sho lé xo kat luí lhoq sansêng é su, myi gi, yuq hkangmó lé lhoq sanséng râ nghut lhê.*

⁵⁰ Xo gi, ge lhê. Nghut kôlhang, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuq eq rayuq nguínón nyí keq." ga taí ri.

10

Myi, Làng Gâng É Hkyô
Mht 19:1-12; Luk 16:18

¹ Hau htâng má, Yesuq gi, Kaperna-um mai htoq ló mù, Yuda mau má é maukyo má é jé luí, Yodan làng tú tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi, Yhang lhaq kut nyi é eq rajung za, haú bang lé mhòqshit byi ri.

² Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lhú?" ga myí é dong, Yhang lé chyam wú akô.

³ Yesuq gi, "Mosheq gi, nungmoq lé, hkâsu ga hkunmó hkyó tô é lhú?" ga taú myí ri.

⁴ Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byi tô ri." ga tú taí akô.

⁵ Yesuq dum tú taí é gi, "Nungmoq é myit nhikhum htân kô é yanmai, Mosheq gi, tarâ haú lé kâ tô é nghut lhê. ⁶ Nghut kôlhang, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.* ⁷ 'Hau é yanmai, yuqgè gi, yhumsing înu îwâ chyáng mai htoq luí, yhangmyi eq rahá rading ralhum za kut nyi mù, ⁸ yhangnhik gi, gungsho ralhum za dut byuq kó râ nghut lhê.'* ⁹ Haú mù luí, yhangnhik gi, í yuq a nghut lo é za, rayuq za dut bê nghut ri. ⁹ Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

¹⁰ Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myí akô. ¹¹ Haú hkûn, Yhang gi, "Yhumsing é yhangmyi lé kâng pyám mù, myiwe gotù dum hâng yu é sù

* **9:44** Bun zo 44, 46, gi, Chyúmlaiká myo myo má a bo é nghut lhê. ✧ **9:48** Esai 66:24 ✧ **9:49** Nhong 2:13 ✧ **10:6** Apûn 1:27 ✧ **10:8** Apûn 2:24

ó yuq nghut kôle, su-myi lú é sù dut bê nghut mù, yhangmyi lé shut é sù nghut bê.
 12 Myiwe rayuq le, yhumsing é yhanglàng lé kàng pyám mù, yuqgè góyuq eq dum hâng é nghut le gi, sulàng lú é hkyô lé kut bê nghut ri." ga tû taí ri.

Zoshâng Wuì Eq Yesuq É Hkyô
Mht 19:13-15; Luk 18:15-17

13 Byu pé gi, zoshâng wuì lé Yesuq záng byi sháng gaq ga, Yesuq chyáng shuí lé lo akô; nghut kôlhang, chángzô pé gi, yhangmoq lé lhom tân hkûm akô nghut ri. 14 Haú lé Yesuq myàng jáng, Yhang gi, wú nhik-yo naú luí, "Haú zoshâng wuì lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú su é bâng é mingdán ru nghut lhê.
 15 Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng râ a nghut." ga yhangmoq lé taí ri. 16 Hau htâng, Yesuq gi, zoshâng wuì lé bún yû mù, yhangmoq ahtoq má loq ke luí, shimân byí ri.

Sùt Wó É Zorâm Rayuq É Hkyô
Mht 19:16-30; Luk 18:18-30

17 Yesuq gi, hkyô dum so xoq e ló é hkûn, byù rayuq gi, din lé lô mù, Yhâng é hí má hkyihput htuoq luí, "Ge é Sará ê, ahtum abyuq é asak wó yû râ matú, ngò haí kut ra râ lú?" ga myí ri.

18 Haú mù, Yesuq gi, "Haí mù, Ngo lé ge é Sará nghu lhê lú? Garai Gasang mai lai luí, ge é ó yuq le a nyì. 19 Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!*" ga bo tô é lé, nàng sê lhê." ga tû taí ri.

20 Haú hkûn, haú yuq gi, "Sará ê, haú pé banshoq lé, ngò, zoshâng hkûn mai cháng bê nghut lhê." ga taí ri.

21 Yesuq gi, haú yuq lé wú tsuq to mù, yhang lé chyitdap luí, taí é gi, "Nàng kut râ rajung râ tô ashí; ló mù, nàng wó miwó lé ùng pyám luí, myùng bang lé byí pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." gâ ri.

22 Haú yuq gi, dang haú lé wó gyo jáng, sutzè gyai wó sù nghut é yanmai, myoq-dong shum byuq mù, gyai yhang myit a ngón é èq ló byuq bê nghut ri.

23 Yesuq gi, lhîngkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haú-í yhang wuì ri-nhung!" ga taí ri.

24 Chángzô pé gi, Yhang taí é dâng é yanmai, mauhong bum akô nghut ri. Nghut kôlhang, Yesuq dum xoq taí é gi, "Zo wuì ê, Garai Gasâng é mingdán má wàng râ matú, haú-í yhang wuì ri-nhung! 25 Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." gâ taí ri.

26 Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyí yu é hui râ nghut lhê lú?" ga, taí lhûm bum akô nghut ri.

27 Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut râ a nghut; nghut kôlhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga taí ri.

28 Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to luí, Nàng htâng cháng bê nghut lhê." ga taí ri.

29 Haú mù, Yesuq tû taí é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuì eq yò pé lé tô pyâm tô é sù ó yuq nghut kôle, 30 shí pyat lhê é yhûm pé, gumang gu-nhá wuì, înu pé, zo dù wuì eq yò pé lé, rashô tú wó hkam yù luí, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yû râ nghut lhê. 31 Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê." gâ ri.

Yesuq, Yhang Shî Râ Hkyô Lé Dum Taí É Hkyô
Mht 20:17-19; Luk 18:31-34

* 10:19 Htoq Ló 20:12-16

³² Yhangmoq gi, Yerusalem wà mó shut doq ló nyí kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzo raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taí kyô é gi, ³³ "Wú keq, nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pê é loq má ap byí pyâm é hui râ nghut lhê; haú bang gi, Yhang lé, shî râ mara byi luí, tûngbaù pé é loq má ap byí pyám kó râ nghut lhê. ³⁴ Haú bang gi, Yhang lé, wuizui kut pyâm é, sôkan byé gyûn é, nhuq bat é kut yù mù, sat pyám kó râ nghut lhê. Hau htâng sum nyí má, Yhang dum dui toq lô râ nghut lhê." ga ri.

Yakuq eq Yohan nhik dung é hkyô

Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ é, ngá-nhik dúng é gû banshoq, Nang kut byi râ lé, ngá-nhik ô nau ri." ga taí akô.

³⁶ Haú hkûn, Yhang gi, "Ngò, nungnhik lé haí kut byi râ ô nau akô lhú?" ga myí ri.

³⁷ Yhangnhik gi, "Náng é hpungwup shingkang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tú taí akô.

³⁸ Nghut kôhang, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm* lé, nungnhik wó shuq kó râ lhú? Ngò hkam yù râ baptisma lé, nungnhik wó hkam yù kó râ lhú?" ga yhangnhik lé tú taí ri.

³⁹ Haú hkûn, yhangnhik gi, "Nga-nhik wó dut lhê." ga tú taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê. ⁴⁰ Nghut kôhang, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haú pé gi, hen to byí é hui bâng matú za nghut lhê." ga yhangnhik lé taí ri.

⁴¹ Haú su gâ é hkyô lé, haú gotû chángzo raxê yuq wó gyo kôjáng, yhangmoq gi,

Yakuq eq Yohan nhik lé nhik-yô akô nghut ri. ⁴² Yesuq gi, yhangmoq banshoq bang lé wut tsíng yù luí, "Tûngbaù pé lé uphkang é ga bang gi, tûngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chûng mù, up zô nyi kô é hkyô lé le, nungmoq sé lhê. ⁴³ Nghut kôhang, nungmoq chyáng gi, haú su a dut kó sháng gaq, nungmoq má, byù mó dut nau sù ó yuq nghut kôle, nungmoq é dui-nhâng zoshâng dut ra râ nghut lhê. ⁴⁴ Hau htoq agó, nungmoq má ushuq dut nau sù ó yuq nghut kôle, banshoq bâng é jùn dut ra râ nghut lhê. ⁴⁵ Hkâsu mù gâ le, haú Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé taí ri.

Myoqjit Sû Barateme, Myoq Dum Myang É Hkyô

Mht 20:29-34; Luk 18:35-43

⁴⁶ Hau htâng, yhangmoq gi, Yerihko wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyí kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri. ⁴⁷ Yhang gi, Nazaret wà byù Yesuq laí ló é lé wó gyo jáng, "Dawiq é Yhangzo Yesuq é, ngo lé shogyo yù laq ô!" ga garû kat ri.

⁴⁸ Haú mù, byù myo myo gi, zim za nyi râ matú yhang lé tân hkûm akô; nghut kôhang, yhang gi, "Dawiq é Yhangzo é, ngo lé shogyo yù laq ô!" ga, je riyhang garû kat ri.

⁴⁹ Haú mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoí; Yhang, nang lé ji nyi ri; toq aq." ga myoqjit sù haú lé taí akô.

⁵⁰ Haú hkûn, haú yuq gi, yhâng é buhîng lé hkyut pyám mù, byam chy luí, Yesuq chyáng lé jé ri.

⁵¹ Yesuq gi, yhang lé, "Ngò, nang lé haí kut byi râ ô nau ri lhú?" ga myi jáng, yhang gi, "Sarâ é, ngò myoq myàng nau ri." ga tú taí ri.

* **10:38** Góm eq baptisma gâ é gi, jamjau hui râ eq shî râ lé, taí nau é nghut lhê.

⁵² Yesuq gi, "Ló aq hkoi, náng é lumjínq myit gi, náng lé lhoq gê byi bê nghut ri." ga tai kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

11

Yesuq, Yerusalem Wà Mó Má Wang Ló É Hkyô

Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm mâ é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé, ² "Nungnhik, hí mâ é wà má é keq; wà haú má wang é hkûn jáng, ó le a jî wú shî é logúng zo tuí to láng é lé, é myâng kó rá nghut lhê; haú lé hpyi yù mù, Ngá chyáng she lò keq. ³ Byù rayuq yuq mai, 'Haí mù, haú su kut nyi akô lú?' ga nungnhik lé lhom myi jáng, 'Shí du lé, haú Yhumsîng râ ri ga, razup má dum taú dé byi rá nghut lhê.' nghû tú tai keq." ga pyîng luí, nhang kat ri.

⁴ Haú nhik gi, e ló mù, hkyô mó yâm mâ é hkumdong nàm má tuí tô é logúng zo radu lé, é myâng kôluí, haú lé tuí hpyi nyi akô. ⁵ Haú hkûn, haú má yap tô é bang ra-am gi, "Haí mù, logúng tuí hpyi nyi akô lú?" ga myî akô. ⁶ Haú jáng, yhangnhik gi, Yesuq pyîng kat é eq rajung za tai kyo kôjáng, yhangmoq gi, she ló rá ahkáng byi kat akô nghut ri. ⁷ Yhangnhik, logúng zo haú lé Yesuq chyáng she jé ló é hkûn, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jî ri. ⁸ Byù myo myo gi, yhangmoq é buhîng pé lé, hkyô má hkyut hkang byi akô; ra-am gi, yò pé má zân yu é mhandíng lé hkang byi akô nghut ri. ⁹ Hí má so bang eq htâng má châng é bang gi,

"Hosana!"

Haú Yhumsîng é myîng mai jé lé lô Sû gi, hkungsô wó nyî sháng gaq ô!

¹⁰ Jé lé lô rá nghut é, nga-nhûng é îwa Dawiq é mingdán gi, hkungsô wó nyî sháng gaq ô!

Htoq tsáng myhâng má hosana nghut sháng gaq ô!"[☆]

ga luí, tai garû bum akô nghut ri.

¹¹ Yesuq gi, Yerusalem wà mó má jé mù, noqkuq yhûm má wang é luí, lhîngkhyuq mâ é jung hkangmó lé wú ri; nghut kôlhang, buí gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq e ló bekô nghut ri.

Maihpáng Gâm Ashi A Zui Râ Matú Tai É Hkyô

Mht 21:18-19

¹² Hau htang nyí, yhangmoq, Behtani wà mai htoq ló kô é hkûn, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú má ashî zúî lhê laq ga é jé wú le, ahaq mai lai luí, haí le a myàng nghut ri. Haí mù gâ le, maihpáng-shi zui yâm a nghut é yanmai nghut ri. ¹⁴ Haú mù, Yesuq gi, shigâm haú lé, "Ahkuí mai gi, náng chyáng mâ é ashî, ó yuq le a myàng zo lo kó sháng gaq." ga tai ri. Yhâng é chángzô pé gi, haú su ga tai é dang lé wó gyô yu akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wà mó má jé é hkûn, Yesuq gi, noqkuq yhûm má wang é mù, haú mâ é zè ung zè wuì kut nyi é bang lé, hkat htoq pyám luí, ngùn htaí zo bâng é siboí pé eq hpûngkyui ung zo bâng é tanghkuq pé lé tu mhuq pyám byí ri. ¹⁶ Hau htoq agó, Yhang gi, ó yuq lé nghut kôle, ung zè lé noqkuq yhûm mai a waq lai nhâng kut pyâm ri. ¹⁷ Yesuq, yhangmoq lé mhoqshit é gi,

"Ngá yhûm gi, byù myû lhunglhâng bâng é matú, kyûdung yhûm ga rá nghut lhê."[☆]

ga kâ tô é a nghut kó lú? Nghut kôlhang, nungmoq gi, 'damaq hkyûng' kut pyám bekô nghut ri." gâ ri.[☆]

¹⁸ Hkyangjong agyi pé eq tarâ sará pé gi, haú lé wó gyo kômù, Yhang lé hkâsu kut wó sat pyám rá hkyô ho nyi akô; nghut kôlhang,

* **11:9** Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9, 10 má gi, hkya-on dang dông chung é nghut lhê. [☆] **11:10** Hkya-on 118:25-26 [☆] **11:17** Esai 56:7 [☆] **11:17** Yer 7:11

shiwa byu pé gi, Yhang mhoqshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, wà hkaû mai htoq ló bekô nghut ri.

Maih páng Gâm Nyhuí Shi Byuq É Hkyô
Mht 21:20-22

²⁰ Htang napkyó, yhangmoq sô lai ló le, maihpáng gâm gi, amyit mai yhang nyhuí kyuq shi byuq é lé myang akô. ²¹ Petruq gi, myit bûn kat luí, "Rabai ê, wú aq! Nang nhing pyâm é maihpáng gâm gi, nyhuí shi byuq bê nghut ri." ga luí, Yesuq lé taí ri.

²² Haú hkûn, Yesuq gi, "Garai Gasang lé lumjìng keq. ²³ Ngò, nungmoq lé teng za taí kôlé, ó yuq nghut kôlé, i-myit má úng-âng é hkyô a bo é za, yhumsing taí é hkyô gi, dut lò rá nghut lhê ga lumjìng kô é nghut le gi, bùm shi lé, 'Htot mù, wuimau má ló gyó wâng aq.' ga taí le lháng, haú hkyô dut byi rá nghut lhê. ²⁴ Haú mù luí, Ngò, nungmoq lé taí kôlé, nungmoq haí dúng le le wó yû rá nghut lhê nghû lumjìng kô é nghut le gi, wó yû kó rá za nghut lhê.

²⁵ Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq gi, kyûdúng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶ (Nghut kôlháng, nungmoq mai mara a hkyut pyám byí é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi rá a nghut.)" ga tû taí ri.†

Yesuq É Ahko Ahkáng Lé Myí Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tará sará pé eq suwún wuí gi, Yhâng chyáng lé jé kômù, ²⁸ "Hai ahko ahkâng èq, Nang, shí pé lé kut nyi lhê lhú? Haú su kut rá ahko ahkáng, Nang lé ó yuq byí é lhú?" ga myí akô.

²⁹ Haú jáng, Yesuq gi, "Ngò le, nungmoq lé rajung myí wú kôlé, tû taí wú keq; haú

hkûn, hai ahko ahkâng èq, Ngò, shí pé kut é hkyô lé taí kyo rá nghut lhê. ³⁰ Yohan byí é baptisma gi, mauhkûng mai lhú? A nghut jáng, byu chyáng mai lhú? Taí wú keq!" ga taú myí kat ri.

³¹ Haú hkûn, yhangmoq chôm hpyê lhum kô é gi, "'Mauhkûng mai nghut lhê' nghû nga-nhúng taí jáng le, 'Haú nghut le nhing, haí mù, yhang lé a lumjìng kô é lhú?' ga rá nghut; ³² 'Byu chyáng mai nghut lhê.' nghû jáng le..." gâ ri. (Yohan gi, myiqhtoí rayuq gè gè nghut lhê ga, lhunglhâng bang lumjìng bùm kô é yanmai, yhangmoq gi, haú byu pé lé gyuq bum akô nghut ri.)

³³ Haú mù, yhangmoq gi, Yesuq lé, "Ng-amoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

12

Tsibiyiq Hkyâm Saí Bang Lé Dangtú Yu É Hkyô

Mht 21:33-46; Luk 20:9-19

¹ Hau htâng, Yesuq, dangtú dông yhangmoq lé taí é gi, "Byù rayuq gi, tsibiyiq hkyâm rahkyam saí to mù, lhinghkyuq kyâm to luí, tsibiyiq wing pyik htoq rá donghkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri. ² Kyôshu yoq jé jáng, yhang gi, yhang yù âng é tsibiyiq shi ê yû rá matú, dui-nhâng zoshâng rayuq lé, hkyâm saí zo bâng chyáng nhang kat ri. ³ Nghut kôlháng, haú bang gi, haú yuq lé lhom chyup bat luí, loq kôm taú nhang kat akô. ⁴ Haú mù, yhang gi, gotú dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpû kat akô nghut ri. ⁵ Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashí nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

† 11:26 Bun zo shí gi, Chyúmlaika ra-am má za bo lhê.

⁶ Ló htáng má, yhang gi, yhang chyitdap é zo lé nhang kat râ za ru nghut alô; haû mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

⁷ Nghut kôlhang, haû bang gi, 'Shí yuq gi, silí wunlí sing yû râ sù nghut lhê; lé keq, yhang lé sat pyám sháng, haû jáng sheq, silí wunlí pé lé nga-nhung wó yû râ nghut lhê.' ga rayuq eq rayuq taí lhûm bum akô. ⁸ Haû mù, yhang lé chyup yû luí, sat pyám mù, hkyâm shinggan shut dú htoq pyâm akô nghut ri.

⁹ Haû jáng, tsibiyiq hkyâm yhumsîng gi, yhangmoq lé hkâsu kut râ lhú? Yhang gi, ê mù, haû hkyâm saí zo bang lé sat pyám luí, hkyâm haû lé, góbang lé htot ngho byí pyám râ nghut lhê. ¹⁰ Chyúmdang má, 'Yhûm saí bâng eq hkyin htoq pyâm é luq-gok gi, htungchyûn mâ é ahkyak dik é luqgok dut bê.

¹¹ Shí hkyô gi, haû Yhumsîng kut é nghut luí, nga-nhung é myoq hí má mauhpo dut bê nghut ri.' ga bò tô é lé, nungmoq a nghap wú kó lhú?"[✠] gâ ri.

¹² Hau htâng, yhangmoq gi, dangtú haû, yhangmoq lé lhoq ang luí taí é hkyô lé, sé kô é yanmai, Yhang lé chyup yû râ matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

Kehtaq Lé Kang Kat Byí É Hkyô
Mht 22:15-22; Luk 20:20-26*

¹³ Hau htâng má, yhangmoq gi, Yesuq é dang má mara hô luí Yhang lé chyup yû râ matú, Hparishe pé ra-am eq Herut é byu pé ra-am lé, Yesuq chyáng nhang kat akô. ¹⁴ Haû bang gi, Yhâng chyáng lé jé kômù, "Sarâ ê, Nang gi, tengmán sù nghut é lé, ngamoq sê lhê. Nang gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é dông mhoqshit é sù nghut ri. Haû mù, Kehtaq lé kang kat byí le gi, ge lhê lhú? ¹⁵ Ngamoq kat ra râ lhú? A kat ra râ lhú?" ga Yhang lé taí akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, haí mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taí kat ri. ¹⁶ Haû hkûn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhú?" ga myí ri.

Yhangmoq gi, "Kehtaq é nghut ri." ga tû taí akô.

¹⁷ Haû mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasâng lé byi keq." ga taí jáng, yhangmoq gi, maú byuq bùm bekô nghut ri.

*Saduke Pé, Yesuq Lé Myí Chyam É Hkyô
Mht 22:23-33; Luk 20:27-40*

¹⁸ Haû dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô. ¹⁹ Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhung lé, Mosheq kê to byí ri. ²⁰ Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yû luí, zo dù a dap é za shi ló byuq bê nghut ri. ²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haû eq rajung za dut byuq bê nghut ri. ²² Haû nhiktâng wuì nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haû le châng shi ló byuq bê nghut ri. ²³ Haû mù luí, haû dum dui toq é buinyi má, myiwe myhí haû gi, hká yuq é yhangmyi nghut râ lhú? Hkâsu mù gâ le, yhang gi, haû nyhit yuq é yhangmyi dut wú bê sù nghut ri." gâ akô.

²⁴ Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú? ²⁵ Haû shi byuq bê bang dum dui toq é hkûn gi, myi byí myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. ²⁶ Shi é mai dum lhoq dui toq é hkyô eq séng luí, Mosheq kê tô é laiká má lháng, haû nyé

[✠] 12:11 Hkya-on 118:22-23 * 12:12 Kehtaq gâ é gi, "hkoséng" gâ é nghut lhê.

duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê. [✧] ga kâ tô é lé, nungmoq a nghap wú kó l hú? ²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taí ri.

Ahkyak Dik É Jep É Tarâ
Mht 22:34-40; Luk 10:25-28

²⁸ Tarâ sará rayuq gi, lé lô mù, yhangmoq taí htíng lhum nyi kô é lé, lé wó gyô ri. Yhang gi, haú bang lé, Yesuq rago tú taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê l hú?" ga myí ri.

²⁹ Haú jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhùng é Yhumsîng Garai Gasang za, Garai Gasang nghut lhê. ³⁰ Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq, náng é wum-o banshoq èq, chyitdap râ lhê. [✧] gâ é nghut lhê. ³¹ Hau htang lhum gi, 'Náng gûng lé náng chyitdap é su, náng é chyangnâm mâ é bang lé le chyitdap aq. [✧] gâ é nghut lhê. Shí í l hùm htoq kô é tarâ gotû a joq lo." ga yhangmoq lé tú taí ri.

³² Haú hkûn, tarâ sará haú yuq gi, "Gyo naú bê, Sará ê! Garai Gasang rayuq za nghut lhê, gotû a nyi lo ga náng taí é gi, têng ri. ³³ Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap râ lhê gâ é eq, náng gùng lé náng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga taí ri.

³⁴ Yesuq gi, yhang hpaqchyí bo é dông tú taí nyi é lé myàng jáng, "Nàng gi, Garai Gasang é mingdán eq a we lo nghut ri." ga yhang lé taí kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?
Mht 22:41-46; Luk 20:41-44

³⁵ Yesuq, noqkuq yhùm má mhoqshit nyi é hkûn lé taí é dang gi, "Haí mù, haú tarâ sará pé gi, Hkrisduq lé, Dawiq é yhangzo za nghut lhê gâ akô l hú? ³⁶ Dawiq gi, Chyoiyúng Woi-nyí èq taí nhang é má, 'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taí ri. [✧]

gâ ri. ³⁷ Haú mù, Dawiq yhang l háng, Hkrisduq lé, Yhumsîng gâ é nghut le gi, yhangzo za hkâsu ge nghut râ l hú?" gâ ri.

Byù hpúng mó gi, Yhâng é dang lé, gabú myit èq gyô nyi bum akô nghut ri.

³⁸ Yesuq gi, mhoqshit uchyang taí é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún lui, gai pé má lhom shi-kyâm yù râ lé le, ³⁹ tarajong pé mâ é ahkyak dik é zùng jang pé eq poi pé mâ é réng é zùng jowò pé má myang zùng râ lé le, ô nau nyi bum akô. ⁴⁰ Yhangmoq gi, chuimó pé é yhùm-yò pé lé hpýoq zo hpýoq shuq kôluí, kyû hîng hîng dũng shit mhaú é bang nghut akô. Haú su é bang gi, dam byí é je riyhang hui zo kó râ nghut lhê." gâ ri.

Chuimó Myhí Kat É Alu Ngùn
Luk 21:1-4

⁴¹ Yesuq gi, alu sidek nàm má zung to mù, noqkuq yhùm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô. ⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri. ⁴⁴ Haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga taí ri.

13

Ló Htâng Buinyì Má Dut Lò Râ Hkyô
Mht 24:1-21, 29-35; Luk 21:5-33

¹ Yesuq, noqkuq yhûm mai htoq ló é hkûn, Yhâng é chángzo rayuq gi, "Sarâ ê, wú aq; hkâ-í ko é luqgok pé! Hkâ-í hkik é yhûm pé!" ga Yhang lé taí kat ri.

² Haú hkûn, Yesuq gi, "Nàng, yhûm mó shí pé lé myàng lhê a nghut lú? Luqgok shí pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." gâ tú taí ri.

³ Yesuq gi, Tsanlun Bùm má, noqkuq yhûm shut hû mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, ⁴ "Haú hkyô pé gi, hkâ-nhám dut lò râ lú? Haú dut lò râ hkûn, hkasû é kumlhá htoq lô râ nghut lhê lú? Ngamoq lé taí kyô wú laq." ga Yhang lé baú myî akô nghut ri.

⁵ Haú mù, Yesuq gi, yhangmoq lé, "Nungmoq lé, ó yuq eq le a wó shuí nghoq sháng gaq, sidiq nyi keq. ⁶ Hkâsu mù gâ le, 'Ngô gi, haú yuq* nghut lhê.' ga, Ngá myîng lé lêng é byù myo myo pô htoq lô mù, byù myo myo lé shuí nghoq kó râ nghut lhê. ⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyì gi, a nghut shi. ⁸ Byù ra-myû eq ra-myû, mingdán ralhum eq ralhum majan zân lhum lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuîhke jamjau hkyo é apûn awang za ru nghut ashí.

⁹ Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má é ap pyám kó râ nghut é htoq agó, tarajong pé má nungmoq lé nhuq bat kó râ nghut lhê. Hau htoq agó, nungmoq gi, Ngá mying é yanmai, mauzau wui eq hkohkam pé é hí má, saksé dông yap ra kó râ nghut lhê. ¹⁰ Haú gabú danglù gi, amyû banshoq lé hí hko kyo ra râ nghut lhê. ¹¹ Nungmoq gi, chyup yu é hui lúi, jep huí é hkûn, haí taí râ lé, hkâ-myit chiq kó. Ahkyíng jé jáng, nang lé myit htoq lô

nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyí eq taí nhang é ru nghut lhê.

¹² Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyám nhâng kó râ nghut lhê.

¹³ Byù lhunglhang bang gi, Ngá é yanmai, nungmoq lé a nguì kut kó râ nghut lhê; nghut kôlhang, jiltûm jé shoq wó hkam jân nyi é sù gi, hkyi yu é hui râ nghut lhê.

¹⁴ 'Haú lhoq hten lhoq hpyoq é achayut hkyô* gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpanng doq ló kó sháng gaq. ¹⁵ Yhumhkûng htoq má nyi tô é sù gi, yhúmhaû mâ é zè haí lé le, a ló gyó wang yù lo sháng gaq. ¹⁶ Yò má nyi tô é sù gi, yhâng é buhîng lé a ló taú yu nyi lo sháng gaq. ¹⁷ Haú buinyì pé má, zogùng dut é myiwe wui eq naú huq ashí nghut é înu wui gi, hkâ-í yhang wuîhke bekó nghut ri myhi-nhung. ¹⁸ Haú hkyô gi, gyoqmyò má a dut sháng gaq, kyûdûng nyi keq. ¹⁹ Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shî é wuîhke jamjau mó gi, haú buinyì pé má dut lò râ nghut lhê; haú su é hkyô gi, htàngnùng má hkâ-nhám le dum dut lo rá a nghut. ²⁰ Buinyì haú pé lé, haú Yhumsîng Garai mai a lhoq shaú é nghut le gi, ó yuq le asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyì haú pé lé, Yhang lhoq shaú pyám byi bê nghut ri. ²¹ Haú ahkyíng má, byù rayuq yuq mai, nungmoq lé, 'Wú keq, shî má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjîng kó. ²² Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lhê. ²³ Haú mù, nungmoq sidiq nyi keq; ahkyíng a jé shi mai, ngò, nungmoq lé, jung hkangmó taí kyô nyi gù nghut lhê.

* 13:6 Haú yuq gâ é gi, Hkrisduq lé gâ é nghut lhê. ✧ 13:14 Dan 9:27; 11:31; 12:11

²⁴ Buinyì háu pé má, wúhke jamjau háu pé laí é htâng,

'Buì gi, noq byuq mù, lhamó gi, a tsô dut byuq rá nghut lhê;

²⁵ kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhùn é huì bùm kó rá nghut lhê.*

²⁶ Háu hkûn, háu Byu Yhangzo gi, mhut ji mù, hpungwup a-tsam mó eq le, hpungwup shíngkang eq le, gyó lé lo é lé, byu pé byu-myàng kó rá nghut lhê. ²⁷ Háu htâng má, Yhang gi, Yhâng é maumang lagyô pé lé nhang kat mù, maumyî chyûn hkangmó eq myigùng htum shoq, mauhkûng htáng shoq mai, Yhang hkyin yu tô é bang lé shuí tsíng yù nhâng rá nghut lhê.

²⁸ Maihpáng gâm lé wú mù, mhoq yú keq; agàm maí a-nyuq nyún lô mù, ahaq htut lô jáng, buì nyé nám chyâng lò bê lé, nungmoq sê lhê. ²⁹ Háu eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lháng nghut nyi bê hkyô lé, nungmoq sé lo keq. ³⁰ Ngò, nungmoq lé teng za taí kôlé, shí pyat mâ é byu pé a ban shi byuq shimá, háu hkyô pé banshoq dut byuq rá nghut lhê. ³¹ Mauhkûng eq myigùng gi, a joq lo dut byuq rá nghut lhê; nghut kôlháng, Ngá é dang gi, ru joq nyi rá nghut lhê.

Háu Buinyì Eq Ahkyíng Lé, Ó Le A Sé
Mht 24:36-44

³² Buinyì eq ahkyíng háu lé gi, ó yuq le a sé; mauhkûng htoq mâ é maumang lagyô pé lháng a sé; háu Zo le a sé; háu Íwa za ru sê lhê. ³³ Háu mù, nungmoq gi, ahkyíng háu hkâ-nhám jé rá lé, a sé kô é yanmai, sidiq nyi keq! Machya nyi keq! ³⁴ Háu gi, byù rayuq, yhâng é dui-nhâng zoshâng wui lé, ó le ó eq sêng é mù lé gàm byi to mù, hkum zúng sù lé le, machya nyi rá matú pying to lui, yhâng yhùm lé, háu dui-nhâng zoshâng wui chyáng ap pyâm to mù, byin we shut htoq ló byuq é sù eq pung ri.

³⁵ Háu mù, háu Yhumsíng hpó gi, myin-htâng laq, myín gunggàm laq, woqtún hkun laq, maubó zó laq, hkâ-nhám jé lô rá lé nungmoq a sê kô é yanmai, sidiq machya

nyi keq. ³⁶ Háu a nghut jáng, Yhang, dàn loq tung tau jé lo é hkûn, nungmoq yhup myhi tô é lé, lo myang pyám rá nghut lhê. ³⁷ Ngò, nungmoq lé, 'sidiq machya nyi keq,' nghu taí é eq rajung za, yuq hkangmó lé le, taí é nghut lhê." ga taí ri.

14

Yesuq, Xú But Byi Huì É Hkyô

Mht 26:1-16; Luk 22:1-6; Yhn 11:45-53; 12:1-8

¹ Ahkuì, háu Lhoqlhai Poì eq múmchi a kat é Muk Zo Poì jé rá í nyi za ru ra alô hkûn, hkyangjong agyi pé eq tará sará pé gi, Yesuq lé hkâsu kut wó haq chyup yù mù, sat pyám rá matú, hkyô ho nyi akô nghut ri. ² Nghut kôlháng, yhangmoq gi, "Byu pé gabyông lô kó abe, poì gyoro má gi, a kut shi sháng." ga taí akô.

³ Yesuq gi, Behtani wà má nyi é manggâm dap wú sù Simûn é yhùm, siboì má nghe zung tô é hkûn, myiwe myhi rayuq gi, nardu amyit mai za saí yu é, gyai hpaù é namngón xú bo é alabasta (luq hpyû) bòng yu lé lô mù, bòng háu lé lãng hkyui lui, namngón xú háu lé Yesuq é ulhum má hut gyun byi ri.

⁴ Háu má nyi tô é bang ra-am gi, wú nhik-yô é myit èq, rayuq eq rayuq taí lhum kô é gi, "Hái mù, namngón xú lé aha agó kut pyâm lhê laq? ⁵ Háu namngón xú lé, denari* sùm sho èq ung lui, myùng bang lé byi le ge lhê mhai!" gá akô. Yhangmoq gi, myiwe myhi hau lé le, gyai chôm tân akô.

⁶ Nghut kôlháng, Yesuq gi, yhangmoq lé, "Myiwe zo háu lé, hkâtân nyi kó; hái mù, yhang lé i-myt lhoq myo nhang nyi akô lhu? Yhang gi, Ngá é ahtoq má ge é hkyô kut bê nghut ri. ⁷ Háu myùng bang gi, nungmoq eq rahá hkâ-nhám le nyi rá nghut lhê mù, nungmoq garúm nau é hkûn, yhangmoq lé wó garúm lhê. Nghut kôlháng, ngò gi, shí má nungmoq eq rahá ayang nyi nyi rá sù a nghut. ⁸ Yhang gi, yhang wó dut é í kut bê nghut ri. Yhang, Ngá gung má, namngón xú hut gyùn é gi, Ngá gung lé yhum rá matú, hí hen lajâng tô é ru nghut lhê. ⁹ Ngò, nungmoq lé teng za taí kôlé,

* 13:25 Esai 13:10; 34:4 * 14:5 Denari rachap gi, byù rayuq é ra-nyi lhê é zuihpau eq wui ri.

haù gabú danglù lé mingkan gón hko kyô é jowò hkanmó má, yhang lé myit bún é dông, yhang kut é hkyô shí lé, taí kyo bekô râ nghut lhê." ga taí kyo ri.

¹⁰ Hau htâng, haù chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pè chyáng e ri. ¹¹ Haù bang gi, haù hkyô lé lhom wó gyo kôjáng, gyô gabú luí, yhang lé ngùn byi râ ga, dang-gidiq byi akô. Haù mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹² Haù htungli joq é eq rajung za, Lhoql-hai Poí hkingga sauzo jaú byi é, múnchi a kat é Muk Zo Poí sâng-hi nyi má, Yesuq é chángzô pé gi, Yesuq lé, "Nàng zo râ Lhoql-hai Poí lé, ngamoq hkâmá ê món to râ lhú?" ga myí akô.

¹³ Haù mù, Yhang gi, chángzo í yuq lé, "Nungnhik, myuq hkaù shut wang ló keq, wuì yambú waq é byù rayuq lhom hui râ nghut lhê; haù hkùn, nungnhik gi, yhang htâng cháng keq. ¹⁴ Haù yuq, wang ló é yhùm mâ é yhumsing lé, 'Ngò, Ngá é chángzô pé eq rahá, Lhoqlhai Poí lé zo râ bíng wap hkâmá nghut lhê lhú ga, Sará myí nhang kat ri.' nghu taí keq. ¹⁵ Haù hkùn, hen to gù nghut é, ahtoq mâ é wap mó lé lhom tân shit râ nghut lhê. Wap haù má, nga-nhùng é matú ê hen to keq." ga taí luí, nhang kat ri.

¹⁶ Chángzo haù nhik gi, htoq e ló mù, myuq hkaù má wang e ló le, Yesuq taí kat é eq roq za é myâng kômù luí, Lhoqlhai Poí lé, món to bekô nghut ri.

¹⁷ Myinhtâng jé lô jáng, Yesuq gi, haù chángzo raxe í yuq eq rahá, haù má lé jé bekô nghut ri. ¹⁸ Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq mâ é rayuq sú gi, Ngo lé ap pyám râ nghut lhê." ga taí ri.

¹⁹ Haù hkùn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

²⁰ Haù hkùn, Yhang gi, "Haù yuq gi, haù raxe í yuq mâ é rayuq nghut lhê. Ngò eq

rahá, hkoq shí má muk jùmzo sù nghut lhê.

²¹ Haù Byu Yhangzo gi, Yhang eq sêng luí kâ tô é eq rajung za, shí râ za nghut lhê. Nghut kôlhang, haù Byu Yhangzo lé ap pyám é sù gi, dingnyé wó ri; haù yuq gi, a hku lé le lháng, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé my-hik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byi ri.

²³ Hau htâng, Yhang gi, góm lé le, yù mù, jeju hkya-on luí, yhangmoq lé byi ri; yhangmoq banshoq bang gi, haù lé yù shuq akô nghut ri.

²⁴ Yesuq gi, yhangmoq lé, "Shí gi, byù myo myô é matú htoq pyám é, dangshikaq eq sêng é Ngá sui nghut lhê. ²⁵ Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

²⁶ Yhangmoq gi, hkya-on mahkôn ralhūm ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Hkyô Lé, Te Taí É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lunglhang bang gi, myit lingbat kó râ nghut lhê; hkâsu mù gâ le,

'Haù sau zúng sù lé, Ngò bat sat pyám mù, sau pé gi, lhoq pyo pyám é hui kó râ nghut lhê.'*

ga kâ tô ri. ²⁸ Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló lánng râ nghut lhê." ga taí ri.

²⁹ Haù hkùn, Petruq gi, "Góbang banshoq myit lingbat kôlhang, ngò gi, myit lingbat râ a nghut." ga taí kat ri.

³⁰ Haù mù, Yesuq gi, "Ngò, nàng lé teng za taí lé, hkù-nyí, hkù-myîn yhang jáng, woq í dâm a tân shimá, nàng, Ngo lé sum dâm he-ngik pyám râ nghut lhê." ga tû taí ri.

³¹ Nghut kôlhang, Petruq gi, "Ngò, Nàng eq rahá shí râ dut kôlhang, Nang lé ngò he-ngik pyám râ a nghut." ga zuq zuq taí ri. Góbang

banshoq le, haû su ga châng taí bum akô nghut ri.

Get-samane Gâ é Jowò Má Kyûdûng É Hkyô

Mht 26:36-46; Luk 22:39-46

³² Yhangmoq gi, Get-samane gâ é jowò má jé lô kômù, Yesuq gi, Yhâng é chângzô pé lé, "Ngò, kyû ê dúng nyi é u lé, shí má zùng láng keq." ga taí ri. ³³ Yesuq gi, Yhang eq rahá Petruq, Yakuq, Yohan pé lé, shuí chûng ri. Haû hkûn, Yhang gi, myit gyai a ngón é eq myit wuîhke é hui mù, ³⁴ yhangmoq lé, "Ngò gi, shí râ í yhang myit yón nyi ri; nungmoq gi, machyâ luí, shí má láng nyí keq." ga taí ri.

³⁵ Yesuq gi, haû mai ratsuí zo sô ê mù, myigùng má gop byên to luí, ahkyíng haû lé ge lhoq lhaí pyám byí le gi, Yhâng chyáng mai lhoq lhaí pyám byi râ matú, ³⁶ "Aba,† Áwa ê, Nàng gi, haí le wó dut é Sû nghut lhê. Góm‡ shí lé, Ngá chyáng mai yu pyám byi laq. Nghut kôlháng, Ngò ô nau é đông a nghut, Nàng ô nau é đông sheq nghut sháng gaq." ga kyûdûng ri.

³⁷ Hau htâng, Yhang gi, Yhâng é chângzô pé chyáng dum taû lo le, yhangmoq yhup myhí to kô é lé lo myang ri. Haû mù, Yhang gi, Petruq lé, "Simun, nàng yhup ngón nyi lhê lhú? Razup za lháng a wó machya nyi lhú? ³⁸ Gunглау é a hui sháng gaq, machyâ luí, kyûdûng nyi keq. Haû woi-nyí gi, kâm nyi kôlháng, gungsho gi, wum nyhôm nyi ri." ga taí ri.

³⁹ Yesuq gi, radàm dum ê mù, hí lé dúng é dang lé za, ê dung ri. ⁴⁰ Yhang dum taû lo le, yhangmoq gi, myoqkuq lai kô é yanmai, yhup myhí to láng kô é lé, lo dum myang ri. Yhangmoq gi, Yhang lé haí taí râ a sé dut byuq akô nghut ri.

⁴¹ Yesuq gi, sum dâm nghû râ lhîng má, yhangmoq chyáng dum taû jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lhú? Gé bê! Haû ahkyíng gi, jé bê nghut luí, haû Byu Yhangzo gi, yubak dap bâng é loq má ap pyâm é hui râ nghut bê. ⁴² Toq keq! Lô

losháng hkoi! Ngo lé ap pyám râ sù gi, jé lé lô bê nghut ri." ga taí ri.

Yesuq, Chyup Yû Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dáng nyo nyi ashí u lé, haû chângzo raxe í yuq má bo é Yudaq gi, haû hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyâm râ sù gi, yhangmoq lé, "Ngò bopuq puq é sù gi, haû yuq nghut bê; Yhang lé chyup yû mù, zúng shuí lô keq." ga kumlhá byí to bê nghut ri. ⁴⁵ Yudaq gi, Yesuq chyáng hkyê za ê mù, "Rabai ê." ga taí luí, Yhang lé bopuq puq byí ri. ⁴⁶ Haû hkûn, yhangmoq gi, Yesuq lé chôm zuí zìng mù, chyup yû bekô nghut ri. ⁴⁷ Haû mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lhú? ⁴⁹ Ngò gi, nyí wuî, nungmoq eq rahá nyi luí, noqkuq yhûm má mho-qshit byí nyi kôlháng, nungmoq, Ngo lé a chyup yû kô é nghut lhê. Nghut kôlháng, Chyúmdang pé gi, dik ra râ nghut lhê." ga taí ri. ⁵⁰ Haû hkûn, haû chângzô pé gi, Yesuq lé tô pyâm to kôluí, hpang byo byuq bekô nghut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haû yuq lé, wó kyaq zui kô é hkûn, ⁵² yhang gi, buhîng lé hkyut hkyô pyâm to mù, gùngchîn hpang lô byuq bê nghut ri.

Yudaq Byìn Tú Wapdoq Má Jéyáng Huí É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akô; haû hkyangjong agyi pé lhunglhâng bang, suwún wuî eq tarâ sará pé le, lé zup zìng bum akô. ⁵⁴ Petruq gi, hkyangjong mó é yhumwàng hkaú má

† 14:36 Aba gâ é gi, Aramaik dang đông "Áwa" gâ é lichyúm nghut lhê. ‡ 14:36 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵ Haú hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôhang, haí le a myàng kó nghut ri. ⁵⁶ Byù myo myo gi, a têng é saksé hkám kôhang, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq saí é noqkuq yhùm shí lé, Ngò hpyoq hpyi pyám mù, sum nyí gyoro má, byu loq èq a saí é, gotû ralhum dum saí râ nghut lhê.' ga taí é lé, ngamoq wó gyô ri." ga akô. ⁵⁹ Nghut kôhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haí le a tû taí luq? Shí bang, Nàng lé mara hun nyi é saksé gi, hká dông nghut lhê lú?" ga luí, Yesuq lé myí ri. ⁶¹ Nghut kôhang, Yesuq gi, jit le a ga nyi tô ri.

Haú mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lú?" ga dum myí ri.

⁶² Haú hkûn, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyam§ má zung tô é lé le, mhuthtui ji mù, mauhkûng mai lé lo é* lé le, nungmoq myàng kó râ nghut lhê." ga taí ri.

⁶³ Haú hkûn, hkyangjong mó gi, yhang é bu lé lêng cheq pyám mù, "Nga-nhúng, hai saksé râ ashí lú? ⁶⁴ Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu wó myit akô lú?" ga myí ri; yhangmoq banshoq bang gi, shí gíng sù nghut ri ga, chôm myit huí akô. ⁶⁵ Haú mù, ra-am gi, Yhang lé sôkan byé gyun é eq, myoq má nghop pyám byi luí, loqtsup èq htui byí lhê kut mù, "Nàng lé ó yuq htui é, myiqhtoi htoí wú aq." ga taí akô. Haú zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyâm É Hkyô
Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaú má nyi tô é u lé, haú hkyangjong mó é dui-nhâng zoshâng myhí rayuq jé lé lo ri. ⁶⁷ Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taí ri.

⁶⁸ Nghut kôhang, yhang gi, "Nàng taí é hkyô lé, ngò, sé le a sé, gyo le a sé gyo." ga he pyám luí, wâng hkúmdong shut htoq e ló bê nghut ri.†

⁶⁹ Dui-nhâng zoshâng myhí haú gi, Petruq lé, haú má dum myàng jáng, awui ayám má yap tô é bang lé, "Shí yuq le, haú hpúng má lom é sù rayuq nghut ri." ga dum taí ri. ⁷⁰ Petruq gi, radàm dum he pyám ri; hau htâng razup zo má, haú nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng mâ é byù rayuq hkyak nghut lhê." ga taí akô.

⁷¹ Haú hkûn, yhang gi, yhanggùng yhang nhing luí, "Haú nungmoq taí é byù lé, ngò a sé." ga dakam ri.

⁷² Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tûn shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taí é dang lé, myit bûn kat mù, wum kat ngau ri.

15

Pilat Hí Má Yesuq Jé Nyi É Hkyô
Mht 27:1-2, 11-26; Luk 23:1-5, 13-25; Yhn 18:28-19:16

¹ Haú napkyó noq za má, hkyangjong agyi pé gi, suwún wuî, tarâ sará pé, Yudaq byìn tú wapdoq gón bang eq rahá kut, chôm bóng yú kômù, Yesuq lé tuí yú luí, shuí htoq ê kômù, mauzau Pilat chyáng ê ap byí akô nghut ri.

² Pilat gi, Yesuq lé, "Nàng gi, Yudaq byu pé é hkohkâm nghut lhê lú?" ga myí jáng, Yesuq gi, "Nàng taí é eq rajung za nghut lhê." ga, tû taí ri.

³ Haú hkyangjong agyi pé gi, Yhang lé mara gyai myo shoq chôm hun akô. ⁴ Haú

§ 14:62 Loqyò hkyam gá é gi, ahko ahkáng wó é jowò lé gá é nghut lhê. * 14:62 Mhuthtui ji mù, mauhkûng mai lé lo é gá é gi, Danielaq 7:14 má bò lhê. † 14:68 Chyúmding ra-am má Haú hkûn jáng, woq tûn bê nghut ri gá é le bo ri.

mù, Pilat gi, Yesuq lé, "Wú aq, yhangmoq, nàng lé mara haù myhó hun nyi le, nàng, haì le a tû taí lú?" ga myí ri.

⁵ Nghut kôlhang, Yesuq gi, haì le a tû taí kut jáng, Pilat gi, maú byuq bê nghut ri.

⁶ Haù Lhoqlhai Poì u lé, mingbyù wui dúng é htóng byù rayuq yuq lé, mauzau mai lhaq lhoq htoq byi byi kut é htung joq ri. ⁷ Haù hkùn, Barabaq gâ é byù rayuq gi, gumlau gabyông é hkùn, byù sat é gumlau bang eq rahá, htóng gyó tô ri. ⁸ Byù hpung mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

⁹ Haù mù, yhang gi, "Yudaq byu pé é hkohkâm lé nhang htoq kat byi râ lé, nungmoq ô nau akô lú?" ga myí ri. ¹⁰ Pilat, haù su ga myí é gi, haù hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri. ¹¹ Nghut kôlhang, haù hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haù byù moq mó lé i-myt lhoq toq byi akô.

¹² Pilat gi, "Haù jáng, nungmoq mai Yudaq byu pé é hkohkâm ga sù yuq lé, ngò hkâsu kut râ lú?" ga yhangmoq lé myí ri.

¹³ Haù hkùn, yhangmoq gi, "Yhang lé tapzîng má jén sat pyám aq." ga chôm garu akô.

¹⁴ Haù jáng, Pilat gi, "Haì mù luí lú? Yhang haì kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garû lo bum akô nghut ri.

¹⁵ Pilat gi, haù byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byi kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaù má shuí wang lô kômù, gyedap gón lé ji tsîng yu akô. ¹⁷ Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má

tsung byi akô. ¹⁸ Hau htâng, yhangmoq gi, "Yudaq byu pé é hkohkâm hpó ê! Chyung hîng xê hîng nyi sháng gaq ô!" ga wut garû akô. ¹⁹ Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luí, Yhâng hí má hkyihput htuq mù, paì mhaù akô nghut ri. ²⁰ Yhangmoq gi, Yhang lé rhoi jihkyoí ban kut yù kôjáng, Yhang wut tô é buhîng nè lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e lô bekô nghut ri.

Yesuq Lé Jén Pyám É Hkyô

Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhângwa, Kuruni myuq byù nghut é Simun ga sù gi, yosô wà mai lò mù, haù jowò mai laí lô ri. Haù hkùn, gyezô pé gi, yhang lé, tapzîng waq nhang akô nghut ri. ²² Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri). ²³ Hau htâng, yhangmoq gi, Yhang lé, mura* eq nyhò tô é tsibiyiq wing huq akô; nghut kôlhang, Yhang gi, a lhom shuq byi nghut ri. ²⁴ Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é dông gam yu pyám byi akô nghut ri.

²⁵ Yhangmoq, Yesuq lé tapzîng má jén tap pyám é hkùn gi, napkyó gau hkyíng nghut bê nghut ri. ²⁶ Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaì hkyam shut rayuq kut, tapzîng htoq má jén tap tô akô nghut ri. ²⁸ (Haù gi, "Yhang gi, yubak dap bâng chyáng nghap lhôm é hui bê nghut ri."* gâ é Chyúmdang lé lhoq dik é nghut ri.)† ²⁹ Hkyô sô laí lô é bang gi, nyhap é dông u-ngut ngut mù, taí kô é gi, "Noqkuq yhùm lé hpoyq pyám luí, sum nyí gyoro má dum wó saí lhê ga Sù ê! ³⁰ Náng gùng nàng hkyi yù luí, tapzîng mai gyó lò wú aq mhaì!" ga akô nghut ri.

* **15:23** Mura gi, chi wó kut jung xù nghut lhê. † **15:28** Esai 53:12 † **15:28** Bun zo shí gi, chyúmding axau ra-am pé má za bo é nghut lhê.

³¹ Haú eq rajung za, hkyangjong agyi pé eq tarâ sará pé le, yhangmoq hkaú má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! ³² Nga-nhung wó myâng mù, lumjìng rã matú, shì, Israelaq byu pé é hkohkâm, Hkrisduq gi, tapzìng mai gyó lo wú sháng gaq." ga, Yhang lé rhoi dang taí akô. Yhang eq rahá tapzìng má jén tap to huí é su nhik le, Yhang lé rhoi dang taí akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

³³ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri. ³⁴ Myinhtâng sum hkyíng jé é hkûn, Yesuq gi, "Eloi, Eloi, lama sabakhtani."* ga, htê mó eq garú kat ri. Haú é lichyúm gi, "Ngá Garai ê, Ngá Garai ê, Nang, haí mù, Ngo lé tô pyâm tô lhé lú?" ga é nghut ri.

³⁵ Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

³⁶ Haú hkûn, byù rayuq gi, din e ló mù, wuimaù lé tsibiyiq wing chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhung chôm lánng wú sháng." ga taí ri.

³⁷ Yesuq gi, htê mó eq garú kat luí, kâng byit byuq bê nghut ri.

³⁸ Noqkuq yhûm mâ é pán-gyang gi, ah-toq maí a-ô í hkyam byáng dut byuq bê nghut ri. ³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taí ri.

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. ⁴¹ Haú bang sum yuq gi, Galile mau má, Yesuq htâng cháng mù, Yhâng rã é hkyô pé lé châng kut byi é bang nghut akô. Yesuq eq rahá, Yerusalem wà mó má doq lé

lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyi (Bánno buinyi é hí nyí) nghut ri. Haú mù, myinhtâng jé lô jáng, ⁴³ Yudaq uphkâng hpúng má bo é, aróng wó é, Garai Gasâng é mingdán lé lánng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé é dúng ri. ⁴⁴ Pilat gi, Yesuq shì bê gá é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shì teng bê lú ga myí ri. ⁴⁵ Shì teng bê hkyô lé, shô up gyezaú chyáng mai wó sê yù jáng, Pilat gi, Yesuq é gungsôm lé yù rã ahkáng, Yosep lé byi kat ri. ⁴⁶ Haú mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyûng tô é lup hkaú má é kat tô ri. Hau htâng, yhang gi, luphkum má, luqlông eq lhêng chí pyâm tô ri. ⁴⁷ Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, ê myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, ê but byi rã matú namngón jung ê wui akô. ² Bánno buinyi htang napkyó bui htoq lo é hkûn yhang, yhangmoq gi, lup shut e ló akô. ³ Yhangmoq gi, "Luphkum mâ é luqgok lé, ó yuq chyûn lhêng pyâm byi rã lú?" ga, rayuq eq rayuq taí lhum akô.

⁴ Nghut kôlhang, yhangmoq tu wú kat kô é hkûn, luqlong haú gi, lhoq lhêng to lánng é lé, myàng akô nghut ri; luqlong haú gi, gyai kô é nghut lhé. ⁵ Yhangmoq gi, lup hkaú má wang ê kô é hkûn, hpyu é buhíng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haú hkûn, haú yuq gi, "Hkâgyuq dàn kó! Nungmoq gi, haú tapzìng má jén sat huí é,

* 15:34 Hkya-on 22:1

Nazaret wà byù Yesuq lé ho akô, a nghut lú? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq. ⁷ Ahkuí, nungmoq gi, ló mù, 'Yesuq gi, nungmoq hí má, Galile mau shut so lángrâ nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myàng kó râ nghut lhê.' nghû, Yhâng é chángzô pé eq Petruq lé ló taí kyo keq." ga lhom taí kat ri.

⁸ Haú mù, myiwe myhí haú bang gi, byòdàn gyuq nán é eq, lup mai hpang htoq ló akô; yhangmoq gi, lúm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Labyo 1:6-11

⁹ Yesuq gi, Bánno buinyi htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà má é Mariq lé hí htoq shit ri. ¹⁰ Mariq haú gi, ló mù, haú Yesuq eq nyi laí lò bê bang, yón ngau nyi kô é hkûn, haú hkyô lé ló taí kyô ri. ¹¹ Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jing kó nghut ri.

¹² Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri. ¹³ Haú nhik gi, taú lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haú lé le a jing byi kó nghut ri.

¹⁴ Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jam shoq htoq ê mù, waxâng zo wuí lhungháng lé, haú gabú danglù hko kyo keq. ¹⁶ Lumjing mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjing é sù ó yuq nghut kôle, mara byi é hui râ nghut lhê.

¹⁷ Lumjing é bang wó kut shit râ kumlhá pé gi, Ngá é mying lé lang luí, nat gâng pé lé wó hkat htoq kó râ eq laklaí é mying pé lé dat nyò kó râ nghut lhê; ¹⁸ yhangmoq gi, lhangmuí pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

¹⁹ Haú Yhumsing Yesuq gi, yhangmoq lé dang ban taí é htâng má, mauhkûng shut shuí toq yu é hui luí, Garai Gasâng é loqyo hkyam má zung to bê nghut ri. ²⁰ Hau htâng, haú chángzô pé gi, htoq é mù, jowò hkangmó má mungdang ê hko kyô akô nghut ri; haú Yhumsing gi, yhangmoq eq rahá nghut nyi mù luí, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byi é nghut ri. Amen.

LUKAQ é Gabú Danglù Laiká (The Gospel of Luke)

¹ Aróng wó dik é sù Htohpilug ê, ngamoq chyáng dut laí lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí, ² byù myo myo gi, shikut luí kê to bekô nghut ri. ³⁻⁴ Ngò le haú pé banshoq lé awang mai ahpyo hpyot jihkùm nuqguq ho myí yù luí, nàng wó sé yu to bê hkyô pé gi, je lhoq gíng é dut sháng gaq nghû, náng é matú banshoq tok za kê kat byi râ lé, ngò wó myit ri.

Wui-myhup Sará Yohan Hku Lé Lô Râ Gà É Hkyô

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myí gi, Arun amyû mâ é, Elizabet ga sù nghut ri. ⁶ Haú nhik gi, Yhumsing Garaí é jep é tarâ eq htúngtarâ banshoq lé, rago za cháng mù, Garaí Gasâng é hí má dngmán é su nhik nghut akô. ⁷ Nghut kôlhang, Elizabet gi, baùdung dung sù nghut é yanmai, yhang nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhang é hpúng eq rahá, Garaí Gasâng é hí má lé zui le, ⁹ haú Yhumsing é noqkuq yhûm ahkaú má namngón hkungga é wang nyhé râ matú, hká yuq nghut râ lé hkyangjong pé é htúngli eq rajung za byù hkyín shosé she wú é hkûn, yhang chyáng âng ri. ¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdung nyi akô.

¹¹ Haú hkûn, Yhumsing Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri. ¹² Zahkariq gi, maumang lagyo haú lé myàng jáng, dan gyuq nyi ri. ¹³ Nghut kôlhang, maumang lagyo gi, "Zahkariq ê, hkâgyuq, náng é kyûdung dang lé Garaí Gasang gyo byi bê. Haú mù luí, náng é yhumsing myhí Elizabet gi, náng é

matú yuqzo rayuq bau byi berâ nghut lhê; nàng gi, yhang lé Yohan nghû myhing byi ra râ nghut lhê. ¹⁴ Yhang gi, náng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. ¹⁵ Hkâsu mù gâ le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq îhpe lé ge shuq râ sù a nghut; yhang nû é unghkaú mai yhang, Chyoiyung Woi-nyí eq byíng nyí râ sù nghut lhê. ¹⁶ Yhang gi, Israelaq yhangzo yhangshû pé myo myo lé, Yhumsing yhangmoq é Garaí Gasâng chyáng lhing lò nhâng râ sù nghut lhê. ¹⁷ Íwâ pé é myit nhikhum lé gi, zô wui shut, nyo é a gyo bang lé gi, dngmán bâng é hpaqchyí hkyô shut lhing lò nhâng luí, haú Yhumsing jé lé râ matú hen tô é byù myù dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e lô râ nghut lhê." ga luí, yhang lé taí ri.

¹⁸ Haú hkûn, Zahkariq gi, "Haú hkyô lé ngò hkâsu kut wó sé râ lhú? Ngò le mang byuq bê, ngá é yhumsing myhí le asak ipyat ko bê." ga luí, maumang lagyo lé tù taí ri.

¹⁹ Maumang lagyo haú gi, "Ngò gi, Garaí Gasang eq rahá nyi é sù Gabrielaq nghut lhê. Nang lé gabú danglù shî taí kyo aq ga luí, Yhang, ngo lé nhang kat é nghut lhê. ²⁰ Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjíng é yanmai, mù haú dut lo é buinyí jé shoq, nàng gi, nhut jit byuq râ nghut lhê." ga luí, yhang lé tù taí ri.

²¹ Haú u, shiwa byu pé gi, Zahkariq noqkuq yhûm ahkaú má haú-í myáng shoq lúng byuq é hkyô lé lánng maú nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhûm ahkaú má yhang myoqwup shing-rán rajung jung myàng ang bê lé, wú sé yu akô nghut ri.

²³ Ahkuí, Zahkariq gi, hkyangjong jong âng é buinyí ngap jáng, yhûm shut dum taú ló byuq bê. ²⁴ Hau htâng má, yhang é yhumsing myhí Elizabet gi, zogung dut lò mù luí, hká le a htoq e za lhamó ngo hkyap yhûmhkaú má lúng byuq ri. ²⁵ Haú hkûn,

yang gi, "Byu pê hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é đông mai huí sêng pyám byí é buinyi má, Yhang ge é hkyô lé, ngo lé tún shit bê nghut ri." ga taí ri.

Yesuq Hku Lé Lô Berâ Gâ É Hkyô

²⁶ Ahkuí, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é myíng gi, Mariq gâ ri; yang gi, Dawiq amyû mâ é Yosep gâ su èq dúng tô é zomyi nghut ri. ²⁸ Maumang haú gi, Mariq chyáng jé jáng, "Mariq ê, nguínón nyi sháng gaq; Nàng, hkungsô wó nyi ri; Haú Yhumsíng Garai gi, nàng eq rahá nyi nyi ri ò!" ga taí ri.

²⁹ Mariq gi, dang haú lé gyo sing nán mù, shí su gâ é dang gi, haí jung gá naú é nghut lhê lú ga luí, myit maú nyi ri. ³⁰ Haú hkûn, haú maumang lagyo gi, "Mariq ê, hkâgyuq, nàng gi, Garai Gasâng é hí má myoqdong wó bê nghut ri. ³¹ Wú aq, nàng zogûng dut lò mù luí, yuqzo rayuq bau râ nghut lhê. Yhâng é myíng lé gi, 'Yesuq' nghû luí, nàng myhíng byi ra râ nghut lhê. ³² Yhang gi, hpung bô sù dut râ nghut mù, Myhang htáng htúm Su é Yhangzo gâ é hui râ nghut lhê. Yhumsíng Garai Gasang gi, yang lé, yhâng é íchyí îwa Dawiq é hkohkâm tanghkuq lé, byi râ nghut mù luí, ³³ Yhang gi, Yakup yhûm* lé hkâ-nhám le ru-up nyi râ nghut lhê. Yhâng é mingdán le htum nghu é joq râ a nghut." ga luí, yang lé taí ri.

³⁴ Haú hkûn, Mariq gi, "Ngò gi, zomyi gyíng ru nghut ashí, haú gi, hkâsu wó dut râ lú?" ga luí, maumang lagyo lé tú taí ri.

³⁵ Haú maumang lagyo gi, "Chyoiyúng Woi-nyí nàng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haú baú lò râ Chyoiyúng sù le gi, Garai Gasâng é Yhangzo ga kó râ nghut lhê. ³⁶ Hau htoq agó, wú aq, nàng é amyû suisho baùdung myhí Elizabet lháng, mang bê le yuqgè zo wun to bê. Ahkuí, zogûng dut é lhamó hkyuq hkyap wàng bê nghut ri. ³⁷ Hkâsu mù gâ le, Garai

Gasang a wó kut é haí le a joq." ga luí, yang lé tú taí ri.

³⁸ Haú hkûn, Mariq gi, "Yhumsing é jùnmyhí ngò nghut nyi lhê; nàng é dang eq rajung za ngá chyáng dut lò sháng gaq." ga tú taí ri. Hau htâng, maumang lagyo gi, yhâng chyáng mai ló byuq bê.

Elizabet Lé Mariq Ê Huí É Hkyô

³⁹ Hau htâng hkâ-í a myáng má, Mariq gi, Yuda mau bum mau má é wà rawà shut hân hân e ló luí, ⁴⁰ Zahkariq é yhûm má wàng mù, Elizabet eq huí nyo lhûm ri. ⁴¹ Mariq é danghtê lé Elizabet wó gyo jáng, yhâng é unghkaú mâ é zoshâng gi, byam chyû lo ri. ⁴² Elizabet le, Chyoiyúng Woi-nyí byíng to mù luí, Mariq lé htê mó èq taí é gi, "Myiwe banshoq má, nàng gi, hkungsô wó dik sù nghut ri. Nàng é unghkaú mâ é zoshâng le hkungsô wó nyi ri ô! ⁴³ Ngá Yhumsing é yhângnu ngá chyáng jé lé é jeju gi, hai é yanmai nghut bê lú? ⁴⁴ Wú aq, nàng danghtê lé wó gyo kat jáng, ngá unghkaú mâ é zoshâng gi, gabú luí byam chyû nyi ri. ⁴⁵ Haú Yhumsíng taí é dang gi, gè gè dik lò râ nghut lhê ga luí, lumjíng é myiwe gi, hkungsô wó nyi ri." gâ ri.

Mariq É Hkya-on Dang

⁴⁶ Haú hkûn, Mariq gi, "Ngá é i-myt mai haú Yhumsíng lé hkya-on nyi lhê,

⁴⁷ ngá é woi-nyí le, Garai Gasang ngá é hkyi yù Sù má gabú nyi lhê.

⁴⁸ Ngò Yhâng é jùnmyhí myit nyhum nyi é lé, Yhang myàng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyi sù, gâ nyi bekô râ nghut lhê.

⁴⁹ hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,

Yhâng é myíng gi, chyoiyúng nyi ri ô.

⁵⁰ Yhang lé gyuq hoq nyi bâng é ahtoq má, Yhang shogyo nhikmyín é hkyô gi, pyat bán hkangmó jé shoq hkâ-nhám le joq nyi râ nghut lhê.

⁵¹ Yhâng é wum-o bo é loq èq mauhpo mù mó pé lé tún shit bê.

* **1:33** Yakup yhûm nghu e gi, Israelaq amyû lé gâ lhê.

Yhumsîng myit é hkyô má nghutbûn nyi é bang lé, Yhang lhoq pyo pyám bê.

⁵² Zaugun suwún wuî lé gi, zau zûng tanghkuq mai lhoq hkyô pyám mù, i-myit nyhûm bang lé gi, lhoq myhâng bê nghut ri.

⁵³ Zòmút huì bang lé gi, ge é zoshuq gyi shoq byi tso mù, sutzè wó bang lé gi, akôm nhang kat bê nghut ri.

⁵⁴⁻⁵⁵ Nga-nhûng é îchýí îwâ pé lé taî tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyîn nyi râ gâ e lé myit bûn nyi é yanmai,

Yhâng é dui-nhâng zoshâng Israelaq byu pé lé hku baú nyi ri."

ga luí, taî ri.

⁵⁶ Mariq gi, Elizabet chyáng lhamó sum hkyap kô nyi mù luí, yhûm shut dum taú lò byuq bê.

Wui-myhup Sará Yohan Baú É Hkyô

⁵⁷ Hau htâng, Elizabet gi, zoshâng bau râ buinyi jé mù, yuqgè zo bau bê. ⁵⁸ Yhang lé haú-í kô é jeju Yhumsîng tân shit é hkyô lé, yhâng é yhumkyo buinûm wuì eq mung moq gumang wuì wó gyo kojáng, yhang eq rahá gabú nyi akô.

⁵⁹ Ahkuí shit nyí jé jáng, yhangmoq gi, zoshâng haú lé ahpyo-kuq hpyit byi râ matú lé kôluí, yhâng wâ é myîng eq rajung za, Zahkariq ga myhíng byi râ dâ akô.

⁶⁰ Nghut kôlhâng, yhâng nu gi, "A nghut, Yohan nghû sheq myhíng râ nghut lhê." ga tû taî ri.

⁶¹ Yhangmoq gi, "Náng é amyû suisho má le, haú su gâ é myîng rayuq le a bo wú shi." ga luí, yhang lé taî akô.

⁶² Haú hkûn, zoshâng haú lé hkâsu nghû myhíng nau lhê laq ga, yhâng wa lé loq lik lik shit mù myî akô. ⁶³ Zahkariq gi, kê jung longpá dúng yù mù, "Yhâng é myîng gi, Yohan nghut lhê." ga kê shit ri. Haú mù, lhunglhâng bang gi, maú byuq bum akô. ⁶⁴ Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri. ⁶⁵ Haú su dut é

hkyô lé, wó gyô é awui ayàm lhîngkhuyuq mâ é lhunglhâng bang gi, gyuq maú byuq bùm kômù, Yuda mau bum mau ramau gôn taî pyo lò bum akô. ⁶⁶ Wó gyô é lhunglhâng bang gi, haú hkyô lé yhumsîng é i-myit unghkaú má kat to mù, "Zoshâng shî gi, hkâsu dut lò râ sù nghut lhê lhú?" ga myit wú nyi akô. Haí mù gâ le, haú Yhumsîng é loq gi, yhang eq rahá nghut nyi é yanmai nghut ri.

Zahkariq É Myiqhtoì Dang

⁶⁷ Haú hkûn, zôshâng é yhângwa Zahkariq gi, Chyoiyúng Woi-nyí byíng lô mù, myiqhtoì dang dong taî é gi,

⁶⁸ "Haú Yhumsîng, Israelaq é Garai Gasang lé hkya-on sháng ô!

Haí mù gâ le, Yhang gi, Yhâng é amyû lé, lé kûm wú mù luí, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyû mai nga-nhûng é matú

wum-o bo é hkyi yu é hkyuî† lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoì pê é nhut mai taî tô é eq rajung za nghut ri.

⁷¹ Haú hkyuî gi, nga-nhûng lé nga-nhûng é gye pê chyáng mai le, a nguì a nau bang banshoq é loq mai le, hkyi yù râ nghut lhê.

⁷² Îwa Garai gi, nga-nhûng é îchýí îwa pé lé shogyo nhikmyin hkyô lé tân shit râ matú, Yhang byi tô é chyoiyúng dangshikaq lé a tô-myhí nghut ri.

⁷³ Haú gi, nga-nhûng é chyiké Abraham lé byi tô é danggidiq nghut lhê.

⁷⁴⁻⁷⁵ Nga-nhûng lé gye pê loq mai hkyi yù râ eq, nga-nhûng asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dingmán é hkyô mai, Yhang lé wó dojaú nyi nhâng râ matú, Yhang jé lé é nghut lhê.

⁷⁶ Ngá zo ê, nàng gi, Yhumsîng é hí má, e lò mù luí, Yhâng é hkyô lé hen lajang byi râ sù nghut é yanmai,

† 1:69 Hkyi yu é hkyuî gi, Yhumsîng Yesuq lé taî é nghut ri.

nang lé Myhang htáng htúm Su é my-
iqhtoi ga kó rà nghut lhê.

77 Nàng gi, Garai Gasâng é byu pé lé, yhang-
moq é yubak mara hkyut pyám byî é
dong,

hkyi yu é hui rà hkyô lé taî kyo rà sù
nghut lhê.

78 Haî mù gâ le, Garai Gasâng é shogyo
nhikmyin é yanmai, napsûn bui‡ gi,
mauhkûng mai nga-nhûng chyáng
htoq lé lô rà nghut lhê.

79 Yhang gi, mauchut hkaû\$ eq shî wup
hkaû má lúng to bang lé builoq su
duqbó byi rà eq,

nga-nhúng lé nguingón simsaq é hkyô shut
shuî e lô rà sù nghut lhê." ga ri.

80 Zoshâng haû gi, kô lò mù, woi-nyî
wum-o bo lò luî, Israelaq byu pé chyáng
htoq shit lo é buinyî jé shoq, yoso pé má nyi
nyi ri.

2

*Betlehem Wà Mó Má Yesuq Hku Lo É
Hkyô*

Mht 1:18-25

1 Buinyî haû pé má, Romaq hkoséng
ming banshoq má é byù lhunglhâng bang
gi, myìng jihpán kat rà matú, hkoséng Ke-
htaq Augustuq chyáng mai mungdang htoq
ri. 2 Jihpán haû lé sâng-hi dàm guq hi é gi,
Kuirenî ga sù Suriq mau má mauzau kut
nyi é hkûn nghut ri. 3 Haû hkûn, byù du jup
gi, myìng jihpán kat rà matú, ó le ô é wà shut
ló bum akô.

4 Haû mù, Yosep le Dawiq é awut ashín
nghut é yanmai, Galile mau Nazaret wà
mai, Yuda mau má é Betlehem gâ é Dawiq
é wà shut, 5 yhang dúng tô é myiwe Mariq
eq rahá myìng kat lhóm rà matú jé doq ló
akô; Mariq kúm gi, gungloq laî to bê nghut
ri. 6 Haû Betlehem má nyi tô ashî le, Mariq
gi, zo hkû rà buinyî jé mù, zomún yuqzo lé
bau bê. 7 Yhang gi, zoshâng haû lé panchoq
èq htup mù no tso langhkang má lheq tô ri;
haî mù gâ le, bíng yhúm má yhangmoq nyi
rà jowò a joq lo é yanmai nghut ri.

‡ **1:78** Napsûn bui gâ é gi, Yesuq lé taî é nghut lhê. § **1:79** Mauchut hkaû gâ é gi, Garai lé a sé mù woi-nyî má shi
tô é bang lé gâ lhê. * **2:11** Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesaia"
gâ é eq rajung za nghut lhê.

Sau Zúng Bang Yesuq Chyáng Jé Lé É Hkyô

8 Ahkuî, haû ginwáng má é sau zúng zo
bang gi, sau zúng jang má yhangmoq é sau
hpúng lé, myín lé zúng nyi akô. 9 Haû hkûn,
Yhumsîng é maumang lagyo gi, yhangmoq
é hí má lé htoq yap shit to mù, Yhumsing
é hpungwup shingkanq gi, awui ayàm má
duqbang lò luî, yhangmoq gyai gyuq bum
akô. 10 Maumang lagyo gi, "Hkâgyuq kó,
byù lhunglhâng bâng é matú, gyai yhang
gabú é danglù, ngò nungmoq chyáng wun
lé lo lhê. 11 Hkû-nyî lhê buinyî má, Hkris-
duq* nghu é Yhumsîng nghut é hkyi yù Sù
gi, Dawiq é wà má nungmoq é matú hku to
bê. 12 Nungmoq é matú kumlhá gi, zoshâng
nyheqnú rayuq panchoq èq htup mù, no
tso langhkang má lheq to láng ra nghut
lhê." ga luî, yhangmoq lé taî ri.

13 Haû hkûn jáng yhang, mauhkûng bang
rajùm rayò htoq lô mù, maumang lagyo
haû eq rahá Garai Gasang lé hkya-ôn é
dang gi,

14 "Htoq tsáng myhâng má, Garai Gasang gi,
hpungwup shingkanq bo nyi sháng
gaq ô!

Myigùng htoq má le, Yhang ô nau é byu pé
má, nguingón é gi, hkâ-nhám le joq
nyi sháng gaq ô!"

gâ akô.

15 Maumang lagyo pé, yhangmoq chyáng
mai, mauhkûng shut dum lô byuq jáng, sau
zúng bang gi, "Sà! Betlehem wà mó má
jé shoq yhang, nga-nhúng ê mù, ahkuî za
Yhumsîng nga-nhúng lé lé shit kyô laî ló bê
hkyô lé é gôn wú sháng." ga luî, rayuq eq
rayuq taî lhúm akô.

16 Hau htâng, yhangmoq gi, hân hân ê luî,
Mariq eq Yosep lé le, no tso langhkang má
lheq tô é zoshâng nyheqnú lé le, ê myàng
akô. 17 Zoshâng haû lé, yhangmoq myàng
kôjáng, zoshâng haû eq séng luî yhangmoq
lé, lé taî kyô é dang lé, taî pyô kat bekô.
18 Wó gyô é bang banshoq gi, haû sau zúng
bang taî kyô é dang lé, maú byuq bum akô.
19 Mariq kúm gi, dut lo é hkyô pé eq wó gyô
é dang banshoq lé unghkaû má matsîng yù
mù luî, nik nik myit wú nyi ri. 20 Sau zúng

bang gi, yhangmoq lé maumang lagyo tai kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum taû lô bekô nghut ri.

Yesuq Lé, Noqkuq Yhûm Má Shuí E É Hkyô

²¹ Zoshâng haû, shit nyí jé mù aphyo-kuq hpyit byi râ buinyí má, yhang unghkaû má a lúng shi mai maumang lagyo myhîng tô é myîng eq rajung za, yhang lé, "Yesuq" ga luí, myhîng byí akô.

²² Mosheq é tarâ eq rajung za, yhangmoq é lhoq san lhoq sêng é buinyí byíng jáng, Yhumsing é tarâ má, "Zomún yuqzo hkgamó gi, haû Yhumsing é hí má chyoiyúng sù wó nghû râ matú, Yhumsing chyáng ê ap byi râ lhê."☆ ga é eq, ²³ "Hpûngkyui razúm, haû a nghut jáng, nghoqmyhû zo í du,"☆ hkungga byi râ lhê ga kê tô é eq rajung za, ²⁴ Mariq eq Yosep gi, zoshâng haû lé shui mù Yerusalem wà mó shut ê akô.

²⁵ Haû hkûn, Simeon ga é mangzo rayuq, Yerusalem wà mó má nyi ri. Haû yuq gi, dingmán é eq tarâ cháng sù nghut mù, Israelaq lé nhik lhoq tîng râ ahkyíng lé lánng nyí sù nghut ri; haû Chyoiyúng Woi-nyí le, yhâng é ahtoq má nyi nyi ri. ²⁶ Yhang gi, haû Yhumsîng Hkrisduq lé a myang é za, shî râ a nghut, ga Chyoiyúng Woi-nyí èq tân shit tô é hui sù nghut lhê. ²⁷ Yhang gi, Chyoiyúng Woi-nyí èq shui mù, noqkuq yhúmhaû má ê jé nyi tô é hkûn lé, Mariq eq Yosep gi, zoshâng Yesuq lé htûng tarâ eq rajung za kut byi râ matú, noqkuq yhúmhaû má shuí wang lô kôjáng, ²⁸ Simeon gi, zoshâng lé loq èq lhom bún yû mù, Garai Gasang lé hkya-ôn é dang gi,

²⁹ "Yhumsîng ê, náng é danggidîq gi, dik bê nghut ri; hkû-nyí náng é jùn ngò gi, nguîngón é èq wó shi lô berâ nghut lhê.

³⁰ Haî mù gâ le, byù lhunglhâng bâng é matú, náng lajang tô é hkyi yù hkyô lé, ngá myoq èq yhang wó myâng bê.

³¹ Haû gi, byù myû chângjup wó myâng râ matú, náng lajang to byí é nghut mù,

³² tûngbaù pé lé, tengmán hkyô má bui su duqbó mù hpông shit râ matú le, náng é amyû Israelaq é hpungwup shîngkâng matú le nghut nyi ri."

gâ ri.

³³ Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maû byuq akô. ³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shî gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri. ³⁵ Haû mù, byù myo myô é unghkaû má, myit mi-myt lé lhoq htoq shit râ nghut lhê. Náng é myit nhiklum má, shâm chûn èq htaû kyâng kat é su gâ é lé, náng hui zo râ nghut lhê." ga taí ri.

³⁶ Ashe amyû má é Hpanuelaq é yhangzo, Annaq gâ é myiqhtoî myhí rayuq nyi ri; yhang gi, ipyat gyai ko bê. Yhang gi, zomyí pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri. ³⁷ Myiwe haû gi, noqkuq yhûm mai a htoq ê za, nyí myín a ga noqkuq dojaú nyí mù, zoshuq gám luí kyûdûng nyi ri. ³⁸ Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglhâng lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taû lô bekô. ⁴⁰ Zoshâng haû gi, kô lò mù, wum-o bò lo é eq, hpaqchyî byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhaû Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poî jé hkgamó, zân wui Yerusalem wà mó má é ê kut akô. ⁴² Yesuq raxe í zân jé jáng, poî haû, ê bo lòm ra htûngli joq é eq rajung za, yhangme wui yhanghpe wui doq lô akô. ⁴³ Haû poî buinyí lai luí, dum taû lo é hkûn, zoshâng Yesuq gi, Yerusalem wà mó

má nyi gyó tô ri; nghut kôlhang, yhangnu yhangwâ nhik gi, a sé kó. ⁴⁴ Yesuq lé rahá lo é luzúm wui chyáng bò râ su ngàm kômù luí, Yosep eq Mariq gi, ra-nyí buigyùm chap sô ló bê htâng má, mung moq wui eq, sê lhùm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taú jé e ló bekô. ⁴⁶ Ahkuí, sum nyí nghû râ nyí sheq, noqkuq yhúmhaú má, tarâ sará pê é gung gûng má zùng to mù, yhangmoq é dang lé gyo yù luí, dum taú myi myi kut nyi é lé, yhangnhik é myàng akô. ⁴⁷ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tú taí é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luí, yhangnu gi, "Ngá zo é, haí mù luí ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é èq, nàng lé jaq châng ho pyám bê." ga luí, Yhang lé taí ri.

⁴⁹ Yhang gi, "Haí mù luí, ngo lé châng ho akô lhú? mauhkúng mâ é ngá Wâ é yhùm má ngò nyi râ lhê le gi, nungnhik a sé kó lhú?" ga luí, yhangnhik lé tú taí ri. ⁵⁰ Nghut kôlhang, yhangnhik gi, Yesuq taí é dang lichyúm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taú jé gyó ló luí, yhangnhik nyo é dang lé gyo mù nyi tô ri. Yhângnu Mariq gi, dut laí lò bê hkyô pé banshoq lé, yhâng é myit nhiklhum má matsing tô ri. ⁵² Yesuq gi, hpaqchyí byéng-yá kúng zet lo é eq, gunghkyáng kô myhang lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

¹ Romaq hkoséng Kehtaq Tiberuq gi, hkó zung é raxe ngo zân nghut é hkún, Yuda mau má Pontu Pilat gi, mauzau ayá má;

* **3:3** Wui-myhup hkâm gâ é gi, baptisma lé gâ é nghut lhê. ✨ **3:6** Esai 40:3-5 † **3:7** Lhangmuí amyú pé gâ é gi, Lukaq 3:7-10 má bo é Hparishe eq Saduke pé lé taí é nghut ri. ‡ **3:8** Nga-nhúng gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. § **3:9** Bun zo shí lhùm é lichyúm gi, myit a lhing bang lé, Garai Gasang jéyáng é buinyi jé râ nghut lhê ga naú é nghut ri.

Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mù má, kut nyi akô. Haú hkún, Garai Gasâng é mung-dang gi, yoso má nyi tô é, Zahkariq é yhangzo Yohan chyáng jé lé ri. ³ Haú mù, yhang gi, Yodan làng yàm jowò hkangmó má, sô jón wún luí, yubak mara hkyut pyám byí é hui râ matú myit lhing mù, wui-myhup hkâm* yù râ hkyô lé, hko kyô nyi ri.

⁴ Haú gi, myiqhtoi Esai-aq laiká má,

"Haú yoso má, byù rayuq garú taí é htê gi, 'Haú Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuìhkung langhkop hkangmó lé lhoq pying ra râ nghut lhê;

bùm eq wingkáng hkangmó lé hpyit pyám ra râ nghut lhê;

agoí aguq é hkyô hkat hkangmó lé lhoq nyhâng ra râ nghut lhê;

ahkung ahkop dut é hkyô hkat hkangmó lé lhoq rhá ra râ nghut lhê.

⁶ Haú hkún, byù banshoq gi, Garai Gasâng é hkyi yù hkyô lé myàng râ nghut lhê."[†]

ga luí, kê tô é eq rajung za nghut ri.

⁷ Shiwa byù rajùm rayò gi, Yohan é loq má wui-myhup hkâm yù râ ga luí htoq lé lò kôjáng, Yohan taí é gi, "Duq htan é lhangmuí amyú pé† é, jé lô râ yubak dam mai wó hpan lut kó sháng gaq ga, nungmoq lé ó yuq taí pùn é lhú? ⁸ Myit lhing hkyô eq gíngdán é ashi zui keq. 'Nga-nhúng gi, Abraham é yhangzo yhangshú pé nghut lhê.‡ nghû luí, yhumsing é i-myt unghkaú má hkâtaí kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ⁹ Ahkuí lhang, Garai Gasang gi, Yhâng é wazung lé haú siggâm wang pé má tô to bê nghut ri; haú mù, ge é ashi a zui é agàm hkangmó lé gi, htuj lhing

pyám mù, myi má dú kat pyám râ nghut lhê." ga ri. §

¹⁰ Haú hkûn, shiwa byu pé gi, "Haú nghut le gi, ngamoq hkâsu kut le gè râ lhú?" ga luí, yhang lé myí akô.

¹¹ Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tû taí kat ri.

¹² Kang guq bang le, wui-myhup hkâm yù râ ga lé lô mù, "Sarâ ê, ngamoq gi, hkâsu kut le ge râ lhú?" ga luí, yhang lé myí akô.

¹³ Yhang gi, "Nungmoq hkyui yù râ masat tô é htoq lai shoq hkâyû kó." ga luí, yhangmoq lé taí ri.

¹⁴ Gyezô pé ra-am le, "Ngamoq gi, hkâsu kut le gè râ lhú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpaû èq gé bûn nyi keq." ga luí, yhangmoq lé taí ri.

¹⁵ Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkaû má myit wú nyi bum akô. ¹⁶ Haú hkûn, banshoq bang lé Yohan taí é gi, "Ngò gi, nungmoq lé, wui èq za wui-myhup hkâm byí lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhang é hkyî-tsung tui lé hpyî râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê. ¹⁷ Yhang gi, loq má byò chung to mù, guq chyârâng mã é guq bùm lé hik sân pyám luí, já é guq cham lé gi, guqchyî má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." ga ri.*

¹⁸ Haú mù, Yohan gi, byù haú bang lé gotû dang myo myo èq lhoq pun lhoq kying mù, gabú danglù lé hko kyô nyi ri.

¹⁹ Nghut kôlhang, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mù banshoq é yanmai, Yohan gi, yhang lé tân mhòqshit bê nghut ri. ²⁰ Mara haú pê htoq agó, Herut dum kut

jat yu é mara gi, Yohan lé htóng má lhùng kat é nghut ri.

*Yesuq, Wui-myhup Hkâm Yu É Hkyô
Mht 3:13-17; Mrk 1:9-11*

²¹ Yohan lé htóng má a lhùng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdúng nyi le, mauhkúng bóng lô mù, ²² haú Chyoiyúng Woi-nyí gi, hpúngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkúng mai danghtê htoq lo ri.

*Yesuq É Byù Xik Shap Kyô É Hkyô
Mht 1:1-17*

²³ Yesuq gi, Yhang mù zuí hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, ²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo,

* **3:17** Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

Yonam gi, Eliakim é yhangzo, ³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Eruk é yhangzo, Eruk gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, ³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunlaú É Hkyô *Mht 4:1-11; Mrk 1:12-13*

¹ Yesuq gi, Chyoiyúng Woi-nyí èq byíng mù, Yodan làng mai dum taú lo é hkûn, Chyoiyúng Woi-nyí gi, Yhang lé yoso shut shuí e ri. ² Haú má, Yesuq gi, buinyí myi xê nyí jé shoq, nat Tsadán èq gunlaú é huí ri. Buinyí haú gyoro má, Yesuq gi, haí le a zô é yanmai, zòmut hui bê nghut ri.

³ Haú mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

⁴ Haú hkûn, Yesuq gi, "'Byù gi, muk èq za asak duí rã a nghut.'" ga luí, Chyúmdang má kã tô ri."* ga yhang lé tú taí ri.

⁵ Hau htâng, nat Tsadán gi, Yesuq lé, gyai yhang myhang é bùm htoq má shuí

doq ló mù, mingkan má joq é mingdán pé banshoq lé razup má za tûn shit luí, ⁶ "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gã le, haú pé banshoq gi, ngo lé ap byí to bê nghut mù, ngò byí nau é sũ ó yuq lé nghut kôlhang, byi rã nghut lhê. ⁷ Haú mù, Nàng, ngo lé noq é nghut jáng, shí pé banshoq Náng é dut rã nghut lhê." ga, Yesuq lé taí ri.

⁸ Haú hkûn, Yesuq gi, "'Haú Yhumsîng náng é Garai Gasang lé za, nãng noqkuq dojaú ra rã nghut lhê.'"* ga luí, Chyúmdang má kã tô ri." ga luí, yhang lé tú taí ri.

⁹ Nat Tsadán gi, Yesuq lé Yerusalem wà mó má shuí ê mù, noqkuq yhum je myhang é shúhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq. ¹⁰ Hkâsu mù gã le, 'Nang lé upzúng byí nyi rã matú, Garai Gasang gi, Yhâng é maumang lagyó pé lé taí to rã nghut mù,

¹¹ luqgok má náng é hkyí a ló htung shoq, yhangmoq é loq èq Nang lé lhom bún yú kó rã nghut lhê.'"* ga luí, Chyúmdang má kã tô ri." ga taí ri.

¹² Nghut kôlhang, Yesuq gi, "'Haú Yhumsîng, nungmoq é Garai Gasang lé, wó chyam wú rã a nghut.'"* ga luí, Chyúmdang má bo tô ri." ga, yhang lé tú taí ri.

¹³ Nat Tsadán gi, gunlaú é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Wà Bang He-ngik Pyâm *É Hkyô*

Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woi-nyí wum-o byíng é èq Galile mau shut dum taú lo ri. Haú mau jowò hkangmó má, Yhâng é hkyô lé taí pyo ló bùm bekô. ¹⁵ Yhangmoq é tarajong pé má, Yesuq mhoqshit byi mù, lhunglhang bang gi, Yhang lé taí hkya-ôn nyi bum akô.

¹⁶ Hau htâng má, Yhang nyi kô lo é Nazaret wà má dum taú jé ló bê; Yhang gi, hkã-nhám le kut nyi é eq rajung za,

Bánno buinyi* lé tarajong má wang ê mù, laiká nghap râ ga toq yap é hkùn, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,

¹⁸ "Yhumsing é Woi-nyí gi, ngá é ahtoq má nyi nyi ri;

hkâsu mù gà le, asho awuí é bang lé gabú danglù hkô kyo râ matú, Yhang ngo lé hkyin yù bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le, zik zo huí é bang lé nhang kat nhâng râ eq,

¹⁹ Yhumsing, Yhâng é byu pé lé hkyi yù râ ahkying zanwut lé hkô kyo râ matú le, Yhang, ngo lé nhang kat bê nghut ri."*

ga luí, kê tô é jowò lé myang záng mù nghap ri.

²⁰ Hau htâng, Yesuq gi, chyúmding haú lé ding mù, shuí-u sù lé tau byí pyám luí, dum zung tô ri; tarajong mâ é byù lhunglhâng bang gi, Yesuq lé chôm wú tô é hkùn, ²¹ Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luí, yhangmoq lé taí hkat ri.

²² Lhunglhâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut l hú?" ga taí bum akô.

²³ Haú mù luí, Yesuq gi, "Nungmoq gè gè yhang, 'Chi sará ê, yhumsing gùng lé lhoq ge yù aq.'† gâ é sanghkyang èq le, 'Nàng, Kaperna-um wà má kut shit wú é hkyô ngamoq wó gyo bê, haú eq rajung za, nàng, nàng é yhum mau má le, kut shit wú aq.' ga luí le, ngo lé taí kó râ nghut lhê." ga taí ri.

²⁴ Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô. ²⁶ Nghut kôlhang, haú ming má sùm zan eq lhamó hkyuq hkyap yhang, mau a wò dut byuq

mù, mutmó gyó tô é hkùn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta wà mâ é, chuimó myhí rayuq chyáng sheq nhang kat byí é nghut lhê. ²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng mâ é rayuq le wó sân-yúng yù kô é a nghut; Suriq byù Naman ga sù tûngbaù hpó za sheq wó sân-yúng é nghut lhê." ga taí ri.

²⁸ Tarajong hkaú mâ é lhunglhâng bang gi, haú hkyô lé wó gyo kôjáng, gyai yhang nhik-yo nau bùm kômù, ²⁹ toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq mâ é gampyoq má, ê chyûn hpyit hkyô pyám râ ga shuí e ló akô. ³⁰ Nghut kôlhang, Yesuq kúm gi, byù hpûng haú mai so hkoq htoq ló byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

³¹ Hau htâng, Yesuq gi, Galile mau mâ é Kaperna-um wà má jé é mù, Bánno buinyi má byu pé lé mhoqshit hi ló bê nghut ri.

³² Yhangmoq gi, Yhang mhoqshit é hkyô lé mauhong nyi akô; hkâsu mù gà le, Yhang gi, ahko ahkáng bo é dang dông taí nyi é yanmai nghut ri.

³³ Yesuq, tarajong hkaú má mhoqshit byí nyi é hkùn, nat gang wang júng é byù rayuq htê mó o mó èq taí é gi, ³⁴ "Ê, Nazaret wà byù Yesuq é, ngamoq gi, Nàng eq haí sêng lhê l hú? Ngamoq lé lhoq hten râ matú, Nàng jé lé é nghut lhê l hú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

³⁵ Haú hkùn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gùng má lhoq lheq to mù, a nò nhang é za, yhâng chyáng mai htoq ló byuq ri.

³⁶ Haú mù luí, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang

* **4:16** Bánno buinyi gâ é gi, Yudaq byu pé nômù é buinyi lé gâ lhê. Ahkui lhê é dông ga jáng, Bánno buinyi gi, bat htoq hkyuq nyi lé âng ri. * **4:19** Esai 61:1-2 † **4:23** Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauho mu wó tân shit râ nghut lhê." gâ é nghut lhê.

wá nghut lhê lhu? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhum bum akô. ³⁷ Haú hkûn, haú mau mâ é awui ayàm jowò hkangmó má jàm shoq, Yhâng é hkyô lé taí pyo hú ló bûm bekô nghut ri.

*Yesuq Nòhpyo Lhoq Gê Byî É Hkyô
Mht 8:14-17; Mrk 1:29-34*

³⁸ Yesuq gi, haú tarajong mai toq ló mù, Simun é yhûm má wang ló ri. Simun é yhâng-aumó gi, alí gyai nyé no nyi é nghut mù luí, lhoq gê byí râ matú, Yesuq lé garúm dung byî akô. ³⁹ Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htâng rayuq é ah-toq má Yesuq gi, loq ke byi luí, lhoq gê byí ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaú má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkûm wú akô. ⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashî, haú é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri. ⁴⁴ Haú mù, Yesuq gi, Yuda mau mâ é tarajong pé má, hko kyô wún nyi ri.

5

*Sâng-hi Ji Yù Huí É Chángzô Pé
Mht 4:18-22; Mrk 1:16-20*

¹ Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng

chyîn chyap wang lé lô kô é hkûn, ² nhông gin-gau yàm má lhai razúm joq tô é lé, Yhang myang kat ri. Ngogûn dú bang kúm gi, lhai mai htoq mù, yhangmoq é gùn pé lé chí nyi akô. ³ Yesuq gi, Simûn é lhai má wàng mù gin-gau mai rachyit lhoq kang nhâng luí, haú lhai htoq má zung to mù, shiwa byu pé lé mhoqshit taí kyô nyi ri.

⁴ Dang ban taí jáng, Yesuq gi, Simun lé, "Wui nik é shut hui luí, ngozo wó kông yù râ matú, nungmoq é gùn pé lé dú hkyô kat keq." ga taí ri.

⁵ Simun gi, "Yhumsîng ê, ngamoq amàn ra-myin mau shikut wú kôlhang, haí le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tú taí ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló râ su dut é yanmai, ⁷ lhai gó lhum mâ é luzúm wui lé, lé garúm yù râ matú loq lik lik kat kôjáng, haú bang lé lô mù, haú lhai í lhum aluq myup ló shoq ngozo lé kat pyíng bekô.

⁸ Simun Petruq gi, haú lé myàng jáng, Yesuq é hkyî wang má hkyihput htuq mù, "Yhumsîng ê, ngá chyáng mai ló byuq aq, haí mù gâ le, ngò gi, yubak dap é byù nghut nyi lhê." ga taí ri. ⁹ Haí mù luí gâ le, Simun le, yhang eq nyi tô é lhunglhang bang le, haú su ngozo wó yu é yanmai, maú nyi bùm kômù nghut ri. ¹⁰ Simûn é luzúm nhik, Zebedi é yhangzo Yakuq eq Yohan le, haú su chôm maú byuq akô.

Hau htâng, Yesuq gi, "Hkâgyuq, ahkuí mai nàng gi, byù lé châng kóng sù dut râ nghut lhê." ga luí, Simun lé taí ri. ¹¹ Yhangmoq gi, wuiyàm má jé jáng, lhai pé eq yhangmoq é zè banshoq lé tô pyâm to luí, Yesuq htâng châng bekô nghut ri.

*Manggâm Dap Bang Lé Yesuq Lhoq Gê
Byî É Hkyô*

Mht 8:1-4; Mrk 1:40-45

¹² Radàm lé, Yesuq gi, wà rawà má nyi tô lé, ragùngdû é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

¹³ Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoi." ga taí ri; haú hkûn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, náng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taí hkûm kat ri.

¹⁵ Nghut kôlhang, Yesuq é hkyô gi, je riyhang taí pyo hû jam ló mù luí, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup míng tô akô. ¹⁶ Yesuq kúm gi, Yhang baú tsik za yoso shut htoq ê mù, kyú ê dung dung kut ri.

Gùngjum Shí Sû Lé, Yesuq Lhoq Gê Byí É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsíng Garaí é wum-o a-tsam le nòhpyo lhoq gê râ matú Yesuq eq rahá nghut nyi ri. ¹⁸ Haú hkûn, byù ra-am gi, gùngjum shí sù rayuq lé taphkang mai waq lé lô kômù, haú yuq lé, yhúmhaú má nyi tô é Yesuq é hí má, wó lheq byi shoq ga hkyô ho nyi akô. ¹⁹ Byù lùm myô chyín chyap to mù, haú nò sù lé hká dông le a wó shuí wàng kôluí, haú yhumhkûng htoq shut waq doq ló mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

²⁰ Yesuq gi, yhangmoq é lumjíng myit lé byu myàng jáng, "Byù náng ê! Náng é yubak mara lé hkyut pyám byi bê." ga taí ri.

²¹ Haú hkûn, Hparishe pé eq tarâ sará pé gi, "Shí su ga luí, Garaí Gasang lé rhoi dang taí é sù gi, ó yuq wá nghut lhê lhú? Garaí Gasang za a nghut jáng, yubak mara wó hkyut pyám byi sù gi, ó yuq wá nghut lhê lhú?" ga luí, myit són wuí nyi bum akô.

²² Yesuq gi, yhangmoq myit són wuí nyi é hkyô lé sé mù, "Nungmoq é i-myt hkaú má, haí mù shí pé lé myit són wuí nyi akô lhú? ²³ 'Náng é yubak mara lé hkyut pyám byi bê.' nghû taí râ eq, 'Toq luí, hkyô so aq.' nghû taí râ má, hká hkun je taí lui lhê lhú? ²⁴ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga mù, haú gùngjum shí sù lé, "Ngò, náng lé taí bá, toq aq, náng é taphkang yu chùng luí, yhùm taú ló aq hkoi." ga taí ri. ²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chùng luí, yhâng é yhùm shut Garaí Gasang lé hkya-on kungtôn uchyang ló byuq bê. ²⁶ Byù banshoq bang gi, gyai maú byuq kômù luí, Garaí Gasang lé hkya-on kungton akô nghut ri. Yhangmoq gyai gyuq maú dik é eq le, "Hkû-nyí, nga-nhúng, mauhpo amú pé lé myàng bê." ga taí nyi akô.

Yesuq Gi, Lewiq É Yhùm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé ê myàng mù, haú yuq lé, "Ngá htâng cháng aq." ga taí ri. ²⁸ Lewiq gi, haú má é zè banshoq lé tô pyâm to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhùm má Yesuq é matú zoshuq poí mó kut byí ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng mâ é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lhú?" ga, Yhâng é chángzô pé lé mara hùn dang taí akô.

³¹ Yesuq gi, yhangmoq lé, "Wángzán bang chi sará a ra kó, nòhpyo hui bang za sheq ru râ lhê. ³² Ngò gi, dingmán bang lé wut yù râ matú jé lé é a nghut, yubak dap bang myit lhing râ matú sheq jé lé é ru nghut lhê." ga tú taí ri.

* 5:24 Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

Zoshuq Gám Hkyô Eq Séng Luí, Yesuq Tai É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haû su kut akô; nghut kôlhang, náng é chángzô pé gi, haû mù zô nyi shuq nyi akô lhú?" ga Yesuq lé tai akô.

³⁴ Yesuq, yhangmoq lé tú tai é gi, "Bíng pé gi, lusik eq rahá nghut nyi to ashí hkûn, yhangmoq lé zo shuq wó gám nhâng râ lhú? ³⁵ Nghut kôlhang, lusik† lé yhangmoq chyáng mai shuí yu pyâm é hkyíng jé râ nghut lhê; haû buinyi pé má kúm gi, yhangmoq, zoshuq gám kó râ nghut lhê." gâ ri.

³⁶ Dangtú dông mai le, Yesuq, yhangmoq lé tai é gi, "Mebu sik mâ é lâng cheq yû mù, mebu xau má hpo é gi, ó a kut wú kó; haû su kut é nghut jáng, mebu sik lé le lâng cheq pyâm é dut mù, pán jap sik le mebu xau eq du lhum râ a nghut. ³⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê. ³⁸ Haû su a dut shoq gi, tsibiyiq wing asik lé, shokuq htûng asik má kat râ râ nghut lhê. ³⁹ Tsibiyiq wing axau shuq nyi bê sù gi, asik lé a shuq naû nghut râ; hkâsu mù gâ le, 'Axau sheq je nghâm ri.' ga tai rá." gâ ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaû mai sô lai ló é hkûn, Yhâng é chángzô pé gi, kyôshi ratsuí langshap yû mù, loq èq nè hpuq zô akô. ² Haû mù luí, Hparishe pé ra-am gi, "Bánno buinyi má a ge kut jung lé, nungmoq gi, haû mù luí haû su kut akô lhú?" ga tai akô.

³ Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lhú? ⁴ Dawiq gi, Garai Gasâng

é yhûm* hkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lhú?" ga tú tai ri. ⁵ Hau htâng, Yhang gi, "Haû Byu Yhangzo gi, haû Bánno buinyi é Yhumsîng nghut lhê." ga yhangmoq lé tai ri.

Loq Jum Shí Sû Lé Yesuq Lhoq Gê Byi É Hkyô

Mht 12:9-14; Mrk 3:1-6

⁶ Gotû Bánno buinyi má le, Yesuq gi, tara-jong má wàng mù mhoqshit nyi é hkûn, loqyo loq ajum shi byuq é byù rayuq haû má nyi tô ri. ⁷ Haû hkûn, tarâ sará pé eq Hparishe pé gi, Bánno buinyi má nôhpyo lhoq gê byi râ lhú ga luí, Yhang lé mara wó hûn shoq ga gyâm wú nyi akô. ⁸ Yesuq kúm gi, yhangmoq é i-myt lé sé sù nghut luí, loq jum shí sù lé, "Toq mù, banshoq bâng é hí má, yap shit aq." ga tai kat ri. Haû yuq le, toq mù yap tô ri.

⁹ Haû hkûn, Yesuq gi, "Ngò nungmoq lé myí wú kôlé, Bánno buinyi má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lhú?" ga luí, yhangmoq lé tai ri.

¹⁰ Hau htâng má, yhangmoq banshoq lé lhing wú mù, haû loq jum shí sù lé "Náng é loq nyhang kat aq." ga tai kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nô chik yhang nhik-yo naû kômù luí, "Yesuq lé hkâsu wá kut pyám râ lhú?" ga luí, rayuq eq rayuq tai lhum nyi akô.

Raxe Í Yuq Lé Lagyo Ga Myhîng Yu É Hkyô

Mht 10:1-4; Mrk 3:13-19

¹² Haû yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdûng nyi ri. ¹³ Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luí, lagyo pé ga myhîng to byi ri. ¹⁴ Haû bang gi, Yesuq eq Petruq ga myîng myhîng byi é Simun eq, yhanggu Andre, Yakuq

† 5:35 Lusik gâ é gi, Yesuq lé tai nau é nghut lhê.

* 6:4 Garai Gasâng é yhûm nghu é gi, Yerusalem wà mó má joq

é saksé zúm lé gâ é nghut lhê.

eq Yohan, Hpilip eq Barhtolume, ¹⁵ Mahte eq Htomaq, Alhpe é yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám rà sù Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuìshuq lung-aû ayàm mâ é Turuq myuq eq Sidun myuq mâ é bang, rajùm rayò gi, ¹⁸ Yhâng é dang gyô yù rà eq yhangmoq é nòhpyo lhoq gê nhâng rà matú, rahá za zup míng tô akô. Agè ashop é nat eq zing-ri huì é bang le ge byuq akô. ¹⁹ Yhâng é gùng mai htoq é wum-ô eq byù banshoq lé lhoq gê byi nyi é yanmai shiwa byu pé le Yhang lé wó záng shoq ga, ho nyi akô.

²⁰ Haú hkûn, Yesuq gi, Yhâng é chángzô pé lé wú kat luì taì é gi,

"Myùng bang nungmoq gi, hkungsô wó nyi ri, hkâsu mù gà le, Garai Gasâng é mingdán‡ gi, nungmoq é mingdán nghut nyi ri.

²¹ Ahkuì, zòmút wuìshit huì nyi é bang nungmoq gi, hkungsô wó nyi ri, hkâsu mù gà le, nungmoq nhik dik shoq myàng zo kó rà nghut lhê.

Ahkuì, ngau nyi bang nungmoq gi, hkungsô wó nyi ri, hkâsu mù gà le, nungmoq myang wuì kó rà nghut lhê.

²² Haú Byu Yhangzô é yanmai nungmoq lé su eq a nguì é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkuì huì é hkûn, nungmoq gi, hkungsô wó nyi ri.

²³ Haú hkûn lé, gabú byam chyû nyi keq, hkâsu mù gà le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taì lhê, hkâsu mù

gâ le, yhangmoq é îchyí îwa pé le myiqhtoi péš lé haú su kut wú bekô."

²⁴ Nghut kôlhang, sùt wó bang nungmoq gi, dingnyé wó rà, hkâsu mù gà le, nungmoq gi, yhumsing gùng má nhik shi nhik dik é hkyô lé huì yù bekô.

²⁵ Ahkuì, gyi gyi dau dau myàng zo myàng shuq nyi é bang nungmoq gi, dingnyé wó rà, hkâsu mù gà le, nungmoq zòmút wuìshit é hui kó rà nghut lhê.

Ahkuì, wui nyi é bang nungmoq gi, dingnyé wó rà, hkâsu mù gà le, iyon yôn é eq ngaubyi ngau-nhap htoq é hui kó rà nghut lhê.

²⁶ Byù banshoq bang, nungmoq lé ge é byù ga kôjáng, nungmoq gi, dingnyé wó rà,

hkâsu mù gà le, yhangmoq é îchyí îwâ pé le, myiqhtoi pyoq pé* lé, haú su ga taì wú bekô.

Gye Pé Lé Chyitdap Râ Hkyô

Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò taì kôlé, nungmoq é gye pé lé chyitdap nyi keq; nungmoq lé a nau a wôm é bang lé ge é hkyô kut keq;

²⁸ nungmoq lé nhing é bang lé, shimân byi keq; nungmoq lé rhoi é bang lé kyûdung byi keq. ²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; ³⁰ nang lé rajung jung dúng é sù lé le, byi pyám aq; náng zè yu pyám byi é su chyáng mai le, hkâdúng yù lo.

³¹ Nungmoq ô nau é dông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó rà lhú? Yubak dap bang le, yhumsing lé chyitdap é bang lé gi, chyitdap nyi akô.

³³ Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó rà lhú? Yubak dap bang le haú su kut nyi akô. ³⁴ Supé lé zè

† **6:15** Zelutuq gâ é lichyúm gi, yhumsing zui sai é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó rà matú shikut nyi é hpúng bang lé, Zelutuq gâ lhê. ‡ **6:20** Garai Gasâng é mingdán gâ é gi, Garai Gasang up é lé gâ lhê. § **6:23** Myiqhtoi pé le zing-ri huì é yanmai, yhangmoq chyunghuq wó nyi akô. Haú eq rajung za, jamjau huì é bang nga-nhúng le chyunghuq wó rà nghut lhê. * **6:26** Myiqhtoi pyoq pé gi, Garai Gasang jéyáng é hui rá.

chyi byî le, dum wó tau byi râ su dut é bang lé za, chyi byî le gi, nungmoq é matú hai akyû bò kó râ lúhú? Yubak dap bang lhang chyi byî é myhó dum wó yû shoq, yubak dap é bang lé chyi byî akô. ³⁵ Nghut kôlhang, nungmoq gi, nungmoq é gye pé lé chyitdap mù, ge é dông kut byî nyi keq. Dum wó tau yù râ lé myoq a byu é za, chyi ngho byi keq; haû su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é Îwa Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haû jáng, nungmoq le jéyáng é a hui kó râ nghut lhê. A doqdân é za nyi keq; haû jáng, nungmoq le doqdân é a hui kó râ nghut lhê. Mara hkyut byi keq; haû jáng, nungmoq le mara hkyut byi é hui kó râ nghut lhê. ³⁸ Byi keq, haû jáng, nungmoq le dum byi é hui kó râ nghut lhê. Mán é búng mai byíng mui shûn shoq nhûn chyíng, dùn chyíng kat mù, nungmoq é tanghkoí hkaû má lik kat byi é hui kó râ. Hkâsu mù gâ le, nungmoq lik byi é bung èq, nungmoq lé dum lik byi râ nghut lhê." gâ ri.

³⁹ Hau htoq agó, Yhang dangtú ralhum dông yhangmoq lé dum taí é gi, "Myoqjit sù gi, myoqjit sù lé hkyô wó tûn shit lhê lúhú? Yhangnhik í yuq é donghkong má byit gyó kó râ nghut lhê, a nghut kó lúhú? ⁴⁰ Jongzo gi, sará htoq gyaú râ a nghut; nghut kôlhang, gúm shoq mhoq yû bê sù ó nghut kôlhang, yhumsing é sará su dut râ nghut lhê.

⁴¹ Yhumsing myoq hkaû má lúng tô é siktúm† lé lhang a myit wú é nhîng, haî mù luí, nunggu nungmâng é myoqwàng‡ lé myang lhê lúhú? ⁴² Yhumsing é myoq má lúng tô é siktúm lé lhang a myàng sù nhîng, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghû luí, náng é gumang hpó lé hkâsu wó taí râ lúhú? Gegùn labyoq kut sù ê, náng é myoq

má lúng tô é siktúm lé hí choq pyám aq. Haû jáng sheq, nunggu nungmang é myoq má wang tô é myoqwàng lé choq pyám byi râ matú, náng san za myàng râ nghut lhê.

Agàm Eq Ashi

Mht 7:17-20; 12:34-35

⁴³ A ge é ashî zuí é, ge é shigâm hkâmá le a joq. Ge é ashî zuí é, a ge é shigâm le a joq. ⁴⁴ Haû mù luí, shigâm hkangmó lé, zuí é ashî lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibyiq shi a wó hpyoq yu wú. ⁴⁵ Ge é sù gi, yhumsing é i-myit unghkaû mâ é suttò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaû mâ é agè ashop é suttò mai, agè ashop é zè pé lé lhoq htoq shit lhê. Haî mù gâ le, yhâng é i-myit unghkaû má byíng mui tô é lé za, yhâng é nhut mai taí htoq lo é nghut lhê.

Luqhtân Htoq Má Yhûm Saí Sù Eq Myi Chîn Dum Má Yhûm Saí Su É Hkyô

Mht 7:24-27

⁴⁶ Ngò taí é eq rajung za lhang a wó châng kut kô é nhîng, haî mù luí, nungmoq Ngo lé 'Yhumsing ê, Yhumsing ê.' nghu nyi akô lúhú? ⁴⁷ Ngá chyáng lé mù, ngá dang gyô yù luí, châng kut é sù ó nghut kôle, hkâsú é sù eq wuí é lé ngò nungmoq lé shit kyo kôle. ⁴⁸ Haú yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuí jê lò luí wuibaù pé èq yhûm haû lé lo gùn kôlhang, ging ging tíng tíng saí to bê nghut luí, haû lé a wó gun nhún. ⁴⁹ Ngá dang gyô yù mù, a cháng sù gi, apûn awang a saí é za myi chîn dum má wahpang yhûm saí sù eq wuí nyi ri. Wuibaù pé èq yhûm haû lé lo gun kat é eq, haú hkûn jáng, lêng gyop byuq ri. Yhûm haû byoq hten byuq é gi, yù whûi a bò loshoq dut byuq râ nghut lhê." gâ ri.

7

Romaq Gyezau Rayuq É Lumjîng Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htâng má, Kaperna-um wà shut wang ló

† 6:41 Siktúm nghu e gi, yubak mara kô é lé taí lhê. ‡ 6:41 Myoqwàng nghu e gi, yubak mara atiq azo lé taí é nghut lhê.

ri. ² Haú hkûn, Romaq gyezau rayuq é chyitdap dui-nhâng zoshâng gi, shî-nò no nyi ri. ³ Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé ê ji lò keq ga, Yudaq suwún wuî lé nhang kat ri. ⁴ Haú bang gi, Yesuq chyáng jé ê kô é hkûn, "Yhang gi, nang shí hkyô kut byi râ matú gingdán é sù, yhang nghut nyi ri; ⁵ hkâsu mù gâ le, yhang gi, nga-nhông amyû lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dúng wut nyi akô. ⁶ Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuî lé taí nhang kat é gi, "Yhumsing Yesuq ê, nang gûng lé hkâlhoq hkyik lo. Nang, ngá é laishîn-htâng má, lé nang râ lhang ngò má a gingdán. ⁷ Haú mù, ngò, nang chyáng jé lé râ matú gingdán é sù a nghut; Nang, dang rahkun za taí kat laq, haú hkûn, ngá é dui-nhâng zoshâng ge ló râ nghut lhê. ⁸ Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'É aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gâ ri.

⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lhang, shî í lumjing é sù lé, Ngò a myang wú." ga taí ri. ¹⁰ Nhang kat é bang yhûm má dum taú jé jáng, no nyi é dui-nhâng zoshâng gi, ge to lág é lé ló myang akô.

Shî Sù Lé Dum Lhoq Tui É Hkyô

¹¹ Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akô. ¹² Haú wà wàng hkum má jé lo é hkûn lé, chuimó myhî é yuqzo te gi, shî mù, yhâng é mâng lé waq htoq lé lo akô. Wà byù myo myo le, chuimó myhî haú eq rahá châng lé lo akô. ¹³ Yhumsing gi, haú chuimó myhî lé myàng jáng, yhang lé wú shogyo luí, "Hkâ-ngaú." ga taí ri.

¹⁴ Yesuq gi, gung shut huí ê mù, loq èq é záng kat ri. Haú hkûn, waq tô é bang le jâng yap to byí akô. Yhang gi, "Zorâm ê, ngò, nang lé taí lhê, toq aq." ga taí ri. ¹⁵ Haú hkûn, shî bê sù gi, toq zûng mù dang taí lo ri. Yesuq gi, zorâm haú lé yhângnû chyáng dum ap byí ri.

¹⁶ Byù lhunglhâng bang gyuaq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhông chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taí nyi akô. ¹⁷ Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn ló bum akô.

Yesuq Eq Wui-myhup Sará Yohan É Hkyô Mht 11:1-19

¹⁸ Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô. ¹⁹ Haú mù luí, Yohan gi, yhâng é chángzo í yuq lé ji yù mù, haú Yhumsing chyáng nhang kat luí, "Nang gi, haú jé lé lô râ Sù nghut lhê lú? Haú a nghut jáng, ngamoq, góyuq lé lág ra shirâ lú?" ga, myí nhang kat ri.

²⁰ Haú nhik gi, Yesuq chyáng jé jáng, "Nang gi, haú jé lé lô râ sù nghut lhê lú? Haú a nghut jáng, ngamoq góyuq lé myoqbyu lág nyí ra shirâ lú?" ga luí, Wui-myhup Sará Yohan gi, ngá-nhik lé nang chyáng myí nhang kat ri." ga taí akô.

²¹ Haú u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng nhang ri. ²² Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myàng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ²³ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

²⁴ Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé taí é gi, "Nungmoq gi, haú lé hpuq wú

râ matú, haú yoso shut e akô lúhú? Lai èq hik nhún é jamgàm lé wú râ matú nghut akô lúhú? ²⁵ Haú a nghut jáng, haí lé wú râ matú e akô lúhú? Nú-nhâm é mebu wut sù lé wú râ matú e akô lúhú? A nghut! Wú keq, gyai hpaú é mebu wut luí agùn agó wó bang gi, hkohkâm-wâng pé má sheq ru nyi lhê. ²⁶ Haú nghut le gi, haí lé wú râ matú é kô é lúhú? Myiqhtoi rayuq lé lúhú? Haú kúm nghut ri. Ngò, nungmoq lé taí kôlé, Yohan gi, myiqhtoi htoq lhang gyaú sù nghut lhê. ²⁷ Haú yuq é hkyô lé, Chyúmdang má kâ tô é gi,

'Wú aq, Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê.'[☆]

gâ ri. ²⁸ Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lhang a nyi, nghut kôlhang, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyú lhunglhang bang eq kang guq bang gi, dang haú pé lé wó gyo kôjáng, Yohan byí é bapisma lé hkâm yù kô é nghut mù luí, Garai Gasâng é dingmán é hkyô lé sê gyô yu akô. ³⁰ Hparishe pé eq tarâ sará pé kúm gi, Yohan byí é bapisma a hkâm yù kômù luí, Garai Gasang hen lajang é hkyô lé yhumsing gung é matú he-ngik pyâm akô.

³¹ Yesuq dum taí é gi, "Haú mù luí, byù myú shí lé, Ngò, hai èq taí kê wú râ lúhú? Yhangmoq hai eq wui akô lúhú?"

³² Yhangmoq gi,

'Nungmoq é matú, ngamoq sampyí mut byi kôlhang, nungmoq gi, a gó kó, ngamoq ngaù hkyangsâng kôlhang, nungmoq gi, a ngaù kó.'

ga luí, gài pé má zùng uchyang rayuq eq rayuq wut taí lhum nyi é zoshâng wui eq wui akô. ³³ Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luí, nungmoq taí akô. ³⁴ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí

akô. ³⁵ Nghut kôlhang, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkâm byí nyi akô."* gâ ri.

Yubak Dap É Myiwe Rayuq, Yesuq Lé Xú But Byí É Hkyô

³⁶ Hparishe rayuq gi, Yesuq lé yhang chyáng zang zo râ matú ji kat ri. Haú mù, Yesuq gi, haú Hparishe é yhúm má wàng luí zo râ matú zung tô ri. ³⁷ Haú hkûn, wú keq, haú wâ mâ é yubak dap é myiwe rayuq gi, Yesuq haú Hparishe é yhúm má zô zung tô é lé sé jáng, gyai hpau dap é namngón xú bo é luq hpyú bòng yu lé luí, ³⁸ Yesuq é nunghtáng hkyí wàng má ngau yap to mù, Yhâng é hkyí má ngaubyí èq záng lhoq teq byi jáng, ûxam èq but sut pyám byí ri. Dum nghut jáng, nhut èq puq luí mura lé but byí ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htung é sù, ó yuq nghut é eq hkâsù é yubak dap é myiwe nghut é lé, Yhang sé râ nghut lhê." ga luí, yhâng é unghkaú má myit nyi ri.

⁴⁰ Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

⁴¹ Haú hkûn, Yesuq gi, "Ngùn chyí zo sù rayuq chyáng, chyín dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri. ⁴² Haú nhik gi, chyín xap râ ngùn a wó kôluí, chyín yhumsing gi, yhangnhik lé xap a ra lò gâ pyâm ri. Haú mù luí, haú nhik mâ é hká yuq gi, yhang lé je chyitdap râ lúhú?" ga myí ri.

⁴³ Simun gi, "Je myo lhoq lhut hui sù, nghut râ su ngam ri." ga tú taí ri.

Yesuq gi, "Nàng myit e dông jô ri." ga taí ri.

⁴⁴ Haú hkûn, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhê lúhú? Ngò, nàng é yhúm má wang le, hkyí chi râ uchyam, nàng a byi, yhang kúm gi, ngaubyí èq ngá hkyí lé tik byi luí, yhâng é xam èq sut pyám byi bê. ⁴⁵ Nàng gi, ngo lé nhut èq a puq nghut ri; yhang kúm gi, ngò yhúmhaú má wang é mai ngá hkyí

☆ 7:27 Mal 3:1 * 7:35 Nghut kôlhang, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haú, tengmán ri ga saksé hkâm nyi akô. † 7:41 Denari rachap gi, ra-nyí lhê é byù rayuq é zuihpau eq wui ri.

má a no loshoq puq nyi râ. ⁴⁶ Nàng gi, ngá ulhum má xù a but byi wú, yhang kúm gi, ngá é hkyi má nàm ngón é mura but byi bê nghut ri. ⁴⁷ Haú su mù, ngò, nàng lé taí lé, haú myiwe gi, je chyitdap luí, yhang wó é yubak myo myo lé hkyut pyám byi é hui bê. Shau za mara hkyut pyám byi é hui sù gi, shau za chyitdap sù nghut ri." ga taí ri.

⁴⁸ Yesuq gi, myiwe haú lé le, "Ngò, nàng é yubak mara hkyut pyám byi bê." ga taí ri.

⁴⁹ Rahá zung tô é bang gi, "Yubak mara lhang wó hkyut pyám byi sù, shí yuq gi, ó wá nghut lhê lú?" ga luí, myit nyi bum akô.

⁵⁰ Yesuq gi, "Nàng é lumjìng myit èq nang lé hkyi yù bê, ngón za ló aq hkoi." ga luí, myiwe haú lé taí kat ri.

8

Yesuq Htàng Châng É Myiwe Wui

¹ Hau htàng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htàng rawà jé e ló ri. ² Hau htoq agó, nat gang dap é mai le, nòhpyo mai le Yesuq èq lhoq ge yu é myiwe wui, nat nyhit nat lhoq htoq pyám byi huí é, Magadalaq wà mà é Mariq le, ³ Herut é ikun zum sù Kúza é yhumsìng myhí Yoanaq le, Susannaq le, gotú myiwe wui myo myo le, Yesuq eq rahá nghut akô. Haú bang gi, yhumsìng wó du é í Yesuq eq lagyo pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴ Wà hkang wà mó mà é bang gi, Yesuq chyáng zup zìng lé lo bùm kômù shiwa byù moq mó zup mìng tô é hkùn, Yesuq dangtú dông taí kyô é gi, ⁵ "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkùn, ra-am gi, hkyô má gyó ang mù, byu èq záng nàng pyeq pyâm lhê, maulat nghoq pê èq hte zo pyâm lhê dut ri. ⁶ Ra-am gi, luqgok yò má gyó ang mù, yuq htoq lo é hkùn, myigùng a teq é yanmai nyhuí shi byuq akô. ⁷ Ra-am gi, zugyóm hkaú má gyó ang luí, zubyap eq rahá yuq htoq lô mù, wup pyâm é hui bê nghut ri.

⁸ Nghut kôlhang, ra-am gi, myìhpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haú su ga taí nyi é hkùn, "Gyô yù râ nohkyap dap sù gi, gyô yù sháng gaq!" ga le, htê mó èq taí kat ri.

⁹ Haú hkùn, Yhâng é chángzô pé gi, dangtú shí hai lichyúm nghut lhê lú ga, Yhang lé myi akô. ¹⁰ Yhang gi, "Garai Gasâng é mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byi to bê. Nghut kôlhang, góbàng matú gi, 'Wú to kôlhang, a myàng kó sháng, gyô nyi kôlhang, a sê gyo kó sháng.'* nghù, ngò dangtú dông taí lhê.

¹¹ Ahkui lhê é dangtú shi é lichyúm gi, ísu nghut ri: kyôshi gi, Garai Gasâng é mungdang nghut nyi lhê. ¹² Hkyô má gyó âng é kyôshi gi, haí eq wui lhê lú gâ le, haú mungdang lé byu pé wó gyô é htàng má, lumjìng é má le, hkyi yu é má le, a jé kó sháng gaq ga luí, yhangmoq é i-myt hkaú mai nat Tsadán èq mungdang haú lé, lé yu pyâm é hui bang eq wui lhê. ¹³ Luqgok yò pé má gyó âng é kyôshi gi, haí eq wui lhê lú gâ le, haú mungdang lé wó gyo jáng, gabú myit èq hap yù kôlhang, amyit a wó chín mù, rayoq rabun za lumjìng luí, gungláu huí é nyí má, dum htak ló byuq é bang eq wui lhê. ¹⁴ Zugyóm má gyó âng é kyôshi gi, haí eq wui lhê lú gâ le, haú mungdang lé gyô yù luí, yhumsìng é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wui lhê. ¹⁵ Hpún bo é myigùng má gyó é kyôshi kúm gi, haí eq wui lhê lú gâ le, haú mungdang lé lhumzui luí ge é i-myt èq ban gyô yù mù, gìng tíng shoq zuí zìng luí, wó jân é i-myt èq ashi zuí é bang eq wui lhê.

Myibung Htân É Hkyô

Mrk 4:21-25

¹⁶ Myibung lé tap mù, aú èq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷ Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zaú tô é zè le

haî a joq nghut ri. ¹⁸ Haû mù luî, nungmoq hkâsu wó gyô yu é hkyô lé sidiq nyi keq, haî mù gâ le, wó to sù lé gi, jat byi shirâ, a wó su chyáng mai kúm gi, yhang wó to bún é mâ é lé lhang, yu pyám byi shirâ nghut lhê." ga taî ri.

Yesuq É Yhângnu Eq Yhanggu Pé
Mht 12:46-50; Mrk 3:31-35

¹⁹ Haû hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang é kó nghut ri. ²⁰ Haû hkûn, Yhang lé, "Náng nu eq nunggu pé gi, nang lé hui naû luî, shinggan má láng yap bum akô." ga taî kyo akô.

²¹ Yesuq gi, yhangmoq lé, "Garai Gasâng é mungdang lé gyô yù luî, châng é bang gi, Ngá nu eq Ngá gû pé nghut akô." ga luî, yhangmoq lé tû taî kat ri.

Laidun Mó Lé Yesuq Lhoq Zîm É Hkyô
Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhung nhông he hpoq shut dap e ló sháng." ga taî luî, lhaî má wàng mù gû dap e ló akô. ²³ Yhangmoq gû dap e ló é hkûn lé, Yesuq gi, yhup myhî tô ri. Haû u lé, nhông haû má laidun mó lò luî, lhaî má wui byíng lô mù, yhangmoq myup shî râ su dut lò nyi bekô nghut ri.

²⁴ Haû mù, yhangmoq gi, Yesuq chyáng huî é luî, Yhang lé nhaû pun mù, "Yhumsîng ê, Yhumsîng ê, nga-nhung myup ló nyi ri." ga taî akô.

Haû hkûn, Yhang toq luî, laidun eq wuîlhêng pé lé tân kat jáng, haû pé gi, zim za dut ló byuq bê. ²⁵ Haû mù, Yesuq gi, "Nungmoq é lumjîng myit gi, hkâmá nghut akô lhú?" ga luî, yhangmoq lé myî ri.

Yhangmoq kúm gi, gyuq maú byuq bùm kôluî, "Shí yuq gi, hkasû é byù nghut lhê là? Yhang hkunmó hkyó jáng, lài eq wuîlhêng pé lhang gyo byi ri-nhung!" ga luî, rayuq eq rayuq myî lûm bum akô nghut ri.

Nat Lé Hkat Htoq Byî É Hkyô
Mht 8:28-34; Mrk 5:1-20

²⁶ Hau htâng, yhangmoq gi, Galile mau tû tap mâ é Gerase byu pé é mau má jé dap e ló

bekô. ²⁷ Yesuq kong shut doq ló le, haû wâ mâ é nat gang dap é sù rayuq gi, Yhang lé hui ri. Haû yuq gi, yhûm má le a nyi é za, mebu a dap é, lupdùng má myáng myáng nyi nyi sù nghut ri. ²⁸ Haû yuq gi, Yesuq lé myàng jáng, wut garu luî, yhâng é hkyî wang má paî gop to mù, "Myhang htâng é Garaî Yhangzo Yesuq ê, Nàng gi, ngò eq haî séng lhê lhú? Ngo lé a zing-ri râ matú, ngò nang lé dúng nyi lhê." ga luî, htê mó eq taî garû nyi ri. ²⁹ Hkâsu mù gâ le, Yesuq gi, agè ashop é nat lé haû yuq gùng mai htoq ló râ matú, tân pyâm é yanmai nghut ri. Byù haû yuq lé nat gâng eq adàm dàm wang júng hkangmó, loq eq hkyî má toqjáng tuî eq tuî shung, kyum xâng tô é eq, zúng tô é nghut kôlhang, láng hpyit pyám pyám kut é htoq ago, nat gâng eq yhang lé yoso hkaû shut lángmhap yù yù kut nyi ri.

³⁰ Yesuq gi, yhang lé, "Náng myîng haî gâ lhê?" ga myî kat é hkûn, yhang gi, "Legio* gâ lhê." ga tû taî ri. Haî mù gâ le, yhâng chyáng nat gang myo myo wang lúng tô é yanmai nghut ri. ³¹ Nat jùm gi, yhangmoq lé nik dik htûm é Lasang-dong shut a kôn kat râ matú, Yesuq lé chôm dúng nyi bum akô.

³² Haû u lé, waq rajùm mó gi, bùm yàm má dû but zô nyi bum akô nghut ri. Haû mù, yhangmoq gi, waq pé chyáng wàng nhâng laq ga, Yesuq lé ahkáng dum dung kut kojáng, Yesuq gi, yhangmoq lé ahkáng byi kat ri. ³³ Haû mù luî, nat gang jùm gi, byù haû yuq chyáng mai htoq ló kôluî, waq pé chyáng wàng byuq bekô nghut ri. Haû hkûn, waq haû jùm gi, gampyoq mai nhông hkaû shut rut din yán wang ló kôluî, myup shi byuq bekô nghut ri.

³⁴ Waq zúng bang gi, haû su dut é lé myàng jáng, hpang din ló kômù, myuq hkaû mâ é bang eq awui ayàm mâ é bang lé ló taî kyô akô nghut ri. ³⁵ Haû mù, wó gyô é bang gi, haû hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyî wang má mebu wut to luî, byù gè rayuq su zúng to láng é lé myàng kômù, gyuq dan bùm bekô nghut ri. ³⁶ Nat dap sù lé hkâsu

* **8:30** Legio gâ é lichyúm gi, gyezo 4000 eq 6000 gyoro bo é gyedap lé taî ri.

kut luî lhoq ge yu é hkyô lé myang é bang gi, góbang lé taí kyô akô nghut ri. ³⁷ Haú hkûn, Gerase byu pé é mau má é lhunglhâng bang gi, gyuq dan dik kôluî, Yesuq lé yhangmoq é mau mai htoq ló byuq râ matú, chôm dúng tôngbán akô. Haú mù luî, Yesuq gi, taú ló byuq râ matú lhaî má wàng bê nghut ri.

³⁸ Nat htoq byuq huî é sù gi, Yesuq htàng cháng râ matú, Yesuq lé dúng tôngbán ri. ³⁹ Nghut kôlhâng, Yesuq gi, "Nàng, yhûm shut sheq ló mù, Garaí Gasang, nang lé hkâ-í kut byi bê hkyô lé, ló taí kyo aq." ga luî, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló taí kyô ri.

Ya-iruaq É Yhangzo Byzô É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

⁴⁰ Ahkuî, Galile byu pé gi, Yesuq dum taú lò râ lé láng nyî kô é nghut mù, Yhang dum taú gû dap lo é hkûn gabú myit eq lhom te yu akô. ⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyî wang má hkyihput htuq luî, yhâng yhûm má lé râ matú ji nyi ri. ⁴² Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haú mù, Yesuq cháng e ló le, shiwa byu pé gi, Yhang lé záng htûng lo bum akô. ⁴³ Haú u lé, raxe í zân sui yuî luî ngunzè lhunglhâng ban pyám shoq chi sará pè chyáng yâ wú kôlhâng, hká yuq le a wó yâ gè byi é† myiwe myhí rayuq le haú hkaú má bo tô ri. ⁴⁴ Myiwe haú gi, Yesuq é nunghtáng má huî lé mù, Yhâng é bushi htàng má é záng kat eq, suí yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhú?" ga luî myi jáng, lhunglhâng bang gi, a sé ga he nyi bùm kô é hkûn lé, Petruq gi, "Yhumsîng ê, shiwa byu pé gi, náng é lînhgkyuq mai náng chyáng chyîn chyap wang lo bùm kô é yanmai, nang lé záng bekô râ nghut lhê?" ga taí ri.

⁴⁶ Yesuq gi, "Byù rayuq ngo lé lé záng mù, ngá chyáng mâ é hpungwup a-tsam htoq ló é lé, ngò châng sé kat ri." ga taí ri.

⁴⁷ Haú jáng, myiwe myhí haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat luî, haî mù Yhang lé záng é hkyô eq, hká dúng ge ló byuq é hkyô pé lé, shiwa byù banshoq bâng é hí má Yesuq lé taí kyô nyi ri. ⁴⁸ Yesuq gi, "Ngá zo ê, náng é lumjîng myit gi, nang lé lhoq gè byi bê nghut ri, ngón za ló aq hkoi!" ga luî, myiwe haú lé taí kat ri.

⁴⁹ Yesuq gi, dang ru taí nyi ashî hkûn, tarajong má up sù Ya-iruaq é yhûm mai byù rayuq jé lé lô luî, "Nung zo gi, shi byuq bê, haú sará lé hkâlhoq hkyik nyî lo." ga luî, Ya-iruaq lé taí kyô ri.

⁵⁰ Yesuq gi, dang haú lé wó gyo jáng, "Hkâgyuq, za lumjîng aq, haú jáng, yhang ge byuq râ nghut lhê." ga luî, Ya-iruaq lé taí ri.

⁵¹ Yesuq gi, Ya-iruaq é yhûm má jé é hkûn lé, Petruq, Yohan, Yakuq, eq haú myiwe zô é yhângnu eq yhângwa mai lai luî, yhûm haú má, ó lé le a wàng nhâng kut ri. ⁵² Haú u lé, lhunglhâng bang zoshâng hau é yanmai, ngaubyi ngau-nhap eq yón nyi akô. Yesuq kúm gi, "Hkâ-ngaú kó, yhang shi byuq é a nghut, yhup myhî tô é sheq ru nghut lhê." ga luî, yhangmoq lé taí ri.

⁵³ Zoshâng gi, shi byuq bê lé yhangmoq sé kôluî, yhangmoq gi, Yesuq lé wuizui kut pyám byî akô. ⁵⁴ Yhang kúm gi, myiwe zo hau é loq má zuî to mù, "Zoshâng ê, toq aq." ga taí kat ri. ⁵⁵ Haú mù luî, yhâng woi-nyî dum taú wàng mù, haú hkûn jáng toq yap ri. Haú jáng, Yesuq gi, zoshâng haú lé zôjung byi keq, ga yhangmoq lé taí kat ri. ⁵⁶ Haú myiwe zô é yhângnu eq yhângwa nhik gi, gyai maú byuq akô. Nghut kôlhâng, Yesuq gi, haú dut é hkyô ó lé le a taí kyo râ matú, yhangnhik lé taí hkûm tô ri.

9

Lagyo Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

† **8:43** Ngunzè lhunglhâng ban pyám shoq chi sará pè chyáng yâ wú kôlhâng, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

¹ Yesuq gi, haû lagyo raxe í yuq lé wut yù mù, nat gang banshoq lé wó hkat htoq pyám rá matú eq, noli nojang wó lhoq gê rá matú, yhangmoq lé wum-o a-tsam eq ahko ahkáng byî ri. ² Hau htâng má, Garai Gasâng é mingdán hkyô hko kyo rá eq, nõhpyo lhoq gê byi rá matú nhang htoq kat ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lhang hkâwûn hkâchûng kó. ⁴ Nungmoq hká yhûm má wàng kôlhang, haú wâ mai dum htoq ló é buinyi jé shoq, haú yhûm má za nyi nyi keq. ⁵ Nungmoq lé a lhom hap yu é bang lé gi, yhangmoq é wâ mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaû lé yhangmoq é myoq hí má ko hkyô pyâm to keq." ga taí kat ri. ⁶ Haû mù, yhangmoq gi, htoq e ló luí, wâ hkan wâ mó má haû gabú danglù hko kyo uchyang, hká jé hkâmá nõhpyo lhoq gê byî wún akô.

Herut Maú Úng-âng É Hkyô

Mht 14:1-12; Mrk 6:14-29

⁷ Haû su dut é hkyô banshoq lé, mauzau Herut wó gyô yù luí myit wuí nyi ri. Hkâsu mù gà le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haû mai, ra-am gi, hí hpyang lhé é myiqhtoi rayuq yuq dum dui toq lô bê ga luí, taí bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shí í wá taí byông bùm kô é gi, ó wá nghut lhé lú?" ga luí, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyo pé dum taú lo é hkûn, yhangmoq kut laí lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuí chûng mù, Bet-saida gà é wâ mó shut tsik za e ló byuq ri. ¹¹ Shiwa byu pé gi, haú hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nõhpyo gè naù bang lé, lhoq gê byî ri.

¹² Buigyùm zó má, lagyo raxe í yuq gi, Yhâng chyáng huí ê mù, "Haû shiwa byu pé lé, awui ayàm mâ é yhûm pé eq wâ pé má

ló mù, zoshuq hô zo luí ló yhup kó sháng gaq, ló nhâng aq. Hkâsu mù gà le, ahkuí nga-nhúng gi, yoso má nghut nyi ri." ga luí, Yhang lé taí akô.

¹³ Haú hkûn, Yesuq gi, "Nungmoq, yhangmoq lé rajung jung byi tso keq." ga tû taí ri.

Yhangmoq gi, "Shí myhô bang lé tso rá zoshuq a é wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gà le, yuqgè wui baú lhang ngo hkyîng kô nghut ri.)

¹⁴ Nghut kôlhang, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri. ¹⁵ Yhangmoq lé Yesuq taí é eq rajung za, banshoq bang lé zùng nhang to bekô.

¹⁶ Haú hkûn, Yesuq gi, haû muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi rá matú, Yhâng é chángzô pé lé byi kat ri.

¹⁷ Haú hkûn, yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri.

Yesuq Gi, Hkrisduq Nghut Lhé Ga Petruq Taí É Hkyô

Mht 16:13-28; Mrk 8:27-9:1

¹⁸ Radàm lé, Yesuq gi, Yhang baú kyûdûng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhé ga, taí akô lú?" ga myí ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhé é myiqhtoi rayuq yuq dum dui toq lo é nghut ri ga, taí akô." ga luí, yhangmoq tû taí akô.

²⁰ Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhé nghu akô lú?" ga myí ri.

Haú hkûn, Petruq gi, "Nàng gi, Garai Gasang nhâng byî é Hkrisduq nghut ri." ga tû taí ri.

²¹ Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri.

²² Haû mù, Yhang gi, "Haû Byu Yhangzo gi, zing-rî é myo myo hui zo luí, suwún wui,

hkyangjong agyi pé, tarâ sará pé èq he-ngik pyâm é hui mù, sat pyâm é hui ra râ nghut lhê, hau htâng sum nyí nghû râ buinyi má, lhoq toq yu é hui râ nghut lhê." ga taí ri.

²³ Hau htâng, banshoq bang lé Yhang dum xoq taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, nyí wuî yhumsing é tapzîng lé waq chûng* luí, cháng ra râ nghut lhê. ²⁴ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlháng, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê. ²⁵ Byù gi, mingkan gón lé wó sing to kôlháng, yhumsing é asak woi-nyí sùm byuq é nghut le gi, yhang é matú, haí akyû bò râ lhú? ²⁶ Ngò eq Ngá é dang lé, lhom hap yù râ lé hoq é sù ó yuq lé le, haú Byu Yhangzo gi, yhumsing é hpungwup shíngkang eq, Yhâng Wâ é hpungwup shíngkang, haú chyoiyúng maumang lagyô pé é hpungwup shíngkang èq jé lé é hkûn, hoq pyám râ nghut lhê. ²⁷ Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shí kó râ a nghut." gâ ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

²⁸ Dang haú taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri. ²⁹ Kyû dúng nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri. ³⁰ Haú hkûn, wú keq, Mosheq eq Eliyaq gi, hpungwup shíngkang eq htoq lé ló luí, Yesuq eq dâng nyo lhûm nyi akô. ³¹ Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dông mai dik lò râ nghut é hkyô lé taí lhûm nyi akô. ³² Petruq eq yhâng luzúm nhik gi, yhup mui nyi akô; nghut kôlháng, yhangmoq bûn lo é hkûn lé, Yesuq é hpungwup shíngkang lé le, Yhang eq rahá yap to su nhik lé le, myang kat akô. ³³ Haú nhik Yesuq chyáng mai gâng ló nyi é hkûn, Petruq gi, Yesuq lé, "Yhumsing ê, shí

jowò má nga-nhúng nyi le ge ri, haú mù, Nàng é matú ralhúm, Mosheq é matú ralhúm, Eliyaq é matú ralhúm kut, ngamoq lé, zúm sùm lhum saí nhâng laq." ga taí kat kôlháng, yhang haí taí nyi é lé, yhang a sé.

³⁴ Petruq dang taí nyi ashí hkûn lé, mhut jé mù, yhangmoq lé htup zíng lo nyi ri. Mhut haú htup lo nyi é yanmai, yhangmoq gi, gyuq byuq akô. ³⁵ Haú mhut hkaú mai htoq lo é htê gi, "Shí yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq." gâ ri. ³⁶ Dang htê haú zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haú bun haú yoq má, ó lé le a taí kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byí É Hkyô

Mht 17:14-18; Mrk 9:14-27

³⁷ Hau htâng nyí, yhangmoq bùm haú mai gyó ló kô le, byù moq mó gi, Yesuq lé lhom te yu akô. ³⁸ Haú hkûn, byù hpúng haú mâ é byù rayuq wut garû htoq ló é gi, ³⁹ "Sarâ ê, wú aq, ngá é zo te yuqzo gi, nat wang júng mù dàn so dàn loq garû lo lhê, guttsú gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rî yù yù kut nyi ri. ⁴⁰ Nat haú lé hkat pyám byi kó laq nghû luí, Náng é chángzô pé lé ngò dúng wú kôlháng, yhangmoq a wó hkat pyám byi kó. Haú mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

⁴¹ Haú mù luí, Yesuq gi, "Lumjîng myit a bo é eq agè ashop é amyû pé ê, Ngò gi, hkâm-yhâng jé shoq nungmoq eq rahá nyi mù, wó jân nyi râ lhú? Nung zo lé, shí shut shuí lé ló aq." ga tú taí ri.

⁴² Zoshâng haú, lé lo nyi le lháng, nat gang gi, yhang lé lhoq lhêng to mù langhtân nhang ashí. Yesuq kúm gi, haú agè ashop é nat lé tân kat luí, zoshâng haú lé lhoq gê byi mù, yhâng wa lé dum ap byí ri. ⁴³ Nyi mi-nyí gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haú lé maú nyi bùm kô le, Yesuq gi, ⁴⁴ "Haú Byu Yhangzo gi, byu pé é loq má ap pyâm

* **9:23** Tapzîng lé waq chûng nghu é gi, Yesuq é yanmai jamjau huí é lé taí é nghut lhê.

é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri. ⁴⁵ Yhangmoq kúm gi, dang haú lé a sê gyo kó, hkâsu mù ga le, haú gi, yhangmoq é matú a sê gyo sháng gaq ga luí, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lhú?
Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sû nghut lhê lhú ga, rayuq eq rayuq taí myíng myô lhûm nyi akô. ⁴⁷ Yesuq kúm gi, yhangmoq é unghkaú má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí, ⁴⁸ "Shí zoshâng lé Ngá é myíng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haú Ngo lé nhang kat é Sù lé hap yu é le nghut lhê. Haú mù luí, nungmoq banshoq má, je tiq sù gi, je ko sù nghut lhê." ga luí, yhangmoq lé taí ri.

⁴⁹ Haú hkûn, Yohan gi, "Yhumsîng ê, Náng é myíng lág luí, nat gâng pé lé hkat pyám byi wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkûm pyám é nghut lhê." ga taí ri.

⁵⁰ Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luí, yhang lé taí ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuí, Yesuq gi, Yhang lé mauhkûng shut shuí toq yú râ buinyi chyâng lò bê nghut mù, Yerusalem wà mó shut ê râ lé myit hpyit to luí, Yhâng é hí má lagyô nhang kat ri. ⁵² Lagyo haú bang gi, Yhâng matú râ é hkyô lajang lág râ ga, Samariq wà rawà má wang ló akô. ⁵³ Nghut kôlhâng, Yesuq gi, Yerusalem wà mó shut laí e ló é sù nghut é yanmai, haú wà bang gi, Yhang lé a lhom hap yù kó. ⁵⁴ Haú hkûn, lagyo Yakuq eq Yohan nhik gi, haú lé myàng jáng,

"Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lhú?" ga luí, Yesuq lé myi akô. ⁵⁵ Yhang kúm gi, lhing wú luí yhangnhik lé, tân pyâm ri, ⁵⁶ haú mù luí, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô Mht 8:19-22

⁵⁷ Yhangmoq haú hkyô má e ló kô le, byù rayuq gi, "Náng hká e le hká ngò cháng râ." ga luí, Yesuq lé taí ri.

⁵⁸ Yesuq gi, haú yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhâng, haú Byu Yhangzo gi, ulhum to jang lháng a wó é nghut ri." ga taí pyám ri.

⁵⁹ Dum rayuq lé, "Ngá htâng cháng aq." ga taí jáng, haú yuq gi, "Yhumsîng ê, ngá wa lé, ló yhúm pyám râ ahkáng hí byi shi laq." ga taí ri.

⁶⁰ Yesuq gi, yhang lé, "Shí bê bang† gi, shí bê bang yhangchang yhúm lhum kó sháng gaq; nghut kôlhâng, náng gi, Garai Gasâng é mingdán hkyô lé, é hko kyo aq." ga taí ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhâng, ngá yhumbyù lé hí hkyang ló shit to râ ahkáng byi shi laq." ga taí ri.

⁶² Yesuq gi, "Yò hpuq li zui mù htâng shut lhing wú sù ó yuq nghut kôlhâng, Garai Gasâng é mingdán eq a gingdán." ga luí, yhang lé taí ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

¹ Hau htâng má, Yhumsîng gi, gotû chángzô pé nyhit xê yuq* lé hkyin yù mù, Yhang e ló râ wà eq jowò hkanmó shut í yuq razúm zúm kut luí, Yhâng é hí má ê nhang kat ri. ² Yesuq gi, yhangmoq lé, "Kyô† shú yù râ myo shoq joq kôlhâng, mù zui râ byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi râ matú, dung keq. ³ Nungmoq e ló keq! Wamhkuí hpúng

† **9:60** Shí bê bang gâ é gi, woi-nyí má shi to bang lé gâ lhê. * **10:1** Chyúmdang ra-am má gi, chángzo nyhit xê í yuq ga le kâ tô ri. † **10:2** Kyô nghú é gi, Yesuq lé lumjîng naù kôlhâng taí kyo râ bang a nyi luí lág tô é bang nghut ri. ‡ **10:2** Kyô shu byù nghu é gi, Yesuq é hkyô gabú danglù lé taí kyo bang nghut ri.

má nhang hâng kat é sau zô pé lé su, Ngò, nungmoq lé nhang kat é nghut lhê. ⁴ Ngùn htúng eq, etap, hkyî-tsung pé hkâyü chûng kó, hkyô má ó lé le hkâshichyên kûn nyi kó.

⁵ Nungmoq gi, hká yhûm má wàng e ló kô le, 'Shi yhûm nguingón nyi sháng gaq.' nghû luî, hí tai keq. ⁶ Haú yhûm má ngu-ingón hkyô eq gingdán sù nyi é nghut le gi, nguingón hkyô haû gi, haû yuq é ahtoq má joq to râ nghut lhê. Haû a nghut jáng, nguingón hkyô haû gi, nungmoq chyáng dum taû lo byuq râ nghut lhê. ⁷ Haú yhûm má nyi to mù, yhangmoq haî byî le haî zo haî shuq keq; hkâsu mù gâ le, mù zui sù gi, zuihpau wó yû gíng lhê; haû mù, nungmoq rayhum htâng rayhûm hkâhtot nyi wún kó.

⁸ Nungmoq hká wà má wang ló kôhang, yhangmoq lhom hap yù kô é nghut le gi, nungmoq é hí má yhangmoq htung to byî é zoshuq lé, zo keq, shuq keq. ⁹ Haú má é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghû luî, yhangmoq lé tai kyo keq. ¹⁰ Nghut kôhang, nungmoq hká wà má wang ló kô le, yhangmoq a lhom hap yu é nghut le gi, haû wà má é hkyô mó má htoq ê mù, ¹¹ 'Ngamoq é hkyî má dap tô é nungmoq wà má é hpuilhaû lhang, nungmoq lé hkyang pû tsô nyi râ matú ngamoq ko hkyô pyâm to byi bê. Nghut kôhang, Garai Gasâng é mingdán gi, chyâng lò bê hkyô lé, sé to keq.' nghû luî tai keq. ¹² Ngò, nungmoq lé tai kôlé, haû buinyi§ lé, haû wà gi, Sodom wà htoq má je hpuzo râ nghut lhê.

¹³ Kurazin wà mó ê! Nang dingnyé wó ri! Bet-saida wà mó ê! Nang dingnyé wó ri! Nungmoq chyáng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tú wut lhê, myiwap kyaq gyûn lhê kut zung ngûng to bekô râ nghut lhê. ¹⁴ Haû mù, tarâ jéyáng é nyi jé jáng, nungnhik gi, Turuq myuq eq Sidun myuq htoq má je hpuzo* kó râ nghut lhê. ¹⁵ Dum mù, Kaperna-um wà nang ê, nang gi, mauhkûng jé shoq waq toq é hui râ

lhú? A nghut, mosumhkung má sheq gyó râ nghut lhê." ga tai ri.

¹⁶ Hau htâng má, chángzô pé lé dum xoq tai é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhit Xê Yuq Dum Taû Jé Lo É Hkyô

¹⁷ Hau htâng, haû chángzo nyhit xê yuq gi, gabú myit eq dum taû lò mù, "Yhumsîng ê, náng é myîng lé lang jáng, nat gâng pé lhang ngamoq é dang lé gyô bum akô." ga tai akô.

¹⁸ Haû su ga tai kôjáng, Yesuq tú tai é gi, "Tsadán gi, mauhkûng htoq mai lhap hpyat é su byit gyó lo é lé ngò myang kat bê.

¹⁹ Wú keq! Ngò gi, nungmoq lé, lhangmuî eq gogok pé lé wó nang râ eq gumlau gyè pé é wum-o a-tsam banshoq lé wó ûng râ ahko ahkáng lé byi bê nghut mù luî, hai eq le nungmoq lé wó lhoq hten râ a nghut lo.

²⁰ Nghut kôhang, nat pé nungmoq é dang gyô é lé za hkâgabú nyi kó, mauhkûng htoq má é asak jihpán laiká buk má nungmoq é myîng bo to bê lé sheq gabú nyi keq." ga tai ri.

²¹ Haû u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsîng, Áwa ê, Nang gi, haû pé lé, hpaqchyî byéng-yá bò bang eq myit hpaqchyî sé bâng é hí mai haq nghop to luî, zoshâng wuî lé tûn shit bê nghut é yanmai, Ngò, Nang lé hkya-ôn lhê ô. Nghut bê, Áwa ê, haû gi, Nang ô nau é hkyô nghut ri.

²² Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luî ó le a sé; Áwa ó nghut é lé le, haû Zo eq haû Zo mai sé nhâng râ matú hkyin yu é bang mai lai luî, ó a sé." ga tai ri.

²³ Hau htâng má, Yhâng é chángzô pè shut lhing wú luî, yhangmoq lé baú za haq tai kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. ²⁴ Hkâsu mù gâ le, Ngò, nungmoq lé tai kôlé, nungmoq wó myàng, wó gyô é pé lé, myiqhtoî pé eq hkohkam pé myo myo gi,

§ 10:12 Haû buinyi gâ é gi, Garai Gasâng tarâ jéyáng é buinyi lé gâ lhê. * 10:14 Nungnhik je hpuzô é hkyô gi, mauhpo kumlhá myo myo myang é nghut kôhang, myit a lhing kô é yanmai nghut ri.

myàng naù gyo naù kôlhang, a wó myâng, a wó gyo kó nghut ri." ga taí ri.

Gè É Samariq Byù

²⁵ Haú hkûn, wú keq, tarâ sará rayuq gi, toq luí, Yesuq lé, "Sará ê, ahtum abyuq é asak lé wó yû shoq, ngò hkâsu kut râ râ lê lhú?" ga luí, Yhang lé myí chyam wú ri.

²⁶ Yesuq gi, "Mosheq é tarâ má hkâsu ga kâ tô ri lhú? Nàng haú lé hkâsu nghap yu nyi lê lhú?" ga luí, yhang lé myí ri.

²⁷ Haú yuq gi, "Haú Yhumsîng náng é Garai Gasang lé, náng é myit nhikhum banshoq, náng é asak woi-nyí lhum gón, náng é wum-o banshoq, náng myit é hkyô banshoq èq, chyitdap râ lê; * náng gûng lé nàng chyitdap é su, náng é chyangnâm mâ é bang lé le chyitdap aq. *" ga tû taí ri.

²⁸ Yesuq gi, "Nàng tû taí é dang jô ri; haú su yhang kut aq, haú jáng nàng gi, asak dui râ nghut lê." ga yhang lé taí ri.

²⁹ Nghut kôlhang, haú yuq gi, yhâng gungdu dingmán é lé, tûn shit naú luí, "Ngá é chyangnâm mâ é sù gi, ó yuq nghut lê lhú?" ga luí, Yesuq lé myí ri.

³⁰ Yesuq tû taí é gi, "Byù rayuq gi, Yerusalem wà mó mai Yeriho wà shut gyó ló le, damyaq eq htûng huí ri. Damyaq haú bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyâm to kôluí ló byuq bekô. ³¹ Haú u lé, hkyangjong rayuq gi, haú hkyô mai laí âng ló le, haú damyaq hui sù lé myàng jáng, koi laí ló byuq ri. ³² Haú eq rajung za, Lewiq rayuq le, haú mai laí ló é hkûn, haú yuq lé myàng jáng, koi laí ló byuq ri. ³³ Nghut kôlhang, Samariq byù rayuq le, haú mai laí ló é hkûn, haú yuq leq tô é lé myàng jáng, wú shogyo luí yhâng chyáng huí ê mù, ³⁴ yhâng é dàm má, xû eq tsibiyiq wing shoq gyun luí, rago za htup byi mù, yhâng é logúng má, haú yuq lé bún ke luí, bing-yhûm ralhum má jé shoq shuí ló mù, gôn lajang byí ri. ³⁵ Htang nyí lé, yhang gi, haú bing-yhûm yhumsîng lé ngùn Denari í chap shê byi mù, taí é gi, 'Shí yuq lé wú lajang byi laq, yhâng gùng má nàng myo chung záng é banshoq

lé ngò dum taú lò jáng, lo xap râ.' gâ ri." gâ ri.

³⁶ Hau htâng, tarâ sará lé, "Nàng gi, byù haú bang sum yuq má damyaq hui sù é chyangnâm mâ é đông nghut sù gi, hká yuq nghut râ su ngam ri lhú?" ga luí, Yesuq myí ri.

³⁷ Haú tarâ sará gi, "Haú yuq lé shogyo sù nghut ri." ga taí ri.

Yesuq gi, "Nàng le haú đông ló kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq É Jé É Hkyô

³⁸ Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri.

³⁹ Mahtaq gi, Mariq gâ é yhanggu myiwe zo rayuq wó ri. Mariq haú gi, Yhumsîng Yesuq é hkyí wang má zung to mù, Yhang mhoqshit é dang lé gyô nyi ri. ⁴⁰ Mahtaq kúm gi, saí tso saí huq é amû myo luí, gyin bûn nyi ri. Haú mù luí, yhang huí ê mù, "Yhumsîng ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng byi lhú? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

⁴¹ Haú hkûn, Yhumsîng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri. ⁴² Nghut kôlhang, je ahkyak é hkyô gi, rahkat za nghut lê. Mariq kúm gi, haú je ge é hkyô lé hkyin yù bè nghut ri. Haú lé yhâng chyáng mai wó yu pyám byi râ a nghut." ga luí, yhang lé tû taí ri.

11

Yesuq Mhoqshit É Kyûdung Dang Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsîng é, Yohan gi, yhâng é chángzô pé lé kyûdung râ hkyô mhoq byí é su, ngamoq lé le mhoq byi laq." ga Yhang lé taí ri.

² Haú hkûn, Yhang gi, "Nungmoq kyûdung le,

'Mauhkûng htoq tsáng myhâng mâ é ngamoq é Âwa ê,

Náng é myìng gi, chyoyíung nyî sháng gaq.

Náng é mingdán jé lô sháng gaq.

³ Ngamoq nyí wuî râ é zoshuq lé, ngamoq lé nyí wuî byi laq.

⁴ Ngamoq lé shut é byù banshoq bâng é mara lé, ngamoq hkyut pyám byî é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.'

ngû keq." ga luî, yhangmoq lé mhoqshit ri.

⁵ Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é nghû sháng, yhang gi, gunggàm yoq má haú yuq chyáng é luî, 'Buinùm hpó è, ngo lé muk sùm long byam chyi byî kat laq, ⁶ haí mù gà le, ngá buinùm rayuq byìn we mai ngá chyáng jé nyi tô ri. Ngò gi, yhang lé byi tso râ haí le a joq byam dut tô ri.' ga taí é hkûn, ⁷ yhúmhaú shut mâ é sù gi, 'Ngo lé, hkâlé lhoq hkyik lo, hkum le myhî pyám bê, ngá zoshâng wuî le ngò eq rahá yhupjang má yhup to bekô. Ngò, nang lé haí le a wó toq yû byi lo.' ga tu kat ri. ⁸ Ngò, nungmoq lé taí kôlé, buinùm nghut é yanmai za gi, muk a kâm toq byi lo kôlhâng, zuq zuq dúng nyi é yanmai, haú yuq lé, yhang ra châ é banshoq toq yû byi râ nghut lhê.

⁹ Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê. ¹⁰ Hkâsu mù gà le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

¹¹ Nungmoq îwâ pé má, ó yuq wá, yhum-sing yhangzo muk dúng le, luqgok byi kó râ lhú? Ngozo dúng le, lhangmuì byi kó râ lhú? ¹² Woq-ú dúng le, gogok byi kó râ lhú? ¹³ Agè ashop é bang nungmoq lháng gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng

myhâng mâ é nungmoq é Îwa gi, Yhang lé dúng é bang lé, je riyhang haú Chyoyíung Woi-nyí byi râ nghut lhê." ga taí ri.

Mara Hûn É Dang Lé Yesuq Tû Tai É Hkyô Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haú htoq lô byuq é htâng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô. ¹⁵ Nghut kôlhâng, yhangmoq chyáng mâ é ra-am gi, "Yhang gi, nat gâng pé é zau Bezebulaq é wum-o a-tsâm èq za, nat gâng pé lé wó hkat pyâm é nghut ri." ga taí bum akô nghut ri. ¹⁶ Ra-am le, Yhang lé, mauhkûng mâ é kumlhá tûn shit wú laq ga dúng chyam wú akô.*

¹⁷ Yesuq kúm yhangmoq myit nyi é hkyô lé sé mù taí é gi, "Ikun byoq é mingdán hká lhum nghut kôle, hten byuq râ za nghut lhê; haú eq rajung za, ikun byù yhangchang rayuq eq rayuq byoq lhûm é yhûm htu gi, byoq gâng lhum râ za nghut lhê. ¹⁸ Nat pé le yhangmoq yhangchang byoq gâng lhûm nyi kô é nghut le gi, Tsadán é mingdán gi, hkâsu kut wó gîng to râ lhú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é yanmai nghut lhê. ¹⁹ Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyám kô é nghut lhê lhú? Haú mù luî, yhangmoq gi, nungmoq lé jéyáng é bang dut bekô râ nghut lhê. ²⁰ Nghut kôlhâng, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

²¹ Wum-o bo é sù rayuq gi, yhâng é yhûm lé, shâm, lhâm chûng luî zúng tô é nghut jáng, yhâng é sutzè pé gi, rago za wó joq to râ nghut lhê. ²² Nghut kôlhâng, yhâng htoq wum je bo é sù lé luî, haú yuq lé, lé zân ung pyâm é nghut le gi, yhang lum tô é shâm,

* **11:16** Byu pé gi, Yesuq lé Garai Gasang nhang kat é hkyô lé saksé myàng naú luî, mauhpo kumlhá dúng nyi akô.

† **11:20** Garai Gasâng é mingdán gà é gi, byù htoq má le, nat htoq má le, Garai Gasâng yhang uphâng é lé gà é nghut lhê.

lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê.‡

²³ Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

²⁴ Haú agè ashop é nat gi, byù rayuq chyáng mai htoq lô mù, kyuq huí é jowò pé má sò yông e lô luí, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi lai lo é yhûm má dum taú lô wú rá.' ga taí ri. ²⁵ Yhang dum taú jé lô wú le, yhûm haú gi, shum pyám mù san za rago dut to lánq é lé lô myang ri. ²⁶ Haú jáng, yhang gi, dum taú ê mù, yhâng htoq je wúí é nat nyhit nat lé shuí lò luí, haú má lo wàng nyi to bekô. Haú mù, haú yuq é nyi yap sâmlai gi, hí lhê htoq má je wúí lò bê nghut ri." ga taí ri.

²⁷ Haú su ga, Yesuq taí nyi é hkûn, haú shiwa hpong mâ é, myiwe zo rayuq htê mó o mó èq Yhang lé taí é gi, "Nang lé wun é ûng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlháng, Yonaq é kumlhá mai lai luí, gotú haí le tûn shít rá a nghut. ³⁰ Yonaq gi, Ninewe wà byù pé hí má kumlhá\$ dut é su, haú Byu Yhangzo gi, shí pyat lhê é byu pé hí má, kumlhá dut râ nghut lhê. ³¹ Maupyí má é hkohkâm myhí gi, maumyí lô htâng é mai lé lô mù, Sholumon é hpaqchyí dang lé, lé gyô yù bê nghut mù, haú tarâ jéyáng é buinyí má, shí ipyat má é byu pé eq rahá toq lô luí, yhangmoq lé mara hûn râ nghut lhê. Wú keq, Sholumon htoq ko sù gi, ahkuí shí má jé nyi to bê. ³² Ninewe wà byu pé

gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyí má, shí ipyat eq rahá toq lô luí, yhangmoq lé mara hûn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlháng, wang lé lô bang myoq wó myâng rá matú kúm gi, tsungjang má tsung to to chyat kut akô. ³⁴ Náng é myoq gi, náng gungdú é myibung* nghut nyi ri. Náng é myoqjí ge é nghut le gi, náng é gungdu gón má maubó byíng mui to rá nghut lhê. Nghut kôlháng, náng myoq a ge é nghut le gi, náng é gungdu gón gi, mauchut tuq dut nyi rá nghut lhê. ³⁵ Haú mù, náng chyáng bo é maubó gi, mauchut byuq é, a chut byuq é lé wú nyí aq. Náng lumjîng é hkyô eq nàng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragúngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyí rá nghut lhê." ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq haú su ga ban taí é htâng má, Hparishe rayuq gi, yhang eq zang rahá zo rá matú, Yesuq lé ji ri. Haú mù, Yesuq gi, haú yhûm má wang é mù zang zo rá ga siboí nàm má zung tô ri. ³⁸ Nghut kôlháng, Hparishe wá gi, zang zo rá hí má Yesuq loq a chí é lé, myàng luí maú nyi ri.†

³⁹ Haú mù luí, Yhumsîng Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chí yúng nyí kômù, nungmoq é unghkaú má gi, lú zo lú shuq é eq agè ashop é hkyô pé byíng zan tô ri. ⁴⁰ Byù bâm pé ê, ahte‡ lé le, ahtoq\$ lé le, saí sù gi, Garai Gasang rayuq za nghut é lé,

‡ **11:22** Haú eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pé chyáng mai, wó hkat pyám bê nghut ri. § **11:30** Kumlhá gi, Yonaq, ngozô wamdao má sum nyí lúng é su, Yesuq le, shí bê mai sum nyí nghú rá nyí má, dum dui toq lô rá hkyô lé taí nau é nghut ri. * **11:34** Myibung gâ é gi, tengmán é mungdang lé wó sê yu é a-tsam lé, taí é nghut ri. † **11:38** Yudaq htûng tarâ má gi, zang a zo shi má loq chí rá lhê. ‡ **11:40** Ahte gâ é gi, i-myt unghkaú lé taí ri. § **11:40** Ahtoq gâ é gi, gungdu lé taí ri.

a sé kó l hú? ⁴¹ Nghut kôlhang, ahte má bo é zè pé lé, ra châ é bang lé byi pyám keq; haú hkûn, nungmoq é matú banshoq gi, sân-yúng lô râ nghut lhê.

⁴² Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shingtón pé eq zangxun mhan-haq ajù jù má é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhai pyâm tô akô. Xê gambùm ragambùm byi é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyi râ lhê.

⁴³ Hparishe pé ê, nungmoq gi, dingnyé wó ri, hkâsu mù gâ le, tarajong pé má é ahkyak dik é zùng jang pé lé le, gai pé má hkunggâ é èq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luí, ahtoq mai sô lai é lupdùng eq du akô." ga taí ri.

⁴⁵ Haú hkûn, tarâ sará rayuq gi, "Sarâ ê, nàng haú su gâ é gi, ngamoq lé le rhoi lhôm nyi é nghut bê." ga Yhang lé tú taí ri.

⁴⁶ Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq râ wui é noqkuq htùng tarâ wôlai lé wùn nhâng luí, yhumsing yhang gi, wò haú lé loqnyhuí èq l háng, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gâ le, nungmoq gi, nungmoq é íchíyí îwâ pé sat pyâm é myiqhtoî pé é lup lé luptsuq tsuq akô. ⁴⁸ Haú mù luí, nungmoq gi, nungmoq é íchíyí îwa pé é muzó lé, myit bo huí é bang nghut nyi akô. Hkâsu mù gâ le, yhangmoq gi, myiqhtoî pé lé sat pyám mù, nungmoq gi, lup haú pé lé luptsuq tsuq akô. ⁴⁹ Haú mù luí, Garai Gasang, Yhâng é hpaqchyí byéng-yá mai taí é gi, 'Myiqhtoî pé eq lagyô pé lé, ngò yhangmoq chyáng nhang kat râ nghut lhê; haú bang má é ra-am lé gi, yhangmoq lhom sat pyám mù, ra-am lé gi, zing-ri kó râ nghut lhê.' gâ ri. ⁵⁰ Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhùm gyoro má sat pyám huí é Zahkariq é sui jé shoq, shun pyâm é myiqhtoî pé é sui banshoq

bang é manglat gi, shí pyat má é byu pé lé hùn râ nghut lhê. ⁵¹ Ngò, nungmoq lé taí kôlé, manglat haú pé lé gi, shí pyat má é byu pé lé, gè gè yhang hùn râ nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsing yhang le a sé, sé naú bang lé le, hkûm zing tô akô nghut ri." ga taí ri.

⁵³⁻⁵⁴ Yesuq haú mai htoq lô é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wui é dangmyi myo myo myi luí, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haú u, byù hkyíng mun zup zing lò mù, rayuq eq rayuq l háng záng nâng lhum shoq dut nyi é hkûn, Yesuq, Yhâng é chángzô pé lé taí hi é gi, "Gegùn labyoq kut é Hparishe pé é múnchi lé koi sidiq pyám keq. ² A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê. ³ Haú mù luí, nungmoq, mauchut hkaú má haq taí é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkûng htoq mai taí pyo bùm bekô râ nghut lhê.

⁴ Ngá buinùm wui ê, Ngò, nungmoq lé taí kôlé, gungdu lé za wó sat pyám mù, woi-nyí lé haí le a wó kut é bang lé, hkâgyuq kó. ⁵ Nghut kôlhang, nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyâm é htâng má, woi-nyí lé ngarai ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, haú yuq lé za, gyuq nyi keq. ⁶ Johkyáng ngo du lé, gyi htingchap í chap èq wó ùng pyâm lhê a nghut kó l hú? Haú johkyáng radu lé l háng, Garai Gasang gi, tô-myhí pyâm é a nghut. ⁷ Garai Gasang gi, nungmoq é ulhum má é xâm banshoq lé l háng, nghap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má l háng gù je bo é bang nghut lhê.

⁸ Ngò, nungmoq lé taí kôlé, byu pé hí má Ngo lé lhom yín yu é sù ó yuq nghut kôlé, Garai Gasâng é maumang lagyô pé é hí má, haú Byu Yhangzo gi, haú yuq lé lhom yín yû râ nghut lhê. ⁹ Nghut kôlhang, byu pé é hí má Ngo lé he-ngik pyâm é sù lé chyaú gi, Garai Gasâng é maumang lagyô pé é hí má, he-ngik pyâm râ nghut lhê. ¹⁰ Haú Byu Yhangzo lé dang dông shut é sù gi, mara hkyut byi é wó hui ra nghut lhê; nghut kôlhang, haú Chyoiyúng Woi-nyí lé rhoi dang taí pyâm é sù gi, mara hkyut byi é hui râ a nghut.

¹¹ Byu pé nungmoq lé jéyáng râ matú tarajong pé má le, agyi suwún wui eq ahkáng ayá wó bâng é hí má le, shui e ló kô é hkûn, hkâsu kut râ lé le, hkâsu nghu tú taí râ lé le, hkâ-myt chiq kó. ¹² Hkâsu mù gâ le, haú u lé yhang, Chyoiyúng Woi-nyí gi, nungmoq hkâsu taí râ hkyô lé mhoqshit byi râ nghut lhê." ga taí ri.

Hpaqchyî A Bo É Sahtê Hpó Lé Dangtú Yu É Hkyô

¹³ Haú hkûn, shiwa hpúng hkaú mai, byu rayuq gi, "Sarâ ê, ngá-nhik tâng wó é muize pé lé chôm gam lhum râ matú, ngá mang lé bo taí byi laq." ga luí, Yesuq lé taí ri.

¹⁴ Yesuq gi, "Byù nàng ê, nungnhik tang ahtoq má tarâ agyi kut luí, ikun zè gâm byi râ gi, ngo lé ó hkyin tô é lhú?" ga luí, yhang lé tú taí ri. ¹⁵ Yesuq yhangmoq lé taí é gi, "Myoqnoq é hkyô banshoq mai, nungmoq é i-myt lé hkûm zìng luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

¹⁶ Dangtú ralhum dông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyaí já ri. ¹⁷ Haú mù luí, yhâng é unghkaú má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

¹⁸ Dum nghut jáng, yhang gi, 'Ngò îsu kut wú râ abe, ngá é chyí xau pé lé hpyoq pyám luí, je kô é chyí pé lé saí râ nghut lhê. Chyí haú pé má ngá é guqzo muilhum pé eq sutzè banshoq lé, tsìng kat to luí, ¹⁹ ngá é i-myt lé îsu nghu taí râ, "I-myt ê, zanwut

myáng myáng é matú, zè gè myo myo ngò tsìng to bê. I-myt nàng zim za kut nyi aq hkoí. Zo mù, shuq mù, ngón ngón nyi aq." ga' gâ ri.

²⁰ Nghut kôlhang, Garai Gasang gi, 'Byù gò ê, náng é asak lé, hkû-myîn yhang, wup yu pyám byi é nghut jáng, nàng tsing hkong tô é zè pé gi, ó yuq é matú dut râ lhú?' ga luí, yhang lé taí ri.

²¹ Haú eq rajung za, yhumsing é matú sutzè hkong to mù luí, Garai Gasâng é hí má myung nyi sù gi, haú yuq su nghut râ nghut lhê." gâ ri.

Myit A Chiq É Za Garai Lé Lumjìng Râ Hkyô

Mht 6:25-34, 19-21

²² Yesuq, Yhâng é chángzô pé lé dum taí é gi, "Haú mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myt chiq kó. ²³ Asak gi, zoshuq htoq má, gungdu gi, mebù htoq má, je ahkyak lhê. ²⁴ Nghonoq pé é hkyô lé myit wú keq; yhangmoq gi, kyô hkyó kyô shu a kut kó; guqchyî eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpauđap nyi lhê a nghut kó lhú? ²⁵ Nungmoq má, ó yuq wá, myit chiq é eq, yhumsing é asak lé radúng kô wó jat yù kó râ lhú? ²⁶ Haú su mù luí, tiq dik é hkyô lé lhang, nungmoq a wó kut kô é nhìng, haí mù luí gotù hkyô pé lé, myit myô nyi akô lhú?

²⁷ Htutbó ban* pé hkâsu kut kô lo é lé, myit wú keq. Haú pé gi, mù le a zui, hkyîng le a duí kó nghut ri. Nghut kôlhang, Ngò, nungmoq lé taí kyo kôlé, Hkôhkâm Sholumon hpúng kô dik u lé wut é mebu lhang, ban haú rabó lé a hkyit nghut ri. ²⁸ Lumjìng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haú su kut hut é nghut le gi, nungmoq lé, je riyhang hut râ a nghut kó lhú? ²⁹ Nungmoq gi, haí zo haí shuq râ lé hkâho nyi kó; haú eq séng luí lé hkâ-myt chiq nyi kó. ³⁰ Hkâsu mù gâ le, Garai Gasang lé a sé bang gi, haú hkyô

* **12:27** Htutbó ban gi, yúng dik é yosô ban nghut lhê.

banshoq lé châng hkat ho nyi akô; nghut kôlhang, nungmoq é Îwa Garai Gasang gi, haú pé lé nungmoq râ é hkyô, sé byî nyi lhê.

³¹ Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi râ nghut lhê.

³² Sau hpúng zô pé ê, hkâgyuq ko, hkâsu mù gê le, nungmoq é Îwa Garai Gasang gi, Yhâng é mingdán nungmoq lé byi nau nyi ri. ³³ Nungmoq wó é zè pé lé ûng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sú lé a jé, manot èq le a wó zô é sutzè lé mauhkung htoq má hkong to keq. ³⁴ Hkâsu mù gê le, náng é sutzè joq jang má, náng é i-myt le jé nyi râ nghut lhê.

Yesuq Dum Jé Lé Lô Râ Hkyíng Lé Machya Nyi Râ Hkyô

Mht 24:45-51

³⁵ Nungmoq gi, hpyihit hit luí, (mù zui râ matú rì rì kut to keq); nungmoq é myibung lé tuq to mù, ³⁶ myiháng poí mai dum taú lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wuì su kut nyi keq. ³⁷ Haú yhumsing jé lo le, machya nyi láng é dui-nhâng zoshâng wuì gi, hkungsô wó nyi râ. Hkâsu mù gê le, ngò, nungmoq lé teng za taí kôlé, haú yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq râ nghut lhê. ³⁸ Gunggàm yoq lé nghut kôlhang, woq tân hkùn lé nghut kôlhang, haú su kut machya nyi é lé, yhumsing hpó lo myang é nghut le gi, dui-nhâng zoshâng haú bang hkungsô wó nyi ri. ³⁹ Yhumsing hpó rayuq, hká u má hkau sú lé lô râ lé, sê tô é ru nghut le gi, yhang machya nyi luí, yhâng yhúm lé a wó hput htong nhâng râ nghut é lé, bûn sê nyi keq. ⁴⁰ Haú mù, nungmoq le rì rì nghut nyi keq; hkâsu mù gê le, haú Byu Yhangzo gi, a bûn nùng má jé lé lô râ nghut lhê." gâ ri.

⁴¹ Haú hkùn, Petruq gi, "Yhumsing ê, dangtú shí gi, ngamoq lé za, taí é nghut lhê lhú? Haú a nghut jáng, lhunglhâng bang lé taí é dông nghut lhê lhú?" ga myi ri.

⁴² Haú jáng, Yesuq gi, "Lumging é eq hpaqchyî bo é sùt zum sù gi, hká yuq nghut lhê lhú? Haú yuq gi, yhâng yhumsing é dui-nhâng zoshâng wuì lé ahkyíng jé jáng zoshuq gàm byi râ matú, yhumsing hpô èq hkyin to sù dut râ nghut lhê. ⁴³ Yhumsing hpó dum taú lo é hkùn, haú su kut nyi láng é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za taí kôlé, yhumsing hpó haú gi, yhâng é sutzè banshoq, dui-nhâng zoshâng haú lé ap to râ nghut lhê. ⁴⁵ Nghut kôlhang, dui-nhâng zoshâng haú gi, yhâng é i-myt unghkaú má, 'Ngá é yhumsing hpó jé lô râ gyai myáng ashî.' ga myit pyám mù, dui-nhâng zoshâng luzúm wuì myiwe, yuggè lé nhuq bat é eq, zo yê shuq yê î shuq wut nyi é nghut jáng, ⁴⁶ dui-nhâng zoshâng hau é yhumsing hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luí a lumjing bang eq rahá nyi pyám râ nghut lhê.

⁴⁷ Yhumsing hpô é i-myt lé sê to kôlhang, yhang ô nau é dông a châng, rì rì le a hen tô é dui-nhâng zoshâng gi, yhâng yhumsing èq nhuq bat é lé, myo myo hui zo râ nghut lhê. ⁴⁸ Nghut kôlhang, a sé mù kut shut sù kúm gi, shau za bat é hui râ nghut lhê. Haú eq rajung za, Garai Gasang gi, myo shoq wó yù su chyáng mai, myo shoq dúng yù râ nghut lhê. Myo myo ap byi tô é hui su chyáng mai, je myo shoq dum dúng yù râ nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng râ matú nghut lhê. Myi haú dap to láng é nghut le gi, ngò ô nau é hkyô jup byíng bê. ⁵⁰ Nghut kôlhang, ngò hkam yù râ é baptisma† rajung joq ashî, haú a hkam yù yù gi, ngò gyai yhang hkâm zo wuì nyi ri. ⁵¹ Ngò jé lé é gi, myidàm htoq má simsaq hkyô byi râ matú nghut nhô ngam akô lhú? Haú dông a nghut, Ngò, nungmoq lé taí kôlé, byu pé lé lhoq pyô lhoq kang râ matú sheq ru nghut lhê. ⁵² Haú su mù, ahkuí mai rayhúm za má é byù ngo yuq gi, rayuq eq rayuq yhangmoq yhangchang

† 12:50 Shí má é baptisma gi, Yesuq, ajung jung hpuzo mù shí hkâm é hkyô lé taí é nghut lhê.

byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê. ⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê." ga taí ri.

Dut Lò Râ Hkyo É Kumhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berá.' ga radá dâm lhaq taí taí mu akô, haú eq rajung za le, dut lò lò mu ri. ⁵⁵ Dum nghut jáng, maupyí shut mâ é lai lo le, 'Bui htân berá.' ga lhaq taí taí mu akô, haú eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumhá lé, sê gam hkoq yu nyi akô. Haú su nghut kô le nhîng, haí mù luí, shí ipyat mâ é kumhá lé gi, a sê gam hkoq dut tô akô lhú?

⁵⁷ Haú eq rajung za, haí mù haú dingmán é hkyô lé yhumsîng yhang yhang a wó do-qqân yù kô é lhú? ⁵⁸ Dangké, nang lé yui tsuq sù eq rahá, tarâ agyì wá chyáng e ló le, hkyô má yhang eq ngón shoq byìn hpyé huí yù aq. Haú a nghut jáng, yui yhumsîng gi, nang lé tarâ agyì chyáng é dé pyám luí, tarâ agyì gi, htóng hkyó su chyáng, nang lé ap pyám luí, yhang gi, nang lé htóng má lhûng pyám râ nghut lhê. ⁵⁹ Ngò, nang lé taí lé, yuichyîn haú a ban xap xap gi, htóng haú mai nàng wó htoq ló râ a nghut." ga taí ri.

13

Myit A Lhîng Jáng Shi Hten Byuq Râ

¹ Haú hkûn, haú má nyi é byù ra-am gi, mauzau Pilat eq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyâm é hkyô, Yesuq lé lé taí kyô akô. ² Yesuq gi, "Galile byù haú bang haú su kut hui zo kô é yanmai, yhangmoq gi, gotú Galile byu pé banshoq htoq má, yubak je myô akô nghû, nungmoq myit ngam akô lhú? ³ Haú su a nghut! Ngò, nungmoq lé taí kôlé, nungmoq le, myit a

lhîng kô é nghut le gi, banshoq bang haú eq rajung za shi hten byuq kô râ nghut lhê. ⁴ Haú htoq agó, Siloam wà mâ é machya gyop gyó luí, nhê sat huí é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lhú? ⁵ Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kô râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhâng é tsibyiq hkyâm má, maihpáng gâm ragàm hô tô ri. Yhang agàm haú má, ashi ê ho wú le, zui tô é a myàng nghut ri. ⁷ Haú hkûn, yhang gi, 'Wú aq, ngò sum zân tup maihpáng gâm haú má ashi ê ho wú le, a myàng nghut ri; haú lé htup pyám aq. Haí mù, maumyí aha agó kut yuq nhang tô lhê lhú?' ga luí, tsibyiq hkyâm zúng sù lé taí ri.

⁸ Hkyâm zúng sù gi, 'Yhumsîng ê, hkûzân za gi, yuq tô wú shi sháng gaq, shigâm hau é lhîngkyuq má ngò du lhîng to mù, myìhpún kat luí bóm byi wú shirâ. ⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htup pyám râ nghut lhê.' ga luí, hkyâm yhumsîng lé tû taí ri." ga ri.

Bánno Buinyì Má Gùng Loq Hten Sù Lé, Lhoq Gê Byì É Hkyô

¹⁰ Bánno buinyì lé, Yesuq gi, tarajong ralhûm má, mhoqshit nyi ri. ¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dângngóm luí, gungdu ratsuí lháng a wó lhoq nyhâng lô é sù nghut ri. ¹² Yesuq gi, myiwe haú lé myàng jáng, yhâng chyáng wut yù mù, "Myiwe myhí ê, nàng, nòhpyo mai gè berá." ga luí, ¹³ yhâng é ahtoq má loq ke byì ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

¹⁴ Haú mù, Bánno buinyì lé, Yesuq nòhpyo lhoq gê byì é yanmai, tarajong má up sù gi, wú nhik-yo luí, "Mù wó zui é buinyì hkyuq nyí joq tô le, buinyì haú pé má, lé wó lhoq ge yù lhê. Haú mù, Bánno buinyì má gi, hkákut kó." ga luí, shiwa byu pé lé taí kat ri.

15 Haú hkûn, Yhumsîng Yesuq gi, "Gegùn labyoq kut bang ê, nungmoq yuq hkangmó gi, Bánno buinyì lé, yhumsîng é no, logúng pé lé, hkup mai hpông htoq yù mù uchyam byi huq huq kut akô a nghut lhú? 16 Haú nghut le gi, raxe shit zân gón Tsadán èq tuí to huí é, Abraham é yhangzo yhangshu myiwe zo shí lé, Bánno buinyì má Tsadán loq mai, hkyut byi a gíng râ lhú?" ga tú taí ri.

17 Haú su ga taí jáng, Yhang eq i-myt shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

*Angshi Cham Eq Munchi Dangké
Mht 13:31-33; Mrk 4:30-32*

18 Haú hkûn, Yesuq taí é gi, "Garai Gasâng é mingdán gi, haí eq wuí lhê lhú? Ngò hai eq taí kê wú râ lhú? 19 Haú gi, byù rayuq mai, yhâng é hkyâm má hô tô é angshi cham eq wuí ri. Angshi cham haú gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

20 Yhang dum xoq taí é gi, "Garai Gasâng é mingdán lé, ngò hai eq taí kê wú râ lhú? 21 Haú gi, myiwe zo rayuq èq sungso mún sum bûng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

*Chyap É Hkúmdong
Mht 7:13-14, 21-23*

22 Hau htâng, Yesuq gi, Yerusalem wà mó shut lai e ló uchyang, rawà bàn rawà má wàng mù, mhoqshit byí ri. 23 Haú hkûn, byù rayuq gi, "Yhumsîng ê, hkyi yu é hui râ bang gi, shau za nghut râ lhú?" ga luí, Yesuq lé myí ri.

24 Yesuq gi, "Chyap é hkúmdong mai, Garai Gasâng é mingdán má wó wàng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wàng shoq ga shikut wú kó râ. Nghut kôlháng, a wó wàng kó râ nghut lhê. 25 Yhumsîng hpó,* hkum toq myhí pyâm é htâng má

sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú taí râ nghut lhê.

26 Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byí wú bê nghut lhê.' ga taí bekô râ.

27 Nghut kôlháng, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tú taí kat râ nghut lhê.

28 Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlháng, nungmoq gi, shinggan shut hkat pyâm é hui luí, haú jowò má ngaubyi ngàu nhap eq zui kyik kyik shoq hpuzô nyi bùm bekô râ nghut lhê. 29 Hau hkûn, buihtoq, buiwàng, maupyí, mautsûng mâ é mingdán myo myo mai byu pé lé luí, Garai Gasâng é mingdán zoshuq poí má myang zùng kó râ nghut lhê. 30 Haú hkûn, ahkuí htâng gyó nyí bang gi, hí bekô râ; ahkuí hí to bang gi, htâng gyó bekô râ." ga luí, yhangmoq lé taí ri.

Yerusalem Wà Mó Eq Séng Luí, Yesuq Taí É Hkyô

31 Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat râ hen nyi ri." ga luí, Yhang lé taí akô.

32 Haú jáng, Yesuq gi, "Hkû-nyí, napmá,† ngò nat gang hkat pyám luí, nò zo hpyo zo lhoq gê byi râ nghut lhê; sum nyí nghû râ buinyì‡ má sheq, ngá mù bàn râ nghut lhê.' nghû luí, agè ashop é wamhkuí haú lé ló taí kyo keq. 33 Haí wá dut kôlháng, hkû-nyí, napmá, sânghe nyí, ngò gi, e ló râ dut ashí. Hkâsu mù gâ le, myiqhtoí pé gi, Yerusalem wà mó mai lai luí gotù jowò má a shi wú kó nghut ri.

* 13:25 Yhumsîng hpó gi, Garai nghut lhê. Yhûm gi, Garai é mingdán lé taí é nghut lhê. † 13:32 Hkû-nyí, napmá gâ é gi, Yesuq mingkan htoq má mù zui râ ahkyíng lé taí é nghut lhê. ‡ 13:32 Sum nyí nghû râ buinyì gâ é gi, Yesuq mingkan htoq má mù ban zui é buinyì lé taí é nghut lhê.

³⁴ Yerusalem ê, Yerusalem ê, myiqhtoi pé lé sat pyám pyám kut mù, náng chyáng nhang kat é bang lé, luqgok eq dú sat sat kut é myuq nàng ê, woqzìng gi, yhangzô pé lé, yhâng é dùng hkaû má tsìng lhùng yu é su, nungzô pé lé, Ngò hkâ-myhó dâm shuî tsìng yù nàu kôlhang, nàng a dóng nghut ri. ³⁵ Wú keq, nungmoq é yhùm gi, nungmoq é matú chamchuyiuyi dut pyâm to berâ nghut lhê; Ngò, nungmoq lé taí kôlé; 'Yhumsìng é myìng mai jé lé lo é Sù gi, hkungsô wó nyi sháng gaq.'^{*} nghù, nungmoq a taí taí gi, Ngo lé wó myâng kó râ a nghut lo." ga luí, yhangmoq lé taí ri.

14

Hparishe Rayuq É Yhùm Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo râ ga Hparishe suwún rayuq é yhùm má, ê wang nyi tô le, haú má é bang gi, Yhang lé gyui gyui chôm wú nyi bum akô. ² Haú u lé, wui wam ana dut sù rayuq gi, Yesuq é hí má jé nyi tô ri. ³ Haú mù, Yesuq gi, "Bánno buinyi má nòhpyo lé lhoq gê byi é gi, tarâ wang lhê lhú, a wang é lhú?" ga luí, tarâ sará pé eq Hparishe pé lé myi kat ri. ⁴ Nghut kôlhang, yhangmoq gi, zim za dut byuq akô. Haú hkûn, Yesuq gi, nòhpyo hui sù lé, zuí to mù, lhoq gê byi luí, nhang kat ri.

⁵ Hau htâng, Yesuq gi, yhangmoq lé, "Nungmoq chyáng má é rayuq yuq gi, yhumsìng é yhangzo rayuq yuq, haú a nghut jáng, no myang radu du, Bánno buinyi má, wuìhtung má byit gyó le, haú hkûn jáng, a xe htoq yu é za, wó nyi kó râ nghut lhê lhú?" ga myi kat ri. ⁶ Yhangmoq kúm gi, dang haú hkun lé, haí le a wó tû taí kó nghut ri.

⁷ Haú hkûn, Yesuq gi, ji tô é bang jé réng é zùng jowò pé hkyin yu nyi kô é lé myàng jáng, yhangmoq lé dangtú dōng taí é gi, ⁸ "Byù rayuq yuq nang lé, myiháng poí má ji é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, ji to shirâ abe. ⁹ Ji tô é nghut jáng gi, nungnhik lé ji tô é yhumsìng hpó lé lô mù, 'Shí yuq lé jowò hui byi aq.' ga luí,

^{*} 13:35 Hkya-on 118:26

náng lé lé taí jáng, nàng hoq hpu luí, hkyi htâng shut huí zùng ra râ nghut lhê. ¹⁰ Haú mù luí, supé nang lé ji le, hkyi htâng má é zùng aq; haú hkûn, nang lé ji sù lé mù luí, 'Buinùm hpó ê, shì je réng é jowò má huí doq zùng aq.' ga luí, nang lé taí jáng, nàng eq rahá zung tô é bíng lhunglhang bâng é hí má, nàng gi, myoqdong wó râ nghut lhê. ¹¹ Hkâsu mù gâ le, yhumsìng gùng lé waq toq é sù ó yuq nghut kôle, lhoq nyhum pyâm é hui râ nghut lhê; yhumsìng gùng lé, lhoq nyhum é sù kúm gi, waq toq é hui râ nghut lhê." ga taí ri.

¹² Hau htâng, Yesuq yhang lé ji é yhumsìng hpó lé taí é gi, "Napzang, a nghut jáng, myinxûn lé nàng byi tso nau le gi, náng é buinùm wui, âgu âmâng pé, mungmoq wui, sùt wó é yhumkyo chang pé lé hkâjì tso. Haú bang lé ji tsô é nghut jáng gi, yhangmoq nang lé dum jì tsô é eq, jeju dum tau kó râ nghut lhê. ¹³ Nghut kôlhang, nàng poí kut mù, byi tso byi huq nau é nghut le gi, myùng bang, hkyi gyui loq hten bang eq myoqjit é bang lé, jì tso aq. ¹⁴ Haú su kut jáng, nàng hkungsô wó nyi râ nghut lhê. Yhangmoq nang lé jeju a wó tau kôlhang, dingmán bang dum dui toq lo é buinyi má, hau é akyû lé, nàng wó hkam yù râ nghut lhê." gâ ri.

Zoshuq Poí Mó Lé Dangtú Yu É Hkyô Mht 22:1-10

¹⁵ Yesuq eq rahá zô zung tô é byù rayuq gi, dang haú wó gyo jáng, "Garai Gasâng é mingdán má é zoshuq poí má wó zo râ sù gi, hkungsô wó nyi sù nghut râ." ga luí, Yesuq lé taí ri.

¹⁶ Yesuq haú yuq lé tû taí é gi, "Byù rayuq gi, myinzang byi tso râ ga, zoshuq poí mó ralhum hen to mù, byù myo myo lé ji tô ri. ¹⁷ Zang byi tso râ yàm jé jáng, yhâng é dui-nhâng zoshâng lé, jì tô é bâng chyáng 'Lé keq hkoi, zoshuq jin to bê.' ga ê châng wut nhang ri.

¹⁸ Nghut kôlhang, haú bang banshoq gi, zoshuq poí má a é râ dōng chyat he pyâm akô. Rayuq sù gi, 'Ngò yohtung rahkyang wui tô lhê; haú lé ê wú râ dut ri. Haú mù, ngo lé ahkáng byi shi laq.' ga yhang lé taí ri.

¹⁹ Dum rayuq le, 'Ngò, nohtó ngo zúm wui tô lê; haú pé lé duì nhang chyam wú râ dut ri; ngo lé ahkáng byi shi laq.' ga taí wô ho ri.

²⁰ Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

²¹ Haú jáng, dui-nhâng zoshâng taú lò mù, yhâng é yhumsîng lé haú hkyô banshoq lò taí kyô ri. Haú hkûn, yhumsîng hpó gi, nhikmó gyô yo mù, 'Wà mâ é hkyô mó hkyô zo hkat hkangmó má hân hân ê mù luí, myùng bang, hkyî gyui loq hten bang eq myoqjit bang lé, ê ji lò aq.' ga luí, yhâng é dui-nhâng zoshâng lé nhang kat ri.

²² Hau htâng má, dui-nhâng zoshâng gi, 'Yhumsîng ê, nàng nhang é eq rajung za ban kut bê; nghut kôlhâng, zùng râ jowò gi, mân tô ashí.' ga taí ri.

²³ Haú su ga jáng, yhumsîng hpó gi, 'Ngá yhûm byíng râ matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq.

²⁴ Nang lé ngò taí lé, hí lé ji to huí é bang rayuq lhang, ngá é zoshuq poí lé wó chyim wú râ a nghut.' ga luí, yhâng é dui-nhâng zoshâng lé taí ri." gâ ri.

Yesuq É Chángzo Wó Dut Râ Matú *Mht 10:37-38; 5:13; Mrk 9:50*

²⁵ Byù hpûng mó Yesuq eq rahá e ló kô é hkûn, Yesuq gi, haú bang lé lhing wú luí, ²⁶ "Ngá chyáng lé sù ó yuq nghut kôle, yhumsîng é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhumsîng é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷ Yhumsîng é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng mâ é byù rayuq yuq, tsehtung yhûm ralhum saí nau le, yhang gi, yhûm haú ban saí râ matú, ngùn hkâ-myhó bàn râ eq yhang wó tô é ngùn luq a luq é lé, zùng mù luí, hí a sôn wú é byù nyi kó râ lúhú? ²⁹ Laq má mù, apûn awang gi, saí hi to mù luí, a wó lhoq pân é nghut jáng, ³⁰ myàng é bang banshoq eq, 'Shí yuq gi, apûn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô râ nghut lê.

³¹ Dangké, hkohkâm rayuq gi, gyè zan râ hen le, gyezo í mun eq lé sù hkohkâm lé, gyezo ramûn eq za lhom wó zân ûng râ, a wó zân ûng râ lé, zùng mù luí, hí a myit wú é nyi râ lúhú? ³² A ûng râ dut le gi, gyè pé we we má nyi tô ashí hkûn lé, lagyo suwún pé lé nhang kat luí, simsaq râ matú htingrám pyám ra râ nghut lê. ³³ Haú eq rajung za, nungmoq chyáng mâ é ó yuq nghut kôlhâng, yhumsîng wó é zè banshoq lé, a pyám to sù gi, ngá é chángzo wó dut râ a nghut.

³⁴ Xo gi, gè lê. Nghut kôlhâng, xomân kân byuq jáng gi, haú lé hai eq dum wó lhoq ngam yù râ lúhú? ³⁵ Haú gi, myigung matú le, myihpún kut râ matú le, akyû a bò lo. Haú mù luí, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga taí ri.

15

Byuq Byuq É Sau *Mht 18:12-14*

¹ Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zîng bum akô. ² Haú hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

³ Haú mù, Yesuq yhangmoq lé dangtú dông taí é gi, ⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyám to mù, byuq byuq é sau haú lé, myàng shoq a châng ho yu é, ó yuq wá nyi kó râ lúhú?

⁵ Byuq byuq é sau haú lé myang hô jáng, gyaí gau é i-myit eq goqsân htoq má bún kê chûng mù, ⁶ yhûm má jé jáng, yhâng é buinùm ji-myi wui eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí râ nghut lê. ⁷ Haú eq rajung za, Ngò, nungmoq lé taí kôlé, myit lhing a râ é dîngmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkûng htoq má, je riyhang gabú jowò dut râ nghut lê.

Byuq Byuq É Ngùn Chap

⁸ Dum nghut jáng, dangtú ralhú gi, myiwe rayuq, ngùn raxê chap wó é má, rachap byuq byuq é nghut le, yhang gi, my-ibung tap mù rayhum é shum luí, myang yù shoq rago za, ho wú rá a nghut lú? ⁹ Haú lé ho myàng jáng le, yhâng é buinùm ji-myi wuì eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chòm gabú sháng.' ga taí rá nghut lhê. ¹⁰ Haú eq rajung za, Ngò, nungmoq lé taí kôlé, myit lîng é yubak dap sù rayuq é yanmai, Garai Gasang é maumang lagyô pé hí má, gabú jowò dut rá nghut lhê." gâ ri.

Byuq Byuq É Yuqzo

¹¹ Yesuq xoq taí é gi, "Byù rayuq gi, yuqzo í yuq wó ri. ¹² Haú nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

¹³ Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsâ pyám bê. ¹⁴ Haú su kut ngunzè wó mi-wó lé ban langsâ pyám é htâng má, haú mau má mutmó gyo é yanmai, yhang gi, asho awui dut lo nyi bê nghut ri. ¹⁵ Haú mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri. ¹⁶ Haú hkûn, yhang gi, waq jùm zô é shigyang cham pé lé lháng, zo naú shoq dut kôlhang, ó yuq le a byi zo kó nghut ri.

¹⁷ Haú mù, yhang myit bûn lo é gi, 'Ngá wâ chyáng nyi é langchyáng pé gi, agùn agó myàng zô nyi kó rá nghut lhê. Nghut kôlhang, ngò gi, shí jowò má, zo mut wuìshit é eq shi ló rá dut bê. ¹⁸ Ahkuí, ngò toq mù, ngá wâ chyáng taú ló luí, "Áwa ê, ngò gi, Garai Gasang lé le, nang lé le, shut bê. ¹⁹ Ahkuí mai ngò gi, nung zo nghú rá a gíng lo, hau é yanmai, náng é langchyáng rayuq dông za ngo lé nyi nháng laq." nghú luí, ló taí rá.' gâ ri. ²⁰ Hau htâng, yhang toq luí, yhâng wâ chyáng ló le, yhang we we má ru nghut ashî hkûn mai, yhâng wa gi, yhang lé lhom myàng jáng, wú shogyo luí, din ê mù,

yhangzô é lingzing má ê po pyik dap to luí, bopuq puq byi ri.

²¹ Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghú rá a gíng lo.' ga luí, yhâng wa lé dung tôngbán ri.

²² Yhângwa kúm gi, yhâng é langchyáng pé lé, 'Réng dik é mebu hân hân yu lé mù, yhang lé hut byi keq; yhâng é loq má, lo-qchyop chyop byi keq; hkyí má le hkyí-tsung tsung byi keq. ²³ Tsô myum tô é nojûng zo le yu sat keq. Haú mù, nga-nhúng gi, zoshuq poí kut mù chòm ngón sháng. ²⁴ Haú mù gâ le, ngá zo shí yuq gi, shi byuq é mai, ahkuí dum duì bê; byuq byuq é mai le, ahkuí dum myàng bê.' ga taí ri. Haú mù, yhangmoq gi, ngón ngón zo shuq ló bekò.

²⁵ Haú u lé, yhangzo ko sù yuq kúm gi, yò má nyi tô ri. Yhang gi, yò mai yhùm shut jé lo nyi é hkûn, zìng út bat luí gó nyi é htê lé lò wó gyô ri. ²⁶ Haú mù, langchyáng rayuq lé wut yù luí, haú hkyô lé yhang myí wú le, ²⁷ langchyáng haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

²⁸ Dang haú lé wó gyo jáng, yhang gi, gyô nhik-yo luí, yhùmhkaú shut a wàng lo kut ri. Haú mù, yhâng wa htoq ê luí, yhang lé é chyuq ri. ²⁹ Yhangzo kúm gi, 'Wú aq, ngò, shî-myháng shîlo náng é jùn dông kut luí, hkâ-nhám le náng dang lé a lu laí wú. Nghut kôlhang, ngò ngá é luzúm wuì eq ngón kún rá matú, bainám zo radu lháng radám le nàng a byi wú shi. ³⁰ Shiwa myhí pé eq zum yap wún luí, náng é sutzè lé lhoq pân pyám é sù nung zo haú dum taú jé lô jáng kúm gi, tsô myum tô é nojûng zo lé, yhâng é matú nàng sat byi bu-nhung!' ga luí, yhâng wa lé tú taí ri.

³¹ Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê. ³² Nghut kôlhang, shî nung gu gi, shi byuq é mai ahkuí dum duì bê; byuq byuq é mai le, dum myàng bê. Haú mù, gabú hpo nghut bê.' ga luí, yhang lé taí ri." gâ ri.

16

Hpaqchyî Ge Dâ Ê Sùt Zum Sû

¹ Yesuq, Yhâng é chángzô pé lé taí é gi, "Sahtê rayuq chyáng sùt zum sû rayuq nyi ri. Haú yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akô. ² Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lhu? Nàng sùt zûm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sû wó kut lo râ a nghut lo.' ga taí ri.

³ Haú jáng, sùt zum sû gi, 'Ahkuí, ngò hkâsu kut lo râ lhu? Ngá é yhumsing gi, ngo lé sùt zum ayá mai lhoq hkyô pyám bê. Myí du myí hkop zo râ le ngò wum a bò; dung zo dung shuq râ le ngò hoq ri. ⁴ Ngo lé sùt zûm é ayá mai hkyô pyám htâng má, supé ngo lé yhangmoq é yhûm má lhom hap yù râ matú, hkâsu kut râ hkyô lé ngò sé bê.' ga wó myit rot jáng, ⁵ yhang gi, yhâng yhumsing hpó lé chyín dap tô é bang rayuq htâng rayuq lé wut yù mù, sâng-hí yuq lé, 'Ngá yhumsing hpó chyáng nàng chyín hkâ-myhó dap tô lhu?' ga myí jáng, ⁶ haú yuq gi, 'Xû rashô pûng dap lhu.' ga tû taí ri.

Haú jáng, sùt zum sû gi, 'Náng é jihpán yù luí, hân zùng mù, ngo xê pûng kut kê to aq.' ga yhang lé taí ri.

⁷ Dum rayuq lé, 'Nàng hkâ-myhó dap tô lhu lhu?' ga myí jáng, haú yuq gi, 'Sungsô rashô bûng dap lhu.' ga tû taí ri. Sutzum sû gi, haú yuq lé, 'Náng é jihpán má shit xê bûng kut kê to aq.' ga taí ri.

⁸ Haú a dingmán é sùt zum sû lé, yhumsing hpó gi, hpaqchyî ge da sû nghut ri ga hkya-ôn ri. Ngò shí lé taí é gi, mingkan zo wuí gi, yhangmoq é mingkan eq séng é hkyô pé má, maubó gung é yhangzo pé* htoq hpaqchyî je bò kô é yanmai nghut lhu. ⁹ Haú mù luí, Ngò nungmoq lé taí kyo kôle, a tara é sutzè pé éq buinùm ho nyi keq, haú mù, sutzè haú htûm byuq jáng, nungmoq lé, ahtum abyuq joq tô é yhûm má, lhom hap yu é hui kó râ nghut lhu.

¹⁰ Tiq é mù má wó lum é sù ó yuq nghut kôlhang, mù mó má le wó lûm râ nghut lhu. Tiq é mù má lhum a zuí é sù ó yuq nghut kôlhang, mù mó má le lhumzui râ a nghut. ¹¹ Haú mù, mingkan sutzè má lhang nungmoq lé a wó lûm kô é nghut le gi, haú tengmán é sutzè lé, nungmoq chyáng ó yuq wá kâm ap byi râ lhu? ¹² Supé é sutzè má, nungmoq lé a wó lûm kô é nghut le gi, nungmoq sîng âng é sutzè lé, nungmoq chyáng ó yuq wá kâm ap byi râ lhu?

¹³ Dui-nhâng zoshâng ó yuq nghut kôlhang, yhumsing í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhu; haú a nghut jáng, rayuq lé gi, lhumzui mù, rayuq lé gi, hpau a tap kut râ nghut lhu. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga taí ri.

¹⁴ Ngùn myoqnoq é Hparishe pé gi, dang haú banshoq lé wó gyo kôjáng, Yesuq lé wuizui kut pyám byí akô. ¹⁵ Haú mù luí, Yesuq gi, yhangmoq lé, "Nungmoq gi, byu pé hí má yhumsing gùng lé yhumsing dingmán bang su kut shit mhaú é bang nghut akô; nghut kôlhang, Garai Gasang gi, nungmoq é i-myit unghkaú lé sé sù nghut lhu. Byù é hí má hpaudap é pé gi, Garai Gasang é hí má achaq achyut é nghut nyi ri.

¹⁶ Jep é tarâ† eq myiqhtoí pé é dang, ahko ahkáng wó tô é ahkyíng gi, wui-myhup sará Yohan jé lé é buinyí jé shoq nghut bê. Haú hkyíng mai gi, Garai Gasang é mingdán hkyô gabú danglù lé, hko kyô nyi mù, yuq du jup gi, haú hkyô má htûng chyíng wang ló bum akô. ¹⁷ Jep é tarâ mâ é tiq dik é dangjí eq myihkyet zo ralhum lé wó lhoq hten râ htoq, mauhkûng eq myigùng hten râ gi, je lui râ nghut lhu.

¹⁸ Dangké, yhumsing é yhangmyi lé kâng pyám mù, myiwe gotù dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taí ri.

Sahtê Hpó Eq Lazaruq

* **16:8** Maubó gung é yhangzô pé nghu é gi, Garai Gasang é yhangzô pé lé taí é nghut lhu. † **16:16** Jep é tarâ gâ é gi, Garai Gasang, Mosheq mai nga-nhúng lé byí tô é tarâ lé gâ lhu.

19 Yesuq dum xoq taî é gi, "Radàm lé, sahtê rayuq gi, nè é eq nú-nhâm é mebu wut mù luî, nyî nyî bui bui zo ngón shuq ngón nyi ri. 20 Yhâng é hkúmdong má gi, ragùngdû é jeq byi tô é Lazaruq gâ é dung zo sù rayuq lé, lé nyhi tô akô. 21 Haú yuq gi, sahtê wá é siboî mai gyó é agyó ahtâng lé, wú zô nau nyi ri. Hkuî pé le yhâng é dàm pé má, lé yoq byî nyi akô.

22 Htâng má, haú dung zo sù shi byuq jáng, maumang lagyô pé gi, mauhkûng má nyi é Abraham é tanghkoî má yhang lé shuí ló byî akô. Sahtê wá le shi byuq luî, yhûm pyám bekô nghut ri. 23 Sahtê wá gi, ngaraî ming má dik shoq hpuzô nyi mù luî, tu wú kat le, we we má Abraham lé le, yhâng é tanghkoî má é Lazaruq lé le, myàng kat ri. 24 Haú mù, yhang gi, 'Áwa Abraham ê, ngo lé shogyo yù laq ô. Ngò gi, shî myi htum má achyí aku nyé é hui zô nyi ri. Haú mù, Lazaruq gi, yhâng é loqnyhui û éq wui má tik yù mù, ngá é shô má wui ra-poq zo hkâlháng lé tik cham byi sháng gaq, yhang lé ngá chyáng nhang kat byi laq ô!' ga luî, dúng wut nyi ri.

25 Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuî, yhang kúm gi, shî má lo nyi byán to bê; nàng chyaú gi, jamjau hui zô nyi bê. 26 Haú mai gotû gi, shî mai nungmoq chyáng dap lé naú bang a wó dap shoq le, haú mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langkung mó éq kyo pyâm to bê nghut ri.' ga tû taî ri.

27 Sahtê wá gi, 'Áwa ê, haú nghut le gi, ngò, nang lé dúng nau ri. Ngá gû pé ngo yuq nyi ashî; yhangmoq le îsu hpuzô é jowò má a jé sháng gaq, 28 yhangmoq myit lhîng shoq ló taî pun râ matú, Lazaruq lé ngá wá yhûm shut nhang kat byi laq ô!' ga luî, dúng wut ngau nyi ri.

29 Abraham gi, 'Yhangmoq chyáng, Mosheq eq myiqhtoî pé nyi lhê; haú bâng dang lé gyô yù kó sháng gaq.' ga taî ri.

30 Sahtê wá gi, 'Áwa Abraham ê, haú su a nghut. Shi byuq é bang má é rayuq yuq yhangmoq chyáng dum taú lo é nghut le

kúm gi, yhangmoq myit lhîng kó râ nghut lhê.' ga taî ri.

31 Abraham gi, 'Mosheq eq myiqhtoî pé é dang lé yhangmoq a gyo kô é nghut le gi, shi byuq é bang má é rayuq yuq dum dui toq ló mù, ló taî kyo kôlhâng, kâm gyo kó râ a nghut.' ga luî, yhang lé tû taî ri." gâ ri.

17

Mara Hkyut É Hkyô Eq Lumjîng Myit Mht 18:6-7, 21-22; Mrk 9:42

1 Yesuq, Yhâng chángzô pé lé taî é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôlhâng, mara kut shut nhang é hkyô lé lhoq htoq é sù gi, dingnyé wó râ. 2 Zoshâng shí bang má é rayuq lé, mara kut shut nhang é sù gi, yhâng é lingzing má luqluí long mó tuî hut byi luî, wuimau má ê dú hkyô pyâm é huî é nghut le gi, yhang é matú je gè râ nghut lhê. 3 Nungmoq gi, yhumsîng gùng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luî, mhoqshit aq; yhang myit lhîng é nghut le gi, yhang lé mara hkyut pyám byi aq. 4 Ranyî má za, yhang nang lé nyhit dàm shut mù, 'Ngò myit lhîng bê.' ga luî, nang lé nyhit dàm dum tôngbán le, tôngbán hkangmó, nàng, yhâng é mara lé hkyut pyám byi aq." gâ ri.

5 Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dúng akô.

6 Haú jáng, Yhumsîng gi, "Nungmoq é lumjîng myit angshi cham í za hkâlháng bò kô é nghut le gi, shî hangwâ gàm lé, 'Sikgâm ê, amyit eq roq bún luî, wuîshuq lung-aú má, ê yuq to aq ô.' gâ le, nungmoq é dang lé sikgâm haú gyo byi râ nghut lhê.

7 Dangké, nungmoq má é rayuq yuq chyáng, yò hpuy é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haú yohtung pá mai jé lo é hkûn, yhang lé, 'Hân zùng mù zang zo aq.' ga luî, ó yuq wá taí kó râ lú?

8 Haú dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyî aq. Ngò bàn zo jáng sheq nàng wó zo

râ nghut lhê.' ga luí, taí râ a nghut kó lú? ⁹ Taí mitaí banshoq lé, dui-nhâng zoshâng ban zui saí byí é nghut kôlhang, yhang lé jeju bûn é dang ó yuq wá taí wú akô lú? ¹⁰ Haú eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mú lé za lhoq pân é bang nghut lhê.' nghu taí keq." ga taí ri.

Manggâm Dap Bang Raxê Yuq Lé, Yesuq Lhoq Gê Byí É Hkyô

¹¹ Ahkuí, Yesuq gi, Yerusalem wà mó shut e ló nyi le, Samariq mau eq Galile mau gyoro mai lai e ló ri. ¹² Yhang, wà rawà shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yù laq ô." ga luí, wut garû bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pè chyáng ló tûn shit keq." ga yhangmoq lé taí ri. Yhangmoq gi, hkyô má ru sô nyi ashí le lhang, sân-yúng ló byuq bekô.

¹⁵ Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taú ê mù, htê mó èq Garai Gasang lé hkya-ôn é eq, ¹⁶ Yesuq é hkyí wang má paí gop to luí, Yhang lé jeju hkya-ôn nyi ri. Haú yuq gi, Samariq byù nghut ri.

¹⁷ Haú mù, Yesuq gi, "Sân-yúng byuq é gi, raxê yuq a nghut lú? Gau yuq gi, hká ló byuq bekô? ¹⁸ Shí tûngbaù rayuq mai lai luí, dum taú lé mù Garai Gasang lé hkya-ôn é byù, rayuq le a nyi lo kó lú?" ga taí ri. ¹⁹ Hau htâng, Yesuq gi, haú yuq lé, "Toq mù ló aq, náng é lumjíng myit gi, nang lé lhoq sân-yúng byi bê nghut ri." ga taí ri.

Garai Gasâng É Mingdán Jé Lô Râ Hkyô Mht 24:23-28, 37-41

²⁰ Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myí akô. Haú jáng, Yesuq gi, "Garai Gasâng é mingdán jé lé râ gi, myoq eq wú luí myàng râ a nghut. ²¹ Garai Gasâng é mingdán gi, nungmoq yuq jup é ahkaú má nghut nyi é

yanmai, 'Wú keq, shí má joq ri, mhó má joq ri.' ga luí le, byu pé gi, wó taí kó râ a nghut." ga luí, yhangmoq lé tû taí ri.

²² Chángzô pé lé le Yesuq taí é gi, "Haú Byu Yhangzô é buinyi ra-nyí lé, nungmoq myàng nau dik é ahkyíng jé râ. Nghut kôlhang, nungmoq gi, Byu Yhangzo lé wó myàng kó râ a nghut. ²³ Haú buinyi má, byu pé gi, nungmoq lé, 'Yhang shí má nyi ri.' haú a nghut jáng, 'Yhang hê má nyi ri.' ga taí kó râ nghut lhê. Nghut kôlhang, hkâ-ê; hkácháng kó. ²⁴ Hkâsu mù gâ le, maumyí rahkyam má hpyat é maulhap gi, maumyí gó hkyam jé shoq duqbó é su, haú Byu Yhangzo dum jé lé é buinyi má le dut râ nghut lhê. ²⁵ Nghut kôlhang, haú su a dut htoq shimá, Yhang gi, zing-rí é myo myo lé le, ipyat shi mâ é byu pé eq he-ngik pyâm é lé le, hui shirâ nghut lhê.

²⁶ Noaq é tsín pyat má dut é su, haú Byu Yhangzo jé lé é buinyi má le dut râ nghut lhê. ²⁷ Byu pé gi, Noaq, wui-sanghpo mó hkaú má wang é hkûn jé shoq, zo zo shuq shuq, myi byi myi yú, myiháng kut luí, nyi nyi bum akô. Haú hkûn, dowui dítng lô mù, yhangmoq banshoq lé lo lhoq htên pyám bê nghut ri.

²⁸ Haú eq rajung za, Lot é pyat má le, byu pé gi, zo mù, shuq mù, ung zo wui zo, ho zo ho shuq, yhûm kut luí nyi nyi akô. ²⁹ Nghut kôlhang, Sodom wà mai Lot htoq ló é buinyi má, mauhkûng mai, myi eq hang gi, mau su wò gyó lô luí, lunglhang lé lhoq htên pyám bê nghut ri.

³⁰ Haú Byu Yhangzo, lé htoq shit é buinyi má le, haú eq rajung za dut râ nghut lhê.

³¹ Haú buinyi má, yhumhkûng* htoq má nyi tô é sù gi, yhúmhkaú mâ é zè lé, a ló gyó wang yù lo sháng gaq. Yò má nyi tô é sù gi, haú eq rajung za, yhûm shut a taú ló lo sháng gaq. ³² Lot é yhangmyi† lé bûn nyi keq. ³³ Yhumsing é asak dui hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duí râ nghut lhê. ³⁴ Ngò, nungmoq lé taí kyo kôlé, haú myín lé, yhupjang ralhum má byù í yuq nyi to kô le, rayuq gi, shuí yu é hui mù, rayuq gi,

* **17:31** Yudaq byu pé é yhumhkûng gi, rá é nghut lhê mù, nyi kún jang kut akô. † **17:32** Lot é yhangmyi gi, Sodom wà shut dum taú lhang wú é yanmai, Garai Gasang lhoq hten pyâm é hui sù nghut lhê.

myit gyó to râ nghut lhê. ³⁵ Myiwe í yuq luí má rahá za chôm luí nyi tô le; rayuq gi, shuí yu é hui mù, rayuq gi, myit gyó pyâm to râ nghut lhê. ³⁶ Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyâm to berâ nghut lhê." gâ ri.

³⁷ Haú hkûn, chángzô pé gi, "Yhumsing Yesuq ê, haú gi, hká gyo má dut râ lú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zîng bùm râ nghut lhê." ga luí, yhangmoq lé tâ tai ri.

18

Chuímó Myhí Eq Tarâ Agyi É Hkyô Lé Dangtú Yù É Hkyô

¹ Yesuq, Yhâng é chángzô pé lé, myit wum a gyuí é za, hkâ-nhám le kyûdung nyi râ hkyô lé, dangtú dông mhoqshit é gi, ² "Wà rawà má, Garai Gasang lé le a gyuq hoq, byù lé le haí su a ngàm é tarâ agyi rayuq nyi ri. ³ Haú wâ má chuímó myhí rayuq le nyi ri. Yhang gi, haú tarâ agyi wá chyáng é luí, 'Ngò eq amû htoq sù lé, yhâng é mara eq rajung za, jéyáng byi laq.' ga luí, ê dum tái tái kut nyi ri.

⁴ Nghut kôhang, tarâ agyi wá gi, ahkyíng rayoq zo jé shoq tarâ a jéyáng byí é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, ⁵ nghut kôhang, chuímó myhí shí yuq é amû lé, ngò a jéyáng a doqdan byí é nghut le gi, yhang dum lé lé kut mù, ngo lé myit hpêbù nhâng râ dut ri. Haú mù, ngò yhâng é amû lé jéyáng byi râ.' ga, yhâng é unghkaú má myit yu ri." gâ ri.

⁶ Haú mù luí, Yhumsing Yesuq gi, "A ding a mán é tarâ agyi wá tái é dang mai mhoq yú keq. ⁷ Garai Gasang gi, Yhang lé nyí myín wut dúng nyi é, Yhang hkyin yu to bê bang lé, tarâ é dông a kut byí é gi, myáng myáng nyi to râ lú? ⁸ Ngò, nungmoq lé tái kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôhang, haú Byu Yhangzo jé lé é buinyi má, lumjîng hkyô lé gi, mingkan htoq má myang wú shirâ lú?" ga tái ri.

Hparishe Eq Kang Guq Sù Kyûdung É Hkyô

⁹ Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông tái é gi, ¹⁰ "Byù í yuq kyûdung kó râ ga, noqkuq yhûm má doq e akô. Rayuq gi, Hparishe, rayuq gi, kang guq sù nghut ri. ¹¹ Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, sumyi le a lú é htoq agó, shí kang guq sù su le, a nghut é yanmai, ngò nàng lé jeju bûn lhê ô! ¹² Ngò gi, rabat má zoshuq í dâm gám nyi lhê; ngò wó yu é gû mâ é xê gambùm ragambùm le kat nyi lhê.' ga luí, yhang baú yhang gotú kut dúng nyi ri.

¹³ Kang guq sù kúm gi, we we má yap to mù, mauhkûng shut lháng a wám tu wú é za, wànggàng bat luí, 'Garai Gasang ê, shí yubak dap sù ngo lé, shogyô yù laq ò!' ga dúng ri.

¹⁴ Ngò, nungmoq lé tái kôlé, kang guq sù kúm gi, Garai Gasang é hí má mara hkyut san byí é lé wó yú luí, yhûm shut dum taú ló bê; nghut kôhang, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga tái ri.

Zoshâng Wuí Lé Yesuq Shimân Byí É Hkyô

Mht 19:13-15; Mrk 10:13-16

¹⁵ Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haú lé myàng jáng, lhom tân hkûm akô nghut ri. ¹⁶ Nghut kôhang, Yesuq gi, zoshâng wuí lé, wut yú luí, "Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasang é mingdán gi, haú sù é bâng é mingdán ru nghut lhê. ¹⁷ Ngò, nungmoq lé teng za tái kôlé, Garai Gasang é mingdán lé, zoshâng su kut a lhom hap yu é nghut le gi, mingdán haú má gè gè yhang wó wâng râ a nghut." ga tái ri.

Ayá Wó É Sahtê Hpó

Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, "Ge é Sará ê, ahtum abyuq é asak wó yú râ matú, ngò haí kut ra râ lú?" ga myí ri.

19 Yesuq gi, "Haî mù, Ngo lé ge é Sará nghu lhê lhu? Garai Gasang mai lai luî, ge é ó yuq le a nyi. 20 Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq. ☆ gâ é dang pé lé, nàng sé gû bê." ga luî, yhang lé tâ ri.

21 Haú yuq gi, "Haú pé banshoq lé, ngò, zoshâng hkûn mai cháng bê nghut lhê." ga tâ ri.

22 Yesuq gi, dang haú lé wó gyo jáng, "Nàng kut râ rajung râ tô ashî; nàng wó miwó lé ùng pyám luî, myùng bang lé byî pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." ga luî, yhang lé tâ ri.

23 Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. 24 Yesuq gi, haú yuq lé wú luî, "Sutzè wó bang gi, Garai Gasâng é mingdán má wàng râ matú, haú-í yhang wuî ri-nhung! 25 Sutzè wó sù rayuq, Garai Gasâng é mingdán má wó wàng râ htoq, gola-uq radu âpno mai wó wang lai râ gi, je lui râ nghut lhê." ga tâ ri.

26 Dang haú lé wó gyô é bang gi, "Haú su ru nghut le gi, ó yuq za hkyi yu é hui râ nghut lhê lhu?" ga myî bum akô nghut ri.

27 Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga tâ kyô ri.

28 Haú hkûn, Petruq gi, Yesuq lé, "Wú aq, ngamoq gi, wó miwó tô pyâm to luî, Náng htâng cháng bê nghut lhê." ga tá jáng,

29 Yesuq gi, "Ngò, nungmoq lé teng za tai kôlé, Garai Gasâng é mingdán é yanmai, yhumsing é yhûm, yhumsing é yhangmyi, yhumsing é âgu âmang, yhumsing é înu îwa, yhumsing é yhangzô pé lé, pyâm to sù ó yuq nghut kôlé, 30 shí pyat má, akyû myo myo wó hkam yù râ htoq agó, htang pyat má le, ahtam abyuq é asak a wó yu é gi, a nyi râ nghut lhê." ga luî, yhangmoq lé tâ ri.

Yesuq, Yhang Shî Hkám Râ Lé Dum Tai Ê Hkyô

Mht 20:29-34; Mrk 10:46-52

31 Yesuq gi, Yhâng é lagyô pé raxe í yuq lé gotû kut wut yù mù, "Gyô wú keq, nga-nhung gi, Yerusalem wà mó shut doq ló

nyi é nghut lhê. Haú má jé jáng, haú Byu Yhangzo eq séng luî, myiqhtoî pé kê tô é banshoq gi, dik lò berâ nghut lhê. 32 Hkâsu mù gâ le, Byu Yhangzo gi, tûngbaù pé é loq má ap pyâm é hui luî, haú bâng èq Yhang lé, wuizui kut pyâm é, rhoi rip e, sôkan byé gyûn é, nhuq bat é kut yû mù, sat pyám kó râ nghut lhê. 33 Hau htâng sum nyi nghû râ buinyi má, Yhang gi, dum dui toq lô râ nghut lhê." ga luî, yhangmoq lé tâ ri.

34 Lagyo pé gi, dang haú pé rahkun lé lhang a sê gyo kó; dang hau é lichyûm gi, yhangmoq é hí má zaú nghop tô é nghut é yanmai, Yhang haî tai nyi é hkyô pé lé yhangmoq a sé kó nghut ri.

Dung Zo É Myoqjit Sû Lé, Yesuq, Myoq Dum Myàng Nhang É Hkyô

35 Ahkuî, Yesuq Yeriho wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. 36 Yhang gi, byù rajum rayò sô lai ló é htê lé wó gyo jáng, haú haî dut nyi é hkyô lé, myi kat ri. 37 Haú hkûn, yhangmoq gi, "Nazaret wà byù Yesuq lai ló ri." ga luî, yhang lé tâ kyo akô.

38 Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

39 Hí má lai ló é bang gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó èq wut dúng kat ri.

40 Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi, 41 "Ngò, nàng lé haî kut byi râ ô nau ri lhu?" ga, yhang lé myi kat ri.

Haú yuq gi, "Yhumsing ê, ngò myoq myàng nau ri." ga tâ ri.

42 Hau hkûn, Yesuq gi, "Náng myoq myàng sháng gaq! Náng é lumjing myit gi, nang lé lhoq gê byi bê nghut ri." ga, yhang lé tâ ri. 43 Haú yuq gi, haú hkûn jáng, yhang myoq wó myàng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng

kôjáng, Garai Gasang lé hkya-ôn nyi bum akô.

19

Yesuq Eq Zake

¹ Yesuq gi, Yeriho wà má wàng mù, sô laí ló nyi ri. ² Haú hkûn, haú wâ má, Zake gâ é kang guq agyì rayuq nyi ri; haú yuq gi, sutzè wó sù nghut ri. ³ Yhang gi, Yesuq hká yuq nghut é lé myàng nàu kôhâng, nyhùm sù nghut é htoq agó, byù rajùm rayò chyîn chyap tô é yanmai, a wó myâng nghut ri. ⁴ Haú mù, yhang gi, Yesuq lé wó myâng shoq ga, Yesuq laí ló râ hkyô hí shut din é mù, hkohùm gâm htoq má é doq zung tô ri.

⁵ Yesuq gi, haú jowò má jé jáng, tu wú kat luí, "Zake ê, hân gyó lô aq; hkû-nyí ngò náng yhùm má bíng râ nghut lhê." ga taí ri. ⁶ Haú jáng, Zake gi, hân hân gyó ló mù, gabú dik é èq Yesuq lé lhom hkulum yu ri.

⁷ Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng kut râ ga wang e ló bê." ga luí, mara hùn dang taí nyi bum akô.

⁸ Zake kúm gi, toq yap mù, "Yhumsîng Yesuq ê, ngò wó é sutzè rawuí gû myùng bang lé gâm byí pyám râ; ngò záng mop zô pyâm é byù rayuq yuq nyi le gi, myi tú dum tau byi râ." ga Yhumsîng Yesuq lé taí ri.

⁹ Haú hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyí shí yhùm má hkyi yù hkyô jé bê, ¹⁰ hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luí, Zake lé taí ri.

Hkohkam É Dui-nhâng Zoshâng Raxê Yuq Mht 25:14-30

¹¹ Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhum dông dum taí jat é gi, ¹² "Aróng wó sù byù rayuq gi, hkohkâm ayá é hkam yù luí, dum taú lò râ ga, wê é ming shut ê râ matú hen nyi ri. ¹³ Haú mù, yhang gi, Yhâng é dui-nhâng zoshâng raxê

yuq lé wut yù mù, rayuq lé ngùn rajoí joí ap byi luí, 'Ngò dum taú jé lô shoq, shi èq hpugá gá nyí láng keq.' ga luí, yhangmoq lé pying tô ri.

¹⁴ Yhâng é mingbyû wuì kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyi râ lé, ngamoq a ô nàu.' ga luí, ê taí râ matú lagyo châng nhang kat akô.

¹⁵ Nghut kôhâng, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byí tô é dui-nhâng zoshâng wuì lé, hpugá gá luí, amyat hkâ-myhó wó ho jat bê hkyô lé sé nàu luí, yhangmoq lé wut nhang kat ri.

¹⁶ Haú hkûn, sâng-hí yuq gi, lé mù luí, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, nàng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gâ ri.

¹⁹ Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

²⁰ Dum rayuq le, lé mù luí, 'Yhumsîng ê, náng é ngùn rajoí lé a byuq shoq, ngò panchoq èq htup tô lhê; wú aq, shí nghut lhê. ²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wuì nghut é yanmai, nang lé ngò gyuq ri.' ga taí ri.

²² Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wuì nghut é hkyô lé, nàng sê to gù nghut le nhîng, ²³ ngá ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lhú?' ga yhang lé taí ri.

²⁴ Hau htâng, yhumsîng hpó gi, ayâm má yap tô é bang lé, 'Haú ngùn rajoí lé yhâng

* 19:9 Abraham é yhangzo ngû é lichyúm gi, Abraham su Garai Gasang lé lumjîng é sù lé gâ lhê.

chyáng mai taû yù luí, raxê joí wó sù lé jat byi keq.' ga taí ri.

²⁵ Haú bang gi, 'Yhumsing ê, yhang gi, raxê joí wó to bê lé nhing.' ga akô.

²⁶ Haú jáng, yhang gi, 'Ngò, nungmoq lé taí kôlé, wó sù† ó yuq le, jat byi é hui shirâ nghut lhê; a wó su chyáng mai kúm gi, yhang wó tô é lé lhang, yu pyám byi shirâ nghut lhê. ²⁷ Ahkuí, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuî lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taí jáng, hí má so luí, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé ló kojáng, Yhâng é chángzo í yuq lé, ³⁰ "Nungnhik, hí mâ é wà má é keq; wà haú má wang é hkûn jáng, ó le a jî wú shí é logúng zo tuí tô lánng é lé, ê myâng kó râ nghut lhê; haú lé hpyi yù mù, Ngá chyáng she lò keq. ³¹ Byù rayuq yuq mai, 'Haú haí mù hpyi nyi akô?' ga nungnhik lé myi kôjáng, 'Shí du lé, haú Yhumsing râ ri gâ.' nghû tú taí keq." ga pyíng luí, nhang kat ri.

³² Nhang kat é sù nhik ê jé lé, Yesuq taí kat é dông yhang, dut to lánng é lé é myang akô. ³³ Yhangnhik logúng zo haú lé hpyi nyi kô é hkûn, yhumsing wui gi, "Haú logúng zo lé, haí mù hpyi nyi akô lú?" ga luí, yhangnhik lé myi akô.

³⁴ Haú jáng, yhangnhik gi, "Shí du lé haú Yhumsing râ ri gâ." ga taí akô.

³⁵ Yhangnhik gi, haú logúng zo lé Yesuq chyáng she lò mù, yhangmoq é buhíng pé lé logúng ahtoq má buí luí, Yesuq lé doq ji nhang akô. ³⁶ Haú su kut, Yhang ji e ló nyi le, byu pé gi, yhangmoq é buhíng pé lé hkyô má hkang byi akô.

³⁷ Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklaí kumlhá pé é yanmai, gabú myit mai htê mó

o mó eq Garai Gasang lé hkya-on kô é dang gi,

³⁸ "Haú Yhumsing é myíng mai jé lé lo é hkohkâm gi, hkungsô wó nyí sháng gaq ô!✧ Mauhkûng htoq má, ngu-ingón nyí sháng gaq ô!

Htoq tsáng myhâng má, Garai Gasang gi, hpungwup shing kang bo nyi sháng gaq ô!"

gâ akô.

³⁹ Haú mù luí, haú byù hpûng hkaú má bo é Hparishe pé ra-am gi, "Sarâ é, náng é chángzô pé lé tân pyám aq." ga luí, Yesuq lé taí akô.

⁴⁰ Haú hkûn, Yesuq gi, "Ngò, nungmoq lé taí kôlé, shí bang zim za nyi kó é nghut le gi, luqgok pé garú lô râ nghut lhê." ga tú taí ri.

⁴¹ Ahkuí, Yesuq, Yerusalem wà mó eq chyâng lò luí, wà mó haú lé myàng jáng, haú wà mó é matú ngaù mù, taí é gi, ⁴² "Wà náng ê! Hkû-nyí lhê é buinyi má, ngu-ingón é hkyô lé náng bún sé tô é nghut le gi, gè râ wá! Ahkuí kúm gi, haú hkyô lé nghop to bê nghut mù luí, náng a sé lo nghut ri. ⁴³ Hkâsu mù gâ le, náng chyáng Garai Gasang lé kúm jé é hkûn, náng a bun a sé wú kat é yanmai, náng é gyè pé gi, awui ayâm má gyewap xuq mù, náng é lhíng hkyuq mai nang lé lom tô é buinyi jé lô râ nghut lhê. ⁴⁴ Haú hkûn, nang lé lhoq htên pyám luí, nung zo pé lé le, haú ahkaú má yhang dùn nhê pyet sat pyám bekô rá; náng gi, luqgok racham htoq má racham lhang a kê lhum loshoq, dut byuq râ nghut lhê." gâ ri.

Yesuq, Noqkuq Yhûm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "'Ngá yhûm gi, kyûdung yhûm dut râ nghut lhê.'✧ ga kâ to kôlhang, ⁴⁶ nungmoq gi, jowò shí lé 'damaq hkyûng'✧ kut akô." ga taí uchyang, hkat htoq pyâm ri.

⁴⁷ Yhang gi, nyí wui noqkuq yhûm má mhoqshit nyi ri. Hkyangjong agyi pé, tarâ sarâ pé eq, byu pé é suwún wui kúm gi, Yhang lé wó sat pyám râ hkyô ho nyi akô.

⁴⁸ Nghut kôlhang, byù banshoq bang gi,

† 19:26 Wó sù nghu é gi, yhumsing a-tsam lé rago dat chûng sù lé taí é nghut lhê. ✧ 19:38 Hkya-on 118:26 ✧ 19:45 Esai 56:7 ✧ 19:46 Yer 7:11

Yhâng mhoqshit é dang lé gyo nau nyi kô é yanmai, wó sat râ hkyô lé, a myang hô kô nghut ri.

20

Yesuq É Ahko Ahkáng Lé Myî Chyam Wú É Hkyô

Mht 21:23-27; Mrk 11:27-33

¹ Ra-nyí lé, Yesuq gi, noqkuq yhûm wàng hkaû má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuî eq rahá kut, Yhâng chyáng lé jé kômù, ² "Hai ahko ahkâng èq Nàng shí pé lé kut nyi lhê lúhú? Ahko ahkáng shî, Nang lé ó yuq byî é lúhú? Ngamoq lé taí kyô wú aq." ga Yhang lé myî akô.

³ Haú hkûn, Yhang gi, "Ngò le, nungmoq lé rajung myî wú kôlé; ⁴ Yohan byî é bap-tisma gi, mauhkûng mai lúhú? A nghut jáng, byu chyáng mai lúhú? Ngo lé taí kyô wú keq?" ga yhangmoq lé myî ri.

⁵ Haú hkûn, yhangmoq chôm hpyê lhum kô é gi, "'Mauhkûng mai nghut lhê.', nghû nga-nhúng taí jáng le, 'Haî mù, yhang lé a lumjíng kô é lúhú?' ga râ nghut; ⁶ 'Byu chyáng mai nghut lhê.' nghû jáng le, shiwa byù banshoq gi, Yohan lé, myiqhtoi rayuq ga lumjíng to kô é yanmai, yhangmoq, nga-nhúng lé luqgok èq dú sat kó râ nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tù taí akô.

⁸ Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Tsibiyiq Hkyâm Yhumsîng Eq Hkyâm Sai Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dông xoq taí kyô é gi, "Byù rayuq gi, tsibiyiq hkyâm ralhûm saî to mù, hkyâm saî zo bâng chyáng ngho byî to luî, gó ming shut myáng myáng è nyi byuq ri. ¹⁰ Kyôshu yoq jé jáng, yhang gi, hkyâm saî zo bâng èq, hkyâm mâ é tsibiyiq shi pé lé lhom byî kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhang, hkyâm

saî zo bang gi, haú yuq lé lhom bat mù, loq kôm taú nhang kat akô. ¹¹ Gotû dui-nhâng zoshâng rayuq lé, yhangmoq chyáng dum nhang kat ri. Nghut kôlhang, yhangmoq gi, haú yuq lé le, lhom bat mù, hoq lhoq hpu luî, loq kôm dum taú nhang kat akô. ¹² Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luî, hkyâm mai hkat htoq kat akô.

¹³ Haú hkûn, tsibiyiq hkyâm yhumsîng gi, 'Ngò hkâsu kut wú râ lúhú? Ngò chyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taí ri.

¹⁴ Hkyâm saî zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yû shoq, yhang lé sat pyám sháng.' ga rayuq eq rayuq taí lhûm bum akô. ¹⁵ Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ lúhú? ¹⁶ Yhang gi, è mù, haú hkyâm saî zo bang lé sat pyám luî, hkyâm haú lé góbang lé htot ngho byî pyám râ nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

¹⁷ Hau htâng, Yesuq gi, yhangmoq lé byu wú luî, "Haú jáng gi, 'Yhûm saî bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.'*

ga Chyúmdang má kê tô é gi, haî gá nau é nghut lhê lúhú? ¹⁸ Luqgok* haú má gyó záng é sù ó yuq nghut kôle, gyuí gyop byuq râ nghut lhê. Luqgok hau èq gyó nhê záng é sù le, nhê pyeq pyâm é hui râ nghut lhê." ga taí ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luî taí é hkyô lé, sé kô é yanmai, haú hkûn jáng lháng Yhang lé chyup yû râ matú hkyô ho nyi akô. Nghut kôlhang, byu pé lé gyuq mù a chyup shi kó nghut ri.

Kang Kat É Hkyô Eq Séng Luî Myi É Dang Mht 22:15-22; Mrk 12:13-17

* **20:17** Hkyâ-on 118:22 * **20:18** Luqgok nghu é gi, Yesuq lé taí ri.

²⁰ Haû mù, yhangmoq gi, Yesuq é dang má mara wó chyup yû shoq ga, gegùn labyoq kut bang lé jowú nhang nyi akô. Haû gi, ahkáng ayá wó é mauzaû chyáng Yhang lé wó ap pyám râ matú nghut ri.

²¹ Haû jowú bang gi, "Sarâ ê, nàng gi, dǐng dǐng mán mán taî mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dǒng mhoqshit é sù nghut é lé, ngamoq sê lhê. ²² Hkoséng Kehtaq lé, ngamoq kang kat râ gi, tarâ wang lhê lhú? A wang é lhú?" ga luí, Yhang lé myí wú akô.

²³ Nghut kôlhang, Yesuq gi, haú bâng é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tûn shit wú keq. Ó yuq é alhó eq masat laiká dap tô ri lhú?" ga myí jáng, ²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haû nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taî ri.

²⁶ Yhangmoq gi, byu pé hí má, Yhâng é dang má mara a wó ho myang é eq, Yhang tû taî é dâng é yanmai, maú hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myí É Dang

Mht 22:23-33; Mrk 12:18-27

²⁷ Haú hkûn, haû dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byí ri. ²⁹ Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ³⁰ Lanong yuq le, yhangmang mó é chui lé gon mù, zo dù a dap é za shi ló byuq bê. ³¹ Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi ló byuq bùm bekô nghut ri. ³² Ló htáng má, myiwe myhí haú le châng shi ló byuq bê nghut ri. ³³ Haû mù

luí, haû dum dui toq é buinyì má, myiwe myhí haû gi, haú nhiktâng wuì mâ é hká yuq é yhangmyi nghut râ lhú? Hkâsu mù gà le, yhang gi, haú nyhit yuq é yhangmyi dut wú bê sù nghut ri." ga luí, Yhang lé myí wú akô.

³⁴ Haú hkûn, Yesuq gi, "Shí mingkan htoq mâ é byu pé gi, ikun kut é eq myi byi myi yû kut nyi bum akô. ³⁵ Shi é mai dum dui toq râ eq, haú pyat má nyi râ gǐng bâng é matú gi, ikun kut é eq myi byi myi yû hkyô joq lo râ a nghut. ³⁶ Haú bang gi, maumang lagyô pé su dut byuq luí, a dat shí lo kê râ nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô. ³⁷ Haû nyé duq nyi é mhanpúng eq séng luí, Mosheq èq kê tô é má lháng, Yhumsíng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga bo tô é yanmai, shi é bang dum dui toq lô râ hkyô lé tûn shit to bê nghut ri. ³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gà le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tû taî ri.

³⁹ Haú hkûn, tarâ sarâ pé ra-am gi, "Sarâ ê, nàng taî é jô ri." ga akô. ⁴⁰ Haû mù, yhangmoq gi, Yhang lé haí le a wám myí jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taî akô lhú? ⁴²⁻⁴³ Dawiq yhang yhang lháng gi, Hkya-on Kungtôn Laiká má, 'Haú Yhumsíng Garai gi, ngá é Yhumsíng lé, "Ngò, náng é gyè pé lé, náng é hkyí nang tanghkuq kut pyám byí é hkyíng jé shoq, Ngá é loqyo hkyam‡ shut zung nyi shi aq." gâ ri.'* ga kê tô ri. ⁴⁴ Haû mù, Dawiq yhang lháng, Hkrisduq lé, Yhumsíng gâ é nghut le gi, Hkrisduq gi, yhangzo za hkâsu ge nghut râ lhú?" ga taî ri.

† 20:36 Dum dui toq lô su é yhangzô pé gâ é gi, Yesuq lé lumjǐng luí, shi é htâng má dum dui toq lo é bang lé gà lhê.

* 20:37 Htoq Lô 3:6 ‡ 20:42-43 Loqyo hkyam nghu é gi, ahko ahkáng wó é jowò nghut lhê. ✧ 20:42-43 Hkya-on 110:1

*Tarâ Sará Pé Lé Sidiq Râ Hkyô**Mht 23:1-36; Mrk 12:38-40; Luk 11:37-54*

⁴⁵ Byù banshoq gyô nyi é u lé, Yesuq, Yhang é chángzô pé lé taí é gi, ⁴⁶ "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún lui, gài pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poí pé mâ é je réng é zùng jowò pé má myang zùng râ lé le, ô nau nyi bum akô.

⁴⁷ Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dîng shit mhaú é bang nghut akô. Haú sù é bang gi, je riyhang htan é dông dam byí é hui zo kó râ nghut lhê." gâ ri.

21*Chuimó Myhí Kat É Alu**Mrk 12:41-44*

¹ Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ² Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri. ³ Haú mù, Yhang gi, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gâ le, haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglháng lé kat bê nghut ri." ga taí ri.

*Ló Htûm Buinyi Má Dut Lò Râ Hkyô**Mht 24:1-21, 29-35; Mrk 13:1-19, 24-31*

⁵ Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham lhang a kê lhum loshoq, hpyoq hpyi pyâm é buinyi jé râ nghut lhê." ga taí ri.

⁷ Haú su ga jáng, yhangmoq gi, "Sará ê, haú nghut le gi, haú hkyô pé gi, hkâ-nhám dut lò râ lhú? Haú dut râ chyâng lò jáng, hkasú é kumlhá htoq lò râ nghut lhê lhú?" ga, Yhang lé myí akô.

⁸ Haú hkûn, Yhang gi, "Nungmoq gi, hkyô shuí ngoq é a hui kó sháng gaq, sidiq nyi

keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé lhang é byù myo myo pò htoq lò kó râ nghut lhê. Nghut kôlhang, nungmoq gi, yhangmoq htâng hkácháng kó. ⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haú hkyô pé hí dut lò râ nghut lhê. Nghut kôlhang, ló htâng é buinyi gi, haú hkûn jáng dut râ a nghut shi." ga taí ri.

¹⁰ Hau htâng, Yhang, yhangmoq lé dum taí é gi, "Ra-myû eq ra-myû, mingdán ralhûm eq ralhûm majan zân lhûm lò kó râ nghut lhê. ¹¹ Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lô râ nghut lhê.

¹² Nghut kôlhang, haú hkyô banshoq a dut shimá, Ngá mying é yanmai, byu pé gi, nungmoq lé chyup yû lui, zing-rî yû mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pé chyáng é ap byí é le, hui kó râ nghut lhê. ¹³ Haú su é pé mai, nungmoq gi, ngò eq séng lui, saksé wó hkám râ hkyô htoq lô berâ nghut lhê. ¹⁴ Nghut kôlhang, hkâsu nghû lhom tú taí râ hkyô lé, hí mai a myit wuí nyi râ lé, nungmoq myit hpyit to keq. ¹⁵ Hkâsu mù gâ le, nungmoq é gye pé lhunglhâng bang, haí le a wó lhom tú taí loshoq, ngò, nungmoq lé dang eq hpaqchyí byi râ nghut lhê. ¹⁶ Nghut kôlhang, nungmoq gi, înu îwâ pé, âgu âmâng pé, mungmoq eq buinùm ji-myi wui èq lhang, ap pyâm é hui kó râ nghut lhê. Yhangmoq gi, nungmoq chyáng mâ é ra-am lé lhang, sat pyám kó râ nghut lhê. ¹⁷ Byù lhunglhâng bang gi, Ngá é yanmai, nungmoq lé a nguì kut kó râ nghut lhê. ¹⁸ Nghut kôlhang, nungmoq é xâm rahkat lhang wó htên byuq râ a nghut.* ¹⁹ Nungmoq gi, wó jân é hkyô mai, asak lé wó yû kó râ nghut lhê.

²⁰ Yerusalem wà mó lé gyè hpúng mó èq lóm tô é lé, nungmoq myàng jáng, wà mó haú htên byuq râ ahkyíng chyâng lò bê lé, bûn sê nyi keq. ²¹ Haú hkûn lé, Yuda mau

* **21:18** Shí má gi, asak woi-nyí a shí râ hkyô lé taí é nghut lhê.

má nyi é bang gi, bùm pé shut h pang doq ló kó sháng gaq; haú wà hkaú má nyi é bang le, h pang htoq kó sháng gaq; wà tiq wà zo pé má nyi é bang le, wà hkaú shut a wàng kó sháng gaq. ²² Hkâsu mù gâ le, Chyúmdang má kâ to má kâ to banshoq dik lò râ matú, buinyi haú pé gi, mara dam byi é buinyi pé dut râ nghut lhê. ²³ Haú buinyi pé má, zogûng dut é myiwe wui eq naú huq ashî nghut é ìnu wui gi, gyai yhang wuîhke kô râ nghut lhê; hkâsu mù gâ le, shí ming ahtoq má wuîhke mó eq, shí amyuahtoq má Garai Gasang nhikmó-yô é jé lô râ nghut lhê. ²⁴ Yhangmoq gi, shâm lhâm eq sat pyám hui lhê eq, ming hkang ming mó má chyup shuí ló é le hui kó râ nghut lhê. Tungbaù pé lé byi tô é buinyi ahkyíng htáng shoq, Yerusalem wà mó gi, tungbaù pé eq nâng zik tô é hui râ nghut lhê.

²⁵ Haú hkûn, bui, kyî, lhamó pé má, kumlhá htoq shit râ nghut lhê. Wuishuq lung-aú má é wuîlhêng pé é mying é hte mó é yanmai, myigùng htoq má, byù myû chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê. ²⁶ Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bùm kó râ nghut lhê; hkâsu mù gâ le, mauhkûng má é wum-o a-tsam pé gi, lhoq nhûn é huî bùm kô râ nghut lhê. ²⁷ Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shing kang mó eq le, gyó lé lo é lé, yhangmoq byu-myàng kó râ nghut lhê. ²⁸ Haú hkyô pé dut hi lò jáng, ulhum tû mù wú kat keq, hkâsu mù gâ le, nungmoq lé hkyi yù râ buinyi gi, chyâng lò bê nghut ri." gâ ri.

²⁹ Yhang, yhangmoq lé dangtú dông xoq taí é gi, "Maihpáng gâm eq sigâm banshoq lé wú wú keq. ³⁰ Sikbu nyún lo é lé myàng jáng, bui nyé nám chyâng lò bê ga luí, nungmoq yhang dat wú sê akô. ³¹ Haú eq rajung za, haú hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za taí kôlé, shí pyat má é byu pé a ban shi byuq shimá, haú hkyô pé banshoq dut byuq râ nghut

lhê. ³³ Mauhkûng eq myigùng gi, a joq lo dut byuq râ nghut lhê; nghut kôlháng, Ngá é dang gi, ru joq nyi râ nghut lhê.

³⁴ "Nghut kôlháng, zo myo shuq myô é, î shuq wut é, mingkan htoq má é myit wui myit hkê é pé eq, nungmoq é i-myit wò lai nyi luí, haú ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyi keq. ³⁵ Hkâsu mù gâ le, buinyi haú gi, mingkan htoq má nyi é byù banshoq bâng é ahtoq má, haú su jé lô râ nghut lhê. ³⁶ Haú mù luí, haú dut lò râ hkyô banshoq mai, nungmoq wó lut lai mù, haú Byu Yhangzô é hí má, wó yap gíng é bang dut sháng gaq, hkâ-nhám le kyûdung luí, ahkyíng hkangmó má machya nyi keq." gâ ri.

³⁷ Yesuq gi, nyi wuî noqkuq yhûm má mhogshit nyi luí, myin wuî Tsanlun Bùm gâ é bùm shut htoq é mù, é nyi to to kut ri.

³⁸ Byù banshoq bang gi, Yhang mhogshit é dang gyo râ ga, napsûn noq noq mai noqkuq yhûm má jé lé bum akô nghut ri.

22

Yesuq Lé, Yudaq Èq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuí, Lhoqlhai Poî gâ é Azuma (múnchi a kat é Muk Zo Poî) jé râ chyâng lò bê. ² Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gâ le, yhangmoq gi, mingbyû wui lé gyuq bùm kô é yanmai nghut ri. ³ Haú hkûn, lagyo raxe í yuq má bo é Iskarut gâ é Yudaq chyáng Tsadán wàng mù luí, ⁴ yhang gi, htoq é mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, é hpyé ri. ⁵ Haú mù, yhangmoq gi, gyô nguì luí, Yudaq lé ngùn byi râ hkyô myit hui bekô. ⁶ Yudaq le hap yù luí, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

Lhoqlhai Poî Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haú Lhoqlhai Poî má é sauzo shigu hkungga sat nhông byi râ é Azuma buinyi jé bê. ⁸ Haú hkûn, Yesuq gi, Petruq

eq Yohan lé, "Nga-nhúng zo râ matú Lhoqlhai Poî é món láng keq." ga luí, nhang kat ri.

⁹ Haú nhik gi, "Hkâmá é món to nhâng nau ri lú?" ga luí, Yhang lé myí akô.

¹⁰ Haú hkûn, Yesuq gi, "Nungnhik, myuq hkaú shut wang e ló le wui yambú waq é byù rayuq lhom hui râ nghut lhê; haú yuq chyáng châng ló luí, yhang wang ló é yhúm má châng wàng mù, ¹¹ yhumsing lé, 'Ngò Ngá é chángzô pé eq rahá, Lhoqlhai Poî zo râ bíng wap hkâmá nghut lhê lú ga, Sará myí nhang kat ri.' nghu taí keq.

¹² Haú hkûn, hen tô é ahtoq mâ é wap mó lé, nungnhik lé lhom tân shít râ nghut lhê; wap haú má é món to keq." ga taí kat ri.

¹³ Haú chángzo nhik htoq e ló le, Yesuq taí kat é eq roq za é myâng kômù, Lhoqlhai Poî lé món to bekô nghut ri.

Yhumsing É Myinzang

¹⁴ Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akô. ¹⁵ Haú hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poî shí lé nungmoq eq rahá zo râ lé, Ngò gyai ô nau nyi lhê. ¹⁶ Hkâsu mù gâ le, ngò, nungmoq lé taí kôlé, Garai Gasâng é mingdán má poí shí a ló dik dik gi, ngò haú lé dum zo râ a nghut ló." ga luí, yhangmoq lé taí ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shí lé yù luí, nungmoq yhangchang gàm shuq lhum keq. ¹⁸ Ngò, nungmoq lé taí kôlé, ahkuí mai gi, Ngò, Garai Gasâng é mingdán a jé jé tsibiyiq wíng lé dum shuq râ a nghut lo." ga taí ri.

¹⁹ Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, "Shí gi, nungmoq é matú byí pyâm é, Ngá é gungdu nghut lhê; Ngo lé bún nyi râ matú, shí su kut nyí keq." ga taí ri.

²⁰ Haú eq rajung za, myinzang ban zo jáng, góm lé le yù mù, "Góm shí gi, nungmoq é matú htoq pyâm é, Ngá é sui má xuq tô é dangshikaq asik nghut lhê. ²¹ Nghut kôlhang, wú keq, Ngo lé ap pyám râ sù gi,

zang bó shí má ngò eq rahá nyi tô ri. ²² Haú Byu Yhangzo gi, hkyin to huí é eq rajung za shí râ nghut lhê; nghut kôlhang, Yhang lé ap pyâm é sù gi, dingnyé wó ri." ga taí ri.

²³ Haú su ga jáng, lagyô pé gi, yhangmoq má shí hkyô kut râ sù gi, hká yuq nghut râ lú ga, rayuq eq rayuq myí lhum bum akô.

²⁴ Haú htoq agó, yhangmoq mâ é hká yuq sheq je kô lhê lú ga le, rayuq eq rayuq taí htíng lhúm bum akô. ²⁵ Haú mù luí, Yesuq gi, "Túngbaù pé é hkohkam pé gi, yhangmoq byù myù pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, taí hkungga nyi bum akô. ²⁶ Nungmoq kúm gi, haú su hká kut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷ Hká yuq sheq je kô lhê lú? Zô zung nyi sù lú? Haú a nghut jáng, saí tsô é sù lú? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lhê. ²⁸ Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô. ²⁹ Haú su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lhê. ³⁰ Haú mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israe-laq amyû raxe í hú lé jéyáng kó râ nghut lhê.

Yesuq Lé, Petruq (Simun) He-ngik Pyâm Râ Hkyô

Mht 26:31-35; Mrk 14:27-31; Yhn 13:36-38

³¹ Simun, Simun é, wú aq, sungsô cham lé shaí é su, nungmoq lé wó shaí shoq ga, Tsadán wá gi, ahkáng dung bê. ³² Nghut kôlhang, náng é lumjíng myit a hten sháng gaq nghu, Ngò, náng é matú kyûdung byi bê; náng dum lhing bún lò jáng, nung gu nung mâng pé lé wum-o lhoq ging byi aq." ga taí ri.

³³ Haú hkûn, Simun gi, "Yhumsing é, htóng wâng kôlhang, shí kôlhang, ngò gi, náng eq rahá cháng râ matú myit hpyit to bê." ga taí ri.

* **22:34** Yudaq byu pé é ra-nyí gi, myinhâng bui wang é mai, htang nyí bui wang é jé shoq nghut lhê. Shí mâ é hkû-nyí gi, nga-nhúng é matú myín âng ri.

³⁴ Yesuq gi, "Petruq ê, nang lé Ngò tai lé, hkû-nyí* lhang woq a tân shi má, nang, Ngo lé a sé ga luí sum dâm he-ngik pyám râ nghut lhê." ga tai ri.

³⁵ Hau htâng, Yesuq, yhangmoq lé tai é gi, "Ngò, nungmoq lé ngunhtung, jhtung, hkyi-tung a wùn a chûng nhang é za, nhang kat é nghut hkûn, nungmoq chyáng haí ra akô lhú?" ga myi jáng, yhangmoq gi, "Haí le a ra lo." ga tai akô.

³⁶ Haú hkûn, Yhang gi, "Ahkuí kúm gi, ngunhtung wó sù gi, yù wun sháng gaq, jhtung wó sù le, yù wùn sháng gaq, shâm a wó sù gi, bumó ung luí wui sháng gaq. ³⁷ Hkâsu mù gâ le, Ngò, nungmoq lé tai kôlé, Ngò eq séng luí Chyúmdang má kâ tô é gi, dut lò berâ nghut lhê; 'Haú yuq gi, yubak mara wó bang má nghap lhôm to bê.† ga kâ tô é dang gi, Ngá chyáng dik lò râ nghut lhê." ga luí, yhangmoq lé tai ri.

³⁸ Haú mù, lagyô pé gi, "Yhumsing ê, wú aq, shí má shâm í hkyam joq tô ri." ga tai kôjáng, Yesuq gi, "Gé bê." ga luí, yhangmoq lé tai ri.

Tsanlun Bùm Má Yesuq Kyûdûng É Hkyô
Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô. ⁴⁰ Haú jowò má jé jáng, Yhang gi, "Nungmoq, gunglaú é a hui sháng gaq, kyûdûng nyi keq." ga luí, yhangmoq lé tai to mù, ⁴¹ chángzô pé nyi é mai luqgok radú we kô gâng e ló luí, hkyihput htuq mù, ⁴² "Áwa ê, Náng ô nau é nghut le gi, góm† shí lé Ngá chyáng mai lhai pyám byi laq. Nghut kôhang, Ngò ô nau é dông a nghut, Náng ô é dông sheq nghut sháng gaq." ga kyûdûng ri. ⁴³ Haú hkûn, mauhkûng mai maumang lagyô rayuq htoq lé luí, Yhang lé i-myt nhik lé tai tîng ri. ⁴⁴ I-myt hkaú má dik shoq hkâm zo wui é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

⁴⁵ Haú mù, kyû ban dung jáng, Yhang toq luí, chángzô pé chyáng ló wú le, yhangmoq

gi, myit yón mù luí, yhup myhî to kô é lé ló myâng mù, ⁴⁶ "Haí mù yhup nyi akô lhú? Toq keq! Gunglaú é a hui sháng gaq, kyûdûng nyi keq." ga luí, yhangmoq lé tai ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Haú su ga, ru tai nyi ashî le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq râ ga huí lé lo ri. ⁴⁸ Haú mù luí, Yesuq gi, "Yudaq ê, nang gi, haú Byu Yhangzo lé bopuq puq é eq gyè pé chyáng ap pyám lhê lhú?" ga luí, yhang lé lhom myi ri.

⁴⁹ Haú hkûn, Yesuq htâng cháng bang gi, haí dut lò râ lé bún sé kô é yanmai, "Yhumsing ê, ngamoq gi, sham eq zân le, gè râ lhú?" ga myi akô. ⁵⁰ Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tù tai mù, haú yuq é nohkyap lé ê záng luí lhoq gê byi ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wui lé, "Nungmoq gi, danyaq rayuq lé chyup é su, shâm, dumbáng eq kut luí, lé lo akô lhú? ⁵³ Ngò gi, nyi wui, noqkuq yhûm má nungmoq eq rahá nyi kôhang, nungmoq Ngo lé chyup yû râ ga a hen wú kó; ahkuí gi, mauchut eq up‡ nyi bê yanmai, nungmoq é ahkyíng nghut nyi ri." ga tai ri.

Yesuq Lé, Petruq Éq He-ngik Pyám É Hkyô
Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Haú hkûn, yhangmoq gi, Yhang lé chyup yû mù she ló luí, hkyangjong mó é yhûm shut shuí wang ló akô. Petruq le we we mai châng tô ri. ⁵⁵ Ahkuí, yhangmoq gi, wàng hkaú má myi mut yû luí zung tô bum é hkûn, Petruq le yhangmoq é ahkaú má bo tô ri. ⁵⁶ Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí,

✠ 22:37 Esai 53:12 † 22:42 góm gâ é gi, Yesuq jamjau hui râ hkyô eq shî râ hkyô lé, tai nau é nghut lhê. ‡ 22:53 Mauchut eq up gâ é gi, Tsadán eq up é lé gâ ri.

"Shí yuq le Yesuq eq rahá nyi sù nghut ri." ga taí ri.

⁵⁷ Haú hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

⁵⁸ Hau htâng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo nyi sù nghut ri." ga taí kat jáng, Petruq gi, "Byù hpó ê, ngò a nghut." ga tú taí ri.

⁵⁹ Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gà le, yhang gi, Galile byù le nghut ri." ga zuq zuq taí ri.

⁶⁰ Petruq gi, "Byù hpó ê, nàng taí nyi é hkyô lé, ngò a sé." ga tú taí ri. Haú su ga ru taí nyi ashí le, woq tân bê nghut ri. ⁶¹ Haú hkûn, Yesuq gi, lhíng luí, Petruq lé wú kat ri. Haú mù, Petruq gi, "Hkû-nyí lháng, woq a tân shi má, nàng Ngo lé sum dâm he pyám râ nghut lhê." ga luí, Yhumsíng yhang lé taí é dang lé bún kat ri. ⁶² Haú mù, yhang gi, shinggan shut htoq ê luí, gyai yhang ê ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yhang lé rhoi luí nghap myíng nghap htê mu nyi akô.

⁶⁴ Yhangmoq gi, Yhâng é myoqdong nghop pyám byi luí, "Nang lé bat sù gi, ó yuq nghut ri lhú? Myiqhtoi htoí wú aq." ga myí akô.

⁶⁵ Yhangmoq gi, Yhang lé nyhap é dang ajung jung đông taí rhoi nyi akô.

Suwún Wui É Hí Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, ming-byû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí ê mù, ⁶⁷ "Nàng Hkrisduq nghut é têng le gi, ngamoq lé taí kyo laq." gâ akô.

Yesuq gi, "Ngò gi, Hkrisduq nghut lhê nghu taí kôlhang, nungmoq jing kó râ a nghut. ⁶⁸ Ngò, nungmoq lé myi kôlhang, nungmoq gi, tú taí kó râ a nghut. ⁶⁹ Nghut kôlhang, ahkuí mai haú Byu Yhangzo gi, a-tsam bo dik é Garai Gasâng é loqyô hkyam má wó zung nyi berâ nghut lhê." ga luí, yhangmoq lé taí ri.

⁷⁰ Haú hkûn, yhangmoq banshoq bang gi, "Haú nghut le gi, Nàng, Garai Gasâng é Yhangzo nghut lhê lhú?" ga myí akô.

Yesuq gi, "Nungmoq taí é eq rajung za Ngò nghut lhê." ga luí, yhangmoq lé tú taí ri.

⁷¹ Haú hkûn, yhangmoq gi, "Nga-nhúng hai jung saksé wá râ nyi ashí lhú? Yhâng é nhut mai yhang, taí htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zíng tô é bang banshoq gi, htoq mù, Yesuq lé mauzau Pilat chyáng shuí wang ê luí, ² "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkúm to luí, Yhânggùng yhang gi, haú Hkrisduq nghu é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pé é hkohkâm nghut lhê lhú?" ga myí jáng, Yesuq gi, "Nàng taí é eq rajung za nghut lhê." ga tú taí ri.

⁴ Pilat gi, "Shí yuq lé hún râ mara ngò a myàng." ga luí, hkyangjong agyi pé eq shiwa byu pé lé taí ri.

⁵ Nghut kôlhang, haú bang gi, "Shí yuq gi, Yuda mau gón má yhang mhoqshit é đông mai, mingbyû wui é i-myt lé shuí gabyông ri. Haú gi, Galile mau mai ahkuí shi má jé shoq nghut bê nghut ri." ga zuq zuq taí bum akô.

⁶ Pilat gi, haú su ga kô é lé wó gyo jáng, Yesuq Galile byù nghut é, a nghut é hkyô lé myí wú ri. ⁷ Yesuq gi, Herut up é mau mâ é byù nghut é lé Pilat sé jáng, haú u lé Yerusalem wà mó má nyi tô é Herut chyáng, é dé kat nhang ri.

⁸ Herut gi, Yesuq lé myàng jáng, gyai yhang gabú pyâm ri. Hkâsu mù gà le, Yhâng é hkyô lé wó gyô wú mù, Yhang laklaí kumlhá ralhú lhum kut shit râ lé, wó myàng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri. ⁹ Haú mù, yhang gi, Yesuq lé dangmyi myo myô eq myí wú

kôlháng, Yesuq gi, dang rahkun lháng a tû taí byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoi jihkyoî kut mù, atam é dông taí hpoî kô luí, réng é mebu hut byi mù, Pilat chyáng dum taú dé nhang kat akô. ¹² Haú nyí jáng, hí hpyang gyè dut lhùm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqđân É Hkyô

Mht 27:15-26; Mrk 15:6-15; Yhn 18:39-19:16

¹³ Haú hkûn, Pilat gi, hkyangjong agyi pé eq zau suwún wuî, mingbyû wuî lé wut tsíng to mù, ¹⁴ "Shí yuq gi, mingbyû wuî lé hkyô shuí ngoq ri ga, Yhang lé nungmoq ngá chyáng shuí lé lô bekô. Ahkuî, wú keq, nungmoq é hí má, Yhang lé ngò myî wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a myàng mù, shí yuq lé nganhung chyáng dum dé kat byi bê nghut ri; haú mù luí, wú keq, shí yuq gi, shí gíng é mara haí le a kut shut nghut ri. ¹⁶ Haú mù, ngò, Yhang lé dam byi luí, nhang pyám râ." ga luí, yhangmoq lé taí ri.

¹⁷ Nghut kôlháng, Lhoqlhai Poî hkangmó má, Pilat gi, mingbyû wuî lé htongbyû rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chôm wut garu bum akô. ¹⁹ Barabaq gi, wà htum má gumlau kut é eq byù sat é yanmai, htóng gyó nyî sù nghut ri.

²⁰ Pilat gi, Yesuq lé nhang pyám nau é nghut mù luí, yhangmoq lé dum puq taí ri.

²¹ Nghut kôlháng, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut taí garû nyi bum akô.

²² Haú mù luí, sum dâm nghû râ hkûn, Pilat dum taí é gi, "Haí mù luí lhú? Yhang gi, hai mara kut shut bê lhú? Yhang má shí gíng é mara lé ngò a myàng, haú mù, ngò, Yhang lé bat, nhuq, mhoqshit luí, nhang pyám râ." ga luí, yhangmoq lé taí ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai,

wó taí ung yù bekô nghut ri. ²⁴ Haú mù luí, Pilat gi, yhangmoq dúng é eq rajung za myit hpyit doqđan byí ri. ²⁵ Haú su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyî sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-

²⁶ Yhangmoq gi, Yesuq lé shuí htoq ló kô é hkûn, yosô wà mai lô é, Kuruni myuq byû nghut é Simun ga sù lé, chyup yû mù, tapzîng waq nhâng luí, Yesuq htâng má cháng nhang akô. ²⁷ Byù rajùm rayô gi, Yhang htâng má châng e ló bum akô. Yhang é yanmai ngaubyi ngàu nhap eq iyon yôn é myiwe zo wuî le haú má bo tô ri. ²⁸ Yesuq gi, yhangmoq shut lhîng wú luí, "Yerusalem byizo wuî ê, Ngá é yanmai hkânghau nyi kó, nungmoq gi, yhumsing gùng eq yhumsing é zo dù wuî é matú sheq ngau nyi keq. ²⁹ Hkâsu mù gâ le, 'Zogûng a dut wú é eq naú a huq wú é baùdung myhí pé gi, hkungsô wó nyi ri.' ga luí, taí é buinyi gi, jé lô râ nghut lhê. ³⁰ Haú buinyi má, byu pé gi, bùm pé lé,

'Ngamoq ahtoq má byoq nhé aq!'

ga luí le, kong pé lé,

'Ngamoq ahtoq má nghop aq!'

ga luí le, wut taí bùm bekô râ nghut lhê.

³¹ Byu pé gi, siggâm jûm tô ashí le isu kut kô é nghut le gi, màn jáng gi, hkâsu wá dut lò râ lhú?" ga taí ri.

³² Haú hkûn, damyaq í yuq lé le, sat pyám râ ga, Yesuq eq rahá shuí htoq ló akô.

³³ Ahkuî, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luí tapzîng má jén tap tô akô. ³⁴ Haú hkûn,

Yesuq gi, "Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lháng, hkyîn shosé she é dông gam yu pyám byi akô.

³⁵ Mingbyû wuî gi, yap to mù tu wú nyi akô. Zau suwún wuî Yhang lé nyhap é gi,

"Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

³⁶ Gyezô pé le, huí ê mù, rhoi nyaú nyaú akô. Yhangmoq gi, chyin wing lé yhun byi kôluí, ³⁷ "Nàng gi, Yudaq byu pé é hkohkâm nghut é nghut le gi, Náng gùng yhang nàng, hkyi yu wú aq." ga Yhang lé tai akô.

³⁸ Yhâng é ulhum ahtoq má le, (Grik đông le, Latin đông le, Hebre đông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

³⁹ Tapzîng htoq má bat tap lhang to huí é damyaq rayuq gi, "Nàng gi, Hkrisduq nghut lhê, a nghut lhu? Haú Náng gùng nàng le, ngá-nhik lé le, hkyi yu aq." ga luí, Yhang lé rhoi ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luí nhing, Garai Gasang lé a gyuq lhu? ⁴¹ Nga-nhik gi, yhumsing kut shut é mara eq rajung za, jéyang hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

⁴² Hau htang, yhang Yesuq lé tai é gi, "Yesuq ê, Nàng, Náng é mingdán má jé lô jang, ngo lé myit bun laq ô." gâ ri.

⁴³ Haú hkûn, Yesuq gi, "Ngò, nang lé teng za tai lé, hkû-nyí yhang nàng Ngò eq rahá hparadisu* má nyi rá nghut lhê." ga luí, yhang lé tú tai kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

⁴⁴ Haú ahkying gi, nyi káng raxe í hkying nghut luí, myinhtang sum hkying jé shoq ramau gón mauchut tuq dut byuq bê nghut ri;† ⁴⁵ hkâsu mù gâ le, builoq shum byuq é yanmai nghut ri. Noqkuq yhúm má é pângyang le, í hkyam byáng dut byuq bê nghut ri. ⁴⁶ Haú hkûn, Yesuq gi, "Áwa ê, Ngò, Ngá é woi-nyí náng é loq má ap byí lhê." ga htê mó eq garú kat ri. Haú su ga ban tai eq, Yhang káng byit bê nghut ri.

⁴⁷ Shô up gyezau hpó gi, haú su dut é lé myàng jang, "Shí yuq gi, gè gè yhang,

dingmán sù nghut ri." ga luí, Garai Gasang lé hkya-on kungton ri. ⁴⁸ Haú hkyô lé wú rá ga, lé zing tô é byù lhunglhang bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú lô byuq bekô. ⁴⁹ Nghut kôlhang, Yhang lé sê é bang eq Galile mau mai Yhang htang châng é myiwe wui gi, we we má yap to mù, haú hkyô pé lé byu wú nyi akô.

Yesuq É Màng Lé Lup Hkaú Má Kat É Hkyô

Mht 27:57-61; Mrk 15:42-47; Yhn 19:38-42

⁵⁰ Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasang é mingdán jé rá hkyô lé myit myoqbyu to sù le, nghut mù luí, ⁵¹ yhang gi, Yudaq uphâng hpúng má é rayuq nghut kôlhang, hpýé lhúm é hkyô má le, zui sai é hkyô má le, myit a bo huí lom é sù nghut ri. ⁵² Yhang gi, Pilat chyáng wàng luí, Yesuq é gungsôm lé dúng yu ri. ⁵³ Haú mù, gungsôm haú lé tapzîng mai hkyut hkyô yù luí, pán yung eq htup yup mù, ó lé lhang a kat wú shí é, luqgok lé kyung tô é luqgok lup hkaú má kat tô ri. ⁵⁴ Haú nyi gi, Hên Lajang Buinyi nghut luí, Bánno buinyi jé rá za nghut bê.

⁵⁵ Galile mau mai Yesuq eq rahá htoq lé lo é myiwe zo wui le, Yosep htang má châng é luí, lup haú lé le, Yesuq é gungsôm lé le, hkâsu kut tô tô é lé, é myang akô. ⁵⁶ Hau htang, yhangmoq gi, yhúm shut taú lò mù, Yesuq é gùng sôm lé but byi rá matú, namngón é jung eq mura xú lé hen tô akô. Bánno buinyi má kúm gi, tarâ joq é eq rajung za, yhangmoq yuban bân nyi bum akô nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyi htang napsùn noq le, myiwe wui gi, yhangmoq hen tô é namngón jung pé lé yu chùng mù, lup shut e lô akô. ² Yhangmoq gi, lup má é luqhkum lêng

* **23:43** Hparadisu nghu é gi, mauhkung mingdán lé tai ri. † **23:44** Nga-nhung é nyi káng raxe í hkying gi, Yudaq byu pé é napkyó hkyuq hkying nghut lhê; yhangmoq é gau hkying gi, nga-nhung é myinhtang sum hkying nghut bê.

bóng to lánq é lé, ê myàng kômù, ³ wang e wú kô le, haú Yhumsîng Yesuq é gungsôm lé, a myàng lo kó nghut ri. ⁴ Yhangmoq maú úng-âng nyi bùm kô é hkûn, radá dâm maulhap su duqbo é mebu wut é byù í yuq, yhangmoq é nàm má yap tô akô. ⁵ Haú mù, myiwe haú bang gi, gyuq dan bum kôluí, myigùng shut myoqdong ngóm gop tô bum é u lé, haú nhik gi, "Nungmoq gi, dui sù lé, shi to bâng chyáng haí mù ho nyi akô lúhú? ⁶ Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashí hkûn lé, ⁷ 'Haú Byu Yhangzo gi, yubak dap bâng é loq má ap pyâm é hui luí, tapzîng má jén sat to huí é htâng, sum nyí nghú é buinyi má lhoq dui toq yu é hui rá nghut lhê.' ga luí, yhangmoq lé taí tô é dang lé myit bun keq." ga luí, yhangmoq lé taí ri. ⁸ Haú hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taú lò mù, lagyo raxe rayuq eq gotú lhunglhang bang lé, haú hkyô banshoq lo taí kyô akô. ¹⁰ Lagyo pé lé lo taí kyo bang gi, Magadalaq wà má é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akô. ¹¹ Lagyo pé kúm gi, yhangmoq é dang lé dangsôm su ngam pyám kôluí, a jîng byi kó nghut ri. ¹² Nghut kôlhang, Petruq gi, toq luí lup má din jé è mù ngóm wú kat le, mâng htup é pán leq tô é lé za myàng mù luí, haú su dut é hkyô lé maú é eq, yhùm shut dum taú lò byuq bê nghut ri.

*Chángzo Í Yuq Lé Yesuq Htoq Shit É Hkyô
Mrk 16:12-13*

¹³ Haú ra-nyí má za, Yesuq é chángzô pé má é í yuq gi, Yerusalem wà mó mai nyhit déng kô wê é Ema-u gâ é wà shut e ló akô. ¹⁴ Yhangnhik gi, dut laí ló é hkyô pé banshoq lé, rayuq eq rayuq taí lhùm nyi akô. ¹⁵ Yhangnhik gi, haú hkyô pé lé rayuq eq rayuq taí hpyê lhùm e ló kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. ¹⁶ Nghut kôlhang, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, "Nungnhik hkyô so uchyang taí lhùm lé lo é gi, haí jung wá nghut akô lúhú?" ga myi kat

jáng, yhangnhik gi, myoqdong shùm kut luí, hkyîng yap tô akô. ¹⁸ Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyí luí nhîng, shí gyoro lé haú wà má dut lo é hkyô pé lé, a sê é bíng gi, Nàng baú za wá nghut lhê lúhú?" ga myi kat ri.

¹⁹ Yhang gi, "Haí jung lúhú?" ga dum myí é hkûn lé, yhangnhik gi, "Nazaret wà byù Yesuq é hkyô nghut lhê; haú yuq gi, Garai Gasâng é hí má le, byù lhunglhang bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoi nghut ri. ²⁰ Nghut kôlhang, hkyangjong agyi pé eq ngamoq é zau suwún wui eq haú yuq lé sat pyám rá matú ap byí pyám kômù, yhangmoq gi, Yhang lé tapzîng má jén sat pyám bekô nghut ri. ²¹ Ngamoq kúm gi, haú yuq lé, Israelaq byù myú lé hkyi yù rá sù nghut lhê nghú luí, myit myoqbyu nyi bum lhê. Nghut kôlhang, haú su dut laí ló é gi, hkû-nyí sum nyí lhang bò bê. ²² Hau htoq agó, hkû-nap noq le, lup má ê wú é, ngamoq hpúng mâ é myiwe wui ra-am gi, ngamoq lé, lo lhoq maú akô. ²³ Yhangmoq gi, Yesuq é gungsôm lé a myàng jáng dum taú lò mù, 'Haú Yhumsîng dui nyi ri.' ga luí, taí kyô é maumang lagyo htoq shit é shing-rán lé, myang é hkyô lé lo taí kyô akô. ²⁴ Haú mù, ngamoq é luzúm wui ra-am gi, lup má é wú kô le, myiwe wui taí é eq rajung za, dut to lánq é lé ê myàng akô. Nghut kôlhang, haú yuq lé gi, yhangmoq a myàng kó gâ." ga luí, Yhang lé taí kyô akô.

²⁵ Haú hkûn, Yhang gi, "Myiqhtoí pé taí é dang banshoq lé lumjîng rá matú, hpaqchyí a bo é eq ngha é sù nhik ê, ²⁶ Hkrisduq gi, haú su é wuihke jamjau hkâm zô yu é htâng má sheq, Yhâng é hpungwup shingkang má wó wang nyi to rá, a nghut kó lúhú?" ga luí, yhangnhik lé myí ri. ²⁷ Yhang gi, yhangnhik lé, Mosheq kâ tô é eq myiqhtoí pé banshoq bang kâ tô é Chyúmdang pé mai, Yhang má âng é dang banshoq é lichyúm lé, taí hpông kyô ri.

²⁸ Ahkuí, yhangmoq, haú nhik e ló é wà má chyâng lò kôjáng, Yesuq gi, laí ló rá su kut ri. ²⁹ Haú hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyum bê mù, mau le chut lô bê nghut

ri." ga luî, Yhang lé wum kat chôm lung nyi akô. Haû mù luî, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo râ ga, yhangnhik eq rahá zung tô é hkûn, muk lé yù luî, jeju hkya-on mù, myhik hpé luî, yhangnhik lé gàm byî ri. ³¹ Haû hkûn, yhangnhik é myoq bóng lô luî, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haû mù, yhangnhik gi, "Yhang gi, hkyô má ngá-nhik eq dang nyo lhûm é eq Chyúmdang é lichyúm taî hpóng shit é hkûn, ngá-nhik gi, i-myt unghkaû má, achiyí aku dut bê a nghut lhú?" ga luî, yhangnhik yhangchang taî lhûm akô.

³³ Yhangnhik gi, toq mù, radá dâm Yerusalem wà mó shut dum taû lô kô le, lagyo raxe rayuq eq, yhangmoq eq rahá nyi é bang zup míng to kô é lé lô myang akô. ³⁴ Haû bang gi, "Haû Yhumsîng gi, teng za yhang dum dui toq lô bê; Simun lé lhang htoq shit bê nghut ri." ga taî lhûm nyi bum akô. ³⁵ Haû hkûn, yhangnhik gi, hkyô má dut laî lô é hkyô pé eq, muk hpé é hkûn má Yesuq lé bûn sé kat é hkyô lé, taî kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haû hkyô lé chôm taî nyi tô bum ashî le, Yesuq gi, Yhang gûng yhang, yhangmoq é agùng má yap to luî, "Nungmoq nguingón yuqyo nyi sháng gaq." ga luî, yhangmoq lé taî ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haû mù luî, Yhang gi, "Nungmoq gi, haî mù dan nyi bum akô lhú? Haî mù nungmoq é i-myt unghkaû má úng-âng nyi bum akô lhú? ³⁹ Ngá é loq eq Ngá é hkyí lé wú wú keq. Ngò yhang nghut nyi lhé. Ngo lé sop wú keq. Sobyô nghû é gi, ngo lé nungmoq myang é su, sho eq showui showang bo é a nghut." ga luî, yhangmoq lé taî kyô ri.

⁴⁰ Yhang gi, haû su ga taí mù, Yhâng é hkyí loq lé tûn shit ri. ⁴¹ Yhangmoq gi, gabú

é eq maú nyi bùm kômù, a wó jíng shi dut tô é hkûn lé, Yesuq gi, "Nungmoq shí má zôhpo rajung jung wó akô lhú?" ga luî, yhangmoq lé myi kat ri. ⁴² Haû hkûn, yhangmoq gi, nyhîn nyhoq tô é ngozo rahtung lé, byî akô. ⁴³ Yhang gi, haû lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taî é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luî kâ to má kâ to banshoq gi, dik râ chyat nghut lhé nghû luî, nungmoq eq rahá nyi to ashî hkûn lé, Ngò, nungmoq lé taî kyô tô é pé gi, shî nghut bê." ga taî ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myt hkum hpóng byî ri. ⁴⁶ Haû mù, Yhang gi, "Hkrisduq gi, wuîhke jamjau hui zo mù, sum nyí nghû râ buinyi má, shi é mai dum dui toq lô râ hkyô lé le, ⁴⁷ Yerusalem wà mó mai hî luî, byù myû chângiup lé, Yhâng é myìng lé lang luî yubak mara hkyut pyâm byi râ hkyô eq myit lîng râ hkyô lé le, hko kyo râ hkyô lé, kâ to bê nghut ri. ⁴⁸ Nungmoq gi, shí pé é saksé pé nghut nyi akô. ⁴⁹ Ngá Wa byî tô é danggidiq* lé, Ngò, nungmoq é ahtoq má nhang kat râ nghut lhé; nungmoq kúm gi, htoq tsáng myhâng mâ é wum-o a-tsam wó yu é buinyi jé shoq, Yerusalem wà mó má láng nyi keq." ga luî, yhangmoq lé taî ri.

Yesuq Mauhkûng Shut Shuî Toq Yu Huî É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuî htoq é mù, Yhâng é loq tu toq luî, shimân byî ri. ⁵¹ Haû su kut shimân byî nyi ashî le, Yhang gi, yhangmoq chyáng mai gâng lô byuq luî, mauhkûng shut shuî toq yu é hui bê nghut ri. ⁵² Yhangmoq kúm gi, Yhang lé noqkuq kômù luî, gyai gabú é myit èq Yerusalem wà mó shut dum taû lô akô. ⁵³ Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

* **24:49** Ngá Wá byi tô é danggidiq nghu é gi, Chyoiyúng é Woi-nyí lé taî ri.

YOHAN é Gabú Danglù Laiká (The Gospel of John)

Haù Mungdang, Xângzo Byù Gùng Lé Dut É Hkyô

¹ A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri. ² Yhang gi, a-nham sâng-hi má, Garai Gasang eq rahá nghut nyi ri.

³ Nyi mi-nyì, joq mijoq gi, Yhang đông mai hpan tô é chyat nghut lhê; Yhang đông mai a hpan é gi, haì lhang a joq nghut ri.

⁴ Asak chyungxe gi, Yhang má nghut lhê mù, asak haù gi, byu pê é matú maubó nghut ri. ⁵ Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri. ⁶ Garai Gasang mai nhang kat é, Yohan gâ é byù rayuq jé lé ri.

⁷ Yhang gi, maubó haù eq sêng é hkyô lé, saksé hkâm byì luí, yhang é yanmai byù lhunglhang bang wó lumjìng kó sháng gaq ga, saksé rayuq đông jé lé é sù nghut ri.

⁸ Yhang gi, haù maubó a nghut; maubó haù lé saksé hkâm byì râ matú za sheq jé lé é ru nghut lhê. ⁹ Byù yuq jup lé duqbó byì é, maubó akying haù gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhang, mingkan haù gi, Yhang lé a wú sé nghut ri. ¹¹ Yhang gi, yhumsing mau má jé lé kôlhang, Yhang é amyù pé gi, Yhang lé a lhom hap yù kó nghut ri. ¹² Nghut kôlhang, Yhang gi, Yhang lé lhom hap yù luí, Yhang é mying lé lumjìng é bang lhunglhang lé, Garai Gasang é yhangzô pé dut râ ahkáng byì bê nghut ri. ¹³ Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴ Haù Mungdang gi, xângzo byù gùng lé dut luí, ngamoq chyáng nyì wú bê nghut lhê. Ngamoq gi, haù jeju eq tengmán hkyô bying tô é, Yhang é hpungwup shingkang lé myang wú bê nghut lhê; haù gi, haù Íwâ é zote rayuq đông, Yhang wó yu é hpungwup shingkang nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkâm é hkùn, garù taí é gi, "'Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghù, ngò taí é sù gi, shí yuq nghut bê." gâ ri. ¹⁶ Yhang é gumjup é jeju ahkaù mai, nga-nhung banshoq bang gi, shimân jeju lé ralhùm htoq ralhùm myang yu nyì bê nghut lhê. ¹⁷ Hkâsu mù gâ lé, haù jep é tarâ gi, Mosheq é loq đông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. ¹⁸ Garai Gasang lé, ó yuq eq le a myang wú wú é nghut lhê; nghut kôlhang, haù Íwâ é tanghkoí má lúng tô é, Yhang Zo zote gi, Garai Gasang é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô Mht 3:1-12; Mrk 1:1-8; Luk 3:15-17

¹⁹ Yerusalem và mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkùn, Yohan saksé hkâm é gi, a-ô mâ é hkyô pé nghut ri. ²⁰ Yhang gi, a hê a zaú tô e za, "Ngò gi, Hkrisduq* a nghut." ga lhom taí kyô ri.

²¹ Haù hkùn, yhangmoq gi, "Haù nghut jáng, nàng gi, ó yuq nghut lhê lú? Nàng gi, Eliyaq lú?" ga myì kôjáng, yhang gi, "A nghut." ga taí ri; "Nàng gi, haù Myiqhtoi nghut lhê lú?" ga dum myì kôjáng, yhang gi, "A nghut." ga tũ taí ri.

²² Haù mù, yhangmoq gi, "Ngamoq lé nhang kat bâng chyáng ló wó taí kyo râ matú, nàng gi, ó yuq nghut lhê lú? Náng gùng lé nàng hkâsu nghù lhê lú? Taí kyô wú laq." ga dum myì akô.

²³ Haù hkùn, Yohan gi, myiqhtoi Esai-aq é dang eq rajung za, "Ngò gi, haù yoso má, 'Yhumsing é matú hkyô lhoq nyhang to

* **1:20** Grik dong Hkrisduq gâ é gi, xù but hui Sù gâ é lichyùm nghut mù, Hebre dong "Mesai" gâ é eq rajung za nghut lhê. ☆ **1:23** Esai 40:3

keq.' gâ é htê lé, garû taî é sù nghut lhê."☆
ga tû taî ri.

24 Hparishe pé mai nhang kat é bang ram gi, yhang lé, 25 "Nàng gi, haû Hkrisduq le a nghut, Eliyaq le a nghut, Myiqhtoi le a nghut é nhîng, haî mù luî, wui-myhup hkâm byi nyi lhê lhú?" ga dangmyi myî akô.

26 Haû hkûn, Yohan tû taî é gi, "Ngò gi, wui èq za wui-myhup hkâm byi lhê; nghut kôlhang, nungmoq a sê é sù rayuq nungmoq chyáng yap tô ri. 27 Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpyî râ lhang a gingdán é nghut ri." gâ ri.

28 Shí pé banshoq gi, Yohan wui-myhup hkâm byi nyi é, Yodan làng hé hpoq mâ é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

29 Hau htang nyí, Yohan gi, yhâng chyáng Yesuq lé lo nyi é lé myàng luî, taî é gi, "Míngkan byu pé é yubak mara lé yu pyám byî é Garai Gasâng é Sauzo lé, wú keq! 30 Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghû, ngò taî é sù yhang nghut bê. 31 Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghû, ngò lé jé mù, wui èq wui-myhup hkâm byi nyi é nghut lhê." gâ ri.

32 Hau htâng, Yohan saksé hkâm é gi, "Haû Woi-nyí gi, mauhkûng mai hpûngkyui gunghkyâng sù é dông mai gyó lé mù, Yhâng chyáng lé nô tô é lé, ngò myàng ri. 33 Ngò gi, Yhang ó yuq nghut é lé a sê é nghut kôlhang, wui èq wui-myhup hkâm byi râ matú, ngo lé nhang kat é Sù, ngo lé taî kyô é gi, 'Haû Woi-nyí gyó lé lô mù, ó yuq chyáng lé nô tô é lé, nàng myàng jáng, haû yuq gi, haû Chyoiyúng Woi-nyí má wui-myhup hkâm byi râ sù nghut lhê.' gâ ri. 34 Haû eq rajung za ngò myàng bê nghut luî, shí yuq gi, Garai Gasâng é Yhangzo nghut lhê nghû, ngò saksé hkâm lhê." gâ ri.

Sâng-hi Lhê É Chángzô Pé

† 1:39 Raxê hkyíng gi, myinhâng myi hkyíng záng ri. "Petruq" gâ é lichyúm gi, luqgok gâ é nghut lhê.

35 Hau htang nyí, Yohan gi, yhâng é chángzo í yuq eq rahá, haû má dum nyi tô akô. 36 Haû hkûn, yhang gi, Yesuq lai lô nyi é lé myang kat jáng, "Hê, Garai Gasâng é sauzo lé, wú keq!" ga taî kat ri.

37 Chángzo haû í yuq gi, yhang haû su gâ é lé wó gyo kôjáng, Yesuq é htâng cháng bekô nghut ri. 38 Yesuq gi, lhing wú kat le, yhangnhik châng tô é lé myàng luî, "Nungnhik haî o akô lhú?" ga myi jáng, yhangnhik gi, "Rabai ê, Nàng hkâmá nyi lhê lhú?" ga taû myî kat akô nghut ri. (Rabai gâ é gi, Sará gâ é lichyúm nghut lhê.)

39 Haû hkûn, Yhang gi, "Lé keq, haû jáng, nungnhik myàng kó râ nghut lhê." ga tû taî ri.

(Haû-u gi, raxê hkyíng† kô nghut ri.) Haû mù luî, yhangnhik gi, châng é mù, Yhang hkâmá nyi é lé, ê myàng kôluî, haû nyi buigyùm shoq, Yhang eq rahá é nyi nyi akô nghut ri.

40 Yohan taî é dang lé wó gyo luî, Yesuq htâng châng é su nhik mâ é rayuq gi, Simun Petruq é yhanggu Andre nghut ri. 41 Andre gi, yhangmang Simun lé hí myàng luî, "Nganhik gi, Mesaia lé myàng bê." ga yhang lé taî kyô ri. (Mesaia gâ é lichyúm gi, Hkrisduq gâ é nghut lhê.) 42 Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa‡ gâ é myíng lé, nàng wó yú râ nghut lhê." ga taî ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

43 Hau htang nyí, Yesuq gi, Galile mau shut ê râ matú, myit hpyit yú bê nghut ri. Yhang gi, Hpilip lé myàng jáng, "Ngá htâng cháng aq." ga taî ri.

44 Hpilip gi, Andre eq Petruq nhik nyi é Bet-saida wà mó má é byù nghut ri.

45 Yhang gi, Nahtanelaq lé myàng jáng, "Mosheq mai tarâ laiká má kê tô é eq myiqhtoi pé mai le lhoq ang luî kê tô é sù, Yosep é yhangzo, Nazaret wà byù Yesuq lé, ngamoq myàng bê." ga yhang lé taî kyô ri.

‡ 1:42 Aramaik dang dông Kehpa gâ é eq Grik dang dông

⁴⁶ Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lhê lhú?" ga myi jáng, Hpilip gi, "Ru lé wú aq." ga yhang lé taí ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akýing rayuq nghut ri." ga taí ri.

⁴⁸ Haú hkûn, Nahtanelaq gi, "Nàng, ngo lé hkâsu kut sê é lhú?" ga myi jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashî hkûn, Ngò, nang lé myàng bê nghut lhê." ga tû taí ri.

⁴⁹ Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkôhkâm le nghut ri." ga taí ri.

⁵⁰ Haú hkûn, Yesuq gi, "Ngò, nang lé, maihpáng gâm ô má myang é nghú taí kyô é yanmai, nàng lumjúng lhê a nghut lhú? Hau htoq je kô é muzó pé lé, nàng myàng râ nghut lhê." ga taí ri. ⁵¹ Hau htâng, Yesuq xoq taí é gi, "Ngò, nungmoq lé teng za taí kôlé, mauhkúng bóng lô luí, haú Byu Yhangzô ahtoq má, Garai Gasâng é mau-mang lagyô pé doq lô gyó lô kut nyi kô é lé, nungmoq myàng kó râ nghut lhê." gâ ri.

2

Wuì Lé Tsibiyiq Wing Dut Nhang É Hkyô

¹ Hau htâng, í nyí nghú râ nyí má, Galile mau mâ é Hkanaq wà mó má, myiháng poí ralhum joq ri. Haú má Yesuq é yhângnu le, bo lom ri. ² Yesuq eq Yhâng é chángzô pé lé le, myiháng poí haú má ji akô nghut ri. ³ Tsibiyiq wing jaú tûm to kô é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé taí ri.

⁴ Haú hkûn, Yesuq gi, "Ânu ê,* haú, nàng gi, Ngò eq haí sêng lhê lhú? Ngá é ahkýing a jé shi é nghut lhê." ga tû taí ri.

⁵ Nghut kôlhang, Yhâng nu gi, haú dui-nhâng zoshâng wuì lé, "Yhang haí taí le, haí kut keq." ga taí ri.

⁶ Haú nàm má, í sum xê galan kô wang é luqgok wúng hkyuq cham joq tô ri; haú

gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

⁸ Hau htâng, Yhang gi, yhangmoq lé, "Ahkuí, ratsuí hkû yù mù, poí-up lé yu ló byi keq." ga taí jáng, yhangmoq gi, yu ló byi akô nghut ri.

⁹ Poí-up hpó gi, wuì mai dut é tsibiyiq wing haú lé, shuq chyam wú ri; wuì hkam é dui-nhâng zoshâng wuì gi, tsibiyiq wing haú hkâmai lo é hkyô lé sê to kôlhang, yhang gi, a sé nghut ri. Haú mù, yhang gi, lusik lé, ji yù luí, ¹⁰ "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga taí ri.

¹¹ Galile mau mâ é Hkanaq wà mó má, Yesuq tûn shit é limik kumhá gi, Yhang kut é limik kumhá pé mâ é sâng-hi dàm nghut ri. Yhang gi, Yhâng é hpungwup shingkang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjúng bum akô nghut ri.

Noqkuq Yhûm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó lô ri; yhangmoq gi, haú má buinyi myi ngò nyi akô nghut ri.

¹³ Yudaq byu pé é Lhoqlhai Poí jé râ nghut é hkûn, Yesuq gi, Yerusalem wà mó má doq lô ri. ¹⁴ Haú hkûn, noqkuq yhûm wàng má, nojúng, sau, hpúngkyui pé lé ûng nyi é bang lé le, siboí má ngùn htaí zô zung nyi é bang lé le, Yhang ló myàng ri. ¹⁵ Haú mù, Yhang gi, tui lé, nhuq râ wase saí yù mù, banshoq bang lé le, sau eq nojúng lé le, haú noqkuq yhûm wàng mai hkat htoq luí, ngùn htaí zo bâng é ngùn htingchap lé gi, tû hut pyám byi mù, yhangmoq é siboí lé gi,

* **2:4** Ânu ê gâ é lé, Grik dông gi, "Myiwe myhí ê" ga bo tô é nghut lhê.

tu mhuq pyám byî ri; ¹⁶ haû hpûngkyui ung zô é bang lé le, "Zè shi pé lé yu htoq ló keq! Ngá Wâ é yhûm lé, hpugá jowò hkâkut kó!" ga luí nhik-yô ri.

¹⁷ Haû mù, Yhâng é chángzô pé gi, "Ngò, Náng é yhûm lé chyitdap kâng tuí é hkyô gi, Ngo lé myi su nyhê jôm pyám râ nghut lhê."* ga kê tô é lé, myit bûn kat akô nghut ri.

¹⁸ Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tân shit râ matú, ngamoq lé, haí jung limik kumlhá wó tân shit râ lhú?" ga chôm myí akô nghut ri.

¹⁹ Haû hkûn, Yesuq gi, "Noqkuq yhûm shí lé nungmoq hpyoq pyám keq, sum nyí gyoro má, Ngò, haû lé dum tu shap râ nghut lhê." ga, yhangmoq lé tû taí ri.

²⁰ Haû Yudaq byu pé gi, "Noqkuq yhûm shí lé, myi xe hkyuq zân tup saí é ru nghut lhê; sum nyí gyoro má za, Nàng wó tu shap râ lhú?" ga tu myí akô nghut ri. ²¹ Nghut kôlhang, Yesuq taí é noqkuq yhûm gi, Yhâng é gùng lé lhoq ang luí taí é nghut ri. ²² Haû mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haû su ga taí é dang lé myit bun kômù, Chyúmdang lé le, Yesuq taí é dang pé lé le, lumjínng akô nghut ri.

²³ Haû Lhoqlhai Poí nghut é u lé, Yerusalem wà mó má Yesuq nyí nyí é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjínng bum akô nghut ri. ²⁴ Nghut kôlhang, Yesuq gi, byù lhunglhang bâng é myit lé sê é yanmai, yhangmoq chyáng, Yhânggùng lé a ap to nghut ri. ²⁵ Yhang gi, byu é i-myit unghkaû má haí lúng tô é lé sê é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshit É Hkyô

¹ Nikodimu gâ é Hparishe rayuq nyi ri; yhang gi, Yudaq byu pé é byìn tú wapdoq má bo é sù nghut ri. ² Yhang gi, myín lé, Yesuq chyáng lé mù, "Rabai è, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le,

Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

³ Haû hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tû taí ri.

⁴ Haû jáng, Nikodimu gi, "Ipyat kó bê é byù gi, dum hkû é hkâsu kut wó hui râ lhú? Ínû é unghkaû má dum wàng mù, dum hku é hui râ gi, gè gè yhang wó dut râ a nghut!" ga taí ri.

⁵ Haû hkûn, Yesuq gi, "Ngò, nàng lé teng za taí kyo lé, ó yuq nghut kôle, wui eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut. ⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷ Nungmoq gi, dum hku é hui râ lhê' nghû Ngò taí é dang lé, nàng hkâmaú nyí. ⁸ Haû, lai gi, yhang nau é shut ló lhê. Lai lò htê lé nàng wó gyo kôlhang, lai hkâmai lo é eq, hká shut ló é lé, nàng sé râ a nghut; haû Woi-nyí mai hku kat huí é sù, ó yuq nghut kôle, haû eq rajung za nghut lhê." ga tû taí ri.

⁹ Haû hkûn, Nikodimu gi, "Haû gi, hkâsu wó dut râ lhú?" ga myí ri.

¹⁰ Yesuq tû taí é gi, "Nàng gi, Israelaq byu pé é sará rayuq nghut to luí nhing, haû hkyô pé lé a sê gyo lhú? ¹¹ Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. ¹² Ngò gi, nungmoq lé, mingkan eq sêng é hkyô lé taí kyô le lhang, a lumjínng kô é nghut le gi, mauhkûng mingdán eq sêng é hkyô lé taí kyô é nghut le gi, hkâsu kut wó lumjínng kó râ lhú? ¹³ Mauhkûng mingdán mai gyó lo é sù, haû Byu Yhangzo mai lai luí, mauhkûng mingdán má ó yuq lhang wó doq ló wú é a nghut. ¹⁴ Mosheq gi, yoso má lhangmuí lé tu shap tô é su, haû Byu Yhangzo le tu shap tô é hui ra râ nghut lhê. ¹⁵ Haû mù, haû Byu Yhangzo lé lumjínng é yuq hkangmó gi, ahtum abyuq é asak wó yù râ nghut lhê.

* 2:17 Hkya-on 69:9

¹⁶ Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjǐng é sũ ó yuq nghut kôle, htên byoq é a huí e za, ahtum abyuq é asak wó yũ sháng gaq ga, rayuq za é Yhâng é Zote lé byí pyám bê nghut ri. ¹⁷ Hkâsu mù gâ le, Garai Gasang gi, mingkan lé mara byi rá matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui rá matú sheq nhang kat é ru nghut lhê. ¹⁸ Yhang lé lumjǐng é sũ gi, mara byí é hui rá a nghut; nghut kôlhang, Yhang lé a lumjǐng é sũ kúm gi, Garai Gasang é Yhangzo zote lé a lumjǐng é sũ nghut é yanmai, mara byí é huí to gù bê nghut ri. ¹⁹ Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit rá malaí, mauchut lé chyit akô nghut ri; haú gi, mara byí é hui rá hkyô yhang nghut ri. ²⁰ Agè ashop hkyô kut é sũ ó yuq nghut kôle, maubó lé a nguí nghut ri; haú yuq gi, yhang kut é hkyô lhoq byông htoq kat rá lé gyuq é yanmai, haú maubó shut lé lô rá a nghut. ²¹ Nghut kôlhang, haú tengmán hkyô đông asak dui é sũ ó yuq le, yhumsing kut é hkyô gi, Garai Gasang lom é hkyô lé, san za byu-myàng sháng gaq ga, haú maubó shut lé lo ri." gâ ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haú má rayoq zo nyi luí, wui-myhup hkâm byí ri. ²³ Haú u lé, Yohan gi, Salim nàm má é E-nun gâ é jowò má, wui gyai myo joq é yanmai, wui-myhup hkâm byí nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. ²⁴ (Haú gi, Yohan lé htóng a lhoq hkyó shí é hkun lhê é hkyô nghut ri.) ²⁵ Haú hkûn, Yohan é chángzô pé ra-am eq Yudaq byu rayuq gi, lhoq san lhoq yúng hking eq séng luí, dang htíng htíng lhúm bum akô nghut ri. ²⁶ Hau htâng, yhangmoq gi, Yohan chyáng lé luí, "Rabai ê, Yodan làng hé hpoq shut nàng eq rahá nyi luí, nàng eq saksé hkâm byí é Sũ gi, ahkuí, wui-myhup hkâm byí nyi é nghut mù, yuq hkingmó gi, Yhâng chyáng

e bum akô nghut ri mhaí." ga, yhang lé taí akô.

²⁷ Haú eq séng luí, Yohan tù taí é gi, "Byu rayuq gi, mauhkúng mai byí é za a nghut jáng, haí le wó hap yù rá a nghut. ²⁸ 'Ngò gi, Hkrisduq a nghut, Yhang é hí má nhang kat huí é sũ za nghut lhê.' nghû, ngò taí é lé, nungmoq yhang saksé nghut bum akô. ²⁹ Myisik wó é sũ gi, lusik nghut ri. Lusik lé, láng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haú sũ é gabú hkyô gi, ngá é gabú hkyô nghut mù, ngò má byíng jup nyi bê nghut ri. ³⁰ Yhang gi, kô jat lò ra rá nghut lhê; ngò gi, yom ló ra rá nghut lhê.

³¹ Ahtoq mai lé é Sũ gi, lhunglhâng é ahtoq má nghut ri; myigùng htoq má é sũ kúm gi, myigùng htoq eq séng é nghut luí, myigùng htoq eq séng é đông za taí ri; mauhkúng mai lé é Sũ gi, lhunglhâng é ahtoq má nghut ri. ³² Yhang gi, wó myàng wó gyô é hkyô lé, saksé hkâm kôlhang, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sũ kúm gi, haú Garai Gasang gi, tengmán sũ nghut ri ga, saksé shit é sũ nghut bê. ³⁴ Garai Gasang eq nhang kat é hui Sũ gi, Garai Gasang é mungdang lé taí ri; hkâsu mù gâ le, Garai Gasang gi, haú Woi-nyí lé, laké a kat e za byí é yanmai nghut ri. ³⁵ Haú Íwa gi, Zo lé chyitdap luí, jung hkingmó lé Yhâng é loq má ap byi bê nghut ri. ³⁶ Haú Zo lé lumjǐng é sũ ó yuq nghut kôle, ahtum abyuq é asak wó lhê; nghut kôlhang, haú Zo lé he-ngik pyám é sũ ó yuq nghut kôle, asak haú lé myàng rá a nghut; hkâsu mù gâ le, Garai Gasang é nhikmo-yo hkyô gi, yhâng chyáng ru joq nyi ri." gâ ri.

4

Yesuq Eq Samariq Myhí Huí É Hkyô

¹ Yesuq gi, Yohan htoq má, chángzo je lhoq myô é eq wui-myhup hkâm byí nyi ri gâ é hkyô lé, haú Hparishe pé wó gyô akô nghut ri. ² (Nghut kôlhang, gè gè ga jáng, Yesuq gi, Yhang wui-myhup hkâm byí é a nghut, Yhâng é chángzô pé sheq ru nghut akô.) ³ Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taú ló bê nghut ri.

⁴ Ahkuí, Yesuq gi, Samariq mau mai sô lai ló râ dut bê nghut ri. ⁵ Haú mù, Yhang gi, Yakup mai yhang zo Yosep lé byí é maumyí rajap eq chyâng lhûm é, Suhka ga myhîng é, Samariq mau má é wà mó ralhum má lo jé ri. ⁶ Haú má, Yakup é wuìhtung le joq to lui, Yesuq gi, hkyô sô ngu é yanmai, wuìhtung hau é nàm má zung gyó tô ri. Haú u gi, nyí-káng raxe í hkyíng* nghut bê nghut ri.

⁷ Haú hkûn, Samariq myiwe myhí rayuq wuì lé hkam ri; Yesuq gi, yhang lé, "Ngo lé wuì byi shuq laq." ga taí ri. ⁸ (Haú u gi, Yhâng é chángzô pé, zoshuq wuì râ matú wà hkaú shut e byuq kô é ahkyíng nghut ri.)

⁹ Haú Samariq myiwe myhí gi, Yhang lé, "Nàng gi, Yudaq byu rayuq nghut to lui nhîng, ngò Samariq myiwe myhí chyáng, haí mù shuq wuì dúng lhê lú?" ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kô nghut ri.)

¹⁰ Haú hkûn, Yesuq gi, yhang lé, "Nàng gi, haú Garai Gasâng é chyunghuq lé le, nang lé wuì dung sù ó yuq nghut é lé le, sê é nghut le gi, noq mai Yhang lé dúng tôngbán lui, Yhang gi, nang lé asak-wuì byi berâ nghut lhê." ga tû taí ri.

¹¹ Myiwe myhí haú gi, "Yhumsîng ê, Nàng gi, wuì hkâm râ zè haí le a wó, wuìhtung le nik ri; haú asak-wuì lé, Nàng hkâmâ é wó yû râ lú? ¹² Ngamoq é îwa Yakup gi, ngamoq lé wuìhtung shí byí to bê nghut lhê; yhang yhang le, yhang zo pé le, yhang rém é dusak pé le, wuìhtung shí mâ é wuì shuq bekô nghut ri; Nàng gi, Yakup htoq je kô lhê lú?" ga Yhang lé taí ri.

¹³ Yesuq gi, "Wuì shí lé shuq é sù ó yuq le, wuìshit é dum hui râ nghut lhê. ¹⁴ Nghut kôlhang, Ngò byí é wuì lé shuq é sù ó yuq nghut kôle, wuìshit é hkâ-nhám a hui lo râ nghut lhê. Ngò byí é wuì haú gi, haú yuq má, ahtum abyuq é asak matú wuìbúm dut râ nghut lhê." ga yhang lé tû taí ri.

¹⁵ Myiwe myhí haú gi, Yhang lé, "Yhumsîng ê, ngò gi, wuì le a shit lo, shí má wuì hkâm le a lé ra lo sháng gaq, wuì haú ngo lé byi laq." ga taí ri.

¹⁶ Haú hkûn, Yesuq gi, "Ló mù, nung làng lé ló wut lò aq." ga, yhang lé taí ri.

¹⁷ Yhang gi, "Ngò, làng a wó." ga taí jáng, Yesuq gi, yhang lé, "Nàng, làng a wó gâ é gi, têng ri. ¹⁸ Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri." ga taí ri.

¹⁹ Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê. ²⁰ Ngamoq é îchyí îwâ pé gi, bùm shí má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri." ga taí ri.

²¹ Haú hkûn, Yesuq taí é gi, "Myiwe myhí ê, Ngo lé jîng aq; bùm shí má le a nghut, Yerusalem wà mó má le a nghut e za, haú Îwa lé noqkuq râ ahkyíng, jé lò nyí bê nghut ri. ²² Nungmoq Samariq byu pé gi, yhumsîng lháng a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yû hkyô gi, Yudaq amyû mai lo é nghut lhê.† ²³ Nghut kôlhang, haú têng é dông noqkuq é bang gi, woi-nyí mai le, tengmán hkyô mai le, haú Îwa lé noqkuq râ ahkyíng gi, jé lo nyí bê nghut lui, ahkuí lháng jé to bê nghut ri; hkâsu mù gâ le, haú Îwa gi, haú su kut noqkuq é bang lé ô nau ri. ²⁴ Garai Gasang gi, woi-nyí nghut lhê; haú mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

²⁵ Myiwe myhí haú gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê." ga taí ri.

²⁶ Hau htâng, Yesuq gi, "Nàng eq dang nyo nyi é sù ngò gi, haú yuq nghut lhê." ga taí ri.

Haú Chángzô Pé Dum Taú Jé Lo É Hkûn Lhê Hkyô

²⁷ Haú u lé, Yhâng é chángzô pé gi, dum taú jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng lui, maú byuq bum akô. Nghut kôlhang, "Nàng, haí ô ri lú?" ga le, "Haí mù Yhang

* **4:6** Nyí-káng raxe í hkyíng gi, Yudaq byu pé é hkyuq hkyíng nghut ri. † **4:22** Bun zo shí má, Yesuq taí nau é gi, hkyi yû hkyô lé, Garai Gasang gi, Yudaq byu pé dông danggidiq byi to é nghut é lé taí nau é nghut ri.

eq dáng nyo nyi lê lú?" ga le, Yhang lé ó yuq a myi kó nghut ri.

²⁸ Hau htâng, myiwe myhí haû gi, yhâng é wui yambú lé tô pyâm to luî, wà shut taû wang ló mù, wà byù wui lé ló taí kyô é gi, ²⁹ "Ngò kut lai lò bê hkyô pé lhungháng lé, taí kyô é byù rayuq lé, lé wú keq! Yhang gi, Hkrisduq nghut lê abe?" gâ ri. ³⁰ Haû mù, yhangmoq gi, wà mai htoq lé luî, Yesuq chyáng lé lo bum akô nghut ri.

³¹ Haû u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akô.

³² Haû hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lê." ga tû taí ri.

³³ Haû mù, Yhâng é chángzô pé gi, "Yhang lé, rayuq yuq eq zoshuq lé dé byi é abe?" ga, rayuq eq rayuq taí lhum bum akô.

³⁴ Haû hkûn, Yesuq taí é gi, "Ngo lé nhang kat Sû ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê. ³⁵ 'Kyôshu yoq jé râ gi, lhamó myi hkyap râ ashî.' ga, nungmoq lhaq taí lê a nghut kó lú? Ngò, nungmoq lé taí kôlé, nungmoq é myoq hpóng luî, haû yò pé má wú kat wú keq! Kyôshi gi, myhíng luî, kyô shu yoq gi, jé to bê nghut ri. ³⁶ Haû kyô hkyó sù eq kyô shu sù gi, rahá wó gabú kó sháng gaq ga, ahkuî lhang, haû kyô shu sù gi, yhâng é zuihpau lé myang yù luî, ahtum abyuq é asak é matú, kyôshi shú tsíng to bê nghut ri. ³⁷ Haû su mù, 'Rayuq gi, sân hkyó, góyuq gi, shú yù.' gâ é sanghkyang gi, têng ri. ³⁸ Nungmoq a zui saí tô é jang má é shú yù râ matú, nungmoq lé Ngò nhang kat bê nghut lê. Góbang gi, haû má wum kat zui saí to bê nghut mù, nungmoq gi, haû bang zui saí é akyû lé shu yù bekô nghut ri." gâ ri.

Samariq Byù Myo Myo Lumjǐng Kô É Hkyô

³⁹ "Yhang gi, ngò kut lai lò bê hkyô lhungháng lé, taí kyô ri." ga luî, myiwe myhí haû saksé hkâm é yanmai, haû wâ má é Samariq byù myo myo gi, Yesuq lé lumjǐng bùm bekô nghut ri. ⁴⁰ Haû mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyi bo nyi bê nghut ri.

⁴¹ Yhâng é dang pê é yanmai, byù myo myo gi, lumjǐng bang dut jat lò bekô nghut ri.

⁴² Yhangmoq gi, myiwe myhí haû lé, "Ahkuî, ngamoq lumjǐng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sû nghut é lé, ngamoq sé bê nghut é yanmai nghut lê." ga chôm taí akô nghut ri.

Mingsuwún Hpó É Yhangzo Lé Lhoq Gê Byi É Hkyô

Mht 8:5-13; Luk 7:1-10

⁴³ Í nyi lai jáng, Yesuq gi, haû mai Galile mau shut htoq e ló bê nghut ri. ⁴⁴ "Myiqhtoi gi, yhumsing é mau má myoqdong a wó wú é nghut lê." ga, Yesuq yhang saksé hkâm é nghut lê. ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hku-lum yu akô; yhangmoq gi, Yerusalem wà mó má, Lhoqlhai Poî ê lóm kô é nghut é yanmai, poî u lé, Yesuq kut é hkyô lhungháng lé, myàng kô é bang nghut ri.

⁴⁶ Yesuq gi, Yhang mai haû wui lé tsibiyiq wing dut nhang é, Galile mau má é Hkanaq wà mó má, ê dum kûm ri. Haû ming suwún rayuq é yhangzo yuqzo gi, Kaperna-um wà má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haû wó gyo jáng, yhang gi, Yesuq chyáng é mù, shí-nò no nyi é yhangzo lé, lé lhoq gê byi râ matú, Yhang lé dúng tóngbán ri.

⁴⁸ Haû hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjǐng kó râ a nghut." ga taí ri.

⁴⁹ Mingsuwún haû gi, "Yhumsing ê, ngá zo a shí shimá gyó lé laq." ga taí ri.

⁵⁰ Haû hkûn, Yesuq gi, "Nàng wó ló bê; nung zo byùn râ nghut lê." ga tû taí ri.

Suwún haû gi, Yesuq taí é dang haû lé gyô jǐng luî, tau ló bê nghut ri. ⁵¹ Yhang gi, hkyô má ru nghut nyi ashî hkûn, yhâng é dui-nhâng zoshâng wui gi, yhang lé lé hui luî, zoshâng haû gè byuq é hkyô, lé taí kyô akô nghut ri. ⁵² Yhang gi, yhang zo hkâ-nhám gè byuq é ahkyíng lé myi wú é hkûn, yhangmoq gi, "A-nyí nap nyi hkyuí

rahkyíng má, gùng nyé é chám ló byuq bê nghut ri." ga taí kyô akô.

⁵³ Haú hkûn, ahkyíng haú gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haú yhângwa bûn sé bê nghut ri. Haú mù, yhang eq yhâng yhumbyù banshoq bang gi, lumjíng bekô nghut ri.

⁵⁴ Haú gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

5

Wuìhtum Yàm Má, Nòhpyo Lhoq Gê Byí É Hkyô

¹ Hau htâng a myáng má, Yudaq byu pé é poí ralhum joq é yanmai, Yesuq gi, Yerusalem wà mó má doq ló ri. ² Ahkuí, haú Yerusalem wà mó é Sau Hkúmdong nàm má, Hebre myíng dông gi, Betzahta ga myhíng é wuìhtum ralhum joq ri; hau é lnhghkyuq má, jiropp ngo lhum joq tô ri. ³ Jirop haú pé má, myoqjit bang, hkyí hten bang, gùngjum shí bang ajùm ayò leq tô bum akô. (Haú bang gi, wuì dui núm râ lé lánng tô é bang nghut akô. ⁴ Hkâsu mù gà le, haú Yhumsing é maumang lagyo gyó lé lé kut mù, wuì lé, lé lhu nhún jáng, wuìhtum haú má hí wó wang é sù gi, haí jung ana wa dap to kôlhang, ge byuq é huí é yanmai nghut ri.)* ⁵ Súm xe shit zân tup no nyi é byù rayuq le, haú má bo tô ri. ⁶ Yesuq gi, haú yuq no leq tô é lé myàng mù, haú su no nyi é gyai myáng bê nghut é hkyô lé sé jáng, yhang lé, "Nàng, gè nau ri lhú?" ga myí ri.

⁷ Nò sù haú yuq gi, "Yhumsing ê, wuì dui núm lo é hkûn, wuìhtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tũ taí ri.

⁸ Hau htâng, Yesuq gi, yhang lé, "Toq aq! Nàng é taphkang yu chùng luí, sô ló aq." ga taí ri. ⁹ Haú yuq gi, radá dâm nò ge byuq bê nghut luí, yhâng é taphkang yù mù, sô ló bê nghut ri.

Haú nyí gi, Bánno buinyi nghut ri. ¹⁰ Haú mù, Yudaq byu pé gi, haú nò ge byuq é hui sù lé, "Hkû-nyí gi, Bánno buinyi nyí nghut é

yanmai, nàng, taphkang waq é gi, tarâ lu lai bê nghut ri." ga taí akô.

¹¹ Nghut kôlhang, yhang tũ taí é gi, "Haú ngo lé lhoq gè byi sù gi, ngo lé, 'Nàng é taphkang yu chùng mù, sô ló aq.' ga taí é nghut lhê." gà ri.

¹² Haú mù, yhangmoq gi, "'Nàng é taphkang yu chùng mù sô ló aq.' ga, nang lé taí é sù gi, ó yuq wá nghut ri lhú?" ga myí akô.

¹³ Nghut kôlhang, haú ó yuq nghut é lé, nò ge byuq é hui sù gi, a châng sê kat nghut ri; hkâsu mù gà le, Yesuq gi, haú mâ é byù moq mó má wang nyó ló byuq é yanmai nghut ri.

¹⁴ Htâng má, Yesuq gi, haú yuq lé no-qkuq yhúm má myàng jáng, "Wú aq, nàng wángzán bê nghut ri; hí lhê htoq má je wuìhke é hkyô a hui zo sháng gaq, mara hkâkut shut lo." ga luí, yhang lé taí ri. ¹⁵ Haú yuq gi, htoq ló mù, yhang lé lhoq gè byí é sù gi, Yesuq nghut ri ga, Yudaq byu pé lé taí kyô ri.

Asak Wó Yú Râ Hkyô

¹⁶ Haú mù, Yudaq byu pé gi, Bánno buinyi nyí má, Yesuq, haú hkyô kut é yanmai, Yhang lé gunjang lo akô nghut ri. ¹⁷ Haú hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zuí nyi é nghut mù, Ngò le mù zuí nyi lhê." ga taí ri. ¹⁸ Haú mù luí, Yesuq gi, Bánno buinyi lé lhoq htên é htoq agó, Garai Gasang lé lhang, Yhâng Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

¹⁹ Yesuq, yhangmoq lé tũ taí é gi, "Ngò, nungmoq lé teng za taí kôlé, haú Zo gi, yhumsing é myit dông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gà le, haú Íwa kut é hkyô lé za, haú Zo châng kut é yanmai nghut lhê. ²⁰ Hkâsu mù gà le, haú Íwa gi, Zo lé chyitdap é nghut luí, Yhang kut é hkyô lhunglhang, haú Zo lé tũn shit ri; nungmoq maú hông shoq, shí pé htoq je ko é hkyô pé lé lhang, haú Zo lé tũn shit shirâ nghut lhê. ²¹ Haú Íwa gi, shí bê bang lé lhoq dui

* 5:4 Bun zo 3 lhum mâ é ahtang túm eq bun zo 4 lhum gi, chyúmding myo myo má a bo é nghut lhê.

toq mù, yhangmoq lé asak byí é eq rajung za, haù Zo le, Yhang byí nau é bang lé, asak byi rà nghut lhê. ²² Hau htoq agó, haù Íwa lé hkunggâ é eq rajung za, haù Zo lé le, lunglhang bang hkungga kó sháng gaq ga, haù Íwa gi, ó yuq lé le a jéyáng e za, jéyáng é hkyô lunglhang, haù Zo lé lum to bê nghut ri. ²³ Haù Zo lé a hkunggâ é sù gi, haù Yhang lé nhang kat é sù Íwa lé le, a hkunggâ é sù nghut ri.

²⁴ Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjínng é sù, ó yuq nghut kôle, mara byí é a hui e za, ahtum abyuq é asak wó é nghut lhê; haù yuq gi, shi é mai lut luí, asak duì bê sù nghut ri. ²⁵ Ngò, nungmoq lé teng za taí kôlé, haù Garai Gasâng é Yhangzô é htê lé, shi byuq bê bang wó gyo rà ahkyíng gi, jé lo nyi bê nghut ri; ahkuí lhang jé to bê nghut ri. Htê haù lé gyô é bang gi, asak duì kó rà nghut lhê. ²⁶ Hkâsu mù gà le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. ²⁷ Hau htoq agó, Yhang gi, haù Byu Yhangzo nghut é yanmai, Garai Gasang gi, tarâ jéyáng rà ahko ahkáng, Yhang lé byi bê nghut ri.

²⁸ Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq ló rà ahkyíng jé lò rà nghut lhê. ²⁹ Ge é hkyô kut é bang gi, asak duì rà matú, duì toq kó rà nghut lhê; agè ashop hkyô kut é bang gi, mara byí é hui zo rà matú, duì toq kó rà nghut lhê. ³⁰ Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gà le, Ngò gi, Ngò ô nau é dông châng é a nghut e za, Ngo lé nhang kat é Sù ô nau é dông châng é sheq ru nghut lhê.

Yesuq Eq Séng Luí, Saksé Hkâm É Hkyô

³¹ Ngá gùng lé ngò saksé hkâm é nghut jáng, ngò za saksé hkâm é hkyô gi, teng rà a nghut. ³² Ngá é hkyô lé saksé hkâm byí é Sù (Ngá Wa) góyuq nyi lhê; Ngò eq séng luí,

haù yuq hkâm é saksé gi, têng é hkyô lé, Ngò sê lhê.

³³ Nungmoq gi, Yohan† chyáng byù nhang kat wú bekô nghut ri; yhang gi, haù tengmán hkyô lé saksé hkâm byi bê nghut lhê. ³⁴ Ngò gi, xângzo byu pé mai saksé hkâm byi rà lé, ra luí a nghut, nghut kôlhang, nungmoq hkyi yu é wó hui rà matú sheq, haù su nghu taí é ru nghut lhê. ³⁵ Yohan gi, duq nyi é myibung su duqbó byí é nghut mù luí, nungmoq gi, haù duqbó é hkaú má, rayoq zo ngón nau nyi akô nghut ri.

³⁶ Nghut kôlhang, Ngò wó é saksé gi, Yohan byí é saksé htoq je kô lhê; hkâsu mù gà le, ahkuí Ngò zui saí nyi é muzó gi, Ngò lhoq pán rà matú, haù Íwa, Ngo lé ap byí tô é nghut luí, haù Íwa, Ngo lé nhang kat é hkyô lé, saksé hkâm byi nyi ri. ³⁷ Hau htoq agó, haù Ngo lé nhang kat é sù Íwa le, Ngò eq séng luí saksé hkâm byi ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó; ³⁸ haù Yhâng é mungdang le, nungmoq chyáng a bò kó nghut ri; hkâsu mù gà le, nungmoq gi, Yhang nhang kat é Sù lé a lumjínng kô é yanmai nghut ri. ³⁹ Nungmoq gi, haù Chyúmdang mai ahtum abyuq é asak wó yu rà nghut lhê ga myit yu kô é yanmai, haù Chyúmdang má ho wú akô nghut ri; nghut kôlhang, Chyúmdang haù gi, Ngò eq séng luí saksé hkâm byi ri; ⁴⁰ nghut kôlhang, asak wó yu rà matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkya-ôn é lé a lhom yu é nghut lhê. ⁴² Nghut kôlhang, nungmoq lé gi, Ngò sê lhê; nungmoq é i-myit hkaú má, Garai Gasang lé chyitdap é myit a bò kó nghut ri. ⁴³ Ngò gi, Ngá Wâ é myìng mai jé lé é sù nghut kôlhang, nungmoq gi, Ngo lé a lhom hap yu kó; yhâng myìng yhang lang é byù, gotû rayuq jé lé é ru nghut le gi, haù yuq lé, nungmoq lhom hap yu kó rà nghut lhê. ⁴⁴ Nungmoq gi, rayuq eq rayuq hkya-ôn lhùm é lé za hap yu luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhîng, hkâsu kut wó lumjínng kó rà lhu?

† 5:33 Yohan shí yuq gi, Wui-myhup Sará Yohan nghut lhê.

⁴⁵ Nghut kôlhang, haû Íwâ é hí má, Ngò, nungmoq lé mara hùn nhô hkâ-ngâm kó; nungmoq lé mara hun é sù gi, haû nungmoq maí myit myoqbyu tô é Mosheq ru nghut lhê. ⁴⁶ Mosheq lé nungmoq gè gè yhang lumjúng kô é ru nghut le gi, Ngo lé le lumjúng kó râ nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri. ⁴⁷ Nghut kôlhang, nungmoq gi, yhang kâ tô é pé lé lhang a lumjúng kô é nhîng, Ngá dang lé, hkâsu kut wó lumjúng kó râ lhu?" gâ ri.

6

Byù Ngo Hkyîng Lé Zoshuq Byi Tsô É Hkyô

Mht 14:13-21; Mrk 6:30-44; Luk 9:10-17

¹ Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri. ² Haû hkûn, byù ajùm ayò gi, haû nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri. ³ Yesuq gi, bùm shut doq ló mù, Yhâng é chángzô pé eq rahá zung tô ri. ⁴ Yudaq byu pé é Lhoqlhai Poí gi, chyâng lo nyì bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo râ muk, nganhúng, hkâmá ê wó wuî râ lhu?" ga taí ri. ⁶ Yesuq, haû su ga taí é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhâng é myit má bo to gù bê nghut ri.

⁷ Hpilip gi, Yhang lé, "Denari* í sho èq muk wuî le lhang, rayuq ratsuí tsuí ngap râ a nghut." ga tû taí ri.

⁸ Haû hkûn, Yhâng é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozo í du wó é yuqgè zo rayuq, shî má nyi ri; nghut kôlhang, byù shî myhò bang lé luq shoq, hkâsu kut wó gâm byi râ lhu?" ga taí htoq kat ri.

¹⁰ Yesuq gi, "Haû shiwa byu pé lé, zùng nhâng keq." ga taí ri. Jowò haû gi, mhán htu é jang nghut mù, yuqgè wuî baú lhang, ngo hkyîng kô zung tô bùm bekô nghut ri; ¹¹ hau htâng, Yesuq gi, muk long pé lé yù mù, jeju

hkyâ-on luí, zung tô é bang lé, yhangmoq o é myhó tsing gâm byi ri. Haû eq rajung za, ngozo lé le haû su kut ri.

¹² Yhangmoq banshoq bang zô gyî bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsîng yù keq. Haí le a langsâ pyám sháng gaq." ga taí ri. ¹³ Haû mù, yhangmoq gi, zô myhit tô é muk-yo muk ngo long má é ajap azo pé lé châng guq tsîng le, raxe í mung byíng shoq wó guq tsîng yu akô nghut ri.

¹⁴ Haû shiwa byu pé gi, Yesuq kut é limik kumlhá lé myàng kô é hkûn, "Shí yuq gi, mingkan htoq má jé lé lô râ gâ é, Myiqhtoi yhang nghut ri-nhung!" ga taí bum akô.

¹⁵ Yesuq gi, yhangmoq lé mù, Yhang lé hkohkâm zik kut nhâng kó râ dâ é hkyô lé, sê é yanmai, Yhang baú tsik za bùm shut dum haq doq ló bê nghut ri.

Yesuq, Wuì Htoq Má Sô É Hkyô

Mht 14:22-27; Mrk 6:45-52

¹⁶ Buigyum htâng, Yhâng é chángzô pé gi, haû nhông shut gyó ló mù, ¹⁷ lhai má wang ji luí, nhông hé hpoq má é Kaperna-um wà shut gû e ló akô; haû hkûn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri. ¹⁸ Haû u lé, laidun htan lo é yanmai, wuìlhêng toq lô bê nghut ri. ¹⁹ Yhangmoq gi, sum myi déng kô lhai kôn e ló kô é hkûn, Yesuq gi, nhông htoq má so luí, haû lhai shut chyâng lé lo nyi é lé myàng kômù, gyuq dan bùm bekô nghut ri. ²⁰ Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé taí ri. ²¹ Haû mù, yhangmoq gi, Yesuq lé gabú myit èq lhai hkaú má shuì hâng yù nau akô. Haû hkûn, lhai haû gi, radá dâm yhangmoq jé nau é jang wuiyàm má jé bê nghut ri.

²² Nhông hé hpoq má nyi tô é byù moq mó gi, haû má lhai racham za joq lai lo é hkyô eq, lhai haû má Yesuq a bo doq jî e za, chángzô pé baú ji htoq ló kô é hkyô lé, hau htang nyí, bûn sê kat akô nghut ri. ²³ Haû hkûn, haû Yhumsîng, jeju hkyâ-ôn é htâng, byu pé muk zô é jowò nam má, Tiberi myuq má é lhai pé jé lé bum ri. ²⁴ Haû byù moq mó gi, Yesuq eq Yhâng é chángzô pé, haû má a nyi lo kô é hkyô lé sé kô é yanmai, Yesuq

* 6:7 Denari rachap gi, byù rayuq é ra-nyí é zuihpau eq wuî é nghut lhê.

lé châng hô râ matú lhaî haú pé má wang ji mù, Kaperna-um wà shut e ló akô nghut ri.

Yesuq, Asak Muk Nghut É Hkyô

²⁵ Yhangmoq gi, nhông hé hpoq má Yesuq lé myàng kôjáng, "Rabai ê, Nang gi, shî má hkâ-nhám jé lé é lú?" ga, Yhang lé myî akô.

²⁶ Haú hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. ²⁷ Htên byuq sê é zoshuq é matú, hkâshikut kó; haú Byu Yhangzo byî râ nghut é ahtum abyuq é asak é matú, ru gîng nyi é zoshuq wó yû râ lé sheq shikut nyi keq. Yhâng chyáng gi, haú Íwa Garai Gasang mai Yhâng é saksé dizik tap to bê nghut lhê." ga tû taí ri.

²⁸ Haú mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ lú?" ga Yhang lé myî akô.

²⁹ Haú hkûn, Yesuq gi, "Garai Gasang nhang kat é Sû lé, lumjîng é gi, Garai Gasang ô nau é muzó nghut bê." ga tû taí ri.

³⁰ Haú mù luí, yhangmoq gi, Yhang lé, "Ngamoq myoq eq wó myáng luí, Nang lé lumjîng râ matú, Nang, haí jung limik kumlhá kut shit râ lú? Nang, haí jung kut shit râ lú? ³¹ Haú Chyúmdang má, 'Yhang gi, yhangmoq zo râ matú, mauhkûng mai muk byî ri.'[☆] ga kâ tô é eq rajung za, ngamoq é îchyí Íwa pé gi, haú yoso hkaú má mannaq muk zo bekô nghut lhê." ga taí akô.

³² Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byî é Sû gi, Mosheq a nghut, haú Ngá Wa sheq, nungmoq lé mauhkûng mai tengmán é muk byî é Sû ru nghut lhê. ³³ Hkâsu mù gâ le, Garai Gasang byî é muk gi, mauhkûng mai gyó lé luí, haú mingkan lé asak byî é Sû nghut lhê." ga taí ri.

³⁴ Yhangmoq gi, "Yhumsîng ê, ahkuí mai, ngamoq lé muk haú hkâ-nhám le byî nyi laq." ga chôm taí bum akô.

³⁵ Haú mù, Yesuq taí kyô é gi, "Ngò gi, asak muk nghut lhê. Ngá chyáng lé é sû gi, hkâ-nhám le zòmut é hui râ a nghut; Ngo lé lumjîng é sû le, hkâ-nhám le wuîshit é hui râ a nghut. ³⁶ Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri. ³⁷ Haú Íwa mai Ngo lé ap byî tô é byù lhunghâng bang gi, Ngá chyáng lé kó râ nghut luí, Ngá chyáng lé é sû ó yuq lé le, Ngò gi, hkâ-nhám lé hkat htoq pyám râ a nghut. ³⁸ Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. ³⁹ Haú Ngo lé nhang kat Sû ô nau é hkyô gi, Yhang mai Ngo lé ap byî tô é bang má é rayuq lé lhang, Ngò, a lhoq hpyuq pyâm e za, jîhtûm buinyi má yhangmoq lé dum lhoq dui toq yû râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haú Zo lé wú mù, Yhang lé lumjîng é sû yuq hkanmó, ahtum abyuq é asak lé wó yû râ matú nghut lhê; Ngò le, jîhtûm buinyi má haú bang lé lhoq dui toq râ nghut lhê." gâ ri.

⁴¹ Haú mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi, ⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nganhúng sê lhê a nghut kó lú? Haú sù é nhîng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lú?" gâ bum akô.

⁴³ Haú hkûn, Yesuq gi, "Nungmoq ahkaú má hkâtaí put nyi kó. ⁴⁴ Haú Ngo lé nhang kat é sû Íwa mai shuî jé é sû za a nghut jáng, ó yuq le Ngá chyáng wó jé lé râ a nghut; jé lé é sû lé gi, jîhtûm buinyi má, Ngò lhoq dui toq râ nghut lhê. ⁴⁵ Myiqhtoi laiká pé má, 'Yhangmoq lhunghâng bang gi, Garai Gasâng eq mhoq byî é hui kó râ nghut lhê.'[☆] ga kâ tô é eq rajung za, haú Íwâ chyáng mai gyo yù, mhoq yu é bang yuq hkanmó gi, Ngá chyáng lé kó râ nghut lhê. ⁴⁶ Haú gi, rayuq yuq mai, haú Íwa lé myang wú bê nghû nau é a nghut; Garai

Gasâng chyáng mâ é Sû za sheq, haû Îwa lé myang wú é Sû nghut lhê. ⁴⁷ Ngò, nungmoq lé teng za taí kôlé, lumjínq é sù gi, ahtum abyuq é asak wó lhê. ⁴⁸ Ngò gi, asak muk nghut lhê. ⁴⁹ Nungmoq é îchyí îwâ pé gi, haû yoso hkaû má mannaq muk zo bekô nghut lhê; nghut kôle, shi byuq bekô nghut ri. ⁵⁰ Nghut kôlhang, shí gi, mauhkúng mai gyó lé lo é muk nghut lhê; haû lé zô é sù gi, a shí lo râ nghut lhê. ⁵¹ Ngò gi, mauhkúng mai gyó lé lo é, haû asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyi râ nghut lhê; muk shí gi, mingkan zô wui é asak matú, Ngò byi râ nghut é Ngá gungsho nghut lhê." ga tû taí ri.

⁵² Haû mù, haû Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso râ lhú?" ga, yhangmoq yhangchang dang htíng htíng lhúm bum akô.

⁵³ Haû hkûn, Yesuq gi, yhangmoq lé, "Ngò, nungmoq lé teng za taí kôlé, haû Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut. ⁵⁴ Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jhtúm buinyi má, haû yuq lé lhoq dui toq yû râ nghut lhê. ⁵⁵ Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. ⁵⁶ Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyi luí, Ngò le haû yuq má nghut nyi bê nghut lhê. ⁵⁷ Haû rû dui nyi é Îwa gi, Ngo lé nhang kat luí, Ngò gi, haû Îwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lhê. ⁵⁸ Shí gi, mauhkúng mai gyó lé lo é muk nghut lhê. Nungmoq é îchyí îwâ pé gi, mannaq muk zo kôle, shi byuq bekô nghut ri; nghut kôlhang, muk shí lé zô é sù gi, ahtum abyuq dui nyi râ nghut lhê." ga taí ri. ⁵⁹ Dang haû pé gi, Yesuq, Kaperna-um wà mâ é tarajong má mhqshít nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

⁶⁰ Yhâng é chángzô pé myo myo gi, haû lé wó gyo kôjáng, "Dang shí gi, gyai wui ri. Ó yuq wá wó cháng râ lhú?" ga taí bum akô.

⁶¹ Yesuq gi, haû eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé, "Dang shí é yanmai, nungmoq myit htên bum akô lhú? ⁶² Haû Byu Yhangzo gi, Yhang nyi laí lò bê jowò shut taû doq ló é lé, nungmoq myàng kô é nghut le gi, hkâsu nghú kó râ lhú? ⁶³ Haû Woi-nyí gi, asak byí lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê. ⁶⁴ Nghut kôle, nungmoq chyáng mâ é ra-am gi, a lumjínq kó nghut ri." ga taí ri. Hkâsu mù gâ le, ó pé gi, a lumjínq kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri. ⁶⁵ Yhang xoq taí é gi, "Haû su mù, haû Îwâ eq ahkáng byí é sù za a nghut le gi, ó yuq le Ngá chyáng wó lé râ a nghut nghú, Ngò, nungmoq lé taí kyo wú bê nghut lhê." gâ ri.

⁶⁶ Haû dàm mai, Yhâng é chángzô pé myo myo gi, Yhâng htâng a cháng lo kô e za, taû ló byuq bùm bekô nghut ri.

⁶⁷ Haû su mù, Yesuq gi, haû chángzo raxe í yuq lé, "Nungmoq le, ló byuq nau akô, a nghut lhú?" ga myí ri.

⁶⁸ Haû hkûn, Simun Petruq gi, "Yhumsîng ê, Nàng gi, ahtum abyuq é asak mungdang wó Sû nghut to bê lé nhíng, ngamoq gi, ó yuq chyáng ê shirâ lhú? ⁶⁹ Nàng gi, Garai Gasâng é Chyoiyúng Sû nghut é lé, ngamoq, lumjínq lhê, sê nyi lhê." ga, Yhang lé tû taí ri.

⁷⁰ Haû hkûn, Yesuq gi, "Nungmoq raxe í yuq lé, Ngò hkyin yù bê a nghut kó lhú? Nghut kôle, nungmoq mâ é rayuq gi, nat nghut ri." ga tû taí ri. ⁷¹ (Yhang gi, haû Simun Iskarut é yhangzo, Yudaq lé taí nau é nghut ri; haû yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

7

Yesuq Eq Yhâng É Gumang Wui

¹ Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù,

Galile mau má sô lhing wún ri. ² Nghut kôlhang, haû Yudaq byu pé é Saksé Zúm Poî chyâng lo nyi é hkûn, ³ Yesuq é yhanggu yuqzô pé gi, Yhang lé, "Náng é chángzô pé gi, Nàng kut é laklaí kumlhá pé lé myàng kó sháng gaq, Nàng, shî mai htoq ló luí, Yuda mau shut e ló aq. ⁴ Myìng hu nau é sù gi, hkaû zaú luí haí le a kut wú é nghut lhê. Nàng gi, haú pé lé kut nyí bê nghut é yanmai, mingkan lé, Náng gûng tûn shit aq." ga taí akô. ⁵ Hkâsu mù gâ le, yhanggu sîng yuqzô pé lhang, Yhang lé a lumjîng kó nghut ri.

⁶ Haû mù luí, Yesuq gi, yhangmoq lé, "Ngá é ahkyíng gi, a jé shi nghut ri; nungmoq é ahkyíng kúm gi, hká hkûn le joq nyi ri. ⁷ Haû mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haí mù gâ le, yhang kut é hkyô gi, agè ashop é nghut é lé, Ngò, saksé tûn shit é yanmai nghut ri. ⁸ Nungmoq gi, poî haú shut doq ló keq. Ngò kúm gi, Ngá é ahkyíng a jé shi nghut é yanmai, poî haú shut a doq ló shirâ nghut lhê." ga taí ri. ⁹ Haû su ga taí luí, Yhang gi, Galile mau má nyi gyó to bê nghut ri.

¹⁰ Nghut kôlhang, Yhang gu pé, haû poî shut doq ló byuq é htâng má, Yhang gi, de de a nghut é dông, tsik za châng doq ló bê nghut ri. ¹¹ Yudaq byu pé gi, haû poî má, Yhang lé châng hô kômù, "Haú yuq gi, hkâmá nghut lhê lhú?" ga, myi wún akô nghut ri.

¹² Haû byù hpûng hkaû má, Yhang eq séng luí taí lhûm bum kô é má, ra-am gi, "Yhang gi, byù gè nghut ri." ga taí kôjáng, ra-am gi, "A nghut, Yhang gi, byu pé lé hkyô shuí ngoq sù nghut ri." ga tû taí akô. ¹³ Nghut kôlhang, haû Yudaq suwún wuí lé gyuq kô é yanmai, ó yuq le, Yhang eq séng é hkyô lé de de a wám taí kó nghut ri.

Haû Poî Má, Yesuq Mhoqshit É Hkyô

¹⁴ Haû poî rawuí nghut ló é hkûn, Yesuq gi, noqkuq yhûm má doq ê luí, mhoqshit hí ló bê nghut ri. ¹⁵ Haú hkûn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haû-í hkâsu mù sê lhê laq?" ga myi bum akô.

¹⁶ Haû mù, Yesuq tû taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. ¹⁷ Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasâng chyáng mâ é nghut a nghut é eq, Ngá é myit dông taí é dang nghut a nghut é lé, yhang sê gâm hkoq yû râ nghut lhê. ¹⁸ Yhumsing é myit dông taí é sù gi, yhumsing é matú aróng hô sù nghut ri; nghut kôlhang, yhumsîng lé nhang kat su é matú, aróng ho é sù gi, tengmán é byù nghut ri; yhang má, a tengmán é hkyô haí le a bò nghut ri. ¹⁹ Mosheq gi, nungmoq lé jep é tarâ byí to bê, a nghut kó lhú? Nghut kôlhang, nungmoq ó yuq le, jep é tarâ haú lé a cháng kó nghut ri. Haí mù luí, Ngo lé sat nau nyi akô lhú?" gâ ri.

²⁰ Haú hkûn, haû byù hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lhú?" ga tû taí akô.

²¹ Yesuq gi, yhangmoq lé, "Ngò, laklaí kumlhá ralhûm kut jáng, nungmoq ban-shoq bang gi, maú byuq bum akô. ²² Nghut kôlhang, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyì má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchýí îwâ pé chyáng mai lo é ru nghut lhê). ²³ Haû, Mosheq é jep é tarâ lé a lhoq htên pyám sháng gaq nghû, Bánno buinyì má, zoshâng lé ahpyo-kuq hpyit byí é nghut le gi, haí mù luí, Bánno buinyì má, byù rayuq é gûng gón lé, Ngò lhoq gè byí é yanmai, Ngo lé nhikjum yô akô lhú? ²⁴ Byù du lé wú luí hkâjéyáng kó; tengmán é dông sheq jéyáng keq." ga taí ri.

Yesuq Gi, Hkrisduq Nghut Lhê Lhú?

²⁵ Haû mù luí, Yerusalem wà mó má é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi? ²⁶ Yhang gi, shî má de de dâng nyo nyi le, yhangmoq gi, Yhang lé, haí le a ga kó myih-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe? ²⁷ Haû Hkrisduq jé lé é hkûn gi, Yhang hkâmai lé lo é lé, ó yuq lhang sé râ a nghut." ga taí bum akô. Nghut kôlhang, shí

yuq gi, hkâmâ é sù nghut é lé, nga-nhúng sê lhê;

²⁸ Haû mù, Yesuq gi, noqkuq yhûm wàng má mhoqshit uchyang, htê mó èq taí kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shî má lé nyí tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang, ²⁹ Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

³⁰ Haû mù, yhangmoq gi, Yhang lé chyup râ dâ akô; nghut kôlhang, Yhâng é ahkyíng a jé shi é yanmai, Yhang lé chyup râ matú, ó yuq le loq a jé kó nghut ri. ³¹ Nghut kôlhang, byù hpûng hkaû mâ é bang myo myo gi, Yhang lé lumjíng bûm kôluí, "Haû Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit râ lhú?" ga taí bum akô nghut ri.

³² Haû Hparishe pé gi, haû byù hpûng hkaû má, Yesuq eq sêng é hkyô lé, haû su ga dangsoq soq lhûm nyí kô é hkyô lé wó gyô yu akô. Haû mù, haû hkyangjong agyi pé eq Hparishe pé gi, Yhang lé é chyup râ matú, noqkuq yhûm zúng é bang lé nhang kat akô.

³³ Haû hkûn, Yesuq gi, "Ngò gi, nungmoq eq rahá rayoq zo za nyí râ nghut lhê; hau htâng, Ngo lé nhang kat Su chyáng taû ló râ nghut lhê. ³⁴ Haû hkûn, nungmoq gi, Ngo lé hô kôlhang, myang hô kó râ a nghut; Ngò nyí é jang má, nungmoq wó jé kó râ a nghut." ga taí ri.

³⁵ Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq râ dâ lhê lhú? Yhang gi, Grik byu pé má nyí byo myín tô é nga-nhúng é byu pé nyí é jowò má ê mù, Grik byu pé lé, ê mhoqshit râ dâ lhê lhú? ³⁶ 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyí é jang má, nungmoq wó jé kó râ a nghut.' gâ é, Yhang taí é dang gi, haí jung wá gá naû é nghut lhê lhú?" gâ akô.

³⁷ Haû lô htâng é eq je ahkyak é Poíbuinyí má, Yesuq toq yap luí, htê mó èq taí é gi, "Wuì shit sù gi, Ngá chyáng lé mù, shuq sháng gaq. ³⁸ Ngo lé lumjíng é sù ó yuq

nghut kôle, haû Chyúmdang má taí tô é eq rajung za, 'Yhâng chyáng mai asak uchyâm é wuìlàng yui htoq ló râ nghut lhê.'" gâ ri.

³⁹ Yhang haû su gâ é gi, Yhang lé lumjíng é bang myang hap yù râ nghut é, haû Woi-nyí lé taí é nghut ri. Haû hkûn jé shoq, haû Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkan dan hû é a hui nhâng shi é yanmai nghut ri.

⁴⁰ Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haû nghut ri." ga taí akô.

⁴¹ Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lhú? ⁴² Haû Chyúmdang má, Hkrisduq gi, Dawiq é awut ashín mâ é nghut luí, Dawiq nyí lai lo é Betlehem wá mai htoq ló râ nghut lhê gâ é, a nghut lhú?" ga myí bum akô nghut ri. ⁴³ Haû mù luí, Yesuq é yanmai, shiwa byu pé gi, gàm hkoq lò byuq bekô nghut ri. ⁴⁴ Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuì U É Bang A Lumjíng Kô É Hkyô

⁴⁵ Hau htâng má, haû noqkuq yhûm zúng bang gi, haû hkyangjong agyi pé eq Hparishe pé chyáng taû ló kô é hkûn, haû bang gi, yhangmoq lé, "Nungmoq, haí mù luí, Yhang lé a shuì lo kô é lhú?" ga lhom myí akô.

⁴⁶ Haû hkûn, haû noqkuq yhûm zúng bang gi, "Shí yuq su ga taí é byù gi, ó le a nyí wú é nghut lhê." ga taí kyô akô.

⁴⁷ Haû mù, haû Hparishe pé gi, "Nungmoq lé le, Yhang èq mhoq hpyoq yù bekô lhú? ⁴⁸ Haû zaú wui chyáng le, Hparishe pé chyáng le, Yhang lé lumjíng é byù bò akô lhú? ⁴⁹ A bò! Nghut kôlhang, haû jep é tarâ lé a sê é byù moq mó shî gi, nhîng pyâm é hui bekô nghut ri." ga nhik-yô é dông tû taí kat akô nghut ri.

⁵⁰ Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi, ⁵¹ "Nga-nhúng é tarâ gi, byù rayuq lé, yhâng é dang hí a gyô wú é eq, yhang haí kut é lé a sê e za, mara byi lhê lhú?" ga, yhangmoq lé myí ri.

⁵² Haú hkûn, yhangmoq gi, "Nàng le, Galile mau byù nghut lhê lúh? Galile mau mai myiqhtoí rayuq lhang a htoq é hkyô lé, nàng gon wú aq, haú jang sé râ nghut lhê." ga tú taí akô.

⁵³ Hau htâng, yuq hkangmó gi, ó le ô yhúm shut taú ló byuq bùm bekô nghut ri.*

8

Yesuq Lé, Lé Myî Chyam Wú Kô É Hkyô

¹ Yesuq kúm gi, Tsanlun Bùm shut e ló bê nghut ri. ² Htang napkyó napsûn noq le, Yesuq gi, noqkuq yhúm wàng hkaú má dum ê luí, byu pé lhunglhang gi, Yhâng é lhîngkyuq má lé zîng bum akô; haú mù, Yhang gi, zung to luí, yhangmoq lé mhoqshit ri. ³ Haú hkûn, haú tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gûng má shap to kôluí, ⁴ Yesuq lé, "Sará ê, myiwe myhí shí lé, sulàng shut nyi é má myang chyup yu é nghut lhê. ⁵ Haú Mosheq é tarâ má gi, shí su é myiwe lé, luqgok èq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghú râ lúh?" ga myî akô. ⁶ Yhangmoq haú su ga myî é hkyô gi, Yhang lé mara wó hún shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqnyhuí èq htaú kê nyi ri. ⁷ Yhang lé, yhangmoq ru jang myî nyi kô é hkûn, Yhang gi, yap nyhang kat mù, yhangmoq lé, "Nungmoq má é mara a wó é sù hí, myiwe myhí shí yuq lé luqgok èq dú sháng gaq." ga taí ri. ⁸ Hau htâng, Yhang gi, dum ngóm luí, myigùng má kê nyi ri.

⁹ Yhangmoq gi, haú su gâ é lé wó gyo kôjáng, je mang bang mai hí luí, rayuq htâng rayuq ló byuq bekô nghut luí, Yesuq baú za myit gyó tô é eq, myiwe myhí haú jâng yap nân tô ri. ¹⁰ Yesuq gi, yap nyhang kat luí, yhang lé, "Myiwe myhí ê, yhangmoq hká ló bekô lúh? Ó yuq èq le, nàng lé mara a byi kó lúh?" ga myî ri.

¹¹ Yhang gi, "Yhumsîng ê, ó yuq le mara a byi kó nghut ri." ga tú taí ri.

Haú hkûn, Yesuq gi, "Ngò le, nàng lé mara a byi, ló aq hkoi, ahkuí mai mara hkâdum kut shut lo." ga taí kat ri.

Yesuq, Mingkân É Maubó

¹² Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htâng châng é sù ó yuq nghut kôle, mauchut hkaú má hkâ-nhám le so râ a nghut, asak maubó lé wó râ nghut lhê." ga taí ri.

¹³ Haú mù, haú Hparishe pé gi, "Wú aq, Nàng gûng Nàng saksé hkâm yu é nghut ri; Nàng é saksé gi, teng râ a nghut." ga taí akô.

¹⁴ Haú hkûn, Yesuq gi, "Ngá gûng Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

¹⁵ Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê.

¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haú Ngo lé nhang kat é sù Íwa eq rahá nghut nyi lhê. ¹⁷ Haú nungmoq é tarâ má yhang le, í yuq mai hkâm é saksé gi, têng lhê ga kê tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haú Ngo lé nhang kat é sù Íwa le, Ngá é matú saksé hkâm byí é nghut lhê." ga tú taí ri.

¹⁹ Haú mù, yhangmoq gi, Yhang lé, "Nàng Wa gi, hkâmá lúh?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tú taí ri. ²⁰ Dang haú pé gi, haú noqkuq yhúm wàng hkaú má é alu kat jang nàm má, Yhang mhoqshit nyi é u lé taí é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkyíng a jé shí é yanmai nghut ri.

²¹ Haú mù luí, Yesuq gi, yhangmoq lé, "Ngò gi, ló byuq râ nghut lhê, haú hkûn, nungmoq Ngo lé hô kó râ, yhumsîng é mara má le shí kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taí ri.

* **7:53** Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

²² Hau é yanmai, haú Yudaq byu pé gi, "Ngò ló é jang má, nungmoq wó jé kó rà a nghut." gâ é gi, Yhânggùng yhang sat shî rà gâ é nghut lhê lú?" ga myi bum akô.

²³ Nghut kôlhang, Yesuq xoq taí é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shî eq sêng é bang nghut akô; Ngò kúm gi, mingkan shî eq sêng é sù a nghut. ²⁴ Haú mù, nungmoq gi, yhumsing é mara má shî kó rà nghut lhê nghû, Ngò taí é nghut lhê. Ngò gi, haú Yuq nghut lhê nghû taí é lé, nungmoq a lumjínng kô é nghut jáng, nungmoq gi, gè gè yhang, yhumsing é mara má shî kó rà nghut lhê." gâ ri.

²⁵ Haú hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyi bê nghut lhê. ²⁶ Ngò gi, nungmoq eq séng luí, taí rà hkyô eq jéyáng rà hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gû lé, Ngò, mingkan lé taí kyô lhê." ga tû taí ri.

²⁷ Yesuq gi, yhangmoq lé, Yhâng Wa eq sêng é hkyô taí kyô nyi é lé, yhangmoq gi, a sê gyo kó nghut ri. ²⁸ Haú mù luí, Yesuq gi, "Haú Byu Yhangzo lé nungmoq tu shap* kat é hkûn sheq, Ngò gi, haú Yuq nghut é hkyô lé le, yhumsing myit dông haí le a kut e za, haú Íwa mhoq byí é dông za taí é hkyô lé le, nungmoq sé kó rà nghut lhê. ²⁹ Haú Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taí ri. ³⁰ Yhang, haú su taí nyi é u lé lhang, byù myo myo gi, Yhang lé lumjínng bûm bekô nghut ri.

Abraham É Awut Ashín Pé Hkyô

³¹ Haú mù, Yesuq gi, Yhang lé lumjínng é Yudaq byu pé lé, "Ngò mhoqshit é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô. ³² Nungmoq gi, haú tengmán hkyô lé sé kó rà nghut luí, haú tengmán hkyô gi, nungmoq lé lhoq lhut kat rà nghut lhê." ga taí ri.

³³ Haú hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haú mù, 'nungmoq lé lhoq lhut kat rà' nghû Nàng hkâsu kut wó taí lhê lú?" ga tû taí akô.

³⁴ Yesuq dum tû taí é gi, "Ngò, nungmoq lé teng za taí kôlé, mara kut shut é sù gi, marâ é jùn nghut lhê. ³⁵ Jùn gi, yhûm ikun eq hkâ-nhám le sêng nyi rà a nghut; zo kúm gi, ikun eq ahtum abyuq sêng lhê. ³⁶ Haú mù luí, haú Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê. ³⁷ Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat rà dâ akô nghut ri. ³⁸ Ngò gi, Ngá Wâ chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é íwa chyáng mai wó gyô yu é eq rajung za kut nyi akô nghut ri." gâ ri.

³⁹ Haú hkûn, yhangmoq gi, "Ngamoq é íwa gi, Abraham nghut lhê." ga tû taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó rà nghut lhê. ⁴⁰ Nghut kôlhang, nungmoq gi, haú Garai Gasâng chyáng mai wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haú sù é hkyô gi, Abraham a kut é nghut lhê. ⁴¹ Nungmoq gi, nungmoq é íwa kut é muzó lé yhang, kut nyi akô." ga taí ri.

Haú hkûn, yhangmoq gi, "Ngamoq gi, dezo amyû a nghut; ngamoq gi, Íwa rayuq za wó lhê; haú gi, Garai Gasang nghut lhê." ga taí he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é Íwa nghut é nghut jáng, nungmoq gi, Ngo lé chyitdap kó rà nghut lhê; hkâsu mù gâ le, Ngò gi, Garai Gasâng chyáng mai lé jé luí, ahkuí, shî má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê. ⁴³ Nungmoq gi, haí mù Ngá é dang lé a sê gyo kô é lú gâ le, Ngò

* **8:28** Tu shap gâ é lichyúm gi, tapzínng htoq má jén sat pyám rà gâ é nghut lhê.

taí é dang lé, nungmoq a wó lhom yù kô é yanmai nghut ri. ⁴⁴ Nungmoq gi, haù nungmoq é îwa nghut é nat Tsadán eq sêng é bang nghut luí, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haù tengmán hkyô má a yap gîng nyi nghut ri. Yhang gi, mhaù é hkûn, yhang é myit má bo é dông taí ri; hkâsu mù gâ le, Yhang gi, byù mhaù nghut luí, mhaù hkyô pé é îwa nghut ri. ⁴⁵ Haù su mù, Ngò, nungmoq lé, haù tengmán hkyô taí kyô é yanmai, nungmoq gi, Ngo lé a lumjîng kó nghut ri. ⁴⁶ Nungmoq mâ é ó yuq wá, Ngo lé mara bo lhê nghû saksé wó tûn shit akô lhú? Ngò gi, haù tengmán hkyô lé taí nyi é nghut le nhîng, nungmoq, Ngo lé haí mù a lumjîng kô é lhú? ⁴⁷ Garai Gasang eq sêng é sù gi, Garai Gasang taí é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga taí ri.

Yesuq Eq Abraham

⁴⁸ Haù hkûn, haù Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lhú?" ga myí akô.

⁴⁹ Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoí nyi akô nghut ri. ⁵⁰ Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haù yuq jéyáng sháng gaq. ⁵¹ Ngò, nungmoq lé teng za taí kôlé, Ngá dang lé châng é sù gi, hkâ-nhám le, shî râ a nghut." ga taí ri.

⁵² Hau é yanmai, haù Yudaq byu pé gi, "Nàng gi, nat gang wang júng to sù nghut é lé, ahkûi, ngamoq sé bê! Abraham gi, shi byuq bê; haù myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shî râ a nghut.' ga taí ri. ⁵³ Nàng gi, ngamoq é îwa Abraham htoq hkik lhê lhú? Yhang gi, shi byuq bê; haù myiqhtoí pé le, shi byuq bekô nghut ri.

Nàng gûng nàng ó yuq su ngàm lhê lhú?" ga taí akô.

⁵⁴ Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haù nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê. ⁵⁵ Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaù dut râ nghut lhê; nghut kôlhang, Ngò gi, Yhang lé sé luí, Yhang é dang gyo sù nghut lhê. ⁵⁶ Nungmoq é îwa Abraham gi, Ngo lé râ buinyi lé myoqbyu gabú nyi é nghut luí, myàng mù, gabú bê nghut ri." ga taí ri.

⁵⁷ Haù hkûn, haù Yudaq byu pé gi, Yhang lé, "Nàng gi, asak ngo xê zàn lhang a nghut shî é nhîng, Abraham lé myàng wú é nghut lhê lhú?" ga taí akô.

⁵⁸ Yesuq gi, "Ngò, nungmoq lé teng za taí kôlé, Abraham lhang a hkû shi má, Ngò nyi gù bê nghut lhê." ✨ ga taí ri. † ⁵⁹ Haù mù luí, yhangmoq gi, Yesuq lé, dú râ ga luqgok kui yu akô; nghut kôlhang, Yesuq gi, haù noqkuq yhûm mai haq htoq ló byuq bê nghut ri.

9

Myoqjit Sù Lé Lhoq Gê Byí É Hkyô

¹ Yesuq gi, sô yông ló nyi é u lé, hku lé é mai myoqjit to gû nghut é byù rayuq lé myang ri. ² Haù hkûn, Yhang é chángzô pé gi, Yhang lé, "Rabai ê, shí yuq, myoqjit gû hku lé é gi, ó yuq kut shut é yubak é yanmai nghut lhê lhú? Yhang kut shut é lhú? A nghut jáng, yhang nu yhang wa kut shut é lhú?" ga myí akô.

³ Yesuq tú taí é gi, "Haù gi, yhang kut shut é yanmai le a nghut, yhang nu yhang wa kut shut é yanmai le a nghut; haù Garai Gasang é muzó lé, yhang má wó lhoq htoq shit râ matú, haù dut é ru nghut lhê. ⁴ Nga-nhúng gi, haù Ngo lé nhang kat Su é muzó lé, nyí nghut tô ashî hkûn, zui saí nyi ra râ dut lhê; myín jé jáng gi, ó yuq le, mù wó zui saí râ a nghut. ⁵ Ngò gi, mingkan htoq má nyi tô é u lé, mingkân é maubó nghut lhê." gâ ri.

✨ 8:58 Htoq Ló 3:14 † 8:58 Bun zo shî má, Yesuq gi, Yhanggûng yhang Garai Gasang nghut lhê gâ nyi nghut ri.

⁶ Yhang gi, haû su ga taí luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byí ri. ⁷ Hau htâng, haú yuq lé, "Haû Siloam wuìhtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haû mù, haú yuq gi, ê chí mù, myoq myàng luí, yhùm shut ló bê nghut ri.

⁸ Haû yhâng é yhumkyo bang eq yhang dung zô wún é lé myang wú é bang gi, "Shí yuq gi, haû zung to mù, dung zo zo lhaq kut é sù, a nghut kó lú?" ga myí bum akô. ⁹ Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

¹⁰ Haú hkûn, yhangmoq gi, "Haû nghut le gi, náng myoq hkâsu kut wó myang é lú?" ga myí akô.

¹¹ Yhang gi, "Haû Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuìhtum má ê chí pyám aq.' ga ngo lé taí ri; haû mù, ngò ê chí pyâm é htâng má, ngá myoq wó myang é nghut lhê." ga tû taí ri.

¹² Haú hkûn, yhangmoq gi, "Byù haú yuq gi, hkâmá nyi ri lú?" ga, yhang lé myí akô.

Yhang gi, "Ngò a sé." ga taí ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haû myoqjit wú bê sù lé, Hparishe pê chyáng shuí lé akô. ¹⁴ Yesuq, tse-nyhaq saí yù mù, haú yuq é myoq lé lhoq myâng byí é buinyi gi, Bánno buinyi nghut ri. ¹⁵ Haû mù, yhang, myoq hkâsu kut wó myang é hkyô lé, haû Hparishe pé le dum myí akô. Haû jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê." ga tû taí ri.

¹⁶ Haû Hparishe pé ra-am gi, "Shí yuq gi, Bánno buinyi é tará lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haû su é limik kumlhá pé lé, hkâsu wó kut htoq râ lú?" ga myí akô. Haû mù,

yhangmoq gi, myit a huí lhùm bùm lò kó nghut ri.

¹⁷ Haû mù, yhangmoq gi, haû myoqjit wú sù shut lhíng mù, "Nang lé myoq lhoq myâng byí é sù gi, hkasû é byù nghut lhê nghû, náng taí râ lú?" ga dum myí kôjáng, "Yhang gi, myiqhtoi rayuq nghut ri." ga, yhang tû taí ri.

¹⁸ Haû Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haû yhâng nu eq yhâng wa lé, ê ji lò nhang é hkûn jé shoq, a lumjíng kó nghut ri. ¹⁹ Haû mù, Yhangmoq gi, haû yhâng nu eq yhâng wa lé, "Shí yuq gi, nungnhik é yhangzo nghut lhê lú? Hku lé é hkûn mai, myoqjit gù nghut lhê lú? Yhang, ahkuí, hkâsu kut wó myang é lú?" ga myí akô.

²⁰ Haú hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê. ²¹ Nghut kôlhang, yhang, ahkuí hkâsu kut wó myang é hkyô lé le, yhâng é myoq lé ó yuq èq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo râ nghut lhê." ga tû taí akô. ²² Haû yhâng nu eq yhâng wâ nhik gi, Yudaq byu pé lé gyuq kô é yanmai, haû su ga taí kô é nghut ri; hkâsu mù gâ le, Yesuq gi, haû Hkrisduq nghut lhê ga yín yu é sù, ó yuq lé nghut kôle, haû tarajong mai lhoq htoq pyám râ nghut lhê ga, haû Yudaq suwún wuì chôm myit hpyit to bekô nghut é yanmai nghut ri. ²³ Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haû Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

²⁵ Haú hkûn, yhang tû taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

²⁶ Hau htâng, yhangmoq gi, "Yhang, nang lé haí kut byí ri lú? Náng é myoq lé, yhang,

hkâsu kut lhoq myâng byî ri l hú?" ga, yhang lé myî akô.

²⁷ Haú hkûn, yhang gi, "Ahkuî za, ngò, nungmoq lé taí kyo bê le, nungmoq sheq a gyo kôluî nhîng! Nungmoq gi, haî mù dum gyô nau akô l hú? Nungmoq le, Yhâng é chángzô pé dut nau akô l hú?" ga taú myî ri.

²⁸ Haú mù, yhangmoq gi, yhang lé gyaí rhoî é dông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê! ²⁹ Garai Gasang gi, Mosheq lé dáng nyo é hkyô lé, ngamoq sê lhê; nghut kôlhang, haú yuq eq séng luî, Yhang gi, hkâmai lé é sù nghut é lé l háng, ngamoq a sé." ga taí akô.

³⁰ Haú hkûn, haú yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê! ³¹ Garai Gasang gi, yubak dap bâng é dang lé a gyo byî é hkyô lé, nga-nhúng sê lhê. Garai Gasang gi, Yhang lé noqkuq luî, Yhâng ô nau é hkyô lé, kut é sù é dang lé kúm gyo byî lhê. ³² Hku lé é hkûn mai myoqjit gù nghut é byù lé, ó yuq eq myoq lhoq myâng byî é gâ é hkyô lé, mingkan lé joq é hkûn mai, ó yuq le a wó gyô wú é nghut lhê. ³³ Haú yuq gi, Garai Gasâng chyáng mai lé é sù za a nghut le gi, haî le wó kut râ a nghut." ga tû taí ri.

³⁴ Haú su ga jáng, yhangmoq gi, "Nàng gi, yubak htui má hku lé é sù nghut to lui nhîng, ngamoq lé wám mhoqshit lhê l hú?" ga tû taí kôluî, yhang lé hkat htoq pyâm akô nghut ri.

Woi-nyí Má Myoqjit É Hkyô

³⁵ Yesuq gi, haú yuq lé yhangmoq hkat htoq pyâm é hkyô lé wó gyo lui, yhang lé myàng hui jáng, "Nàng gi, haú Byu Yhangzo lé lumjîng lhê l hú?" ga myî ri.

³⁶ Haú hkûn, haú yuq gi, "Yhumsîng ê, haú gi, ó yuq nghut lhê l hú? Yhang lé, ngò wó lumjîng sháng gaq, taí kyo laq." ga myî ri.

³⁷ Yesuq gi, "Nàng, haú yuq lé myàng wú bê nghut lhê; ahkuî, nàng eq dáng nyo nyi é sù gi, haú yuq yhang nghut lhê." ga taí ri.

³⁸ Haú mù, haú yuq gi, "Yhumsîng ê, ngò lumjîng lhê!" ga taí lui, Yhang lé noqkuq ri.

³⁹ Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shî má Ngò jé lé é nghut lhê." ga taí ri.

⁴⁰ Yhang eq rahá nghut nyi é Hparishe pé ra-am gi, Yhang haú su ga taí é lé wó gyo kôjáng, "Hkâsu htà? Ngamoq gi, myoqjit bang dut bê l hú?" ga myî akô.

⁴¹ Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuî, nungmoq gi, myoq myàng bang nghut lhê ga kô é yanmai, nungmoq má yubak mara bo ashî kó nghut ri.

10

Sau Zúng Sù Eq Sau Hpúng

¹ Ngò, nungmoq lé teng za taí kôlé, haú sau hkup má, hkúmdong mai a wang e za, gó hkyô dông doq lut wang é sù gi, hkau sù eq damyaq nghut ri. ² Haú hkúmdong mai wang é sù kúm gi, sau zúng sù nghut ri. ³ Haú hkum zúng sù gi, yhang lé hkum hpóng byî é htoq agó, haú sau pé gi, yhâng é htê lé gyo byî akô. Yhang gi, yhâng é sau pé lé, myîng lang lui wut yù mù, yhangmoq lé shuí htoq htoq kut nyi ri. ⁴ Yhâng é sau pé banshoq lé hpông htoq yù mù, yhang gi, hí má sô ri; sau pé gi, yhâng é htê lé sê gyo kô é yanmai, yhâng é htâng má châng akô nghut ri. ⁵ Nghut kôlhang, yhangmoq gi, byù bíng é htâng má, hkâ-nhám l háng cháng kó râ a nghut e za, yhâng chyáng mai kúm hpang byuq kó râ nghut lhê; hkâsu mù gâ le, haú byù bíng é htê lé, yhangmoq a sê gyo kô é yanmai nghut ri." ga taí ri. ⁶ Yesuq gi, dangtú haú lé yù mù, yhangmoq lé taí kyô ri; nghut kôlhang, yhangmoq gi, Yhang haî taí kyô nyi é lé, a sê gyo kó nghut ri.

⁷ Haú mù, Yesuq dum taí é gi, "Ngò, nungmoq lé teng za taí kôlé, Ngò gi, haú sau pé wang é hkúmdong nghut lhê. ⁸ Ngá é hí má lé é lhunglhang bang gi, hkau bang eq damyaq pé nghut akô; haú sau pé kúm gi, yhangmoq é dang lé a lhom gyo byi kó nghut ri. ⁹ Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui râ nghut lhê. Haú yuq gi, htoq htoq wàng wàng wó kut râ eq mhan-yô myang

hò rã nghut lhê. ¹⁰ Haû hkau sũ gi, hkau rã, sat rã eq lhoq htên pyám rã matú, lé e za nghut lhê. Ngo lé é gi, yhangmoq, asak wó yũ rã eq byingjup é asak lé wó yũ rã matú sheq nghut lhê.

¹¹ Ngò gi, ge é sau zúng sũ nghut lhê; haû ge é sau zúng sũ gi, sau pé é matú, yhumsing é asak lé ap byi pyâm é nghut lhê.

¹² Haû langchyang kut sũ gi, sau pé lé sing é sau zúng sũ a nghut; haû mù, yhang gi, haû wamhkuí lé lo é lé myàng jáng, sau pé lé pyâm to mù hfang ló byuq rã nghut lhê; haû hkûn, wamhkuí gi, sau hpúng lé ê htim luí, lhoq pyo pyám rã nghut lhê. ¹³ Yhang gi, langchyang hpó nghut luí, haû sau pé é matú haí le a myit chiq byí é yanmai, hfang é nghut ri.

¹⁴ Ngò gi, haû ge é sau zúng sũ nghut lhê; haû Íwa gi, Ngo lé sê é nghut luí, Ngò le, haû Íwa lé sê é eq rajung za, ¹⁵ Ngá é sau pé lé, Ngò sê lhê; Ngá é sau pé le, Ngo lé sê akò nghut ri; Ngò gi, haû sau pé é matú, yhumsing é asak lé ap byi pyâm é nghut lhê.

¹⁶ Ngò gi, sau hkup shí mã é a nghut é gotú sau pé wó ashí; sau haû pé lé le, Ngò, shuí yù rã rã nghut lhê; sau haû pé le, Ngá é htê lé gyo kó rã nghut lhê; haû hkûn, sau hpúng rahpúng za dut luí, sau zúng sũ le rayuq za, nghut rã nghut lhê. ¹⁷ Ngò gi, Ngá é asak lé dum wó taú yù sháng gaq nghú, yhumsing é asak lé ap byi pyâm é yanmai, Ngá Wa gi, Ngo lé chyitdap é nghut lhê. ¹⁸ Ngá é asak lé, ó yuq eq le wó yu pyâm é a nghut, Ngá é myit đồng byi pyâm é ru nghut lhê. Ngò gi, yhumsing asak lé ap byi pyám rã ahko ahkáng eq haû lé dum taú yù rã ahko ahkáng wó sũ nghut lhê. Haû gi, Ngá Wã chyang mai Ngò wó yu é hkunmó nghut lhê." gã ri.

¹⁹ Dang haû pé é yanmai, haû Yudaq byu pé gi, myit a huí lhum dum dut byuq bekò nghut ri. ²⁰ Haû mã é bang myo myo gi, "Yhang gi, nat gang wang júng to luí, nã byuq bê nghut ri. Yhâng é dang lé, haí mù gyô nyi akò lhú?" ga taí bum akò.

²¹ Nghut kôlhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sũ lé, myoq wó

lhoq myâng nhâng rã lhú?" ga taí bum akò nghut ri.

Yudaq Byu Pé A Lumjng Kô É Hkyô

²² Yerusalem wã mó má, Ap Nóng Poi* jé bê nghut ri. Haû gi, gyoqmyò nám nghut ri.

²³ Haû hkûn, Yesuq gi, haû noqkuq yhùm wàng mã é, Sholumon é Jiroq mã sô yông wún ri. ²⁴ Haû u lé, haû Yudaq byu pé gi, Yhâng é lhinghkyuq mã lé zing bùm kômù, "Nàng gi, ngamoq lé hkã-myháng jé shoq úng-áng nhang nyi rã lhú? Nàng, Hkrisduq nghut le gi, ngamoq lé san za taí kyô pyám laq." ga taí akò.

²⁵ Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjng kó nghut ri. Ngá Wã é mying mai, Ngò kut é laklaí kumlhá haû pé gi, Ngá é matú saksé hkám byí nyi ri. ²⁶ Nghut kôlhang, nungmoq gi, Ngá é sau a nghut kô é yanmai, a lumjng kó nghut ri. ²⁷ Ngá é sau pé gi, Ngá é htê lé dat gyô akò; Ngò gi, yhangmoq lé sê lhê; yhangmoq le, Ngá htâng châng akò nghut ri. ²⁸ Ngò gi, yhangmoq lé, ahtum abyuq é asak byí é nghut mù, yhangmoq gi, hkã-nhám le htên byoq kó rã a nghut; ó yuq eq le, yhangmoq lé, Ngá é loq mai wó lú yũ rã a nghut. ²⁹ Yhangmoq lé, Ngá é loq mã ap byi tô é sũ, haû Ngá Wa gi, lhunglhâng htoq mã je gyaú Sũ nghut lhê; ó yuq eq le, yhangmoq lé, Ngá Wã é loq mai wó lú yũ rã a nghut. ³⁰ Ngò eq haû Íwa gi, rayuq za nghut lhê." ga tũ taí ri.

³¹ Haû hkûn, haû Yudaq byu pé gi, Yesuq lé, dú rã matú luqgok dum kui akò.

³² Nghut kôlhang, Yesuq gi, yhangmoq lé, "Haû Íwã chyang mã é laklaí kumlhá mó pé myo myo, Ngò, nungmoq lé tũn shit bê nghut lhê. Nungmoq, Ngo lé dú rã gi, hkã lhùm é yanmai nghut akò lhú?" ga myí ri.

³³ Haû Yudaq byu pé gi, "Ngamoq, Nang lé dú rã gi, haû pé hkã lhùm é yanmai le a nghut; Nàng gi, byù rayuq nghut to luí, Garai Gasang nghut é đồng taí whuí luí, Yhang lé rhoí dang taí é yanmai, dú rã nghut lhê." ga tũ taí akò.

³⁴ Haû hkûn, Yesuq gi, yhangmoq lé, "Nungmoq gi, garaí pé nghut akò nghut,

☆ 10:16 Esai 56:8 * 10:22 Ap Nóng Poi gã é gi, Garai Gasang é yhùm lé ap nóng lé gã lhê. ☆ 10:34 Hkya-on 82:6

Ngò taí bê nghut lhê.^{1*} ga nungmoq é tarâ má kê to lhê a nghut kó lúhú? ³⁵ Chyúmdang haú lé gi, a ge lhoq hpyoq pyâm é nghut luí, haú Garai Gasâng é mungdang lé wó yu é bang lé, 'garaí pé' gâ é nghut le gi, ³⁶ haú Íwa mai, Yhang é matú hkyin htoq yú luí, mingkan má nhang é Sû eq séng luí gi, hká đông nghú kó râ lúhú? 'Ngò gi, Garai Gasâng é Yhangzo nghut lhê.' nghú taí é yanmai, Ngò gi, Garai Gasang lé taí hpoi ri nghú, nungmoq, haí mù Ngo lé mara hún akô lúhú? ³⁷ Ngá Wá é muzó pé lé, Ngò kut é a nghut jáng, Ngo lé hkâlumjínng kó. ³⁸ Nghut kôhang, Ngò, haú pé lé kut é nghut le gi, nungmoq, Ngo lé a lumjínng kôhang, haú muzó pé lé lumjínng keq; haú hkûn, haú Íwa gi, Ngò má nghut nyi é hkyô lé le, Ngò gi, haú Íwa má nghut nyi é hkyô lé le, nungmoq wó sé luí, sé gyo kó râ nghut lhê." ga tû taí ri. ³⁹ Yhangmoq gi, Yhang lé chyup râ dum hen akô; nghut kôhang, Yhang gi, yhangmoq é loq mai wó lut ló bê nghut ri.

⁴⁰ Hau htâng, Yesuq gi, haú Yodan làng he hpoq mâ é, Yohan, wui-myhup hkám byí hi é jowò má ló jé ri. Haú má, Yhang nyi nyi é nghut luí, ⁴¹ byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôhang, shí yuq eq séng luí, Yohan taí é hkyô lhunglháng gi, têng ri." ga taí bum akô. ⁴² Haú jowò má, byù myo myo gi, Yesuq lé lumjínng bùm bekô nghut ri.

11

Lazaruq Shi Byuq É Hkyô

¹ Ahkuí, Lazaruq gâ é byù rayuq gi, no nyi ri. Yhang gi, haú Mariq eq yhângnhá Mahtaq nhik nyi é Behtani wà mâ é sù nghut lhê. ² Mariq haú gi, Yhumsîng lé namngón-xú hut gyun luí, hkyí má yhâng xam èq sùt byí é sù nghut ri; yhang gi, haú no nyi é Lazaruq é yhângnhá nghut ri. ³ Haú mù, haú yhângnhá nhik gi, "Yhumsîng ê, Nàng chyitdap é sù gi, no nyi ri." ga, Yesuq chyáng é taí nhang akô.

⁴ Yesuq gi, dang haú lé wó gyo jáng, "Nòhpyo haú gi, shî-nò a nghut. Haú Garai

Gasâng é Yhangzo gi, hau é yanmai, hpungwup shingkang wó dan hú é hui sháng gaq ga, Garai Gasâng é hpungwup shingkang é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶ Haú su mù, Yhang gi, haú Lazaruq no nyi ri gâ é lé, wó gyô é hkûn, haú Yhang nyi é jowò má, í nyi nyi tô ashí nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taú ló sháng." ga taí ri.

⁸ Haú hkûn, yhangmoq gi, "Rabai ê, hkû-yoq za, haú Yudaq byu pé, Nang lé luqgok èq dú sat râ da kô é nghut le nhîng, ahkuí, haú shut dum taú ló râ lúhú?" ga Yhang lé myí akô.

⁹ Yesuq gi, "Nyi gi, hkyíng hkum raxe í hkum bo lhê a nghut kó lúhú?*" Nyi má hkyô sô é sù gi, mingkan shi é maubó é yanmai myoq myàng luí, lengbat râ a nghut.

¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tû taí ri.

¹¹ Haú su ga taí é htâng má, Yhang, yhangmoq lé xoq taí kyô é gi, "Nga-nhúng é luzúm Lazaruq yhup myhî byuq bê nghut ri; nghut kôhang, Ngò gi, yhang lé ê nhaú toq râ nghut lhê." gâ ri.

¹² Haú hkûn, Yhâng é chángzô pé gi, "Yhumsîng ê, yhang yhup myhî tô é nghut le gi, ge lò râ nghut lhê." gâ taí akô. ¹³ Yesuq gi, Lazaruq shi byuq bê hkyô lé taí é nghut ri; nghut kôhang, Yhâng é chángzô pé gi, gè gè yhup myhî tô é lé taí é su ngam pyâm akô nghut ri.

¹⁴ Haú mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê. ¹⁵ Ngò haú má a nyi záng é gi, nungmoq wó lumjínng râ matú nghut luí, nungmoq é matú Ngò gabú byí ri; yhâng chyáng e ló sháng hkoí." gâ ri.

¹⁶ Haú mù, haú Zozúm le gâ é Htomaq gi, gotú chángzô pé lé, "Nga-nhúng le, Yhang eq rahá shi sháng gaq, châng e ló sháng." ga taí ri.

Haú Í-nhâ Nhik Lé, Yesuq Nhik Tîng É Hkyô

* **11:9** Nyi gi, hkyíng hkum raxe í hkum bo lhê a nghut kó lúhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

¹⁷ Yesuq gi, jé e é hkûn, haû Lazaruq lé lup má kat pyâm é myi nyí nghut bê hkyô lé, lhóm taí kyô akô. ¹⁸ Behtani wà gi, Yerusalem wà mó eq í déng kô za wê lhùm ri. ¹⁹ Haû mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tíng byi kó râ ga lé jé nyi bum akô nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé é huí ri; nghut kôlháng, Mariq gi, yhùm má nyi tô ri.

²¹ Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut. ²² Nghut kôlháng, ahkuí le, Garai Gasâng chyáng Nàng haí dung kôlháng, Yhang byi râ nghut é lé, ngò sê lhê." ga taí ri.

²³ Yesuq gi, yhang lé, "Nung gu, dum dui toq râ nghut lhê." ga taí ri.

²⁴ Haú hkûn, Mahtaq gi, "Haú jìhtùm buinyi má dum dui toq é hkûn, yhang le dum dui toq râ nghut é lé, ngò sê lhê." ga taí ri.

²⁵ Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq kôlháng, dum dui râ nghut lhê. ²⁶ Asak dui nyi luí, Ngo lé lumjîng é sù ó yuq nghut kôle, hkâ-nhám le shi é hui râ a nghut. Nàng gi, dang shî lé lumjîng lhê lhú?" ga taí ri.

²⁷ Haú hkûn, yhang gi, "Yhumsîng ê, ngò lumjîng lhê. Nàng gi, haû mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjîng lhê." ga, Yhang lé taí kyô ri.

²⁸ Yhang gi, haû su ga taí é htâng má, taú ló mù, yhanggu Mariq lé, tsik za wut yù luí, "Haû Sará jé tô ri; Yhang gi, nang lé myi nyi ri." ga taí kyô ri. ²⁹ Mariq gi, haû lé wó gyo jáng, hân za toq mù, Yesuq chyáng ê bê nghut ri. ³⁰ Haú u lé, Yesuq gi, haú wâ hkaú má a wang ló shî e za, Mahtaq eq huí é jowò má ru nyi tô ashî nghut ri. ³¹ Haû yhùmhkaú má, Mariq lé nhik tíng nyi é Yudaq byu pé gi, yhang hân za toq luí, htoq ló é lé myàng kôjáng, yhang, lup má é ngaú râ dâ lhê abe ga, myit yù kômù, yhang htâng châng e ló bum akô nghut ri.

† 11:27 Hkrisduq lé Mesaia le gâ lhê.

³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyi wang má ngóm gop to luí, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut." ga taí ri.

³³ Yesuq gi, Mariq ngaú nyi é lé le, haû yhang eq rahá lé lo é Yudaq byu pé ngau nyi kô é lé le, myàng jáng, Yhâng é myit má gyai yhang hkâm zo wuí é eq myit wui myit hke dut nyi ri. ³⁴ Haû mù, Yhang gi, "Yhang lé, hkâmá tô tô akô lhú?" ga myi jáng, yhangmoq gi, "Yhumsîng ê, lé wú wú aq." ga tû taí akô.

³⁵ Yesuq gi, ngaú bê nghut ri.

³⁶ Haû mù, haû Yudaq byu pé gi, "Wú keq, Yhang gi, Lazaruq lé, haû-í yhang chyit ri-nhung!" ga taí akô.

³⁷ Nghut kôlháng, ra-am gi, "Haû myoqjít sù lé, myoq wó lhoq myâng byi é Sù gi, shí yuq lé le, a shî lo shoq a wó kut é lhú?" ga taí bum akô nghut ri.

Lazaruq Lé Lhoq Dui Toq É Hkyô

³⁸ Yesuq gi, Yhâng é myit má radàm dum gyai yhang hkâm zo wuí é èq, lup má lé jé ri. Lup haû gi, luqhkýung dong nghut luí, luqgok rachâm èq chí tô akô. ³⁹ Haû mù, Yhang gi, "Luqgok haû lé yu pyám keq." ga taí ri.

Haú hkûn, haû shi byuq su é yhângnhá Mahtaq gi, "Yhumsîng ê, yhang lé, haú má tô tô é myi nyi lháng nghut bê yanmai, ahkuí gi, bup nàm berâ nghut lhê." ga taí ri.

⁴⁰ Haû mù, Yesuq gi, "Nàng, lumjîng é nghut le gi, haû Garai Gasâng é hpungwup shingkang lé, wó myâng râ nghut lhê nghú, Ngò, nang lé taí kyô wú bê a nghut lhú?" ga taí ri.

⁴¹ Haû mù luí, yhangmoq gi, luqgok haû lé yu pyâm akô. Hau htâng, Yesuq gi, mauhkûng shut tu wú luí, "Áwa ê, Nàng, Ngá é dang lé gyo byi é yanmai, Ngò, Nang lé jeju hkya-ôn lhê. ⁴² Nàng gi, hkâ-nhám le, Ngá é dang lé gyo byi nyi é lé, Ngò sê lhê; nghut kôlháng, Nàng, Ngo lé nhang kat é hkyô lé, shî má yap tô é bang lumjîng kó sháng gaq nghú, yhangmoq é matú, Ngò, isu nghú taí é nghut lhê." ga taí ri.

⁴³ Yhang gi, haû su ga taí luí, "Lazaruq ê, htoq lô aq." ga htê mó eq wut kat ri. ⁴⁴ Haú hkûn, haú shi byuq bê sù gi, yhâng é loq hkyí pé má pân eq htup yup to gû eq, yhâng é myoqdong má hpajet eq htup to gû htoq lo ri.

Haû mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taí ri.

*Yesuq Lé Sat Pyám Râ Haq Dâ É Hkyô
Mht 26:1-5; Mrk 14:1-2; Luk 22:1-2*

⁴⁵ Haû mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjîng bùm bekô nghut ri. ⁴⁶ Nghut kôlhang, yhangmoq chyáng mâ é ra-am gi, haû Hparishe pé chyáng lô mù, Yesuq kut é hkyô lé, lô taí kyô akô. ⁴⁷ Haû mù, haû hkyangjong agyi pé eq Hparishe pé gi, Yudaq byin tú wapdoq‡ zuphpong lé ji tsîng to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè râ lúh? ⁴⁸ Nga-nhúng, Yhang lé haû su ru kut nyí nhang é nghut jáng, yuq hkangmó gi, Yhang lé lumjîng kó râ nghut lhê; haú hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq htên pyám kó râ nghut lhê." ga taí akô nghut ri.

⁴⁹ Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lháng a sé kó nghut ri-nhung! ⁵⁰ Haú byuhú gón htên byoq byuq râ htoq má, byuhú hau é matú, byù rayuq shî hkâm byi le gi, nungmoq é matú je gè râ hkyô lé, nungmoq, a myít jé kó nghut ri." ga taí kat ri.

⁵¹ Yhang haû su ga taí é gi, yhumsing myit dông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shî hkâm byi râ nghut é hkyô lé le, ⁵² byuhú hau é matú baú a nghut e za, haû byo myín tô é, Garai Gasâng é yhangzô pé lé, shuít tsîng yù mù, rading ralhum za dut nhâng râ matú, shî hkâm byi râ nghut é hkyô lé le, myiqhtoi dang taí é ru nghut lhê. ⁵³ Haú nyí mai, yhangmoq gi, Yesuq lé sat râ matú chôm da bekô nghut ri.

⁵⁴ Hau é yanmai, Yesuq gi, Yudaq byu pé gyoro má, de de a sô shit wún e za, haú mai htoq luí, haú yoso eq chyâng lhùm é mau mâ é, Ehprim gâ é wà má é mù, Yhâng é chángzô pé eq rahá nyi nyi ri.

⁵⁵ Haú Yudaq byu pé é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông yhumsing gùng lé lhoq sân-yúng yù râ matú, yosô wà pé mai, Yerusalem wà mó shut doq lô bum akô. ⁵⁶ Haú mù, yhangmoq gi, Yesuq lé ho nyi kô é nghut luí, haú noqkuq yhùm wàng má yap to uchyang, rayuq eq rayuq, "Nungmoq, hkâsu wó myit akô lúh? Yhang gi, Poí má a lé lô râ gâ lhê là?" ga myí lhùm bum akô. ⁵⁷ Nghut kôlhang, haú hkyangjong agyi pé eq Hparishe pé gi, Yesuq lé wó chyup yù râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

12

*Yesuq, Namngón-xù But Byi Huí É Hkyô
Mht 26:6-13; Mrk 14:3-9*

¹ Haú Lhoqlhai Poí jé râ hkyuq nyi râ ashî hkûn, Yesuq gi, Yhâng eq shi é mai lhoq dui toq yu é sù, Lazaruq nyi é Behtani wà má lô jé ri. ² Haú má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haú Yesuq eq rahá siboí má zô zung nyi bang mâ é rayuq nghut ri. ³ Haú hkûn, Mariq gi, haú nardu amyit mai za saí yu é, gyai hpaú é namngón-xù raxe í rûng kô yu lé mù, Yesuq é hkyí má hut gyun byi luí, yhâng é uxam eq sùt byí ri. Haú mù, yhùm haú gi, namngón-xù shôm byíng to bê nghut ri.

⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi, ⁵ "Haú myùng bang lé byí pyám râ matú, haú namngón-xù lé denari sum sho eq haí mù a ùng pyám é lúh?" ga taí ri. ⁶ Yhang haû su ga taí é gi, myùng bang lé chiq byí é yanmai taí é a nghut, yhang gi, ngùn htûng chûng sù nghut luí, haú má kat tô é ngùn lé, yhumsing é matú lhaq yu

‡ 11:47 Yudaq byin tú wapdoq lé Grik dông gi, San-hedrin gâ lhê.

chùng chùng kut é, hkau sù nghut é yanmai taí é nghut ri.

⁷ Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xù shí lé hkong to byî é nghut lhê. ⁸ Haû myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut." ga tũ taí ri.

⁹ Haû u lé, Yudaq byu pé ajùm ayò gi, haû má Yesuq nyi é lé sé kôluí, lé lo akò; haû bang gi, Yesuq é yanmai za lé kô é a nghut, haû Yhâng eq shí bê mai lhoq dui toq yu é Lazaruq lé, lé myâng nau kô é yanmai le nghut ri. ¹⁰ Haû mù, haû hkyangjong agyi pé gi, Lazaruq lé le, sat pyám râ matú chòm hpyê lhùm akò. ¹¹ Hkâsu mù gâ le, yhâng é yanmai, haû Yudaq byu pé myo myo gi, Yesuq chyáng lhing ló kômù, Yhang lé lumjúng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyí, haû Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akò. ¹³ Haû mù, yhangmoq gi, byùm-haq pé yu chùng mù, Yhang lé é tẽ uchyang,

"Hosana!"*

Haû Yhumsing é myìng mai jé lé lô Sù gi, hkungsô wó nyí sháng gaq ô!

Haû Israelaq byu pé é Hkohkâm gi, hkungsô wó nyí sháng gaq!"[✧]

ga, taí garú bum akò nghut ri. ¹⁴ Haû hkûn, Yesuq gi, logúng zo radu lé myàng luí, doq jî ri;

¹⁵ haû gi, "Zi-un byizo† é, hkâgyuq; wú keq, nungmoq é hkohkâm gi, logúng zo má jì mù lé lo nyi ri."[✧]

ga, kâ tô é eq rajung za nghut ri.

¹⁶ Haû pé banshoq lé, Yhâng é chángzò pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huí é htâng má za sheq, haû pé gi, Yhang eq séng luí kâ tô é hkyô lé le, haû eq rajung za,

Yhang lé, yhangmoq mai kut bê hkyô lé le, bùm sê kat akò nghut ri.

¹⁷ Haû Yesuq gi, lup hkaû má é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haû hkyô lé, saksé hkám byî nyi akò. ¹⁸ Haû mù, byù myo myo gi, Yesuq tũn shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akò. ¹⁹ Hau é yanmai, haû Hparishe pé gi, "Wú keq, nganhúng, hkâsu yhang a ge kut lo nhung! Haû mingkan gón gi, Yhâng htâng châng bùm bekò." ga, rayuq eq rayuq taí lhùm bum akò nghut ri.

Yesuq, Yhang Shí Râ Hkyô Lé Te Taí É Hkyô

²⁰ Haû hkûn, noqkuq râ matú Poí má doq ló é bang má, Grik pé ra-am le bo tô akò.

²¹ Yhangmoq gi, Galile mau, Bet-saida wà mó má é Hpilip chyáng lé jé kômù, "Àhkaû ê, ngamoq gi, Yesuq lé myàng nau ri." ga, dung tóngbàn akò. ²² Haû mù, Hpilip gi, Andre lé, é taí kyô ri; Andre eq yháng nhik gi, Yesuq lé, é taí kyô akò.

²³ Haû mù, Yesuq gi, "Haû Byu Yhangzo gi, hpungwup shingkang dan hù é hui râ matú, ahkyíng jé bê nghut ri. ²⁴ Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashí myo myo lhoq htoq râ nghut lhê.

²⁵ Haû yhumsing é asak lé chyitdap é sù gi, asak sùm byuq râ nghut lhê. Mingkan shí má, haû yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. ²⁶ Ngo lé dojaú é sù ó yuq nghut kôle, Ngá htâng cháng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá Wa gi, haû Ngo lé dojaú é sù lé, shigyaú râ nghut lhê.

²⁷ Ahkuí, Ngò, myit wuîhke nyi ri; Ngò hkâsu nghú taí râ lhi? 'Áwa ê, ahkyíng shí mai Ngo lé lhoq lhut yù laq.' nghú taí râ lhú? Nghut kôle, Ngò gi, ahkyíng shi é matú

* **12:13** Hebre dang má, hosana gâ é gi, "ahkuí hkyi yù aq" gâ é nghut lhê. Nghut kôlhang, bun zo shí má gi, hkyá-on dang đông chung é nghut lhê. ✧ **12:13** Hkyá-on 118:25-26 † **12:15** Hebre myíng đông Zi-un byizo gâ é gi, Yerusalem má é byu pé lé gâ é nghut lhê. ✧ **12:15** Zhk 9:9

za sheq jé lé é ru nghut lhê. ²⁸ Áwa ê, Náng é myìng lé hpungwup shingkang dan hu nhâng aq hkoì!" ga taí ri.

Haú hkùn, "Ngò gi, Ngá é myìng lé hpungwup shingkang dan hu nhâng bê nghut luí, dum dan hu nhâng shirâ nghut lhê." gâ é htê, mauhkùng mai htoq lo ri. ²⁹ Haú má nyi tô é byù moq mó gi, haú lé wó gyo kôjáng, "Maugum gum ri." gâ bum akô; ram gi, "Yhang lé, maumang lagyo rayuq nyo ri." ga taí bum akô nghut ri.

³⁰ Haú hkùn, Yesuq gi, "Danghtê shî gi, Ngá é matú a nghut, nungmoq é matú ru nghut lhê. ³¹ Ahkuí gi, mingkan shî lé jéyáng râ ahkyíng nghut bê; mingkan shi é zau gi, ahkuí hkat htoq pyâm é hui râ nghut lhê. ³² Nghut kôlhang, Ngò gi, myigùng mai tu shap kat é hui é hkùn, byù lhunglhang bang lé, Ngá chyáng shê yù râ nghut lhê." ga taí ri. ³³ Yhang haú su ga taí é gi, Yhang hkâsu kut shî râ nghut é hkyô lé shit é nghut ri.

³⁴ Haú hkùn, haú byù moq mó gi, "Haú tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhîng, 'Haú Byu Yhangzo gi, tu shap é hui ra râ nghut lhê.' nghû, Nàng hkâsu kut wó taí lhê lú?" ga, myí akô.

³⁵ Haú mù, Yesuq gi, yhangmoq lé, "Nungmoq chyáng, haú maubó joq nyi râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashî hkùn sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri. ³⁶ Nungmoq gi, maubó é yhangzô pé wó dut kó sháng gaq, haú maubó joq nyi ashî hkùn, haú lé lumjíng keq." ga taí ri. Yesuq gi, dang haú ban taí jáng, yhangmoq chyáng mai htoq ló luí, haq byuq bê nghut ri.

Yudaq Byu Pé, A Lumjíng Ru Dut Nyi Kô É Hkyô

³⁷ Yesuq gi, yhangmoq é hí má, limik kumlhá haú pé banshoq kut shit kôlhang,

yhangmoq gi, Yhang lé a lumjíng shi kó nghut ri. ³⁸ Haú gi,

"Yhumsîng ê, nga-nhùng é danglù lé, ó yuq wá lumjíng byi wú é lú? Haú Yhumsîng é loq‡ gi, ó yuq lé htoq shit wú é lú?"[✧]

ga, myiqhtoi Esai-aq taí tô é dang lo dik é nghut ri.

³⁹ Yhangmoq a wó lumjíng kô é hkyô gi, Esai-aq taí é dang má,

⁴⁰ "Yhang gi, yhangmoq é myoqjí lé lhoq chit byi luí, yhangmoq é i-myt lé lhoq htan to byi bê nghut ri;

haú mù, yhangmoq gi, myoqjí èq a wó myáng, i-myt èq a wó sê gyo, Ngò, yhangmoq lé yâ ge byi râ matú, a wó lhing taú lò kó dut râ nghut lhê."[✧]

ga le bo tô é yanmai nghut lhê. ⁴¹ Esai-aq gi, Yesuq é hpungwup shingkang lé myang é yanmai, Yhang eq sêng é hkyô lé, haú su ga taí é nghut ri.

⁴² Nghut kôlhang, haú uphkâng bang myo myo lhang gi, haú u má, Yesuq lé lumjíng bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yhangmoq lumjíng bê hkyô lé a yín yu bùm kó nghut ri. ⁴³ Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé chyáng mâ é aróng lé, je ô nau kô é yanmai nghut ri.

⁴⁴ Haú mù, Yesuq, htê mó èq taí é gi, "Ngo lé lumjíng é sù gi, Ngo lé baú lumjíng é a nghut; haú Ngo lé nhang kat é Sù lé le, lumjíng é nghut lhê. ⁴⁵ Ngo lé myang é sù gi, haú Ngo lé nhang kat é Sù lé le myang é nghut lhê. ⁴⁶ Ngò gi, Ngo lé lumjíng é sù ó yuq le, mauchut hkaú má a nyi sháng gaq nghû, maubó dông mingkan má lé jé é nghut lhê.

⁴⁷ Ngò gi, Ngá é dang lé wó gyo luí, a châng é sù ó yuq lé le, jéyáng râ a nghut; hkâsu mù gâ le, Ngò gi, mingkan lé jéyáng râ matú jé lé é a nghut; haú mingkan lé hkyi yù râ matú sheq, jé lé é ru nghut lhê.

⁴⁸ Ngo lé he-ngik luí Ngá é dang lé a hap yu é sù lé, jéyáng râ Sù rayuq nyi lhê; Ngò taí é danghkun haú gi, haú jihtûm buinyi má,

‡ 12:38 Yhumsîng é loq gâ é gi, Yhumsîng é hpungwup a-tsam lé gâ é nghut lhê. ✧ 12:38 Esai 53:1 ✧ 12:40 Esai 6:10

haú yuq lé mara byi râ nghut lhê. ⁴⁹ Hkâsu mù gâ le, Ngò gi, Ngá é myit đông taí é a nghut; nghut kôlhang, Ngò haí taí râ eq hkâsu nghu taí râ lé gi, haú Ngo lé nhang kat é sù Íwa mai, Ngo lé hkunmó hkyô to bê nghut lhê. ⁵⁰ Haú Yhâng é hkunmó gi, ahtum abyuq é asak nghut é lé, Ngò sê lhê. Haú mù luí, Ngò, haí taí kôlé, haú Íwa mai Ngo lé taí kyô é lé za, taí é nghut lhê." gâ ri.

13

Chángzô Pé É Hkyî Chi Byî É Hkyô

¹ Haú Lhoqlhai Poí jé râ hí má za, Yesuq gi, Yhang, mingkan shî mai Yhâng Wâ chyáng htot ló râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jihtûm jé shoq Yhâng é chyitdap myit lé shit râ nghut lhê.

² Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byi to gû nghut ri. ³ Yesuq gi, haú lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló râ sù nghut é lé le, sê ri. ⁴ Haú mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhûm èq hpyihit hit tô ri. ⁵ Hau htâng, Yhang gi, jirung má uchyam hut kat mù, Yhâng é chángzô pè é hkyî chi byi luí, haú Yhâng é hpyidum má hit tô é hpajet èq sut huí byi ri.

⁶ Yhang gi, Simun Petruq chyáng jé jáng, Simun Petruq gi, "Yhumsîng ê, Nàng gi, ngá hkyî lé chi byi râ nghut lhê lú?" ga myí ri.

⁷ Haú hkûn, Yesuq gi, "Ngò, haí kut nyi é hkyô lé, ahkuí, nàng sê gyo râ a nghut; nghut kôlhang, htâng má sê gyo râ nghut lhê." ga tû taí ri.

⁸ Petruq gi, "Ngá hkyî lé, Nàng, hkâ-nhám le wó chi byi râ a nghut." ga taí jáng, Yesuq gi, "Nang lé, Ngò a chi byi é nghut jáng, nàng gi, Ngò eq séng râ a nghut." ga tû taí ri.

⁹ Haú hkûn, Simun Petruq gi, "Yhumsîng ê, haú su nghut jáng gi, ngá é hkyî lé baú za a nghut, ngá é loq eq ulhum lé le chi byi laq!" ga tû taí ri.

¹⁰ Yesuq gi, "Gùng chi bê sù gi, hkyî za chi jáng, ragùngdû é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tû taí ri. ¹¹ Hkâsu mù gâ le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

¹² Yesuq gi, yhangmoq é hkyî lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byi é hkyô lé, sê gyo akô lú?" ¹³ Nungmoq, Ngo lé, 'Sarâ' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lhê. ¹⁴ Ngò, nungmoq é Sarâ eq Yhumsîng nghut sù lhang, nungmoq é hkyî lé chi byi é nghut le gi, nungmoq le, rayuq eq rayuq é hkyî lé chi byi lhum râ dut lhê. ¹⁵ Nungmoq gi, Ngò, nungmoq lé kut byi é su kut kó sháng gaq nghu, Ngò, nungmoq lé alik kut shit tô é nghut lhê. ¹⁶ Ngò, nungmoq lé teng za taí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut. ¹⁷ Ahkuí, nungmoq gi, haú pé lé sé bekô nghut luí, châng kut kô é nghut jáng, hkungsô wó kó râ nghut lhê.

Yesuq Lé Ap Pyám Râ Lé, Te Taí É Hkyô

¹⁸ Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kôlhang, 'Haú ngá é muk lé bo zô é sù gi, ngo lé, yhâng é hkyihtáng la-nhik èq nâng htíng râ nghut lhê.'* gâ é Chyúmdang lé, lhoq dik râ matú ru nghut lhê.

¹⁹ Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq* nghut é lé, nungmoq wó lumjíng kó râ matú nghut lhê. ²⁰ Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê." gâ ri.

²¹ Yesuq gi, haú su ga taí é htâng má, myit wuîhke nyi mù, saksé hkâm é gi, "Ngò, nungmoq lé teng za taí kôlé, nungmoq mâ

* 13:18 Hkya-on 41:9 * 13:19 Haú Yuq gâ é gi, Hkrisduq lé gâ é nghut lhê.

é rayuq sù gi, Ngo lé ap pyám râ nghut lhê." gâ ri.

²² Haù mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhúm bum akô nghut ri. ²³ Haù Yesuq chyitdap é chángzo rayuq gi, Yesuq é tanghkoí nâm má leq nge zung tô ri. ²⁴ Haù mù, Simun Petruq gi, chángzo haù yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

²⁵ Haù mù, chángzo haù gi, Yesuq é tanghkoí má saí leq nge zung mù, "Yhumsîng ê, haù gi, ó yuq nghut lhê lhú?" ga, Yhang lé myí ri.

²⁶ Yesuq gi, "Ngo, muk jap zo shí lé jum yù mù, byí é sù gi, haù yuq nghut lhê." ga tú taí luí, muk jap zo haù lé jum yù mù, Simun é yhangzo Yudaq Iskarut lé byí ri. ²⁷ Yudaq gi, muk haù lé yù zo kat é eq, Tsadán gi, yhang chyáng wàng bê nghut ri.

Haù mù, Yesuq gi, "Nàng kut râ é hkyô lé, hân kut aq hkoí." ga yhang lé taí kat ri. ²⁸ Nghut kôlhang, yhang lé, Yesuq haù su ga haù mù taí é hkyô lé, zohpoq haù má nyi tô é bang gi, rayuq lhang a sê gyo kó nghut ri. ²⁹ Haù Yudaq gi, ngùn zum sù nghut é yanmai, ra-am gi, haù Poí má râ é hkyô lé, ê wuí râ matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akô nghut ri. ³⁰ Yudaq gi, muk haù lé lhom yù eq, htoq ló byuq bê nghut ri. Haù u gi, mauchut bê nghut ri.

Petruq He-ngik Pyám Râ Lé, Yesuq Te Taí É Hkyô

Mht 26:31-35; Mrk 14:27-31; Luk 22:31-34

³¹ Haù yuq htoq ló byuq jáng, Yesuq taí é gi, "Ahkuí, haù Byu Yhangzo gi, hpungwup shingkang dan hù é nghut luí, Garai Gasang gi, haù Byu Yhangzô é yanmai, hpungwup shingkang dan hu bê nghut ri. ³² Garai Gasang gi, haù Byu Yhangzô é yanmai, hpungwup shingkang dan hù é nghut jáng, Yhang le, Yhang má haù Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

³³ Ngá zo pé ê, Ngo, nungmoq eq rahá nyi râ gi, razup za ru nghut alô. Nungmoq gi,

Ngo lé hô kó râ nghut lhê; nghut kôlhang, 'Ngo ló é jang má, nungmoq wó jé kó râ a nghut.' nghú, haù Yudaq byu pé lé, Ngo taí é eq rajung za, ahkuí, nungmoq lé le, Ngo taí lhê.

³⁴ Ngo, nungmoq lé, hkunmó asik byi to kô lé, nungmoq yhangchang chyitdap lhum keq. Ngo, nungmoq lé chyitdap é su, nungmoq yhangchang chyitdap lhum rá dut lhê. ³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhang bang sé kó râ nghut lhê." gâ ri.

³⁶ Haù hkùn, Simun Petruq gi, "Yhumsîng ê, Nàng, hká shut ló râ lhú?" ga, Yhang lé myi jáng, Yhang gi, "Ngo ló é jang má, nungmoq, ahkuí a wó châng kó râ nghut lhê. Nghut kôlhang, htâng má gi, nungmoq cháng ra kó râ nghut lhê." ga tú taí ri.

³⁷ Petruq gi, "Yhumsîng ê, haù mù luí, ahkuí ngò Nàng htâng a wó châng é lhú? Ngo gi, Nàng é matú, shí hkám râ rì rì nghut lhê." ga taí ri.

³⁸ Haù mù, Yesuq taí é gi, "Nàng gi, gè gè yhang, Ngá é matú shí hkám râ lhú? Ngo, nàng lé teng za taí lé, woq a tûn shimá, nàng, Ngo lé sum dâm he-ngik pyám râ nghut lhê.

14

Yesuq, Yhâng É Chángzô Pé Lé Nhik Ting É Hkyô

¹ Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. ² Ngá Wá é yhúm má, nyi jowò myo myo joq lhê; a joq é ru nghut le gi, noq mai, Ngo, nungmoq lé taí kyo râ nghut lhê. Ngo, haù má ló é gi, nungmoq é nyi jowò ló hên lánng râ matú ru nghut lhê. ³ Ngo gi, ló mù, nungmoq é matú nyi jowò ló hen é nghut jáng, Ngo nyi é jang má nungmoq le wó nyi shoq, Ngo eq rahá nyi râ matú, Ngo dum taú lé mù, nungmoq lé, lé shuí yù râ nghut lhê. ⁴ Ngo ló é jang má jé é hkyô lé, nungmoq sê lhê." gâ ri.

Yesuq Za Hkyô

⁵ Haù hkùn, Htomaq gi, Yhang lé, "Yhumsîng ê, Nàng hká shut ló é lé lhang,

ngamoq a sê le nhîng, hkyô haû lé, ngamoq hkâsu kut wó sé râ lúhú?" ga myî ri.

⁶ Yesuq gi, "Ngò gi, hkyô nghut lhê; haû tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut. ⁷ Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lhê. Ahkuî mai, nungmoq gi, Yhang lé sé kô é htoq agó, myàng le myang wú bekô nghut lhê." ga tû taí ri.

⁸ Haú hkûn, Hpilip gi, "Yhumsîng ê, ngamoq lé, haû Íwa tûn shit laq, haú hkûn, ngamoq nhik shî râ nghut lhê." ga taí ri.

⁹ Yesuq tû taí é gi, "Hpilip ê, Ngò, nungmoq eq shî myáng lhang nyi lò bê le nhîng, nàng, Ngo lé a sé lúhú? Ngo lé myang é sù gi, haû Íwa lé myàng bê nghut ri; haû nghut le nhîng, 'Ngamoq lé, haû Íwa tûn shit laq.' nghû, nàng hkâsu wó taí lhê lúhú? ¹⁰ Ngò gi, haû Íwa má nghut nyi luí, haû Íwa gi, Ngò má nghut nyi é hkyô lé, nàng a lumjîng lúhú? Ngò, nungmoq lé taí é dang haú pé gi, Ngá é myit mai taí é a nghut; haû Ngò má lúng nyi é Íwa sheq, Yhâng é mù zuí nyi é ru nghut lhê. ¹¹ Ngò gi, haû Íwa má nghut nyi luí, haû Íwa gi, Ngò má nghut nyi lhê nghû é lé lumjîng keq; haû a nghut jáng, kut shit é limik kumlhá pé dông za lhang, lumjîng keq. ¹² Ngò, nungmoq lé teng za taí kôlé, Ngo lé lumjîng é sù gi, Ngò kut é muzó lé kut râ nghut lhê. Ngò gi, haû Íwâ chyáng ló râ nghut é yanmai, haû yuq gi, hau htoq je kô é muzó pé lé lhang kut râ nghut lhê. ¹³ Haû Yhangzô é yanmai, Íwâ é hpungwup shing kang wó hû ló shoq, Ngá é myîng lé lang luí, nungmoq hai jung dung kôlhang, Ngò gyo byi râ nghut lhê. ¹⁴ Nungmoq gi, Ngá é myîng lé lang luí, hai dung kôlhang, Ngò gyo byi râ nghut lhê.

Chyoiyúng Woi-nyí Byi Râ Danggidiq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó râ nghut lhê. ¹⁶ Haû Íwa gi, nungmoq eq ahtum abyuq nyi nyi râ nghut é, hpaqchyí byi Sû gotû rayuq, nungmoq lé byi râ matú, Ngò gi, haû Íwa lé dung râ nghut lhê. ¹⁷ Haû yuq gi, tengmán é Woi-nyí nghut lhê. Haû mingkan gi, Woi-nyí

haû lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luí, nungmoq má nyi to râ Sû nghut é yanmai, nungmoq gi, Yhang lé sê akô. ¹⁸ Ngò gi, nungmoq lé, chuizô pé dông pyâm to râ a nghut; nungmoq chyáng Ngò dum jé lé râ nghut lhê. ¹⁹ Adê myáng má, haû mingkan gi, Ngo lé a myàng lo râ nghut lhê; nghut kôlhang, nungmoq gi, Ngo lé myàng kó râ nghut lhê. Hkâsu mù gâ le, Ngò gi, asak dui nyi é nghut mù, nungmoq le duí kó râ nghut lhê. ²⁰ Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haû buinyi má, nungmoq sé kó râ nghut lhê. ²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap râ nghut lhê; Ngò le, haû yuq lé chyitdap luí, Ngá gûng lé yhang, yhang lé shit râ nghut lhê." gâ ri.

²² Hau htâng, (Yudaq Iskarut a nghut sù) Yudaq gi, "Yhumsîng ê, Nàng gi, haû mingkan lé Náng gûng a shit e za, ngamoq lé shit râ nghut é gi, hai mù nghut lhê lúhú?" ga myî ri.

²³ Haú hkûn, Yesuq tû taí gi, "Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haû yuq lé chyitdap râ nghut luí, Ngá hpe gi, haû yuq chyáng lé mù, yhang eq rahá nyi râ nghut lhê. ²⁴ Ngo lé a chyitdap é sù gi, Ngá dang lé gyo râ a nghut. Nàng wó gyô é dang shí pé gi, Ngá myit mai taí é a nghut; dang haú pé gi, Ngo lé nhang kat é Sû, haû Íwâ é ru nghut lhê.

²⁵ Ngò gi, shî pé banshoq lé, nungmoq eq rahá nyi tô ashî u lé taí bê nghut lhê.

²⁶ Nghut kôlhang, Ngá é myîng dông, haû Íwa nhang kat râ nghut é, hpaqchyí byi Sû nghû é, haû Chyoiyúng Woi-nyí gi, nungmoq lé, jung hkangmó mhoq byi râ eq, Ngò, nungmoq lé taí kyo bê hkyô lhunglhang, nungmoq lé lhoq pun râ nghut lhê. ²⁷ Ngò gi, nungmoq chyáng, nguínón hkyô tô to byi bê; Ngá é nguínón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-

myit nhiklhum lé, myit wui myit hke é eq gyuq kyûm é hkâdut nhâng kó.

²⁸ 'Ngò gi, ló byuq luí, nungmoq chyáng dum taú lé râ nghut lhê.' nghû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haú Íwâ chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haú Íwa gi, Ngá htoq je ko Sû nghut lhê. ²⁹ Haú dut é hkûn, nungmoq lumjîng kó sháng gaq nghû, ahkuí, haú a dut shimá, Ngò, nungmoq lé taí kyô é nghut lhê. ³⁰ Ahkuí mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haú yuq gi, Ngo lé up râ ahkáng haí a wó é sù nghut ri. ³¹ Nghut kôlhang, haú Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nú Eq Akoq Pê É Hkyô

¹ Ngò gi, haú tsibiyiq nú akyîng nghut lhê; Ngá Wa gi, tsibiyiq hkyâm yhumsîng nghut lhê. ² Yhang gi, ashi a zuí é akoq hkangmó lé, Ngá chyáng mai kyik pyám luí, ashi zuí é akoq hkangmó lé kúm gi, ashi je myo zuí sháng gaq ga, shang pyám byí ri. ³ Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri. ⁴ Ngò má nyi nyi keq; Ngò le, nungmoq má nyi nyi râ nghut lhê. Akoq hkangmó gi, tsibiyiq nú má nui nyi é za a nghut jáng, yhang baú ashi wó zuí é a nghut. Haú eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.

⁵ Ngò gi, tsibiyiq nú nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haú yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haí le a wó kut kô é nghut lhê. ⁶ Ngò má a nyi nyi é sù gi, haú dú pyâm é hui luí, kyuq shi byuq é akoq eq wuí ri; haú sù é akoq pé gi, byu pê èq guq yù mù, myihkyóm má dú kat pyâm é hui luí, nyé

gyó byuq râ nghut lhê. ⁷ Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é haí nghut kôlhang, dung keq; haú hkûn, nungmoq lé byi râ nghut lhê. ⁸ Nungmoq gi, haú ashi ga-myhó zuí é dông, Ngá Wâ é hpungwup shingkang lé lhoq htoq shit é nghut luí, Ngá é chángzô pé nghut é hkyô lé tún shit nyi bekô nghut ri.

⁹ Haú Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gîng nyi keq. ¹⁰ Ngò gi, Ngá Wâ é hkunmó lé châng é nghut luí, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê. ¹¹ Nungmoq má Ngá é gabú hkyô joq nyi râ eq, nungmoq é gabú hkyô wó byíng jup râ matú, Ngò, nungmoq lé, dang shí pé taí é nghut lhê. ¹² Ngò, nungmoq lé chyitdap é su, nungmoq yhangchang chyitdap lhum keq; haú gi, Ngá é hkunmó nghut lhê. ¹³ Haú yhumsîng é luzúm wui é matú, yhumsîng é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuí nghut bekô. ¹⁵ Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wuí nghû wut é nghut lhê; hkâsu mù gâ le, dui-nhâng zoshâng gi, yhâng yhumsîng hpô é muzó lé a châng sé nghut ri. ¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui râ matú hkyin masat tô é ru nghut lhê. Hau hkûn sheq, Ngá é myîng lé lang mù, haú Íwâ chyáng nungmoq haí jung dung kôle, Yhang byi râ nghut lhê. ¹⁷ Nungmoq yhangchang chyitdap lhum keq; haú gi, Ngá é hkunmó nghut lhê.

Haú Mingkan Gi, Chángzô Pé Lé A Jú É Hkyô

¹⁸ Haú mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. ¹⁹ Nungmoq gi, haú mingkan eq sêng

é bang nghut é nghut jáng, haû mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luî, nungmoq gi, haû mingkan eq a sêng lo kô é yanmai, mingkan gi, nungmoq lé a jú é nghut ri. ²⁰ 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bûn nyi keq. Ngo lé lháng, yhangmoq zing-rî yù bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó râ nghut lhê. ²¹ Nghut kôlhang, yhangmoq gi, Ngá é mying é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang kat é Sû lé, yhangmoq a sé kôluî nghut ri. ²² Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuî gi, yhangmoq mara wó taí hkyut râ a nghut lo. ²³ Ngo lé a jú é sù gi, Ngá Wa lé le a jú é sù nghut ri. ²⁴ Haû ó yuq lháng a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuî kúm gi, laklai kumlhá haû pé lé yhangmoq myang nyi kôlhang, Ngò eq Ngá Wa lé a jú kô é nghut ri. ²⁵ Haû gi, 'Yhangmoq gi, jungúyô má Ngo lé a jú kut akô nghut ri.'^{*} ga, yhangmoq é tarâ má kâ tô é dang lé lhoq dik é nghut ri.

²⁶ Haû Íwâ chyáng mâ é, Ngò nhang kat râ nghut é, Íwâ mai htoq lé lo é tengmán é Woi-nyí nghut é, haû hpaqchyî byi Sû jé lé é hkûn, Ngá é hkyô lé saksé hkâm byi râ nghut lhê. ²⁷ Nungmoq le, Ngò eq rahá sâng-hi mai nyi bekô nghut é yanmai, saksé hkâm byi ra kó râ nghut lhê.

16

¹ Nungmoq gi, myit lingbat jowò a joq kó sháng gaq nghû, haû pé banshoq lé, Ngò, nungmoq lé taí kyo bê nghut lhê. ² Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haû dông mai Garai Gasang lé dojaú nyi lhê ga myit yu

* 15:25 Hkya-on 35:19; 69:4

é ahkyíng, gè gè yhang, jé râ nghut lhê. ³ Yhangmoq gi, haû Íwâ lé le, Ngo lé le, a sé kô é yanmai, haû su kut kó râ nghut lhê. ⁴ Nghut kôlhang, nungmoq lé, Ngò sidiq byi é hkyô lé, ahkyíng jé jáng nungmoq bûn nyi kó sháng gaq nghû, Ngò haû hkyô taí kyô é nghut lhê. Ngò gi, nungmoq eq rahá nghut nyi é yanmai, haû hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

⁵ Nghut kôlhang, ahkuî, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lú?' ga, Ngo lé a myi kó nghut ri. ⁶ Ngò, nungmoq lé, haû hkyô pé taí kyô é yanmai, nungmoq é i-myit unghkaû má iyon hkyô byíng to bekô nghut ri. ⁷ Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haû hpaqchyî byi Sû gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lhê. ⁸ Yhang jé lé é hkûn, Yhang gi, haû mara wó é eq séng luî le, dingmán hkyô eq séng luî le, tarâ jéyáng hkyô eq séng luî le, haû mingkan lé tûn shit râ nghut lhê. ⁹ Haû yubak mara wó é eq séng luî ga jang, byu pé gi, Ngo lé a lumjîng kô é yanmai nghut ri. ¹⁰ Haû dingmán hkyô eq séng luî ga jang, Ngò gi, haû Íwâ chyáng ló râ nghut luî, nungmoq, Ngo lé a myàng lo kó râ nghut é yanmai nghut ri. ¹¹ Haû tarâ jéyáng hkyô eq séng luî ga jang, mingkan shi é zau gi, mara byí é huí é nghut é yanmai nghut ri.

¹² Ngò gi, nungmoq lé taí râ hkyô myo myo wó ashî; nghut kôlhang, ahkuî, nungmoq wó hkâm kó râ a nghut. ¹³ Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé râ nghut lhê. Yhang gi, Yhâng myit dông taí râ a nghut; Yhang, wó gyô yu é hkyô lé za taí luî, dut lò râ hkyô pé lé le, nungmoq chyáng taí pyô râ nghut lhê. ¹⁴ Yhang gi, Ngò wó é lé, yù mù, nungmoq lé taí kyô é eq sé nhang é dông, Ngá é hpungwup shingakang lé hû ló nhâng râ

nghut lhê. ¹⁵ Haû Îwa wó é lhunglhang gi, Ngá é chyat nghut lhê. Hau é yanmai, haû Woi-nyí gi, Ngò wó é lé yù mù, nungmoq lé sé nhâng rá nghut lhê nghû, Ngò taí é nghut lhê.

¹⁶ Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê." gâ ri.

Changzô Pé É Iyon Hkyô Gi, Gabú Hkyô Taû Dut Râ

¹⁷ Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê.' gâ é eq 'Ngò gi, Îwâ chyáng ló rá nghut é yanmai nghut lhê.' ga, Yhang taí é gi, haí jung gá nau é nghut lhê lú?" ga, rayuq eq rayuq myí lhum bum akô. ¹⁸ Hau htoq agó, yhangmoq gi, "Adê myáng má, gâ é gi, Yhang haí jung gá nau lhê lú? Nga-nhúng gi, Yhang haí taí nau é lé a sê gyo." ga, taí lhum bum akô nghut ri.

¹⁹ Yesuq gi, yhangmoq myi naû kô é hkyô lé sê ri; haû mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê.' nghû, Ngò taí é lé, haí jung gá nau lhê laq nghû, rayuq eq rayuq myi lhum nyi akô lú? ²⁰ Ngò, nungmoq lé teng za taí kôlé, haû mingkan gi, gabú nyi é u lé, nungmoq gi, ngaù é eq iyon yón é hui kó rá nghut lhê. Nungmoq gi, iyon yón é hui kó rá nghut lhê; nghut kôlhang, nungmoq é iyon hkyô gi, gabú hkyô taû dut rá nghut lhê. ²¹ Myiwe gi, zoshâng hkû rá nghut jáng, zohkû-nò nò rá ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haû no hpu é hkyô lé a bun byuq lo nghut ri. ²² Haû eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó rá nghut lhê; nungmoq é gabú hkyô haû lé, nungmoq chyáng mai ó yuq èq le wó yu pyám byi rá a nghut. ²³ Haû buinyi má, nungmoq gi,

Ngo lé, haí le a dung lo kó rá nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng haí dung kôle, Yhang byi rá nghut lhê. ²⁴ Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, haû hkûn, nungmoq myang hap yù kó rá nghut luí, nungmoq é gabú hkyô gi, byíng jup lò rá nghut lhê.

²⁵ Ngò gi, nungmoq lé, dangtú dông haû pé taí kyo bê nghut lhê; nghut kôlhang, Ngò gi, dangtú a chùng lô e za, haû Îwa eq sêng é hkyô, nungmoq lé san za taí kyô é ahkyíng jé rá nghut lhê. ²⁶ Haû buinyi má, nungmoq gi, Ngá é myíng lé lang luí dung kó rá nghut lhê. Ngò gi, nungmoq é matú, haû Îwâ chyáng dung byi rá nghû taí nyi é a nghut. ²⁷ Hkâsu mù gâ le, nungmoq gi, Ngo lé chyitdap kô é eq, Ngò gi, Îwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haû Îwa yhang, nungmoq lé chyitdap é nghut lhê. ²⁸ Ngò gi, haû Îwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haû Îwâ chyáng dum taû ló rá nghut lhê." gâ ri.

²⁹ Haû hkûn, Yesuq é chángzô pé gi, "Ahkuí, Nàng gi, dangtú a chùng é dông, san za taí kyô nyi é nghut bê! ³⁰ Nàng gi, lhunglhang lé sê é sù nghut é lé le, Nàng lé, ó yuq èq le dangmyi myi nó a rá é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjíng lhê." ga taí bum akô.

³¹ Haû hkûn, Yesuq tû taí é gi, "Nungmoq, ahkuí lumjíng bekô lú? ³² Nghut kôlhang, nungmoq gi, lhoq pyo pyám é hui luí, Ngo lé baú za tô pyám to kômù, ó le ô yhùm shut ló byuq rá ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nguínón hkyô wó kó sháng gaq nghû, Ngò gi, haû hkyô pé lé taí kyô é nghut lhê. Nungmoq gi, mingkan shí má, wuîhke hkyô hui kó rá nghut lhê; nghut kôlhang, myit wum lhoq

kíng keq. Ngò gi, mingkan lé ung pyám bê nghut lhê." gâ ri.

17

Yesuq Kyûdûng É Hkyô

¹ Yesuq gi, haû su ga taî é htâng má, mauhkûng shut tu wú luí, kyûdûng é gi, "Áwa ê, ahkyíng jé bê nghut ri; haû Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup shingkang hû ló nhâng laq ô! ² Hkâsu mù gâ le, Nang mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nang gi, byù lhunghâng bang lé up râ ahkáng, Yhang lé byi tô é yanmai nghut ri. ³ Nang za tengmán é Garai Gasang nghut é eq Nang nhang kat é sù Yesuq Hkrisduq lé, sê é gi, ahtum abyuq é asak nghut lhê. ⁴ Ngò gi, Nang, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê. ⁵ Áwa ê, haû mingkan lhang a joq shî mai, Ngò, Nang eq rahá chôm wó é hpungwup shingkang eq, ahkuí, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyûdung byi é hkyô

⁶ Mingkan mai, Nang, Ngo lé hkyin htoq yû byi é bang lé, Ngò gi, Náng é myìng lhoq htoq shit bê nghut lhê. Yhangmoq gi, Náng é byu pé nghut bekô; Nang gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekô nghut ri. ⁷ Nang, Ngo lé byi é lhungháng gi, Náng chyáng mâ é nghut é lé, ahkuí, yhangmoq sé bekô nghut ri. ⁸ Hkâsu mù gâ le, Nang, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, haû pé lé hap yû bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nang, Ngo lé nhang kat é hkyô lé le, yhangmoq lumjìng bekô nghut ri. ⁹ Ngò gi, yhangmoq é matú kyûdung byi lhê. Ngò gi, haû mingkan byu pé é matú dung byi nyi é a nghut; Nang, Ngo lé ap byi tô é bâng é matú sheq dung byi nyi é ru nghut lhê;

hkâsu mù gâ le, yhangmoq gi, Náng é byu pé nghut akô. ¹⁰ Ngò wó é lhungháng gi, Náng é chyat nghut mù, Nang wó é lhungháng le, Ngá é chyat nghut lhê. Haû mù, Ngò gi, yhangmoq má hpungwup shingkang hû é hui bê nghut lhê. ¹¹ Ngò gi, Nang chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nang, Ngo lé byi é, haû Náng myìng é a-tsam eq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut luí, Nang, Ngo lé byi é myìng hau eq, yhangmoq lé rago zúng bê nghut lhê. Haû Chyúmdang lhoq dik sháng gaq ga, haû bang mâ é htên byoq hui râ sù mai lai luí, ó yuq le a byuq byuq é nghut lhê.

¹³ Ngò gi, ahkuí, Náng chyáng lò râ nghut bê; nghut kôlhang, Ngá é gabú hkyô gi, yhangmoq chyáng byìng jup sháng gaq nghû, Ngò gi, haû pé lé mingkan má taî é nghut lhê. ¹⁴ Ngò gi, yhangmoq lé, Náng é mungdang byi bê nghut lhê; haû mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri. ¹⁵ Ngò kyûdûng é gi, Nang, yhangmoq lé mingkan mai shuí htoq yû râ matú dúng é a nghut, haû agè ashop su chyáng mai, yhangmoq lé upzúng yû râ matú sheq dúng é ru nghut lhê. ¹⁶ Ngò gi, mingkan mâ é a nghut é su, yhangmoq le, mingkan mâ é a nghut kó. ¹⁷ Yhangmoq lé, haû tengmán hkyo eq lhoq sân-yúng yû laq; Náng é mungdang gi, tengmán hkyô nghut ri. ¹⁸ Nang, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê. ¹⁹ Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lhê.

Lumjìng Bang Lhunghâng É Matú, Yesuq Kyûdung Byi É Hkyô

²⁰ Ngò gi, yhangmoq é matú baú za kyûdung byi é a nghut; Yhangmoq é danglu

é yanmai, Ngo lé lumjǐng kó râ bāng é matú le, Ngò kyúdung byí é nghut lhê. ²¹ Haú mù, yhangmoq banshoq bang gi, rading ralhūm za dut nyì kó sháng gaq. Haú mingkan gi, Nàng, Ngo lé nhang kat é hkyô lé wó lumjǐng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za nghut é su, yhangmoq le, rading ralhūm za dut nyì kó sháng gaq nghū, Ngò gi, Nàng, Ngo lé byí é hpungwup shingkang lé, yhangmoq lé byi bê nghut lhê. ²³ Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haú mingkan wó sé râ matú, yhangmoq gi, gumjup shoq rading ralhūm za wó dut kó sháng gaq nghū, Ngò gi, yhangmoq má nyi nyi luí, Nàng gi, Ngò má nyi nyi é nghut lhê.

²⁴ Áwa ê, haú mingkan lhang a joq shi mai, Nàng, Ngo lé chyitdap luí byi tô é hpungwup shingkang haú lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

²⁵ Dingmán é Áwa ê, haú mingkan gi, Nang lé a sé kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri. ²⁶ Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luí, xoq mù sé nhang nyi shirâ nghut lhê." gâ ri.

18

Yesuq Chyup Yú Huí É Hkyô

Mht 26:47-56; Mrk 14:43-50; Luk 22:47-

53

¹ Yesuq gi, haú su ga kyúdung é htàng má, Yhâng é chángzô pé eq rahá, Kedron wuìhkung mai laí byit dap ló luí, haú hpoq má joq é hkyâm ralhūm má wang e akô nghut ri.

² Hkyâm haú gi, Yesuq eq Yhâng é chángzô pé lhaq hui hui kut é jowò nghut é yanmai, haú Yesuq lé ap pyám rã sũ

Yudaq le sê ri. ³ Haú mù, Yudaq gi, haú hkyangjong agyi pé eq Hparishe pé chyáng mai nhang kat é noqkuq yhūm zúng bang ra-am eq gyezo rajùm lé, haú jowò shut shuí wang lé lo ri. Haú bang gi, myihu, myibung eq shâm lhâm pé chung lé lo akô.

⁴ Yesuq gi, Yhang má dut lò râ hkyô lhunglhang lé sé gũ nghut mù, htoq ê luí, yhangmoq lé, "Nungmoq, ó yuq lé ho akô lhu?" ga myi ri.

⁵ Haú hkùn, yhangmoq gi, "Nazaret wà byù Yesuq lé ho lhê." ga tũ tái kôjáng, Yesuq gi, "Ngò gi, haú yuq nghut lhê." ga tái ri. (Yesuq lé ap pyám sũ Yudaq le, yhangmoq eq rahá yap tô ri.) ⁶ "Ngò gi, haú yuq nghut lhê." ga Yesuq tái kat é hkùn jáng, yhangmoq gi, nungzut zut mù, myigùng má lèng leq ló bum akô nghut ri.

⁷ Yhang gi, "Nungmoq, ó yuq lé ho akô lhu?" ga, yhangmoq lé dum myi kat jáng, yhangmoq gi, "Nazaret wà byù Yesuq lé ho lhê." ga tái akô.

⁸ Haú hkùn, Yesuq gi, "Ngò gi, haú yuq nghut lhê nghū, nungmoq lé tái kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tũ tái ri. ⁹ Haú gi, "Nàng, Ngo lé byi tô é bang rayuq le lhang, Ngò, a lhoq hpyuq pyám." ga, Yhang tái tô é dang dik râ matú nghut ri.

¹⁰ Haú hkùn, Simun Petruq gi, shâm wun tô é nghut luí, shâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byi ri. (Dui-nhâng zoshâng haú yuq é myìng gi, Malhku gâ ri.)

¹¹ Haú mù, Yesuq gi, Petruq lé, "Náng é shâm lé, shambyâng má xâng pyám aq! Haú Íwa, Ngo lé byi é góm* lé, Ngò a shuq é wó nyi râ lhu?" ga tái kat ri.

Yesuq Lé, Anna Chyáng Shuí É Hkyô

Mht 26:57-58; Mrk 14:53-54; Luk 22:54

¹² Hau htàng, gyezo haú jũm eq yhangmoq é gyezau hpó, Yudaq byu pé é ming-suwún wuì gi, Yesuq lé chyup yú mù, tũ akô nghut ri. ¹³ Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut

* **18:11** Góm lé shuq gâ é gi, jamjau hui râ eq shi hkám rà lé, tái nau é nghut lhê.

ri. ¹⁴ Kayahpaq gi, byu pê é matú rayuq shî hkám byî le je gè râ nghut lhê ga, haû Yudaq byu pé lé hpaqchyî byî é sù yuq nghut ri.

Yesuq Lé, Petruq Sâng-hi Dam He-ngik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haû yuq gi, hkyangjong mó lé rago sê lhê nghut mù luí, hkyangjong mó é yhumwàng hkaû shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má lánq yap tô ri. Haû hkyangjong mó lé rago sê é sù, gotû chángzo haû yuq gi, taû htoq ló mù, hkum zúng é myiwe myhí lé taí luí, Petruq lé shuí hâng yu ri.

¹⁷ Haû hkûn, haû hkum zúng é myiwe myhí gi, Petruq lé, "Nàng gi, haû yuq é chángzô pé mâ é rayuq a nghut lhú?" ga myi jáng, yhang gi, "Ngò a nghut." ga tû taí ri.

¹⁸ Haû u lé, gyoq é yanmai, dui-nhâng zoshâng wuì eq noqkuq yhûm zúng bang gi, yhangmoq gyoq gânq râ matú myigyê eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myî Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Haû u lé, haû hkyangjong mó gi, Yesuq lé, Yhâng é chángzô pé hkyô eq Yhâng mhóqshit é hkyô eq séng luí myî ri.

²⁰ Haû hkûn, Yesuq gi, "Haû mingkan htoq má, Ngò, de de taí bê nghut lhê. Ngò gi, haû Yudaq byu pé banshoq bang chôm zîng é, tarajong pé má le, noqkuq yhûm má le, ayang mhóqshit é nghut lhê. Ngò gi, haq zaú luí taí é hkyô haí le a joq. ²¹ Nàng, haí mù Ngo lé myi lhê lhú? Haû, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akô nghut ri." ga tû taí ri.

²² Yesuq haû su ga taí jáng, haû nàm má nyi tô é noqkuq yhûm zúng sù rayuq gi, Yhang lé pyuq kat luí, "Hkyangjong mó lé wá, Nàng, haû su nghû dang tû lhê lhú?" ga taí ri.

²³ Haû hkûn, Yesuq gi, "Ngò taí shut é nghut le gi, shut é hkyô lé saksé tûn shit aq. Nghut kôlhang, Ngò gi, têng é dông ru taí le nhîng, nàng, haí mù Ngo lé pyuq lhê lhú?" ga tû taí ri. ²⁴ Hau htâng, Anna gi, Yhang lé tuí to gù, haû hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô

Mht 26:71-75; Mrk 14:69-72; Luk 22:58-62

²⁵ Haû Simun Petruq gyoq gang yap tô é hkûn, "Nàng gi, Yhâng é chángzô pé mâ é rayuq a nghut lhú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Haû Petruq eq nohkyap zân hpyit pyám byî é huí su é buinùm nghut é sù, haû hkyangjong mó é dui-nhâng zoshâng rayuq gi, yhang lé, "Haû hkyâm má, nàng, Yhang eq rahá nghut nyi é lé, ngò a myang é su ngam lhê lhú?" ga taí ri. ²⁷ Haû hkûn, Petruq gi, xoq he pyám ri; haû u yhang, woq tûn bê nghut ri.

Pilat É Myoq Hí Má, Yesuq Jé Nyi É Hkun Lhé Hkyô

Mht 27:1-2, 11-14; Mrk 15:1-5; Luk 23:1-5

²⁸ Hau htâng, yhangmoq gi, Yesuq lé, Kayahpaq chyáng mai, haû mauzau hpô é yhûmwàng shut shuí e ló akô. Haû u gi, napsûn noq ashî nghut ri. Yhangmoq gi, agot a-û a dut e za, htûngli dông Lhoqlhai Poí lé wó zo râ matú, yhûmhkaû má a wàng kó nghut ri. ²⁹ Haû mù luí, mauzau Pilat gi, yhangmoq chyáng htoq ê mù, "Shí yuq lé, nungmoq hai mara hûn nau akô lhú?" ga myî ri.

³⁰ Haû hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi râ a nghut." ga tû taí akô.

³¹ Pilat gi, "Yhang lé, nungmoq yhang shuí ló mù, nungmoq é tarâ dông ló jéyáng keq." ga taí jáng, haû Yudaq byu pé gi, "Nghut kôlhang, ngamoq gi, ó yuq lé sat rá ahkáng le a wó é nghut lhê." ga tû taí akô nghut ri. ³² Haû su dut é hkyô gi, Yesuq, Yhang hká dông shî râ ga taí é dang lé lhoq dik râ matú nghut lhê.

³³ Haû mù, Pilat gi, yhúmkaû má taû wang ló mù, Yesuq lé wut yù luí, "Nàng gi, Yudaq byu pé é hkohkâm nghut lê lú?" ga myí ri.

³⁴ Haú hkûn, Yesuq gi, "Haû gi, náng é myit dông taí é nghut lê lú? A nghut jáng, góbang mai, nang lé, Ngá é hkyô taí kyo luí nghut lê lú?" ga taû myí ri.

³⁵ Pilat gi, "Ngò gi, Yudaq byù nghut lê lú? Haû Nàng é byù myû eq Nàng é hkyangjong agyi pé sheq, Nang lé, ngá loq má ap byí é ru nghut lê. Nàng gi, haí kut é nghut lê lú?" ga dum myí ri.

³⁶ Haú hkûn, Yesuq gi, "Ngá é mingdán gi, mingkan shí eq a sêng. Mingkan shí eq sêng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wuì, Ngo lé chôm hung yù kó rã nghut lê. Nghut kôlhang, Ngá é mingdán gi, mingkan shí eq a sêng é ru nghut lê." ga taí ri.

³⁷ Haû mù, Pilat gi, "Haû jáng, Nàng gi, hkohkâm nghut bê lú?" ga myi jáng, Yesuq gi, "Ngo lé, hkohkâm nghut lê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lê; haú tengmán hkyô lé saksé hkám rã matú, Ngò, mingkan htoq má jé lé é nghut lê. Haú tengmán hkyô eq sêng é sù ó yuq le, Ngá é dang lé gyô ri." ga tũ taí ri.

³⁸ Haú hkûn, Pilat gi, "Tengmán hkyô gâ é gi, haí jung lú?" ga myí ri. Yhang gi, haú su ga myi luí, haú Yudaq byu pé chyáng dum htoq ê mù, "Shí yuq chyáng mara hùn rã hkyô, ngò a myàng nghut ri. ³⁹ Nghut kôlhang, haú Lhoqlhai Poí u lé, nungmoq é matú, ngò, htóng byû rayuq nhang htoq kat byi byi kut é htung, nungmoq wó akô. Haú mù, 'Yudaq byu pé é hkohkâm' lé, nhang htoq kat byi rã lé, nungmoq ô nau akô lú?" ga myí ri.

⁴⁰ Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

19

*Yesuq Lé, Tapzîng Má Jén Sat Rã Matú
Doqdân É Hkyô
Mht 27:15-31; Mrk 15:6-20; Luk 23:13-25*

¹ Haû mù luí, Yesuq lé lãng she yù mù, nhuq bat rã matú, Pilat hkunmó hkyô ri.

² Haú gyezô pé gi, zujanmaú saí yù kôluí, Yesuq é ulhum má tsung byi kômù, Yhang lé, buhîng nè hut byi akô nghut ri. ³ Hau htâng, yhangmoq gi, Yhâng chyáng dum huí ê ê kut luí, "Yudaq byu pé é hkohkâm ê! Chyung hîng xê hing nyi sháng gaq ô!" ga taí kômù, Yhâng é myoqdong má pyuq byi akô nghut ri.

⁴ Pilat gi, haú Yudaq byu pé chyáng radàm dum htoq ê mù, "Wú keq, shí yuq chyáng mara hùn rã hkyô, ngò a myang é lé nungmoq sé sháng nghù, Yhang lé, ngò nungmoq chyáng shuí htoq lé byi lê." ga taí ri. ⁵ Yesuq gi, haú zumuq tsung tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lê." ga taí ri.

⁶ Haú hkyangjong agyi pé eq yhangmoq é noqkuq yhùm zung bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hùn rã hkyô a myàng." ga tũ taí ri.

⁷ Haú hkûn, haú Yudaq byu pé gi, "Ngamoq chyáng tarã rahkat joq lê; tarã haú dông ga jang, Yhang gi, shí gíng bê nghut ri; hkâsu mù gâ le, Yhang gi, Garai Gasâng é Yhangzo haú nghut lê gâ ri." ga xoq taí akô.

⁸ Pilat gi, dang haú lé wó gyo jáng, je gyô gyuq luí, ⁹ yhúmkaû shut dum wang ló mù, Yesuq lé, "Nàng, hkâmâ é sù nghut lê lú?" ga myí ri. Nghut kôlhang, Yesuq gi, dang rahkun lhang a tũ taí byi nghut ri. ¹⁰ Haú hkûn, Pilat gi, "Nàng, ngo lé a tũ taí kut lê lú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lú?" ga myí ri.

¹¹ Yesuq gi, "Nàng lé, haú ahtoq mai ahkáng byi e za a nghut le gi, nãng, Ngo lé haí kut rã a-tsam le wó rã a nghut. Haú mù luí, Ngo lé, nãng é loq má ap byi é sù gi, mara je bo é nghut lê." ga tũ taí ri.

¹² Haú hkûn mai, Pilat gi, Yesuq lé lhoq lhut kat byi nau nyi bê nghut ri. Nghut

kôlhang, haû Yudaq byu pé gi, "Nàng, haû yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhum-sing gùng lé, hkohkâm gâ é sù gi, hkoséng Kehtaq eq shai lhùm é sù nghut lhê." ga, ru jâng garû nyi bum akô nghut ri.

¹³ Haû lé wó gyo jáng, Pilat gi, Yesuq lé shuí htoq ê mù, Hebre myíng dông Gabahta gâ é Luqgok hkâng myhang to jang nhu é jowò mã é tarâ jéyáng tanghkuq má zung tô ri. ¹⁴ Haû u gi, Lhoqlhai Poî é matú, Hên Lajâng é Buinyi nyí-káng raxe í hkyíng nghut ri.

Pilat gi, haû Yudaq byu pé lé, "Nungmoq é hkohkâm lé wú keq." ga taí ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haû hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lhú?" ga myi jáng, haû hkyangjong agyi pé gi, "Haû hkoséng Kehtaq mai lai luí, gotú hkohkâm ngamoq a wó." ga, tú taí akô nghut ri.

¹⁶ Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haû mù luí, yhangmoq gi, Yesuq lé shuí ló bekô nghut ri.

Tapzîng Má Jén Pyâm É Hkyô

Mht 27:32-44; Mrk 15:21-32; Luk 23:26-

43

¹⁷ Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri.

¹⁸ Yhangmoq gi, haû má, Yesuq lé tapzîng htoq má jén tap pyám akô; Yhang eq rahá, gotú í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

¹⁹ Pilat le, masat laiká kê yù luí, haû tapzîng htoq má tap tô ri. Haû má gi, "YUDAQ BYU PÊ É HKOHKÂM, NAZARET WÀ BYÛ YESUQ" gâ tô ri. ²⁰ Yesuq lé jén tô é jowò gi, myuq eq chyâng lhùm é htoq agó, haû masat laiká gi, Hebre dông le, Latin dông le, Grik dông le, kê tô é yanmai, haû

Yudaq byu pé myo myo gi, masat laiká haû lé nghap bum akô nghut ri. ²¹ Haû Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' nghú hkâká, 'Ngò gi, Yudaq byu pé é hkohkâm nghut lhê ga, Yhang taí ri.' nghú luí sheq ká aq." ga taí akô.

²² Haû hkûn, Pilat gi, "Ngò kê é dông, ngò kê to bê nghut lhê." ga tú taí ri.

²³ Haû gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haû ahte bu lé le, gàm râ dê akô; nghut kôlhang, haû gi, hkyupshi a bo e za, awang mai ahpyo hpyot kut woq tô é nghut ri.

²⁴ Haû mù, yhangmoq gi, "Bu shí lé gi, a lêng cheq e za, ó yuq myang yù ang râ laq, hkyîn shosé she wú sháng." ga, rayuq eq rayuq taí lhum akô.

Haû gi,

"Yhangmoq, Ngá é mebu lé chôm gam yù kó râ; Ngá é ahtê bú é matú, hkyîn shosé shê kó râ nghut lhê."*

gâ é Chyúmdang lé lhoq dik râ matú dut é nghut lhê. Haû mù, gyezô pé gi, haû su kut bekô nghut ri.

²⁵ Haû Yesuq é tapzîng nàm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà mã é Mariq pé, yap tô bum akô. ²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ánu ê* nung zo lé wú aq." ga taí mù, ²⁷ chángzo haû lé le, "Náng nu lé wú aq." ga taí ri. Haû hkûn mai, chángzo haû yuq gi, Yesuq é yhângnu lé, yhâng é yhùm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-49

²⁸ Hau htâng, Yesuq gi, ahkuí, muzó bàn bê nghut é lé sé luí, haû Chyúmdang lhoq dik râ matú, "Ngò, wuì shit ri." ga taí ri.

²⁹ Haû má, tsibiyiq wing chyîn rayambú joq tô ri; haû mù, yhangmoq gi, wuìmaù lé tsibiyiq wing chyîn haû má jum yù luí, jàm-yang ahpyo má tuí tap mù, Yhâng é nhutwuí

* 19:24 Hkya-on 22:18 * 19:26 Ánu ê, gâ é lé, Grik dông gi, "myiwe myí hí ê" ga bo tô é nghut lhê.

je shoq yhun byi akô nghut ri. ³⁰ Yesuq gi, tsibiyiq wing chyin hau lé shuq yu mù, "Mù bàn bê." ga tai ri. Yhang, hau su ga tai eq yhang, ulhum nhuq ló mù, kang byit bê nghut ri.

³¹ Htang nyi gi, ahkyak é Bánno buinyi nghut lui, hau nyi gi, Hên Lajang Buinyi nghut ri. Hau mù, Yudaq byu pé gi, Bánno buinyi má, mang pé lé tapzing htoq má a joq to nhang nau kô é yanmai, hkyi pé lé bat hkyui pyám mù, mang pé lé yu hkyô pyám nhang râ matú, Pilat chyáng dung tongban akô. ³² Hau mù lui, gyezô pé gi, lé mù, Yesuq eq jén hui su nhik má é, rayuq é hkyi lé hí bat hkyui pyám mù, rayuq é hkyi lé dum bat hkyui pyám akô nghut ri. ³³ Nghut kôlhang, yhangmoq gi, Yesuq chyáng jé é hkun, Yhang shi to láng bê nghut é lé myang kô mù, Yhang é hkyi lé a bat hkyui byi kó nghut ri. ³⁴ Nghut kôlhang, gyezo rayuq gi, Yesuq é namcham má lham eq htau kat byi jang, rada dam sui eq wui yui htoq lo ri. ³⁵ Hau lé myang é sú gi, saksé hkám byi ri; yhang saksé hkám é hkyô gi, tengmán ri. Hau yhang tai kyô é hkyô gi, teng é lé, yhang sé mù, nungmoq le wó lumjing kó shang gaq ga, saksé hkám byi é nghut ri. ³⁶ Hau hkyô pé dut é gi, "Yhang é showui rahkat lhang a lhoq hkyui râ nghut lhê."* gâ é Chyúmdang hau lhoq dik râ matú nghut lhê. ³⁷ Chyúmdang gotu ralhum má le, "Yhangmoq eq htau htong é sú lé, yhangmoq tu wú kó râ nghut lhê."* gâ é bo tô ashí nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htang, Yesuq é changzo dut nyi é Aramahti myuq byu Yosep gi, hau Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dung ri. Pilat eq ahkang byi kat jang, yhang gi, gungsôm hau lé, lé yu ló bê nghut ri. ³⁹ Yhang gi, hí hkun, myin lé, Yesuq lé é hui é sú, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê joí kô yu lé ri. ⁴⁰ Yhangnhik gi, Yesuq é gungsôm lé yu mù, Yudaq byu pé é

mang yhum htung eq rajung za, namngón jung eq rahá, pán yung eq htup yup to byi akô. ⁴¹ Hau Yesuq lé tapzing má jén sat pyám é jowò nam má, hkyâm ralhum joq ri; ó yuq lé le a lheq wú shí é, lup sik ralhum hkyâm hkaú má joq tô ri. ⁴² Hau nyi gi, Yudaq byu pé é Hên Lajang Buinyi nghut é yanmai le, lup hau le chyang é yanmai le, yhangnhik gi, Yesuq lé, hau má é lheq tô akô nghut ri.

20

Lup Akôm

Mht 28:1-10; Mrk 16:1-8; Luk 24:1-12

¹ Bánno buinyi htang, napsun noq le mau a bó shimá, Magadalaq wà má é Mariq gi, hau lup má é jé le, lup hkum má é luqlong hui hpyuq to láng é lé myang ri. ² Hau mù, yhang gi, Simun Petruq eq Yesuq chyitdap é changzo góyuq chyáng din jé ló mù, "Hau Yhumsing lé, lup mai yu htoq ló byuq bekô; hkámá é kat to kô é lé, ngamoq a sé." ga tai ri.

³ Hau mù, Petruq eq changzo hau gi, lup shut e ló akô. ⁴ Yhangnhik í yuq é din akô; nghut kôlhang, changzo hau gi, Petruq htoq má wó din lui, lup má hí din jé e ri. ⁵ Hau mù, yhang gi, ahkaú shut ngóm wú kat é hkun, hau pán yung htui leq tô é lé myang ri; nghut kôlhang, yhang gi, a wang é nghut ri. ⁶ Hau htang, Simun Petruq gi, chang jé lui, lup hkaú shut wang e ri; hau hkun, yhang gi, hau má pán yung htui joq tô é lé le, ⁷ hau Yesuq é ulhum má htup é panchoq lé le, myang ri. Panchoq hau gi, pán yung htui eq rahá a nghut e za htui jup leq tô ri. ⁸ Hau lup má hí jé é changzo le, ahkaú má wang é lui, myang jang, lumjing bê nghut ri. ⁹ (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.) ¹⁰ Hau htang, hau changzô nhik gi, yhum tau ló bekô nghut ri.

Magadalaq Wà Má É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhang, Mariq gi, lup shinggan má ngau yap tô ri. Yhang gi, ngau uchyang

lup hkaû má ngóm wú kat ri. ¹² Haú hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haî mù ngau nyi lê lhú?" ga myi kôjáng, yhang gi, "Ngá é Yhumsîng lé yù ló hpyuq kôluî, Yhang lé hkámá ló lheq to kô é lé, ngò a sê é yanmai nghut lê." ga tâ ri. ¹⁴ Haú su ga luî, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

¹⁵ Yesuq gi, "Myiwe myhí ê, nàng, haî mù ngau nyi lê lhú? Nàng gi, ó yuq lé ho wún lê lhú?" ga myi jáng, yhang gi, hkyâm saí zo sù su ngam pyám mù, "Sarâ ê, nàng, Yhang lé waq htot pyâm é nghut le gi, hkámá ê lheq tô é, ngo lé tâi kyo laq, ngò, Yhang lé yu ló râ." ga tâ ri.

¹⁶ Haú hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhîng mù, Hebre myíng dông, "Raboni!" ga wut kat ri. (Haú gi, "Sarâ ê" gâ é lichyúm nghut ri.)

¹⁷ Yesuq gi, "Ngo lé hkâzáng shi; hkâsu mù gâ le, Ngò gi, haú Îwâ chyáng a taú doq ló shî é nghut lê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lê.' gâ ri nghû, ló tâi kyo aq." ga, yhang lé tâi kat ri.

¹⁸ Magadalaq wâ mâ é Mariq gi, chángzô pê chyáng ló mù, "Yhumsîng lé, ngò myàng bê!" ga tâi luî, yhang lé shit kat é pé lé, tâi kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haú nyí, Bánno buinyî htang myîn lé, haú chángzô pé gi, Yudaq byu pé lé gyuq kô é yanmai, hkum tsing myhí pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luî, "Nungmoq nguîngón yuqyo nyi sháng gaq!" ga tâi ri. ²⁰ Yhang gi, haú su ga tâi é htâng má, yhangmoq lé, Yhâng é loq pé eq namcham lé tûn shit ri. Chángzô pé gi, haú Yhumsîng

lé myàng kôjáng, gyai gabú bùm bekô nghut ri.

²¹ Yesuq gi, "Nungmoq nguîngón yuqyo nyi sháng gaq! Haú Îwâ gi, Ngo lé nhang kat é su, Ngò gi, ahkuî, nungmoq lé nhang kat é nghut lê." ga dum tâi ri. ²² Haú su ga tâi mù, Yhang gi, yhangmoq é ahtoq má soq mut luî, "Haú Chyoiyúng Woi-nyí lé hap yù keq. ²³ Ó yuq é mara pé lé nghut kôle, nungmoq hkyut byî é nghut jáng, mara haú pé gi, hkyut pyám byî é hui râ nghut lê; nungmoq a hkyut byî é nghut jáng, mara haú pé gi, hkyut pyám é hui râ a nghut." ga tâi ri.

Htomaq Lé, Yesuq Htoq Shit É Hkyô

²⁴ Haú chángzô raxe í yuq má bo é, Zozûm le gâ é Htomaq gi, Yesuq lé jé é hkûn, haú chángzô pé eq rahá a nyi to nghut ri. ²⁵ Haú mù luî, gotû chángzô pé gi, yhang lé, "Haú Yhumsîng lé, ngamoq myàng bê." ga tâi kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mâ é shamtoq zuhkô lé myàng mù, ngá é loqnyhui eq joí wú é eq, Yhâng é namcham má, ngá é loq eq myang lap wú é za a nghut jáng, haú lé ngò lumjîng râ a nghut." ga tâi ri.

²⁶ Rabat myáng jáng, chángzô pé gi, haú yhúmhkaû má dum nyi tô akô; Htomaq le, yhangmoq eq rahá nghut nyi ri. Haú hkum pé myhí to kôlhang, Yesuq gi, lé jé mù, yhangmoq é agùng má yap to luî, "Nungmoq nguîngón yuqyo nyi sháng gaq!" ga tâi ri. ²⁷ Haú htâng, Yhang gi, Htomaq lé, "Náng é loqnyhui, shî má lé joí mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyi aq." ga tâi ri.

²⁸ Haú hkûn, Htomaq gi, "Ngá é Yhumsîng, ngá é Garai Gasang ê!" ga Yhang lé tâi ri.

²⁹ Yesuq gi, yhang lé, "Nàng gi, Ngo lé myang é yanmai, lumjîng é a nghut lhú? A myàng kôlhang, lumjîng é bang gi, hkungsô wó nyi ri." ga tâi ri.

³⁰ Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô pé hí má kut shit bê nghut ri. ³¹ Nghut kôlhang, Yesuq gi, Garai Gasang é Yhangzo Hkrisduq nghut é lé, nungmoq

wó lumjǐng rā matú eq, lumjǐng é yanmai, nungmoq Yhâng é myǐng má asak wó kó rā matú, shí hkyô pé lé kâ tô é nghut lhê.

21

Ngozo Wó Chyup Yu É Limik Kumhá

¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô má é dông nghut ri. ² Simun Petruq, Zozûm le gâ é Htomaq, Galile mau Hkanaq wà mó má é Nahtanelaq, Zebedi é yhangzo nhik eq gotú chángzo í yuq pé gi, rahá nyì to bum akô. ³ Haú hkûn, Simun Petruq gi, yhangmoq lé, "Ngò gi, ngozo kóng ê rā." ga taí jǎng, yhangmoq gi, "Ngamoq le châng lé rā." ga taí akô. Haú mù luí, yhangmoq gi, htoq ê mù, haú lhai má wàng bekô nghut ri; nghut kôlhang, haú myîn, radu lǎng a wó kóng kó nghut ri.

⁴ Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haú chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wui ê, nungmoq, ngozo wó akô lǎhú?" ga, wut myi kat jǎng, yhangmoq gi, "A wó." ga tũ taí akô.

⁶ Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jǎng, nungmoq wó kông yù kó rā nghut lhê." ga taí ri. Haú mù, yhangmoq gi, gùn dú hkyô kat é hkûn, ngozo lûm myô é yanmai, haú gùn lé lǎng a wó lǎng yù lo kó nghut ri.

⁷ Haú mù luí, haú Yesuq chyitdap é chángzo gi, Petruq lé, "Yhumsîng ru nghut ri." ga taí ri. Simun Petruq gi, "Yhumsîng ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhâng é gùng má baíyup yù mù, wui hkaú má byam wang ló bê nghut ri. ⁸ Haú chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhai mai she jé lo akô nghut ri. ⁹ Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Haú, ahkuí za nungmoq wó kông yu é ngozo, ra-am yù lé keq." ga taí ri.

¹¹ Haú mù, Simun Petruq gi, lhai má doq ji luí, kô é ngozo rasho ngó xe sũm du yhang bo é gùn lé, dùng yàm má she htoq tô ri. Ngozo haú myhó myo kôlhang, gùn gi, a jeq nghut ri. ¹² Yesuq gi, yhangmoq lé, "Napzang lé zo keq." ga taí ri. Chángzô pé gi, Yhang, haú Yhumsîng nghut é lé sé kô é yanmai, ó yuq lǎng, "Nàng, ó yuq nghut lhê?" ga, a wám myi kó nghut ri. ¹³ Yesuq gi, lé mù, muk lé é yù luí, yhangmoq lé byí ri; ngozo lé le, haú su kut ri. ¹⁴ Yesuq gi, shi é mai lhoq dui toq yù huí é htâng, Yhâng é chángzô pé lé htoq shit é má, shí gi, sum dâm nghũ rā dâm nghut ri.

Yesuq Eq Petruq

¹⁵ Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lǎhú?" ga myi jǎng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga tũ taí ri. Haú hkûn, Yesuq gi, "Ngá é sau zô pé lé, baú aq." ga, yhang lé taí ri.

¹⁶ Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lǎhú?" ga dum myi jǎng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga tũ taí ri. Haú hkûn, Yesuq gi, "Ngá é sau pé lé, rém aq." ga taí ri.

¹⁷ Dum radâm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lǎhú?" ga myi ri.

Haú hkûn, Petruq gi, "Nàng gi, ngo lé chyitdap lhê lǎhú?" ga, yhang lé Yesuq eq sũm dam dâm taí é yanmai, yhâng myit nô luí, "Yhumsîng ê, Nàng gi, lhunglǎng lé sê lhê; ngò, Nàng lé chyitdap é hkyô lé, Nàng sê lhê." ga taí ri.

Haú hkûn, Yesuq gi, "Ngá é sau pé lé, baú aq. ¹⁸ Ngò, nàng lé teng za taí lé, nàng, zorâm nghut é hkûn gi, yhumsîng gùng yhumsîng hpyihit baíyup* yù mù, ê nau é jowò hkangmó má wó é é nghut lhê; nghut kôlhang, nàng mang jǎng gi, loq í loq lham luí, nang lé góyuq eq hpyihit baíyup byi mù,

* **21:18** Hpyihit baíyup gâ é lichyúm gi, mebu wut luí ri ri kut tô é lé gâ lhê.

nàng a ê nau é jowò shut shuê ê râ nghut lhê." ga taí ri. ¹⁹ (Yesuq haú su ga taí é gi, haú Petruq, hkâsu kut shí é dông mai, Garai Gasâng é hpungwup shingkang lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, "Ngá htâng cháng aq." ga taí ri.

²⁰ Haú hkûn, Petruq gi, lhîng wú kat le, haú Yesuq chytidap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsîng ê, Nang lé ap pyám râ sù gi, ó yuq lhú?" ga, myi wú é sù nghut ri. ²¹ Petruq gi, haú yuq lé myàng jáng, Yesuq lé, "Yhumsîng ê, shí yuq gi, hkâsu dut râ lhú?" ga myí ri.

²² Yesuq gi, "Ngò jé lé é hkûn jé shoq, Ngò, yhang lé dui nyì nhâng nau é nghut le gi, nàng eq haí sêng lhê lhú? Nàng gi, Ngá htâng cháng aq." ga tû taí ri. ²³ Dang hau é yanmai, chángzo haú yuq a shî râ nghut lhê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shî râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyì nhâng nau é nghut le gi, nàng eq haí sêng lhê lhú?" ga, taí é ru nghut lhê.

²⁴ Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.

²⁵ Yesuq gi, gotû muzó myo myo le kut ashî nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lháng ngo râ a nghut nghû, ngò wó myit ri.

LAGYO Laiká (Acts)

Yesuq, Mauhkûng Má Shuî Yù Huî É Hkyô

¹ Htohpilug ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuî yu é buinyi jé shoq, ² Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê. ³ Yesuq gi, shî hkâm é htâng má, Yhang dui toq bê hkyô lé, lumgíng é saksé myo myô èq yhangmoq lé tân shit mù, buinyi myi xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri. ⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ é danggidiq byí tô é chyunghuq lé lánng nyí keq. ⁵ Hkâsu mù gâ le, Yohan gi, wui èq wui-myhup hkám byí é nghut lhê; nghut kôlhang, nungmoq kúm gi, buinyi hkâ-myháng a myáng má, Chyoiyúng Woi-nyí mai baptisma wó hkam yù kó rá nghut lhê." gâ ri.

⁶ Lagyô pé gi, Yhang eq rahá chôm zup míng tô é hkûn, Yhang lé, "Yhumsíng ê, nàng, haû Israelaq byu pé lé mingdán dum xuq byi rá gi, ahkuí yhang nghut bê lhú?" ga myí akô.

⁷ Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra. ⁸ Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yù mù luí, Yerusalem wà mó eq Yuda mau banshoq, Samariq mau eq maumyí htáng shoq, ngá é saksê pé dut kó rá nghut lhê." ga luí, yhangmoq lé taí ri.

⁹ Dang haû ban taí é htâng má, yhangmoq wú nyi le, Yhang gi, mauhkûng shut shuî yu é hui mù, yhangmoq hí mai Yhang

lé a myàng loshoq, mhut èq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nàm má htoq yap lò mù, ¹¹ "Galile byu pé ê, haí mù luí mauhkûng shut wú tsuq nyi akô lhú? Nungmoq é hí mai mauhkûng shut shuî yù huî é, haû Yesuq mauhkûng shut doq ló é u lé, nungmoq myang kat é su, Yhang dum jé lé rá nghut lhê." ga taí akô.

Yudaq É Jowò Má, Mahtiaq Lé Hkyin Kat É Hkyô

¹² Hau htâng má, yhangmoq gi, Tsanlun Bùm mai, Yerusalem wà mó shut taú ló bekô.* Haú gyoro gi, Bánno buinyi má ge sô é í za wê ri. ¹³ Yhangmoq jé ló kôjáng, yhangmoq nyi nyi kô é yhûm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. ¹⁴ Yhangmoq lhunghâng bang gi, myiwe wui le, Yesuq é yhângnu Mariq le, yhanggu pé le kut mù, i-myit rahkat za kyû chôm dung dung kut nyi akô.

¹⁵ Buinyi haú yoq má, Petruq gi, lumjíng é gumang gu-nhá† wui rasho í xê yuq kô zup zíng tô é gung gûng má, toq yap mù, ¹⁶ "Gumang gu-nhá wui ê, Yesuq lé chyup é bang lé hkyô shuî hí é sù Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri. ¹⁷ Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhang shí hkyô dut bê nghut ri." ga taí ri.

¹⁸ (Yudaq gi, yhang kut é agè ashop é muzó mai wó é ahpau èq myigùng ratóng wui yu é htâng, haú má yhang, a-nghop dông byit gyó mù wam buq goq luí, ú banshoq buq myín byuq bê nghut ri. ¹⁹ Haú hkyô lé Yerusalem wà mó má nyi é lhunghâng bang wó gyo kôjáng, myigùng haú lé yhangmoq é myíng dông,

* **1:12** Tsanlun bùm eq Yerusalem gyoro gi, déng rawuí hkup kô we ri. † **1:15** Gumang gu-nhá gâ é lé, Grik má gi, gumang za gâ to lhê.

'Akeladama' ga myhîng akô; haû gi, 'Sui myigùng', gâ é nghut ri.)

²⁰ Petruq xoq taí é gi, "Hkâsu mù gâ le, Hkya-on Kungtôn Laiká má, 'Yhâng é jowò chamchyuyui dut byuq sháng gaq; haú má ó le a nyi kó sháng gaq.'[☆]

ga luí le, dum

'Yhang wó é ayá lé byù góyuq wó yu pyám byi sháng gaq.'[☆]

ga luí le, bo tô ri. ²¹⁻²² Haû mù luí, Yohan baptisma byí hi é hkûn mai, Yesuq lé nga-nhung chyáng mai shuí yu é buinyi jé shoq, Yhumsîng Yesuq nga-nhung eq rahá htoq htoq wàng wàng kut nyi é buinyi banshoq pé má, nga-nhung eq yhang zum nyi sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhung eq rahá saksé dut râ sù nghut lhê." gâ ri.

²³ Haú hkûn, yhangmoq gi, Yustu ga le myhîng é, Barsabaq gâ é Yosep eq Mahtiaq nhik lé hkyin tô akô. ²⁴⁻²⁵ Haû mù, yhangmoq kyûdung kô é gi, "Byù banshoq é i-myit lé sê é Yhumsîng ê, Yudaq Iskarut gi, yhang ló gîng é jowò shut ló râ ga, tô pyâm tô é yhâng é lagyo ayá é matú shí nhik mâ é nàng hkyin tô é sù lé tûn shit laq ò." ga akô.

²⁶ Hau htàng, yhangmoq, byù hkyin shosé she le, Mahtiaq chyáng ang bê. Haû mai, Mahtiaq lé gi, haû lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyô

¹ Penteko-ti* buinyi jé jáng, lumjîng bang banshoq gi, jowò ralhum má za, chôm zup míng nyi tô akô. ² Haú hkûn, laidun mó lo é su gâ é htê gi, byodàn ratung, mauhkûng mai mying htoq lô mù luí, yhangmoq zîng tô é yhûm byíng shoq dut to bê nghut ri.

³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴ Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang dông nyo lo bum akô.

⁵ Haú u lé, mauhkûng ô má joq é mingdán hkgangmó mâ é, tarâ hkunggâ é Yudaq

byu pé gi, Yerusalem wà mó má bíng nyi bum akô. ⁶ Haû mying é htê lé wó gyo kôjáng, byù rajum rayò zîng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí, ⁷ maú bùm uchyang taí kô é gi, "Wú keq, ahkuí dang taí nyi é byù shí bang lhunglhâng gi, Galile byu pé chyat a nghut kó lúhú? ⁸ Haú nghut é wa, hkâsu mù nga-nhung ó le ô é yhumsîng mau mâ é myíng dông sê gyô yu lhê lúhú? ⁹ Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, ¹⁰ Hprugi eq Pamhpuli, Egotuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noqkuq htûng má lhing wang lò bang, ¹¹ Kreti zinlóng eq Arabiq mau mâ é bang, nga-nhung gi, yhangmoq hko kyô é Garai Gasâng é mauhpo muzó hkyô lé, yhumsîng mau mâ é myíng dông yhang wó sê gyô yu ri-nhung." gâ ri. ¹² Yhangmoq banshoq bang gi, maú úng-âng byuq kômù, "Shí gi, haí wá nghut lhê lúhú?" ga le, rayuq eq rayuq myí lhum bum akô.

¹³ Nghut kôlhâng, byù ra-am gi, "Shí bang gi, î shuq wut é bang nghut akô." ga luí, taí jihpoi bum akô nghut ri.

Petruq Hko Kyô É Mungdang

¹⁴ Haú hkûn, Petruq gi, lagyo góbang raxe rayuq eq toq yap mù, htê mó èq byù haú bang lé taí é gi, "Yudaq byu pé eq Yerusalem wà mó má nyi nyi é lhunglhâng bang ê, rago gyô wú keq! Ngò, nungmoq lé, shí hkyô taí kyo kôlé. ¹⁵ Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí. ¹⁶ Shí hkyô kúm gi, myiqhtoi Yoelaq taí tô é eq rajung za dut é nghut ri. ¹⁷ Yhang taí tô é gi,

'Garai Gasang îsu gâ ri: Ló htàng é buinyi pé má, Ngò Ngá é Woi-nyí lé byù lhunglhâng bâng é ahtoq má hut gyun râ nghut lhê.

Haú mù, nungmoq é yuqzo byizô pé gi, myiqhtoi htoi kó râ; nungmoq é zorâm wuì gi, myoqwup shing-rán myàng

☆ 1:20 Hkya-on 69:25 ☆ 1:20 Hkya-on 109:8 * 2:1 Penteko-ti gâ é gi, Lhoqlhai Poí laí é htàng ngo xê nyi jé é buinyi má, kut é poi lé gâ lhê.

kó rã; nungmoq é hpaû mâng pé gi, yhupmoq myàng kó rã nghut lhê.

18 Buinyi haú pé má, Ngá é dui-nhâng zoshâng hpô pé eq dui-nhâng zoshâng myhî pé é ahtoq má lhang, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó rã nghut lhê.

19 Ngò gi, ahtoq mauhkûng htoq má mauhpo muzó pé lé, a-ô myigûng htoq má, kumlhá pé lé, sui eq, myi eq, myihkau dùm pé èq kut mù tân shit rã.

20 Haû Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut rã nghut lhê.

21 Haú hkûn, Yhumsing é mying lé lãng é bang yuq hkanmó gi, hkyi yu é hui kó rã nghut lhê.*

gã ri.

22 Israelaq byu pé ê, dang shí lé gyô yù keq, nungmoq sê é eq rajung za, Nazaret wã byù Yesuq nungmoq é hí má tân shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri. 23 Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyâm é hui mù, nungmoq gi, agè ashop byu pé é loq èq, Yhang lé tapzîng htoq má jén sat pyám nhâng bekô nghut ri. 24 Nghut kôlhang, haû shî-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shî-nò jamjau mó mai, lhut pyám byi luí lhoq dui toq yû bê nghut ri. 25 Dawiq gi, shí yuq eq séng luí taí é má, 'Haû Yhumsing gi, ngá é myoq hí má hkã-nhãm le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún rã a nghut lo.

26 Haû mù, ngá i-myt gi, nuingón nyi luí, ngá nhut shô gabú hkya-ôn nyi ri; ngá é gungdu le myit myoqbyù jowò má nyi nyi rã nghut lhê.

27 Hkãsu mù gã le, nãng, ngá é woi-nyí lé mosumhkung mã tô pyâm to rã a nghut.

Nãng, nãng é Chyoiyúng Sù lé bup byuq é hui nhâng rã a nghut.

28 Nãng, ngo lé asak dui é hkyô sé nhâng bê. Nãng é myoq hí má, nãng, ngo lé gabú hkyô lhoq pyíng byi rã nghut lhê.*

gã ri.
29 Gumang wui ê, nga-nhûng é îchyí îké Dawiq kãng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhûng chyáng joq tô é lé le, ngò, nungmoq lé a gyuq a kyum wám taí lhê.

30 Dawiq gi, myiqhtoi rayuq nghut é yanmai, yhâng é awut ashín mã é rayuq lé, yhâng é hkohkãm tanghkuq mã zûng nhâng rã ga Garai Gasang byi tô é danggidiq lé sê to mù, 31 'Hkrisduq† gi, mosumhkung mã pyâm to a hui rã eq, Yhâng é gungsho a bup byuq é za, dum dui toq ló rã nghut lhê.', gã é hkyô lé te sê to luí taí tô ri.

32 Garai Gasang gi, haû Yesuq lé lhoq dui toq yù bê. Ngamoq banshoq bang gi, haú hkyo é saksé pé nghut nyi ri. 33 Haû mù, Garai Gasang gi, Yesuq lé Yhâng é loqyo hkyam mã lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkãm yù mù, hut hkyô kat bê nghut é yanmai, ahkuí nungmoq shí su wó myàng, wó gyo bekô nghut ri. 34-35 Hkãsu mù gã le, Dawiq gi, mauhkûng htoq tsáng myhâng mã a doq ló wú kôlhang, yhang gi,

'Haû Yhumsing Garai gi, ngá é Yhumsing lé, "Ngò, nãng é gye pé lé, nãng é hkyi nang tanghkuq kut pyám byi é hkyíng jé shoq,

Ngá é loqyo hkyam shut zung nyi shi aq." gã ri.*

gã luí, taí ri.

36 Hau é yanmai, Garai Gasang gi, nungmoq èq tapzîng mã jén sat pyâm é haû Yesuq lé, Yhumsing eq Hkrisduq dut nhang é hkyô, Israelaq byu pé lhunglhang bang hkyak sê nyi kó sháng gaq ô." gã ri.

Sãng-hi Lumjîng É Bang

* 2:21 Yol 2:28-32 * 2:28 Hkya-on 16:8-11 † 2:31 Grik dong Hkrisduq gã é gi, xû but hui Sù gã é lichyúm nghut mù, Hebre dong Mesaia gã é eq rajung za nghut lhê. * 2:34-35 Hkya-on 110:1

³⁷ Yhangmoq gi, haû lé wó gyô bùm kôjáng, yhangmoq é i-myt má záng kô é nghut mù luí, "Gumang wuì ê, ngamoq hkâsu kut lo rá lhú?" ga luí, Petruq eq lagyo góbang lé myí akô.

³⁸ Petruq gi, "Nungmoq yuq hkangmó myit lhîng mù, Yesuq Hkrisduq é myîng mai wui-myhup hkâm yù keq; Haû jáng, nungmoq é yubak hkyut pyám byí é hui kó rá nghut lhê. Haû hkûn, Chyoiyúng Woi-nyí gâ é chyunghuq lé, nungmoq wó yù kó rá nghut lhê. ³⁹ Hkâsu mù gâ le, danggidiq haû gi, nga-nhûng é Yhumsîng Garai Gasang ji yù rá bang banshoq nghut é, nungmoq eq nungmoq é yhangzo yhangshû pé eq le, mau we má nyí é lhunghâng bang eq le, sêng lhê." ga luí, yhangmoq lé taí kyô ri.

⁴⁰ Yhang gi, dang gotû myo myô èq le saksé hkám mù, "Shî agè ashop é amyû mai wó lut htoq lo keq ô!" ga luí, yhangmoq lé lhoq pun lhoq kyîng ri. ⁴¹ Dang haû lé guq yu é bang gi, wui-myhup hkâm yu bùm kôluí, haû nyí má byù sum hkyîng kô jat wàng lo bum bekô nghut ri.

Lumjîng Bang Zùm Yap É Hkyô

⁴² Haû bang gi, lagyo pé mhoqshit é hkyô, zùm yap é hkyô, muk hpê gam é hkyô‡ eq akyú dúng é hkyô má, i-myt rahkat za chôm châng nyi akô. ⁴³ Lagyo pé kut shit é mauhpo muzó eq limik kumlhá pé myo myô é yanmai, lhunghâng bang gi, gyuq maú nyi bum akô nghut ri. ⁴⁴ Lumjîng é lhunghâng bang gi, rawò má za zup zîng to mù, azîng zè banshoq lé chôm chung nyi akô. ⁴⁵ Yhangmoq gi, yhumsîng é sutzè pé lé, ûng pyám mù, yuq hkangmó lé, yhang rá tô é eq rajung za gàm byí akô. ⁴⁶ Yhangmoq gi, nyí wuí myit rahkat zâ èq noqkuq yhûm wàng má nyi nyi akô. Yhumsîng é yhûm pé má le muk hpê gam é hkûn, ⁴⁷ Garai Gasang lé hkya-on kungtôn uchyang, gabú é eq myit huí é èq chôm zo chôm shuq nyi bum akô; byù banshoq bâng é hí má le myoqdong wó bum akô. Haû Yhumsîng gi, nyí wuí yhangmoq chyáng hkyi yù hui bang jat lò nhang ri.

‡ 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poido chôm zô é lé gâ lhê.

3

Hkyî Hten Sû Rayuq Lé, Petruq Lhoq Gé Byí É Hkyô

¹ Ahkuí, Petruq eq Yohan gi, myinhâng zó sum hkyîng lhê é kyûdung nám má, noqkuq yhûm shut doq e ló akô. ² Haû hkûn, înú unghkaû mai hkyî hten lugù dut é byù rayuq lé, noqkuq yhûm má wang lé lô bâng chyáng mai dúng zo sháng gaq ga, Yúngl hó hkum ga myhîng é hkúmdong má nyí hkang nyí mó waq lé lô mù, lé nyhi to to kut akô. ³ Yhang gi, Petruq eq Yohan, noqkuq yhûm haû má wang e ló é lé, myàng luí, lhôm dúng nyi ri. ⁴ Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô. ⁵ Haû mù, yhang, yhangnhik chyáng mai rajung jung wó yù rá lé myit myoqbyù luí, yhangnhik lé rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôhang, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq." ga taí uchyang, ⁷ yhâng é loqyo loq má zui mù lâng toq kat ri; haû hkûn jáng, yhâng é hkyî kochang-chap pé wúm bo lò bê nghut ri. ⁸ Haû mù, yhang gi, radá dâm toq yap mù sô kat luí, so uchyang, byàm uchyang Garai Gasang lé hkya-on mù, yhangnhik eq rahá noqkuq yhûm má wang ló ri. ⁹ Yhang sô e ló nyí é eq Garai Gasang lé hkya-on kungton nyi é lé, lhunghâng bang chôm myang akô. ¹⁰ Haû yuq gi, noqkuq yhum é Yúngl hó hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haû dung zo sù byìn châng tô é hkûn, shiwa byu pé gi, wú maú uchyang, Sholumon jirop shut, yhangmoq chyáng din yán wang lé lo bum akô. ¹² Petruq haû lé myàng jáng, shiwa byu pé lé taí é gi, "Israelaq byu pé ê, shí yuq é hkyô lé haí mù luí maú nyi akô lhú? Nga-nhik é dingmán hkyô eq wum-o a-tsâm èq, shí yuq lé wó so nhang é su ngâm luí,

ngá-nhik lé wú tsuq bum akô lhu? Haú dông a nghut. ¹³ Abraham, Isak eq Yakup pê é Garai Gasang, nga-nhông é ichyí îwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byi é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri. ¹⁴ Haú chyoyúng dingmán é Sû lé nungmoq he-ngik pyám kômù, byù sat sù lé sheq dúng htoq yú kôluí, ¹⁵ Asak Yhumsing lé gi, sat pyám bekô. Garai Gasang kúm gi, haú yuq lé shi é mai lhoq dui toq yú bê nghut ri; ngá-nhik gi, haú hkyo é saksé nghut nyi lê. ¹⁶ Yesuq é mying lé lumjínng é yanmai, haú lumjínng myit mai za, shi nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjínng é yanmai, shi yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq le haú hkyô lé a sé mù kut pyám é hkyô lé ngò sê nyi lê. ¹⁸ Nghut kôlhang, haú hkyô gi, Garaí é Hkrisduq shi-nò jamjau hui râ nghut lê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. ¹⁹ Hau é yanmai, haú Yhumsing chyáng mâ é ngu-íngón é ahkyíng yàm yoq jé lô râ matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byi é hui râ matú le, nungmoq gi, myit lhíng mù Garai Gasang chyáng lhing lò keq. ²¹ Garai Gasang gi, a-nham pyat mai, Yhâng é chyoyúng myiqhtoi pê é nhut mai, taí nhang to bê eq rajung za, nyi mi-nyì, joq mijoq lé asik dum saí é pyat jé shoq, Yesuq lé mauhkûng htoq má nyi nhang to râ nghut lê. ²² Hkâsu mù gâ le, Mosheq taí tô é le, 'Haú Yhumsing Garai Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lê; haú yuq taí mitaí nungmoq gyo ra râ

nghut lê. ²³ Myiqhtoi hau é dang lé a gyo sù ó yuq nghut kôlhang, yhumsing é byù myú mai chyung hpyit pyám é hui râ nghut lê.'* gâ ri.

²⁴ Gè gè yhang, Samuelaq mai, yhâng é htâng má châng pô htoq lo é myiqhtoi pé banshoq bang hko kyô lo é má le, buinyì shí pé eq séng mù taí to bekô nghut ri. ²⁵ Nungmoq gi, haú myiqhtoi pê é dang silí wunlí eq, Garai Gasang mai, Abraham lé, 'Náng é awut ashîn é yanmai, mingkan htoq mâ é byù myú chângjup hkungsô wó kó râ nghut lê!'* gâ é eq rajung za, nungmoq é ichyí îwâ pé eq tô tô é dang-gidiq lé wó hkam yù râ bang nghut akô. ²⁶ Garai Gasang gi, nungmoq yuq hkangmó lé yhumsing agè ashop é hkyô mai wó lhing taú lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Hui É Hkyô

¹ Hkyangjông pé, noqkuq yhúm zúng é suwún hpó eq Saduke pé gi, Petruq eq Yohan shiwa byu pé lé dang nyo nyi é hkûn, htoq lé lô kômù, ² yhangnhik, shiwa byu pé lé mhòqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô. ³ Haú mù, yhangmoq gi, yhangnhik lé chyup yú luí, myinhâng mauchut lô bê nghut é yanmai, htang napkyó jé shoq htóng má lhúng tô akô. ⁴ Nghut kôlhang, mungdang lé wó gyô yu é bang myo myo gi, lumjínng kômù luí, yuqgè ngo hkyíng kô jé shoq myô jat lò bekô nghut ri.

Yudaq Byin Tú Wapdoq Má, Yhangnhik Lé Myi Jep Wú É Hkyô

⁵ Htang nyi, yhangmoq é zau wui, suwún wui eq tará sará pé gi, Yerusalem wà mó má chôm hui zup akô. ⁶ Hkyangjong mó Anna, Kayahpaq, Yohan, Alesander pé eq hkyangjong mó é amyú pé banshoq le, haú má bo tô akô. ⁷ Haú mù, yhangmoq gi, Petruq eq Yohan lé gung gúng má nyhi to

luí, "Nungnhik gi, haí a-tsam, ó yuq é myìng mai mù shí lé kut akô lúhú?" ga myí akô.

⁸ Haú hkûn, Petruq gi, Chyoiyúng Woi-nyí byíng tô é nghut mù luí, yhangmoq lé taí é gi, "Mingbyû wui é zaugun suwún wui ê, ⁹ hkyí hten sù shí yuq lé lhoq gê byí é jeju yanmai, yhang hkâsu kut lhoq ge yù huí é hkyô lé, hkû-nyí nungmoq ngá-nhik lé myí gôn wú naú kô é nghut le gi, ¹⁰ nungmoq lhunglhâng bang eq Israelaq byu pé ban-shoq lé sé nhâng kôlé, nungmoq eq tapzîng má jén sat pyám mù, Garai Gasâng eq shi é mai lhoq dui toq yu é, Nazaret wà byù Yesuq Hkrisduq é myìng mai, shí yuq gi, nungmoq é hí má ísu wáng wáng zán zán yap tô é nghut ri.

¹¹ 'Yhûm saí bang nungmoq hkyin htoq pyám é luqgok gi, htungchyûn mâ é ahkyak dik é luqgok dut bê.'[†]

gâ é gi, Yesuq lé taí é dông nghut ri. ¹² Hkyi yù hkyô gi, Yhang mai lai luí gotû a nyi lo, hkâsu mù gâ le, nga-nhúng hkyi yu é hui râ matú, mauhkúng a-ô má, Yhâng é myìng mai lai luí, xângzo byu pé lé byí tô é myìng gotû a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayû byù za nghut é hkyô lé sé to kô é yanmai, maú nyi bum akô; nghut kôlhâng, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. ¹⁴ Hau htoq agó, lhoq gê byí é hui sù le, yhangnhik eq rahá yap tô é lé, yhangmoq myàng kô é nghut mù luí, taí râ hkyô haí le a joq lo kó nghut ri. ¹⁵ Haú mù, yhangnhik lé, haú Yudaq byìn tú wapdoq* mai lhoq htoq to mù, yhangmoq rayuq eq rayuq hpyé lhum kô é gi, ¹⁶ "Shí nhik lé hkâsu kut lé gè râ lúhú? Yhangnhik kut shit e laklaí kumlhá gi, Yerusalem wà mó má nyi é lhunglhâng bâng é hí má de za dut bê nghut é yanmai, nga-nhúng haú lé a wó hê lo nghut ri. ¹⁷ Nghut kôlhâng, mingbyû wui má shí hkyô je riyhang a byo myín ló sháng gaq, ahkuí mai myìng haú lé lang mù ó lé le a taí kyo

lo râ matú, yhangnhik lé kyuq hkúm pyám sháng." gâ bum akô.

¹⁸ Haú mù, yhangnhik lé dum wut hâng yù luí, Yesuq é myìng lé lang mù, haí le hkâtaí, hkâ-mhoqshit kó ga chôm hkúm akô.

¹⁹ Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqdân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a taí é, a wó nyí nghut lhê." ga luí, yhangmoq lé dum tú taí akô.

²¹ Haú hkûn, yhangmoq gi, dut lai lò bê hkyo é yanmai, shiwa byu pé Garai Gasang lé hkya-on kungton nyi bum kôluí, yhangnhik lé dâm byi râ hkyô a myàng kó é nghut mù luí, yhangnhik lé dum tân kyuq luí nhang pyám bekô nghut ri. ²² Hkâsu mù gâ le, haú laklaí kumlhá dông lhoq gê byi huí é sù gi, asak myi xê zàn chyân bê sù nghut é yanmai nghut ri.

Lumjîng Bâng É Kyûdung Dang

²³ Yhangnhik gi, nhang kat pyám é hui kôjáng, yhangnhik é luzúm wui chyáng taú ló kômù, hkyangjong agyi pé eq suwún wui eq yhangnhik lé hkyím é dang ban-shoq lé, ló taí kyo akô nghut ri. ²⁴ Haú hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyûdung kô é gi, "Mauhkúng eq myigùng, wuìshuq lung-aù eq, haú pé má, nyi mi-nyí lé hpan tô é, ahko ahkáng lhunglháng wó é Yhumsing ê, ²⁵ Nàng, náng é dui-nhâng zoshâng, ngamoq é íchýí íké Dawiq é nhut mai, Chyoiyúng Woi-nyí eq taí tô é gi,

'Haí mù luí, tûngbaù amyû pé gi, nhikjum yô akô? haí mù luí, byu pé gi, akôm dâ pyám akô lúhú?

²⁶ Haú Yhumsing eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wui eq rahá zup zîng bum akô.'[†]

gâ ri. ²⁷ Gè gè yhang, Herut eq Pontu Pilat nhik gi, tûngbaù pé eq Israelaq byu pé le mù, wà mó shí má chôm zîng to kôluí, nàng

* 4:11 Hkya-on 118:22 * 4:15 Yudaq byìn tú wapdoq lé Grik dông gi, San-hedrin gâ lhê. * 4:26 Hkya-on 2:1-2

† 4:27 Xû but é hkyô gi, Yudaq byu pé htung dông xû but byi jáng, rajung jung kut râ matú hkyin masat yu é hkyô nghut lhê. Xû but byi é sù gi, Grik dông Mesaia gâ é nghut lhê.

xu but byi é sũ,† náng é Chyoiyúng dui-nhâng zoshâng Yesuq lé gumlau toq râ dâ nyi akô. ²⁸ Náng é wum-o a-tsam eq náng ô nau é dông dut râ matú, hí hkûn mai náng myit hpyit doqdân tô é hkyô lé, yhangmoq gi, kut pyám bekô nghut ri. ²⁹ Yhumsîng ê, ahkuî yhangmoq taî kyuq nyi é dang lé myàng byi laq ô! Náng é dui-nhâng zoshâng wui, a gyuq a kyum é myit eq náng é dang lé taî râ matú wum-o byi laq! ³⁰ Náng é wum-o bo é loq lhâm kat luî, nolì nojàng lé lhoq gê byi mù, náng é Chyoiyúng dui-nhâng zoshâng Yesuq é myìng mai, limik kumlhá eq mauhpo muzó pé lé kut shit laq ô!" gâ akô.

³¹ Haû su, kyû ban dung kôjáng, yhangmoq zîng tô é jowò gi, dui núm lô mù, yhangmoq lhunghâng bang gi, Chyoiyúng Woi-nyí byíng lô luî, Garai Gasâng é mungdang lé a gyuq a kyum é za taî bùm bekô nghut ri.

Azîng Zê Lé Chôm Gam Chûng Kô É Hkyô

³² Haû lumjîng é lhunghâng bang gi, i-myit rahkat za nghut nyi akô; ó yuq le, yhumsîng wó é zè lé ngá é a gâ é za, banshoq eq chôm gam chung nyi akô. ³³ Lagyô pé le, haû Yhumsîng Yesuq dum dui toq é hkyô lé a-tsam mó eq saksé hkâm nyi kô é nghut mù luî, yhangmoq banshoq bâng é ahtoq má jeju myo myo joq nyi ri. ³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhûm wó é bang ó yuq nghut kôlhâng, haû pé lé adàm dàm ùng pyám luî wó yu é ngùn le gi, ³⁵ lagyô pé é hkyî wang má lé to byî akô. Haû mù luî, a wó a lòm sũ ó yuq lé le ra tô é eq rajung za gàm byî akô nghut ri.

³⁶ Haû hkûn, Barnaba ga luî lagyô pé eq myhíng byi é, Kupru ming mâ é Lewiq byù Yosep le, yhang wó é maumyî ratóng lé ung luî, wó yu é ngùn lé lagyô pé é hkyî wang má, lé to byî ri. ³⁷ Barnaba gâ é dang lichyúm gi, myit wum byí su é yhangzo gâ é lichyúm nghut lhê.

5

Anani Eq Sahpira Nhik É Hkyô

¹ Nghut kôlhâng, Anani ga sũ gi, yhangmyi Sahpira eq rahá, yhâng nhâm wó é maumyî ratóng lé ùng pyám luî, ² yhangmyi le bo sê é dông, ngùn haû ram lé gi, haq myhit yu to mù, ram lé za lagyô pé é hkyî wang má lé to byî akô.

³ Haû mù luî, Petruq gi, "Anani ê, Chyoiyúng Woi-nyí lé mhaû pyám râ matú eq, maumyî hpau mâ é ram lé haq yu to râ matú, haû mù luî, náng é myit má Tsadán le byíng nhang tô lhê lhú? ⁴ Maumyî haû joq tô le, náng é zè nghut lhê a nghut lhú? Wó ung é ngùn le náng é zè nghut ashî, a nghut lhú? Haû mù luî, náng haû dông dâ lhê lhú? Byù lé mhaû é a nghut, Garai Gasang lé mhaû pyám bê nghut ri." ga taî ri.

⁵ Anani gi, dang haû lé wó gyo jáng, lêng mù, shi byuq bê nghut ri. Haû hkyô lé wó gyô é bang banshoq le, gyai yhang gyuq bùm bekô nghut ri. ⁶ Haû hkûn, zorâm wui gi, toq mù, yhâng é mâng lé htup luî, ê waq myhup pyám akô. ⁷ Haû htâng, sum hkyíng kô myáng jáng, yhangmyi le, wang lé lo ri. Haû su dut é hkyô lé gi, yhang a sé nghut ri.

⁸ Haû hkûn, Petruq gi, "Ngo lé taî kyô wú aq. Nungnhik ùng é maumyî hpau gi, shí gũ za nghut lhê lhú?" ga myi jáng, yhang gi, "Nghut lhê, haû gũ za nghut bê." ga tũ taî ri.

⁹ Petruq gi, "Nungnhik gi, haû Yhumsîng é Woi-nyí lé ísu kut chyam wú râ matú, hkâsu mù chôm myit huî akô lhú? Wú aq, náng é yhumsîng hpó lé ê myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lhê." ga taî ri.

¹⁰ Radá dâm, yhang le lagyo hpô é hkyî wang má lêng shi byuq bê. Zorâm wui le wang lo wú le, myiwe haû shi to lánng é lé myàng kôluî, waq ê mù, yhanglang é nàm má, ê myhup pyám bekô. ¹¹ Haû é yanmai, haû hkun lhê é hpúng byù banshoq bang eq, haû su dut é hkyô lé wó gyo má wó gyô é bang gi, gyai yhang gyuq bùm bekô nghut ri.

Byù Myo Myo Lé, Lagyô Pé Lhoq Gê Byî É Hkyô

¹² Ahkuî, lagyô pé gi, mingbyû wui é hí má limik kumlhá eq mauhpo muzó myo myo lé, kut shit nyi akô. Haû lumjîng bang

gi, i-myt rahkat zâ èq, Sholumon jirop má chòm hui hui kut bum akô. ¹³ Shiwa byu pé gi, yhangmoq lé hkunggâ nyi bùm kôlhang, yhangmoq lé a wám è zum bùm kô. ¹⁴ Nghut kôlhang, haù Yhumsîng lé lumjîng é myiwe yuqgè wuì gi, myo sheq myô jat lò kômù, yhangmoq chyáng je myô jat lò bê nghut ri. ¹⁵ Haù mù luì, byu pé gi, Petruq laì lo é hkùn, yhâng é wupzo za lhang rayuq yuq é ahtoq má zang sháng gaq ga, nõhpyo huì é bang lé, wà mâ é hkyô yàm má waq htoq è mù, yhuphpú pé eq taphkang pé má lheq tô akô. ¹⁶ Hau htoq agó, Yerusalem awuì ayàm mâ é wà pé mai le, byù ajùm ayò gi, no é bang eq agè ashop é nat wang zing-ri huì é bang lé shuì jé lé bum akô; haù bang lhunglhang gi, lhoq gè lhoq yô byì é huì bum akô nghut ri.

Lagyo Pé Zing-ri Huì É Hkyô

¹⁷ Hkyangjong mó eq yhâng é luzúm wuì, Saduke hpúng mâ é byu pé kúm gi, gyai yhang wú manon bùm kôluì, toq mù, ¹⁸ lagyo pé lé chyup yù luì, wà mâ é htóng má lhung tô akô. ¹⁹ Nghut kôlhang, haù myín lé, Yhumsîng é maumang lagyo rayuq gi, htóng hkum pé lé hpông pyám mù, yhangmoq lé shuì htoq yù uchyang, ²⁰ "Nungmoq htoq ló mù, noqkuq yhùm má è yap to luì, dui é asak hkyô sik eq sêng é danglù banshoq, shiwa byu pé lé taì kyo keq." ga taì ri.

²¹ Napsùn myoqmyàng zó lé, yhangmoq gi, noqkuq yhùm má wàng mù yhangmoq wó gyô yu é eq rajung za, shiwa byu pé lé, mhoqshit hi ló akô.

Haù u lé, hkyangjong mó eq yhâng é luzúm wuì gi, Israelaq byu pé é suwún wuì lhunglhang bang lé ji yù mù, Yudaq byìn tú wapdoq chòm zung yù luì, lagyo pé lé è shuì yù rà matú htóng shut byù nhang kat akô. ²² Haù bang kúm gi, htong má jé é hkùn, lagyo pé lé a myàng kôjáng, dum taù lò mù lo taì kyo kô é gi, ²³ "Htóng hkum le ging ging myhî to lánq ri, htóng zúng bang le hkum yàm má yap tô akô. Nghut kôlhang, hpông wú le, ahkaù má ó le a nyi to lo nghut ri." gâ ri. ²⁴ Noqkuq yhùm zúng é zau hpó eq hkyangjong agyì wuì gi, dang haù lé wó

gyo kôjáng, "Shí hkyô haì dut lô râ lhú?" ga, gyai gyuq maù bum akô.

²⁵ Haù hkùn, byù rayuq wang lé lô mù, "Wú keq, nungmoq èq htóng má lhung tô é bang gi, noqkuq yhùm má yap to mù byu pé lé mhoqshit nyi bum akô." ga luì, yhangmoq lé taì kyô ri. ²⁶ Haù mù luì, zau hpó haù gi, yhâng é a-ô mâ é bang eq è mù, lagyo pé lé è shuì yu akô. Nghut kôlhang, shiwa byu pé luqgok èq dú lô kô râ lé gyuq kô é yanmai, htân htân a wám kut kô nghut ri.

²⁷ Lagyo pé lé shuì jé lô kôjáng, Yudaq byìn tú wapdoq hí má yhangmoq lé nyhî tô akô. Haù hkùn, hkyangjong mó gi, ²⁸ "Yesuq é myìng lé lang luì a mhoqshit rà matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luì, Yesuq é sui lé, ngamoq é ahtoq má ke byi rà dâ nyi akô." ga luì, yhangmoq lé taì akô.

²⁹ Haù hkùn, Petruq eq gotù lagyo pé tú taì kô é gi, "Ngamoq gi, byù dang lé gyo ra htoq má Garai Gasâng é mungdang lé je luì gyo rà dut lhê. ³⁰ Nga-nhông é îchyí îwâ pé é Garai Gasang gi, nungmoq èq tapzîng má lhang sat pyâm é Yesuq lé, shi e mai lhoq dui toq kat bê nghut ri. ³¹ Israelaq amyû lé, myit lhîng hkyô eq mara hkyut byi hkyô hpông byi rà matú, up é ahkáng wó Sû eq hkyi yù Sû kut nhâng rà ga, Garai Gasang gi, Yhang lé, Yhâng é loqyo loq* má waq toq to bê nghut ri. ³² Ngamoq le shí hkyo é saksé pé nghut nyi lhê; mungdang lé gyô yù luì châng é bang lé Garai Gasang byì tô é Choyiyúng Woi-nyí le, shí pé é saksé nghut lhê." ga akô.

Gamalelaq Hpaqchyì Byì É Hkyô

³³ Yhangmoq gi, dang haù lé wó gyo kôjáng, lùm gyo nhik-yo naù kômù, lagyo pé lé sat pyám rà lhang myit akô. ³⁴ Nghut kôlhang, mingbyù banshoq bâng é hí má aróng wó é tarâ sará Gamalelaq gâ é Hparishe rayuq, haù Yudaq byìn tú wapdoq má toq yap mù, lagyo pé lé razup zo lhoq htoq to nhâng luì, ³⁵ yhang taì é gi, "Israelaq byu pé è, shí bang lé hkâsu kut

* 5:31 Garai é loqyo loq gâ é gi, hpautap hkungga gíng é jowò lé taì nau é nghut lhê.

râ hkyô, rago za hí myit wú keq. ³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luî, yhang htâng châng é lhunglhâng bang le byo myín byuq kômù, haí le a wó kut dut byuq akô nghut ri. ³⁷ Hau htâng, myìng jihpán guq yu é buinyi má, Yudaq gâ é Galile byù rayuq pô htoq mù, mingbyû wuî lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhâng bang le, byo myín byuq bekô nghut ri. ³⁸ Ahkuî le, shí bang lé haí le hkâgon ko, yhangmoq kâm é dông nghut nyí kó sháng gaq; yhangmoq kut nyi é hkyô eq dâ nyi é hkyô pé gi, byù myit dông kut é nghut jáng, htên byoq byuq râ za nghut lhê. ³⁹ Nghut kôlhâng, Garai Gasâng chyáng mâ é nghut le gi, nungmoq wó lhoq hkyíng pyám kó râ a nghut. Garai Gasâng é gyè sheq dut lò kó râ nghut lhê." gâ ri.

⁴⁰ Dang haû lé yhangmoq gyô htuk bum akô. Haû mù, lagyô pé lé wut yù mù luî, nhuq bat yù kômù, Yesuq é myìng lé lang luî mhoqshit é hkyô a ge kut râ nghut lhê ga taí kômù, nhang pyâm akô nghut ri.

⁴¹ Lagyô pé kúm gi, Yesuq é myìng é yanmai ru hpuzô é hkyô gi, gíngdán nyi ri, ga myit yù kômù, Yudaq byìn tú wapdoq haû mai gabú myit èq htoq lô bekô. ⁴² Hau htâng, yhangmoq gi, nyí wuî làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuî, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhî pé lé, nyí wuî lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hùn dang taí bum akô.

² Haû hkûn, lagyo raxe í yuq gi, chángzô pé lhunglhâng bang lé wut yù mù, "Ngamoq,

Íwa Garai Gasâng é mungdang hko kyô é muzó lé rap pyâm to mù, zangbó amû lé za lajang nyi é nghut le gi, a htuk râ nghut lhê. ³ Haû mù luî, gumang wuî ê, Chyoiyúng Woi-nyí byíng é eq hpaqchyî byéng-yá bo é nhik bo byù nyhit yuq lé nungmoq chyáng mâ é hkyin to keq. Haû bang lé muzó shí lhum hun to râ nghut lhê. ⁴ Ngamoq kúm gi, kyûdung é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

⁵ Dang haû lé shiwa byù lhunglhâng bang gyô htuk kômù luî, lumjíng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htung má lhing wang lò bê sù Antioku wà mó mâ é Nikolaq pé lé hkyin yù mù, ⁶ lagyô pé chyáng shuí lô akô; lagyô pé gi, kyûdung byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luî, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haû lumjíng hkyô má châng nyi bum akô.

Stehpan Chyup Yû Huí É Hkyô

⁸ Ahkuî, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tân shit ri. ⁹ Haû hkûn, luthkyô ga bâng é tarajong eq sêng é Kuruni, Alesander eq Kiliki, Asia mau mâ é bang ra-am gi, toq mù, Stehpan eq dang chyin chyin lhùm akô. ¹⁰ Nghut kôlhâng, Stehpân é dang gi, Chyoiyúng Woi-nyí lom é hpaqchyî dang nghut é yanmai, yhangmoq a úng kó nghut ri.

¹¹ Haû mù, yhangmoq gi, "Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri." ga luî, mhaû taí nhâng râ byù haq lung tô akô.

¹² Haû mù, yhangmoq gi, mingbyû wuî eq nhik bô suwún wuî, tarâ sará pé lé, chun htau mù, Stehpan lé chyup yû nhâng luî, Yudaq byìn tú wapdoq má shuí nyhi tô akô.

¹³ Mhaû é saksé byu pé lé le lhoq hâng kat luî, haû bang gi, "Shí yuq, shí chyoiyúng jowò* eq jep é tarâ lé shut shai é dang ru

* 6:13 Shí chyoiyúng jowò gi, Yerusalem noqkuq yhùm lé gâ lhê.

taï nyi ri. ¹⁴ Nazaret wà byù Yesuq ga sù gi, jowò shî lé hpyoq pyám mù, nga-nhúng lé Mosheq èq byî tô é htunghking lé htaï pyám rà nghut lhê ga luí, yhang taï é dang lé ngamoq wó gyô é nghut lhê." ga taï akô.

¹⁵ Haù Yudaq byìn tú wapdoq má zung to bang banshoq, yhang lé chôm wú tsuq nyî kô é hkûn, yhâng é myoqdong gi, maumang lagyo é myoqdong su dut é lé, yhangmoq myang akô nghut ri.

7

Stehpan Taï É Dang

¹ Haù hkûn, hkyangjong mó gi, "Dang haù pé têng lhê lú?" ga luí, yhang lé myi jáng,

² Stehpan tú taï é gi, "Gumang wuì eq îwa wuì ê, gyô wú keq, nga-nhúng lhunglhâng bâng é îchyí Abraham gi, Haran wà má a ló nyî shî lé, Mesopotamiaq mau má nyi tô ashî hkûn, hpungwup shingkang bo é Garai Gasang gi, yhâng chyáng lé htoq shit mù, ³ 'Náng é ming eq náng é amyû mai htoq ló luí, ngò tûn shit rà ming shut e ló aq.'* ga luí, yhang lé taï ri.

⁴ Haù mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shî má yhang lé htot lô nhâng bê nghut ri. ⁵ Garai Gasang gi, shí ming má yhang lé silí wunlí nghû rà, hkyí rahkô nang í é myigùng lháng a byî é nghut kôlhâng, yhang, zodù lháng a wò shi mai, yhang lé le, yhâng é awut ashín pé lé le, maumyî shî byi rà ga danggidiq byî to bê nghut ri. ⁶ Hau htoq agó, shí hkyô lé Garai Gasang xoq taï é gi, 'Náng é awut ashín pé, tûngbaù ming má bíng nyî mù, haù ming bâng èq myi shô zàn jùn zô é eq zing-rî é lé hui kó rà. ⁷ Nghut kôlhâng, yhangmoq lé jùn zô é amyû lé le, ngò jéyáng rà nghut lhê.' gâ ri. 'Haù hkûn, yhangmoq gi, haù ming mai htoq lô mù, jowò shî má ngo lé noqkuq kó rà nghut lhê.'* ga le, Garai Gasang taï ri. ⁸ Hau htâng, yhang lé ahpyo-kuq hpyit byi rà hkyô eq sêng é dangshikaq le, byî ri. Haù mù, Abraham gi, Isak lé hku é htâng shit nyí buinyi má ahpyo-kuq hpyit byî ri; Isak gi, Yakup lé

hkû mù, Yakup gi, îchyí îwa achyûng raxe í yuq lé hku kat bê nghut ri.

⁹ Haù îchyí îwâ pé gi, Yosep lé manôn kôluí, Egutuq ming shut jùn dông ûng kat akô. Nghut kôlhâng, Garai Gasang gi, yhang eq rahá nghut nyi mù luí, ¹⁰ wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haù gi, Egutuq ming eq, yhâng é hkohkâm-wâng banshoq lé up nhang ri.

¹¹ Haù u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhúng é îchyí îwâ pé le zoshuq a myang hô zo lo dut byuq bekô nghut ri. ¹² Ahkuí, Yakup gi, Egutuq ming má guqzo joq é hkyô lé wó gyo jáng, nga-nhúng é îchyí îwâ pé lé sâng-hî dâm é nhang ri. ¹³ Htang dâm dum é é hkûn, Yosep gi, yhanggu yhangmâng pé lé yhang ó nghut é hkyô taï kyô ri. Hpara-uq le Yosep é yhumbyù ikun hkyô lé sê yù byi bê nghut ri. ¹⁴ Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri. ¹⁵ Yakup le Egutuq ming má jé gyó ló luí, yhang eq nga-nhúng é îchyí îwâ pé gi, banshoq haù ming má shî ló byuq bekô nghut ri. ¹⁶ Yhangmoq é mâng lé gi, Shehkem wà má yu taù ló mù, Shehkem wà mâ é Hamora é yhangzo yhangshu pé chyáng mai, Abraham èq ngùn byi mù wui hpyit tô é lupdùng má ló myhup tô akô nghut ri.

¹⁷ Abraham lé Garai Gasang byî tô é danggidiq dik rà ahkyíng jé lo nyi é u lé, ¹⁸ nga-nhúng é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri. ¹⁹ Hkohkâm hpó haù gi, nga-nhúng é amyû htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é dông mai nga-nhúng é îchyí îwâ pé lé zing-ri bê nghut lhê.

²⁰ Haù u má, Mosheq lé hkû to bê. Yhang gi, Garai Gasâng é hí má gyai yúnglô é sù nghut ri; yhang gi, yhângwâ é yhùm má lhamó sum hkyap baù tô é hui mù, ²¹ htot

tô tô é hui jáng, yhang lé Hpara-uq é byizô èq xe yù mù, zosíng kut yù luí, hku kô ri. ²² Mosheq gi, Egutuq ming má é hpaqchyí byéng-yá banshoq lé mhoq yù luí, nhut shô a-tsam eq hkyí loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é gumang Israelaq byu pé chyáng ê kúm wú râ matú wó myit htoq kat ri. ²⁴ Ê jé jáng, zing-ri hui nyi é sù rayuq lé ê myâng luí, haú yuq lé búng mù, zing-rí nyi é Egutuq byù lé, loqchoq hpuq é dông sat pyâm ri. ²⁵ Mosheq gi, yhâng é byu pé lé yhâng é loq dông Garai Gasang hkyi yù hkyô byi nyi é lé, yhâng é amyû pé sê gyo byi nhô ngàm kôhlang, yhangmoq a sê gyo byi kó nghut ri. ²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyín naù luí, 'Ahkaù nhik ê, gumang yhangchang sheq ru nghut lhê nhing, haí mù rayuq eq rayuq byoq lhum nyi akô lhú?' ga taí ngón wú ri.

²⁷ Luzúm hpó lé zing-rí nyi sù yuq gi, 'Ngamoq é ahtoq má zau eq tarâ agyí kut râ matú, nàng lé ó yuq hkyin tô é lhú? ²⁸ A-nyí nap Egutuq byù lé sat pyâm é su, ngo lé le sat pyám nau ri lhú?' ga luí, tú taí uchyang yhang lé dùn chyún pyâm ri. ²⁹ Mosheq gi, dang hau é yanmai, hpâng luí Midian ming má é nyi byuq ri. Haú má yuqzo í yuq ê wó ri.

³⁰ Haú ming má myi xê zàn lai jáng, Sinaq Bùm yàm, yoso hkaù má é myi gyúng tô é mhanpúng mai, maumang lagyo rayuq gi, Mosheq lé htoq shit ri. ³¹ Mosheq gi, haú lé myàng jáng, hau é yanmai maú luí, wú wú râ ga huí e ló le, Yhumsíng é htê htoq lo é gi, ³² 'Ngò gi, náng íchyí íwâ pé é Garai Gasang, Abraham, Isak, Yakup é Garai Gasang nghut nyi lhê.' ga ri. Mosheq kúm gi, gyuq nán luí, a wám tu wú nghut ri.

³³ Haú Yhumsíng gi, 'Náng é hkyí-tsung hkyut pyám aq, nàng yap tô é jowò gi, chyoiyúng é myigùng nghut lhê. ³⁴ Egutuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù râ matú ngò gyó lé é

nghut lhê; ahkuí, lé aq, ngò, nang lé Egutuq ming shut nhang taú kat râ.' ga luí, yhang lé dum taí ri.

³⁵ Yhangmoq èq, 'Nang lé zau eq tarâ agyí kut râ matú, ó yuq hkyin tô é lhú?' ga luí he-ngik pyâm é Mosheq lé yhang, mhanpúng má htoq shit é maumang lagyo dông mai, Garai Gasang gi, yhangmoq é zau eq hkyi yù sù kut nhâng luí, taú nhang kat é nghut ri. ³⁶ Haú Mosheq yhang, Egutuq ming má le, NÔNG Nè má le, yoso hkaù pé má le, myi xê zàn gyoro má mauhpo muzó pé eq limik kumlhá pé tún shit uchyang, yhâng é byù myû pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lhê.' ga luí, taí tô é sù le Mosheq yhang nghut ri. ³⁸ Yoso hkaù má nghut nyi ashí hkún lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhông é íchyí íwâ pé eq le rahá nghut sù gi, yhang yhang nghut nyi ri; nga-nhúng lé ap byi rá asak dui é mungdang lé lom yu é sù le, yhang nghut nyi ri.

³⁹ Nghut kôhlang, nga-nhông é íchyí íwâ pé kúm gi, yhâng é dang lé a kâm gyo kômù, yhang lé he pyám luí, Egutuq ming shut taú nau é myit bo bum akô. ⁴⁰ Haú mù, Arun lé, 'Egutuq ming mai nga-nhúng lé shuí htoq lo é Mosheq gi, haí dut byuq bê hkyô lé, ngamoq a sé lo; haú mù, nga-nhông hí má so byi rá hparaù lhô pé saí byi aq.' ga taí akô. ⁴¹ Haú buinyi pé má, yhangmoq gi, nojúng zo lhô saí mù, alhò haú lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô. ⁴² Haú mù luí, myiqhtoi pé é laiká má kâ tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byi é nghut akô lhú?

⁴³ Nungmoq gi, nungmoq noq râ matú saí yu é alhò, Molak é zúm eq Rehpan hpara é kyí lé sheq, waq lhing wún kô é yanmai,

Babelon lai shoq ngò nungmoq lé lhoq
lhâm pyám râ nghut lhê.*

ga luí, bo tô é eq rajung za, Garai Gasang
gi, yhangmoq chyáng mai myoqdong lhing
pyám mù, mauhkûng htoq mâ é bui, kyî,
lhamó pé lé noqkuq râ matú ap pyám bê
nghut ri.

⁴⁴ Mosheq lé, nàng myang é azòng eq
rajung za saí aq ga, Garai Gasang taí é dông
saí tô é saksé zúm lé, haú yoso má nga-
nhûng é íchýí íwâ pé wó yû bekô nghut ri.

⁴⁵ Haú mù, nga-nhûng é íchýí íwâ pé gi,
yhangmoq é myoq hí mai Garai Gasang eq
hkat htoq pyám byí é byù myû pé é mau
má, Yoshuq eq rahá wang nyi ló kô é hkûn,
saksé zúm haú lé yu wang ló akô. Haú
gi, Dawiq é pyat jé shoq joq to bê nghut
ri. ⁴⁶ Dawiq kúm gi, Garai Gasâng hí má
myoqdong wó sù nghut mù luí, Yakup é
Garai Gasâng matú nyi jowò saí râ ahkáng
dung kôlháng, ⁴⁷ Sholumon eq sheq saí bê
nghut ri.

⁴⁸ Nghut kôlháng, Myhang htáng htum Sù
gi, byu é loq eq za saí é yhûm má nyi é a
nghut, haú hkyô eq séng luí myiqhtoi wá taí
tô é gi,

⁴⁹ 'Mauhkûng gi, ngá é zùng tanghkuq,
myigùng gi, ngá é hkyî nang jang
nghut nyi lhê;

ngá é matú hkasû é yhûm saí byi shi kó râ
lhú? Ngò nô yù râ jang gi, hkâmá
nghut kó râ lhú?

⁵⁰ Haú banshoq lé ngá é loq eq baú saí tô é a
nghut kó lhú? ga luí, haú Yhumsîng
taí ri.*

gâ ri.

⁵¹ I-myyit htân mù, i-myyit eq nohkyap má
ahpyo-kuq a hpyit é bang* ê, nungmoq gi,
nungmoq é íchýí íwâ pé su, Chyoiyúng Woi-
nyí lé hkâ-nhám le lhom he-ngik pyám nyi
akô; ⁵² Nungmoq é íchýí íwâ pé èq a zing-rí
wú é myiqhtoi, ó yuq wá nyi lhê lhú? Haú
Dingmán Sù pô htoq râ hkyô lé hko kyô é
bang lé, yhangmoq sat pyám é chyat nghut
akô; ahkuí, nungmoq le, haú Dingmán Sù
lé ap pyám é bang eq sat pyám é bang nghut
nyi akô. ⁵³ Maumang lagyo èq shit kyo byí

é tarâ lé nungmoq wó yû kôlháng, haú lé a
cháng kó nghut ri." gâ ri.

Stehpan Lé Luqgok Èq Dú Sat É Hkyô

⁵⁴ Haú hkyô lé yhangmoq wó gyo kôjáng,
yhangmoq é nhiklum má lûm htaú záng
kô é yanmai, Stehpan lé, zui wang ngat
kyáng shoq wú nhik-yô nyi akô. ⁵⁵ Stehpan
kúm gi, Chyoiyúng Woi-nyí byíng mù,
mauhkûng shut tu wú kat le, Garai Gasâng
é hpungwup shingkang lé le, Garai Gasâng
é loqyo hkyam shut Yesuq yap tô é lé le,
myang ri. ⁵⁶ Haú mù, yhang gi, "Wú keq,
mauhkûng hpông tô é lé le, Garai Gasâng é
loqyo hkyam shut haú Byu Yhangzo yap tô
é lé le, ngò myàng ri." ga taí kat ri.

⁵⁷ Haú hkûn, yhangmoq gi, htê mó o mó
garu uchyang, yhumsîng é nohkyap xaú
pyám mù, radá dâm yhang lé chôm htim
kômù, ⁵⁸ yhang lé wà mai she htoq ló kôluí,
luqgok eq chôm dú ló bekô nghut ri; saksé
kut é bang gi, Sholuq gâ é zoram é hkyî
wang má yhangmoq é buhîng pé lé hkyut
bum tô akô.

⁵⁹ Luqgok eq dú nyi bùm kô é u lé, Steh-
pan gi, "Yhumsîng Yesuq ê, ngá é woi-nyí
lé hap yù laq." ga kyûdûng ri. ⁶⁰ Hau htâng,
yhang gi, hkyihput htuq mù, "Yhumsîng ê,
yhangmoq kut é mara haú lé hkyut pyám
byi laq." ga luí, htê mó èq wut dûng ri; haú
ban taí jáng, yhang kâng byit byuq bê nghut
ri.

8

Hpúng Byú Lé Sholuq Zing-rí É Hkyô

¹ Sholuq gi, haú má nyi to mù, Stehpan lé
sat pyám é muzó má myit bo huí ri.

Haú nyí mai, Yerusalem wà mó mâ
é noqkuq hpúng gi, zing-ri mó huí lo é
nghut mù luí, lagyo pé mai lai luí, lumjîng
bang lhunglháng gi, Yuda mau eq Samariq
mau jowò hkangmó má byo myín ló bekô.

² Nghut kôlháng, tarâ hkunggâ é bang gi,
Stehpan lé yhum pyám é htâng má, yhang
é yanmai iyon mó huí nyi akô nghut ri.

³ Sholuq kúm gi, rayhum htâng rayhûm
wàng mù, myiwe yuqgè lé she hkyut htoq
yû luí, htóng má lhûng tô é dông mai, no-
qkuq hpúng haú lé lhoq hpyoq ló nyi ri.

* 7:50 Esai 66:1-2

* 7:51 I-myyit eq nohkyap má ahpyo-kuq a hpyit é bang gâ é gi, Garaí dang lé a lùm a châng é bang lé gâ lhê.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkangmó má mungdang lé hkô kyô ló akô. ⁵ Haú hkûn, Hpilip gi, Samariq mau má é myuq ra-myuq shut e ló mù, Hkrisduq é hkyô lé hkô kyô ri. ⁶ Byù ajùm ayò gi, Hpilip taí kyô é hkyô lé wó gyô é eq, yhang tûn shit é limik kumhá lé myàng kôjáng, i-myt rahkat za eq yhâng é dang chòm gyô nyi bum akô. ⁷ Nat wang júng é byù myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyí htên é bang myo myo le, ge ló byuq bum akô. ⁸ Haú mù luí, haú myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byù rayuq gi, hí lé haú myuq má myoqheq hpaqchyí kut shit mù, Samariq byu pé lé lhoq maú luí, yhâng gùng lé yhang, laklaí sù nghut lhê gâ ri. ¹⁰ Byù tiq ko banshoq le, "Byù shí yuq gi, 'haú a-tsam mó' gâ é, Garaí chyáng mai hpungwup a-tsam wó yù sù nghut ri." ga luí, yhâng é dang lé gyô bum akô. ¹¹ Haú yuq gi, myáng myáng yhâng é myoqheq hpaqchyí èq yhangmoq lé lhoq maú lo é yanmai, yhâng dang lé chòm lum bum akô. ¹² Nghut kôlhang, Hpilip hko kyô é Garaí Gasâng é mingdán hkyô eq, Yesuq Hkrisduq é mying eq sêng é gabú danglù hkyô lé, lumjúng kôjáng, myiwe yuqgè wui-myhup hkâm yu bum akô. ¹³ Simun yhang yhang le lumjúng mù luí, wui-myhup hkâm yù mù, Hpilip htâng châng wún ri. Hpilip é kumhá mó eq laklaí kumhá pé lé myàng jáng, yhang gi, gyai maú byuq ri.

¹⁴ Garaí Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyo pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô. ¹⁵ Yhangnhik gi, lé jé jáng, byù haú bang Chyoiyúng Woi-nyí wó yù rá matú kyúdung byí akô. ¹⁶ Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsing Yesuq é mying mai wui-myhup hkâm yu é za ru nghut bùm ashí. ¹⁷ Haú mù

luí, lagyo nhik yhangmoq é ahtoq má loq ke byi jáng, yhangmoq gi, haú Chyoiyúng Woi-nyí lé wó hkâm yù bekô nghut ri.

¹⁸ Lagyo nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù, ¹⁹ "Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yù rá matú, haú su é a-tsam ngo lé le byi kó laq." ga dung ri.

²⁰ Petruq kúm gi, "Garaí Gasâng é chyunghuq lé ngun èq wó wui yù rá nghut lhê ga luí, myit é yanmai, náng é ngùn gi, náng eq rahá htên byoq byuq sháng gaq. ²¹ Náng gi, Garaí Gasâng é hí má myit a dúng sù nghut é yanmai, shí hkyô má náng wó bo lhóm rá a nghut. ²² Haú mù luí, shí agè ashop é hkyô mai myit lhing mù, Yhumsing Garaí chyáng dúng tôngbán aq. Haú hkûn, náng é unghkaú má myit pyám é hkyô lé, mara hkyut pyám byi abe. ²³ Náng gi, ladu lai shoq nhikhko zo mù, yubak marâ èq tuí zing to huí é lé, ngò myàng ri." ga yhang lé taí ri.

²⁴ Haú hkûn, Simun gi, "Nungnhik taí é hkyô haí le ngá chyáng a jé sháng gaq, ngá é matú haú Yhumsing chyáng kyúdung byi kó laq." ga tú taí ri.

²⁵ Yhangnhik kúm gi, haú Yhumsing é mungdang lé saksé hkâm mù ban hko kyo jáng, Samariq byu pé é wà myo myo má, haú gabú danglù lé hko kyo uchyang, Yerusalem wà mó shut dum taú lò bekô nghut ri.

Hpilip Eq U-nuk Nhik É Hkyô

²⁶ Ahkuí, Yhumsing é maumang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyí shut nyâng za e ló aq. Hkyô haú gi, yoso hkyô nghut lhê." ga taí ri. ²⁷ Haú hkûn, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zùm é, Ehtiopi byù u-nuk rayuq gi, noqkuq rá ga Yerusalem wà mó má ê mù, ²⁸ dum taú lo é hkûn, yhâng é myanglhêng má zùng luí, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, "Myanglhêng shut chyâng e ló aq." ga taí ri.

³⁰ Haú mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lú?" ga luí, yhang lé myí ri.

³¹ Haú yuq gi, "Mhoqshit sù yuq a nyi le, ngò hkâsu kut sê gyo râ lú?" ga tú taí mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi, "Sat râ sau lé su, Yhang lé she e ló bê nghut ri; sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shôm pyâm to huí é hkûn, Yhang lé a tara é đông doqdân pyám bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lú?"[☆] gâ ri.

³⁴ Haú hkûn, haú u-nuk wa gi, Hpilip lé, "Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lê lú? Yhânggùng lé taí é nghut lê lú? Haú a nghut jáng, góyuq é hkyô lé taí é nghut lê lú?" ga myí ri. ³⁵ Haú hkûn, Hpilip gi, Chyúmdang haú lé yù mù, Yesuq eq sêng é gabú danglù lé taí kyô ri.

³⁶ Haú su e ló kô le, wui joq é má jé jáng, haú u-nuk hpó gi, "Wú aq, shí má wui joq tô ri, wui-myhup hkâm yù râ matú ngo lé hkúm râ jang haí joq ashí lú?" ga taí ri. ³⁷ Hpilip gi, "Náng i-myit banshoq èq, nàng lumjíng bê nghut le gi, hkâm yu le ge lê." ga taí ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjíng bê." ga tú taí ri.* ³⁸ Haú hkûn, yhâng é myanglêng hkying nhâng mù, yhangnhik wui má gyó wâng luí, Hpilip gi, u-nuk hpó lé wui-myhup hkâm byí ri.

³⁹ Wui hkaú mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôlhang, yhang gi, e ló é hkyô shut gabú myit èq xoq sô e ló bê nghut ri. ⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq

haú mau mâ é myuq pé wà pé hkanmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luí, hkyangjong mó chyáng ê mù, ² Yhumsing é Hkyô lé lumjíng é myiwe yuqgè myàng mi-myàng lé chyup yú luí, Yerusalem wà mó shut wó she ló râ matú, Damaskuq myuq mâ é tarajong pé má byi râ laiká pé lé dưng chùng ri. ³ Yhang e ló le, Damaskuq myuq eq chyáng ló nyi é hkûn, yhâng é lênghkyuq má mauhkûng mai dân loq tung duqbó htoq ló ri. ⁴ Yhang myigùng má lêng ngop tô é u lé, "Sholuq, Sholuq, nàng ngo lé haí mù zing-rí nyi lê lú?" ga luí, yhang lé taí é htê wó gyô ri.

⁵ Haú hkûn, yhang gi, "Yhumsing ê, nàng gi, ó yuq nghut lê lú?" ga myi jáng, haú Yhumsing gi, "Nàng zing-rí nyi é Yesuq nghut lê, ⁶ toq aq, myuq shut wang ló aq. Nàng zui saí râ hkyô lé lhom taí kyo râ nghut lê." ga tú taí ri.

⁷ Yhang eq rahá e ló é luzúm wui gi, htê haú wó gyo kôlhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wú le, haí lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí wang ló akô. ⁹ Sholuq gi, sum nyí tup myoqjit byuq mù luí, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsing gi, yhang lé, "Anani ê." ga shing-rán đông wut ri.

Yhang gi, "Yhumsing ê, shí má nyi lê." ga tú taí ri.

¹¹ Haú Yhumsing dum taí é gi, "Toq aq, Hkyô-Nyàng gâ é wà hkyô shut é mù, Yudaq é yhúm má, Tarshu byù Sholuq lé é hô aq, yhang gi, kyûdùng nyi ri. ¹² Yhang gi, Anani ga sù wang lé lô mù, yhâng é myoq dum myàng sháng gaq ga, yhâng é ahtoq má loq ke byí é lé, shing-rán đông myàng bê nghut ri." gâ ri.

☆ 8:33 Esai 53:7-8 * 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

¹³ Anani kúm gi, "Yhumsîng ê, shí yuq gi, Yerusalem wà mó má, náng é sâ-n-yúng bang lé a ge é dông hkâ-myhó kut laí lo é hkyanglù lé ngò myo myo wó gyô wú bê; ¹⁴ Shí pé má le, náng é myìng lé lîng é bang banshoq lé chyup râ ga, hkyangjong agyi pè chyáng mâ é ahko ahkáng wó yu to sù nghut ri." ga tû taí ri.

¹⁵ Nghut kôlhang, Yhumsîng gi, "Ru ê aq, shí yuq gi, tûngbaù pé eq yhangmoq é hkohkam pè é hí má le, Israelaq byu pè é hí má le, ngá é myìng lé wùn waq râ matú, ngò chûng râ nghû luí hkyin to sù nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tûn shit râ nghut lhê." ga taí ri.

¹⁷ Hau htâng, Anani gi, jé ê mù, yhûm haú má wàng luí, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, náng lé lo é hkyô má, náng lé htoq shit é Yhumsing Yesuq èq ngo lé nhang kat é nghut lhê." ga taí ri. ¹⁸ Haú hkûn jáng, Sholuq é myoq mai akyap sù é wuí gyó byuq mù, yhang myoq dum wó myâng bê. Haú hkûn, yhang gi, toq mù wui-myhup hkâm yù luí, ¹⁹ zoshuq lé zo mù, wum-o dum lhoq pyíng yù bê nghut ri.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mâ é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasâng é Yhangzo nghut é hkyô, haú hkûn jáng tarajong pé má hko kyô nyi bê nghut ri. ²¹ Sholuq é dang lé wó gyô é lhunglhang bang gi, maú byuq bùm kômù, "Shí yuq gi, Yerusalem wà mó má myìng haú lîng é bang lé lhoq hten lhoq hpyoq sù nghut lhê, a nghut kó lhú? Ahkuí, shí má le, haú su é bang lé chyup yù mù, hkyangjong agyi pè chyáng ló ap râ da luí jé lé é sù a nghut kó lhú?" ga myi bum akô. ²² Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tûn shit ri.

²³ Buinyí tsómra myáng é htâng má, Yudaq byu pé gi, yhang lé sat pyám râ matú haq dâ akô. ²⁴ Nghut kôlhang, yhangmoq dâ

é hkyô lé Sholuq sê pyâm ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. ²⁵ Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taú Jé Lo É Hkyô

²⁶ Hau htâng, yhang gi, Yerusalem wà mó má jé lo é hkûn, chángzô pé eq zùm yap râ matú shikut wú kôlhang, yhang gi, chángzo dut bê hkyô lé a jíng kô é yan-mai, lhunglhang bang gi, yhang lé gyuq bum akô. ²⁷ Barnaba kúm gi, Sholuq lé lagyo pè chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq èq yhang lé taí é dang wó gyô é hkyô lé le, Damaskuq myuq má Yesuq é myìng mai gyuq myit a bo é za hkâsu kut hko kyô é hkyô lé le, yhangmoq lé taí kyô ri. ²⁸ Haú mù, Sholuq gi, yhangmoq eq rahá Yerusalem wà mó má htoq htoq wàng wàng kut nyi uchyang, Yhumsîng é myìng mai a gyuq a kyum é za hko kyô nyi ri. ²⁹ Grik dang nyo é Yudaq byu pé eq le, taí he lhûm nyi akô; nghut kôlhang, yhangmoq gi, yhang lé sat pyám râ dâ akô. ³⁰ Haú hkyô lé, gumang wui sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkanmó mâ é noqkuq hpúng gi, haú yoq pé má, lhoq ging lhoq tîng é hkyô wó yù mù, nguínón nyi akô; haú Yhumsîng lé gyuq hkunggâ é hkyô má le, Chyoiyúng Woi-nyí èq lhoq pun lhoq kyíng é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

³² Haú hkûn, Petruq gi, haú mau pé má hkat kûm wún uchyang, Ludaq wà mó má nyi é sâ-n-yúng bâng chyáng ê jé ri. ³³ Haú wà má, gùngjum shí luí shit zân tup yhupjang mai a wó toq é Ainea gâ é byù rayuq lé è myang ri. ³⁴ Haú mù, Petruq gi, "Ainea ê, Yesuq Hkrisduq, nang lé lhoq gè byi bê nghut ri, toq mù, náng é yhuphpú hen yù aq." ga luí, yhang lé taí ri. Haú hkûn jáng,

Ainea wó toq yap bê nghut ri. ³⁵ Ludaq eq Sharon pá má nyi é lhunghâng bang gi, haú yuq lé myàng mù luí, Yhumsing Yesuq chyáng lhing wang lo bum akô.

Dorka Ga Sû Dum Dui Lo É Hkyô

³⁶ Ahkuí, Yopa myuq má Tabihta gâ é chángzo myiwe rayuq nyi ri; mying haú lé Grik dang đông gi, Dorka* gâ é nghut lhê. Myiwe haú gi, ge é muzó kut nyi é sủ eq, asho awuí bang lé alu byi nyi é sủ nghut ri. ³⁷ Haú u lé, yhang gi, nõhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô. ³⁸ Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haú hkûn, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuí hâng yu akô. Chuimó myhí pé lhunghâng bang gi, yhâng nàm má yap mù ngaú uchyang, yhangmoq eq rahá nyi tô ashí hkûn Dorka hkyup é buhíng eq gotú mebu pé lé tûn shit nyi akô.

⁴⁰ Petruq kúm gi, lhunghâng bang lé htoq ló nhâng mù, hkyihput htuq luí, kyûdung mù, mâng shut lhing wú luí, "Tabihta ê, toq aq!" ga taí ri, haú hkûn myiwe haú myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lhâm kat mù yhang lé lâng toq yù luí, lumjíng bang eq chuimó myhí pé lé wut yù mù, duì gú ap byi ri. ⁴² Haú hkyô lé, Yopa myuq má é bang banshoq wó gyô ló kômù luí, byù myo myo gi, haú Yhumsing Yesuq lé lumjíng bum akô nghut ri. ⁴³ Haú mù, Petruq gi, shokuq loqmú saí é Simun ga sủ eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap má é nghut lhê. ² Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang

lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhám le kyûdung nyi ri. ³ Ra-nyí lé, myinhâng sum hkyíng kô má, Garai Gasang é maumang lagyo rayuq gi, yhâng chyáng jé mù, "Koneli ê." ga luí, yhang lé wut é lé, shing-rán mai de de myang ri.

⁴ Haú mù, haú yuq lé wú tsuq to mù, "Yhumsing ê, hai hkyô nghut lhê lhú?" ga gyuq myit eq myi ri.

Maumang kúm gi, "Náng é kyûdung dang eq alu byi é hkyô gi, Garai Gasang é hí má, hkungga masat đông hkyâng bê nghut ri.

⁵ Ahkuí, Yopa myuq shut byù nhang kat mù, Petruq gâ é sủ Simun lé é shuí lò nhâng aq. ⁶ Yhang gi, wuimau yàm má é, shokuq hkyup zô é Simun yhâm má bíng nyi ri." ga taí ri.

⁷ Koneli gi, yhang eq dang taí é maumang lagyo ló byuq jáng, duì-nhâng zoshâng í yuq eq, yhâng chyáng hkâ-nhám le châng nyi bang má é, tarâ hkunggâ é gyezo rayuq lé jì yù mù, ⁸ dut lai lo é hkyô banshoq, yhangmoq lé taí kyo luí, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung rã ga, yhumhkung shut doq ló ri. ¹⁰ Haú hkûn, yhang gi, zòmut luí rajung jung zô nau nyi ri; nghut kôhang, zoshuq ru gaí nyi ashí le, yhang moq byuq ló mù myoqwup shing-rán myang é gi, ¹¹ mauhkung bóng lô mù, hpajóng mó sủ é lé, myi chyùn má zui luí myigùng shut lhoq hkyô kat é azíng lé myang ri. ¹² Haú hkaú má, myigùng htoq má é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri. ¹³ "Petruq ê, toq mù, sat zo aq." gâ é danghtê le mying htoq lo ri.

¹⁴ Petruq kúm gi, "Yhumsing ê, haú gi, a wó dut, achau achyut é eq a sanséng é zè lé, ngò hkâ-nhám le a zô wú." ga tũ taí ri.☆

¹⁵ Haú hkûn, "Garai Gasang lhoq san lhoq séng bê zè lé, a sanséng hkâ-nghũ." ga luí, yhang lé dum taí kat ri.

* **9:36** Dorka gâ é lichyúm gi, "chochí" gâ é nghut lhê. ☆ **10:14** Nhung 11 lé wú aq.

¹⁶ Haû su ga sum dâm taî é htâng má, zè haû lé radá dâm mauhkûng shut wup yu ló bê nghut ri.

¹⁷ Ahkuî, Petruq gi, yhang myang é shing-rán lé haî wá nghut lhê lú ga luî, myit maú nyi é hkûn, haû Koneli nhang kat é bang gi, Simun é yhûm lé myang hô kômù, hkumtot má yap to luî, ¹⁸ Petruq gâ é sù Simun, yhûm haû má nyi a nyi é lé, wut myî wú akô.

¹⁹ Petruq gi, shing-rán haû lé ru myit wú nyi ashî le, Woi-nyî gi, "Wú aq, byù sum yuq nang lé ho nyi akô, toq mù gyó ló aq; ²⁰ yhangmoq gi, ngò nhang kat é bang nghut é yanmai, myit haî a úng-âng é za, yhangmoq eq rahá bo ló aq." ga taî ri.

²¹ Haû mù, Petruq gi, haû bâng chyáng gyó ló luî, "Nungmoq hô nyi é sù gi, ngò nghut lhê, haî ra luî lé kô é lú?" ga myî ri.

²² Yhangmoq taî é gi, "Dingmán é, Garai Gasang lé gyuq hkunggâ é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taî é dang gyo yù râ matú, yhang lé chyoiyúng maumang lagyo èq taî shit kyô é hkyô lé wó yù luî, ngamoq lé nhang kat é nghut lhê." ga akô. ²³ Haû mù luî, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq mâ é gumang wuî ra-am le châng akô nghut ri.

Koneli Lé Petruq Huî É Hkyô

²⁴ Hau htang nyi, yhangmoq gi, Kesare wà mó shut wang ló akô. Koneli gi, yhâng é gumang wuî eq buinùm ji-myi wuî lé ji tsing to mù, yhangmoq lé lánng nyi ri. ²⁵ Petruq wang ló jáng, Koneli gi, te yù mù, yhâng é hkyî wang má paî gop noqkuq ri. ²⁶ Petruq kúm gi, "Toq aq, ngò le byù ru nghut lhê." ga luî, taî uchyang yhang lé tu toq ri.

²⁷ Haû mù, Petruq gi, yhang eq dang nyô uchyang wang ló wú le, byù myo myo zup zîng tô bum é lé myang ri. ²⁸ Haû hkûn, yhang gi, yhangmoq lé, "Yudaq byù rayuq gi, noqkuq htung dông tûngbaù rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhâng, ó yuq lé le achâq achyut dut ri, a sanséng dut ri ngû a ge taî é hkyô lé

gi, Garai Gasang, ngo lé tûn shit bê. ²⁹ Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haû mù luî, haî ra kô é yanmai, ngo lé ji akô ngû ngò myî nau ri." ga taî ri.

³⁰ Haû hkûn, Koneli gi, "Laî lò bê myi nyi nyi, myinhtâng sum hkyíng má, ngá é yhûm má, ngò kyûdung nyi le, danso loq, duqbo é mebu wut é byù rayuq ngá é hí má yap htoq shit mù, ³¹ 'Koneli ê, Garai Gasang gi, nàng é kyûdung danghtê lé le gyo byi bê; nàng alu byî é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haû yuq gi, wuimau yàm mâ é shokuq hkyup zô é Simun yhûm má bíng nyi ri.' ga taî ri. ³³ Haû mù luî, haû hkûn jáng ngò nàng chyáng byù nhang kat bê nghut lhê. Ahkuî, nàng jé é gi, gyai gè bê nghut ri. Yhumsing yhang nang lé taî nhang é gû banshoq gyô yù râ matú, ahkuî ngamoq lhunglhâng bang Garai Gasâng é hí má nghut nyi lhê." ga taî ri.

Petruq Hko Kyô É Mungdang

³⁴ Haû hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuî ngò gè gè yhang sé bê. ³⁵ Byù myû chângjup má, Yhang lé gyuq hkunggâ é eq tengmán é muzó jizó saî é sù gi, Yhang é hí má myoqdong wó nyi ri. ³⁶ Nyi mi-nyî, joq mijoq é Yhumsing, Yesuq Hkrisduq é yanmai, nguóngón hkyô eq sêng é gabú danglù lé hko kyo sháng gaq ga, Israelaq byu pé chyáng Garai Gasang hun kat é mungdang eq rajung za, ³⁷ baptisma hkyô lé, Yohan hko é htâng, Galile mau mai Yuda mau banshoq má taî pyo ló é hkyô lé, nungmoq sé gû nghut nyi lhê. ³⁸ Haû gi, Garai Gasâng èq Chyoiyúng Woi-nyî eq wum-o a-tsam byî to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat èq zing-ri huî é bang banshoq lé lhoq gè byî wún ri.

³⁹ Haû mù, Yudaq byu pé é ming má le, Yerusalem wà mó má le, yhang zui saî bê muzó banshoq é saksê pé gi, ngamoq nghut nyi lhê. Haû yuq lé yhang, yhangmoq sik zîng má jén sat pyám bekô nghut

ri. ⁴⁰ Garai Gasang kúm gi, sum nyí nghû râ buinyì má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri. ⁴¹ Yhang shí é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhé. ⁴² Yhang gi, asak dui é bang eq shí bê bâng é tarâ agyì kut râ matú, Garai Gasang èq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri. ⁴³ 'Yhang lé lumjínq é bang yuq hkanqmó gi, Yhâng é mying é yanmai, yubak hkyut pyám byí é hui kó râ nghut lhé.' ga luí, taí é myiqhtoi banshoq gi, Yhâng é hkyô lé saksé hkam byí é bang nghut nyi akô." ga taí ri.

Chyoiyúng Woi-nyí Lé, Túngbaù Pé Wó Hap Yu É Hkyô

⁴⁴ Petruq gi, haú hkyô lé ru taí nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé lo ri. ⁴⁵ Túngbaù pé é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjínq bang Yudaq byu pé gi, maú bum akô. ⁴⁶ Hkâsu mù gâ le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

⁴⁷ Haú mù, Petruq gi, "Ngamoq su Chyoiyúng Woi-nyí hkâm yù bê bang lé, bap-tisma a byi nhâng râ gi, wui lé ó yuq wó hkûm to râ lhú?" ga taí ri. ⁴⁸ Hau htâng, yhang gi, yhangmoq lé Yesuq Hkrisduq é mying lang luí wui-myhup hkâm yù râ matú pying tô ri. Haú hkûn, yhangmoq gi, Petruq lé buinyì ra-í nyí, nyi gyó shi aq ga chôm hkûm akô.

11

Petruq, Yhang Kut É Muzó Lé Shit Kyô É Hkyô

¹ Túngbaù pé le, Garai Gasang é mung-dang lhom yù bê gâ é hkyô lé, lagyo pé eq Yuda mau pé má é gumang wui wó gyô akô. ² Haú mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjínq bang gi, ³ "Nàng gi,

ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

⁴ Haú hkûn, Petruq gi, haú dut lò bê hkyô lé awang mai ahpyo hpyot, yhangmoq lé taí sân kyô hi kat é má, ⁵ "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri. ⁶ Haú lé rago za saí wú le, myigùng htoq má hkyí myi hkyí dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luí, myit wú nyi é hkûn, ⁷ 'Petruq é, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsing ê, haú gi, a wó dut, achauq achyut é eq a sansêng é zè, ngá é nhut má hkâ-nhám le a wang wú.' nghû taí kat é nghut lhé.

⁹ Haú hkûn, 'Garai Gasang lhoq san lhoq yúng bê zè lé, a sansêng hkâ-nghû.' ga luí, mauhkûng mai dum taí kat ri. ¹⁰ Haú su ga sum dâm taí é htâng má, haú pé banshoq lé mauhkûng shut dum wup yu ló bê nghut ri.

¹¹ Haú hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô.

¹² Chyoiyúng Woi-nyí gi, ngo lé myit a úng-âng é za, yhangmoq htâng châng é aq ga taí ri; shí gumang hkyuq yuq le ngò eq rahá é mù, Koneli é yhûm má ngamoq wang é.

¹³ Haú hkûn, haú yuq gi, yhâng é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyo èq yhang lé, 'Yopa myuq shut byù nhang kat mù, Petruq gâ é sù Simun lé è jî nhâng aq; ¹⁴ nàng eq náng yhumbyù lhunglhâng bang hkyi yù hui râ danglù, yhang, náng chyáng wun lé lô byi râ nghut lhé.' ga taí é hkyô lé le, ngamoq lé taí kyô ri.

¹⁵ Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haú hkûn sheq, ngò gi, 'Yohan gi, wui èq wui-myhup hkâm byí ri; nungmoq kúm gi, Chyoiyúng Woi-nyí èq wui-myhup hkâm byí é hui kó râ nghut lhé.' ga luí, Yhumsing taí é dang lé bûn kat ri. ¹⁷ Haú mù luí, Yhumsing Yesuq Hkrisduq

lé lumjǐng é hkùn, ngamoq lé Garai Gasâng jeju chyunghuq byí é su, Yhang, yhangmoq lé le byí é nghut le gi, ngò gi, hkasú é byù nghut luí, Garai Gasang lé wó lhom hkùm pyám rá lhú?" ga taí ri.

¹⁸ Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tǔngbaù pé lé le, asak duí rá matú myit lhǐng hkyô byi bu-nhung!" ga luí, Garai Gasang lé chòm hkya-ôn akò nghut ri.

Antioku Wà Mâ É Noqkuq Hpúng

¹⁹ Ahkuí, Stehpan lé sat pyám kô é htàng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu pé lé baú za, mungdang haú hko kyô akò nghut ri. ²⁰ Nghut kôlhang, yhangmoq mâ é Kupru byù eq Kuruni byù ra-am gi, Antioku wà mó má châng jé ló kômù, Yhumsing Yesuq é gabú danglù lé, Grik pé lé le taí kyô bum akò. ²¹ Haú Yhumsing é loq gi, yhangmoq eq rahá nghut nyí mù luí, byù myo myo gi, lumjǐng mù, Yhumsing chyáng lhǐng wang lo bùm bekò nghut ri.

²² Haú bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akò. ²³ Yhang jé é hkùn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhikhum banshoq èq haú Yhumsing má lhumzuí nyi rá matú, lhunglhang bang lé myit wum byí ri. ²⁴ Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjǐng myit le byíng tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekò nghut ri.

²⁵ Hau htàng, Barnaba gi, Sholuq lé é hô rá ga Tarshu myuq shut ê mù, yhang lé myàng jáng, Antioku wà mó má shuí lo ri. ²⁶ Haú mù, yhangnhik gi, razàn gón noqkuq hpúng haú eq rahá zum nyi kô é nghut mù luí, byù myo myo lé wó mhoqshit akò. Chángzô pé gi, Hkristan gâ é myìng lé, Antioku wà mó má sâng-hi wó yù bekò nghut ri.

²⁷ Haú u lé, myiqhtoí pé ra-am gi, Yerusalem wà mó mai, Antioku wà mó má lé jé bum akò. ²⁸ Haú bang mâ é Agabu gâ é sù gi, toq yap mù, Romaq mingkan tǐng má mutmó gyó lô rá nghut é hkyô lé, Woi-nyí èq tǔn shit é dǒng taí kyô ri; (Haú gi, hkohkâm Klodi é pyat má dut bê nghut lhê.) ²⁹ Haú mù luí, chángzô pé gi, Yuda mau mâ é gumang wui lé, ó le ó wó dut é myhó garum kat rá ga, myit hpyit yu bum akò. ³⁰ Haú eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pé chyáng hun kat bekò nghut ri.

12

Petruq, Htóng Mai Wó Lut Htoq Lo É Hkyô

¹ Haú u lé, Herut hkohkâm gi, hpúng byù ra-am lé chyup yù mù, zing-ri rá ga ngantsá nyi ri. ² Haú mù, Yohan é yhangmang Yakuq lé sham èq sat pyám nhang ri. ³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jàng chyup yu ri. Haú dut é gi, mún a kat é muk zo poí u lé nghut ri. ⁴ Herut gi, Lhoqlhai Poí lai jàng sheq, mingbyù wui hí má jéyáng rá ga myit tô é yanmai, yhang lé chyup yu é htàng má, htóng má lhúng to mù, yhang lé zúng rá matú, gyè myi yuq yuq kut myi hpúng lé ap tô ri.

⁵ Haú mù, Petruq gi, htóng má lúng tô ri; hpúng byù wui kúm gi, yhang é matú Garai Gasâng chyáng kyú gyai chòm dung byí nyi akò nghut ri.

⁶ Petruq gi, Herut èq yhang lé jéyáng rá matú she htoq yù rá hí myìn lé, shamtoq-tui í hkat èq tuí é hui luí, gyezo í yuq é gyoro má yhup myhí tô ri; zúng é bang le htóng hkum má zúng nyi bum akò. ⁷ Haú hkùn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má ê hpuk kat mù, "Myap toq wú aq." ga nhaú ri; haú hkùn, Petruq é loq mâ é toqjâng tui pé le gyut gyó ló bê nghut ri.

⁸ Maumang dum taí é gi, "Hpyihit hit mù, hkyí-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htàng cháng aq." ga yhang lé maumang

lagyo dum taí ri. ⁹ Haú hkûn, yhang gi, htóng mai yhâng htâng châng htoq lô ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri. ¹⁰ Ahkuí, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik htoq luí, wà hkyô rahkat má sô lô le, maumang lagyo gi, haú hkûn jáng, yhâng chyáng mai gâng lô byuq bê nghut ri.

¹¹ Ahkuí, Petruq gi, dum bûn gyíng lò jáng, "Yhumsíng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuí ngò gè gè sé bê." ga taí ri.

¹² Haú hkyô lé myit sé kat jáng, yhang gi, byù myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé lô ri. ¹³ Haú mù, yhang gi, yhûm wàng hkum lé lô bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lô ri. ¹⁴ Yhang gi, Petruq é htê nghut é lé sé gyô kat jáng, lûm gabú luí hkum a hpóng byi shí é za, yhúmhkaú shut din wang lô mù, "Petruq gi, hkum mhó lut má lo yap tô ri." ga lô taí kyô ri.

¹⁵ Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut âng ri." ga taí akô.

¹⁶ Nghut kôlhang, Petruq gi, hkum ru bat nyi mù, yhangmoq hpông kat é hkûn, yhang lé myàng kôjáng, chôm maú byuq bum akô. ¹⁷ Yhang gi, yhangmoq lé zim za nyi keq ga loq lik shit mù, yhang lé Yhumsíng eq htóng mai hkâsu kut shuí htoq yu é hkyô lé taí kyo luí, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq lô luí, jowò gó shut e lô bê nghut ri.

¹⁸ Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum akô. ¹⁹ Herut kúm gi, Petruq lé ho wú le a myàng jáng, zúng é bang lé myí gôn wú mù, yhangmoq lé sat pyám râ matú hkunmó hkyô ri.

Herut Hkohkâm Shi Byuq É Hkyô

Hau htâng, yhang gi, Yuda mau mai Kesare wà mó má gyó lô mù lô nyi nyi ri. ²⁰ Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ eq yhâng chyáng é mù, Blastu gâ é, hkohkâm wa lum tô é suwún hpó lé ê lûm hkaú mù, simsaq hkyô é dúng akô. Hkâsu mù gâ le, yhangmoq é zoshuq wó râ matú gi, Herut é ming lé lûm hkaú nyi kô é yanmai nghut ri.

²¹ Haú hkûn, ding lhûm tô é buinyi má, Herut gi, hkohkâm hking wut chûng mù, hkohkâm tanghkuq má zùng luí, yhangmoq lé hkohkâm mungdang byi ri. ²² Haú jáng, mingbyû wui gi, "Htê shí gi, waxâng byu é htê a nghut, garai wá é htê sheq nghut ri." ga garû bum akô. ²³ Radá dâm, Herut gi, Garai Gasâng é hpungwup shingkang lé a tê byi é yanmai, Yhumsíng é maumang lagyo gi, yhang lé dâm byi luí, yhang gi, luq eq hkê é hui mù, shi byuq bê nghut ri.

²⁴ Haú Garai Gasâng é mungdang gi, sé é bang myô jat lò mù, je riyhang byo myín lô bê nghut ri.

²⁵ Barnaba eq Sholuq nhik gi, Yerusalem wà mó má yhangnhik saí tûm nyi é muzó ban saí jáng, Markuq gâ é Yohan lé shuí chûng mù, Antioku wà mó shut taú lô bekô nghut ri.

13

Barnaba Eq Sholuq, Hkyin Nhang Kat Huí É Hkyô

¹ Ahkuí, Antioku wà mó mâ é noqkuq hpúng má, myiqhtoí pé eq sará pé le lom nyi akô. Haú bang gi, Barnaba, Niger* gâ é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akô. ² Yhangmoq gi, zoshuq gám luí Yhumsíng lé noqkuq dojaú nyi é hkûn, Choyiyúng Woi-nyí gi, "Ngá é mù wùn waq râ matú ji tô é Barnaba eq Sholuq nhik lé, hkyin to keq." ga taí ri. ³ Haú mù luí, yhangmoq gi, zoshuq gám luí kyûdung mù,

* 13:1 Grik dong Niger gâ é gi, byù noq gâ é nghut lhê.

yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴ Haú mù, yhangnhik gi, Chyoiyúng Woi-nyí eq nhang kat é eq rajung za, Seluki wà shut gyó ló mù, haú má é lhai ji luí, Kupru zinlóng má jé ló luí, ⁵ Salami wà mó má nyi nyi é hkùn, Yudaq byu pé é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

⁶ Yhangmoq gi, haú zinlóng mai lai byit e ló mù Pahpu wà mó jé ló kô é hkùn, myiqhtoi pyoq nghut sù Bara-Yesuq gâ é Yudaq byù myoqheq sará rayuq eq htông hui akô. ⁷ Haú yuq gi, Sergi Poluq gâ é, myit hpaqchyí kùng é ginwáng zau hpó é byù rayuq nghut lhê. Minggyi hpó haú gi, Garai Gasâng é mungdang gyô yù nau mù, Barnaba eq Sholuq nhik lé ji yu ri. ⁸ Haú hkùn, myoqheq sará gâ é lichyúm dông myhíng é Eluma le gâ é Bara-Yesuq kúm gi, ginwáng zau hpó lé haú lumjínng hkyô má a jau ló nhâng nau é nghut mù luí, yhangnhik lé lhom he tang pyâm ri. ⁹ Haú hkùn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luí, ¹⁰ "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkangmó é gye hpó é, Yhumsing é tengmán hkyô lé a lhoq hpyoq é a wó nyí lú? ¹¹ Ahkuí, wú aq, Yhumsing é loq gi, náng chyáng jé mù, náng gi, rayoq zo builoq a wó myang é za, myoqjit byuq râ nghut lhê." ga taí ri.

Haú hkùn jáng, yhâng é myoq gi, myhì-myhà ga luí mauchut tuq dut lò byuq ri; haú mù, yhang lé shê râ byù ho sop lhíng wún ri. ¹² Haú hkyô lé ginwáng zau hpó myàng jáng, Yhumsing eq sêng é mhoqshit é hkyô lé wú maú luí lumjínng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm wui gi, Pahpu wà mó mai lhai ji mù, Pamhpuli mau má é Perga wà má jé ló akô. Markuq gâ é Yohan kúm gi, yhangmoq eq gang luí, Yerusalem wà mó shut taú lú byuq bê nghut ri. ¹⁴ Dum, yhangmoq gi, Perga mai toq e ló le, Pesidi ginwáng má é Antioku

wà mó má jé ló akô. Bánno buinyi má, yhangmoq gi, tarajong má wang zung tô akô. ¹⁵ Haú hkùn, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, "Gumang wui é, mingbyù wui lé myit wum byi dang joq kô é nghut le gi, ahkuí taí lo keq." ga luí, yhangmoq chyáng taí nhang kat ri.

¹⁶ Haú hkùn, Poluq gi, toq yap mù, zím byuq kó sháng gaq ga loq tũ luí, "Israelaq byu pé eq Garai Gasang lé gyuq hkunggâ é byu pé é, chôm gyô yù keq. ¹⁷ Israelaq byu pé é Garai Gasang gi, ngamoq é íchyí iké pé lé hkyin yù bê nghut mù luí, Egutuq ming má byùbínng dut nyi to ashí hkùn, yhangmoq lé kô myhâng nhâng mù, hpungwup a-tsam bo é loq eq haú mau mai shuí htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyâm byi mù, ¹⁹ Hkanan ming má é byuhú nyhit hú lé lhoq htên pyâm luí, haú bâng é mingdán má é silí wunlí yhangmoq lé gám byí ri. Haú gi, myi shô ngo xê zàn kô myáng ri.

²⁰ Hau htâng má, Garai Gasang gi, myiqhtoi Samuelaq é pyat jé shoq tarâ agyí pé lé to byí ri. ²¹ Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyú má é, Kisha é yhangzo Sholuq lé byi luí, yhang gi, myi xê zàn up bê nghut ri. ²² Hau htâng, Sholuq lé lhoq hkyô pyâm mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

²³ Garai Gasang gi, Yhâng é danggidiq joq é eq rajung za, Israelaq byu pé é matú, haú yuq é awut ashín mai, hkyi yù Sù Yesuq lé, pô htoq nhâng bê nghut ri. ²⁴ Yesuq a jé lé shimá, Yohan gi, Israelaq byu pé banshoq lé myit lhíng hkyô eq sêng é baptisma hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyi-tsung tui hpyí râ lháng ngò a gíng.' ga taí ri.

²⁶ Abraham é yhangzo yhangshù pé eq Garai Gasang lé gyuq hkunggâ é tũngbaù,

gumang wuê ê, shî hkyi yù hkyô mungdang lé, nga-nhung chyáng byi kat bê nghut ri. ²⁷ Yerusalem wà mó má é bang eq, yhangmoq é zau suwún wuê gi, Yhang hkyi yù sù nghut é lé le, Bánno buinyi hkangmó nghap é myiqhtoî pé é dang lé le, a sê gyo kô é yanmai, Yesuq lé sat râ doqdân é hkûn, myiqhtoî pé é dang lé lhoq dik pyám bekô nghut ri. ²⁸ Yhâng chyáng shî gíng é mara a myàng kôlhang, Yhang lé sat pyám nhâng râ matú, Pilat chyáng dúng akô. ²⁹ Yhangmoq gi, yhang eq séng luî, kê to má kê to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri. ³⁰ Garai Gasang kúm gi, Yhang lé shi é mai lhoq dui toq yù bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuî, nga-nhung Israelaq byu pé é hí má, Yhâng é saksé dut bekô nghut ri.

³² Haú mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê. [☆]

ga luí, kê tô é eq rajung za, ³³ Garai Gasang gi, íchyí íwâ pé lé byi tô é danggidiq lé, Yesuq lé lhoq dui toq byi é dông, yhangmoq é yhangzo yhangshu ngamoq é matú, lhoq dik byi é gabú danglù lé, nungmoq chyáng ngamoq wun lé byi bê. ³⁴ Hau htoq agó, Yhang htên byoq é hkâ-nhám a hui shoq, shi é mai lhoq dui toq yù râ hkyô eq séng luí, Garai Gasang taí é gi,

'Dawiq lé byi tô é danggidiq eq rajung za, choyiyúng é eq lumgíng é jeju lé, ngò nungmoq lé byi râ nghut lhê. [☆]

gâ ri. ³⁵ Hkya-on Kungtôn Laiká gó wô má le,

'Náng é Choyiyúng Sù lé, Nàng htên byoq nhâng nau râ a nghut. [☆]

ga taí tô ri.

³⁶ Ahkuî, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, íchyí íwâ pé eq rahá myhup pyám hui mù, htên byoq byuq é hui

bê nghut ri. ³⁷ Garai Gasang lhoq dui toq yu é sù kúm gi, htên byoq huí é a nghut.

³⁸ Haú nghut é yanmai, gumang wuê ê, haú yuq mai yubak wó hkyut pyám byi é hkyô lé, nungmoq lé hko kyô nyi é nghut é le, sê nyi keq. ³⁹ Hau htoq agó, Mosheq é tarâ eq mara hkyut san byi é a hui kôlhang, haú yuq lé lumjíng é bang gi, hkyô lhumjup má mara hkyut san byi é hui râ nghut lhê.

⁴⁰ Hau é yanmai,

'Wú keq, jihpoi é bang ê, maú mù luí htum byuq keq;

nungmoq é buinyi pé má ngò rajung jung kut htoq râ nghut lhê;

⁴¹ haú hkyô lé, rayuq yuq, nungmoq lé hkaí kyo kôlhang, jíng kó râ a nghut. [☆]

ga luí, myiqhtoî pé taí é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuî, Poluq eq Barnaba nhik tarajong mai htoq ló le, htâng lhê é Bánno buinyi má le, haú pé lé dum hkaí kyo râ matú yhangmoq chôm dúng akô. ⁴³ Chôm byo htoq ló kô é hkûn, Yudaq byu pé eq Yudaq noqkuq htung má lhing wang lo é tarâ hkunggâ é byù myo myo gi, yhangnhik é htâng má châng bùm kô é nghut mù luí, Garai Gasang jeju má gíng nyi râ matú, yhangnhik gi, yhangmoq lé lhoq pun lhoq kyíng akô nghut ri.

Tûngbaù Pé Chyáng Lhing Lo É Hkyô

⁴⁴ Hau htang lhê é Bánno buinyi má, Garai Gasang é mungdang gyô yù râ matú, rawa bang aluq shoí banshoq, lé zup zîng to bum akô. ⁴⁵ Yudaq byu pé kúm gi, byù moq mó haú lé myàng jáng, manon myit baú byíng bùm kômù luí, Poluq taí é dang lé taí htíng é eq nhíng pyám akô.

⁴⁶ Poluq eq Barnaba le gyuq myit a bo é dông taí é gi, "Garai Gasang é mungdang lé, nungmoq lé hí taí kyo râ dut é yanmai, ngá-nhik taí bê nghut lhê. Nghut kôlhang, nungmoq gi, haú lé lhom he-ngik pyám kômù, ahtum abyuq é asak eq gíngdán é dông yhumsing gùng lé a myit yù kô é yanmai, wú keq, ahkuî, ngá-nhik gi, tûngbaù pé shut lhing ló berâ nghut lhê. ⁴⁷ Hkâsu mù gâ le, haú Yhumsíng gi,

'Hkyi yù hkyô lé maumyî htum shoq wó chùng jé râ matú, Ngò, nàng lé tũngbaù pé é maubó dut nhâng bê. ✠ ga luí, ngamoq lé hkunmó hkyó kat bê." gâ ri.

⁴⁸ Tũngbaù pé gi, dang haù lé wó gyo kôjáng, gabú é eq Yhumsing é mungdang lé hkyá-on kungtôn nyi bum akô. Ahtum abyuq é asak lé wó râ matú hkyin to huí é lhunglhâng bang le, lumjínng bum akô nghut ri.

⁴⁹ Yhumsing é mungdang gi, haù ming gón jam lò bê nghut ri. ⁵⁰ Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wuì mâ é tarâ hkungga bang eq, haù wà mâ é suwún wuì lé, nhik lhoq yo kôluí, yhangnhik lé maukyo mai chôm hkat htoq pyâm akô.

⁵¹ Yhangnhik gi, yhangmoq lé a nau é hkyô tũn shit é dông, yhumsing é hkyi mâ é hpuilhaù lé yhangmoq chyáng ko hkyô pyâm to kômù, Ikoni wà mó shut ló byuq bekô nghut ri. ⁵² Chángzô pé kúm gi, gabú é htoq agó, Choyiyúng Woi-nyí byíng nyi bum akô nghut ri.

14

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

¹ Ahkuí, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tũngbaù pé ajùm ayò lumjínng bùm kó shoq, wum kat hko kyô akô. ² Nghut kôlhang, a lumjínng é Yudaq byu pé gi, lumjínng é gumang wuì lé a ngui râ dông tũngbaù pé lé mhoq hpyoq yù mù, shuì gumlaù akô. ³ Haù mù luí, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akô; Yhang Yhumsing le yhangnhik é loq mai limik kumlhá eq mauhpo muzó dut nhang é dông, Yhâng é jeju mungdang lé saksé hkám byí nyi ri. ⁴ Haù wà mâ é bang kúm gi, myit byo ló bùm kô é nghut mù luí, Yudaq byu pé chyáng ra-am, lagyô pé chyáng ra-am, lom byuq ló akô. ⁵ Ahkuí, tũngbaù pé le, Yudaq byù eq yhangmoq é uphkâng bang le, yhangnhik lé rhoi mù luqgok eq dú sat râ ga htím lo bum akô.

⁶ Nghut kôlhang, yhangnhik gi, haù hkyô lé bũn sê kat kôjáng, Lukaoni ginwáng mâ é Lustra eq Derbe wà mó eq, hau é awuì ayàm wà tiq wà zo pé shut hfang e ló akô.

⁷ Haù pé má le, gabú danglù xoq hko kyô wún akô nghut ri.

Lustra Wà Mó Má Ló Jé É Hkûn Lhê Hkyô

⁸ Ahkuí, Lustra wà mó má, ìnu unghkaù mai hkyi hten mù luí, hkâ-nhám le hkyô a wó sô wú é sũ rayuq zung tô ri. ⁹ Yhang le Poluq taí é dang lé gyô nyi ri. Poluq gi, haù yuq lé wú tsuq kat é hkûn, wó lhoq gè byi hui râ nghut lhê gâ é lumjínng myit yhâng chyáng bo tô é lé, myàng byí ri. ¹⁰ Haù mù, Poluq gi, "Toq yap aq!" ga luí, htê mó eq yhang lé taí kat jáng, yhang gi, byam toq kat mù, wó so bê nghut ri.

¹¹ Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang dông, "Nat hparà pé gi, byù gùng dông kut luí ngamoq chyáng gyó lô bekô nghut ri." ga luí, wut garu bum akô. ¹² Hau htàng, Poluq gi, dang myô taí sũ nghut é yanmai, yhang lé Herme ga, Barnaba lé gi, Zeu ga myhíng byí akô.

¹³ Haù wà yàm mâ é Zeu hparà noqkuq yhùm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi râ hen akô.

¹⁴ Nghut kôlhang, lagyo nhik Barnaba eq Poluq gi, haù lé wó gyo kôjáng, yhumsing é mebu lãng cheq pyâm kôluí, shiwa hpong gung gũng shut ðin wang ê kômù, garù taí kô é gi, ¹⁵ "Hkaù pé ê, haí mù haù su kut lo akô lú? Nga-nhik le nungmoq eq rajung za, xângzo byù za nghut lhê, akyú a bo é hkyô shí pé lé tô pyâm to mù, mauhkũng eq myigũng, wuìshuq lung-aù eq haù pé má nyi mi-nyí, joq mijoq lé hpan to sũ, rú ðui nyi é Garai Gasàng chyáng lhing wang lò kó sháng gaq nghu luí sheq, nungmoq lé gabú danglù hko kyô é nghut lhê.

¹⁶ Garai Gasang gi, byù myú chângjup lé hí hpyang lhê é pyat bán má ó le ó kãm é dông kut nhâng bê nghut ri. ¹⁷ Nghut kôlhang, Yhang gi, mauhkũng mai mau wô nhâng luí, kyôshi zuí nhang é ahkyíng yam-yoq byi mù, nungmoq lé zoshuq agùn agó byí

é eq, nungmoq lé i-myt ngón nhang nyi é đông, Yhang ge é hkyô lé tûn shit mù, Yhang nyi é hkyô lé saksé hkâm nyi ri." ga akô.
¹⁸ Haû su ga taí kô le lhang, yhangnhik lé shiwa byu pé mai hkungga nhông byi râ hkyô lé, yhangnhik gi, gyai wuihke luí sheq wó hkûm pyâm akô nghut ri.

¹⁹ Hau htâng, Antioku wà mó eq Ikoni wà mó pé mâ é Yudaq byu pé ra-am lé jé kômù, shiwa byu pé lé shuî-u luí, Poluq lé luqgok èq chòm dú kômù, yhang lé shi byuq bê su ngàm kô é yanmai, wà shinggan shut shê hkyut htoq pyâm akô. ²⁰ Nghut kôlhang, Poluq gi, yhang é lêngkhuyq má chángzô pé yap tô kô é hkûn, toq mù wà shut tau wang ló ri. Hau htang nyí, yhang gi, Barnaba eq rahá Derbe wà mó shut e ló bekô nghut ri.

Antioku Wà Mó Má Taû Jé Ló É Hkyô

²¹ Haú wâ má yhangnhik èq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum taû ló kômù, ²² chángzô pé lé myit lhoq ging byi uchyang, haû lumjîng hkyô má ru gîng nyi râ matú myit wum byi akô. "Nga-nhúng gi, Garai Gasâng é mingdán má wàng râ matú, wuihke jamjau myo myo hui ra râ nghut lhê." ga le, mhoqshit akô. ²³ Yhangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luí kyûdung mù, yhangmoq lumjîng nyi é Yhumsîng Garaí chyang ap byi tô akô. ²⁴ Hau htâng, yhangnhik gi, Pesidi ginwáng mai laí byit ló mù, Pamhpuli ginwáng má jé ló akô nghut ri. ²⁵ Haú ginwáng mâ é Perga wà mó má mungdang hko kyo luí, Atali wà mó shut laí gyó ló akô nghut ri.

²⁶ Haû mai, lhaí ji mù, ahkuí yhangnhik wùn waq laí ló bê muzó é matú, Garaí Gasâng jeju má ap luí yhangnhik lé nhang kat é Antioku wà mó má dum jé ló bekô nghut ri. ²⁷ Jé lo é hkûn, yhangnhik gi, hpúng byù wui lé wut tsîng yù mù, yhangnhik đông mai Garaí Gasang kut é hkyô banshoq lé le, tûngbaù pé lé haû lumjîng hkyô hkum hpóng byi é hkyô lé le, shit kyô akô. ²⁸ Haû mù, yhangnhik gi, haú wâ má

chángzô pé eq tsómra myang shoq nyi nyi akô nghut ri.

15

Ahpyo-kuq Hpyit Hkyô Eq Sêng É Manghkáng

¹ Ahkuí, Yuda mau mâ é byù ra-am gi, Antioku wà mó má lé jé mù, gumang wui lé, "Nungmoq gi, Mosheq é htûngtarâ eq rajung za, ahpyo-kuq a hpyit é nghut jáng, hkyi yu é hui râ a nghut." ga luí, mhoqshit bum akô. ² Hau é yanmai, myit a hui lhum é hkyô htoq lô mù, Poluq eq Barnaba nhik gi, haú bang eq gyai yhang myíng myô lhum akô; haû mù luí, gumang wui gi, Yerusalem wà mó má nyi é lagyo pé eq suwún wui chyang, haú hkyô lé ló hpyê lhum râ matú, Poluq, Barnaba nhik eq rahá, yhangmoq chyang mâ é ra-am lé, nhang kat râ ga hkyin tô akô. ³ Haû mù, hpúng byù wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô laí ló uchyang, tûngbaù pé lêng wang lò bê hkyô lé taí kyô akô. Haú mâ é gumang wui lé gyai yhang gabú nhang akô nghut ri. ⁴ Yhangmoq, Yerusalem wà mó má jé kô é hkûn, hpúng byù wui, lagyo pé eq suwún wui gi, yhangmoq lé lhom hkûlum yù kô é nghut mù luí, yhangmoq gi, yhangmoq đông mai Garaí Gasang kut é hkyô lunglhang lé, haú bang lé shit kyô akô.

⁵ Haú hkûn, Hparishe hpúng mâ é lumjîng bang ra-am gi, toq mù luí, "Tûngbaù pé lé, ahpyo-kuq hpyit nhâng râ eq, Mosheq é tarâ đông cháng nhâng râ gi, ra yhang râ lhê." ga taí bum akô nghut ri.

Yerusalem Wà Mó Má Kut É Byìn Tú Wap Hpong

⁶ Ahkuí, lagyo pé eq hpúng suwún wui gi, shí hkyô lé chòm myit wú râ ga, zup tô bum akô. ⁷ Shí hkyô lé gyai yhang dang rhâng lhum bùm kô é htâng má, Petruq gi, toq mù luí, "Gumang wui ê, Garaí Gasang gi, ngá nhut mai taí é, haû gabú danglù lé, tûngbaù pé gyô yù mù lumjîng kó sháng gaq ga, hí hkûn nungmoq chyang mai ngo lé hkyin yù bê hkyô lé, nungmoq sé lugù nghut bê. ⁸ Haû mù, myit nhikhum lé sé byi sù Garaí

Gasang gi, nga-nhúng lé byî é eq rajung za, yhangmoq lé le Chyoiyúng Woi-nyí byî é dông, yhangmoq lé hap yù bê hkyô lé saksé tûn shit bê nghut ri. ⁹ Garai Gasang gi, yhangmoq lumjîng luî, yhangmoq é myit nhiklum lé lhoq san lhoq yúng byi bê nghut é yanmai, nga-nhúng eq yhangmoq é gyoro má gamhkuî é hkyô a joq nhâng lo nghut ri. ¹⁰ Haû nghut le gi, îchyí îwâ pê èq le, nga-nhúng èq le a ung é wòlai lé, haû chángzô pê é lingzing má ke byî é dông mai, haî mù, ahkuî Garai Gasang lé chyam wú nyi akô lúhú? ¹¹ Nghut kôlhang, ngamoq gi, yhangmoq eq rajung za, Yhumsîng Yesuq é jeju mai za hkyi yu é huî é hkyô lé lumjîng é bang nghut lhê." ga luî, yhangmoq lé taî ri.

¹² Haû hkûn, zup míng tô é bang lhunglháng gi, zim za kut luî, Barnaba eq Poluq nhik mai, tûngbaù pê chyáng, Garai Gasâng èq yhangnhik é loq dông limik kumlhá pé eq mauhpo muzó pé kut shit é hkyô, taî kyô nyi é lé chôm gyô nyi akô. ¹³ Yhangnhik dang ban taí kôjáng, Yakuq gi, "Gumang wui ê, ngá dang lé gyô wú keq. ¹⁴ Garai Gasang gi, tûngbaù pê chyáng mai Yhâng mying é matú byù ra-myû hkyin yù ra ga, yhangmoq lé sâng-hi mai hkâsu kut lé kûm nyi é hkyô lé, Simun taî kyo bê nghut ri. ¹⁵⁻¹⁶ Shí hkyô gi,

'Hau é htâng má gi, ngò dum taû lò mù luî, lêng gyop byuq bê Dawiq é yhûm* lé dum saî râ nghut lhê.

Haû byoq htên tô é pé lé saî saî mù, haû lé dum lhoq toq râ nghut lhê.

¹⁷ Haû hkûn sheq, ngá myîng mai ji yu é tûngbaù pé eq, myit gyo tô é byù lhunglhâng bang gi, Yhumsîng Garai lé hô kó râ nghut lhê ga,

¹⁸ a-nham mau htoq xâng hkun mai, shí hkyô pé lé sé nhang é Yhumsîng Garai taî ri.'*
ga myiqhtoî pé kê tô é dang eq rajung za nghut ri.

¹⁹ Haû mù luî, ngò taí nau é gi, tûngbaù pê chyáng mai Garai Gasâng shut lhing lo é bang lé, gotû haî le a lhoq wui é za, ²⁰ hparà lô pé lé kyáng byî é a sansêng é zoshuq pé

lé le, ashop é dông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lhê. ²¹ Hkâsu mù gâ le, gó hkûn mai yhang, Mosheq é tarâ lé wà hkangmó má hko kyô lô kômù, Bánno buinyi hkangmó tarajong pé má nghap kyo kyo kut bûm kô é nghut lhê." ga taî ri.

Lumjîng É Tûngbaù Pê Chyáng Hun Kat É Laiká

²² Haû hkûn, lagyo pé, suwún wui eq, hpúng byù wui lhunglhâng bang gi, Poluq, Barnaba nhik eq rahá Antioku wà mó shut nhang kat râ byù lé, yhangmoq chyáng mai hkyin yù ra matú chôm myit hpyit akô. Haû eq rajung za, yhangmoq gi, gumang wui chyáng mâ é nhik bô suwún nhik Barsabaq gâ é Yudaq eq Sila lé hkyin yu akô nghut ri.

²³ Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, tûngbaù gumang wui ê, nungmoq é gumang wui nghut é, ngamoq lagyo pé eq suwún wui gi, ngu-íngón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dang èq lhoq byok pyám luî, nungmoq é myit lé lhoq nhúng byî nyi é hkyô lé, ngamoq wó gyo bê. ²⁵ Haû mù, ngamoq lhunglhâng bang gi, byù ra-am lé hkyin yù mù, ²⁶ nga-nhúng é Yhumsîng Yesuq Hkrisduq é matú, yhumsing asak lé lháng a hâ é nga-nhúng chyitdap é Barnaba, Poluq nhik eq rahá, nungmoq chyáng nhang kat râ matú chôm myit huî bê. ²⁷ Haû mù luî, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taî kyo kó râ nghut lhê.

²⁸ Nungmoq é matú gi, hparà lô pé lé tîng byî é zoshuq eq sui, lingzing mai myhik sat é dusak sho eq ashop é dông gungsho zùm yap é hkyô pé lé, koi pyám râ hkyô mai lai luî, gotû wòwùn hûn râ hkyô a joq nghû luî, Chyoiyúng Woi-nyí le, ngamoq le, myit huî to bê. ²⁹ Nungmoq

* **15:15-16** Dawiq é yhûm gâ é gi, Dawiq eq yhâng é awut ashîn pé up é hkyô lé gâ é nghut lhê. ✧ **15:18** Amo 9:11-12

haú pé lé koi pyâm nyi kôjáng gi, gè rà nghut lhê.

Nguingón wángzán nyi kó sháng gaq ô!" ga kâ tô ri.

³⁰ Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byû wui lé ji tsing to kôluí, haú hûn kat é laiká lé ap byi akô nghut ri. ³¹ Hpúng byû wui gi, laiká haú lé ban nghap kôjáng, wum-o byi é danglù hau é yanmai, gabú nyi bum akô. ³² Yudaq eq Sila gi, myiqh-toi nhik le nghut kômù luí, gumang wui lé mungdang myo myô èq lhoq pun lhoq kying kômù, wum-o lhoq gîng to byi akô. ³³ Rayoq zo haú má nyi nyi kô é htâng má, gumang wui gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri. ³⁴ (Sila kúm gi, yhang ô nau é dông nyi gyó tô ri.)† ³⁵ Poluq eq Barnaba kúm gi, Antioku wà mó má nyi gyó to kômù, Yhumsing Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyi tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, wà hkyap hkangmó má é gumang wui chyáng taú lò luí, yhangmoq hkâsu dut nyi é hkyô lé, ló dum kúm wú lo goq." ga taí ri. ³⁷ Barnaba gi, Markuq gâ é Yohan lé le shuí chûng nau ri. ³⁸ Nghut kôlhang, Poluq gi, haú yuq lé a kâm shuí chûng nau nghut ri; hkâsu mù gâ le, yhang gi, Pamhpuli mau má yhangnhik lé tô pyâm to mù, yhangnhik eq rahá muzó a kâm xoq zui nau é sù nghut é yanmai nghut ri. ³⁹ Hau é yanmai, yhangnhik gi, gyai yhang taí shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chûng luí, lhai ji mù Kupru zinlóng shut e ló byuq bê nghut ri. ⁴⁰ Poluq kúm gi, Sila lé hkyin yù mù, gumang wui èq yhang lé Yhumsing Garaí é jeju má ap kat kô é htâng má, yhangnhik gi, htoq e ló byuq bekô. ⁴¹ Haú mù, Poluq gi, Suriq mau eq Kiliki mau mai sô lai ló

uchyang, haú mâ é noqkuq hpûng pé lé wum-o lhoq gîng byi wún bê nghut ri.

16

Poluq Eq Sila Nhik Chyáng Timohti Châng É Hkyô

¹ Poluq gi, Derbe wà mó má jé é htâng, Lustra wà mó má dum jé ri. Haú wà má, Timohti gâ é chángzo rayuq nyi ri. Yhâng nu gi, Yesuq lé lumjîng é Yudaq myiwe myhí nghut ri; yhâng wa kúm gi, Grik amyû nghut ri. ² Timohti gi, Lustra wà mó eq Ikoni wà mó má nyi é gumang wui èq hkyâ-ôn é hui sù nghut ri. ³ Poluq gi, hkyowui má yhang lé shuí chûng nau mù luí, ahpyo-kuq hpyit byi ri. Hkâsu mù gâ le, yhâng wa gi, Grik nghut é hkyô lé haú mâ é Yudaq byu pé lhunglhang bang sé kômù, haú bang lé myit tê byi é yanmai nghut ri. ⁴ Haú mù, yhangmoq gi, rawa htâng rawa mai lai ló uchyang, Yerusalem wà mó má é lagyo pé eq hpúng suwún wui, chôm myit hpyit tô é hkyô lé, cháng kó sháng gaq ga, yhangmoq lé taí kyô akô. ⁵ Haú mù luí, hpúng byû wui gi, lumjîng hkyô má wum-o bo lò kômù, ranyí èq ra-nyí byù du myô jat lo nyi ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang é hko kyo râ hkyô lé Chyoiyung Woi-nyí èq yhangmoq lé hkûm pyâm é yanmai, Hprugi mau eq Galatiq mau dông sô lai lò mù, ⁷ Musi mau kyo má jé lò kôjáng, Bihtuni mau shut wang ló râ dâ akô; nghut kôlhang, Yesuq é Woi-nyí gi, yhangmoq lé ahkáng a byi nghut ri. ⁸ Haú mù, yhangmoq gi, Musi mau mai sô lai lò luí, Troa myuq má gyó jé lò akô. ⁹ Haú má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yû laq." ga luí, yhang lé dung wut nyi é shing-rán myang ri. ¹⁰ Shing-rán haú lé Poluq myang é eq, Makedoni byu pé lé gabú danglù hko kyo râ matú, ngamoq lé Garaí Gasang wut yù bê nghut ri nghú myit yù luí, haú hkûn yhang, ngamoq gi, Makedoni mau shut dap ê râ matú rì rì kut lò bê nghut lhê.

† 15:34 Bun zo shí lhum gi, Grik Chyúmlaiká myo myo má a bò nghut lhê.

Ludia Gâ É Myiwe Myhí Hpúng Byû Dut Lo É Hkyô

¹¹ Haû mù luí, ngamoq gi, Troa myuq mai Samohtake zinlóng ang ang shut lhai ji ê mù luí, htang nyí gi, Neapoli wà má jé bê nghut lhê. ¹² Haû mai lai jáng, Make-doni mau má, Romaq byu pé xuq tô é, haú ginwáng mâ é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

¹³ Bánno buinyì jé jáng, ngamoq gi, kyûdung jowò joq nhô ngam mù, wà hkum shinggan mâ é, wuilàng yàm shut htoq ê luí, haú má zîng to láng é myiwe wuì lé, zung gyó mù nyo hi é nghut lhê. ¹⁴ Haú dang gyo nyi é bang má, Garai Gasang lé noqkuq é, Htuatira myuq byû, pán nê ung zo sù Ludia gâ é myiwe myhí rayuq bo ri; Yhumsîng Garai gi, Poluq taí kyô é hkyô lé rago gyô yù sháng gaq ga, yang lé myit hkum hpóng byí ri. ¹⁵ Yang gi, yang eq yhang yhumbyù wuì wuì-myhup ban hkâm yù kôjáng, "Nungmoq gi, ngo lé haú Yhumsîng Yesuq má lumjîng bê sù nghut é dông, myit yù byi kô é nghut jáng, ngá yhûm má lé bíng keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haú kyûdung é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haú yuq gi, gumhpân hpan é dông yhang yhumsîng wuì lé ngunzè gyai yang hô byí é sù nghut lhê. ¹⁷ Myiwe haú gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô taí kyô wún é, Myhang Htâng é Garai Gasâng é dui-nhâng zoshâng wuì nghut bum akô ô!" ga wut garû ri. ¹⁸ Buinyì myo myo haú su chyat châng garû wún é yanmai, Poluq gi, gyai yang myit hpêbu byuq mù, lhing wú kat luí, nat haú lé, "Yesuq Hkrisduq é myîng lang luí ngò nang lé hkunmó hkyô kat lhê, yhang chyáng mai htoq ló byuq aq." ga luí, nat haú lé, nhik-yô kat ri. Haú hkûn jáng, nat haú gi, yhang chyáng mai htoq ló byuq bê nghut ri.

¹⁹ Ahkuí, myiwe hau é yhumsîng wuì gi, ngunzè myàng zo râ myoqbyù jowò a

joq lo é hkyô lé sé kôjáng, Poluq eq Sila nhik lé chyup yù mù, gai mâ é suwún wuì chyáng she hkyut e akô. ²⁰ Dum, yangmoq gi, yangnhik lé tarâ agyì pé chyáng shuí ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byí nyi é dông, ²¹ nga-nhûng é myuq lé gunjâng nyi akô nghut ri." ga taí akô.

²² Haú mù luí, shiwa byu pé gi, yangnhik lé chôm htîm akô. Tarâ agyì pé gi, yangnhik é mebu lé lêng hkyut pyám luí, wumchûm hkat eq bat râ matú, hkunmó hkyô kat akô. ²³ Yangmoq gi, yangnhik lé gyai yang nhuq bat yu é htâng, htong má lhûng kat mù, rago za wú zúng râ matú htóng suwún lé hkunmó hkyô tô akô. ²⁴ Htóng suwún hpó gi, haú sù é hkunmó lé wó jáng, yangnhik lé hkyi kyum hut luí, htóng mâ é, je ahtê gok má lhûng tô ri.

Htóng Suwún Hpó Hkyi Yù Huí É Hkyô

²⁵ Nghut kôlhang, gunggâm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkûn, htóng byù góbang gi, yangnhik é htê lé chôm gyô nyi bum akô. ²⁶ Haú hkûn, byodàn ratung layàng mó nún lô mù htóng yhûm gón le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkanmó mâ é tojâng tui pé le gyut gyó byuq bê nghut ri. ²⁷ Htóng suwún hpó gi, yhup bûn lò mù, htóng hkum pé bóng hâ tô bum é lé myang kat jáng, htóng byu pé ban hpang byuq bûm bekô râ nghut lhê ga myit yù luí, shâm shê mù, yhanggûng yang sat shî râ dâ ri. ²⁸ Nghut kôlhang, Poluq gi, "Ê, náng gûng yang nàng haú su hkâkut, ngamoq banshoq shî má nyi tô lhê." ga luí, htê mó eq wut garu taí kat ri.

²⁹ Haú hkûn, yang gi, duq é myibung lé dung yù mù, ahkaú shut din wang ló luí, Poluq eq Sila nhik é hí má gyuq nán é eq ngóm gop tô ri. ³⁰ Hau htâng, yang gi, yangnhik lé shuí htoq yù luí, "Sarâ nhik ê, ngò hkyi yu é hui râ matú, haí kut ra râ lú?" ga myi kat ri.

³¹ Haú hkûn, yangnhik gi, "Yhumsîng Yesuq lé lumjîng jáng, nàng eq náng yhumbyù lhunghâng bang hkyi yu é hui râ

nghut lhê." ga taî akô. ³² Hau htâng, yhangnhik gi, haû htóng suwún hpó eq yhâng yhumbyù lhunglhâng lé, Yhumsing é mungdang hko kyô akô. ³³ Haû myîn haû u lé yhang, htóng suwún hpó gi, yhangnhik lé shuí ê mù, yhangnhik é dàm pé lé tsing chî pyám byi luî, haû htâng, yhang eq yhâng yhumbyù banshoq bang wui-myhup hkâm yù bekô nghut ri. ³⁴ Hau htâng, yhang gi, yhangnhik lé, yhâng é yhúmhaû má shuí wang ló mù, zoshuq hkang byî ri. Yhang eq yhâng yhumbyù banshoq bang gi, Garai Gasang lé wó lumjîng bekô nghut é yanmai, gyai gabú nyi bum akô nghut ri.

Haq Nhang Pyám Râ Lé A Đông É Hkyô

³⁵ Ahkuî, maubó jáng, tarâ agyî wuî gi, "Haû nhik lé nhang pyám aq." ga, htóng suwún hpô chyáng pyata pé lé taî nhang kat akô. ³⁶ Haû hkûn, htóng suwún hpó gi, "Nungnhik lé nhang pyám aq ga, tarâ agyî wuî mai byù nhang kat ri; haû mù, ahkuî, nungnhik gi, ngón za htoq ló lo keq." ga luî, Poluq lé taî ri.

³⁷ Poluq kúm gi, "Nga-nhik gi, Romaq mingdán byû sheq ru nghut le wa, myî gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluî nhîng, ahkuî tsik za haq nhang pyám râ dâ akô nhung lhi? A wó dut, yhangmoq yhang sheq lé shuí htoq yû kó sháng gaq." ga luî, yhangmoq lé tû taî kat ri.

³⁸ Pyata pé gi, tarâ agyî wuî lé dang haû pé ló taî kyo kôjáng, tarâ agyî wuî gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluî, ³⁹ yhangmoq yhang, yhangnhik chyáng lé mù, tóngbán luî, shuí htoq yû mù, wà haû mai htoq ló byuq râ matú chôm dúng akô. ⁴⁰ Haû mù, Poluq eq Sila nhik gi, htóng mai htoq ló é htâng, Ludia é yhôm má wang ló akô; haû má, gumang wuî eq le hui kômù, yhangmoq lé wum-o byi luî, htoq ló bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amhpipoli wà mó eq Apolon wà mó mai sô lai ló mù,

Htesaloni wà mó má jé akô. Haû wâ má gi, Yudaq byu pé é tarajong rallum joq ri. ² Poluq gi, yhang lhaq kut nyi é eq rajung za, tarajong má wàng luî, Bánno buinyî sum nyi yhang, Chyúmdang má bo é eq séng mù, yhangmoq eq chôm mîng lhum uchyang, ³ Hkrisduq wuîhke jamjau hui mù, shî bê mai dum dui toq lô râ hkyô lé taî hkoq san kyo luî, "Nungmoq lé, ngò hko kyô nyi é haû Yesuq gi, Hkrisduq nghut lhê." ga taî ri. ⁴ Yudaq byu pé mâ é ra-am gi, gyô jîng kômù, Poluq eq Sila nhik chyáng lé xoq yu akô; haû eq rajung za, Garai Gasang lé hkunggâ é Grik pé myo myo eq, ahkyak é myiwe wuî tsómra myo shoq le, gyô jîng kômù, lé xoq yu akô.

⁵ Nghut kôlhâng, a gyô jîng é Yudaq byu pé gi, manôn kôluî, gai má é byùgang jùm ra-am lé lung yù mù, byù moq mó tsîng yù luî, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhôm má htîm e ló akô. ⁶ Nghut kôlhâng, yhangnhik lé a myàng kôjáng, yhangmoq gi, Yason eq gumang wuî ra-am lé, yhangmoq é wà suwún wuî chyáng lêng she é kômù, "Mingkan gón lé atau ahû kut é byù shí nhik, ahkuî shî má jé jáng, Yason gi, yhâng é yhôm má lhom hkûlum yu ri. ⁷ Yhangmoq lhunglhâng bang gi, Yesuq gâ é hkohkâm góyuq nyi lhê ga kôluî, hkoséng Kehtaq é tarâ lé lhoq shai é đông kut é bang nghut akô." ga taî garû bum akô. ⁸ Shiwa byu pé eq wà suwún wuî gi, dang haû lé wó gyo kôjáng, myit wuî myit hke dut nyi bum akô. ⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidîq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haû myîn jáng yhang, gumang wuî gi, Poluq eq Sila nhik lé Beria wà mó shut nhang kat akô; yhangnhik gi, haû wà má jé jáng, Yudaq byu pé é tarajong má wang ló akô nghut ri. ¹¹ Haû Beria wà mó byu pé gi, Htesaloni wà mó byu pé htoq má je riyhang nhik bo bum akô; haû mù, danglù haû lé gyai ô nau é myit èq hap yù mù, danglù shî teng a têng é hkyô lé wó sé shoq

ga, nyí wuî Chyúmdang lé chôm nghap wú nyi akô nghut ri. ¹² Haú mù luí, Yudaq byu pé myo myo gi, lumjínq bum akô, haú eq rajung za, aróng wó é Grik myiwe wuî eq yuqgè wuî myo myo le, lumjínq bùm bekô nghut ri.

¹³ Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó má é Yudaq byu pé sé kôjáng, yhangmoq gi, haú má lé kômù, wà byù wuî lé mhoq hpyoq luí, gabyông lò nhang akô. ¹⁴ Haú hkûn, gumang wuî gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri. ¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló rà matú pying kat é dang lé wun chûng mù, dum taù lò bekô nghut ri.

Poluq, Ahten Myuq Má Nyi É U Lhê Hkyô

¹⁶ Ahkuî, Poluq gi, Ahten myuq má haú nhik lé láng nyi tô é u lé, haú wà má rawa é hparà lhô baú dut tô é lé myàng mù luí, yhâng i-myyit gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuî taí sân kyô lhûm nyi akô nghut ri. ¹⁸ Haú mù luí, Epikuri hpaqchyî eq Sto-i hpaqchyî* lé sê é, myit wú hpaqchyî bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haí wá taí nyi lhê lhú?" ga; ra-am gi, "Góming hparà pé é hkyô lé taí kyo sù nghut sam ri." ga, taí bum akô nghut ri. ¹⁹ Hau htâng, yhangmoq gi, Aripagu gâ é byìn tú wap shut Poluq lé shuî doq ló mù, "Nang mhoqshit é hkyô asik, ngamoq lé sé nhang le a gè lhú? ²⁰ Nang èq taí é maú nhô za gâ é hkyô lé ngamoq wó gyô ri; haú é dang kyíng lé ngamoq sé nau ri." ga taí bum akô. ²¹ (Ahten byu pé eq haú má nyi é góming byu pé lhunglhâng bang gi, dang sik lù sik

haú lé taí kún gyô kún mù, yhangmoq é ahkyíng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé é, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaî matú.', ga luí, kâ tô é hkungga gyap ralhum lé myang záng ri; haú nungmoq a sê é za jaú nyi é Garaî hkyô lé, ngò, nungmoq lé hkaî kyo kôlé.

²⁴ Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsîng le nghut lhê mù luí, byu loq èq saí é noqkuq yhûm má nyi rà a nghut. ²⁵ Yhang gi, byù lhunglhâng bang lé asak, soq, ra mira gumjup shoq byi to sù nghut nyi é yanmai, rajung jung rà é sù lé su, byu loq èq dojaú rà sù a nghut. ²⁶ Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yamyoq eq nyi rà jowò masat to byi bê nghut ri. ²⁷ Yhang gi, nga-nhúng yuq hkangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. ²⁸ Hkâsu mù gâ le, nungmoq é jihkyang kat bang, 'Nga-nhúng le yhâng é awut ashîn pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.

²⁹ Haú mù, nga-nhúng gi, Garai Gasâng é yhangzô pé nghut nyi é yanmai, Garaî gùng gi, byu é hpaqchyî loq èq kyûng kâ tô é hîng, ngùn, luqgòk pé eq pûng lhê nghú luí hkâ-myyit yù kó. ³⁰ Laí lò bê haú myoq a bóng shi é pyat lé, Garai Gasang gi, haí le a ga lhaí pyâm to kôlhang, ahkuî gi, jowò hkangmó má é byù lhunglhâng bang lé, myit lhîng keq ga hkunmó hkyô to bê nghut ri. ³¹ Hkâsu mù gâ le, Yhang hkyin to sù mai mingkan gón lé tara é dông jéyáng rà buinyi

* **17:18** Epikuri hpaqchyî gi, htang pyat a joq, ahkuî ngón yù rà za ahkyak gâ é nghut lhê. Sto-i hpaqchyî gi, haí wá dut kôlhang i-myyit zim za kut mù, htang pyat matú chiq a ra gâ é nghut lhê.

ra-nyí masat to bê nghut ri. Shí hkyô lé, byù lhunglhâng bang é hí má wó lum é saksé dut sháng gaq ga, Yhang haú yuq lé shi é mai lhoq dui toq yú bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô.

³³ Hau htâng, Poluq gi, haú zuphpong mai htoq ló byuq bê nghut ri. ³⁴ Nghut kôlhang, byù ra-am gi, Poluq é htâng cháng kômù, lumjíng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotú byu pé le, bo bum akô nghut ri.

18

Poluq, Korinhtuq Myuq Má Nyi É U Lhê Hkyô

¹ Hau htâng má, Poluq gi, Ahten myuq mai htoq luí, Korinhtuq myuq má jé lo ri. ² Haú má, yhang gi, Romaq myuq mai Yudaq byù lhunglhâng bang htoq ló byuq râ dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luí, yhangnhik chyáng ê ri. ³ Yhangmoq gi, jonghpang saí zo bang chyat nghut kô é yanmai, muzó púng kôluí, Poluq gi, yhangnhik eq rahá nyi nyi mù, muzó chôm saí akô. ⁴ Bánno buinyi hkanmó, Poluq gi, tarajong má Yudaq byù eq, Grik pé lé, taí sân kyo luí, lhoq pun lhoq kyíng yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhang, Yudaq byu pé gi, lhom he-ngik pyám kômù, yhang lé rhoí dang taí pyám akô; haú mù, Poluq gi, yhang mebu ko shit é dông yhangmoq lé a nau é hkyô tûn shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbaù pê chyáng e ló berâ nghut lhê." ga luí, yhangmoq lé taí ri.

⁷ Hau htâng, yhang gi, tarajong mai htoq luí, jong haú eq yhep nghut é, Garai Gasang lé noqkuq é Titu Yustu ga su é yhúm má wang ló ri. ⁸ Krispu gâ é tarajong má up sù gi, yhang yhumbyù lhunglhâng bang eq rahá, Yhumsing lé lumjíng akô. Korinhtuq myuq byu pé myo myo le, Poluq é dang lé gyô yù mù, lumjíng luí, wui-myhup hkâm yu bum akô nghut ri.

⁹ Ra-myìn lé, shing-rán ralhum má Yhumsing mai Poluq lé taí é gi, "Hkâgyuq, taí aq, zim za hkâ-nyí. ¹⁰ Ngò nàng eq rahá nghut nyi lhê, nàng lé ó yuq èq le haí wó kut râ a nghut, hkâsu mù gâ le, myuq shí má, ngá é byù myo myo nyi bum lhê." gâ ri. ¹¹ Haú mù luí, Poluq gi, Garai Gasang é mungdang mhoqshit uchyang, razàn eq lhamó hkyuq hkyap yhang, haú myuq má nyi nyi ri.

¹² Galio ga sù, Ahkaia mau má é ginwáng zau kut nyi é u lé, Yudaq byu pé gi, myit rahkat zâ èq Poluq lé chôm chyup yú kôluí, tarâ hpyit wap má she háng kômù, ¹³ "Byù shí yuq gi, jep é tarâ eq shai lhúm é dông, Garai Gasang lé noqkuq râ matú, byu pé lé mhoq hpyoq wún ri." ga mara hún akô.

¹⁴ Haú hkûn, Poluq tû taí râ dâ lò jáng, Galio gi, Yudaq byu pé lé, "Yudaq byu pé ê, muzó shí gi, tarâ lu laí é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê. ¹⁵ Nghut kôlhang, muzó shí gi, nungmoq é tarâ eq séng luí, dang eq séng luí, myíng eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyí kut byi râ a nghut." ga taí mù, ¹⁶ tarâ hpyit wap mai yhangmoq lé hkat htoq pyám nhang ri. ¹⁷ Haú hkûn, yhangmoq lhunglhâng bang gi, tarajong má up sù Sositeni lé chyup yú mù, tarâ hpyit wap hí má chôm bat akô. Galio kúm gi, haú hkyô lé hai gùn a kut byi nghut ri.

Poluq, Antioku Wà Mó Má Dum Taú Jé É hkyô

¹⁸ Poluq gi, Korinhtuq myuq má buinyi tsómra myáng shoq lumjíng bang eq nyi nyi ri. Hau htâng, yhang gi, haú bang lé shi-kyâm to luí, Priskila eq Akula nhik lé

byinzùm kut mù, lhai ji luí Suriq mau shut e ló akô. Hau hí má, yhang gi, danggididq tô tô é yanmai, Kenhkrea wà má xâm nyhâm pyâm ri.* ¹⁹Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé taí sên kyo byí ri. ²⁰Haú má é bang gi, yhangmoq eq rahá rayoq zo nyi shi rá dông yhang lé dung kô é nghut kôhang, yhang gi, a nhô lo nghut ri. ²¹Haú mù, yhang gi, Ehpesu myuq mai lhai ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé rá nghut lhê." ga, yhangmoq lé danggididq byí tô ri. ²²Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htâng, Antioku wà mó má dum gyó ló ri.

²³Yhang gi, haú wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawà má é chángzô pé lé wum-o lhoq ging byí ri.

Apolo Zui Saí É Muzó

²⁴Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kûng é sù nghut ri. ²⁵Yhang gi, Yohan é baptisma hkyô lé za sé sù nghut kôhang, Yhumsing é hkyô lé mhoq yú bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byí ri. ²⁶Ahkuí, yhang gi, gyuq kyûm myit a bo é za tarajong má taí hí ló ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasâng é mungdang hkyô lé azó tung taí sên kyo byí akô nghut ri.

²⁷Apolo gi, Ahkaia mau shut dap e ló nau é hkûn, gumang wui gi, yhang lé wum saí byi mù, yhang lé lhom hkûlum yù rá matú, chángzô pé chyáng laiká ká byí kat akô; yhang gi, jé jáng, Garai Gasâng jeju mai lumjíng bê bang lé, gyai yhang wó garúm sù dut bê nghut ri. ²⁸Hkâsu mù gâ le, yhang

mai, Yesuq gi, Hkrisduq yhang nghut nyi ri ga luí Chyúmdang má tûn shit uchyang, byu pé hí má Yudaq byu pé lé, wum kat wó taí ung pyâm é yanmai nghut ri.

19

Poluq, Ehpesu Myuq Má Nyi U Lhê Hkyô

¹Ahkuí, Apolo gi, Korinhtuq myuq má nyi tô é hkûn, Poluq gi, mau káng mai sô lai ló mù, Ehpesu myuq má jé ri. Haú má, yhang gi, chángzô pé ra-am eq huí luí, ²yhangmoq lé, "Nungmoq gi, lumjíng é hkûn, Chyoiyúng Woi-nyí lé, wó yú bekô lhú?" ga myí ri.

Haú hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tû taí akô.

³Haú mù, Poluq gi, "Haú nghut jáng, nungmoq gi, haí jung baptisma hkam yú kô é lhú?" ga luí, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tû taí akô.

⁴Haú hkûn, Poluq gi, "Yohan é baptisma nghu é gi, myit lhíng mù wui-myhup hkâm yu é hkyô lé gâ lhê. Yohan gi, yhang é htâng má jé lé rá sù, haú Yesuq lé sheq lumjíng rá lhê ga shiwa byu pé lé taí ri." ga taí ri.

⁵Yhangmoq gi, dang haú lé wó gyo kôjáng, Yesuq é myíng lang luí baptisma byí é lé, hkam yu bum akô. ⁶Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoí lo bum akô. ⁷Haú bang lunglhang gi, yuqgè raxe í yuq kó nghut ri.

⁸Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé taí sên kyo mù, lhoq pun lhoq kyíng yu ri.

⁹Nghut kôhang, ra-am gi, myit htan lo bùm kôluí a kâm lumjíng kô é htoq agó, haú Yhumsing é Hkyô lé byu pé hí má lhoq hpoí pyám byi kôjáng, Poluq gi, yhangmoq chyáng mai htoq luí, chángzô pé lé shuí chûng mù, Turanu gá su é hpaqchyí mhoq jong má, nyí wui taí sên kyô lhúm nyi akô.

¹⁰Haú su kut í zân yhang mhoqshit nyi é yanmai, Asia mau gón má é Yudaq byu pé

* **18:18** Xâm nyhâm pyâm é gi, Yudaq htûng dông rajung jung kut rá matú danggididq to luí, haú lé ban kut jáng, yhumsing xâm lé nyhâm pyâm é nghut lhê.

eq Grik pé lhunglhâng bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dông laklai kumlhá kut ri. ¹² Haú mù, Poluq chyáng má é hpajet eq hpyihit rajung jung lé, nò bâng chyáng yu ló mù, ló záng byi jáng lháng, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

¹³ Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é mying mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhumsing Yesuq é mying lé lang luí, hkat chyam wú akô. ¹⁴ Skewa gâ é, Yudaq hkyangjong agyì rayuq é yuqzo nyhit yuq le haú su kut wun akô. ¹⁵ Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tû taí mù, ¹⁶ agè ashop é nat haú wang júng é byù gi, yhangmoq htoq má byam doq jí to luí, nhuq bat yù mù yhangmoq lé ung pyâm ri. Yhangmoq gi, yhùm haú mai gungchín sui nê yang yang hpanq htoq ló bekô nghut ri.

¹⁷ Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhâng bang gi, chôm gyô gyuq bum akô. Yhumsing Yesuq é mying gi, hkyá-on lhoq toq é hui bê nghut ri.

¹⁸ Lumjínq bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akô. ¹⁹ Myoqheq hpaqchyí kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyâm akô. Mausau haú pé é ahpau lé sôn wú le, ngùn chap ngo mun záng ri. ²⁰ Haú dông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htâng má, Poluq gi, Makedoni mau eq Ahkaia mau dông sô lai ló mù, Yerusalem wà mó má ló jé rà ga myit hpyit yù luí, "Haú má ló jé tô é htâng má, ngò, Romaq myuq má le, jé wú

râ dut ashî." ga taí ri. ²² Haú mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyô tô ri.

²³ Haú yoq lé, haú Yhumsing é Hkyô yanmai gyai yhang gabyông lo bum akô.

²⁴ Demetri gâ é ngùn bat zo sù rayuq gi, Artemi hpara é ngùn yhùm zòng zo saí luí, mù saí luzúm wuí lé wó sùt nhang nyi ri.

²⁵ Yhang gi, yhâng é ngùn bat zo luzúm wuí eq haú jung amú kut é góbang lé le jí tsing to mù, taí é gi, "Luzúm wuí ê, muzó shí lhùm é yanmai, nga-nhúng nyi ngón yuqyo nyi é hkyô lé, nungmoq sê lhê. ²⁶ Nghut kôle,

ahkuí gi, Ehpesu myuq má za le a nghut lo, Asia mau lháng aluq jâm shoq, byu loq èq saí é zè lé, garaí pé a nghut ga, shí Poluq ga sù mai byù myo myo lé mhoq hpyoq yù mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô.

²⁷ Haú mù luí, nga-nhúng é muzó shí gi, hpoí byuq râ lé chiq râ é za a nghut, hparà myhí mó Artemi é noqkuq yhùm gi, haí a dut byuq luí, Asia mau gón eq mingkan gón mai noq é hparà myhí é shingkanq hpoí byuq râ lé le myit chiq râ dut bê." gâ ri.

²⁸ Yhangmoq gi, dang haú lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ô!" ga chôm garú bum akô. ²⁹ Hkâm-yháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poí wàng mó shut radá dâm chyín chyap wang ló bum akô. ³⁰ Poluq gi, moq hpúng hau hí má htoq shit naú kôlhang, chángzô pé gi, yhang lé a wàng nhâng kó nghut ri. ³¹ Poluq é luzúm wuí nghut é, haú mau má é suwún wuí ra-am lháng, yhang lé poí wàng hkaú má a ê rà matú, hkùm pyâm nhang akô nghut ri.

³² Zíng tô é bang gi, hai hù háng le a sé lo dut byuq kômù luí, ra-am rajung ga garú bum akô. Myo mi-myô gi, haí mù luí yhangmoq haú má nyi tô é lé lháng a sê bùm kó nghut ri. ³³ Yudaq byu pé gi, Alesander lé hí má chôm chyùn htoq kat kôluí, shiwa hpong mai ra-am gi, yhang hká dông taí râ hkyô lé mhoq byi kat akô. Alesander

le shiwa hpong lé taí san kyo naú luí, zim byuq râ matú loq tu ri. ³⁴ Nghut kôlhang, Alesander, Yudaq byù nghut é lé sé kôjáng, yhangmoq lhunghâng bang gi, rahtê za kut kôluí, "Ehpesu myuq byu pê é Artemi gi, kô nyí sháng gaq ô!" ga hkyíng hkum í hkum kô garú bum akô.

³⁵ Haú, myuq chyare hpó gi, shiwa moq mó lé lhoq zim luí taí é gi, "Ehpesu myuq byu pé ê, Ehpesu myuq shí gi, Artemi myhí mó é noqkuq yhúm eq mauhkûng mai byit gyó lo é yhâng é alhô lé, wú zúng nyi é wà nghut é hkyô lé, mingkan má a sê é ó yuq wa nyi lhê lhú? ³⁶ Haú mù luí, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko. ³⁷ Shí nhik gi, noqkuq yhúm lé hpoyôq zo su nhik le a nghut, nga-nhúng é hparâ myhí lé lhoq hpoi su nhik le a nghut kô é le nhing, nungmoq shuí lé bekô nghut ri. ³⁸ Demetri eq yhâng é ngùn bat zo luzúm wú gi, rayuq yuq é ahtôq má mara hún râ hkyô joq kô é nghut jáng, tarâ rûng pé hpông tô lhê. Tarâ agyi pé nyi lhê. Haú má yhangmoq ê kó sháng gaq. ³⁹ Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyâm râ nghut lhê. ⁴⁰ Hkú-nyí gabyông é mú shí má, mú htoq wang a bo é yanmai, nga-nhúng lé mara hún râ chiq râ ri. Shí su kut chôm míng é hkyô lé, hai é yanmai nghut lhê nghú, nga-nhúng a wó taí kyo nghut ri." gâ ri. ⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Đông Lai Lô É U Lhê Hkyô

¹ Haú gabyông é hkyô zím byuq é htâng má, Poluq gi, chángzô pé lé ji yù luí, yhangmoq lé wum byi dang taí to mù, shi-kyâm to luí, Makedoni mau shut htoq e ló bê nghut ri. ² Yhang gi, haú mau mai sô lai ló uchyang, byu pé lé wum byi é dang myo myo taí luí, Grik mau má ló jé bê. ³ Yhang haú má lhamó sum hkyap nyi yù mù, lhai ji luí Suriq mau shut ê râ hen nyi é hkûn,

Yudaq byu pé gi, yhang lé gyám nyi kô é yanmai, yhang gi, Makedoni mau đông tau lò râ lé myit hpyit bê nghut ri. ⁴ Yhang eq rabyin za châng é bang gi, Beria wà mó má é Purú yhangzo Sopata, Htesaloni wà mó má é Aristakuq eq Sekundu nhik, Derbe wà mó má é Ge-u, Timohti, Asia mau má é Tuhkiku eq Trohpimu nhik pé nghut akô. ⁵ Yhangmoq gi, hí so lánng luí, ngá-nhik lé Troa myuq má ló lánng nyi akô. ⁶ Nghut kôlhang, ngá-nhik gi, Azuma Poi* lai é htâng má, Hpilipi wà mó mai lhai ji ló le, ngo nyi nghú jáng, Troa myuq má yhangmoq lé hui luí, haú má nyhit nyi chôm nyi é nghut lhê.

Troa Wà Má, Utuhku Ga Sù Lhoq Tui Toq Hui É Hkyô

⁷ Rabat é sâng-hi nyi lé, ngamoq gi, muk hpê gâm râ matú lé chôm zup zing tô é hkûn, Poluq gi, htang nyi ló byuq râ ga hen tô é yanmai, chángzô pé lé gunggâm jé shoq hko kyô nyi ri. ⁸ Ngamoq zup zing nyi é haú ahtôq pyâm wap má, myibung myo myo le duq tô ri. ⁹ Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luí, yhúm sum tsáng mai byit gyó mù, yhang lé bún toq wú le shi byuq bê nghut ri. ¹⁰ Haú hkûn, Poluq gi, gyó ló mù, po ngop to luí, "Hkâdân ko, yhang soq bo ashí." ga taí ri. ¹¹ Haú mù, yhang gi, dum tau doq ló luí, muk lé hpé mù, zo luí, maubó shoq yhangmoq eq dang nyo kún mù htoq ló bê nghut ri. ¹² Zorâm zo haú lé duí gù shuí ló kômù, nhik tîng é gyai yhang hui bekô nghut ri.

Troa Wà Eq Melitu Wà Gyoro Má É Hkyowui

¹³ Poluq gi, myi hkyô ló râ matú hen tô é yanmai, yhang lajang byi é eq rajung za, yhang lé Asu wà má lhai lhom shuí ji râ matú, ngamoq gi, lhai ji mù hí ló lánng bê nghut lhê. ¹⁴ Haú mù, yhang gi, Asu wà má ngamoq eq hui luí, ngamoq gi, yhang lé lhai má shuí ji chûng mù, Mitulene myuq shut e ló bê. ¹⁵ Htang nyi, ngamoq gi, haú mai lhai ji mù, Kiu zinlóng yâm mai lai ló luí, hau htang nyi gi, Samu zinlóng má lai dap ló luí, htang nyi gi, Melitu wà mó má

* 20:6 Múnchi a bo é Muk zo Poi lé, Azuma Poi le gâ lhê.

jé ló bê nghut lhê. ¹⁶ Poluq gi, wó dut é nghut jáng, Penteko-ti buinyi lé Yerusalem wà mó má wó jé shoq gâ é yanmai, Asia mau má buinyi a kâm lhoq htum naù mù luí, Ehpesu myuq lé lhai pyâm to râ matú, myit hpyit to bê nghut ri.

Ehpesu Hpúng Suwún Wuí Lé, Poluq Shikyâm Tô É Dang

¹⁷ Poluq gi, Melitu wà mó mai Ehpesu shut byù nhang kat luí, hpúng suwún wuí lé ê jî nhang ri. ¹⁸ Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyi mai, nungmoq eq hkâsu kut nyi nyi é ahkyíng banshoq lé le; ¹⁹ Yudaq byu pé jeq hô luí, ngò wuínke jamjau hui zo kôlhang, haú Yhumsing é muzó lé, ngò myit gyai lhoq nyhûm é eq ngaubyi ngaù nhap é èq wùn waq é hkyô lé le; ²⁰ nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pé hí eq rayhûm htâng rayhûm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhing mù Garai Gasâng chyáng lhing lò ra eq, nga-nhûng é Yhumsing Yesuq lé lumjíng ra hkyô lé, saksé hkâm kyo lugú nghut bê lé le, nungmoq sê nyi akô.

²² Ahkuí, ngò gi, Woi-nyí má tuí tô é hui bê yanmai, Yerusalem wà mó má e ló lhê; haú má, ngò haí ló dut râ lé kúm gi, a sé nghut ri. ²³ Ngò gi, htóng eq wuínke jamjau hkyô ngo lé láng tô ri ga, wà hkangmó má Chyoiyúng Woi-nyí èq lhoq pùn é hkyô lé za sê nyi lhê. ²⁴ Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkám râ matú, Yhumsing Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

²⁵ Garai Gasâng é mingdán hkyô lé hko kyô wún é hkûn, ngò eq huí é nungmoq lhunglhâng bang gi, htâng nùng má ngo lé a myàng lo kó râ nghut é lé, ahkuí ngò sê to bê. ²⁶ Haú mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkám tô lhê. ²⁷ Hkâsu mù gâ le, Garai Gasang ô nau

é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê. ²⁸ Nungmoq gi, yhumsing gùng lé le, nungmoq lé Chyoiyúng Woi-nyí èq up zúng nhang é sau hpúng† lhunglhâng lé le, zúng nyí keq. Garai Gasang Yhâng suí èq wui tô é noqkuq hpúng lé le, rém zúng nyí keq. ²⁹ Ngò ló byuq é htâng má, sau hpúng lé a shogyô é, ashop é wamhkui gi, nungmoq chyáng jé râ nghut é hkyô lé, ngò sê lhê. ³⁰ Hau htoq agó, chángzô pé lé wó mhoq hpyoq yû shoq ga, shut é òng taí é byu pé lhâng nungmoq chyáng mai htoq lô râ nghut lhê. ³¹ Haú mù luí, nungmoq yuq hkangmó lé, ngò sum zân tup ngaubyi ngau-nhap eq nyí myín a hkyíng loshoq, lhoq pun lhoq kyíng tô é dang pé lé, nungmoq gi, myit bun mù machya nyí keq.

³² Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq ting mù, lhoq chyoiyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hing, ngùn, mebu pé lé le a myoqnoq wú. ³⁴ Ngá é loq shí í loq gi, ngò eq ngá htâng châng é bang ra chá é lé kut byi bê hkyô lé, nungmoq yhang sé gú nghut lhê. ³⁵ Ngò kut é muzó banshoq gi, nungmoq é alik dut bê nghut luí, shí su kut shikut é òng mai, nga-nhúng gi, wum-o nyhóm bang lé htuoq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsing Yesuq taí é dang lé bún nyi sháng." gâ ri.

³⁶ Poluq gi, haú su ga ban taí jáng, hkyihput htuoq mù, yhangmoq lhunglhâng bang eq rahá za kyûdùng ri. ³⁷ Yhangmoq lhunglhâng bang gi, yhang lé po to luí, bopuq puq mù, chôm ngaù akô. ³⁸ Htâng nùng má, yhang lé dum myàng rá a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhai má jé shoq lé châng dé kat akô nghut ri.

21

Yerusalem Wà Mó Shut Doq Ló Nyi É U Lhê Hkyô

† 20:28 Sau hpúng gâ é gi, lumjíng é bang lé gâ lhê.

¹ Ngamoq gi, yhangmoq lé kang pyâm to luî, lhai jî chùng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haû mai Patara wà má dum jé bê. ² Haú wâ má Hpinisi mau shut dap ló é lhai lé, ngamoq myàng luî, haû mai chôm jî chùng bê. ³ Haú hkûn, ngamoq gi, Kupru zinlóng lé myàng jáng, hau é loqyo hkyam đông lai ló luî, Suriq mau shut e ló le, hpugá zê lé hkyó rá matú, Turuq myuq má nô é nghut lhê. ⁴ Haú wâ má, chángzô pé lé myang hô luî, yhangmoq chyáng nyhit nyí bíng yu é. Chángzo haú bang gi, Chyoiyúng Woi-nyí eq lhoq pûn é đông Poluq lé Yerusalem wà mó shut a ló rá matú, chôm hkûm akô. ⁵ Nghut kôlhang, nyhit nyí haú lai jáng, ngamoq gi, ngamoq é hkyowui shut dum xoq sô htoq ló bê. Chángzô pé lunglhang bang gi, yhangmoq é myi zo wui eq rahá, ngamoq lé wà shinggan jé shoq châng dé kôluî, ngamoq gi, yhangmoq eq rahá wuiyâm má hkyihput htuq mù, kyû chôm dung bê nghut lhê. ⁶ Hau htang, rayuq eq rayuq ban shi-kyâm lhum jáng, ngamoq gi, lhai má wàng bê; yhangmoq gi, yhûm shut dum tau ló byuq bekô nghut ri.

⁷ Ngamoq gi, Turuq myuq mai lhai jî chùng mù, Toleme wà má jé ló bê. Ngamoq gi, haú wâ má é gumang wui lé shichyên yù mù, yhangmoq eq rahá ra-nyí chôm nyi kûn é nghut lhê. ⁸ Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang nyhit yuq* má bò sù, gabú danglù hko taí é Hpilip gá su é yhûm má, ngamoq wang bíng bê nghut lhê. ⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhûm má rayoq zo nyi é htang má, Agabu gâ é myiqhtoi rayuq, Yuda mau mai jé lé ri. ¹¹ Yhang gi, ngamoq chyáng jé lé luî, Poluq é hpyihit lé yù mù, yhanggùng yhang loq eq hkyí pé má tui mù luî, taí é gi, "Shî hpyihit yhumsing lé, Yerusalem wà mó má é Yudaq byu pé mai shî su kut lhom tui luî, tungbau pé é loq má ap pyám kó rá nghut lhê;" ga luî, Chyoiyúng Woi-nyí taí ri." gâ ri.

¹² Dang haú lé wó gyo jáng, haú má é

bang eq ngamoq gi, Poluq lé Yerusalem wà mó má a doq ló rá matú, gyai yhang chôm hkûm bê nghut lhê. ¹³ Nghut kôlhang, Poluq gi, "Nungmoq gi, haí mù luî ngaubiyi ngau-nhap kut é eq, ngo lé myit wum gyui rá đông kut nyi akô lhú? Ngò gi, Yhumsing Yesuq é yanmai, Yerusalem wà mó má, tuí é hui rá za a nghut, shî hkâm rá matú le rì rì nghut lhê." ga tú taí pyâm ri. ¹⁴ Yhang lé wó taí hkûm rá su a dut lo jáng, ngamoq gi, "Garai Gasang ô nau é đông nghut sháng gaq." nghu luî, zim za chôm nyi bùm bê.

¹⁵ Hau htang má, ngamoq gi, zè món chùng mù Yerusalem wà mó shut doq ló bê nghut lhê. ¹⁶ Kesare wà mó má é chángzô pé ra-am le, ngamoq eq rabyin za nghut kôluî, yhangmoq gi, ngamoq lé Kupru byu Manason ga sù, hí hí lhê é chángzo rayuq é yhûm má shuí ló mù, yhang chyáng bíng nhang akô.

Yerusalem Wà Mó Má, Yakuq Lé Ê Huí Ê Hkyô

¹⁷ Yerusalem wà mó má ngamoq jé é hkûn, gumang wui gi, ngamoq lé gabú tung lhom hkûlum yu akô. ¹⁸ Htang nyí, Poluq eq ngamoq gi, Yakuq lé ê huí le, hpúng suwún wui le zing nyi to lánng akô. ¹⁹ Poluq gi, yhangmoq eq ban shichyên jáng, yhang wùn waq lai lo é hpúng mù đông mai, Garai Gasang eq tungbau pé chyáng kut byi bê hkyô pé lé, jihkûm nuqguq shit kyô ri.

²⁰ Yhangmoq gi, haú lé wó gyo kôjáng, Garai Gasang lé hkya-ôn akô. Hau htang, Poluq lé taí kô é gi, "Âmang ê, Yudaq byu pé má lumjínng é bang hkâ-myhó hkyíng mun nghut bê lé, nàng sê lhê. Haú bang lunglhang gi, jep é tarâ má myit zuq to bê bang chyat nghut bum akô. ²¹ Nghut kôlhang, yhangmoq lunglhang bang gi, tungbau pé chyáng nyó lúng tô é Yudaq byu banshoq bang lé, nàng, yhumsing yhangzo yhangshû pé é matú ahpyo-kuq hpyit a ra nghu é eq nga-nhûng é htung tarâ lé châng nyi a ra nghu luî, Mosheq é tarâ lé tô pyám rá đông mhoqshit ri gâ é dang lé, wó gyo yu bùm bekô nghut ri. ²² Nàng jé bê hkyô lé, yhangmoq wó gyo berá za nghut lhê. Ahkuí, ngamoq hkâsu kut lo rá lhú? ²³ Haú

* 21:8 Lagyo 6:1-6

mù, ngamoq taí é dông kut aq, ngamoq chyáng danggidiq mó byi bê byù myi yuq nyi lhê. ²⁴ Nàng gi, haú bang lé ji yù mù, yhangmoq eq rahá lhoq san lhoq yúng yú aq, yhangmoq lé u wó wuq yù rá matú, ahpau le htoq byi aq. Haú hkùn sheq, byù lhunghâng bang gi, yhangmoq wó gyô tô é hkyô a têng byuq é eq, nàng yhang lháng, jep é tarâ lé, châng kut nyí sù nghut é hkyô lé, sé kó rá nghut lhê. ²⁵ Lumjínng é tûngbaù pé é matú kúm gi, hparà lhô pé lé tîng byí é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám rá matú, ngamoq chôm doqdan luí, ká hùn kat bê nghut lhê." ga akô.

²⁶ Haú mù luí, Poluq gi, hau htang nyí haú bang lé ji yù luí, yhangmoq eq rahá, lhoq san lhoq yúng yú mù, noqkuq yhùm má wàng luí, yhangmoq yuq hkangmó é matú hkungga wó byi shoq ga, yhangmoq é lhoq san lhoq yúng buinyì ngap bê hkyô lé, taí kyô ri.

Poluq Chyup Yú Huí É Hkyô

²⁷ Buinyì nyhit nyí haú ngap rá yàm má, Asia mau mâ é Yudaq byu pé ra-am gi, noqkuq yhùm má Poluq lé myàng kômù, shiwa byu pé lé shuí gabyong luí, yhang lé chyup yù mù, garû taí kô é dang gi, ²⁸ "Israelaq byu pé ê, garúm yú keq, shí yuq gi, nga-nhúng byuhú lé le, jep é tarâ lé le, jowò shí lé le, shut shai é dông jowò hkangmó mâ é byù banshoq lé mhogshit sù nghut ri. Hau htoq agó, noqkuq yhùm má Grik pé lé shuí háng é eq, chyoiyúng jowò shí lé achauq achyut kut é sù nghut ri." gâ akô. ²⁹ (Hkâsu mù gâ le, yhangmoq gi, Ehpesu myuq byù Trohpimu ga sù eq Poluq wà hkaù má rahá nghut kô é lé, myàng kômù, haú yuq lé noqkuq yhùm shut shuí háng nhô ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lhínghkyuq mai din lé lô kôluí, Poluq lé chyup zing to uchyang, noqkuq yhùm shinggan shut she hkyut htoq ló akô. Haú hkùn jáng, hkum pé lé myhí pyám akô nghut ri. ³¹ Poluq lé yhangmoq sat rá dâ nyi kô é hkùn, Yerusalem wà gón gabyông

nyi akô gâ é hkyô lé, Romaq dap up zaú é no má, lò jé ri. ³² Haú mù, yhang gi, radá dâm shô up gyezau ra-am eq gyezô pé lé shuí chùng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

³³ Haú hkùn, dap up zau hpó gi, Poluq chyáng ê jé mù, yhang lé chyup yù luí, toqjáng tui í hkat eq tuí to nhang ri; hau htâng, yhang ó yuq nghut é hkyô lé le, haí kut shut é hkyô lé le myí wú ri. ³⁴ Shiwa byu pé kúm gi, rayuq rajung ga garû bum akô. Haú mù, gyezau hpó gi, lûm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri. ³⁵ Poluq gi, zumhtâng wang má jé lo é hkùn, byù moq mó lûm htím chyín chyap lô kô é yanmai, gyezô pé gi, yhang lé waq doq ló akô. ³⁶ Shiwa byu pé gi, "Yhang lé sat pyám keq." ga châng garû nyi akô nghut ri.

Poluq, Yhumsing Gùng Mara A Bo É Lé Taí Sân Kyô É Hkyô

³⁷ Gyezô pé gi, Poluq lé gyewap má shuí wàng rá za nghut é hkùn, Poluq gi, dap up zau hpó lé, "Ngò nàng lé dang wó nyô rá lhú?" ga myi jáng, dap up zau hpó gi, "Nàng, Grik myíng dat mu lhê lhú? ³⁸ Nàng gi, hí hkùn gumlau kut mù, byù sat wún bang myi hkyîng lé, yoso shut shuí htoq ló é sù, Egotuq byù a nghut lhú?" ga tau myí ri.

³⁹ Haú hkùn, Poluq gi, "Ngò gi, Kiliki mau Tarshu myuq mâ é Yudaq byù nghut lhê; ngò nyi é wà gi, wà chyap wà zo za a nghut, jeju mai, byù shí bang lé ngò dang taí rá ahkáng byi laq." ga dúng ri.

⁴⁰ Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haú hkùn, yhangmoq lhunghâng bang zim byuq kômù, Poluq, yhangmoq lé Hebre myíng dông taí é gi,

22

¹ "Gumang wuè eq îwa pé ê, ahkuí, ngò mara a bò nghu taí é dang lé gyô wú shi keq." gâ ri.

² Yhangmoq gi, yhang Hebre myíng dông taí é dang lé wó gyô bùm kôjáng, gyai yhang zím byuq bekô. Haú mù, Poluq xoq taí é gi,

3 "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôhang, wà mó shî má nyi kô lò sù nghut lhê. Ngò gi, nga-nhông ìchyí îwa pê é jep é tarâ lé, Gamalelaq é loq má jihkúm nuqguq mhoq yû luî, hkû-nyí lhê é nungmoq lhunglhâng bang su, Garai Gasang lé gyai myit zing zuq é sù nghut lhê. 4 Ngò gi, shí Hkyô cháng bang lé shi é jé shoq, zing-rî wú é sù eq, myiwe yuqgè ó yuq lé nghut kôhang, chyup yû mù htóng má lhông pyâm wú bê sù nghut lhê. 5 Hkyangjong mó eq byìn tú wap suwún wuî lhunglhâng bang gi, ngá é saksé pé nghut akô. Ngò gi, Damaskuq myuq má nyi é yhangmoq é Yudaq gumang wuî lé byi râ laiká yhangmoq chyáng mai wó yu chông luî, haú mâ é bang lé le Yerusalem wà mó má dam byi râ matú, chyup tuí lô râ nghû, Damaskuq myuq shut e é nghut lhê.

6 Nyigùng tû zó lé, ngò Damaskuq myuq shut sô chyâng lô nyi é hkûn, maubó gi, ngá é lîngkhyuq má mauhkông mai byodàn tung duqbó to bê nghut ri. 7 Haú mù, ngò myigùng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rî nyi lhê lú?' gâ ri.

8 Ngò le, 'Yhumsîng ê, nàng ó nghut lhê lú?' nghu myí kat jáng, 'Ngò gi, nàng zing-rî wún é sù, Nazaret wà byù Yesuq nghut lhê.' ga luî, Yhang tû taí kat ri. 9 Ngò eq rahá e lô é bang kúm gi, maubó lé myàng kôhang, ngo lé taí é danghtê lé a sê gyo kó nghut ri.

10 Dum, ngò gi, 'Yhumsîng ê, ngò haí kut ra râ lú?' nghu myi jáng, haú Yhumsîng gi, 'Toq mù, Damaskuq myuq má wang lô aq, nàng kut râ matú wò byí tô é hkyô pé lhunglhâng, nang lé haú má lhom taí kyo berá nghut lhê.' ga ngo lé dum taí ri. 11 Haú maubó é shingkâng é yanmai, ngò myoqjit byuq mù, ngá é byinzùm wuî gi, Damaskuq myuq shut ngo lé loq mai she wang lô akô.

12 Haú hkûn, Anani gâ é yuqgè rayuq ngá chyáng lé huî ri. Yhang gi, jep é tarâ lé gyuq hkunggâ é eq, haú má nyi é Yudaq byû lhunglhâng bâng é hí má myoqdong gyai wó é sù nghut ri. 13 Yhang gi, ngá nâm má yap to luî, 'Gumang Sholuq ê, nàng myoq myàng aq hkoil!' ga taí ri. Haú hkûn jáng yhang, yhang lé ngò wó myang kat bê nghut lhê.

14 Yhang dum xoq taí é gi, 'Nga-nhông ìchyí îwa pê é Garai Gasang gi, nang lé, Yhang ô nau é hkyô sé sháng gaq ga luî le; Dingmán Sù lé wó myàng luî, Yhâng é nhut mâ é mungdang lé wó gyo sháng gaq ga luî le, hkyin to bê nghut ri. 15 Haú mù, nàng gi, nàng myang é eq wó gyô yu é hkyô pé lé, byù lhunglhâng bâng é hí má, Yhâng é matú saksé hkám byi râ su dut râ nghut lhê. 16 Ahkuî, nàng haí lé láng nyi ashî lú? Toq aq, Yhâng é myìng lé lang luî wui-myhup hkâm yu é eq, nàng é yubak mara pé lé chí sân pyám aq.' gâ ri.

17 Hau htâng, ngò gi, Yerusalem wà mó má dum taú jé lô mù, noqkuq yhùm má kyû ê dúng nyi le, moq byuq lô mù, 18 'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq lô aq.' ga Yhumsîng ngo lé taí nyi é lé, myoqwup shing-rán dông myang ri.

19 Haú mù, ngò gi, 'Yhumsîng ê, tarajong ralhùm htâng ralhum má nang lé lumjîng bang lé, htóng má chyup lhông pyâm é eq, hkat bat lhing wún é hkyô lé, yhangmoq sê bum akô. 20 Nàng é saksé Stehpan sat hui luî suí shun u lé, ngò nâm má yhang yap to mù, haú hkyô lé myit bo hui luî, yhang lé sat pyám bâng é mebu lé zúng byí é nghut lhê.' nghû tû taí bê.

21 Haú hkûn, Yhumsîng gi, 'Ê aq, ngò, nang lé, wê gâng é tûngbaù pé chyáng nhang kat râ.' ga, ngo lé taí ri." gâ ri.

Poluq, Romaq Mingdán Byû Nghut É Hkyô

22 Shiwa byu pé gi, dang haú hkun jé za gyô yù kômù, "Shî sù é byù gi, myigùng htoq má nyi a gíng, sat pyám keq." ga, htê mó eq garû bum akô.

23 Yhangmoq gi, haú su garu uchyang, yhumsîng buhîng lé hkyut dú pyâm lhê, hpuilhup lé mauhkông shut kyaq tâng lhê, kut nyí kôjáng, 24 dap up zau hpó gi, Poluq lé gyewap má shuî hâng yù nhâng mù, yhang lé shiwa byu pé haí mù shî su ga garû bùm kô é hkyô lé wó sé shoq ga, nhuq bat nhâng luî, myí choq nhang ri. 25 Nhuq bat râ matú shokuq tuí eq tui kôjáng, Poluq gi, nâm má yap tô é shô up gyezau lé,

"Romaq mingdán byû ru nghut sù lé nhîng, lhang a jéyáng shimá, nungmoq nhuq bat lé gi, tarâ wang akô lhu?" ga taî ri.

²⁶ Rashô up gyezau gi, dang haû lé wó gyo jáng, dap up zaû chyáng ló mù, "Nàng haî kut râ dâ nyi lhu? Shí yuq gi, Romaq mingdán byû sheq ru nghut ri." ga luî, yhang lé ló taî kyô ri.

²⁷ Haû mù, dap up zau gi, Poluq chyáng ê mù, "Nàng gi, Romaq mingdán byû nghut lhu? Taî kyô wú laq." ga myî ri.

Poluq gi, "Ngò, Romaq mingdán byû nghut lhu." ga tû taî ri.

²⁸ Haú hkûn, dap up zau hpó gi, "Ngò lhang ahpau myo myo byî pyám luî sheq, Romaq mingdán byû ru wó dut é nghut lhu." ga tû taî jáng, Poluq gi, "Ngò kúm gi, Romaq mingdán byû dut gû hku lé lo é sù nghut lhu." ga taî ri.

²⁹ Yhang lé myî choq wú râ gâ é bang gi, haú hkûn jáng, yhang chyáng mai huî zut ló bûm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuî pyám bê nghut é yanmai, gyuq byuq bê nghut ri.

Yudaq Byîn Tú Wapdoq Suwún Wuî Gam Hkoq Byuq É Hkyô

³⁰ Htang nyî, dap up zau hpó gi, Yudaq byu pé mai Poluq lé hun é mara haî nghut é hkyô lé hkyak wó sé shoq ga, Poluq lé tuî hpyi pyám byi mù, hkyangjong agyi pé eq Yudaq byîn tú wapdoq suwún wuî lhunglhang lé ji tsîng to luî, yhangmoq é gung gûng má Poluq lé shuí wàng mù, shap to bê nghut ri.

23

¹ Haú hkûn, Poluq gi, Yudaq byîn tú wapdoq suwún wuî lé wú tsuq to mù, "Ngá gumang wuî ê, ngò gi, hkû-nyî jé shoq Garai Gasâng é hí má sansêng é i-myt eq asak dui nyi bê nghut lhu." ga taî ri. ² Haû mù luî, hkyangjong mó Anani gi, Poluq nâm má yap to bang lé, yhang nhut má bat byi keq gâ ri. ³ Haú hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng eq bat râ nghut lhu. Nàng gi, tarâ eq rajung za ngo lé jéyáng râ matú shî

má zung to luî nhîng, haî mù tarâ eq shut shai é dông ngo lé bat nhang lhu?" ga taî ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhu?" ga luî, chôm taî akô.

⁵ Poluq gi, "Gumang wuî ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Nàng amyû lé up é sù lé wó rhoi râ a nghut.'* ga le kê tô é nghut lhu." ga tû taî ri.

⁶ Hau htâng, haû zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byîn tú wapdoq suwún wuî lé, "Gumang wuî ê, ngò gi, Hparishe awut ashín mâ é, Hparishe rayuq nghut lhu. Shî bê bang dum dui toq lô râ hkyô lé myit myoqbyû é yanmai, ngò jéyáng é huî nyi ri." ga luî, garû taî kat ri.

⁷ Yhang haû su ga taî kat jáng, Hparishe pé eq Saduke pé gi, dang jet jet lhûm lò kômù, Yudaq byîn tú wapdoq hpong gi, gam hkoq ló byuq bekô nghut ri. ⁸ (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taî bum akô. Hparishe pé kúm gi, haú pé joq lhu ga, lumjîng bang nghut akô.)

⁹ Haû mù luî, gyai yhang taî garû bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taî bê nghut jáng gi, hkâsu nghû kó râ lhu?" ga luî, zuq zuq taî htîng lhûm akô nghut ri. ¹⁰ Haû su kut gyai yhang taî htîng lhûm lò kôjáng, dap up zau hpó gi, Poluq lé lhang myha pyám kó râ lé chiq é yanmai, yhangmoq chyáng gyó ê mù, Poluq lé haú bâng é gung gûng mai ê lú shuí lò luî, gyewap má shuí wang ló râ matú, gyezô pé lé nhang kat ri.

¹¹ Haú myîn, Yhumsîng gi, Poluq é nâm má yap to luî, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhu." ga, yhang lé taî ri.

Poluq Lé Sat Râ Haq Dâ É Hkyô

* 23:3 But hpyu tô é xewâm gâ é gi, gegùn labyoq kut bang lé gâ lhu. ✧ 23:5 Htoq Ló 22:28

¹² Htâng napkyó, Yudaq byu pé gi, Poluq lé sat râ hpaqchyî chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri. ¹³ Hpaqchyî shî lé chôm dâ é bang gi, myi xê yuq chyân nghut bum akô. ¹⁴ Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat gi, ngamoq haî le a zo nghû, chôm dakam yu to bê nghut lhê. ¹⁵ Hau é yanmai, ahkuî nungmoq gi, Yudaq byin tú wapdoq suwún wui eq rahá kut luî, Poluq é hkyô lé rago za myî gon wú râ nghu mhaû é dông, yhang lé nungmoq chyáng wut yù râ matú, dap up zaû chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga taî akô.

¹⁶ Nghut kôlhang, haû lhom haq sat kó râ gâ é hkyô lé, Poluq é yhâng nhammó é yhangzo yuqgè zo wó gyô yù luî, yhang gi, gyewap má wang ê mù, Poluq lé ê taî kyô rì.

¹⁷ Haú hkûn, Poluq gi, shô up gyezau rayuq lé ji yù mù, "Zorâm shî lé dap up zaû chyáng shuî ê aq, yhang, yhang lé shit kyo râ hkyô rajung joq lhê ga." ga taî ri. ¹⁸ Haú mù luî, shô up gyezau hpó gi, zorâm haû lé dap up zaû chyáng shuî ê mù, "Zorâm shî nang lé shit kyo râ hkyô rajung joq lhê gâ ri ga, yhang lé náng chyáng shuî lé râ matú, htóng byû Poluq gi, ngo lé ji yù mù taî ri." ga, yhang lé taî ri.

¹⁹ Haú jáng, dap up zau hpó gi, jauwò má zorâm haû lé yhâng loq mai she ê mù, "Nàng ngo lé haî jung shit kyô nau ri lhú?" ga, yhang lé baú tsik za myî ri.

²⁰ Haú hkûn, zorâm haû gi, "Yudaq byu pé gi, Poluq lé rago za saî myî wú râ su kut mhaû mù, napmá, Yudaq byin tú wapdoq má shuî yù râ matú, náng chyáng dung kó râ ga, myit chôm huî to bekô nghut ri. ²¹ Haú mù luî, yhangmoq ô nau é dông hkâgyo byi, hkâsu mù gâ le, Poluq lé a wó sat sat gi, haî le a zo a shuq râ nghut lhê ga, byù myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yù râ matú haq lhom to láng kó râ nghut lhê. Ahkuî lháng, yhangmoq gi, mù haû kut râ matú rì rì nghut bûm bekô;

náng é ahkáng lé za láng nyi bum akô nghut ri." ga shit kyô ri.

²² Haú hkûn, dap up zau hpó gi, zorâm haû lé, "Nàng, ngo lé shí hkyô shit kyo bê hkyô lé, ó yuq lé le hkâtaî kyo." ga, sidiq byi mù, taû nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yù mù, "Hkû-myîn sum hkyíng† má Kesare wà mó shut ê râ matú, gyezô pé í shô, myang ji bang nyhit xê, lhâm chûng bang í shô kut mù, rì rì hen to keq. ²⁴ Hau htoq agó, Poluq lé mingzau Hpilik chyáng ngón za wó dé kat râ matú, yhang ji râ myang pé le lajang byi keq." ga, yhangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik ê, ngò Klodi Lusi gi, nguingón danglù shit kyô kat lhê.

²⁷ Shí yuq lé gi, Yudaq byu pê eq chyup yù mù sat pyám râ dâ nyi bekô za nghut lhê. Nghut kôlhang, ngò gi, gyezô pé eq rahá é wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê.

²⁸ Haú su mù, haî mù yhang lé mara hûn kô é hkyô lé sé nau é yanmai, yhangmoq é Yudaq byin tú wapdoq má yhang lé shuî jé byi wú bê nghut lhê. ²⁹ Haú hkûn, yhangmoq é tarâ hkyô eq séng luî za mara hun bûm kô é lé ngò myang ri. Nghut kôlhang, shî gíng é eq htóng lhúng gíng é mara haî le a bò nghut ri. ³⁰ Shí yuq lé sat pyám râ hpaqchyî da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hûn nau é bang lé gi, nang hí má yhang hun lhum keq nghú pying kat bê nghut lhê." gâ ri.

³¹ Haú mù luî, gyezô pé gi, haû pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. ³² Htang nyí, myang ji bang lé é châng dé nhâng kômù, yhangmoq gi, gyewap shut dum taû lò bekô nghut ri. ³³ Myang jì é gyezô pé gi, Kesare wà mó

† 23:23 Myín sum hkyíng gi, nga-nhúng é myín gau hkyíng nghut lhê.

má jé kô é hkûn, mauzau hpó lé laiká byi mù, Poluq lé le jâng ap byi akô nghut ri. ³⁴ Haú hkûn, mauzau hpó gi, laiká haú lé ban nghap jâng, Poluq hká mau mâ é byù nghut é hkyô lé myi wú luí, Kiliki mau mâ é byù nghut é lé sé jâng, ³⁵ "Nang lé mara hûn bang jé jâng sheq, náng mù lé ngò gôn wú rá." ga taí ri. Hau htâng, yang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hûn Huí É Hkyô

¹ Hau htâng, ngo nyi lai jâng, hkyangjong mó Anani gi, suwún wú ra-am eq tarâ sé sù Tertulu lé shuí gyó ló mù, mauzau hpô hí má Poluq lé mara lé taí hun bum akô. ² Haú hkûn, Poluq lé hí má ji hâng tô é nghut mù, Tertulu, yang lé mara hûn dang taí hi é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Náng sê up sê hkang é jeju lé, byù myú shi wó hkâm zô nyi é yanmai, ³ ngamoq gi, haú lé hkyô hkat hkangmó eq jowò hkangmó má jeju bûn é myit eq hkam yu nyi bê nghut lhê. ⁴ Nghut kôhang, ngò nang lé lhoq hkyik é đông a dut sháng gaq, taí rá dang ratot zo lé, myit hîng hîng to mù gyo byi laq nghu dúng tôngbán lhê ô!

⁵ Shí yuq gi, byù lé gunjang sù, mingkan gón mâ é Yudaq byu pé lhunglhang lé shuí gabyong sù eq, haú Nazaret hpúng mâ é hkyô-u shê sù nghut é lé, ngamoq myang ri. ⁶ Hau htoq agó, yang gi, noqkuq yhûm lé achay kut rá dá nyi luí, yang lé ngamoq chyup yú mù, (ngamoq é tarâ đông jéyáng rá hen nyi é hkûn, ⁷ dap up zau Lusi gi, lé lô mù, ngamoq é loq maí yang lé lé lú shuí yú luí, yang lé mara hûn bang lé, náng chyáng jé keq ga hkunmó hkyô tô é nghut lhê.) ⁸ Haú mù, náng, yang lé myi wú jâng, ngamoq yang lé hun é mara banshoq têng é hkyô lé, náng wó sé rá nghut lhê." gâ ri.

⁹ Yudaq byu pé le, haú pé gi, têng lhê ga bo chôm taí akô nghut ri.

Poluq, Mara A Bò É Lé Taí Hung É Hkyô

¹⁰ Mingzau hpó gi, Poluq lé dang taí rá đông loq lik kat jâng, Poluq taí é gi, "Zau ê, shí mau bâng é ahtoq má, náng zanwut myo myo jéyáng byi nyi é hkyô lé, ngò sê é yanmai, ngò gabú myit eq yhumsing matú, mara a bo é hkyô taí bá. ¹¹ Ngò, Yerusalem wà mó má noqkuq rá matú doq e é buinyi raxe í nyi lhang a chyân shi é gi, náng lui za wó sé rá nghut lhê. ¹² Noqkuq yhûm má ngò ó yuq eq taí htîng lhûm é lé lhang, tarajong, a nghut jâng, wà hkaú hká jowò má le byu pé lé shuí gabyông é lé lhang, ngo lé mara hun é bang gi, a myàng kó. ¹³ Ahkuí, ngo lé yangmoq hun é mara pé lé, náng hí má yangmoq saksé lhang a wó tûn shit kó nghut ri. ¹⁴ Nghut kôhang, náng hí má ngò yín yú rá hkyô rahkat gi, yangmoq eq shut shaí hkyô ga myhîng tô é Hkyô lé cháng lui, ngamoq é íchý íwâ pé é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjîng lhê. ¹⁵ Ngò gi, dingmán é bang eq a dingmán bâng é dum dui toq lô rá hkyô joq é lé, yangmoq eq rajung za Garai Gasang má myit myoqbyu nyi é sù nghut lhê. ¹⁶ Haú mù luí, Garai Gasang eq byu é hí má, ngò gi, rá é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra lai é htâng má, ngò gi, ngá é byù myú mâ é myùng bang lé chyunghuq byi rá eq alu kat rá matú, Yerusalem wà mó shut ló jé bê nghut lhê.

¹⁸ Haú su kut nyi é hkûn, ngò eq rahá hai byù moq mó le a nyi, hai jung gabyông é hkyô le a htoq, ngò noqkuq yhûm má lhoq san lhoq yúng yú bê hkyô lé za, yangmoq myang akô. ¹⁹ Nghut kôhang, Asia mau mâ é Yudaq byù ra-am gi, haú má nyi tô é nghut lhê; yangmoq mai ngo lé mara hûn rá hkyô joq kô é nghut le gi, shi náng é hí má yangmoq lé jé kó ra nghut lhê. ²⁰⁻²¹ Haú a nghut jâng, shi má nyi tô é bang gi, ngò Yudaq byin tú wapdoq hí má yap to mù, 'Shi byuq bâng é dum dui toq rá hkyo é yanmai, hkû-nyí nungmoq ngo lé jéyáng nyi akô.' nghu luí, garú é dang hkûn mai lai luí, ngò má gotú mara myàng shi kô é nghut le gi, yangmoq yang taí kyo kó sháng gaq." gâ ri.

²² Hpilik gi, Hkyô haú lé rago sê lhê nghut

mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luí, yhangmoq lé ahkyíng htot kat byí ri. ²³ Poluq lé le, zúng za zúng to mù, yhâng é buinùm ji-myi wui mai yhang ra chá é hkyô lajang byi naú kô é bang nyi le gi, ahkáng byi keq ga luí, shô up gyezau lé hkunmó hkyô kat ri.

²⁴ Buinyì rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjíng hkyô tái kyô é le gyô yu ri. ²⁵ Poluq gi, dingmán hkyô, yhumsing gùng lé hkang é hkyô eq, jé lò râ tarâ dara hkyô lé mhòqshit jáng, Hpilik gi, gyô gyuq mù, "Nàng ahkuí wó ló bê, ngò jin jáng sheq nang lé dum ji yù râ nghut lhê." ga tái ri. ²⁶ Hpilik kúm gi, Poluq èq ngùn haq byi râ lé myit myoqbyù mù, yhang lé anum num ji yù luí, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôhang, Hpilik gi, Yudaq byu pé é hí má myoqdong wó nau é yanmai, Poluq lé htóng má jâng lhùng pyâm to bê nghut ri.

25

Poluq, Kehtaq Chyáng Jé Râ Matú Dúng È Hkyô

¹ Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri. ² Haú hkùn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyám râ dâ to kômù luí, jeju ralhum kut byí é đông Poluq lé Yerusalem wà mó shut dé kat byi râ matú, Hpestu lé lhom dúng akô. ⁴ Nghut kôhang, Hpestu gi, "Poluq lé Kesare wà mó má sheq ru lhùng tô lhê, hkâ-myháng a myáng má, ngò yhang le haú má dum taú ló râ nghut lhê. ⁵ Haú mù, nungmoq má é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hùn kó sháng gaq." ga tũ tái ri.

* 25:8 Kehtaq gâ é gi, "hkoséng" gâ é nghut lhê.

⁶ Hau htâng, yhang gi, shit nyi, raxê nyí kô yhangmoq chyáng nyi yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhâng hí má shuí wang lò râ matú hkunmó hkyô kat ri.

⁷ Poluq jé jáng, Yerusalem wà mó mai gyó lo é Yudaq byu pé gi, yhâng é lhíng hkyuq má yap to kôluí, saksé a wó tũn shit é mara mó myo myo lé, yhâng é ahtoq má chôm tái hun akô nghut ri.

⁸ Haú hkùn, Poluq gi, "Yudaq byu pé é jep é tarâ eq shai é đông le, noqkuq yhùm lé shut é đông le, Kehtaq* lé shut é đông le, ngò a kut wú." ga luí, mara a bo é hkyô tái ri.

⁹ Nghut kôhang, Hpestu gi, Yudaq byu pé é hí má myoqdong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi râ matú, nàng dóng lhê lú?" ga myí ri.

¹⁰ Poluq kúm gi, "Ngò gi, doqdan hui râ nghut jáng, shí doqdan é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lháng a shut wú sù nghut lhê.

¹¹ Laq má mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyám; nghut kôhang, shí Yudaq byu pé mai ngo lé mara hun é hkyô a teng é nghut jáng gi, ó yuq lháng ngo lé yhangmoq é loq má ap byi râ ahkáng wó râ a nghut, ngò gi, Kehtaq chyáng wang tái râ nghut lhê." ga tũ tái ri.

¹² Haú hkùn, Hpestu gi, yhâng é byìn tú wap bang eq ban hpyè lhum jáng, "Nàng Kehtaq chyáng wang tái râ ga bê nghut lhê, Kehtaq chyáng wang ló aq hkoi!" ga tái kat ri.

Poluq Lé, Hkohlâm Agripa Hí Má Shuí Hâng Yu É Hkyô

¹³ Hau htâng, buinyì hkâ-myháng a myáng má, Hkohlâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri.

¹⁴ Haú mù, yhangnhik tâng gi, buinyì tsómra myáng nyi nyi é htâng má sheq, Hpestu gi, haú Poluq é hkyô lé hkohlâm wa eq tái kyô lhùm é gi, "Hpilik, lhùng to lánng é htóng byù rayuq nyi ri. ¹⁵ Ngò Yerusalem

wà mó má nyi tô é hkûn, hkyangjong agyi pé eq Yudaq byu pé é suwún wuî gi, haú yuq é hkyô lé taí kyo kôluî, haú yuq lé mara byi râ matú ngo lé chôm dúng akô.

¹⁶ Haú hkûn, ngò gi, mara hun é hui sù, mara hun é bang eq chyung chyog yoq kut luî, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám rá le, Romaq htung a joq nghû luî yhangmoq lé taí kyo bê nghut lhê. ¹⁷ Yhangmoq ngá htang châng gyó lô kô é hkûn, ngò gi, a nô yu é za, htang nyí jáng tarâ tanghkuq má zùng luî, haú yuq lé shuí wang lò rá matú hkunmó hkyô kat é.

¹⁸ Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhum le a hun htoq lô kó nghut ri.

¹⁹ Yhangmoq é noqkuq htung hkyô eq, haú dui nyi ri ga Poluq eq taí é, shi byuq bê Yesuq é hkyô lé za dang jet jet lhùm bum akô. ²⁰ Haú mù, ngò gi, haú hkyô lé hká dông gon yù rá le a sé lô é yanmai, haú hkyô lé Yerusalem và mó má doqdân é ló hkam yù rá matú, yhang dóng a dóng é hkyô lé myí wú le, ²¹ Poluq yhang sheq, Hkoséng mó chyáng jé rá ga taí é yanmai, Kehtaq chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lhê." gâ ri.

²² Haú hkûn, Agripa gi, "Ngò le haú yuq é dang gyô wú nau ri." ga, Hpestu lé taí jáng, yhang gi, "Napmá, nàng wó myang gyo rá nghut lhê." ga tû taí ri.

²³ Htàng nyí, Agripa eq Bernike nhiktàng gi, shing kang bò bò za lé lô mù, dap up zau wuî eq và mã é agyi suwún wuî eq rahá, rùng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akô. ²⁴ Haú hkûn, Hpestu taí é gi, "Hkohkâm Agripa eq ahkuî shí má zup zing tô é lhunglhâng bang ê, Yerusalem và mó eq shí và mã é Yudaq byu pé banshoq bang, ngá chyáng lé taí kôluî, shí yuq lé asak a wó duì nhang to lo ga garû bùm é gi, ahkuî nungmoq myang é shí yuq yhang nghut bê.

²⁵ Nghut kôlhâng, shí yuq zui sai é má shí gíng é mara haí lé lháng ngò a myàng nghut ri. Yhang gi, Hkosêng chyáng wâng rá ga taí é yanmai, yhang lé Romaq myuq shut dé kat rá matú ngò myit hpyit to bê. ²⁶ Dé kat

bá nghû jáng le, ngá é yhumsing Hkosêng chyáng yhang é hkyô jihkúm nuqguq kâ hun kat rá haí le a bò nghut ri. Haú mù luî, yhang lé ban myí gôn wú jáng sheq, ká rá hkyô rajung jung hkâlhâng ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htóng byú rayuq yuq lé dé kat é hkûn, yhang lé hun é mara a wó tûn shit lé gi, a htuk nghû luî, ngò myit lhê." gâ ri.

26

Poluq É Hí Hpyang Lhê É Nyi Yap Hkyô

¹ Haú hkûn, Agripa gi, Poluq lé, "Nàng, nàng matú dang tai rá ahkáng wó bê." ga taí ri.

Haú mù luî, Poluq loq tû kat mù mara a bo é hkyô taí é gi, ²⁻³ "Hkohkâm Agripa ê, nàng gi, Yudaq byu pé é htunghking banshoq eq taí htung lhùm é hkyô hkat hkangmó lé, gyai sê to sù nghut é yanmai, Yudaq byu pé ngo lé hun é mara hkat hkangmó lé, ngò hkû-nyí nàng é hí má mara a bò é hkyô myang taí é gi, ngá matú gabú hpo yhang nghut ri nghû myit yu nyi lhê; haú mù luî, ngá dang lé myit hing é eq gyó yù byi laq nghû, dúng tôngbán kat lhê.

⁴ Ngò gi, zoshâng hkûn mai, ngá amyû má le, Yerusalem và mó má le, hkâsu kut nyi kô lo é hkyô lé, Yudaq byu pé lhunglhâng bang gi, sé gû nghut akô. ⁵ Yhangmoq gi, ngo lé hí hkûn mai sé kô é yanmai, ngò, ngamoq é noqkuq htung mã é tarâ htan dik é hpúng má bo é Hparishe rayuq nghut é hkyô lé, saksé hkâm naú kô é nghut jáng, yhangmoq wó hkâm lhê. ⁶ Nghut kôlhâng, doqdân é hui zo rá matú, ahkuî ngò shí má yap tô é gi, Garai Gasang eq ngamoq é íchýí íwa pé lé byí tô é danggidiq lé myit myoqbyù nyi é yanmai nghut lhê. ⁷ Ngamoq é byù myû raxe í hú gi, danggidiq jeju haú lé wó hkam yù shoq ga, Garai Gasang lé nyí myín noqkuq dojaú shikut nyi bum akô; Hkohkâm wa ê, myit myoqbyù hkyô hau é yanmai, ngo lé Yudaq byu pé mara hun bum akô nghut ri. ⁸ Garai Gasang gi, shí bê bang lé dum lhoq tui lhê gâ é hkyô lé, a wó lûm nghû, haí mù myit yu akô lúh?

⁹ Ngò le, Nazaret wà byù Yesuq é myìng eq shai lhùm é dōng myo myo wó kut rà nghut lhê nghû, gè gè yhang myit yu wú bê nghut lhê. ¹⁰ Gè gè haú dōng le Yerusalem wà mó má kut wú bê nghut lhê; hkyangjong agyi pè chyáng mâ é ahkáng wó yù luí, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo huí wú bê nghut lhê. ¹¹ Ngò gi, tarajong banshoq má a lhing lhing yhangmoq lé dam byi luí, Yesuq lé rhoi dang tái kó shoq shikut wú bê nghut lhê; nhik mó góng yo luí, gó mau mâ é wà pé lhang jé shoq, yhangmoq lé châng zing-rí wú bê nghut lhê.

Poluq Hpúng Byù Dut Lo É Hkyô

¹² Haú hkùn, radàm lé, ngò gi, hkyangjong agyi pè chyáng mai ahko ahkáng eq hkunmó lé yu chùng mù, Damaskuq myuq shut e ló nyi le, ¹³ Hkohkâm wa ê, nyigùng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lhinghkyuq má, mauhkung mai duq bó htoq lo é lé myang ri. ¹⁴ Haú hkùn, ngamoq banshoq bang myigùng má lêng gop tô bum le, Hebre myíng dōng, 'Sholuq, Sholuq, nàng, ngo lé haí mù zing-rí nyi lhê lúhú? Zuchùn lé pik le gi, náng é matú gyai yhang wui lhê.' ga luí, ngo lé tái é danghtê lé ngò wó gyô kat ri.

¹⁵ Haú mù, ngò gi, 'Yhumsing ê, nàng gi, ó yuq nghut lhê lúhú?' nghû luí, myi jáng, haú Yhumsing tú tái é gi, 'Nàng zing-rí nyi é Yesuq nghut lhê. ¹⁶ Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tũn shit shirâ nghut é hkyô pè é matú, ngá é mù wùn rà byù eq saksé dut nhâng rà dōng nang lé hkyin to rà nghû, ngò náng chyáng lé htoq shit é nghut lhê. ¹⁷ Náng é amyû pè é loq mai le, tũngbaù pè é loq mai le, ngò, nang lé hkyi yù nyi rà nghut lhê. ¹⁸ Yhangmoq, yubak hkyut pyám byi é jeju wó yù rà eq, ngo lé lumjíng é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaú mai maubó shut, Tsadán é a-tsam hkaú mai Garai Gasâng shut yhangmoq lhing ló

râ matú, ngò, nàng lé yhangmoq chyáng nhang kat rà nghut lhê.' gâ ri.

Poluq Kut É Muzó Hkyô

¹⁹ Haú mù luí, hkohkâm Agripa ê, ngò gi, mauhkung mâ é myoqwup shing-rán haú lé a gyô é a wó é nyi nghut lhê. ²⁰ Ngò gi, yhangmoq myit lhing luí, Garai Gasang shut lhing taú lò mù, myit lhing bê hkyô lé, hkyi zó loq zó dōng mai tũn shit kó sháng gaq nghû, sân-hi má Damaskuq myuq má nyi é bâng chyáng mai hí luí, Yerusalem wà mó má é bâng chyáng má le, Yuda mau gón má é bâng chyáng má le, tũngbaù pè chyáng má le, hkô kyo bê nghut lhê. ²¹ Hau é yanmai, Yudaq byu pé gi, ngo lé noqkuq yhùm má chyup yù luí, sat pyám rà da kô é nghut lhê. ²² Nghut kôhang, ngò gi, hkù-nyí jé shoq Garai Gasâng eq garúm é lé wó yù luí, ahkuí shí má yap to mù, tiq ko banshoq bang lé saksé wó hkâm kyô é nghut lhê. ²³ Ngò tái é má, Hkrisduq gi, hpuzo luí, shí bê bang mai sân-hi dui toq lò mù, Yhâng é amyû eq tũngbaù amyû pé lé maubó é hkyô lé wó tái kyo rà nghut lhê ga luí, dut lò rà hkyô lé, myiqhtoí pé eq Mosheq tái tô é hkyô mai lai luí, ngò gotũ haí le a tái é nghut lhê." gâ ri.

²⁴ Yhang haú su ga mara a bo é hkyô tái é lé, Hpestu gi, "Poluq ê, nàng na bê! Lúm mhoq myô yu é yanmai na bê nghut ri." ga luí, htê mó eq dang lat tái hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò tái é dang gi, tengmán é dang eq dang gyíng nghut lhê.

²⁶ Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum tái é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò myit lum nyi lhê. ²⁷ Hkohkâm Agripa ê, nàng gi, myiqhtoí pè é dang lé lumjíng lhê lúhú? Nàng lumjíng é hkyô lé ngò sê lhê." ga tú tái ri.

²⁸ Haú hkùn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lúhú?" ga tái ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a

nghut, hkû-nyí ngò taí é dang lé gyô nyi é lhunglhâng bang, ngò su dut râ matú, ngò gi, Garai Gasang lé kyûdûng nyi lhê." ga tû taí ri.

³⁰ Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri. ³¹ Yhangmoq htoq ló kô é hkûn, "Shí yuq gi, sat gíng é mara eq htóng lhúng gíng é mara haí le a kut shut nghut ri." ga, rayuq eq rayuq taí lhum bum akô nghut ri.

³² Agripa gi, Hpestu lé, "Shí yuq gi, yhang mai Kehta q chyáng jé râ ga a taí tô é nghut le gi, yhang lé wó nhang pyám berâ nghut lhê." ga taí ri.

27

Poluq, Romaq Myuq Shut Wuì-sanghpo Mai E Ló É Hkyô

¹ Ahkuí, ngamoq lé Itali ming shut wuì-sanghpo mai gû dap ló nhâng râ matú myit hpyit to kôluí, yhangmoq gi, Poluq eq htongbyû góbang ra-am lé, Augustuq Hkosêng é gyewap mó mâ é, Yuliu gâ é shô up gyezaú é loq má ap byí kat akô.

² Haú hkûn, Asia mau mâ é wuimau gíngau cháng luí wà pé má wang jón ló é, Adramuti myuq mai toq é wuì-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byu rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng râ é hkyô lé yhâng é buinùm wuì mai lhom lajang byi kó sháng gaq ga, yhangmoq eq é hui râ matú ahkáng byí kat ri. ⁴ Haú mai dum toq ló é hkûn, laí tau mut é yanmai, Kupru zinlóng lé lai hkaú uchyang jî laí ló mù, ⁵ Kiliki eq Pamhpuli mau mâ é wuimau dông laí byit ló le, Laiki mau mâ é Mura myuq má jé bê nghut lhê. ⁶ Haú má, shô up gyezau hpó gi, Itali ming shut dap e ló é, Alesandru myuq mâ é wuì-sanghpo lé myang hkyup luí, ngamoq lé haú má ji nhâng bê nghut ri. ⁷ Haú mai buinyi myo myo yhó yhó lé za jî e ló luí, awui ahke yhang Kidu wà mó eq ang má wó jé ló jáng, laí tau mut é yanmai,

hí shut a wó laí ló lo mù, ngamoq gi, laí lé cháng luí, Kreti zinlóng lé lai hkaú mù, Salamone kongzô é tû tap âng é mai laí ló é nghut lhê. ⁸ Haú mâ é wuiyâm mai awui ahke ji ló lé, Lasea wà eq a wê lhùm é Yuqyo é Guhkan gâ é jowò má jé ri.

⁹ Ahkuí, buinyi tsómra lhoq lhai pyám luí, haú Zoshuq gám poí lai bê nghut é yanmai, wuì-sanghpo mai sô wún le gi, gyuq chiq râ nám jé bê nghut ri. Haú mù, yhangmoq lé Poluq taí pun taí kyíng é gi, ¹⁰ "Âhkaú pé é, shí dâm lhê é wui hkyô gi, wuìhke mó hui luí, wuì-sanghpo eq zè pé sùm pyám râ htoq agó, nga-nhông é asak lháng sum râ dut é hkyô lé, ngò byu myang ri." gâ ri. ¹¹ Nghut kôlháng, shô up gyezau hpó gi, Poluq é dang lé gyo râ malaí, wuì-sanghpo hkâng sù eq wuì-sanghpo yhumsing é dang lé, je lum ri. ¹² Guhkan haú gi, gyoqmyò* wó lhoq lhai râ su a dut é yanmai, myo hpyang gi, Hponik guhkan má wó jé le jé mù, haú má gyoqmyò ló nyi lhai râ matú chôm myit huí akô. Guhkan haú gi, Kreti zinlóng má maupyí buiwàng hkyam eq mautsûng buiwàng hkyam shut hu tô é jowò nghut ri.

Wuimau Má, Laidun Mó Htông Huí É Hkyô

¹³ Maupyí shut mâ é laí yhó le hik lô jáng, yhangmoq myit tô é má hkyak nghut bê su ngam pyám kôluí, shamtoq goknghe lé lhoq toq yú kômù, Kreti zinlóng yâm dông jî e ló bê nghut lhê. ¹⁴ Nghut kôlháng, hkâ-myháng a myáng má, Buihtoq mautsûng laí gâ é laidun mó gi, haú zinlóng mai mut lò luí, ¹⁵ wuì-sanghpo lé lo mut htông é yanmai, hí shut a wó ló lo jáng, ngamoq gi, laí mut ló é shut châng yông ló bê nghut lhê. ¹⁶ Ngamoq gi, Koda gâ é zinlóng zo lé lai hkaú uchyang yông ló nyi é hkûn, haú sakhkyílhai lé gyai shikut é eq wó lêng yù luí, ¹⁷ wuì-sanghpo ahtoq má lêng toq to bê. Wuì-sanghpo lé gi, a byoq lo shoq tuí eq tuí kíng to bê nghut lhê. Dum, yhangmoq gi, Surti gâ é semuí bùm má ló kê gyâm to râ lé chiq kô é yanmai, wuì-sanghpo mâ é panlong pé lé lhoq nyhum hkyô yù mù, châng yông ló bekô nghut ri. ¹⁸ Laidun mó lúm htan

* 27:12 Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.

é yanmai, htang nyí yhangmoq gi, hpugá zê pé lé hkyom dú hkyó pyám bekô nghut ri. ¹⁹ Sum nyí nghu é nyí má, yhangmoq gi, wui-sanghpo zê pé lé yhumsing é loq èq yhang hkyô pyám bekô. ²⁰ Buinyì myáng myáng, bui lé le, kyí pé lé le a myàng é eq, laidun mó za ru mut nyi é yanmai, wó lut rà nghû myit myoqbyu tô é hkyô lé, ngamoq tô pyám bê nghut lhê.

²¹ Yhangmoq zoshuq a zô é, buinyì tsómra myáng lô bê nghut mù luí, Poluq gi, yhangmoq é gung gûng má yap to mù, "Âhkaú pé ê, nungmoq ngá é dang gyo luí, Kreti zinlóng mai a htoq ló é nghut le gi, shî su htên byoq é marop hui zo rà a nghut. ²² Ahkuí nghut kôlhang, ngò taí é dang lé gyô yù mù myit wum yù keq; nungmoq mâ é hká yuq lé asak sum rà a nghut, wui-sanghpo za sheq htên byoq byuq rà nghut lhê. ²³ Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taí é gi, ²⁴ 'Poluq ê, hkâgyuq, Kehta é hí má nàng wó yap rà nghut lhê. Wui-sanghpo shî má nàng eq rahá ji tô é lhunglhâng bâng é asak lé, Garai Gasang gi, náng é yanmai, laí laí byi rà nghut lhê.' gâ ri. ²⁵ Hau é yanmai, âhkaú pé ê, myit wum yù keq, ngo lé taí kyô é eq rajung za dut lò rà nghut lhê nghû luí, Garai Gasang lé ngò lumjîng nyi lhê. ²⁶ Nghut kôlhang, nganhúng gi, zinlóng ralhum lhum má ló htûng chyap to rà nghut lhê." ga luí, yhangmoq lé i-myit taí tîng ri.

²⁷ Buinyì raxe myi nyí myín má, gunggàm yoq lé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô. ²⁸ Haú su mù, wui nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri. ²⁹ Haú mù luí, luqmó má ló záng htung rà lé chiq kômù, yhangmoq gi, wui-sanghpo htâng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyúdüng nyi bum akô nghut ri. ³⁰ Wui-sanghpo hkâng bang gi, wui-sanghpo lé tô pyâm to luí hpâng rà dâ é myit eq, wui sanghpo-u shut mâ é shamtoq goknghe pé lé lhoq hkyó rà su

kut mhaú luí, sakhkyîlhaí lé wui má lhoq hkyô nyi bum akô. ³¹ Haú mù, Poluq gi, shô up gyezau eq gyezô pé lé, "Shí bang wui-sanghpo má a nyi le gi, nungmoq wó lut rà a nghut." ga taí ri. ³² Haú hkûn, gyezô pé gi, sakhkyîlhaí lé tuí tô é tui lé zân hpyit kat kôluí, sakhkyîlhaí gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo rà matú myit wum byí é gi, "Nungmoq gi, myit chiq luí, zoshuq haí le a zô é, hkû-nyí raxe myi nyí myáng lô bê. ³⁴ Haú mù luí, zoshuq rajung jung zo keq! Haú gi, nungmoq wó lut rà matú nghut lhê. Nungmoq chyâng mâ é ó yuq é xâm rahkat lháng byuq rà a nghut." gâ ri. ³⁵ Haú su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkya-on mù, muk lé hpé luí, zô hí bê nghut ri. ³⁶ Haú hkûn sheq, banshoq bang gi, myit wum wó yù kômù, zoshuq zô bùm bekô nghut ri. ³⁷ Wui-sanghpo haú mâ é byù lhunglhâng gi, í sho nyhit xe hkyuq yuq nghut lhê. ³⁸ Yuq hkangmó bàn zô gyí é htâng má, wui-sanghpo sóm rà matú, sungso pé lé wui má dú kat pyâm akô nghut ri.

Wui-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haú lé a sé kôlhang, semuî-jàng chyûn ralhum lé byu myàng kôluí, wó dut é nghut jáng, haú má sanghpo lé kôn gyam rà matú chôm doqdân yu akô nghut ri. ⁴⁰ Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luí, wui-sanghpo ulhum mâ é panlong lé lhoq toq yù mù, laí hkyô cháng luí wuiyàm shut mut ló bê nghut ri. ⁴¹ Nghut kôlhang, semuî lo bum tô é jowò ralhum má, wui-sanghpo ló htûng chyap byuq luí, sanghpo u gi, a wó duí lo mù, sanghpo htâng lé gi, wuillheng èq lò bat hkyop myha pyám bê nghut ri.

⁴² Haú hkûn, gyezô pé gi, htongbyû pé wuili lí hpang byuq kó rà lé gyuq kô é yanmai, yhangmoq lé sat pyám rà chôm dâ akô. ⁴³ Nghut kôlhang, shô up gyezau hpó gi, Poluq lé hkyi yù naú luí, yhangmoq dâ é hkyô lé hkûm pyám mù, wuili dat li bang gi,

wuì má byam gyó luí wuiyàm shut hí li dap ló kó sháng ga luí le, ⁴⁴ góbang gi, siklong eq wuì-sanghpo má é gotú zè pé má zui mù, gu dap ló sháng ga le, hkunmó hkyô kat ri. Haù đông mai lhunglhang bang gi, wuiyàm shut rago wó jé dap ló bekô nghut ri.

28

Malata Zinlóng Má Jé Nyi Tô É U Lhé Hkyô

¹ Ngamoq wó lut dap ló jáng sheq, zinlóng haù gi, Malata gà é lé sê ri. ² Zinlóng byu pé gi, ngamoq lé shogyo myit gyai lhom tân shit akô. Mau ru jâng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô. ³ Haù hkûn, Poluq gi, htang rawaq guq tsing yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù, yhâng é loq má hte zing tô ri. ⁴ Zinlóng byu pé gi, Poluq é loq má lhangmuì haù hte lhang tô é lé myàng kôjáng, "Shí yuq gi, gè gè yhang byù sat é sù teng râ dut ri; wuì mai wó lut ló kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq taì lhum bum akô nghut ri. ⁵ Poluq kúm gi, lhangmuì haù lé myihkyóm má ko hkyô kat luí, haì le a dut é za nyi tô ri. ⁶ Yhangmoq gi, yhânggùng wâm lò berâ, haù a nghut jáng, byodàn ratung shi hkyaq lêng lò berâ, ga myit láng nyi bum akô. Nghut kôlhang, myáng myáng láng wú nyi bum le, yhang má haì le a dut lo é lé myàng kôjáng, yhangmoq é i-myt dum htaì pyám kôluí, shí yuq gi, hparà rayuq sheq nghut ri ga dum taì bum akô nghut ri.

⁷ Hau é nàm má, zinlóng agyi hpó Popli sing é maumyí pé joq tô ri. Haù yuq gi, ngamoq lé lhom te yù mù, yhâng yhâm má sum nyí yhang lalúm la-nye lhom hkûlum yu ri. ⁸ Haù u lé, Popli é yhângwa gi, alì nyé no nyi é eq wuiwam shun leq tô ri. Poluq gi, haù yuq chyáng wàng mù, kyûdung byi luí, yhâng é ahtoq má loq ke byi mù, yhang lé lhoq gè byi ri. ⁹ Haù su dut é yanmai, zinlóng má é nò byù góbang banshoq le, lé luí lhoq gè byi é hui bekô nghut ri.

¹⁰ Yhangmoq gi, ngamoq lé a hkyô hkyô đông hkungga kôluí, ngamoq wuì-sanghpo ji mù, dum toq ló râ hkûn, ngamoq râ é gù lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq má é, "Hparà zozùm nhiktâng" gà é alhô dap é wuì-sanghpo má, ngamoq wang jì htoq ló bê nghut lhê. Wuì-sanghpo haù gi, gyoqmyò lé zinlóng haù má joq lai é nghut ri. ¹² Surakusa wà mó má jé jáng, haù má ngamoq sum nyí nô yu é nghut lhê. ¹³ Haù mai jì xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê. ¹⁴ Haù má é gumang wuì ra-am eq hui luí, ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê. ¹⁵ Haù má é gumang wuì gi, ngamoq jé lo nyi é hkyô lé wó gyo kôjáng, te yù râ ga, Apì Gai gà é wà eq Bìng Yhâm Sùm Lhum gà é wà jé shoq lé akô. Poluq gi, haù bang lé lhom myàng jáng, Garai Gasang lé hkya-on kungtôn mù, myit wum wó yù bê nghut ri. ¹⁶ Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotú san nyi râ matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyi sum nyí lai é htâng má, Poluq gi, haù má é Yudaq suwún wuì lé ji yu ri. Yhangmoq jé lé bùm kôjáng, yhang gi, "Gumang wuì è, ngò gi, nga-nhùng é amyû lé le, íchýí îwa pé é htunghking lé le, shut shai é đông haì le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pé é loq má ap byi kat é hui bê nghut lhê. ¹⁸ Romaq zau wuì kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri. ¹⁹ Nghut kôlhang, haù lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haù nghut kôle, ngá amyû lé mara hùn râ jowò

* 28:20 Israelaq amyû é myit myoqbyù hkyô gi, Mesaia gà é hkyi yù sù lé myoqbyù nyi é nghut lhê.

joq é yanmai gi, a nghut. ²⁰ Haû mù luí, Israelaq amyú é myit myoqbyù hkyô* é yanmai, shí shamtoq-tuí èq tuí é ngò hui zò é hkyô eq séng luí, nungmoq eq nyo kún rà matú, ngò, nungmoq lé ji kat é nghut lhê." ga luí, yhangmoq lé taí ri.

²¹ Haú hkûn, yhangmoq gi, "Náng é hkyô eq séng luí Yuda mau mâ é laiká ngamoq a wó yû nghut ri. Haû mai lé é gumang wui ó yuq le, nàng eq sêng é a ge é luhkyang lé shit kyô é a bò kó nghut ri. ²² Nghut kôlhang, shí nàng lom é hpúng gi, jowò hkangmó má taí he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tú taí akô.

²³ Yhangmoq gi, yhang eq huí kún rà buinyì ding to kôluí, yhang bíng é yhûm má byù myo myo lé zîng bum akô. Haú hkûn, yhang gi, napkyó mai myín htàng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoí pé é dang má cháng mù, yhangmoq lé shikut luí, Yesuq é hkyô taí pun taí kyîng ri. ²⁴ Yhang taí é hkyô lé, ra-am gi, lumjîng bum akô; ra-am kúm gi, a lumjîng kó nghut ri. ²⁵ Yhangmoq rayuq eq rayuq haú su myit a huí lhûm bùm kô é yanmai, Poluq gi, yhangmoq lé, "Chyoiyúng Woinyí, Myiqhtoi Esai-aq é nhut mai nungmoq é îchyí îwâ pé lé taí é dang gi, gyai yhang têng ri. Dang haû gi,

²⁶ 'Byù haú hú chyáng ê mù,
"Nungmoq gyô tsuq to kôlhang, sê gyo kó rà a nghut;
wú tsuq to kôlhang, wú sé kó rà a nghut.", nghû ê taí aq.

²⁷ Hkâsu mù gâ le, amyú shi é i-myit gi, htan byuq luí,
yhangmoq é nohkyap gi, htu byuq bê nghut ri;
yhangmoq é myoq gi, chûm byuq bê nghut ri;
haû a nghut le gi, yhangmoq é myoq èq myàng mù,
yhangmoq é nohkyap èq wó gyo luí,
yhangmoq é i-myit má sê hkyâng kômù,
ngá chyáng lhing lò kôluí, ngò yhangmoq lé lhoq gê byi berâ nghut lhê.†

gâ ri.

²⁸ Haû mù luí, shí Garai Gasâng é hkyi yù hkyô lé, tûngbaù pé chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyi keq ô!" ga luí, danghkun haû taí kat é htàng má, yhangmoq gi, htoq ló byuq bùm bekô nghut ri. ²⁹ (Poluq haú su ga taí é htàng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

³⁰ Poluq gi, yhang nghô lúng é yhûm má í zân tup nyi é u lé, yhang chyáng lé má lé é bang lé lhom hkûlum yu ri. ³¹ Haû mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsîng Yesuq Hkrisduq eq séng é hkyô lé mhoqshit byí ri; yhang lé, ó le a hkûm zing to kó nghut ri.

† 28:27 Esai 6:9,10

ROMAQ

Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luí, chyoiyúng Chyúmdang pé má, ² Garai Gasang gi, hí hí mai Yhâng é my-iqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglù é matú hkyin to huí é sũ, ngò Poluq gi, Romaq myuq má nyi é, Garai Gasâng eq chyitdap é hui luí, sânyúng bang dut râ matú ji yu é bang banshoq lé, dang kyô kat lê. ³ Yhâng é Yuqzo haú gi, byù hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsîng Yesuq Hkrisduq nghut ri. ⁵ Yhang dông mai le, Yhâng myíng é matú le, ngamoq gi, byù myú chângjup mai byù ji yù mù, lumjîng hkyô lé châng nyi nhâng râ matú, jeju eq lagyo ayá lé wó hkam yù bê nghut lê. ⁶ Nungmoq le, Yesuq Hkrisduq eq séng râ matú ji yù huí é bang má lôm bekô nghut ri.

⁷ Nga-nhúng é Îwa Garai Gasang eq Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjîng hkyô lé, mingkan gón má taí pyo ló bê nghut é yanmai, sâng-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lê. ⁹ Ngá é kyûdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklhum banshoq eq dojaú é Garai Gasang gi, ngá é saksé nghut lê; ¹⁰ Garai Gasang ô nau é nghut jáng, hkâ-í a myáng

má, ngò, nungmoq chyáng wó jé lé râ hkyô htong byi râ matú, ahkuí, ngò kyûdung lê.

¹¹ Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyai yhang myàng nau nyi ri.

¹² Haú su nghu é gi, nga-nhúng rayuq eq rayuq é lumjîng hkyô dông mai, nungmoq eq ngò, myit wum byí é hui râ matú nghut lê. ¹³ Gumang wui ê, ngò gi, haú tûngbaù pê chyáng mai ashi wó yu é eq rajung za, nungmoq chyáng mai le ashi wó yú râ matú, nungmoq chyáng lé jé râ nghu adàm dàm dá wú é nghut kôlhang, ahkuí jé shoq hkûm tang pyám huí é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sũ nghut lê. ¹⁵ Haú nghut é yanmai, ngò gi, Romaq myuq mâ é bang nungmoq lé le, haú gabú danglù gyai yhang hko kyo nau nyi é nghut lê.

¹⁶ Haú gabú danglù hkyô má, ngò gi, a hoq é nghut lê; hkâsu mù gâ le, haú gi, sâng-hi má Yudaq byu pé, hau htâng tûngbaù pé má, lumjîng é sũ yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsâm nghut lê. ¹⁷ Hkâsu mù gâ le, lumjîng myit mai wó yú luí, lumjîng myit má gîng nyi é, Garai Gasâng chyáng mâ é dingmán hkyô lé gi, gabú danglù haú má hpông shit bê nghut ri. Haú gi, "Haú dingmán sũ gi, lumjîng myit mai asak duí râ nghut lê."* ga kâ tô é eq rajung za nghut ri.

Xângzo Byu Pê Htoq Má Garai Nhikmo-yô É Hkyô

¹⁸ Haú tengmán hkyô lé, yhumsîng é agè ashop hkyo eq zik hkûm pyâm é byu pé é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri. ¹⁹ Haí mù gâ le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkâsu mù gâ le, mau htoq xâng hkun mai, hpan tô é zè pé lé wú

* 1:17 Hbk 2:4

járng, Yhâng é a byu-myang é isâm nghut é, ahtum abyuq é hpungwup a-tsam eq Garaí é myit sâmlai lé gi, san za wó myâng, wó sê gyô é nghut lhê. Haû mù luí, byu pé gi, mara mai wó he lut râ hkyô a joq lo nghut ri.

²¹ Haî mù gâ le, yhangmoq gi, Garaí Gasang lé sê to kôlhang, Yhang lé Garaí dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyíng é yhangmoq é myit nhiklhum gi, chut byuq bê nghut ri. ²² Yhangmoq gi, hpaqchyí bò bang nghut lhê ga kôlhang, a-ngok é bang dut byuq bekô nghut ri. ²³ Haû mù, htên byoq a sê é Garaí Gasâng é hpungwup shingkang lé, htên byoq sê é byù zòng, nghoq lhô, dusak lhô eq yê jung dusak lhô pé èq, htaî lhik pyám bekô nghut ri.

²⁴ Hau é yanmai, Garaí Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê nghut ri. ²⁵ Yhangmoq gi, haû Garaí Gasâng é tengmán hkyô lé, mhaû é hkyo èq htaî lhik pyám kômù, hpân Sû lé noqkuq dojaú râ malaî, mhaû hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

²⁶ Haû nghut é yanmai, Garaí Gasang gi, yhangmoq lé, ahoq ahî é yut yut ô nau hkyô má ap pyám bê nghut ri. Yhangmoq é myiwe wui lhang gi, htung akying lé tô pyám kômù, haû eq shai é dông htaî lhik pyám nyi akô nghut ri. ²⁷ Haû eq rajung za, yuqgè wui le, myiwe wui eq zum é htung akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluí, yhangmoq kut shut é eq gingdán é yubak dam lé, yhumsing gung yhumsing hkam yù nyi bekô nghut ri.

²⁸ Hau htoq agó, haû Garaí Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garaí Gasang gi, yhangmoq lé, htên byoq sê é myit má ap pyám é nghut

lhê. ²⁹ Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhùm é hkyô pé byíng jup tô é bang dut bekô nghut ri; manon é, byù sat é, mabyoq jishùm htoq é, mhaú zô é eq myit goi bo é pé le byíng bum ri. ³⁰ Yhangmoq gi, lumu é bang, gansang é bang, Garaí lé a jú é bang, byù rhoi é bang, nghutbùn é bang, gyáng é bang, agè ashop kut râ hkyô lhoq htoq é bang, mó wui é jìno a gyô é bang nghut akô. ³¹ Yhangmoq gi, a gyíng a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô. ³² Haú pé lé kut é bang gi, shí gíng lhê gâ é, Garaí Gasâng é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

2

Garaí Gasang Tarâ Jéyáng É Hkyô

¹ Haû mù luí, góyuq lé tarâ jéyáng é sù nàng è, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkùn, nàng gung nàng mara byi nyi bê nghut ri. ² Haú dông kut nyi é bang lé, Garaí Gasang gi, tengmán é dông tarâ jéyáng é lé, nga-nhúng sê nyi lhê. ³ Haû mù, byù za nghut to luí, góbang lé gi, jéyáng mù, yhumsing gi, haú dông roq châng kut nyi é sù nàng è, nàng gi, Garaí Gasâng é tarâ jéyáng hkyô mai wó hpan lut râ su ngam nyi lhê lhú? ⁴ Haû a nghut járng, nàng gi, Garaí Gasâng é ge é hkyo èq nang lé myit wó shuí lhang nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyám nyi lhê lhú?

⁵ Nghut kôlhang, náng é myit htân hkyô eq myit a lhang é nhiklhum é yanmai, haû Garaí Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhum-sing gung yhang hkong tô nyi bê nghut ri.

⁶ Garaí Gasang gi, yuq hkangmó lé, ó le ó kut é má cháng luí, hkâm zo nhâng râ nghut lhê. ⁷ Jân shirâng mù, ge é hkyô kut nyi é dông, hpungwup shingkang lé le, aróng eq

htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lhê. ⁸ Nghut kôlhang, haû yhumsing wuizat hkyô za hô luí, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lhê. ⁹ Wuîhke hkyô eq iyon yon hkyô gi, agè ashop kut é xângzo byù yuq hkgámó chyáng jé râ nghut lhê; sâng-hi má Yudaq byu pè chyáng jé mù, tûngbaù pè chyáng le jé râ nghut lhê. ¹⁰ Nghut kôlhang, hpungwup shinggang, aróng eq nguínón hkyô gi, haû ge é hkyô kut é bang yuq hkgámó chyáng jé râ nghut lhê: sâng-hi má Yudaq byu pè chyáng jé mù, tûngbaù pè chyáng le jé râ nghut lhê. ¹¹ Hkâsu mù gâ le, Garai Gasang gi, myoqdong a hkyin é Sû nghut lhê.

¹² Haû jep é tarâ lé a sê é mara kut shut é bang lhunglhang gi, jep é tarâ dông a nghut é za htên byoq kó râ nghut lhê. Haû jep é tarâ hkaû má mara kut shut é bang lhunglhang gi, jep é tarâ dông jéyáng é hui zo kó râ nghut lhê.* ¹³ Hkâsu mù gâ le, haû jep é tarâ lé wó gyô é bang lé, Garai Gasâng é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lhê. ¹⁴ Haû jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. ¹⁵ Yhangmoq gi, haû jep é tarâ hkyô pé lé, yhangmoq é i-myit unghkaû má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haû lé saksé hkám byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri. ¹⁶ Haû hkyô gi, ngò tai pyo é gabú danglù eq rajung za, byu pè é zaú nghop tô é hkyô pé lé, Hkrisduq Yesuq dông mai Garai Gasâng eq tarâ jéyáng é buinyi má dut râ nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gûng nàng Yudaq byù rayuq nghut lhê ga mù, haû jep é tarâ lé lumhkau nyi é eq Garai Gasang lé

xoq é hkyô má nghutbûn nyi é sù; ¹⁸ Yhâng ô nau é hkyô lé sê é eq haû jep é tarâ mhoqshit é hkyô wó yû bê nghut é yanmai, je ahkyak é hkyô lé sê gâm hkoq é sù; ¹⁹ haû jep é tarâ má, hpaqchyî eq tengmán hkyo é alik wó sù nghut é yanmai, haû myoqjít bâng é matú hkyô-u shê sù eq mauchut hkaû má é bâng é matú maubó nghut sù; ²⁰ byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nàng, góbang lé mhoq byi sù nhîng, yhumsing gùng yhumsing a mhoq yû lú? A wó hkau ga hko tai luí nhîng, nàng gi, hkaû lhê a nghut lú? ²² Sumyi sulàng lú hkyô a wó kut ga byu pé lé tai luí nhîng, nàng gi, su-myi sulàng lú hkyô kut lhê a nghut lú? Hpara lhô lé a jú dik sù nàng gi, noqkuq yhûm lé hpýoq zo hpýoq shuq nyi lhê a nghut lú? ²³ Jep é tarâ eq séng luí nghutbun sù nàng gi, haû jep é tarâ lé lu lai é dông, Garai Gasang lé a hkungga kut lhê a nghut lú? ²⁴ Haû gi, "Garai Gasâng é myîng gi, nungmoq é yanmai, tûngbaù pè chyáng lhoq hpoí pyám é huí ri."* ga kâ tô é eq rajung za nghut ri.

²⁵ Haû jep é tarâ lé nàng châng é nghut jáng, ahpyo-kuq hpýit hkyô gi, akyû bò bê nghut ri. Nghut kôlhang, nàng, jep é tarâ lé lu lai é nghut jáng, a hpýit é eq rajung za dut bê nghut ri. ²⁶ Ahpyo-kuq a hpýit kôlhang, jep é tarâ hkyô pé lé châng é bang lé gi, ahpyo-kuq hpýit bê bang dông ge són byi lhê a nghut kó lú? ²⁷ Kâ tô é tarâ lé wó mù, ahpyo-kuq hpýit hkam to gù nghut é, tarâ lu lai é sù nàng lé, gungsho má ahpyo-kuq a hpýit kôlhang, jep é tarâ lé châng é sù gi, mara hûn râ nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpýit é gi, ahpyo-kuq hpýit kyîng a nghut. ²⁹ Ahte myit hkaû má Yudaq byù nghut sù za, Yudaq byù kyîng nghut lhê. Kâ tô é tarâ dông a nghut é za, Woi-nyí eq myit má ahpyo-kuq hpýit é gi, ahpyo-kuq hpýit kyîng nghut bê. Haû yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

* **2:12** Haû jep é tarâ lé a sê bang gâ é gi, tûngbaù pé lé gâ é nghut luí, haû jep é tarâ hkaû má é bang gâ é gi, Yudaq byu pé lé gâ é nghut lhê. ✨ **2:24** Esai 52:5

3

Garai É Lhumzui Hkyô

¹ Haú dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú?

² Hkyô hkangmó má gyai akyû bò lê! Je hí má gi, haú Garai Gasâng é mungdang lé yhang, yhangmoq lé ap byi bê nghut ri.

³ Yhangmoq mâ é ra-am lumjîng myit a bo é nghut le gi, hkâsu kó lú? Yhangmoq lumjîng myit a bo é yanmai, Garai Gasâng é lhumzui hkyô lé akyû a bò nhâng wó dut râ lú? ⁴ Hká dông le a wó dut!

"Haú mù, nàng dang taí é hkûn, dingmán é hkyô wó lhoq htoq râ eq, nàng jéyáng huí é hkûn, ùng râ nghut lê."✧

ga kê tô é eq rajung za, byù yuq hkangmó gi, byù-mhaú dut kôlhang, Garai Gasang gi, tengmán nyi sháng gaq.

⁵ Nghut kôlhang, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lê; haú nghut jáng, nga-nhúng hkâsu nghû taí râ lú? Nga-nhúng lé Garai Gasang nhikmoyô é hkyô gi, Yhang a tarâ mù nghut lê lú? (Ngò gi, byù hkyam dông taí htîng é nghut lê.) ⁶ Ratsuí lhang a nghut! Haú su ru nghut le gi, haú mingkan lé, Garai Gasang hkâsu wó jéyáng râ lú? ⁷ Rayuq yuq, "Ngò mhaú é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkan lé je wó lhoq hu nhang é nghut le nhîng, haí mù luí, ngò, yubak byù rayuq dông mara byí é hui zô nyi ra shirâ lú?" ga taí dang-rháng râ nghut lê. ⁸ "Ge é hkyô htoq sháng gaq, nga-nhúng, agè ashop hkyô kut sháng." nghû haí mù a taí kô é lú? Dang haú lé ngamoq taí é nghut lê ga luí, ngamoq lé lumù gansang é dông byù ra-am taí akô. Haú bang gi, mara dam byí é hui zo gîng bang nghut akô.

Dingmán Byù A Nyi

⁹ Haú jáng, hkâsu nghû lo râ lú? Nga-nhúng gi, je gè bang nghut lê lú? Ratsuí lhang a nghut. Yudaq byù nghut nghut,

tûngbaù pé nghut nghut, yubak mara hkaú mâ é bang chyat nghut lê nghû, ngamoq taí san kyô wú bê nghut lê. ¹⁰ Chyúmdang má kê tô é le,

"Dingmán é byù a nyi, rayuq lhang a nyi nghut ri;

¹¹ Sê gyô é byù rayuq le a nyi, Garai Gasang lé ho é byù le a nyi nghut ri;

¹² Lhunglhang bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyi, rayuq lhang a nyi nghut ri."✧

gâ ri.

¹³ "Yhangmoq é hkyung gi, hpông tô é lup pé nghut akô; yhangmoq é shô gi, mhaú akô."✧

"Yhangmoq é nhutwuí pé má gi, shîduq bò lhangmui é duq dap bum ri."✧

gâ tô ri.

¹⁴ "Yhangmoq é nhut pé gi, nhing myíng nhing htê eq myit nô danghko bau byíng zan tô ri."✧

gâ tô ri.

¹⁵ "Yhangmoq é hkyi pé gi, byù sat sui lhoq htoq râ matú, lawán nau akô;

¹⁶ Yhangmoq sô nyi é hkyô pé gi, htên byoq é eq wuîhkê é ahkô tông tô é nghut mù,

¹⁷ nguîngón é hkyô lé gi, yhangmoq a sé kó nghut ri."✧

gâ tô ri.

¹⁸ "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."✧

gâ tô ri.

¹⁹ Byù yuq hkangmó é nhut gi, tû taí jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haú jep é tarâ má taí é lhunglhang gi, jep é tarâ ô má nyi é bang lé taí é nghut é hkyô lé, nga-nhúng sê lê.

²⁰ Haú mù luí, jep é tarâ lé châng é dông mai, ó yuq le, Yhâng é hí má dingmán sù gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lê.

Lumjîng Jáng, Dingmán Sù Wó Dut É Hkyô

²¹ Ahkuí kúm gi, jep é tarâ dông a nghut é za, haû jep é tarâ eq myightoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri. ²² Garai Gasâng chyáng mâ é dingmán hkyô haû gi, Yesuq Hkrisduq lé lumjínng é dông mai nghut mù, lumjínng bang banshoq htoq má jé é nghut lhê. Gamhkuí é hkyô a joq. ²³ Hkâsu mù gà le, lhunghâng bang gi, yubak mara kut shut bê bang chyat nghut mù, Garai Gasâng é hpungwup shing kang lé a hkyit hkap byuq lo kó nghut ri. ²⁴ Ahkuí kúm gi, Hkrisduq Yesuq mai lo é hkyi yù hkyô dông, Garai Gasâng é jejú èq, mara hkyut san byí é laí laí wó hui bê nghut ri. ²⁵ Garai Gasang gi, Yesuq é sui lé lumjínng bâng matú, shíhtáí gunglik hkungga ralhum dông, Yesuq lé byí pyám bê nghut ri. Haû gi, laí lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tûn shit é nghut ri. ²⁶ Garai Gasang haû su kut é gi, Yhânggùng yhang dingmán Sû nghut é eq, Yesuq lé lumjínng é sù lé mara hkyut san byí é Sû nghut râ matú, ahkuí lhê ipyat má, Yhâng é tengmán hkyô lé shit byí é nghut lhê.

²⁷ Haû su nghut jáng, nghutbun jowò joq ri lhú? A joq. Hai tarâ mai a joq dut byuq é lhú? Haû jep é tarâ châng é yanmai nghut lhê lhú? A nghut, lumjínng hkyo é yanmai sheq a joq dut byuq é nghut lhê. ²⁸ Hkâsu mù gà le, byù gi, haû jep é tarâ châng é dông a nghut é za, lumjínng luí, mara hkyut san byi huí é hkyô lé, ngamoq lum nyi lhê. ²⁹ Garai Gasang gi, Yudaq byu pé é Garai Gasang za nghut lhê lhú? Tûngbaù pé é Garai Gasang le a nghut lhú? Nghut lhê, tûngbaù pé é Garai Gasang le nghut lhê. ³⁰ Hkâsu mù gà le, Garai Gasang gi, rayuq za nghut é yanmai, rajung za lumjínng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. ³¹ Haû nghut jáng, nga-nhúng gi, lumjínng myit hau èq, jep é tarâ lé lhoq hpoí pyám râ lhú? Ratsuí lháng a nghut! Nga-nhúng gi, jep é tarâ haû lé lhoq gîng tîng é bang ru nghut lhê.

✧ 4:3 Apûn 15:6,22 ✧ 4:8 Hkya-on 32:1-2

4

Abraham, Mara Hkyut San Huí É Hkyô

¹ Haû su nghut jáng, nga-nhúng é íchýí îwa Abraham gi, haû hkyô mai haí wó sê yu ri nghû, taí râ lhú? ² Abraham gi, zui saí é dông mai, mara hkyut san byi huí é ru nghut le gi, yhang nghutbun jang joq râ nghut lhê; nghut kôlhang, Garai Gasâng é hí má gi, yhang haû dông a nghut. ³ Chyúmdang má hkâsu gà tô ri lhú gà le, "Abraham gi, Garai Gasang lé lumjínng bê nghut mù, yhang lé, dingmán sù ga són byi bê nghut ri."✧ gà ri.

⁴ Zui saí é sù gi, yhâng é zuihpau lé, chyunghuq dông wó yu é a nghut é za, wó yù gîng luí, wó yu é ru nghut lhê. ⁵ Nghut kôlhang, zui saí é hkyô dông a nghut é za, haû agè ashop hkyô lé mara hkyut san byí é Garai Gasang lé lumhkau é sù gi, yhâng é lumjínng myit é yanmai, dingmán sù ga són byi huí é nghut lhê. ⁶ Haû eq rajung za, yhang zui saí é hkyô dông a nghut é za, Garai Gasâng èq dingmán sù ga són byi huí é, Garai Gasâng chyáng mâ é shimân jeju wó é sù eq séng luí, Dawiq taí é gi,

⁷ "Tarâ lu laí é lé mara hkyut pyám byi huí é eq yubak mara lé nghop pyám byi huí é bang gi, hkungsó wó nyi ri.

⁸ Bo tô é mara lé, Yhumsing èq mara a són byí é hui sù gi, hkungsó wó nyi ri."✧ gà ri.

⁹ Haû sù é jeju gi, ahpyo-kuq hpyit hkâm bâng é matú za nghut lhê lhú? Ahpyo-kuq a hpyit bâng é matú le nghut lhê lhú? Hkâsu mù gà le, Abraham é lumjínng myit lé, dingmán sù ga són byi bê nghut lhê nghû, ngamoq taí nyi bê nghut lhê. ¹⁰ Haû su són byí é gi, hkâ-nhám nghut lhê lhú? Ahpyo-kuq hpyit hkâm é htâng má lhú? A nghut jáng, hí má lhú? Haû gi, ahpyo-kuq hpyit hkâm é htâng má a nghut é za, hí má ru nghut lhê. ¹¹ Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjínng luí wó é dingmán hkyô gà é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôlhang, lumjínng é lhunghâng bang lé

dingmán bang ga són byî é wó hui râ matú, haú bâng é îwa dut bê nghut ri. ¹² Haú ahpyo-kuq hpyit hkâm é za a nghut, nga-nhông é îwa Abraham, ahpyo-kuq hpyit a hkam yù shi má wó é lumjínng hkyo é hkyî-kám lé cháng luî ahpyo-kuq hpyit bâng é îwa le, yhang nghut ri.

¹³ Mingkân é amyû hkông xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjínng hkyô mai lo é dingmán hkyô đông ru nghut lhê. ¹⁴ Hkâsu mù gâ le, jep é tarâ đông nyi yap é bang gi, amyû hkông xoq pé nghut é nghut jáng, lumjínng hkyô gi, akyû a bo é eq, danggidiq gi, hpau a dap é dut byuq lhê. ¹⁵ Haú jep é tarâ gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

¹⁶ Haú mù luî, danggidiq gi, Abraham é awut ashín lhungháng bâng chyáng, jeju mai za lo é eq gingtíng nyi é dut sháng gaq ga, lumjínng hkyô mai lo é nghut lhê. Haú gi, jep é tarâ má lòm bâng é matú baú za a nghut, Abraham é lumjínng hkyô má lòm bâng é matú le nghut lhê. Abraham gi, nga-nhông lhunghâng bâng é îwa nghut ri. ¹⁷ "Ngò gi, nang lé, byù myû myo myô é îwa dut nhâng bê."* ga kâ tô é eq rajung za, haú shi byuq bê bang lé wó lhoq dui é eq a joq wú é zè lé joq shoq wó kut é, yhang lumjínng é sù Garai Gasâng hí má, Abraham gi, nga-nhông é îwa nghut lhê.

¹⁸ "Náng é awut ashín pé le, haú eq rajung za myô lò râ nghut lhê."* ga yhang lé taî kyô to bê eq rajung za, yhang gi, myit myoqbyù jowò haî a joq kôlhang, lumjínng luî myoqbyu nyi é nghut mù, byù myû myo myô é îwa dut bê nghut ri. ¹⁹ Yhang gi, rashô zàn kô jé byuq bê nghut mù, yhânggùng gi, shi é gyá dut é hui zô é eq Sarah é zoyhúm shibó le shum byuq kôlhang, yhang gi, lumjínng myit a yom byuq nghut ri. ²⁰ Hau htoq agó, Garai Gasâng é danggidiq eq séng luî, a lumjínng a dut é eq hê myit mhô myit a dut é za, yhâng é lumjínng myit lé saî lhoq gingtíng mù, Garai Gasang lé hkya-on kungtôn luî, ²¹ Garai Gasang gi, Yhang byi tô é danggidiq eq rajung za wó kut râ a-tsam bò sù

nghut é lé, yhang myit zing nyi ri. ²² Hau é yanmai, "Yhang lé, dingmán sù ga són byi bê nghut ri."* gâ tô é nghut lhê. ²³ "Yhang lé, són byi bê." ga, kâ tô é dang gi, yhang é matú za a nghut, ²⁴ nga-nhông é Yhumsíng Yesuq lé, shi é mai lhoq dui toq yû sù Garai Gasang lé lumjínng luî, Yhang èq dingmán bang ga són byi râ nghut é, nga-nhông é matú le nghut lhê. ²⁵ Yhumsíng Yesuq gi, nga-nhông é yubak marâ é matú, shi hkâm byi râ đông ap pyâm é hui luî, nga-nhông, mara hkyut san byi é hui râ matú, lhoq dui toq é hui bê nghut ri.

5

Nguingón Hkyô Eq Gabú Hkyô

¹ Haú mù luî, nga-nhông gi, lumjínng é đông mai mara hkyut san byi é hui bê nghut é yanmai, nga-nhông é Yhumsíng Yesuq Hkrisduq đông, Garai Gasang eq buinùm wó xoq yû bê nghut lhê. ² Yesuq é yanmai, nga-nhông gi, ahkuî wó yu to bê jeju shi má, lumjínng luî wó wâng bê nghut mù, Garai Gasâng é hpungwup shingkang lé myoqbyù luî gabú gumrong nyi lhê. ³ Haú za a nghut, nga-nhông gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri; ⁴ hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhông sê lhê. ⁵ Myoqbyu to hkyô haú gi, nga-nhông lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhông lé byi tô é Chyoiyúng Woi-nyí đông, nga-nhông é i-myit unghkaú má hut kat byi bê nghut ri.

⁶ Hkâsu mù gâ le, nga-nhông gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhông é matú shi hkâm byi bê nghut ri. ⁷ Gè gè ga jáng, dingmán su é matú shi hkâm byi râ byù gi, shau râ nghut lhê; nghut kôlhang, byù gè rayuq é matú kúm gi, wám shi hkâm é byù nyi sê lhê. ⁸ Nghut kôlhang, nga-nhông gi, yubak dap bang nghut nyi ashî hkùn, nga-nhông é matú

Hkrisduq shî hkám byî é má, Garai Gasang gi, Yhâng é chyitdap myit, nga-nhúng lé shít byi bê nghut ri.

⁹ Nga-nhúng gi, ahkuî, Yhâng é sui mai mara hkyut san byî é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lâ. ¹⁰ Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byî é dông, Garai Gasang eq buinùm wó xoq yu é hui bê nghut lâ. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lâ. ¹¹ Haû su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuî wó yu to bê nghut mù, Yhâng é yanmai, Garai Gasang má le, gabú gum-rong nyi lâ.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, mingkan má jé wâng bê nghut luî, shî-nò hkyô gi, yubak marâ é yanmai châng jé bê nghut ri; haú dông mai, byù lhunglhâng bang gi, yubak dap bang chyat nghut byuq mù, shî-nò hkyô gi, byù lhunglhâng bâng chyáng jé bê nghut ri. ¹³ Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lâ. Nghut kôlhang, jep é tarâ a joq shî é hkûn gi, yubak mara lé mara su a ngàm shî é nghut lâ. ¹⁴ Haû su ga kôlhang, Adam su hkunmó lé lu laî é dông mara a kut shut bâng é ahtoq má lhang, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

¹⁵ Nghut kôlhang, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byî é hkyô lhoq htoq

é nghut lâ; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lâ. ¹⁷ Haû htoq agó, byù rayuq tarâ lu lai luî, haû rayuq é yanmai, shî-nò hkyô up nyi bê nghut lâ, ahkuî kúm, haû Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak dui hkyô má uphkan nyi kó râ nghut lâ.

¹⁸ Haû mù luî, tarâ lu laî é hkyô ralhûm é yanmai, byù lhunglhâng bang gi, mara dam byî é hui zo kô é su, dingmán hkyo é muzó ralhûm é yanmai, byù lhunglhâng bang gi, asak dui hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó râ nghut lâ.

²⁰ Haû jep é tarâ jat é gi, tarâ lu lai hkyô je myo rá matú nghut lâ. Nghut kôlhang, yubak mara myô jat é hkûn, jeju gi, je riyhang myô jat lo é nghut lâ. ²¹ Haû mù, yubak mara gi, shî-nò hkyô dông uphkan bê su, jeju gi, nga-nhúng é Yhumsîng Yesuq Hkrisduq é yanmai, ahtum abyuq é asak wó byî é dingmán hkyô dông up râ nghut lâ.

6

Hkrisduq Eq Rading Ralhum

¹ Haû nghut jáng, nga-nhúng gi, hkâsu nghû taí râ lú? Jeju myô jat lò sháng gaq nghû, nga-nhúng, yubak mara kut xoq nyi râ lú? ² Haû su a nghut sháng gaq! Nga-nhúng gi, yubak mara eq shi gang bê bang nghut lâ; hkâsu mù haú má wó dui nyi lò râ lú? ³ Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shî hkám hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lú? ⁴ Haû mù luî, Hkrisduq gi, Íwâ é hpungwup shingkâng eq, shî bê mai lhoq dui toq huí é su, nga-nhúng le, asak asik dông wó dui nyi sháng gaq nghû, nga-nhúng gi, wui-myhup hkâm

é dông, Yhang eq rahá, shî hkâm é eq myhup yhum é hui bê nghut lê.

⁵ Nga-nhúng gi, Yhang shî hkám é hkyô má, Yhang eq rading ralhum za dut bê nghut jáng, Yhâng é dum dui toq hkyô má le, Yhang eq rading ralhum za hkyak dut râ nghut lê. ⁶⁻⁷ Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lê.

⁸ Haû mù, nga-nhúng gi, Yhang eq rahá shî hkám bê nghut jáng, Yhang eq rahá dui nyi râ nghut lê nghû, lumjínghê. ⁹ Hkâsu mù gâ le, Hkrisduq gi, shî bê mai lhoq dui toq é hui bê nghut mù, Yhang gi, dum wó shí lo râ a nghut é lé, nga-nhúng sê lê; shî-nò hkyô gi, Yhang lé hkâ-nhám le wó sing to râ a nghut lo. ¹⁰ Yhang shî hkâm é shî-nò hkyô gi, banshoq bâng é matú, yubak mara eq séng luí radâm za shî hkám byi bê nghut ri; nghut kôlhang, Yhang dui nyi é asak gi, Garai Gasâng hí má dui nyi é nghut lê.

¹¹ Haû eq rajung za, nungmoq gi, yubak mara eq shî gang luí, Hkrisduq Yesuq dông Garai Gasâng é matú asak dui nyi lê nghû, sôn yù keq. ¹² Haû mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agè ashop hkyô é chùng zè pé dông yubak mara má hkâ-ap byi pyám kó, shî bê mai lhoq dui toq yù huí é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyô é chùng zè pé dông, Garai Gasâng chyáng ap byi keq. ¹⁴ Hkâsu mù gâ le, nungmoq gi, jep é tarâ hkaû má a nghut lô é za, jeju hkaû má nghut nyi bekô yanmai, yubak mara gi, nungmoq lé sîng sù wó dut râ a nghut lo.

Dingmán Hkyô É Jùn Pé

¹⁵ Haû jáng gi, hkâsu kó lú? Nga-nhúng gi, jep é tarâ hkaû má a nghut lo é za, jeju hkaû má nghut nyi bekô yanmai, mara

wó kut shut kó râ lú? Haû su a wó kut!

¹⁶ Nungmoq gi, rayuq yuq é jìno gyo râ matú, yhumsing gùng lé jùn pé dông ap pyâm é hkûn, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jìno gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lú?

¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklum banshoq eq cháng bekô nghut é yanmai, Garai Gasâng lé jeju hkyá-on sháng. ¹⁸ Nungmoq gi, yubak mara mai lhoq lhut é hui bang nghut kômù, dingmán hkyô é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng; nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông lhang ap byi wú bekô nghut é su, ahkuí gi, chyoiyúng hkyô wó yù râ matú, haû pé lé, dingmán hkyô má jùn dông ap byi keq. ²⁰ Nungmoq gi, yubak marâ é jùn dut nyi kô é hkûn, dingmán hkyô eq uphkang é mai lut nyi kô é nghut lê. ²¹ Ahkuí, nungmoq hoqjung nghû wú htoq é pé gi, haû u lé, hai akyû wó yù kô é lú? Hau pé gi, shi byuq é má htâm é chyat nghut ri. ²² Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyû gi, chyoiyúng hkyô wó yu é nghut mù, ahtum abyuq é asak wó râ nghut lê. ²³ Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

¹ Gumang wui ê, ngò gi, tarâ lé sê é bang nungmoq lé tái nyi lê: haû tarâ gi, byù rayuq lé, yhang, asak dui nyi é u lé za wó uphkang é lé, nungmoq a sé kó lú?

² Dangké, ikun wàng bê myiwe myhí rayuq gi, yhâng é yhumsing hpó asak dui nyi é ahkyíng má, tarâ eq up zing tô é hui ri;

nghut kôlhang, yhâng é yhumsîng hpó shi byuq é nghut jáng gi, haû ikun wàng tarâ mai, yhang wó lut bê nghut ri. ³ Haû nghut é yanmai, yhâng é yhumsîng hpó asak dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhâng é yhumsîng hpó shi byuq é nghut jáng gi, yhang, tarâ haû mai lut bê nghut luí, yuqgè góyuq eq hâng lhum kôlhang, sulàng lú sù a nghut lo.

⁴ Haû mù luí, ngá é gumang wui ê, nung-moq le, haû shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashi wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê. ⁵ Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyô é ashi zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê. ⁶ Nghut kôlhang, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dông a nghut é za, Woi-nyí é hkyô sik dông nga-nhúng dojaú nyi é nghut lhê.

Jep É Tarâ Eq Yubak Mara

⁷ Haû jáng, nga-nhúng hkâsu taí râ lhú? Jep é tarâ gi, yubak mara nghut lhê lhú? Ratsuí lháng a nghut! Gè gè ga jáng, haû jep é tarâ dông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"✧ ga jep é tarâ má a taí tô é nghut jáng, myoqnoq é hkyô lé, ngò sé râ a nghut. ⁸ Nghut kôlhang, yubak mara gi, hkunmó é ahkáng lé chûng mù, ngò má myoqnoq hkyô jung hkangmó lhoq htoq byí ri; hkâsu mù gâ le, jep é tarâ hkaû má a nghut jáng, yubak mara gi, shi é za nghut lhê. ⁹ Ngò gi, tarâ hkaû má a nghut é za asak dui wú bê nghut lhê; nghut kôlhang, haû hkunmó htoq lô jáng, yubak mara gi, dui lò mù, ngò gi, shî bê nghut lhê. ¹⁰ Haû mù luí, asak dui nhâng râ matú nghut é hkunmó haû gi, shî-nò hkyô dut byuq é lé, ngò wó sê é nghut lhê. ¹¹ Hkâsu mù gâ le, yubak mara

gi, hkunmó é ahkáng lé chûng mù, ngo lé mhaû yù luí, hau eq ngo lé shî nhang ri. ¹² Hau pé lé wú jáng, jep é tarâ gi, chyoyúng ri; haû hkunmó gi, chyoyúng, dingmán é eq ge é nghut ri.

¹³ Haû nghut jáng, ge é hkyô haû gi, ngá é matú shî-nò hkyô dut byuq bê lhú? Haû dông a nghut! Nghut kôlhang, yubak mara lé gi, yubak mara dông hkyak wó lhoq htoq shit râ matú, haû ge é hkyô dông mai, yubak mara gi, ngò má shî-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó dông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn dông ung zô é hui bê nghut lhê. ¹⁵ Ngò haî kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. ¹⁷ Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô haî le a bo é lé, ngò sé lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

²¹ Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gâ le, ngò gi, Garai Gasang é tarâ lé, ngá é i-myit unghkaû má myit nguì gabú nyi lhê. ²³ Nghut kôlhang, ngá é gungdu showui showang pé má bo é gotû tarâ gi, ngá é i-myit tarâ eq majan zân lhûm é nghut luí, ngá é gungdu showui showang hkaû má mù zui nyi é yubak é tarâ má, ngo lé shúmbyû dut nhang é lé, ngò myang ri.

✧ 7:7 Htoq Ló 20:17

²⁴ Ngò gi, shogyo rayhup dut sù nghut ri-nhung! Shî nhang é gungdu shî mai, ó yuq wá, ngo lé wó hkyi yù râ l hú? ²⁵ Nga-nhung é Yhumsing Yesuq Hkrisduq dông mai wó lut bê nghut mù, Garai Gasang lé jeju hkyôn nyi lhê!

Haù mù luí, ngò yhang, myit é dông gi, Garai Gasang é tarâ lé châng lhê, nghut kôlhang, yubak gungsho dông gi, yubak é tarâ lé châng lhê.

8

Haù Woi-nyí Mai Asak Dui É Hkyô

¹ Haù mù luí, ahkuí, Hkrisduq Yesuq má nghut nyi bâng é matú gi, mara byí é hkyô a joq lô é nghut lhê. ² Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq dông, yubak mara eq shî-nò hkyô é tarâ mai, ngo lé lhoq lhut yù bê nghut lhê. ³ Haù jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gunghkyâng dông, Yhang Zo sîng lé nhang kat é dông kut pyám bê nghut ri. ⁴ Haù mù, Garai Gasang gi, yubak gungsho dông asak a dui é za Woi-nyí dông asak dui bang nghut é nga-nhung má, haù jep é tarâ má bo é hkyô pé lé, wó lhoq dik râ matú, gungsho ralhum má, mara lé doqđân pyám bê nghut ri.

⁵ Haù yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haù Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶ Haù yubak byu é myit gi, shi é hkyô nghut ri; haù Woi-nyí eq hkgang to huí su é myit kúm gi, asak eq nguínón hkyô nghut ri. ⁷ Haù yubak myit gi, Garaí é tarâ ô má a nyi é htoq agó, haù lé a wó cháng kut é yanmai, Garaí é gyè nghut ri. ⁸ Haù yubak gungshô eq hkgang tô é hui bang gi, Garai Gasang lé a wó gabú nhâng kó nghut ri.

⁹ Nghut kôle, Garai Gasang é Woi-nyí gi, nungmoq chyáng lúng nyi bê nghut jáng, nungmoq gi, haù yubak gungshô eq hkgang to huí é bang a nghut lô é za, Woi-nyí eq

hkgang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê.

¹⁰ Nghut kôlhang, nàng má Hkrisduq nyi nyi é nghut jáng, nàng é gungdu gi, yubak marâ é yanmai shî kôlhang, nàng é woi-nyí gi, dingmán hkyô é yanmai dui nyi ri. ¹¹ Hau htoq agó, Yesuq lé shi é mai lhoq dui toq yù Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yù Sù gi, nungmoq má nyi nyi é, Yhâng é Woi-nyí dông mai, nungmoq é, shî sê é gungdu pé lé le, asak dui nhâng râ nghut lhê.

¹² Haù mù luí, Gumang wuì ê, nga-nhung gi, yubak gungsho dông asak dui râ matú, wò wó é bang a nghut. ¹³ Hkâsu mù gâ le, haù yubak gungsho dông asak dui kô é nghut jáng, nungmoq gi, shî râ nghut lhê; nghut kôlhang, haù gungshô é shut shaí hkyô lé, Woi-nyí eq sat pyám kô é nghut jáng, nungmoq gi, asak dui râ nghut lhê. ¹⁴ Garaí Gasang é Woi-nyí eq shuí u é hui bang gi, Garaí Gasang é yhangzô pé nghut lhê. ¹⁵ Hkâsu mù gâ le, nungmoq gi, gyuq râ matú, nungmoq lé jùn dum taù dut nhang é woi-nyí lé, a hap yu é za, nga-nhung lé zo yín yu é Woi-nyí lé hap yu tô é bang ru nghut lhê; haù mù, nga-nhung gi, Yhang é yanmai, "Aba, * Áwa ê" nghú wut é nghut lhê. ¹⁶ Nga-nhung gi, Garaí Gasang é yhangzô pé nghut é lé, Woi-nyí haù gi, nga-nhung é woi-nyí eq rahá saksé hkâm nyi ri. ¹⁷ Ahkuí, nga-nhung gi, zo wuí nghut bê yanmai, Hkrisduq eq rahá, Garaí Gasang é amyù hkûngxoq pé wó dut é nghut lhê. Nga-nhung gi, Hkrisduq é wuíhke jamjau pé lé, gè gè yhang bo huí zô é nghut jáng, Yhâng é hpungwup shinggang lé le, bo myang hkam yù râ nghut lhê.

Htângnùng Lhê É Hpungwup Shinggang

¹⁸ Nga-nhung é ahkuí lhê é wuíhke jamjau hkyô pé gi, nga-nhung lé shit râ nghut é hpungwup shinggang eq whuí râ a gingdán nghú, ngò wó myit ri. ¹⁹ Haù hpan to huí é lhunglhang gi, Garaí Gasang é yhangzô pé lé lhoq htoq shit byi râ lé, gyai yhang myit lánng nyi akô nghut ri. ²⁰ Hkâsu

* **8:15** Aba gâ é gi, Aramaik dang dông "áwa" gâ é lichyúm nghut lhê.

mù gâ le, haû hpan to huî é lhunglhang gi, akyû a bo é chyat dut byuq bê nghut ri. Haû gi, yhumsing hkyin yu é đông a nghut é za, haû su dut nhâng Sû ô nau é đông kut é nghut ri. ²¹ Haû hpan to huî é lhunglhang gi, htên byoq byuq râ matú shúm dut é mai lhoq lhut é hui luî, Garai Gasang é yhangzo pé é hpungwup bo é luthkyô má wó wâng râ matú, myoqbyu tô é nghut lhê.

²² Haû hpan to huî é lhunglhang gi, ahkuî hkying jé shoq, zohkû-nò no é su nò-kying kying nyi kô é lé, nga-nhung sê lhê. ²³ Haû pé za a nghut, Woi-nyí é sâng-hi ashi† lé wó yû bê bang nga-nhung le, zo pé đông yin yu é jeju lé láng uchyang, i-myt unghkaû má nò-kying kying é nghut lhê. Zo pé đông yin yu é jeju haû gi, nga-nhung é gungdu hkyi xe yù hkyô nghut lhê. ²⁴ Hkâsu mù gâ le, nga-nhung gi, myit myoqbyu hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyu shirâ lúhú? ²⁵ Nghut kôlhang, nga-nhung gi, a wó shí é lé myit myoqbyu é nghut jáng, myit hîng hîng kut láng é nghut lhê.

²⁶ Haû eq rajung za, Woi-nyí gi, nga-nhung wum nyhôm é hkyô má garúm byi ri. Nga-nhung gi, haî dung râ é lé a sé kôlhang, haû Woi-nyí yhang gi, dang mai a wó taí htoq é nò-kying htê đông, nga-nhung é matú bo dúng xoq byi ri. ²⁷ Nga-nhung é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é đông, sân-yung bâng é matú bo dúng xoq byi ri.

Banshoq Lé Je Wó Ung Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yù luî, Yhang lé chyitdap bâng é matú, lhunglhang lé ge é đông chyat kut é hkyô lé, nga-nhung sê lhê. ²⁹ Hkâsu mù gâ le, Yhang Zo gi, gumang wui myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó púng nhâng râ matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yù bê bang

lé gi, mara hkyut san byi ri; mara hkyut san byi é hui bang lé gi, hpungwup shing kang bò nhang ri.

³¹ Haû jáng gi, shí hkyô eq séng luî, nga-nhung haî taí shirâ lúhú? Garai Gasang gi, nga-nhung hkyam shut nghut jáng, nga-nhung lé, ó yuq wá gyè wám kut râ lúhú?

³² Yhumsing é Yhangzo lé lhang a ha bûn é za, nga-nhung banshoq bâng é matú ap byi pyâm é Sû gi, Yhang lé le, lhunglhang lé le, rahá laí laí byi râ a nghut lúhú? ³³ Garai Gasang eq hkyin yu to bê bang lé, ó yuq wá mara wó hûn râ lúhú? Garai Gasang gi, mara hkyut san byi Sû nghut ri. ³⁴ Hkrisduq Yesuq gi, shí hkám luî, shí hkâm é htoq agó, shi é mai lhoq dui toq yu é hui mù, Garai Gasang é loqyo hkyam má nghut nyi luî, nga-nhung é matú bo dúng xoq byi nyi bê nghut é yanmai, ó yuq wá mara wó byi râ lúhú? ³⁵ Hkrisduq é chyitdap myit mai, nga-nhung lé, hai eq wá wó lhoq kang râ lúhú? Gunjang huî é hkyo eq luq? Wuîhke huî é hkyo eq luq? Zing-ri huî é hkyo eq luq? Mutmó huî é hkyo eq luq? Gùng chín dut huî é hkyo eq luq? Gyuq jung eq luq? Sham eq luq? ³⁶ Haû gi,

"Náng é yanmai, ngamoq, nyi wui sat pyâm é huî nyi ri;

sat râ matú nyi tô é sau pé lé su, ngamoq lé myit pyâm akô."[✧]

ga kê tô é eq rajung za nghut ri. ³⁷ A wó lhoq kang; nga-nhung lé chyitdap Su é yanmai, nga-nhung gi, haû pé banshoq lé je wó ung pyâm é nghut lhê. ³⁸ Hkâsu mù gâ le, shí kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, haî jung a-tsam pé nghut kôlhang, ³⁹ htoq tsáng mâ é nghut kôlhang, a-ô tsáng mâ é nghut kôlhang, hpan tô é gotû haî nghut kôlhang, nga-nhung é Yhumsing Hkrisduq Yesuq má bo é Garai Gasang é chyitdap myit mai, nga-nhung lé wó lhoq kang pyám râ a nghut nghû, ngò gi, hkyak wó sê yu ri.

9

Garai Gasang Hkyin Yu É Israelaq Byu Pé

† 8:23 Woi-nyí é sâng-hi ashi gâ é gi, Woi-nyí gi, Garai Gasang byi é chyunghuq pé mâ é sâng-hi lhum nghut lhê.

✧ 8:36 Hkya-on 44:22

¹ Ahkuî, ngò gi, Hkrisduq má tengmán é dang taí râ; ngò a mhaû é lé, haû Chyoiyúng Woi-nyí gi, ngá é unghkaû myit má hkyak saksé hkâm nyi ri. ² Ngò gi, ngá é myit nhiklum má, gyai yhang yón kuq nyi é eq ayang hpuzô nyi lhê. ³ Hkâsu mù gâ le, ngò gi, ngá é byuhú, ngá é gumang wui é matú, nhing é hui luí Hkrisduq eq gang le lhang gè râ su gâ ri. ⁴ Haû bang gi, Israelaq byu pé nghut lhê. Zo yín yû huí é hkyô le, hpungwup shingkang le, dangshikaq pé le, tarâ lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akò nghut ri. ⁵ Haû mying hû é ichyí iwâ pé gi, yhangmoq é ichyí iwâ pé nghut luí, byu é hkyam dong gon jáng, Hkrisduq gi, yhangmoq amyû mâ é nghut ri. Yhang gi, lunglhang lé up é, ahtum abyuq hkya-on huí é Garai Gasang nghut ri! Amen.

⁶ Haû gi, Garai Gasang é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byu akying chyat a nghut kó nghut ri. ⁷ Abraham é awut ashín banshoq bang gi, yhang é zo wui akying chyat nghû a wó taí é nghut lhê. Hau é malaí, "Isak dong mai lo é lé, nang é awut ashín nghû són byi râ nghut lhê."* gâ tô ri. ⁸ Radong taí sháng ga jáng, gungsho mai hku é zo wui gi, Garai Gasang é zo wui akying a nghut kó, danggidiq eq sêng é zo wui za sheq, Abraham é awut ashín pé dong són byi é nghut lhê. ⁹ Hkâsu mù gâ le, "Masat tô é ahkying má, ngò dum taú lé mù, Sarah gi, yuqzo hkû râ nghut lhê."* ga taí tô é danggidiq é yanmai nghut lhê.

¹⁰ Haû za a nghut, Rebeka é yhangzô nhiktang é iwa gi, nga-nhung é iwa nghut su Isak rayuq za nghut lhê. ¹¹⁻¹² Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yû Su é yanmai nghut é lé, wó gíng nyi sháng gaq ga, haû zozûm nhik a hku lé shí é htoq agó, ge é eq a ge é muzó haí lhang a kut shimá, "Haû ko sú yuq gi, tiq sú yuq lé dojaú râ nghut lhê."* ga, Rebeka lé taí kyô tô é nghut lhê. ¹³ Haû gi, "Yakup lé, ngò

chyitdap lhê, nghut kôlhang, Eso lé gi, a ngui é nghut lhê."* ga kâ tô é eq rajung za nghut ri.

¹⁴ Haû nghut é yanmai, nga-nhung hkâsu nghû taí râ? Garai Gasang gi, a tarâ é sù nghut lhê lhú? Ratsuí lhang a nghut! ¹⁵ Hkâsu mù gâ le,

"Ngò, shogyo nhikmyin naù sù lé, shogyo nhikmyin râ nghut lhê;

Ngò, jeju byi naù sù lé, jeju byi râ nghut lhê."*

ga, Mosheq lé Yhang taí ri. ¹⁶ Haû mù luí, haû hkyin yu é hkyô gi, byu yut yut ô nau é yanmai le a nghut, shikut é yanmai le a nghut, Garai Gasang é shogyo nhikmyin é yanmai za nghut lhê. ¹⁷ Hkâsu mù gâ le, Chyúmdang má, "Náng chyáng Ngá é a-tsam wó tûn shit râ eq mingkan gón má Ngá é mying lhoq pyo é hui râ matú sheq, Ngò, nang lé lhoq toq kat é nghut lhê."* ga, Hpara-uq lé taí ri. ¹⁸ Haû mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

¹⁹ Nungmoq mâ é rayuq yuq, "Haû jáng, Garai Gasang gi, ngamoq lé haí mù mara hun nyi ashí lhú? Yhang ô nau é hkyô lé, ó yuq wá wó hkûm pyâm lhê lhú?" ga, ngo lé taí kó râ nghut lhê. ²⁰ Nghut kôlhang, Garai Gasang lé dang tu sù byu nang gi, ó yuq wá nghut lhê lhú? Saí to hui bê é zè pé gi, "Nàng, haí mù ngo lé shí su kut saí tô lhê lhú?" nghû saí é Sù lé wó taí râ lhú? ²¹ Tso-au saí sù gi, tsohtung rallum mai za, hkik é tso-au pé eq a hkik é tso-au pé saí râ ahkáng wó lhê a nghut kô lhú?

²² Garai Gasang gi, Yhang é nhikmo-yo hkyô tûn shit luí, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ jang haí joq ashí lhú? ²³ Hpungwup shingkang é matú noq mai hen to bang nghut é, Yhang shogyo nhikmyin huí é bang lé, Yhang é agùn agó é hpungwup shingkang lé sé nhâng naù mù, Yhang haû su kut é nghut jáng, taí râ haí joq ashí lhú?

²⁴ Haû bang gi, Yudaq byu pé mai za a

* 9:7 Apûn 21:12 * 9:9 Apûn 18:10,14 * 9:11-12 Apûn 25:32 * 9:13 Mal 1:2-3 * 9:15 Htoq Ló 33:19
* 9:17 Htoq Ló 9:16

nghut, tûngbaù pé mai le ji yù huì é bang nga-nhúng nghut lhê. ²⁵ Haù eq rajung za, Hosea laiká má Yhang taì tô é gi,

"Ngá é byù myû a nghut é bang lé, 'Ngá é byù myû' nghû;

Ngò a chyit é byizo lé 'Ngò chyit sù' nghû wut râ nghut lhê."[☆]

gâ ri. ²⁶ Haù mù,

"Nungmoq gi, ngá é byù myû pé a nghut.' nghû yhangmoq lé taì é jowò má yhang,

yhangmoq gi, 'Rû dui nyi é Garai Gasâng yhangzô pé' ga wut é hui kó râ nghut lhê."[☆]

gâ ri.

²⁷ Esai-aq le, Israelaq byu pé eq séng luì garu taì é gi,

"Israelaq yhangzo yhangshû pé gi, wuìshuq lung-aù yàm mã é semuì su myo kôlhang,

myit gyó tô é bang za sheq hkyi yu é hui kó râ nghut lhê.

²⁸ Hkâsu mù gâ le, haù Yhumsîng gi, myidàm htoq má Yhâng é tarâ jéyáng hkyô lé hân hân lhoq dik lhoq htûm pyám râ nghut lhê."[☆]

gâ ri.

²⁹ Haù eq rajung za, hí lé Esai-aq taì tô é gi,

"A-tsam dik shoq bò sù haù Yhumsîng za, nga-nhúng lé, awut ashín a myhit to byí é nghut jáng,

nga-nhúng gi, Sodom wà su dut byuq luì, Gomoraq myuq eq pung byuq râ nghut lhê."[☆]

gâ ri.

Israelaq Byu Pé A Lumjîng Kô É Hkyô

³⁰ Haù mù, nga-nhúng hkâsu nghû taì râ lhú? Dingmán hkyô lé a châng hkat é tûngbaù pé gi, haù lé wó yù bekô; haù gi, lumjîng hkyo é yanmai wó yu é dingmán hkyô nghut ri. ³¹ Nghut kôlhang, tarâ eq séng é dingmán hkyô lé châng hkat é Israelaq byu pé gi, haù lé a wó yù kó nghut ri.

³² Haù mù a wó yù kô é lhú? Yhangmoq gi, lumjîng myit eq châng hkat kô é a nghut é za, muzó pé eq châng hkat kô é yanmai, a

wó yù kô é nghut ri. Yhangmoq gi, "htung htê râ luqgok" má htung leng bekô nghut ri.

³³ Haù,

"Wú keq, htung leng râ luqgok eq myit leqbat nhâng râ luqmó cham lé, Ngò,

Zi-un bùm má lheq to luì,

Yhang lé lumhkaù sù gi, hkâ-nhám le hoq hpu é hui râ a nghut."[☆]

ga kâ tô é eq rajung za nghut ri.

10

¹ Gumang wuì ê, ngò gi, haù Israelaq byu pé hkyi yu é hui kó sháng gaq nghû, gyai yhang myit shirông luì, Garai Gasâng chyáng yhangmoq é matú kyûdung byí nyi lhê. ² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é dông a nghut kó.

³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsîng dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaù má a nyi kó nghut ri. ⁴ Hkrisduq gi, lumjîng bang yuq hkanmó, dingmán é má wó jé kó sháng gaq ga, jep é tarâ ló htûm jang dut bê nghut ri.

⁵ Mosheq gi, "Haù pé dông châng é sù gi, haù pé mai asak duì râ nghut lhê."[☆] ga, jep é tarâ eq séng é dingmán hkyô lé kâ sân kyô tô é nghut lhê. ⁶ Nghut kôlhang, lumjîng hkyô eq séng é dingmán hkyô gi, "Náng é myit nhiklhum má, 'Mauhking má, ó yuq doq ló râ lhú?'[☆] (Haù gi, Hkrisduq lé shuí gyó lò râ gá nau é nghut lhê), ⁷ haù a nghut jáng, 'Nik é jang má, ó yuq gyó wâng râ lhú?'[☆] (Haù gi, Hkrisduq lé, shi é mai dui toq nhâng râ gá nau é nghut lhê.), nghû hkâtaì kó." gâ tô ri. ⁸ Haù jáng, hkâsu gâ tô ri lhú? "Haù mungdang gi, nâng eq chyâng nyi ri; nâng é nhut má le, nâng é myit nhiklhum má lé nghut nyi ri."[☆] gâ tô ri. Haù gi, ngamoq hko taì é lumjîng hkyô eq séng é mungdang nghut lhê. ⁹ Haù mù, "Yesuq gi, Yhumsîng nghut ri." nghû nâng é nhut eq yín yù mù, Garai Gasang gi, Yhang lé, shi é mai dui toq nhâng bê nghut lhê nghû, nâng é myit

☆ 9:25 Hos 2:23 ☆ 9:26 Hos 1:10 ☆ 9:28 Esai 10:22-23 ☆ 9:29 Esai 1:9 ☆ 9:33 Esai 8:14; 28:16 ☆ 10:5 Nhung 18:5 ☆ 10:6 Tarâ Pun 30:12 ☆ 10:7 Tarâ Pun 30:13 ☆ 10:8 Tarâ Pun 30:14

nhiklhum má lumjínng é nghut jáng, nàng gi, hkyi yu é hui râ nghut lhê. ¹⁰ Hkâsu mù gà le, byù gi, myit nhiklhum má lumjínng jáng, mara hkyut san byí é hui mù, nhut mai yín yù jáng, hkyi yù huí é nghut lhê. ¹¹ Haù Chyúmdang taí é gi, "Yhang lé lumhkau é sù ó yuq le, hkâ-nhâm lháng hoq hpû é hui râ a nghut." ✧ gà ri. ¹² Hkâsu mù gà le, Yudaq byù eq tûngbaù pé é gyoro má gam hkoq é hkyô haí le a joq é za, haù Yhumsîng gi, banshoq bâng é Yhumsîng nghut lhê mù, Yhang lé wut dung bang lhunglháng lé, agùn agó shimân byí ri. ¹³ Hkâsu mù gà le, "Haù Yhumsîng é myíng lé lâng é bang yuq hkangmó gi, hkyi yu é hui râ nghut lhê." ✧ gà tô ri.

¹⁴ Haù nghut lé gi, yhangmoq a lumjínng é sù lé nhîng, hkâsu wó wut dung kó râ lú? Yhangmoq a wó gyô wú é sù lé nhîng, hkâsu wó lumjínng kó râ lú? Hko kyô é sù a nyi le nhîng, hkâsu wó gyo kó râ lú? ¹⁵ Nhang kat é a hui le gi, yhangmoq hkâsu kut wó hko kyo kó râ lú? Haù eq rajung za, "Gabú danglù pé hko kyo bâng é hkyí-kám pé gi, hkâ-í yhang yúng ri myhi-nhung!" ✧ ga kâ tô ri.

¹⁶ Nghut kôlháng, Israelaq byu pé banshoq bang gi, gabú danglù lé hap yù kô é a nghut. Hkâsu mù gà le, Esai-aq gi, "Yhumsîng ê, ngamoq é danglù lé ó yuq wá lumjínng é lú?" ✧ ga taí ri. ¹⁷ Haù nghut mù luí, lumjínng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôlháng, ngò myi kó lé: yhangmoq gi, a wó gyô wú kô é nghut lhê lú? Yhangmoq gi, wó gyo gù za nghut lhê, haù eq rajung za,

"Yhangmoq é htê gi, myidàm htoq banshoq má jâm bê nghut ri;

yhangmoq é mungdang pé gi, mingkan htungchyûn hkangmó má jé bê nghut ri." ✧

gà tô ri. ¹⁹ Ngò dum myi kó lé: Israelaq byu pé gi, a sê gyo kô é nghut lhê lú? Mosheq sâng-hi má taí é gi,

"Byù rahú lháng a nghut bang èq, Ngò, nungmoq lé manôn nhâng râ;

sê gyo nyan a bo é amyù èq, Ngò, nungmoq lé wú nhik-yo nhâng râ nghut lhê." ✧

gà ri. ²⁰ Hau htoq agó, Esai-aq a gyuq a wàm taí é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myí é bang lé, Ngò htoq shit bê nghut lhê." ✧

gà ri. ²¹ Nghut kôlháng, Israelaq byu pé eq séng luí, Yhang taí é gi,

"Ngò gi, jìno a gyô é eq ngegáng-htu é byù myù lé, nyí wuí Ngá loq lham mù ji nyi lhê." ✧

gà ri.

11

Israelaq Byu Pé Lé A He-ngik Pyám

¹ Haù mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lú? Ratsuí lháng a nghut! Ngò yhang le, Israelaq byù myú nghut luí, Abraham é awut ashín eq Ben-yamyin hú má é sù nghut lhê. ² Garai Gasang gi, Yhang te sê to gû nghut é, Yhâng é byu pé lé a he-ngik pyám é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó lú? Garai Gasang é hí má, yhang, Israelaq byu pé lé mara hûn é gi, ³ "Yhumsîng ê, yhangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akô nghut ri." ✧ gà ri.

⁴ Garai Gasang gi, yhang lé, hkâsu ga tû taí é nghut lhê lú? Haù gi, "Balaq hpara é hí má hkyihput a htuq shí é byù nyhit hkyíng lé, Ngá é matú myhit to lhê." ✧ gà é nghut lhê.

⁵ Haù eq rajung za, ahkuí gi, jeju yanmai hkyin yù huí é bang za myit gyó tô é nghut lhê. ⁶ Jeju yanmai nghut é nghut le gi, muzó é yanmai a nghut lo; muzó dòng ru nghut le gi, jeju gi, jeju a nghut lo.

⁷ Haù nghut jáng, hkâsu lú? Israelaq byu pé gyaí ho shikut kôlháng, a wó kô é lé, hkyin htoq yù huí é bang kúm gi, wó bekô

nghut ri. Góbang gi, myit lhoq htân byí é hui akô nghut ri; ⁸ haú gi,

"Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."*

ga kê tô é eq rajung za nghut ri. ⁹ Dawiq taí é le,

"Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

¹⁰ Yhangmoq myoq a wó myâng shoq, myoqjí lhoq chut pyám byí é hui sháng gaq;

yhangmoq é nunghkûng gi, ayang wòlai wun goí nhang é hui sháng gaq."*

gâ ri.

Tûngbaù Pé Lé Hkyi Yu É Hkyô

¹¹ Ngò dum myi kó lé: Israelaq byu pé gi, a wó dum gè râ í leqbat byuq bekô lúh? Ratsuí lhang a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pé chyáng jé byuq é nghut lhê. ¹² Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pé é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!

¹³ Nungmoq tûngbaù pé lé ngò taí nyi lhê: ngò gi, tûngbaù pé é lagyo nghut nyi é u má, ngá é hpungmû lé hpautap nyi lhê.

¹⁴ Haú gi, ngá é amyû pé lé manôn myit wó bô nhâng mù, yhangmoq ra-am lé wó hkyi yù râ lé myit myoqbyu é hkyô nghut lhê. ¹⁵ Hkâsu mù gâ le, yhangmoq lé hengik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é đông dut bê a nghut lhi?

¹⁶ Hau htoq agó, sâng-hî ashi đông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haú amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haú tsanlun akoq pé* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haú pé má xoq é hui mù, haú tsanlun amyit é xù lé bo shuq lom é nghut jáng, ¹⁸ akoq haú pé lé hkâwú tiq pyám kó. Nungmoq haú su kut é nghut jáng, nungmoq gi, haú amyit lé htuq é a nghut é za, amyit haú sheq nungmoq lé htuq é hkyô lé, nungmoq myit sé keq. ¹⁹ Nungmoq kúm gi, "Ngò, haú má xoq é hui râ matú sheq, akoq haú pé gi, lhoq hkyui pyâm é huí é ru nghut lhê." ga taí râ nghut lhê. ²⁰ Haú su gi, nghut lhê. Nghut kôlhang, yhangmoq gi, a lumjíng é yanmai, lhoq hkyui pyâm é hui kômù, nungmoq kúm gi, lumjíng é yanmai, wó ging tûng nyi é nghut lhê. Hká gumrong nyi, gyuq kyum nyi keq. ²¹ Hkâsu mù gâ le, Garai Gasang gi, akoq akying pé lé a ha bún é nghut le gi, nungmoq lé le ha bun râ a nghut.

²² Haú mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi râ nghut lhê. Haú a nghut jáng, nungmoq le, zân hpyit pyâm é hui râ nghut lhê. ²³ Yhangmoq gi, a lumjíng hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sù nghut lhê. ²⁴ Haí mù gâ le, yosô tsanlun gàm akoq nghut gù nungmoq lé hpyit yù mù, htûng a nghut é đông, hô é tsanlun agàm má xoq é nghut le gi, haú akoq akying pé nghut é yhangmoq gi, ó le ó é tsanlun- ngut akying má xoq yu é lé je riyhang hui râ nghut lhê ô!

Israelaq Byu Pé Hkyi Yu É Hui Râ Hkyô

²⁵ Haú mù, gumang wui ê, nungmoq a nghutbun kó sháng gaq nghû, zau tô é hkyô shí lé, nungmoq a sé dut râ lé, ngò a ô nau é nghut lhê: haú gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htân é huí é hkyô nghut lhê.

* **11:8** Tarâ Pun 29:4 * **11:10** Hkya-on 69:22-23 * **11:17** Tsanlun akoq pé gi, Israelaq byu pé lé taí nau é nghut lhê. † **11:17** Yosô tsanlun a-nyuq gi, tûngbaù pé lé taí nau é nghut lhê.

²⁶ Hau htâng sheq, Israelaq amyû banshoq bang hkyi yu é huí râ nghut lhê. Haû gi, "Hkyi yù Sû gi, Zi-un bùm mai htoq lô râ nghut lhê;

Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi râ nghut lhê.

²⁷ Ngò, yhangmoq é yubak mara lé huí sêng pyám byi jáng,

haû gi, yhangmoq lé Ngò byi tô é Ngá é dangshikaq nghut lhê."[✧]

ga kê tô é eq rajung za nghut ri.

²⁸ Haû gabú danglù eq séng luí ga jang, yhangmoq gi, nungmoq é matú gyè nghut akô; nghut kôlhang, hkyin htoq yû hkyô eq séng luí ga jang, yhangmoq gi, myìng hû é îchýi îwa pé é yanmai, chyitdap é huí akô nghut ri; ²⁹ hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaí lhik pyâm é a nghut. ³⁰ Nungmoq gi, Garai Gasâng é jìno a gyô é bang radàm dut wú kô é nghut kôlhang, yhangmoq jìno a gyô é yanmai, ahkuí kúm, shogyo nhikmyin hkyô wó hkam yù bekô nghut é su, ³¹ ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri. ³² Hkâsu mù gâ le, Garai Gasang gi, byù lhunglhâng bang lé, shogyo nhikmyin hkyô wó tân shít shoq ga, lhunglhâng bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuí jung nghut ri-nhung!

³⁴ "Haû Yhumsing é myit lé, ó yuq wá ung sê lhê lhú? Yhâng é hpaqchyí byi sù gi, ó yuq wá dut wú é lhú?"[✧]
gâ ri.

³⁵ "Garai Gasâng eq jeju dum tau byi râ dut shoq, ó yuq wá, Garai Gasang lé byi wú é lhú?"[✧]
gâ ri.

³⁶ Hkâsu mù gâ le, joq mijoq gi, Yhâng chyáng mai nghut mù, Yhang đông mai nghut luí,

Yhâng é matú chyat nghut ri. Haû hpungwup shing kang gi,

Yhâng chyáng ahtum abyuq ru joq nyí sháng gaq ô! Amen.

12

Dui É Hkungga Pé Dut Râ Hkyô

¹ Haû mù luí, gumang wuì ê, nungmoq é gungdu pé lé, Garai Gasang myit nguì ô nau é eq chyoiyúng é, dui é hkungga đông nhông byi keq nghú, Garai Gasâng é shogyo nhikmyin hkyô mai, ngò, nungmoq lé wum byi kat lhê. Haû gi, woi-nyí hkyô đông nungmoq noqkuq dojaú é hkyô nghut lhê.

² Mingkan shí lhùm é sâmlai đông a cháng lo é za, myit sik wó yû râ đông nungmoq é a-kyang lé htaí pyám byi nhâng keq. Haû hkûn sheq, Garai Gasâng é ge é, myit nguì é eq gumjup é ô naù hkyô lé, nungmoq wó chyâm, wó sê gàm hkoq yû kó râ nghut lhê.

³ Hkâsu mù gâ le, ngo lé byi tô é jeju yanmai, nungmoq yuq hkangmó lé ngò taí kôlé: nungmoq gi, yhumsing gùng lé lai shoq a nghutbùn é za, ó le ó lé, Garai Gasâng eq lumjíng myit tsing gàm byi to bê eq rajung za, myit yù gíng é í za myit yù keq. ⁴ Nga-nhúng yuq hkangmó é gungdu ralhum má gi, gungdu showui showang pé myo myo bo é nghut luí, gungdu showui showang haú pé banshoq gi, jai chûng jang a pung é nghut lhê. ⁵ Haû eq rajung za, myo myo nghut é nga-nhúng le, Hkrisduq má gungdu ralhum za dut luí, yuq hkangmó gi, rayuq eq rayuq gungsho sêng lhùm é bang chyat nghut lhê. ⁶ Nga-nhúng lé byi tô é jeju yanmai, nga-nhúng wó é chyunghuq gi, gotû tù nghut lhê. Byù rayuq é chyunghuq gi, myiqhtoi htoi é nghut jáng, yhâng é lumjíng hkyô eq rajung za htoi sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng

gaq; ⁸ myit wum byi é nghut jáng, myit wum byi sháng gaq; ra châ é bang lé garúm byi é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyi keq. ¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyi mù, haú Yhumsing lé dojaú nyi keq. ¹² Myit myoqbyù hkyô má gabú keq; wuîhke hkyô má hkam jan keq; kyûdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bíng hkulum é lé rago kut keq.

¹⁴ Nungmoq lé zing-rî é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byin hpyé gohut huí nyi keq. A nghutbûn é za, nyi yap hkyô nyhúm bang eq zùm yap keq. Hpaqchyî bo é sù su hkâ-myt ngàm kó.

¹⁷ Ó yuq lé le, agè ashop é yanmai, agè ashop é dông lató hkâhpuaq kó. Yuq hkangmó é myoq hí má ge é lé kut râ rago myit keq. ¹⁸ Wó dut é nghut jáng, nungmoq wó dut é í, yuq hkangmó eq nguingón shoq nyi keq. ¹⁹ Ngá é buinùm wuî ê, lató a hpuaq é za, Garai Gasâng é nhikmo-yo hkyô lé sheq láng nyi keq. Hkâsu mù gà le, "Ngò sheq lató hpuaq râ sù nghut lhê; ngò lató hpuaq râ."* ga, haú Yhumsing taí ri ga kê tô ri. ²⁰ Haú mù,

"Nungmoq lé gyè kut sù zòmut é nghut le gi, byi tso keq; yhang wuîshit é nghut le gi, rajung jung byi huq keq.

Haú dông kut jáng, nàng, yhâng é ulhum htoq má gyúng é myigye bum to byi é nghut lhê."*

ga le kê tô ri. ²¹ Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

* 12:19 Tarâ Pun 32:35 * 12:20 Sângkyang 25:21-22

13

Ahkáng Ayá Wó Bâng Ô Má Nyi Râ É Hkyô

¹ Yuq hkangmó gi, up é ahkáng ayá wó bâng é a-ô má nyi ra râ nghut lhê; hkâsu mù gà le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byi tô é chyat nghut lhê. ² Hau é yanmai, up é ahkáng ayá lé gumlau toq é sù gi, Garai Gasang byi tô é up é ahkáng ayá lé gumlau toq é sù nghut ri; haú su kut é bang gi, tarâ jéyáng é hui zo râ hkyô lé ho yù nyi é bang nghut akô. ³ Hkâsu mù gà le, uphkan é bang gi, ge é hkyô kut bâng é matú gyuq nán hpo a dut é za, shut shaí hkyô kut bâng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lí? Haú jáng, ge é hkyô kut aq, haú hkûn, yhang, nang lé hkya-on râ nghut lhê. ⁴ Hkâsu mù gà le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhang, nàng, shut shaí hkyô kut é nghut le gi, gyuq nán nyi aq; haí mù gà le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi râ matú nhikmo-yo Su é gunglik nghut lhê. ⁵ Haú mù luí, dam byi râ lé chiq é yanmai za a nghut, yhumsing nhik bô râ é yanmai le, haú up é ahkáng ayá wó bâng é a-ô má nyi râ dut lhê.

⁶ Nungmoq hkansé kat râ é gi, hau é yanmai le nghut lhê; hkâsu mù gà le, haú up é ahkáng ayá wó bang gi, Garai Gasâng é dui-nhâng zoshâng wuî nghut lhê mù, uphkan é mù lé, ahkying bying shoq wùn waq nyi akô nghut ri. ⁷ Yuq hkangmó lé byi âng é eq rajung za byi keq: hkansé kat byi ang sù lé gi, hkansé kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhùm é chyin mai lai luí, hai chyin le hkâdap lhum kó; hkâsu mù gà le, góyuq lé chyitdap é sù

gi, haû jep é tarâ lé lhoq dik bê sù nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"^{*} gâ tô é hkunmó pé eq gotû hkunmó haî nghut nghut, "Náng gûng lé nàng chyitdap é su, náng é chyangnâm mâ é bang lé le chyitdap aq."^{*} gâ é tarâ má lo jup to bê nghut lhê. ¹⁰ Chyitdap myit gi, chyangnâm mâ é byù lé a ge é haî le a kut é nghut lhê. Haû mù luî, chyitdap myit gi, haû jep é tarâ lé lhoq dik é hkyô nghut ri.

¹¹ Haû mù, ahkuî lhê é ahkyíng yàm-yoq lé sê gyo luî, haú hkyô lé kut keq. Nungmoq yhup mui é mai bûn gying râ ahkyíng jé bê; haî mù gâ le, nga-nhúng é hkyi yù hkyô gi, lumjíng hi é hkun lhê htoq má ahkuî je chyáng bê nghut ri. ¹² Haû myín ahkyíng gi, lai byuq ló râ za nghut bê; nyí ahkyíng gi, jé lô berâ nghut lhê. Haû mù luî, mauchut é muzó lé tô pyám mù, maubó é gyehking lé wut to sháng. ¹³ Ye lhaí é eq shuq wut é, ashop é dông gungsho zùm yap é eq shut é dông nyi zô lhúm nau é myit bo é, mabyoq jishûm htoq é eq manon é pé a kut é za, nyí-káng lhê su, ge é a-kyang dông nyi yap sháng. ¹⁴ Hau htoq agó, Yhumsíng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâmyit kó.

14

Gumang Wuî Lé A Jéyáng Râ Hkyô

¹ Lumjíng myit má wum nyhóm sù lé, myíng myo nhô zâ é hkyô pé lé a jéyáng byí é za hap yù keq. ² Byù rayuq é lumjíng myit gi, jung hkanmó zô ri; nghut kôhang, lumjíng myit nyhóm sù gotû rayuq gi, mhan-haq hpoqnoq za zô ri. ³ Jung hkanmó zo sù gi, a zo sù lé a ge wú tiq pyám; jung hkanjung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri. ⁴ Nàng gi, ó yuq wá nghut mù, góyuq é dui-nhâng zoshâng lé jéyáng lhê lú? Yhang, yap ging kôhang, leqbat kôhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haû

Yhumsíng gi, yhang lé wó yap ging nhâng Sù nghut lhê.

⁵ Rayuq myit é gi, buinyi ra-nyí gi, gó nyí htoq je ge lhê gâ ri; dum rayuq myit é gi, nyí wuî rajung za nghut lhê gâ ri. Yuq hkanmó gi, yhumsíng myit yu é lé a úng-âng nyi sháng gaq. ⁶ Buinyi ra-nyí lé, ahkyak lhê ga myit yù sù gi, haû Yhumsíng é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsíng lé bun luî zô nyi ri; a zo sù le, haû Yhumsíng lé bun luî Garai Gasang lé jeju hkya-ôn nyi ri. ⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. ⁸ Nga-nhúng asak dui nyi le gi, haû Yhumsing é matú dui é ru nghut lhê; nga-nhúng shi byuq le gi, haû Yhumsing é matú shi é ru nghut lhê. Haû mù, asak dui nyi kôhang, shi byuq kôhang, nga-nhúng gi, haû Yhumsíng eq sêng é bang nghut lhê.

⁹ Haû su mù, Hkrisduq gi, shi byuq bang eq asak dui bâng é Yhumsíng dut sháng gaq, shi hkám mù dum dui toq é nghut lhê.

¹⁰ Haû mù, nàng gi, haî mù náng é gumang hpó lé jéyáng nyi lhê lú? Haî mù náng é gumang hpó lé wú tiq nyi lhê lú? Nga-nhúng lhunglhâng bang gi, Garai Gasang é tarâ jéyáng tanghkuq hí má yap râ bang chyat nghut lhê. ¹¹ Hkâsu mù gâ le,

"Haû Yhumsíng gi, 'Ngò rû dui nyi é eq rajung za, Ngá é hí má hkyihput hkanmó htuq râ nghut lhê;

Garai Gasang lé, shô hkanmó èq yín yù kó râ nghut lhê.' ga taí ri."^{*}

ga kâ tô ri. ¹² Haû mù luî, nga-nhúng yuq hkanmó gi, yhumsíng kut lai lo é hkyô lé, Garai Gasang chyáng shit ra râ nghut lhê.

¹³ Haû nghut mù, nga-nhúng gi, rayuq eq rayuq tarâ jéyáng lhúm é hkyô lé tô pyám sháng. Ó yuq nghut kôhang, yhumsing é gumang é hkyowuî má, myit leqbat jowò eq htung htê jowò a to byi râ matú, myit sidiq keq. ¹⁴ Haû Yhumsíng Yesuq má nghut nyi é sù ngò gi, haî jung zoshuq nghut kôhang, yhang baú yhang a sansêng a dut é hkyô lé, hkyak wó sé luî, jíng nyi lhê. Nghut kôhang,

^{*} 13:9 Htoq Ló 20:13-15 ^{*} 13:9 Nhong 19:18 ^{*} 14:11 Esai 45:23

ó yuq le, rajung jung lé a sanséng ga myit yu é nghut jáng, yhang é matú, zè haù gi, a sanséng é nghut lhê. ¹⁵ Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shî hkám byi bê sù nghut é, náng é gumang hpó lé, nàng zoshuq é dông mai hkálhoq hten pyám. ¹⁶ Nàng, ge ri nghû myit yu é hkyô lé, agè ashop é dông hkâtaî pyám nhâng. ¹⁷ Hkâsu mù gâ le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí má gabú é hkyô ru nghut lhê. ¹⁸ Haí mù gâ le, shí hkyô dông mai Hkrisduq lé dojaú é sù gi, Garai Gasang ô nau é sù eq byu pè èq hkya-ôn é hui sù nghut ri.

¹⁹ Haù mù luí, nguingón hkyô má nyi râ eq, rayuq eq rayuq wum byi lhum râ hkyô lé, shikut nyi keq. ²⁰ Zoshuq é yanmai, Garai Gasâng é muzó lé hkálhoq hten pyám. Zoshuq lhunglháng gi, sanséng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹ Tsibiyiq wing shuq é eq sho zô é hkyô má nghut kôlhang, gotû haí jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²² Haù mù, haù pé eq séng luí, nàng lumjíng é haí nghut kôle, nàng eq Garai Gasâng gyoro má za joq nyi sháng gaq. Yhumsíng ge lhê gâ é èq, yhumsing gùng yhumsíng mara byi jang a joq é sù gi, hkungsô wó nyi ri. ²³ Nghut kôlhang, úng-âng é myit èq zô é nghut le gi, mara byi é hui ri, haí mù gâ le, yhang zô é gi, lumjíng myit mai a nghut; lumjíng myit mai a kut é haí nghut kôlhang, mara nghut ri.

15

Góyuq Lé Myit Ngón Nhâng Râ Hkyô

¹ Lumjíng hkyô má wum-o bo é nga-nhúng gi, yhumsíng myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byi nyi râ dut lhê. ² Nga-nhúng yuq hkangmó gi, yhumsing é chyangnâm má é su é ge é hkyô dut râ

matú, yhang wó kô myhang lò shoq, yhang lé lhoq ngón byi nyi sháng. ³ Hkâsu mù gâ le, Hkrisduq lháng gi, Yhânggùng yhang lhoq ngón é a nghut; haù gi, "Nang lé rhoi bâng é dang gi, Ngá chyáng gyó ke bê nghut ri."✧ ga, kâ tô é eq rajung za nghut ri. ⁴ Hkâsu mù gâ le, lai lò bê hkùn kâ tô é lhunglháng gi, nga-nhúng lé mhoq byi râ matú chyat kâ tô é nghut lhê; haù gi, Chyúmdang má é hkam jan hkyô eq myit wum byi hkyô dông mai, nga-nhúng myit myoqbyù hkyô wó râ matú nghut lhê.

⁵ Haù hkam jan hkyô eq myit wum byi hkyô lé byi é Garai Gasang gi, nungmoq, Hkrisduq Yesuq é htáng châng nyi é u lé, nungmoq yhangchang rading ralhum za dut é woi-nyí byi sháng gaq; ⁶ haù jáng sheq, nungmoq gi, i-myit rahkat eq nhut htê ralhum èq za, nga-nhúng é Yhumsíng Yesuq Hkrisduq é Yhângwa nghut Sù, Garai Gasang lé, wó hkya-on kungtôn kó râ nghut lhê.

⁷ Haù mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shíngkang lé lhoq htoq shit râ matú, nungmoq le, rayuq eq rayuq hap yu lhum keq. ⁸ Hkâsu mù gâ le, ngò, nungmoq lé tai kôlé, haù myìng hù é íchyí íwâ pé lé byi tô é danggidiq pé lé lhoq ging râ matú, Hkrisduq gi, Garai Gasâng é tengmán hkýo é malaî, Yudaq byu pè é dui-nhâng zoshâng dut bê nghut ri. ⁹ Haù mù, Garai Gasâng é shogyo nhikmyin hkýo é yanmai, haù tûngbaù pé, Garai Gasang lé wó hkya-on kungtôn kó râ nghut lhê. Haù hkyô gi, "Haù mù luí, tûngbaù pé chyáng má, Nang lé, ngò hkya-on râ nghut lhê; Náng é myìng lé, ngò hkya-on mahkôn râ nghut lhê."✧

ga kâ tô é eq rajung za nghut ri. ¹⁰ Dum, "Tûngbaù pé ê, Yhâng é byu pé eq rahá gabú nyi keq."✧

gâ tô ri. ¹¹ Dum,

"Nungmoq tûngbaù pé lhunglhâng bang ê, haù Yhumsíng lé hkya-on keq, byù myù lhunglhâng bang ê, Yhang lé hkya-on mahkôn hkôn keq."✧

gâ tô ashí nghut ri. ¹² Hau htoq agó, Esai-aq taí é gi,

"Yese é Amyit gi, yuq htoq lô luî, Yhang gi, byù myù chângjup é ahtoq má up râ sù nghut lhê; tûngbaù pé gi, Yhang má myit myoqbyù kó râ nghut lhê."[☆]
gâ ri.

¹³ Haù myit myoqbyù hkyô byî é Garai Gasang gi, Yhang lé lumhkau nyi é bang nungmoq lé, gabú hkyô banshoq eq ngu-ingón hkyô lhoq pyíng byi sháng gaq; haù jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyi kó râ nghut lhê.

A Gyuq A Wam É Za, Poluq Laiká Kâ É Hkyô

¹⁴ Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhûm é má kûng é bang nghut é lé, ngá gûng ngò yhang hkyak lumjíng lhê. ¹⁵ Ngò gi, nungmoq lé dum lhoq pûn é dông, ahkyak é pé ra-am lé a gyuq a wàm kâ kat bê nghut lhê. ¹⁶ Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luî, Garai Gasâng èq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tûngbaù pé chyáng, Hkrisduq Yesuq é hpungmû wùn sù dut râ matú, Garai Gasang, ngo lé jeju byî é yanmai nghut lhê.

¹⁷ Haù mù luî, ngò gi, Garai Gasang lé dojaú é hkyô eq séng luî, Hkrisduq Yesuq má nghutbûn nyi lhê. ¹⁸ Ngò gi, ngò taí é eq zui saí é muzó dông le, haù Woi-nyí é a-tsâm chûng mù, kumlhá pé eq laklaí kumlhá pé dông le, tûngbaù pé lé, Garai Gasâng é jìno gyo shoq shuí ú é má, ngo lé Hkrisduq nhang é muzó hkyô lé taí é mai lai luî, gotú haí lé le wám taí é a nghut. ¹⁹ Haù mù luî, ngò gi, Yerusalem wà mó mai Ilurikhkam mau jé shoq é hkyô awui ayàm jam shoq, Hkrisduq é gabú danglù lé hko kyo bê nghut lhê. ²⁰ Ngò hkâ-nhám le myit tuí nyi é hkyô gi, góyuq hi tô é apûn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê. ²¹ Haù gi,

"Yhâng é hkyô lé, taí kyô é a hui shî é bang, myàng kó râ nghut luî, a wó gyô wú é bang, sê gyo kó râ nghut lhê."[☆]

ga kâ tô é eq rajung za nghut ri. ²² Haù mù luî, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn É Hkyô

²³ Nghut kôhang, ahkuî gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, ²⁴ ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haù mai htugbang kat râ lé, ngò myoqbyu tô lhê. ²⁵ Ahkuî, ngò kúm gi, Yerusalem wà mó mâ é sân-yúng bang lé dojaú râ matú, haù wâ shut e ló é hkyolat má nghut nyi lhê. ²⁶ Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri. ²⁷ Yhangmoq gi, haù su kut nau bùm bekô nghut ri, gè gè ga jáng, haù gi, yhangmoq chyín dap tô é dông ru nghut lhê. Hkâsu mù gâ le, haù Yudaq byu pé é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chûng râ chyín dap tô é dông nghut lhê. ²⁸ Haù mù luî, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê. ²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰ Gumang wui ê, ngá é matú Garai Gasâng chyáng kyûdung byî é dông, ngò wum kat yhang shikut é hkyô má nungmoq bo wàng lóm râ matú, nga-nhûng é Yhumsîng Yesuq Hkrisduq eq Woi-nyí é

chyitdap myit é yanmai, ngò, nungmoq lé wum taí tsuq kat lhê. ³¹ Yuda mau mâ é a lumjǐng bǎng chyǎng mai, ngò hkyi yu é wó hui luí, Yerusalem wà mó má ngò wùn waq é muzó lé, haú mâ é sǎn-yǔng bang hap yù gǐng é wó dut rǎ matú kyú bo dung byi keq. ³² Haú jáng sheq, ngò gi, Garai Gasang ô nau é dǒng mai, gabú myit èq nungmoq chyǎng wó jé lé mù, nungmoq eq rahá wum-o wó yú rǎ nghut lhê. ³³ Haú nguǐngón hkyo é Garai Gasang gi, nungmoq banshoq bang eq rahá rú nyi nyi shǎng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng má é hpungtê, nga-nhǔng é gu-nhá Hpobe lé, nungmoq chyǎng shichyen byi kat lhê.

² Nungmoq gi, sǎn-yǔng bang kut gǐng é eq rajung za, haú Yhumsǐng má yhang lé hap yù luí, yhang rǎ tô é hkyô haí nghut kôle, yhang lé htũqbang keq. Hkâsu mù gǎ le, yhang gi, byù myo myo lé le, ngo lé le, gyai yhang garúm lai bê sǔ nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq. ⁴ Yhangnhik gi, ngá é asak é matú, yhangnhik é asak sum rǎ í yhang dut wú kô é nghut mù, ngò za a nghut, tǔngbaù pè é noqkuq hpúng pé banshoq le, yhangnhik lé jeju bǔn lhê.

⁵ Yhangnhik é yhǔm má chǒm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sǎng-hi lumjǐng wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sǔ nghut é Mariq lé bo shi-kyám byi keq.

⁷ Ngò eq rahá htǒng lǔng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sǔ nhik nghut akô.

⁸ Haú Yhumsǐng má, ngò chyitdap é sǔ, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lǔm bê sǔ, Apele lé bo shi-kyám byi keq.

Aristobulu eq sǐng é yhumbyù wui lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haú Yhumsǐng má nghut nyi bê bang, Narkiso é yhumbyù wui lé bo shi-kyám byi keq.

¹² Haú Yhumsǐng má mù zui shikut é myiwê nhik, Truhpena eq Truhposa lé bo shi-kyám byi keq.

Haú Yhumsǐng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haú Yhumsǐng má hkyin yu é hui bê sǔ, Ruhpu lé le, ngá nu dǒng nghut wú bê nghut é Ruhpú é yhǎngnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

¹⁵ Hpilologu, Yulia, Nerea eq yhǎng é nhammó eq, Olumpa, yhangmoq eq rahá nyi é sǎn-yǔng bang banshoq lé, bo shi-kyám byi keq.

¹⁶ Rayuq eq rayuq, chyoiyǔng bopuq é èq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

¹⁷ Gumang wui ê, nungmoq é lumjǐng hkyô má, nungmoq mhoq hkam yù bê nghut é mhoqshit hkyô eq shai lǔm é, gam hkoq hkyô pé eq myit leqbat hkyô pé lhoq htoq é bang lé sidiq keq nghú, wum taí tsuq kat lhê. Yhangmoq lé koi pyám keq. ¹⁸ Hkâsu mù gǎ le, haú sǔ é bang gi, nga-nhǔng é Yhumsǐng Hkrisduq lé dojaú é bang a nghut é za, yhumsǐng é wamdaù matú dojaú é bang nghut akô. Yhangmoq gi, myit nú-nhǎm é bang lé, dang ngón dang nguí dǒng mhaú zô akô nghut ri.

¹⁹ Nungmoq, jìno gyo kô é hkyô lé, yuq hkanmó wó gyo bê nghut ri; haú mù, ngò gi, nungmoq é matú gyai yhang gabú nyi lhê; nghut kǒlhang, ge é hkyô eq séng luí gi, nungmoq hpaqchyí bò mù, agè ashop hkyô eq séng luí gi, nungmoq a bo lòm rǎ lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhông é Yhumsing Yesuq é jeju gi, nungmoq eq rahá nghut nyi sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haû eq rajung za, ngá é buinùm wui Luki, Yason eq Sosipata pé le, shi-kyám dang sang kat akô nghut ri.

²² Laiká shi lé bo ká sù ngò Tertiu gi, haû Yhumsing má nungmoq lé shi-kyám kat lhê.

²³ Ngo lé le, noqkuq hpúng gón lé le, bing hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akô. ²⁴ Nga-nhông é Yhumsing Yesuq Hkrisduq é jeju gi, nungmoq lhunglhang bang eq rahá nghut nyi sháng gaq. Amen.*

²⁵ Byù myû chângiup bang lumjing lui, Yhang é jino gyo sháng gaq ga, a-nham pyat mai haq tô é hui kôlhang, ²⁶ ahkuí, ahtum abyuq é Garai Gasang é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wui é hkyo é shing-rán má cháng lui, ngá é gabú danglù eq Yesuq Hkrisduq é hkyô tai pyo é dông, nungmoq lé wó lhoq ging ting byi é, ²⁷ rayuq za é hpaqchyî bo sù Garai Gasang chyáng, Yesuq Hkrisduq dông mai, hpungwup shingkang gi, ahtum abyuq ru joq nyi sháng gaq ô! Amen.

* **16:24** Chyúmding ra-am má chyumbun 24 shi a bo é nghut lhê.

KORINHTUQ

Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi, ² jowò hkanmó má nga-nhông é Yhumsing Yesuq Hkrisduq é mying lé láng é bang eq rahá, chyoyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq má é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhông é Îwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê. ⁵ Hkâsu mù gâ le, nungmoq gi, Hkrisduq dông mai, nungmoq dang tai é hkyô banshoq eq nungmoq é sumsé hpaqchyí banshoq má je lhoq gumjup é hui bekô nghut ri. ⁶ Haú gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. ⁷ Haú mù, nga-nhông é Yhumsing Yesuq Hkrisduq dum htoq shit râ lé, nungmoq gyai myoqbyu láng nyi é u má, nungmoq gi, woi-nyí hkyô eq séng é chyunghuq haí lé le langhpyut kó râ a nghut. ⁸ Nga-nhông é Yhumsing Yesuq Hkrisduq é buinyi má, nungmoq lé mara hún râ hkyô a bò shoq, Hkrisduq gi, nungmoq lé, htáng shoq gíngtíng nhang nyi râ nghut lhê. ⁹ Nga-nhông é Yhumsing nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhùm É Hkyô

¹⁰ Gumang wui ê, nungmoq hkaú má gam hkoq lhùm é hkyô pé a joq é za, nungmoq é myit eq myit sôn wú é hkyô má gumjup shoq rading ralhüm za dut nyi sháng gaq, nungmoq lhunglhang bang rayuq eq rayuq byin hpyé gohut huí nyi keq nghú, ngò, nungmoq lé, nga-nhông é Yhumsing Yesuq Hkrisduq é mying mai dúng tôngbán kat lhê. ¹¹ Ngá é gumang wui ê, Hkloe é yhùm byù wui gi, nungmoq hkaú má mabyoq htoq hkyô joq é lé, ngo lé hkyáng lo shit akô. ¹² Ngò haú su nghú tai é gi, nungmoq má é rayuq yuq gi, "Ngò gi, Poluq htáng châng lhê." ga, góyuq gi, "Ngò gi, Apolo htáng châng lhê." ga, dum rayuq gi, "Ngò gi, Kehpa htáng châng lhê." ga, dum góyuq gi, "Ngò gi, Hkrisduq htáng châng lhê." ga, tai büm kô é yanmai nghut lhê.

¹³ Hkrisduq gi, gam hkoq é hui bê lú? Ngò Poluq gi, nungmoq é matú tapzing má jén sat é hui bê lú? Nungmoq gi, ngá é mying mai wui-myhup hkâm yù kô é lú? ¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkám byí wú é yanmai, ¹⁵ nungmoq ó yuq le, ngá é mying mai wui-myhup hkâm yù bê nghú a wó tai é nghut mù, ngò, Garai lé jeju hkya-ôn lhê. ¹⁶ (Stehpana é yhumbyù wui lé le, ngò wui-myhup hkám byí é nghut lhê, haú mai lai luí gotú ó lé hkám byí záng ashí laq, ngò a myit bun lo nghut ri.) ¹⁷ Hkâsu mù gâ le, Hkrisduq, ngo lé nhang kat é gi, wui-myhup hkám byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyí byéng-yá dang dông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

Garaí É A-tsam Eq Hpaqchyí Byéng-yá Gi, Hkrisduq

¹⁸ Hkâsu mù gâ le, tapzing má Yesuq shí hkâm é hkyô eq séng é danglù gi, htên byoq hui râ bâng é matú, danggang dut byuq ri; nghut kôlhang, hkyi yu é huí nyi bang nga-nhông é matú gi, Garai Gasang é a-tsam nghut ri. ¹⁹ Hkâsu mù gâ le, Chyúmdang má kâ tô é gi,

"Hpaqchyí bò bâng é hpaqchyí byéng-yá lé,
Ngò lhoq htên pyám râ nghut lhê;

nyan bô bâng é nyan lé, Ngò, ajè dut pyám nhâng râ nghut lhê."[✧]
ga ri.

²⁰ Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang tái kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú? ²¹ Hkâsu mù gâ le, Garai Gasâng é hpaqchyî byéng-yá mai ga jang, mingkan zo wui gi, yhumsing é hpaqchyî byéng-yá đông mai Garai Gasang lé a wó sé kô é yanmai, danggang gâ pyám byi kô é mungdang lé hko kyô é đông lumjîng bang lé hkyi yù râ matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri. ²³ Nghut kôlhang, ngamoq gi, tapzîng má jén sat huí é Hkrisduq é hkyô lé hko kyô lhê. Haù gi, Yudaq byu pé é matú myit leqbat jowò eq tûngbaù pé é matú danggang dut byuq ri. ²⁴ Nghut kôlhang, Garai Gasâng èq ji yù huí é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri. ²⁵ Hkâsu mù gâ le, Garai Gasâng é ngok hkyô gâ é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

²⁶ Gumang wui ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng đông hpaqchyî byéng-yá bo é bang, ahkáng ayá wó é bang, zaugun suwún amyû mâ é bang a myô é nghut lhê. ²⁷ Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan mâ é ngok bang gâ é lé hkyin yu é nghut lhê; Garai Gasang gi, wum bô bang lé hoq lhoq hpu râ matú, mingkan mâ é wum nyhóm bang gâ é lé hkyin yu é nghut lhê. ²⁸ Yhang gi, mingkân èq ahkyak tô é lé lhoq htên pyám râ matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin yu é nghut lhê. ²⁹ Haù gi, ó yuq le, Yhâng é hí má a ge nghut-bun râ matú nghut ri. ³⁰ Garai Gasâng é

yanmai, nungmoq gi, Hkrisduq Yesuq má nghut nyi bekô nghut ri; Hkrisduq gi, nga-nhông é matú, Garai Gasâng chyáng mã é hpaqchyî byéng-yá dut bê nghut ri. Haù gi, nga-nhông é dingmán hkyô, chyoiyúng hkyô eq hkyi yù hkyô nghut ri. ³¹ Haù mù luí, "Gumrong é sù gi, haù Yhumsîng má gumrông sháng gaq."[✧] ga kâ tô é eq rajung za nghut ri.

2

Woi-nyí Mai Lo É Garai Gasâng É Hpaqchyî Byéng-yá

¹ Gumang wui ê, ngò gi, Garai Gasang eq sêng é saksé hkyô lé nungmoq chyáng tái pyô râ matú jé lé é hkûn, dang tái kung é eq hpaqchyî byéng-yá mó bo é đông lé é a nghut. ² Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkanngmó lé tô-myhî pyám râ nghú myit hpyit yù bê nghut lhê. ³ Ngò gi, nungmoq chyáng jé lé é hkûn, wum nyhôm é eq gyai yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyî bo é eq mhuí yu é dang pé đông a nghut é za, Woi-nyí é a-tsâm èq nungmoq lé shit é đông ru nghut mù, ⁵ nungmoq é lumjîng myit gi, byù é hpaqchyî byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit òng bê bang lé hpaqchyî byéng-yá òng nyo lhê; shí pyat lhê é hpaqchyî byéng-yá eq htên byoq nyi huí é shí pyat mã é zaú wui é hpaqchyî byéng-yá òng kúm a nghut. ⁷ Ngamoq tái é gi, haq tô é eq, ahkyíng nghu é lháng a joq shi mai nga-nhông é hpungwup shingkâng é matú Garai Gasang tô to byi é hpaqchyî byéng-yá nghut é, Garai Gasâng é zaú tô é hpaqchyî byéng-yá lé tái é ru nghut lhê. ⁸ Shí pyat lhê é zau wui gi, hpaqchyî byéng-yá haù lé rayuq lháng a sê gyo kó nghut ri; yhangmoq sê gyo kô é ru nghut le gi, hpungwup shingkanng bo é Yhumsîng lé tapzîng má jén sat pyám kó râ a nghut. ⁹ Nghut kôlhang, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri."*

ga kê tô é eq rajung za nghut ri. ¹⁰ Nghut kôlhang, Garai Gasang gi, haú hkyô lé, Yhâng é Woi-nyí dông nga-nhúng lé hpông shit bê nghut ri.

Woi-nyí haú gi, jung hkangmó lé ho gôn wú é nghut luí, Garai Gasâng é zaú tô é hkyô lé lhang ho gôn wú é sù nghut ri. ¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lú? Haú eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹² Nga-nhúng gi, mingkân é woi-nyí lé hap yu tô é a nghut é za, Garai Gasâng èq nga-nhúng lé byí to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq hap yu tô é ru nghut lhê. ¹³ Haú mù luí, ngamoq gi, waxâng zô wui é hpaqchyí byéng-yá èq mhoq byí é dang dông taí é a nghut, Garaí é Woi-nyí èq mhoq byí é dang dông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taí sân kyô é nghut lhê. ¹⁴ Haú Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haú mù gâ le, haú pé gi, yhâng é matú ngok é hkyô nghut luí, woi-nyí hkyô dông mai haú hkyô lé a wú é yanmai, yhang gi, haú pé lé a wó sê gyo nghut ri. ¹⁵ Woi-nyí eq sêng é byù gi, lhunglhang lé wó jéyáng lhê, nghut kôlhang, yhang lé kúm gi, ó yuq èq le wó jéyáng é a nghut. ¹⁶ Chyúmdang má,

"Hkâsu mù gâ le, ó yuq wá, haú Yhumsing é myit lé sé mù, Yhang lé wó mhoqshit wú é lú?"*

ga kê tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhùm É Hkyô

¹ Gumang wui ê, hí hkûn, ngò gi, nungmoq lé, Woi-nyí eq sêng é bang lé dông

wó taí é a nghut; mingkan eq sêng é bang dông nghut kômù, Hkrisduq má zonú su dut bang lé dông sheq taí wú é nghut lhê. ² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.* Ahkuí lhang, nungmoq gi, zoshuq apat lé a wó zo shi kó nghut ri. ³ Nungmoq gi, mingkan eq sêng é bang ru nghut nyi ashí kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wui su nyi yap bum lhê a nghut kó luq? ⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taí nyi bùm kô é nghut jáng, nungmoq gi, mingkan zo wui nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é dui-nhâng zoshâng za nghut luí, ó le ó lé, haú Yhumsing èq hun tô é muzó eq rajung za wùn waq é nghut luí, nungmoq gi, ngá-nhik dông mai wó lumjínng kô é ru nghut lhê. ⁶ Ngò gi, gabú danglù amyui lé hô kat, Apolo gi, wui hpyun byi, nghut kôlhang, yuq kô lò nhang é gi, Garai Gasang za ru nghut lhê. ⁷ Haú mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê. ⁸ Amyui hô kat sù eq wui hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunhuq wó yú kó râ nghut lhê. ⁹ Hkâsu mù gâ le, ngamoq gi, Garai Gasâng é mù zui luzúm wui nghut lhê; nungmoq gi, Garai Gasâng é yò, Garai Gasâng é yhùm nghut nyi akô.

¹⁰ Garai Gasang, ngo lé byí to bê jeju eq rajung za, yhùm saí kung sù rayuq dông, ngò gi, yhùm apûn awang hi to bê nghut lhê; gotû byù gi, hau é ahtoq má saí toq jat nyi é nghut lhê. Nghut kôlhang, yuq hkangmó gi, yhumsing saí é má rago sidiq râ lhê. ¹¹ Hkâsu mù gâ le, hi to gù nghut é, Yesuq Hkrisduq nghu é yhùm apûn awang

* **2:9** Esai 64:4 * **2:16** Esai 40:13 * **3:2** Nungmoq lé naú byi huq é, gâ é gi, lui é hkyô pé lé hí mhoq byí é lé gâ lhê.

mai lai luí, ó yuq le, gotû yhûm apûn awang lé wó saí é a nghut. ¹² Yhûm apûn awang hau é ahtoq má, hîng, ngùn, hpaudap luq-gok pé, sik, mhan, hkowá pé lé chûng mù saí jat kô é nghut jáng, ¹³ yuq hkangmó é muzó hkâsu nghut é hkyô lé lhoq htoq shit é hui râ nghut lhê. Haí mù luí gâ le, haû Yesuq é Buinyì gi, haû lé byu-myàng nhâng mù, haû buinyì lé gi, myí eq lhoq htoq shit râ nghut lhê. Haû myi gi, yuq hkangmó saí é muzó hkasû é nghut é lé chyâm râ nghut lhê. ¹⁴ Rayuq yuq saí é yhûm gi, ru gîng nyi é nghut jáng, haû yuq gi, yhang é shigyaú chyunghuq wó yû râ nghut lhê. ¹⁵ Nghut kôlhang, yhûm haû nyé gyó byuq é nghut jáng, yhang gi, yhûm sûm byuq é hui zo râ nghut lhê; yhang gi, asak lut kôlhang, myishâm mai wó lut é byù su dut râ nghut lhê.

¹⁶ Nungmoq gi, Garai Gasâng é noqkuq yhûm nghut luí, Garai Gasâng é Woi-nyí gi, nungmoq má lúng nyí bê hkyô lé a sé kó lhú? ¹⁷ Rayuq yuq, Garai Gasâng é noqkuq yhûm lé lhoq htên é nghut jáng, Garai Gasang gi, haû yuq lé lhoq htên pyám râ nghut lhê. Hkâsu mù gâ le, Garai Gasâng é noqkuq yhûm gi, chyoiyúng lhê; nungmoq gi, noqkuq yhûm haû nghut akô.

¹⁸ Nungmoq gi, yhumsing gùng yhumsîng hkâlhoq nghoq kó. Nungmoq mâ é rayuq yuq, shí ipyat mâ é byù nyí a-tsáng dông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut râ lhê. ¹⁹ Hkâsu mù gâ le, mingkan shî mâ é hpaqchyí byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri."* ga kê tô é eq rajung za nghut ri. ²⁰ Hau htoq agó, "Haû Yhumsîng gi, hpaqchyí byéng-yá bò bang myit é hkyô pé akôm nghut é lé sê lhê."* ga le kê tô ri. ²¹ Haû mù luí, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê. ²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htàngnùng mâ é hkyô le, banshoq

gi, nungmoq é chyat nghut ri. ²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haû mù luí, byu pé gi, ngamoq lé, Hkrisduq é dui-nhâng zoshâng wui dông eq Garai Gasâng é zaú tô é hkyô pé lé taí pyô râ matú ap byí tô é hui bang dông sôn yù râ lhê. ² Haû dông nghut jáng, ap byí tô é hui bang gi, yhumsîng lhumzui hkyô lé saksé shit râ dut lhê. ³ Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê. ⁴ Haí mù gâ le, ngá gûng ngò mara a bò bûn é nghut kôlhang, haû gi, ngo lé wó lhoq sân-yúng byí é a nghut. Ngo lé jéyáng é sù gi, haû Yhumsîng nghut lhê. ⁵ Haû mù, masat tô é ahkyíng a jé shimá haí lé le a jéyáng é za, haû Yhumsîng jé lé shoq, lánng nyí keq. Yhang gi, mauchut hkaú má haq tô é pé lé byu-myàng nhâng mù, byu pé é myit nhikhlum má lúng é hkyô lé lhoq htoq shit râ nghut lhê. Haû hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lhê.

⁶ Gumang wui ê, ngò gi, "Kê tô é gû mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yù sháng gaq nghû, nungmoq é akyu é matú, ngò eq Apolo má haû pé lé yù mù dangtú kut é nghut lhê. Haû hkûn, nungmoq gi, nghutbûn é dông, rayuq lé gi, wú ko, góyuq lé gi, wú shóm, a kut kó râ nghut lhê. ⁷ Ó yuq wá, nang lé, góyuq eq shaí shoq kut lhê lhú? Nàng hap yu é a nghut le gi, wó râ lhú? Nàng, hap yu é nghut le gi, a hap yu é dông haí mù nghutbûn nyi lhê lhú?

⁸ Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ

lé, ngò hkâ-í yhang ô nau nyi lê ô! ⁹ Nghut kôlhang, sat râ matú doqdan huí é shúm byû pé lé su, Garai Gasang gi, lagyô pé nghut é ngamoq lé de de kut htoq shit bê nghû, ngò wó myit ri. Ngamoq gi, nyi mi-nyì, joq mijoj, maumang lagyô pé eq waxâng zô wui é hí má, wú kûn jung đông dut nhang é huí nyi gù bê nghut lê. ¹⁰ Ngamoq gi, Hkrisduq é yanmai ngok é bang đông sôn yu é hui kôlhang, nungmoq kúm gi, Hkrisduq má hpaqchyî gyaí bo é bang đông dut bekô nhung! Ngamoq gi, wum nyhôm é bang đông sôn yu é hui kôlhang, nungmoq kúm gi, wúm bo é bang đông dut bekô nhung! Nungmoq gi, hkunggâ é huí akô; ngamoq kúm gi, hkunggâ é a hui nhung! ¹¹ Shí hkyíng shí u jé shoq, ngamoq gi, zòmut wuìshit huí é, mebu ajeq amyhâ dut huí é, nhuq bat huí é, yhumsing é nyi jowò a wó é bang nghut nyi lê. ¹² Ngamoq gi, yhumsing loq eq yhang mù zui wum kat nyi lê. Ngamoq gi, nhîng pyâm é hui jáng, shimân byi, zing-rî é hui jáng, jân pyám kut lê. ¹³ Ngamoq gi, lumù gansang é hui jáng, dang ngón dang nguí tû nyo lê. Ngamoq gi, ahkuí jé shoq, myidàm htoq mâ é hpoqkyuq hpoqpyâng eq mingkân é buzaq pé đông sôn yu é huí nyi lê.

¹⁴ Ngò gi, nungmoq lé hoq lhoq hpu râ matú haú pé lé kê é a nghut, ngá é chyitdap zo wuì lé đông lhoq pûn kyíng râ matú ru nghut lê. ¹⁵ Nungmoq gi, Hkrisduq má mhoqshit bang ra mun wó kô é nghut kôlhang, íwâ pé myo shoq wó kô é a nghut; hkâsu mù gâ lé, ngò gi, haú gabú danglù đông mai, Hkrisduq Yesuq má nungmoq é íwa dut é nghut lê. ¹⁶ Haú mù luí, ngò kut é su cháng keq nghû, ngò, nungmoq lé lung kat lê. ¹⁷ Hau é yanmai, ngò gi, haú Yhumsîng má lhumzui sù nghut é, ngò chyitdap é ngá zo đông nghut sù Timohti lé, nungmoq chyáng nhang kat é nghut lê. Yhang gi, Hkrisduq Yesuq mâ é ngá é asak duì hkyô lé, jowò hkangmó mâ é noqkuq hpúng hkangmó lé ngò mhoq byi é eq rajung za, nungmoq lé lhoq pun byi râ nghut lê.

¹⁸ Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbûn byuq bekô nghut ri. ¹⁹ Nghut kôlhang, haú Yhumsîng gyô é nghut jáng, ngò gi, nungmoq chyáng hân za jé lé râ nghut lê; haú hkûn, ngò gi, nghutbûn é byù haú bang haí taí é hkyô lé za a nghut, yhangmoq hai a-tsam wó é hkyô lé le gôn htoq râ nghut lê. ²⁰ Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lê. ²¹ Nungmoq hkâ đông ô nau akô lú? Ngò gi, nungmoq chyáng, nuichûm hkat eq, a nghut jáng, chyitdap é eq nú-nhâm é myit mai lé lô ra râ lú?

5

Ashop É Đông Gungsho Zùm Yap É Hkyô Kut É Sù Lé Lhoq Htoq Pyám Râ Hkyô

¹ Nungmoq chyáng, ashop é đông gungsho zùm yap é hkyô joq é lé, hkyak taí hû lò bekô; haú gi, a lumjîng bâng chyáng lhang a dut wú é hkyô nghut é, yuqgè rayuq gi, yhângwâ é myiwe eq nyi zô lhum nyi é hkyô nghut ri. ² Nghut kôle, nungmoq gi, nghutbûn nyi bum akô nhung! Haú đông a nghut é za, nungmoq gi, yón é myit tûn shit mù, haú su kut é byù lé, nungmoq é hpúng mai lhoq htoq pyâm le, a gè kó lú? ³ Ngò gi, ngá gungdu, nungmoq eq rahá a nyi to kôlhang, ngá é i-myit gi, nungmoq eq rahá nghut nyi luí, gungdu jé nyi tô é đông mai, haú hkyô kut é sù lé jéyâng doqdan gù nghut lê. ⁴ Nungmoq gi, nga-nhûng é Yhumsîng Yesuq é myîng mai zup zing mù, ngá é i-myit gi, nungmoq eq rahá nghut nyi luí, nga-nhûng é Yhumsîng Yesuq é a-tsam le, nungmoq eq rahá nghut nyi é hkûn, ⁵ byù haú yuq lé, Tsadán é loq má ap byi pyám keq.* Haú jáng, Yhumsing é buinyi má, yhâng é woi-nyí gi, hkyi yu é hui râ matú, yhâng é yubak gungsho gi, lhoq htên pyâm é hui râ nghut lê.

⁶ Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé

* **5:5** Tsadán é loq má ap byi pyám keq gâ é gi, hpúng byû wui eq a zùm yap nhâng lo râ lé taí é nghut lê. † **5:6** Mún gâ é gi, yubak mara lé taí nau é nghut lê. Lhoqlhai Poi jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk saí kô é nghut lê.

kó lúhú? ⁷ Nungmoq gi, múnchi a bo é bang nghut nyí kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhúng é Lhoqlhai Poí sauzo, Hkrisduq gi, hkungga nhong é hui bê nghut lhê. ⁸ Haú mù luí, nga-nhúng gi, agè agaú hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyô é muk nghut é, múnchi a bo é muk èq, Poí haú lé kut nyí sháng.

⁹ Ashop é đông gungsho zùm yap é bang eq hkâzùm kó nghú, ngò, nungmoq lé, ngá é laiká má kâ kat byi bê nghut lhê. ¹⁰ Nghut kôlhang, mingkan shí eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó nghú é gi, a nghut. Haú su ru nghut le gi, mingkan htoq shí mai nungmoq htoq ló byuq ra kô râ nghut lhê. ¹¹ Nghut kôlhang, yhânggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lhê nghú, ahkuí, ngò, nungmoq lé kâ kat nau é nghut lhê. Haú sù é byù eq gi, rahá lhang hkâzo kó.

¹² Haú noqkuq hpúng shinggan mâ é bang lé jéyáng râ gi, ngò eq hai sêng lhê lúhú? Nghut kôlhang, hpúng ahkaú mâ é bang lé nungmoq jéyáng râ dut lhê. ¹³ Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haú agè agaú é sù lé, nungmoq chyáng mai lhoq htoq pyám keq."* gâ tô ri.

6

Lumjǐng Bāng Hkaú Má Jéyáng Lhúm É Hkyô

¹ Nungmoq mâ é rayuq yuq gi, gumang góyuq eq dang-rhâng lhúm tô é nghut jáng, haú hkyô lé jéyáng nhâng râ matú, haú sân-yúng bāng é hí má taí râ malaí, Garai a wó bāng é hí má wám taí râ lúhú? ² Haú sân-yúng bang gi, mingkan lé jéyáng râ nghut é hkyô lé, nungmoq a sé kó lúhú? Nungmoq gi, mingkan lé jéyáng râ bang nghut kôle nhing, tiq é mù pé lé wó jéyáng

é bang a nghut kó lúhú? ³ Nga-nhúng gi, maumâng pé lé jéyáng râ nghut é hkyô lé, nungmoq a sé kó lúhú? Haú mù, shí pyat mâ é hkyô pé lé, gè gè yhang wó jéyáng kô râ nghut lhê ô! ⁴ Haú mù luí, nungmoq gi, dang-rhâng lhúm é mù pé joq é nghut jáng, noqkuq hpúng má ahkyak a nghut é bang lé tará agyí kut nhâng kô râ lúhú? ⁵ Ngò, haú su nghú taí é gi, nungmoq lé hoq hpu nhâng râ matú nghut lhê. Lumjǐng bāng chyáng dang-rhâng lhúm é hkyô lé wó jéyáng râ hpaqchyí luq shoq bo é byù, nungmoq chyáng rayuq lhang a nyi dut kô râ lúhú? ⁶ Nghut kôlhang, nungmoq gi, gumang yhangchang rayuq eq rayuq, a lumjǐng bāng é hí má lhang rúng shok lhum akô nhung!

⁷ Nungmoq hkaú má mù jéyáng lhúm é hkyô joq é nghut jáng, nungmoq gi, sum lugù nghut bê. Góyuq èq shut le lhang rú ge lhê a nghut kô lúhú? Mhaú zô é huí le lhang rú gè lhê a nghut kô lúhú? ⁸ Nghut kôle, nungmoq yhang gi, mhaú zo kô é eq shut kô é nghut luí, haú gi, nungmoq é gumang wui lé kut é nghut lhê.

⁹ Agè agaú é bang gi, Garai Gasang é mingdán mâ é shimân jeju a myang hkam yù kó râ nghut é hkyô lé, nungmoq a sé kó lúhú? Hkâ-nâ nyi kó. Ashop é đông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyi zô lhúm é mara kut shut é bang le, ¹⁰ hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasang é mingdán mâ é shimân jeju lé myang hkam yù kô râ a nghut. ¹¹ Nungmoq mâ é ra-am gi, haú su kut kô é bang nghut akô. Nghut kôlhang, nungmoq gi, nga-nhúng é Garai Gasang é Woi-nyí eq Yhumsing Yesuq Hkrisduq é mying mai, mara hkyut san byí é, lhoq sân-yúng é eq chí sân pyám byí é hui bekô nghut ri.

Ashop É Đông Gungsho Zùm Yap É Hkyô

¹² "Jung hkangmó kut râ ahkáng ngò wó lhê." Nghut kôlhang, jung hkangmó gi, akyù byí é a nghut. "Jung hkangmó kut râ ahkáng ngò wó lhê." Nghut kôlhang, haí

jùng èq le ngo lé wó sing pyám râ a nghut. ¹³ "Zoshuq gi, wamdaù é matú nghut mù, wamdau gi, zoshuq é matú nghut ri." ga nungmoq ra-am taí kó râ nghut lhê. Nghut kôlhang, Garai Gasang gi, haù í jùng é lé lhoq htên pyám râ nghut lhê. Gungdu gi, ashop é đông gungsho zùm yap hkyô é matú a nghut é za, haù Yhumsing é matú nghut mù, haù Yhumsing gi, gungdú é matú nghut ri. ¹⁴ Garai Gasang gi, Yhâng é a-tsâm èq, haù Yhumsing lé, shi é mai lhoq dui toq yù bê nghut mù, nga-nhúng lé le lhoq dui toq yù râ nghut lhê. ¹⁵ Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lú? Haù nghut le nhing, Hkrisduq é gungsho showui showang pé lé yù mù, shiwa myhí pé eq rading ralhum za kut pyám nhâng kô râ lú? Hkâ-nhám le a ge dut nhâng! ¹⁶ Shiwa myhí eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lú? Hkâsu mù gâ le, "Yhangnhik gi, gungsho ralhum za dut kô râ nghut lhê."* ga taí tô ri. ¹⁷ Nghut kôlhang, haù Yhumsing eq rading ralhum za dut é sù gi, woi-nyí má Yhang eq ralhum za dut bekô nghut ri.

¹⁸ Ashop é đông gungsho zùm yap é hkyô lé koi pyám keq. Byù rayuq kut shut é gotú mara pé banshoq gi, yhâng é gungdu shing-gan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri. ¹⁹ Nungmoq é gungdu gi, Garai Gasang chyáng mai nungmoq wó yù bê nghut é, nungmoq má lúng nyi é Chyoiyúng Woi-nyí é noqkuq yhùm nghut é lé, nungmoq a sé kô lú? Nungmoq gi, yhumsing gùng lé sing é bang a nghut. ²⁰ Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haù mù luí, nungmoq é gungdú èq, Garai Gasang lé, hkunggâ é hkyô shit nyí keq.

7

Myi Yu É Eq Sêng É Hkyô

¹ Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le

* 6:16 Apùn 2:24

gè ri. ² Nghut kôlhang, ashop é đông gungsho zùm yap é hkyô gyai myô é yanmai, yuqgè hkangmó gi, yhumsing é myiwe wó râ lhê; myiwe hkangmó gi, yhumsing é yuqgè wó râ lhê. ³ Haù yhumsing hpó gi, wò joq é eq rajung za, yhâng yhumsing myhí eq zùm sháng gaq; haù đông za, yhumsing myhí le, yhâng yhumsing hpó eq zùm sháng gaq. ⁴ Haù yhumsing myhí é gungdu gi, yhânggùng yhang za sêng é a nghut, yhâng é yhumsing hpó eq le sêng lhê. Haù eq rajung za, yhumsing hpô é gungdu gi, yhânggùng yhang za sêng é a nghut, yhâng é yhumsing myhí eq le sêng lhê. ⁵ Nungmoq myit huí lhum luí, kyûdùng é má rago ap nóng râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkang é yanmai, Tsadán èq gunglaú é a hui kô sháng gaq, ahkyíng ayoq haù lai jáng, rahá dum zùm keq. ⁶ Ngò, haù su nghú taí é gi, hkunmó hkyô é đông a nghut, ahkáng byí kat é đông ru nghut lhê. ⁷ Byù banshoq bang gi, ngò su nyi râ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasang chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò taí kôlé, ngò su, haù đông jâng nyi pyám kô é nghut le, yhangmoq é matú ge é hkyô nghut ri. ⁹ Nghut kôlhang, yhumsing gùng lé a wó hkang kô é nghut le gi, yhangmoq, myi yù myi ló râ lhê; hkâsu mù gâ le, myi su nyé luí ô nau nyi râ malaí, myi yu myi ló le je ge lhê.

¹⁰ Myi yù bê bang lé, ngò, hkunmó hkyô kôlé, shí gi, ngò đông hkyô é a nghut, Yhumsing chyáng mâ é ru nghut lhê: Yhumsing myhí gi, yhâng é yhumsing hpô chyáng mai a ge gang râ nghut lhê. ¹¹ Nghut kôlhang, yhang gâng é nghut jáng, myi a dum ló é za nyi râ lhê, haù a nghut jáng, yhâng é yhumsing hpó eq dum xox yù râ lhê. Yhumsing hpó le, yhâng é yhumsing myhí lé a ge kâng pyám râ nghut lhê.

¹² Góbang lé ngò shí su nghú taí kôlé, shí gi, Yhumsing chyáng mâ é a nghut, ngò đông mai taí é ru nghut lhê. Gumang rayuq

yuq gi, lumjıng sũ a nghut é yhumsıng myhı wó é nghut le, myiwe haũ, yhang eq rahá nyi nau é nghut jáng, yhang lé a ge káng pyám rá nghut lhê. ¹³ Myiwe rayuq gi, lumjıng sũ a nghut é yhumsıng hpó wó é nghut le, yuqgè haũ, yhang eq rahá nyi nau é nghut jáng, yhang eq a ge gang rá nghut lhê. ¹⁴ Hkâsu mù gâ le, haũ a lumjıng sũ yhumsıng hpó gi, yhang yhumsıng myhı dõng mai lhoq sân-yúng é hui bê nghut mù, a lumjıng sũ yhumsıng myhı le, lumjıng sũ nghut é yhang é yhumsıng hpó dõng mai lhoq san lhoq yúng é hui bê nghut ri. Haũ a nghut jáng, nungmoq é zo wui gi, a sanséng dut kô rá nghut lhê; nghut kôlhang, yhangmoq gi, haũ dõng mai, chyoiyúng bekô nghut ri.

¹⁵ Nghut kôlhang, haũ a lumjıng sũ gâng ló naũ jáng gi, gâng ló sháng gaq. Lumjıng é yuqgè nghut nghut, myiwe nghut nghut, haũ sũ é hkyô pé má gi, hkũm zing tô é hkyô a joq é nghut lhê. Garai Gasang gi, nga-nhúng lé, nguıngón shoq nyi sháng gaq ga ji yù bê nghut lhê. ¹⁶ Yhumsıng myhı ê, náng é yhumsıng hpó lé wó hkyi yù rá nghũ, hkâsu wó sé rá lhú? Yhumsıng hpó ê, náng é yhumsıng myhı lé wó hkyi yù rá nghũ, hkâsu wó sé rá lhú?

¹⁷ Hká dõng nghut kôlhang, yuq hkanqmó gi, Garai Gasang, yhang lé ji yu tô é hkũn, haũ Yhumsıng mai yhang lé nyi nhang tô é dõng asak dui nyi rá lhê. Haũ gi, noqkuq hpúng pé banshoq má ngò tô to byı é tará nghut lhê. ¹⁸ Byù rayuq gi, ji yu é huı é hkũn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sũ dõng a dut byuq sháng gaq. Byù rayuq gi, ji yu é huı é hkũn, ahpyo-kuq hpyit a hkam yu to shı é nghut jáng, ahpyo-kuq hpyit a hkam yù sháng gaq. ¹⁹ Ahpyo-kuq hpyit hkâm hkyô gi, haı ahkyak a nghut; ahpyo-kuq hpyit a hkâm hkyô gi, haı ahkyak a nghut. Garai Gasang é hkunmó pé lé cháng nyi é za sheq ahkyak nghut lhê. ²⁰ Yuq hkanqmó gi, yhang lé Garai Gasang eq ji yu é hkũn lhê su xoq nyi nyi rá lhê. ²¹ Nang gi, ji yù huı é hkũn jùn dut nyi é lhú? Haũ hkyô lé hkâ-myit chiq. Nghut kôlhang, nang

gi, luthkyô wó yu é nghut jáng, haũ dõng nyi aq. ²² Hkâsu mù gâ le, haũ Yhumsıng eq ji yu é huı é hkũn, jùn dut nyi é sũ gi, haũ Yhumsıng eq lhoq lhut yu é byù nghut bê. Haũ eq rajung za, ji yu é huı é hkũn, luthkyô wó é sũ gi, Hkrisduq é jùn nghut ri. ²³ Nungmoq gi, Garai Gasang eq ahpau byi mù wui hpyit yu é hui bê bang nghut akô. Haũ mù, byu pé é jùn hkâdut kó. ²⁴ Gumang wui ê, yuq hkanqmó gi, yhumsıng lé Garai Gasang eq ji yu é huı to bê dõng, Yhang é hí má xoq nyi nyi rá lhê.

²⁵ Ahkuı, zomyi zorâm wui é hkyô taı kôlé. Haũ Yhumsıng chyáng mâ é hkunmó gi, ngò a wó; nghut kôlhang, Yhumsıng é shogyo nhikmyın é yanmai, lumjıng sũ rayuq nghut nyi é dõng, ngò, nungmoq lé hkyô shit rá nghut lhê. ²⁶ Ahkuı hui zô é wuihke hkyo é yanmai, nungmoq gi, yhumsıng nyi to é su xoq nyi nyi le je ge ri nghũ, ngò wó myit ri. ²⁷ Nang, myiháng bê a nghut lhi? Lhoq kang rá hkâda lo. Nang, myi a háng shı a nghut lhi? Myi hkâhó lo. ²⁸ Nghut kôlhang, nang, myiháng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myiháng é bang gi, shı pyat má wuihke hkyô pé myo myo hui kó rá nghut mù, ngò, nungmoq lé haũ mai hkyi yù nau ri.

²⁹ Gumang wui ê, ngò taı nau é lichyúm gi, ahkyıng tot byuq bê nghut mù, ahkuı mai, myi wó é bang gi, a wó é bang dõng nyi kó sháng gaq.* ³⁰ Yón ngaũ huı é bang gi, a huı é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹ haũ mingkan zè pé lé chung é bang gi, haũ pé lé a myit tuı é bang su, nghut kó sháng gaq. Hkâsu mù gâ le, shı mingkan é ahkuı lhê é azòng isâm gi, laı ló nyi é nghut lhê.

³² Ngò gi, nungmoq lé a myit myo nhâng nau. Myi a yù shı é sũ gi, haũ Yhumsıng lé hkâsu wó gabú nhâng rá matú, haũ Yhumsıng é muzó lé myit chiq nyi ri. ³³ Nghut kôlhang, myi yù bê sũ gi, yhang é yhumsıng myhı lé hkâsu wó gabú nhâng rá matú, mingkan shı é muzó eq séng luı myit chiq nyi ri. ³⁴ Haũ mù, yhang shirong é myit gi,

* 7:29 A wó é bang dõng nyi kó sháng gaq gâ é gi, Garaı mù lé je myit zuq nyi sháng gá naũ é nghut lhê.

byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haú Yhumsíng lé rago wó ap nóng rá matú, Yhumsíng é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsíng hpó lé hkâsu wó gabú nhâng rá matú, mingkan shi é muzó eq séng luí myit chiq nyi ri. ³⁵ Ngò, haú su nghú taí é gi, nungmoq é matú ge é hkyô nghut lhê; nungmoq lé tara eq zúí zing é a nghut é za, myit a byò lo shoq Yhumsíng lé wó ap nóng rá matú, jô é đông asak wó duí kô sháng gaq nghu é hkyô ru nghut lhê.

³⁶ Nghut kôlhang, rayuq yuq gi, yhang dúng tô é zomyi gyíng lé a htuk é đông kut nyi é su wó myit ngàm jáng, myiwe haú asak kô lo nyi mù, hâng yù rá dut bê nghú myit é nghut le gi, yhang ô nau é đông kut sháng gaq. Yhang mara kut é a nghut. Yhangnhik gi, hâng lhum rá lhê. ³⁷ Nghut kôlhang, yhang gi, haú hkyô lé yhâng é myit mai wó lhoq zím pyâm é nghut mù, yut yut ô naú hkyô é ahkaú má a nghut é za, yhumsíng ô naú é hkyô lé wó hkúm zing pyâm é sù nghut luí, haú zomyi gyíng lé a hâng yù rá matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸ Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôlhang, zomyi gyíng haú lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsíng hpó rú dui nyi nyi, yhang eq xoq tô ashí nghut lhê. Nghut kôlhang, yhâng é yhumsíng hpó shi byuq é nghut jáng, yhang gi, myi ló rá ahkáng dum wó bê nghut lhê, nghut kôle, haú yuq gi, Yhumsíng eq séng é sù dut rá lhê. ⁴⁰ Ngò jéyáng é đông ga jáng, myi a dum ló é wó nyi le gi, yhâng é matú je gabú hkyô dut rá nghut lhê. Ngò le, Garai Gasâng é Woi-nyí wó sù nghú wó myit ri.

8

Hparà Lhò Lé Tíng Byí É Zoshuq

¹ Ahkuí, hparà lhò pé lé tíng byí é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê. ² Byù rayuq

yuq gi, rajung jung lé sé bûn é nghut le, yhang sé âng é lé lháng a sé shi nghut ri. ³ Nghut kôlhang, Garai Gasâng lé chyitdap é sù gi, Garai Gasâng eq sê é sù nghut ri.

⁴ Haú mù luí, hparà lhò pé lé tíng byí é zoshuq lé zô é eq séng luí gi: hparà lhò gi, mingkan má haí lháng a nghut é hkyô lé le, Garai Gasâng gi, Yhang rayuq mai lai luí gotú a nyi é lé le, nga-nhúng sê lhê. ⁵ Hkâsu mù gâ le, mauhkúng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsíng pé" myo myo nyi kôlhang ⁶ nga-nhúng é matú gi, Íwa nghut é Garai Gasâng rayuq za nyi é nghut mù, lhunglháng gi, Yhang mai hpan é nghut luí, nga-nhúng gi, Yhâng é matú asak dui nyi é nghut lhê. Yesuq Hkrisduq nghu é Yhumsíng rayuq za nyi é nghut mù, lhunglháng gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

⁷ Nghut kôlhang, yuq hkanmó gi, haú hkyô lé sê gam hkoq yu é a nghut. Ra-am gi, ahkuí jé shoq hparà lhò pé má mán byuq kô é yanmai, haú sù é zoshuq lé yhangmoq zô é hkún, hparà lhò lé tíng byí é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri. ⁸ Nghut kôlhang, zoshuq gi, nga-nhúng lé, Garai Gasâng shut shuí chyâng e é a nghut. Nga-nhúng a zô é nghut le gi, je sùm byuq ló é a nghut, zô é nghut le gi, je ge lo é a nghut.

⁹ Haú su ga kôlhang, nungmoq a htung a htê zô é hkyô gi, lumjíng myit wum nyhôm bâng é matú myit leqbat jowò a dut shoq sidiq keq. ¹⁰ Hkâsu mù gâ le, sumsé hpaqchyí wó é bang nungmoq gi, hparà lho é noqkuq yhúm má zô nyi kô é lé, haú myit sôn sê é hkyô má wum nyhôm é sù rayuq yuq myang é nghut jáng, hparà lhò pé lé tíng byí é zoshuq lé, yhang wám zo rá lé wum byí é a dut kó rá lú? ¹¹ Haú mù, Hkrisduq shí hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyí eq lhoq htên pyâm é huí berâ nghut lhê. ¹² Nungmoq gi, haú hkyô đông mai, nungmoq é gumang wui lé mara kut shut é eq, yhangmoq é myit sôn sê é

hkyô wum nyhôm é lé nò nhang é hkûn, Hkrisduq lé mara kut shut é nghut bekô. ¹³ Haû mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhâm le, sho lé a zo lo râ nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lhú? Ngò gi, lagyo rayuq, a nghut lhú? Ngò gi, nga-nhông é Yhumsing Yesuq lé myang wú bê sù, a nghut lhú? Nungmoq gi, haû Yhumsing má, ngò zui saí é muzó é ashi pé chyat, a nghut kô lhú? ² Ngò gi, góbâng chyáng lagyo a nghut kôlhâng, nungmoq chyáng gè gè nghut lhê! Hkâsu mù gâ le, nungmoq gi, haû Yhumsing má, ngò lagyo nghut é hkyô saksé dizik nghut bum akô.

³ Ngá ahtoq má jéyáng bang lé, ngá gûng ngò taí hung kat kôlé. ⁴ Ngamoq gi, zo râ shuq râ ahko ahkáng a wó é bang nghut lhê lhú? ⁵ Gotû lagyo pé eq Yesuq é yhanggu yuqzô pé eq Kehpa kut é su, lumjîng sù nghut é yhumsing myhí shuí chûng râ, ngamoq, ahko ahkáng a wó é nghut lhê lhú? ⁶ Ngò eq Barnaba baú za, asak duì hkyô é matú mù zui ra râ lhú?

⁷ Ó yuq wá, yhumsing zoshuq wùn luí, gyè mù wùn waq râ lhú? Ó yuq wá, tsibiyiq hkyâm saí mù, haû mâ é tsibiyiq shi a zo kut râ lhú? Ó yuq wá, sau rém mù, sau naú a shuq kut râ lhú? ⁸ Ngò gi, shí hkyô pé lé xângzo hkyam dông za taí é nghut lhê lhú? Haû tarâ má le, rajung za taí tô lhê, a nghut lhú? ⁹ Hkâsu mù gâ le, haû Mosheq é tarâ má, "Guq nâng nyi é no lé nhuttsung hkâ-tsûng to byi."* ga kâ tô ri. Garai Gasang gi, no eq séng luí za chiq é nghut lhê lhú? ¹⁰ Gè gè yhang, yhang gi, nga-nhông é matú taí é a nghut kô lhú? Nghut lhê, haû gi, nga-nhông é matú kâ to byí é nghut lhê. Haû mù gâ le, yò hpuq sù, yò hpuq é eq, guq bat sù, guq bat é gi, kyô chôm shú yù râ lé myoqbyù luí, kut kô é nghut lhê. ¹¹ Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shú

yu é nghut jáng, lùm myô é dut byuq bekô lhú? ¹² Góbâng gi, nungmoq chyáng mai garúm é ahko ahkáng wó kô é nghut jáng, ngamoq gi, haû lé je wó râ lhê a nghut kô lhú?

Nghut kôlhâng, ngamoq gi, ahko ahkáng haû lé a yu é nghut lhê. Haû yù râ malai, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê. ¹³ Haû noqkuq yhûm má mù zuí é bang gi, yhangmoq é zoshuq lé haû noqkuq yhûm mai wó é hkyô eq, hkungga gyap má dojaú é bang gi, hkungga gyap má nhông byí é ra-am lé myàng zô é hkyô lé, nungmoq a sé kô lhú? ¹⁴ Haû eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haû Yhumsing hkunmó hkyô to bê nghut ri.

¹⁵ Nghut kôlhâng, ngò gi, ahko ahkáng haû pé haí lé le a yu é nghut lhê. Nungmoq, ngo lé haû su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gâ le, ngò haû su gumrong é hkyô lé, rayuq yuq lhoq htên pyâm byi râ htoq má, ngò shi byuq le lháng je ge ri. ¹⁶ Nghut kôlhâng, gabú danglù lé ngò hko kyô é hkûn, ngò gumrong jang a joq; hkâsu mù gâ le, haû gi, ngò a kut a ge é ngá wô nghut lhê. Haû gabú danglù lé ngò a hko kyô é nghut le gi, ngò dingnyé wó râ nghut lhê. ¹⁷ Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut râ nghut lhê. ¹⁸ Haû mù luí, ngá é shigyaú chyunghuq gi, haí nghut lhê lhú ga jang, haû gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lhê.

¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lhê. ²⁰ Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkûn, Yudaq byù rayuq dông dut nyi lhê. Ngò gi, tarâ hkaû má nyi sù a nghut kôlhâng, tarâ hkaû

* 9:9 Tarâ Pun 25:4

mâ é bang lé shuí lhing yù râ matú, tarâ hkaû má nyi bâng chyáng nghut nyi é hkûn, tarâ hkaû mâ é byù rayuq dông dut nyi lhê. ²¹ Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq dông dut nyi lhê. Nghut kôlhang, gè gè ga jáng, Garai Gasâng é tarâ mai a lut htoq é za, Hkrisduq é tarâ hkaû má nyi sù nghut lhê. ²² Ngò gi, wum nyhóm bang lé shuí lhing yù râ matú, wum nyhóm bâng chyáng nghut nyi é hkûn, wum nyhóm sù rayuq dông dut nyi lhê. Ngò gi, wó dut é hkyô dông mai byù ra-am lé wó hkyí sháng gaq nghú, byù lhunglhang bâng chyáng, byù ajà jà dông nyi nyi lhê. ²³ Ngò gi, gabú danglù mai wó é shimân jeju pé lé wó chôm hkam yù sháng gaq nghú, gabú danglù é yanmai haú pé banshoq lé kut é nghut lhê.

²⁴ Din shingjóng poí má din râ bang banshoq din kôlhang, rayuq za shigyau chyunghuq wó é hkyô lé, nungmoq a sé kô lú? Chyunghuq wó râ matú din keq. ²⁵ Sup poí má shingjóng lhûm é bang yuq hkanmó gi, yhumsing gùng yhumsing tarâ htan é dông lhoq mhân yù râ lhê. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhúng gi, ahtum abyuq gîngtîng nyi râ nghut é janmaú wó râ matú shikut é nghut lhê. ²⁶ Haú mù luí, ngò gi, jum dân din é byù rayuq su din é sù a nghut. Ngò gi, lai lé bat é byù rayuq su, akôm má bat é sù le a nghut. ²⁷ Ngò gi, góbâng chyáng mungdang hko é htâng má, ngá gûng ngò, shigyau chyunghuq eq a gîngdán sù a dut sháng gaq nghú, ngá gûng lé gyai yhang lhoq mhân yù mù, ngá gung lé jùn kut yu nyi lhê.

10

Israellaq Pé É Labaú Mai Sidiq Byí É Hkyô

¹ Gumang wui ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkûn, nga-nhúng é íchyí îwa pé banshoq bang gi, mhutdûm ô má nyi mù, Nhong Nè mai wó lai byit kô é nghut lhê.*

² Yhangmoq banshoq bang gi, mhutdûm eq

Nhong Nè má, Mosheq é chángzô pé dông baptisma hkam yu é bang chyát nghut bekô. ³ Yhangmoq banshoq bang gi, rajung zâ é woi-nyí zang zo kô é eq, ⁴ rajung zâ é woi-nyí wui shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê. ⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

⁶ Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi râ matú nga-nhúng é azòng dut bê nghut ri. ⁷ "Byu pé gi, zùng mù, zo luí shuq luí, a lumjîng bang kut é dông, toq mù, ye bum akô."* ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. ⁸ Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mûn sum hkyîng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut râ nghut lhê. ⁹ Yhangmoq mâ é ra-am gi, haú Yhumsing lé chyâm luí, lhangmui pé èq hte sat é hui bùm kô é su, haú Yhumsing lé, nga-nhúng gi, a ge chyâm râ nghut lhê. ¹⁰ Yhangmoq mâ é ra-am gi, nhutluq shô-myô kôluí, lhoq htên é maumâng eq sat pyâm é hui kô é su, nungmoq gi, nhutluq shô-myô hkâkut kó.

¹¹ Yhangmoq chyáng wú yû râ azòng dông haú pé dut htoq luí, ló htáng râ ipyat pé má nyi âng to bang nga-nhúng é matú sidiq byi râ dông kâ to bê nghut ri. ¹² Haú mù luí, nungmoq gi, yap gîng nyi bê su ngàm kô é nghut jáng, a leqbat râ matú sidiq nyi keq! ¹³ Byu chyáng htoq sê é gunglaú hkyô za nungmoq hui râ nghut lhê. Garai Gasang gi, lhumzui sù nghut lhê mù, nungmoq a wó jân é gunglaú hkyô lé hui nhâng râ a nghut. Nghut kôlhang, nungmoq gunglaú hui é hkûn, Yhang gi, haú lé nungmoq wó jan râ matú, hkyô htong byi râ nghut lhê.

Hparà Lhò Noq Hkyô Lé Koi Pyám Râ

* **10:1** Bun zo ralhûm mai raxê lhum gi, Htoq Ló Laiká má bo é Mosheq htâng cháng bâng é hkyô lé kâ tô é nghut lhê.

✧ **10:7** Htoq Ló 32:6

Hkyô

¹⁴ Haû mù luî, ngò chyitdap é luzúm wui ê, hparà lhô noq hkyô lé koi pyám keq. ¹⁵ Nhik gyíng bang lé ngò taí lhê; ngò haí taí nyi é hkyô lé nungmoq gùng myit sôn yù keq. ¹⁶ Nga-nhúng, jeju bún nyi é jeju góm lé shuq é hkûn, Hkrisduq é sui má chôm zùm bê a nghut kó lhú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kô lhú? ¹⁷ Haí mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gâ le, nga-nhúng banshoq bang gi, haû rahtung zâ é muk lé chôm gâm zô é bang chyat nghut lhê.

¹⁸ Israelaq byu pé é hkyô lé myit wú keq. Haû hkungga lé zô é bang gi, hkungga gyap má chôm lom é bang nghut lhê, a nghut kó lhú? ¹⁹ Hparà lhô, a nghut jáng, hparà lhô lé tîng byí é hkungga gi, rajung jung nghut lhê nghû, ngò taí é lhú? ²⁰ Haû su taí é a nghut, a lumjîng bâng é hkungga gi, Garai Gasang lé nhông byí é a nghut, nat gâng pé lé tîng byí é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê. ²¹ Nungmoq gi, haû Yhumsing é góm lé le, nat gâng pé é góm lé le, ge shuq râ a nghut; nungmoq gi, haû Yhumsing é zangbó má le, nat gâng pé é zangbó má le, rahá ge bo lòm râ a nghut. ²² Nga-nhúng gi, haû Yhumsing lé manôn nhâng nau é bang dut râ a nghut kô lhú? Nga-nhúng gi, Yhâng htoq je wúm bo é bang nghut lhê lhú?

Lumjîng Su É Luthkyô

²³ "Jung hkanmó kut râ ahkáng wó lhê." nghut kôlhang, jung hkanmó gi, akyû wó é a nghut. "Jung hkanmó kut râ ahkáng wó lhê." nghut kôlhang, jung hkanmó gi, byù lé wó kô làm nhang é a nghut.† ²⁴ Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

²⁵ Sho ùng gai má ùng é haí lé lé, ùng-âng é myit èq a myí gôn é za zo keq. ²⁶ Hkâsu mù gâ le, "Myidàm htoq eq haû má joq é jung hkanmó gi, Yhumsing é chyat nghut lhê."✧ gâ tô ri.

²⁷ A lumjîng bang ra-am, nungmoq lé zang zo jì mù, nungmoq ê nau é nghut jáng, ùng-âng é myit èq a myí gôn é za, nungmoq hí má to byí é gû lé zo keq. ²⁸ Nghut kôlhang, rayuq yuq, nungmoq lé, "Shí gi, hparà lhô lé tîng byi bê nghut lhê." ga taí kyô é nghut jáng, nungmoq lé taí kyo su é yanmai le, myit ùng-âng é yanmai le, haû lé hkâzo kó. ²⁹ Ùng-âng é myit haû gi, nungmoq é a nghut, góyuq é ùng-âng é myit lé taí nau é ru nghut lhê. Ngá é luthkyô lé, haí mù góyuq é ùng-âng é myit èq jéyáng é huí nhang lhê lhú? ³⁰ Ngò jeju bún é myit mai bo zo bo shuq yu é nghut jáng, Garai Gasang lé jeju hkyo-on bê nghut é zoshuq hau é yanmai, haí mù lumu pyâm é ngò hui râ lhú?

³¹ Haû mù luî, nungmoq zo kôlhang, shuq kôlhang, haí kut kôlhang, Garai Gasang é hpungwup shingkâng é matú chyat kut keq. ³² Ngò gi, yuq hkanmó lé, hkyô hkanmó má shikut luî myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasang é noqkuq hpúng mâ é byù lé nghut nghut, ó yuq lé le myit hkâleqbat nhâng kó. ³³ Hkâsu mù gâ le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

¹ Ngò gi, Hkrisduq é alik châng é su, nungmoq gi, ngá é alik cháng keq.

Noqkuq É Má Htap Htuk Râ Hkyô

² Nungmoq gi, hkyô hkanmó má ngo lé bún nyi kô é yanmai le, nungmoq lé ngò hai byi bê mhoqshit hkyô pé lé myhik zing nyi kô é yanmai le, ngò, nungmoq lé hkyo-on lhê.

³ Ahkuî, ngò, nungmoq lé sê hkyâng nhâng nau é hkyô gi: yuqgè hkanmó é ulhum gi, Hkrisduq nghut ri; myiwe hkanmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. ⁴ Yuqgè hkanmó gi, kyûdùng le nghut nghut, myiqhtoi htoî le nghut nghut, yhâng é ulhum lé nghop tô é nghut jáng,

† 10:23 Bun zo 23 mã é dangnghe gi, Korinhtuq byu pé lhaq taí é dang nghut lhê. ✧ 10:26 Hkyo-on 24:1

yhâng é ulhûm é aróng lé lhoq hpoi pyâm é nghut bê. ⁵ Myiwe hkangmó gi, kyûdûng le nghut nghut, myiqhtoi htoi le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoi pyâm é nghut bê. Haû gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyám ra râ nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé a nghop to ra râ nghut lhê. ⁷ Yuqgè gi, Garai Gasâng é azông isâm eq hpungwup shingkang nghut é yanmai, yhâng é ulhum lé a nghop râ é nghut lhê. Myiwe kúm gi, yuqge é hpungwup shingkang nghut ri. ⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê. ⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê. ¹⁰ Haû nghut é yanmai le, maumang lagyo pê é yanmai le, myiwe gi, ahko ahkáng kumlhá đông yhâng é ulhum lé nghop râ dut lhê.

¹¹ Nghut kôlhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkangmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyûdûng é gi, htuk kô râ lú? Nungmoq, yhumsing gung é matú doqdân yù keq. ¹⁴ Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle, ¹⁵ myiwe xâm hîng tô é nghut jáng, yhâng é matú hpungwup shingkang nghut é hkyô lé, htunglî eq nungmoq lé mhoqshit lhê, a nghut kô lú? Hkâsu mù gâ le, xâm hîng tô é gi, nghop râ zè đông yhang lé byî tô é nghut lhê. ¹⁶ Rayuq yuq, haû hkyô lé taí dang-rháng nau é nghut jáng, ngamoq chyáng le, Garai Gasâng é noqkuq hpûng pê chyáng le, gotú htunglî a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkyâ-ôn é a nghut. ¹⁸ Sâng-hi má, noqkuq hpûng ralhum đông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut luí, têng é le bò râ nghû, ngò lumjîng lhê. ¹⁹ Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê. ²⁰ Nungmoq rahá zup zîng kô é hkûn, nungmoq gi, haû Yhumsing é myinzang zô é a nghut kó. ²¹ Hkâsu mù gâ le, nungmoq zô é hkûn, góyuq lé le a lánng é za, ó le ó hí yù zô akô. Haû mù, rayuq gi, zo mut huí nyí, góyuq gi, shuq wut to dut akô nghut ri. ²² Nungmoq gi, zo jang shuq jang yhûm a wó bang nghut akô lú? Garai Gasâng é noqkuq hpûng lé wú tiq pyám kô é eq, a wó bang lé hoq hpu nhâng kô é, nghut akô lú? Nungmoq lé ngò hkâsu nghû taí kó râ lú? Haû pê é yanmai, ngò, nungmoq lé hkyâ-on râ lú? Ratsú lhang a wó dut!

²³ Hkâsu mù gâ le, haû Yhumsing chyáng mai ngò wó hap yu é gû lé, nungmoq lé hai byi bê nghut lhê: Haû Yhumsing Yesuq gi, Yhang lé ap pyám huí é myîn má, muk lé yù mù, ²⁴ jeju hkyâ-ôn é htâng má, haû lé myhik hpé mù, taí é gi, "Shî gi, nungmoq é matú Ngá é gungsho nghut lhê; Ngo lé bûn nyí râ matú, shî su kut nyí keq." gâ ri. ²⁵ Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui mâ é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyí râ matú shî su kut keq." gâ taí ri. ²⁶ Hkâsu mù gâ le, nungmoq gi, muk shî lé zo luí, góm shî lé shuq é hkangmó, haû Yhumsing shî hkâm é hkyô lé, Yhang jé lé shoq, shit kyô nyí râ lhê.

²⁷ Haû mù luí, ó yuq nghut kôle, a gingdán é đông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. ²⁸ Haû mù, ó yuq le, muk zo góm shuq râ hí má, yhumsing gung yhumsing

jep wú ra râ nghut lhê. ²⁹ Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhânggùng yhang mara zô bô shuq bo yu é nghut lhê. ³⁰ Haû nghut é yanmai, nungmoq mâ é byù myo myo gi, wum nyhôm é, nòhpyo huí é nghut bum akô. Ra-am gi, shi ló byuq bekô nghut ri. ³¹ Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é hui râ a nghut. ³² Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haû Yhumsing èq jéyáng é hkûn, nga-nhúng gi, mhoqshit é huí nyí gù bê nghut lhê.

³³ Haû mù luí, ngá é gumang wuì ê, nungmoq gi, zo râ nghû rahá zup zîng é hkûn, rayuq eq rayuq láng lhum keq. ³⁴ Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmút é nghut jáng, yhûm má zô chûng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

12

Woi-nyí Hkyô Eq Sêng É Chyunghuq Pé

¹ Gumang wuì ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê. ² Nungmoq gi, a lumjîng bang nghut nyí kô é hkûn lé, dang a nyo é hparà lhô noq râ matú hkyô shuí nghoq é hui kô é hkyô lé, nungmoq sê lhê. ³ Haû mù luí, "Yesuq gi, nhîng pyâm é hui sháng gaq." ga, Garai Gasâng é Woi-nyí mai taí é byù ó yuq le a nyí é eq, haû Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê.

⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê. ⁶ Zui saí é hkyô ajung jung joq lhê, nghut kôlhang, Garai Gasang yhang za, byù lhunghâng bang má, haû pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé byi bê

nghut ri. ⁸ Rayuq lé gi, Woi-nyí haû mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri; ⁹ góyuq lé gi, Woi-nyí hau èq, lumjîng myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haû pé é lichyúm taí sân kyô é ahkáng, byí é nghut ri. ¹¹ Chyunghuq haû pé banshoq gi, Woi-nyí hau èq za kut é loqmú chyat nghut mù, Yhang myit hpyit é đông yuq hkangmó lé haû pé tsing gàm byí é nghut ri.

Gungbun Myo Kôlhang, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haû eq rajung za, Hkrisduq eq le haû đông nghut ri. ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yú bê bang nghut lhê.

¹⁴ Haû gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. ¹⁵ Haû hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

¹⁶ Dum, haû nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁷ Ragùng dú é gi, myoqjí za nghut é nghut jáng, gyô é hkyô gi, hkâmá nghut râ lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhú? ¹⁸ Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê

nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ lúhú? ²⁰ Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹ Haû myoqjí gi, loq lé, "Ngò, nang lé a ra!" nghû a ge taí. Haû ulhum gi, hkyî lé, "Ngò, nang lé a ra!" nghû a ge taí. ²² Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. ²³ Hau htoq agó, hpau a lúm tap râ su myit ngam é gungsho showui showang pé lé, nga-nhúng je hpautap râ lhê. Haû a shit é jung gungsho pé lé, nga-nhúng hpautap é dông rago nghop râ lhê. ²⁴ Nga-nhúng é wó shit é gungsho pé kúm gi, haû hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Haû mù, gungdu má gamhkuí lhûm é hkyô a bo é za, gungsho showui showang pé ralhum eq ralhum, rajung za kut wó myit tê byi lhum kó râ nghut lhê. ²⁶ Haû gungsho showui showang ralhum jamjau huí é nghut jáng, lhum hkangmó bo jamjau râ nghut lhê. Ralhum hpautap huí é nghut jáng, lhum hkangmó bo gabú é nghut lhê.

²⁷ Ahkuí, nungmoq gi, Hkrisduq é gungdu nghut kôluí, nungmoq yuq hkangmó gi, haû é gungsho showui showang pé nghut akô. ²⁸ Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoí pé, súm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuî-u râ chyunghuq wó é bang, laklaí dang ahú hú ge taí é bang lé, masat to bê nghut ri. ²⁹ Banshoq bang gi, lagyô pé nghut lhê lúhú? Banshoq bang gi, myiqhtoí pé nghut lhê lúhú? Banshoq bang gi, mhoqshit bang nghut lhê lúhú? Banshoq bang gi, laklaí kumlhá kut akô lúhú? ³⁰ Banshoq bang gi, nò lhoq ge é chyunghuq wó é nghut lhê lúhú? Banshoq bang gi, laklaí dang ahú hú ge taí lhê lúhú? Banshoq bang gi, dang haû pé é lichyúm ge taí sân kyô lhê lúhú? ³¹ Nghut kôlhang,

nungmoq gi, je gyaú é chyunghuq lé gyai yhang ô nau nyi keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhum shit kôlé.

13

¹ Ngò gi, byu pé é eq maumang lagyô pé é mying pé lé sê taí é nghut kôlhang, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lhê. ² Ngò gi, myiqhtoí htoí é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjéng myit bo é nghut kôlhang, chyitdap myit a bo é nghut jáng, ngò haí a nghut sù dut berá nghut lhê. ³ Ngò gi, wó é sutzè banshoq myùng bang lé byi pyâm é eq, ngá é gungdu lé nyhê pyám râ matú ap pyâm é nghut kôlhang, chyitdap myit a bo é nghut le gi, hai akyû a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê.

⁵ Chyitdap myit gi, hpau a dap é hkyô a kut, yhumsing é akyû baú za a hô, lui za nhikjum a yo, shut é mara a matsing é nghut lhê. ⁶ Chyitdap myit gi, agè ashop é má a gabú é za, haû tengmán hkyô má gabú nyi ri. ⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htúm byuq é a nghut. Myiqhtoí htoí é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyí hkyô gi, laí ló byuq râ nghut lhê. ⁹ Hkâsu mù gà le, nga-nhúng sê é gi, ra-am rahtâng ru nghut lhê. Nga-nhúng myiqhtoí htoí é gi, ra-am rahtâng ru nghut lhê. ¹⁰ Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê. ¹¹ Ngò, zoshâng nghut ashí hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê.

¹² Ahkuí, nga-nhúng gi, myoqjám hkaú má é rago a sân é wupzo lé za myàng é nghut lhê; nghut kôlhang, htâng má, myoqdong hkyùm wó myàng rá nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé rá nghut lhê.

¹³ Ahkuí, lumjínq myit, myit myoqbyù hkyô, chyitdap myit shi sùm lhum myit tô ri. Nghut kôlhang, haú pé má é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklai Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoi é chyunghuq lé je riyhang myit o nyi keq. ² Hkâsu mù gâ le, laklai dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri. ³ Nghut kôlhang, myiqhtoi htoi é sù yuq hkangmó gi, byu pé lé wum byi dang eq nhik tíng dang taí ri. ⁴ Laklai dang rahú nyo é sù gi, yhumsing gùng lé htuqbang byí ri, nghut kôlhang, myiqhtoi htoi é sù gi, noqkuq hpúng lé htuqbang byí ri. ⁵ Ngò gi, nungmoq yuq hkangmó laklai dang ahú hú pé nyò rá lé ô nau ri, nghut kôlhang, nungmoq myiqhtoi htoi rá lé je ô nau é nghut lhê. Hkâsu mù gâ le, laklai dang ahú hú nyo é sù gi, haú noqkuq hpúng lé wó htuqbang rá matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wuì ê, ngò gi, nungmoq chyáng lé je mù, laklai dang pé nyo é nghut kôle, shing-rán nghut nghut, sumpsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq rá lú?

⁷ Htê lhoq htoq é asak a bo jung zè pé má lhang gi, sampyí nghut nghut, tíng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé rá lú? ⁸ Dum, tut htê le

gam hkoq é dông a mut kyô é nghut jáng, majan htoq rá ri ri ó yuq wá hên rá lú? ⁹ Nungmoq chyáng le haú dông nghut lhê. Nang, laklai dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé rá lú? Nungmoq gi, maulat má za taí hâng pyâm nyi kó rá nghut lhê. ¹⁰ Mingkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. ¹¹ Haú mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê. ¹² Nungmoq chyáng le haú dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haú nghut é yanmai, laklai dang ahú hú taí é sù ó yuq le, yhang haú taí é lichyúm wó taí sân kyo sháng gaq, kyûdung rá dut lhê. ¹⁴ Hkâsu mù gâ le, laklai dang ahú hú dông ngò kyûdung é nghut jáng, ngá é woi-nyí mai dúng é nghut lhê; nghut kôlhang, ngá é myitnyân é matú, hai akyû a wó nghut ri. ¹⁵ Haú mù, ngò hkâsu kut rá lú? Ngò gi, ngá é woi-nyí mai le kyûdung rá, ngá é myitnyan mai le kyûdung rá nghut lhê; ngò gi, ngá é woi-nyí mai le mahkôn hkôn rá, ngá é myitnyan mai le mahkôn rá nghut lhê. ¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang má é rayuq gi, nungmoq haí taí é lé a sê é nghut mù, nungmoq jeju hkya-on é hkûn, "Amen" ga hkâsu wó taí rá lú? ¹⁷ Nungmoq gi, ge dik shoq jeju hkya-on kô é abe, nghut kôlhang, góbang gi, htuqbâng é a hui kó nghut ri.

¹⁸ Ngò gi, nungmoq banshoq bâng htoq má laklai dang ahú hú je wó taí é yanmai, Garai Gasang lé jeju bûn ri. ¹⁹ Nghut kôlhang, noqkuq hpúng má, laklai dang rahú dông danghkun ramun ngò taí rá htoq má, góbang lé mhoqshit rá akyû bo é dang ngo hkun taí rá lé ngò je ô nau ri.

²⁰ Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú dông kut mù,

nungmoq myit é hkyô má gi, ko bang đông kut keq. ²¹ Haû jep é tarâ má kê tô é gi, "A wó gyô wú é dang đông mai le, góming byu pê é nhutwuí đông mai le, byû shí bang lé ngò tái râ nghut lhê; nghut kôlhang, yhangmoq gi, ngá dang gyo kó râ a nghut." ga Yhumsing tái ri."*

²² Haû mù, laklai dang ahú hú nyo é hkyô gi, lumjینگ bâng matú kumlhá a nghut é za, a lumjینگ bâng matú sheq ru nghut lhê. Myiqhtoi dang kúm gi, a lumjینگ bâng matú a nghut é za, lumjینگ bâng matú sheq ru nghut lhê. ²³ Haû nghut mù, noqkuq hpúng gón chôm zing mù, yuq hkanmó laklai dang ahú hú nyò kê é nghut jáng, a sê gyô é bang nghut nghut, a lumjینگ é bang nghut nghut, wang lé kê é hkûn, yhangmoq gi, nungmoq nâ bùm bekô ga a tái kó râ nghut lhê lú? ²⁴ Nghut kôlhang, yuq hkanmó, myiqhtoi dang tái nyi é u má, a lumjینگ sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq eq lhoq pûn kyíng é hui râ eq, banshoq eq jéyáng é hui râ nghut é htoq agó, ²⁵ yhang é i-myit má zaú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop lui, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga tái pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haû jáng, gumang wui ê, nga-nhung haí tái râ lú? Nungmoq rahá lé chôm zing é hkûn, yuq hkanmó gi, Garai hkyanon mahkôn nghut nghut, mhoqshit é dang nghut nghut, shing-rán nghut nghut, laklai dang ahú hú nyo é hkyô nghut nghut, tái sân kyô é nghut nghut pé lé, wó le ge ri. Haú pé banshoq gi, noqkuq hpúng lé wum-o byi râ matú chyat kut é dut râ lhê. ²⁷ Rayuq yuq, laklai dang ahú hú nyo é nghut jáng, í yuq eq myô htum sum yuq mai a lai é za, rayuq htang rayuq nyò râ dut é htoq agó, rayuq yuq haû lé tái sân kyo ra râ dut lhê. ²⁸ Tái san kyô é sù a nyi é nghut jáng, laklai dang ahú hú nyo é sù gi, noqkuq hpúng má

zim za nyi râ dut mù, yhanggùng yhang eq Garai Gasang lé za nyò râ dut lhê.

²⁹ Myiqhtoi í yuq nghut nghut, sum yuq nghut nghut tái kyo râ dut lhê; góbang gi, haí tái é lé rago gyô chyam wú râ dut lhê. ³⁰ Nghut kôlhang, zung tô é sù rayuq yuq chyáng shing-rán jé é nghut jáng, hí tái nyi é sù gi, nô byuq râ dut lhê. ³¹ Hkâsu mù gâ le, yuq hkanmó gi, mhoqshit é eq myit wum byí é wó hui kó sháng gaq, nungmoq banshoq bang gi, rayuq htang rayuq myiqhtoi wó htoi é nghut lhê. ³² Haû myiqhtoi pé é woi-nyí pé gi, myiqhtoi pé uphkan é a-ô má nghut nyi ri. ³³ Hkâsu mù gâ le, Garai Gasang gi, atau ahú dut é Garai Gasang a nghut é za, nguingón hkyô é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za, ³⁴ myiwe wui gi, noqkuq hpúng pé má zim za nyi râ dut lhê. Yhangmoq gi, dang tái ahkáng a wó é nghut mù, haû jep é tarâ má bo é eq rajung za a-ô má nyi kó sháng gaq. ³⁵ Yhangmoq gi, rajung jung sé naû kê é nghut jáng, yhum má yhangmoq é yhumsing hpô pé chyáng myi kó sháng gaq; hkâsu mù gâ le, myiwe rayuq noqkuq hpúng má dang tái é gi, ahoq ahí hkyô nghut ri.

³⁶ Haû Garai Gasang é mungdang gi, nungmoq chyáng mai htoq lo é nghut lhê lú? Haû gi, nungmoq chyáng za lé jé bê nghut lhê lú? ³⁷ Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haû Yhumsing é hkunmó nghut é lé, yhang sê yù sháng gaq. ³⁸ Yhang gi, haû lé haí su a ngàm kut é nghut jáng, yhanggùng le, haí su a ngàm kut é hui zo râ nghut lhê.

³⁹ Haû mù lui, ngá é gumang wui ê, myiqhtoi htoi râ lé ô nau nyi mù, laklai dang ahú hú nyo é lé hkâhkum pyám kó. ⁴⁰ Nghut kôlhang, jung hkanmó gi, htuk é đông eq shuq shuq tap tap zâ é hkyô đông kut é dut râ lhê.

15

Hkrisduq É Dui Toq Hkyô

* 14:21 Esai 28:11-12

¹ Gumang wuì ê, ngò, nungmoq lé hko kyo bê nghut mù, nungmoq le hap yù luì, nungmoq yap gíng tô é jowò nghut é gabú danglù hkyô lé, ahkuì, ngò, nungmoq lé lhoq pùn kat nau ri. ² Ngò, nungmoq lé hko kyo bê é mungdang lé, nungmoq ging ging myhik zing nyì kô é nghut jáng, nungmoq gi, gabú danglù hau é yanmai hkyi yù huì é nghut akô. Haù a nghut jáng, nungmoq lumjíng é gi, akôm dut bê nghut lhê.

³ Ngò hap yu tô é pé lé, sâng-hi ahkyak é dông, ngò, nungmoq lé hai byi bê nghut lhê. Haù pé gi: Chyúmdang eq rajung za, Hkrisduq gi, nga-nhúng é yubak marâ é matú shí hkám byi bê gâ é nghut ri; ⁴ Yhang gi, myhup yhúm é hui luì, Chyúmdang eq rajung za sum nyí nghu é nyí má lhoq dui toq é hui bê nghut mù, ⁵ Petruq lé htoq shit luì, haù lagyo raxe í yuq lé le htoq shit ri. ⁶ Hau htâng má, Yhang gi, ra-u má za, gumang wuì ngo shô yuq chyân lé htoq shit ri. Haù bang má é myo hpyang gi, ahkuì jé shoq asak dui nyi bum akô; ra-am kúm gi, shi ló byuq bekô nghut ri. ⁷ Hau htâng, Yhang gi, Yakuq lé htoq shit mù lagyo pé banshoq bang lé htoq shit ri. ⁸ Ló htâng má, Yhang gi, hkù buinyì a jé shí é má hku é dông nghut sù ngo lé le htoq shit bê nghut ri.

⁹ Hkâsu mù gâ le, ngò gi, lagyo pé má é tiq dik sù nghut lhê. Haù Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghu râ lháng a gingdán é sù nghut lhê. ¹⁰ Nghut kôlhang, ngò ahkuì îsu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haù gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹ Haù mù luì, ngò nghut nghut, yhangmoq nghut nghut, ngamoq hko kyô é gi, haù hkyô chyat nghut lui, nungmoq lumjíng é le, haù hkyô nghut ri.

Shi Byuq Bâng É Dui Toq Hkyô

¹² Nghut kôlhang, haù Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq má é ra-am gi, shi byuq bâng é dui toq hkyô a joq nghu, hkâsu wó taí kó râ lú? ¹³ Shi byuq bâng é dui

toq hkyô a joq é ru nghut le gi, Hkrisduq le lhoq dui toq é hui berâ a nghut. ¹⁴ Hau htoq agó, Hkrisduq gi, lhoq dui toq é a huì é ru nghut le gi, ngamoq hko kyô é hkyô eq, nungmoq é lumjíng hkyô gi, akôm dut byuq râ nghut lhê. ¹⁵ Hau htoq agó, Garai Gasang gi, haù Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huì é hkyak a joq é ru nghut le gi, Garai Gasang, Yhang lé lhoq dui toq kat râ a nghut. ¹⁶ Hkâsu mù gâ le, haù shi byuq bang lhoq dui toq é a huì é nghut jáng, Hkrisduq le, lhoq dui toq é hui berâ a nghut. ¹⁷ Hkrisduq gi, lhoq dui toq é a huì é nghut jáng, nungmoq é lumjíng hkyô gi, akôm dut lui, nungmoq gi, nungmoq é yubak mara hkaù má ru nyi nyi shi kó râ nghut lhê. ¹⁸ Haù nghut jáng, Hkrisduq má shi ló byuq bê bang le, htên byoq byuq râ za nghut lhê. ¹⁹ Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.

²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. ²¹ Hkâsu mù gâ le, shí-nò hkyô gi, byù rayuq dông mai lò bê nghut é eq rajung za, shi byuq bâng é dui toq hkyô le, byù rayuq dông mai lo é nghut lhê. ²² Hkâsu mù gâ le, lhunglhâng bang gi, Adam é yanmai shi byuq é su, lhunglhâng bang gi, Hkrisduq eq rading ralhú za nghut é yanmai lhoq dui toq é hui râ nghut lhê. ²³ Nghut kôlhang, yuq hkangmó gi, ó le ó âng é hkùn lhoq dui toq é hui râ nghut lhê: Hkrisduq gi, sâng-hi lhoq dui toq huì é sù nghut lhê. Hau htâng má, Yhang jé lé é hkùn, Yhang eq sêng é bang lhoq dui toq é hui râ nghut lhê. ²⁴ Hau htâng, jihtúm jé râ nghut lhê; haù hkùn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haù Íwa nghut sù Garai Gasang lé mingdán ap byi râ nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyi wang ô má tô pyâm é hkùn jé

shoq up nyi ra ra nghut lhê. ²⁶ Haû lhoq htên pyâm é hui ra nghut é ló htâng é gyê gi, shî-nò hkyô nghut ri. ²⁷ Hkâsu mù gâ le, "Garai Gasang gi, jung hkangmó lé, Yhâng é hkyî wang ô má tô pyâm bê nghut ri."*
gâ Chyúmdang má kê tô ri. "Jung hkangmó lé" Yhâng é a-ô má tô pyâm bê ga taî é hkûn, jung hkangmó lé Hkrisduq é a-ô má tô pyâm bê sù Garai Gasang yhang kúm a lom é hkyô, san za nghut nyi ri. ²⁸ Yhang gi, haû hkyô ban kut é htâng má, haû Zo yhang le, jung hkangmó lé Yhâng é a-ô má to byi bê sù Garai Gasang é a-ô má nyi sù dut nhang é hui ra nghut mù, Garai Gasang gi, lhunglhâng htoq má gyaú sù nghut lui, lhunglhâng lé sîng sù nghut ra nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkâm byi bùm kê é gi, hai akyû bò kó ra lhú? Haû shi byuq bang lhoq dui toq é a hui kê é ru nghut le gi, yhangmoq matú haî mù byu pé wui-myhup hkâm yù kó ra lhú? ³⁰ Ngamoq gi, ngamoq é matú, hkyíng hkangmó haî mù chiq rá jowò má nyi rá lhê lhú? ³¹ Gumang wui ê, ngò gi, nyí wui aluq shoî shoî shi é hui zô é nghut lhê. Haû su nghû é gi, nga-nhûng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. ³² Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò ra lhú? Shi byuq bang lhoq dui toq é a huî é ru nghut le gi,

"Nga-nhúng gi, napmá shî ra nghut é yanmai,

zo sháng, shuq sháng."*

ngghû ra za nghut lhê.* ³³ "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuî nghoq é hkâhui zo kó! ³⁴ Nungmoq gi, tau bûn gyîng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taî é gi, nungmoq hoq bun ra matú nghut lhê.

Dui Toq É Gungdu

³⁵ Nghut kôlhâng, rayuq yuq gi, "Haû shi byuq bê bang, hkâsu kut lhoq dui toq é hui kó rá lhú? Yhangmoq gi, hkasû é gungdu nghut kó rá lhú?" ga myi ra nghut lhê.

³⁶ Haû-í nghâ sù ê! Nang hô hkyô kat é pé gi, shi byuq é za a nghut jáng, yuq htoq lô ra a nghut mhaî. ³⁷ Nang, kyô hkyô é hkûn, yuq lò ra nghut é agâm lé hô hkat e a nghut é za, sungsô amyui nghut nghut, gotû amyui rajung jung nghut nghut lé za hô kat é ru nghut lhê. ³⁸ Nghut kôlhâng, Garai Gasang gi, Yhang myit hpyit to bê eq rajung za haû lé gungdu ralhum byi mù, kyôshi myui hkangmó lé, ó le ô é gungdu byi ri. ³⁹ Gungsho lhunglhâng gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê. ⁴⁰ Mauhkûng gùng pé le joq é nghut lui, myidam gùng pé le joq ri; nghut kôlhâng, mauhkûng gùng pé é shingkang gi, rajung, myidam gùng pé é shingkang gi, gó jung ru nghut lhê. ⁴¹ Haû bui má bo é shingkang gi, rajung, lhamó mâ é gi, gó jung, kyí pé mâ é gi, gó jung ru nghut lhê; kyí racham eq rachâm é shingkang le gotû tû shai lhum lhê.

⁴² Haû mù, shi byuq bê bâng é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut lui, lhoq dui toq huî é gungdu kúm gi, htên byoq a sê é nghut lhê. ⁴³ Hô hkyô kat é hkûn gi, aróng a bò, lhoq dui toq huî é hkûn gi, hpungwup shingkang bo ri. Hô hkyô kat é hkûn gi, wum nyhóm mù, lhoq dui toq huî é hkûn gi, a-tsam bo ri. ⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é huî ri.

Gungsho gungdu joq é nghut le gi, woi-nyí gungdu le joq é nghut lhê. ⁴⁵ Haû nghut mù, "Haû sâng-hi yuq byù Adam gi, asak dui é xângzo dut bê nghut ri."* ga kê tô ri. Haû ló htâng é Adam kúm gi, asak byi é woi-nyí nghut ri.† ⁴⁶ Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haû sâng-hi yuq byù gi, myidam mâ é tseyûn lé saí é nghut

* 15:27 Hkya-on 8:6 * 15:32 Esai 22:13 * 15:32 Dang ngho shî gi, a lumjîng bang taî é dang nghut lhê. * 15:45 Apûn 2:7 † 15:45 Ló htâng é Adam gi, Yesuq lé taî nau é nghut lhê.

mù, htang lھے yuq byù gi, mauhkũng htoq mã é nghut ri. ⁴⁸ Haù myidàm byù nghut sũ su, myidàm eq sêng é bang le nghut nyi akô; haù mauhkũng htoq mã é byù nghut sũ su, mauhkũng eq sêng é bang le nghut nyi akô. ⁴⁹ Nga-nhũng gi, myidàm byù é gunghkyâng isâm lé hkam yù bê nghut é su, mauhkũng htoq mã é byu é gunghkyâng isâm lé le myang hkam yù râ nghut lھے.

⁵⁰ Gumang wuì ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut. ⁵¹ Gyo to keq, zaú tô é hkyô lé, ngò, nungmoq lé taí kyo kôlé: Nga-nhũng banshoq bang gi, shi byuq râ a nghut é za, htaí lھik é hui râ ru nghut lھے. ⁵² Haù gi, ló htâng é tut htê mying é hkũn, ralhap za, myoqkuq ralap má dut râ nghut lھے. Hkâsu mù gâ le, tut htê mying râ nghut lھے, haù hkũn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhũng gi, htaí lھik é hui râ nghut lھے. ⁵³ Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lھے. ⁵⁴ Haù htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkũn sheq, "Shî-nò hkyô gi, ùng budàng èq myui pyâm é hui bê nghut ri."* ga kâ tô é eq,

⁵⁵ "Shî-nò hkyô ê, náng é ùng budàng gi, hkâmá lھú? Shî-nò hkyô ê, náng é nyin gi, hkâmá lھú?"*

gâ tô é sanghkyang gi, dik râ nghut lھے.

⁵⁶ Haù shî-nò hkyo é nyin gi, yubak mara nghut ri; yubak marâ é a-tsam gi, jep é tarâ nghut ri. ⁵⁷ Nghut kôlhang, Garai Gasang lé jeju hkya-ôn lھے! Yhang gi, nga-nhũng é Yhumsing Yesuq Hkrisduq dông mai, nga-nhũng lé ùng budàng byi é nghut ri.

⁵⁸ Haù mù luí, ngá é chyitdap gumang wuì ê, yap gingting nyi keq. Hai èq le, nungmoq lé hkâlhoq dui nũn nhâng kó. Nungmoq gi, haù Yhumsing má nungmoq wùn waq é muzó akôm a nghut é lé sé kô é nghut lھے yanmai, haù Yhumsing é muzó lé ayang wùn waq shikut nyi keq.

16

Yerusalem Wà Mó Mã É Lumjıng Bång É Matú Alu Hkyuí Râ Hkyô

¹ Ahkuí, Garai Gasâng é byu pè é matú alu hkyuí râ hkyô eq sêng luí gi, haù Galatiq mau mã é noqkuq hpũng pé lé ngò kut nhang é su kut keq. ² Ngò jé lé é hkũn, alu hkyuí râ hkyô a kut ra râ dông, bat hkangmó mã é sâng-hi nyi má, yuq hkangmó gi, yhumsing wó ho é má cháng mù, gam tô to lánq keq. ³ Ngò jé lé é hkũn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó mã é dé nhâng râ nghut lھے. ⁴ Ngò le ê ang râ dut é nghut jáng, yhangmoq gi, ngá é byinzùm kut râ nghut lھے.

Poluq Lum Kat É Hkyô Pé

⁵ Ngò gi, Makedoni mau laí byit é htâng, nungmoq chyáng jé lé râ nghut lھے. Hkâsu mù gâ le, ngò gi, Makedoni mau laí byit râ za nghut lھے. ⁶ Ngò hkâmá é kôlhang, ngá é hkyowuì má nungmoq wó garúm kat kó râ matú, ngò gi, rayoq zo nghut nghut, gy-oqmyò lھáng lai shoq nghut nghut, nungmoq eq rahá nyi abe. ⁷ Ngò gi, laí ló uchyang za nungmoq lé lé kum râ nghut mù, ahkuí wó myâng râ lé a nau é nghut lھے; ngò gi, haù Yhumsing dóng é nghut jáng, nungmoq eq rahá rayoq nyi râ lé myit myoqbyu lھے. ⁸ Nghut kôlhang, ngò gi, Penteko-ti poi buinyi jé shoq Ehpesu myuq má nyi râ nghut lھے. ⁹ Hai mù gâ le, ngo lé htıq htıng é bang myo myo nyi é nghut kôlhang, akyú htoq é muzó é matú hkum mó ngo lé hpông to byi é yanmai nghut lھے.

¹⁰ Timohti jé lé jáng, yhang, nungmoq eq rahá nyi é u má, gyuq é hkyô hai le a joq râ matú wú byi keq; hkâsu mù gâ le, yhang gi, haù Yhumsing é muzó lé, ngò su wùn waq wùn é sũ nghut lھے. ¹¹ Haù mù, ó yuq le, yhang lé hkâwú shóm kó. Yhang gi, ngá chyáng wó dum taú jé sháng gaq, yhâng é hkyowuì má nuingón é dông nhang kat keq. Haù gumang wuì eq rahá lò kó râ lé, ngò myit lánq nyi lھے.

¹² Ahkuí, nga-nhũng é gumang Apolo é hkyô eq séng luí ga jang: yhang gi, haù

gumang wuì eq rahá nungmoq chyáng lé râ lé, ngò, gyai yhang wum taì tsuq lhê. Yhang kúm gi, ahkuì lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

¹³ Machya nyî keq; lumjíng hkyô má ging ging tíng tíng yap nyì keq; gyuq kyum myit hkâbô kó; wum bo nyì keq. ¹⁴ Jung hkanmó lé, chyitdap myit eq zui saí keq.

¹⁵ Stehpana eq yhâng é yhumbyù wuì gi, Ahkaia ming má sâng-hi hpúng wâng bang nghut luì, yhangmoq gi, yhumsíng gùng lé, haù sâ-yúng bâng é dojaú hkyô má ap nóng bekô lé, nungmoq sê akô nghut ri. Gumang wuì ê, ngò, nungmoq lé wum taì tsuq kat kôlé, ¹⁶ haù sù é bâng é a-ô má le, haù muzó má bo wang lòm mù, mù zui shikut bang yuq hkanmó é a-ô má le, nyì keq. ¹⁷ Ngò gi, Stehpana, Hportunatu eq Ahkaiku pé jé lo é hkún, gyai gabú é nghut lhê, haì mù gâ le, yhangmoq gi, nungmoq a kut byì é hkyô lé, lhoq pyíng byi bekô nghut ri. ¹⁸ Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haù sù é bang lé, hpautap nyì keq.

Ló Htâng É Shi-kyâm Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhùm má chôm huì é noqkuq hpúng lé, haù Yhumsíng má nungmoq lé gyai yhang shi-kyâm kat akô. ²⁰ Shí má nyì é gumang wuì banshoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq èq shi-kyâm lhum keq.

²¹ Ngò, Poluq gi, shi-kyâm dang shì lé, ngá é loq èq yhang ká é nghut lhê.

²² Rayuq yuq, haù Yhumsíng lé a chyitdap é nghut jáng, haù yuq gi, nhíng pyâm é huì sháng gaq. Yhumsíng ê, jé lé aq hkoi!

²³ Haù Yhumsíng Yesuq é jeju gi, nungmoq eq rahá nghut nyì sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyì sháng gaq. Amen.

KORINHTUQ

Pê Chyáng Htang Dàm Hun Kat é Laiká (2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhông é gumang Timohti le kut, Korinhtuq myuq mâ é, Garai Gasâng é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê: ² Nga-nhông é Íwa nghut é Garai Gasang eq haû Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyî sháng gaq.

Nhik tíng hkyô banshoq é Garai Gasang

³ Nga-nhông é Yhumsîng Yesuq Hkrisduq é Yhângwa eq Garai Gasang, shogyo nhik-myin hkyo é Íwa eq nhik tíng hkyô banshoq é Garai Gasang gi, hkya-on kungton é huî nyî sháng gaq. ⁴ Garai Gasâng chyáng mai ngamoq wó yû bê nghut é nhik tíng hkyo èq, hkasû é wuîhke hkyô hui bang lé le nga-nhông wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byî ri. ⁵ Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik tíng hkyô le byíng mui nyi é nghut lhê. ⁶ Ngamoq, myit myo uhkyî é huî é nghut jáng, nungmoq é nhik tíng hkyô eq hkyi yû hkyo é matú nghut nyi ri; ngamoq, nhik tíng é huî é nghut jáng, nungmoq é nhik tíng hkyo é matú nghut luî, haû gi, ngamoq jamjaû é eq rajung za nghut é jamjau hkyô lé, myit hing é dông mai wó jân pyám râ a-tsam, nungmoq chyáng lhoq htoq byî é nghut lhê. ⁷ Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wuî ê, Asia mau má, wuîhke jamjaû é ngamoq gyai yhang hui zô é hkyô

lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq hpuzô é nghut luî, ngamoq gi, asak duì lo râ lhang a myit myoqbyu lô é nghut lhê. ⁹ Gè gè yhang, ngamoq gi, sat hui berâ nghû, ngamoq é i-myit má lumjîng pyâm é nghut lhê. Nghut kôlhang, haû gi, ngamoq gùng ngamoq a lumhkau é za, shî bê bang lé lhoq duì toq sù Garai Gasang lé lumhkaû râ matú dut é nghut lhê. ¹⁰ Garai Gasang gi, haû sù é shî râ hkyô mai hkyi yû bê nghut mù, ngamoq lé hkyi yû râ za nghut lhê. Yhang gi, ngamoq é matú nungmoq kyûdung byî nyi é u má, xoq luî ngamoq lé hkyi yû râ za nghut lhê nghû, ngamoq gi, Yhang lé myit myoqbyu to bê nghut luî, ¹¹ myo myo kyûdung byî é lé gyo byî é má ngamoq shimân jeju wó mù, byû myo myo gi, ngamoq wó é shimân jeju é yanmai Garai Gasang lé jeju hkya-on kó râ nghut lhê.

Poluq, Hen Tô É Muzó Htaî Pyâm É Lé Tai Hung É Hkyô

¹² Ngamoq nghutbûn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duì bê hkyô lé le, je luî nungmoq eq zùm yap é hkyô lé le, ngamoq é myit sôn sê é hkyo èq, saksé hkám byî é hkyô nghut lhê. Ngamoq haû su kut é gi, mingkan hpaqchyî byéng-yá dông mai kut é a nghut é za, Garai Gasâng é jeju dông mai kut é ru nghut lhê. ¹³ Hkâsu mù gâ le, ngamoq gi, nungmoq a dat nghap é eq a sê gyô é haî le a ká byî kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ram lé wó sê gyô yû bê eq rajung za, haû Yhumsîng Yesuq é buinyi má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.

¹⁵ Haû hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yû kó sháng gaq nghû, ngò gi, nungmoq chyáng hí lé kum râ matú hen to bê nghut lhê. ¹⁶ Ngò gi, Makedoni mau shut e ló é hkyowuî má nungmoq lé hí lé kum mù, Makedoni mau mai nungmoq chyáng dum taû lò luî, Yuda mau shut e é

hkyowuì má, nungmoq, ngo lé garúm kat kó râ lé myit lum to bê nghut lhê. ¹⁷Ngò gi, haú hkyô hen é hkûn, agon za hen hkyut é nghut lhê lhú? Haú a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." nghu é wó tái râ matú, mingkan myit dông hen é nghut lhê lhú?

¹⁸Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut. ¹⁹Hkâsu mù gâ le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasâng é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê. ²⁰Hkâsu mù gâ le, Garai Gasang gi, danggidiq hkâ-myhó to kôle, haú pé gi, Hkrisduq má "Nghut lhê" chyat nghut lhê. Haú mù, Garai Gasâng é hpungwup shingkâng é matú, Yhâng dông mai, nga-nhúng gi, "Amen" nghû tái é nghut lhê. ²¹Ngamoq eq nungmoq lé Hkrisduq má yap gingting nhang é sù gi, Garai Gasang nghut ri. Yhang gi, nga-nhúng lé masat é xù but byi mù, ²²Yhang sing lhê gâ é dizik, nga-nhúng lé htung tap byi lui, jé lô râ hkyô pé hkyak joq lhê nghu é masat zè dông, Yhâng é Woi-nyí lé nga-nhúng é i-myit unghkaú má kat byi bê nghut ri.

²³Ngò gi, nungmoq hkyamsa râ matú, Korinhtuq myuq má a dum taú lé é hkyô têng é lé, ngá é saksé dut râ dông Garai Gasang lé wut dúng lhê. ²⁴Haú gi, nungmoq é lumjúng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chòm zui saí é ru nghut lhê; haí mù gâ le, lumjúng myit mai za nungmoq wó yap gíng nyi bùm kô é ru nghut lhê.

2

¹Haú mù lui, ngò gi, nungmoq lé myit nò nhâng é dut râ dông, lé dum kúm é a kut râ nghû, myit hpyit to bê nghut lhê. ²Hkâsu mù gâ le, nungmoq lé ngò yón kuq nhang é nghut le gi, ngò yón kuq nhang bê bang nungmoq mai lai lui, ó yuq wá

ngo lé wó gabú nhâng râ lhú? ³Ngò jé lé é hkûn, ngo lé gabú nhâng râ âng é bâng èq, ngo lé myit nò nhang é a hui sháng gaq nghû, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak myit lum tô lhê. ⁴Hkâsu mù gâ le, ngò gi, nungmoq lé laiká kâ é hkûn, myit myo uhkyí mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haú gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

Mara Hkyut Byí Lhum Râ Hkyô

⁵Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng lui, ngò gyai wá yhang zuq zuq a tái nau é nghut lhê. ⁶Nungmoq myo hpyâng èq yhang lé mara dam byí é hkyô gi, yhâng é matú gé bê nghut ri. ⁷Nghut kôlhang, ahkuí, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik títng byi keq. ⁸Haú mù lui, nungmoq é chyitdap myit gi, yhang é ahtoq má dum lhoq gíng shit nyí keq nghû, nungmoq lé ngò wum tái tsuq kat lhê. ⁹Ngò, nungmoq lé haí mù laiká ká byí kat é hkyô gi, nungmoq chyam wú huí é hkyô lé wó jân é hkyô eq jung hkangmó má jino gyo hkyô bò a bo é lé, wó sé râ matú le nghut lhê. ¹⁰Nungmoq, rayuq yuq lé mara hkyut byí é nghut le gi, ngò le, haú yuq lé mara hkyut byí lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ung râ matú, nungmoq é yanmai, Hkrisduq é myoq hí má ngò mara hkyut byi bê nghut lhê. ¹¹Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹²Ngò gi, Hkrisduq é gabú danglù hko kyo râ matú, Troa myuq má é jé é hkûn, haú Yhumsing gi, ngo lé hkum hpóng byí é lé, ngò myang ri. ¹³Nghut kôlhang, ngò gi,

ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq e ló é nghut lhê.

¹⁴ Nghut kôlhang, Hkrisduq má, ngamoq lé hkâ-nhám le ûng budang hkyô shut shuî-û yù mù, Hkrisduq lé sê é sumsé hpaqchyi é nam ngón shôm lé, ngamoq dông mai jowò hkangmó má tai pyo é sù, Garai Gasang gi, jeju hkya-ôn é huí nyi sháng gaq. ¹⁵ Hkâsu mù gâ le, ngamoq gi, hkyi yu é huí nyi bâng chyáng le, htên byoq ló é huí nyi bâng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶ Ngamoq gi, htên byoq nyi bâng é matú shî-nò hkyô é shôm dut mù, hkyi yù huí nyi bâng é matú nghut jáng, asak hkyô é nam ngón shôm dut é nghut lhê. Haú mù, ó yuq wá muzó shî eq htuk râ lú? ¹⁷ Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé dông lhumzui myit mai tai é nghut lhê.

3

¹ Ngamoq gi, yhumsing gùng yhumsing dum owaq hi ló é nghut lhê lú? Byù ram kut é su, nungmoq chyáng, ngamoq é matú htuqluq htuqbang laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? ² Nungmoq gùng yhang gi, ngamoq é myit nhiklhum má kâ tô é, yuq hkangmó eq nghap luí sê yu é laiká gùng pé nghut akô. ³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng má é laiká nghut kô é hkyô lé shit nyi akô. Haú gi, kâ jung chí eq kâ tô é dông a nghut é za, rû dui nyi é Garai Gasâng é Woi-nyí eq kâ tô é nghut é htoq agó, luqlong pé má kâ tô é dông a nghut é za, xângzo byu é myit nhiklhum long pé má kâ tô é ru nghut lhê.

⁴ Haú su nghû hkyak wó myit lum é hkyô gi, Garai Gasâng é hí má, Hkrisduq dông mai ngamoq wó yu é nghut lhê. ⁵ Ngamoq gi, yhumsing gùng haí lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê. ⁶ Yhang gi, ngamoq lé, dangshikaq asik lé wó wùn

waq râ a-tsam byi bê nghut ri. Dangshikaq asik haú gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dâm byi lhê, Woi-nyí kúm gi, asak byí é nghut lhê.

Dangshikaq Asik É Hpungwup Shingkang

⁷ Ahkuî, haú Mosheq é myoqdong mâ é hpungwup shingkang é yanmai, haú Israellaq byu pé gi, yhâng é myoqdong lé a wó wú tsuq to kó nghut ri. Hpungwup shingkang haú shûm lo byuq sê é nghut kôlhang, luq-long má dok kâ tô é, shî-nò hkyô lhoq htoq é tarâ muzó gi, hpungwup shingkang eq rahá jé lé é nghut lhê. ⁸ Haú su nghut jáng, haú Woi-nyí é muzó gi, hpungwup shingkang je riyhang dut râ a nghut kó lú? ⁹ Gè gè yhang, haú byù lé mara byí é tarâ muzó lhang, hpungwup shingkang bo é nghut le gi, dingmán nhang é hkyô sik gi, je riyhang hpungwup shingkang bo é nghut lhê ô! ¹⁰ Hkâsu mù gâ le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri. ¹¹ Shum byuq ló é tarâ lhang gi, hpungwup shingkang eq rahá lé jé bê nghut le gi, ru gíng nyi é dangshikaq asik é hpungwup shingkang gi, je riyhang gyaú râ nghut lhê ô!

¹² Haú mù luí, ngamoq gi, haú sù é myoqbyù hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haú Israellaq byu pé haú lé a wú tsuq râ matú, yhâng é myoqdong lé myoqgo eq nghop pyâm é sù nghut ri. ¹⁴ Nghut kôlhang, yhangmoq é myit gi, lhoq chut byí é hui bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nghut ri. Haú gi, huí sêng pyâm é a hui shi, haí mù gâ le, Hkrisduq dông za haú lé wó yu pyâm é nghut lhê. ¹⁵ Hkû-nyí jé shoq lhang, Mosheq é laiká lé nghap é hkûn, yhangmoq é myit nhiklhum má myoqgò eq nghop tô é nghut ri. ¹⁶ Nghut kôlhang, ó yuq le, Yhumsing chyáng hká u lîng lò kôlhang, haú hkûn jáng, myoqgò gi, hî pyám byí é hui râ nghut

lê. ¹⁷ Yhumsîng gi, haû Woi-nyí nghut mù, Yhumsing é Woi-nyí nyi é jowò má, luthkyô le joq lê. ¹⁸ Haû Yhumsîng é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi hkyô nghut é, Yhâng é isâm shut htaí lhik wang é huí nyi bê nghut lê. Haû hkyô gi, haû Woi-nyí nghut sù Yhumsîng chyáng mai lo é nghut lê.

4

Tseyam Pé Má Bo É Sutzè

¹ Ngamoq gi, Garai Gasâng jeju mai muzò hkyô haû wó é nghut mù, myit wum a gyuí é nghut lê. ² Ngamoq gi, zaú tô é eq hoq htoq é hkyô pé lé tô pyám luí, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lê. Haû su kut râ malaí, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkgangmó é myit sôn sê é hkyô má, yhumsing gùng yhumsîng htuk shoq nyi lê. ³ Ngamoq é gabú danglù gi, myoqgo eq nghop pyám é huí é nghut jáng, haû gi, htên byoq nyi bâng chyáng za nghop pyám huí é ru nghut lê. ⁴ Haû Garai Gasâng é azòng isâm nghut sù, Hkrisduq é hpungwup shingkang bo é gabú danglù é maubó lé, a lumjîng bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri. ⁵ Haû nghut é yanmai, ngamoq gi, yhumsing gùng eq séng luí hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lê! ⁶ Hkâsu mù gâ le, "Mauchut hkaû mai maubó htoq lô sháng gaq."* ga taí é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkang é maubó lé sê gyô é nyan lé, nga-nhúng lé byí é dông, Yhâng é maubó lé, nga-nhúng é i-myt unghkaû má duqbó nhâng bê nghut ri.

⁷ Nghut kôlhâng, ngamoq gi, sutzè haû bo é tseyam pé† nghut nyi lê. Haû gi,

gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô lé tûn shit râ matú nghut lê. ⁸ Ngamoq gi, wuîhke hkyo eq lûnghkyuq mai gyai yhang nhê zik é huí kôlhâng, a gyop byuq é nghut lê; myit lhoq nhúng pyám é huí kôlhâng, myit a htâm byuq é nghut lê; ⁹ zing-rí é huí kôlhâng, kâng pyám huí é a nghut; bat lhêng pyám é huí kôlhâng, htên byoq huí é a nghut. ¹⁰ Haû Yesuq é asak duí hkyô le, ngamoq é gungdu má lhoq htoq shit é huí sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wùn é nghut lê. ¹¹ Hkâsu mù gâ le, Yesuq é asak duí hkyô gi, nga-nhúng é shî sê é gungdu má lhoq htoq shit é huí sháng gaq nghû, asak duí nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyám é huí nyi ri. ¹² Haû mù luí, shi byuq hkyô gi, ngamoq má mù zuí nyi ri; asak duí hkyô kúm gi, nungmoq má mù zuí nyi é nghut ri.

¹³ "Ngò gi, lumjîng bê nghut lê, haû mù, ngò taí é nghut lê."* ga kâ tô é eq rajung za, ngamoq le, lumjîng hkyô hau eq yhang, lumjîng bê nghut mù taí é nghut lê. ¹⁴ Haû mù gâ le, haû Yhumsîng Yesuq lé shi é mai lhoq dui toq é Sù gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuî jé râ nghut é lé, ngamoq sê lê. ¹⁵ Haû jeju wó é byu pé gi, je riyhang myô jat lò mù, Garai Gasâng é hpungwup shingkang é matú, jeju hkya-ôn é hkyô gi, byíng mui nyi sháng gaq ga, haû pé banshoq gi, nungmoq é akyu é matú nghut nyi ri.

¹⁶ Haû mù luí, ngamoq gi, myit wum a gyuí é nghut lê. Ngamoq é shinggan gungdu gi, htên byoq ló nyí kôlhâng, i-myt unghkaû gi, ra-nyí eq ra-nyí asik dut nhang é huí nyi ri. ¹⁷ Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haû pé htoq gyai hkik é ahtum abyuq é hpungwup shingkang lé, wó yú nhang ri. ¹⁸ Haû mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq

* 4:4 Ipyat shi é garai gâ é gi, Tsadán lé gâ é nghut lê. wum nyhôm é gungdu lé gâ é nghut lê.

* 4:6 Apûn 1:3 † 4:7 Tseyam pé gâ é gi, nga-nhúng é

☆ 4:13 Hkya-on 116:10

nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhkûng Htoq Mã É Yhûm

¹ Haû myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq eq saí é a nghut é za, mauhkûng htoq má joq é ahtum abyuq é yhûm* nghut é, Garai Gasâng chyáng mã é yhûm lé, nga-nhúng wó é hkyô lé, nga-nhúng sê lhê. ² Nghut kôlhang, ahkuí, nga-nhúng gi, nga-nhúng é mauhkûng yhûm lé tû hut byí é lé gyai yhang hui naû mù, nò-kying su kyíng nyi lhê. ³ Haí mù gâ le, nga-nhúng gi, hut byí é hui jáng, gungdu a bò bang a dut lo rà nghut lhê. ⁴ Hkâsu mù gâ le, nga-nhúng gi, zúm shí má lúng nyi é u lé, wôlai wùn mù, nò-kying su kyíng nyi lhê; haû gi, shí byuq sê é lé, asak dui é eq wó htaí lhik pyám sháng gaq nghû, nga-nhúng gi, a hut byí é hui rà lé a ô nau é za, nga-nhúng é mauhkûng yhûm lé tû hut byí é hui rà lé ô nau é yanmai nghut lhê. ⁵ Ahkuí kúm, jeju haû hkam yù rà matú, nga-nhúng lé lajàng to byí é sù gi, Garai Gasang nghut mù, jé lô rà hkyô gi, hkyak joq lhê nghû é masat zè đông, nga-nhúng lé haû Woi-nyí byi bê nghut ri.

⁶ Haû mù luí, ngamoq gi, hkâ-nhám le hkyak lum tô lhê. Gungdu shí má yhûm đông ru lúng nyí nyí gi, haû Yhumsing eq wê gâng nyí ashí nghut é lé ngamoq sê nyi lhê. ⁷ Ngamoq gi, byu-myang é đông mai a nghut é za, lumjing myit mai asak dui é ru nghut lhê. ⁸ Ngamoq gi, hkyak myit lum tô lhê nghû, ngò taí lhê, haû mù, gungdu shí mai wê gang luí, haû Yhumsing eq rahá nyí rà lé ngamoq je riyhang ô nau é nghut lhê. ⁹ Haû mù, ngamoq gi, gungdu shí má yhûm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng rà matú nghut lhê. ¹⁰ Hkâsu mù gâ le, yuq hkangmó gi, gungdu shí má yhûm đông lúng nyi é u lé, ge é nghut nghut, a ge

é nghut nghut, kut é eq rajung za hkam yù rà matú, Hkrisduq é tarâ jéyáng tanghkuq hí má, nga-nhúng banshoq bang htoq shit ra rà nghut lhê.

Nguingón Hkyô Xoq É Muzó

¹¹ Haû mù, Yhumsing lé gyuq hkungga rà hkyô haí nghut é lé ngamoq sê é nghut luí, ngamoq gi, byu pé lé taí pún kyíng shikut lhê. Ngamoq haí nghut é gi, Garai Gasâng chyáng san za nghut nyí mù, nungmoq é myit sôn sê é hkyô má le san za nghut rà lé, ngò myit lum lhê. ¹² Haû myit nhiklhum má bo é lé gumrông rà malaí, byu-myang é lé gumrong é bang lé, nungmoq wó tû taí kó sháng gaq nghû, ngamoq gi, nungmoq chyáng yhumsing gung lé dum owaq shikut é a nghut é za, ngamoq é hkyô lé, nungmoq wó gumrông rà ahkáng, nungmoq lé byí é ru nghut lhê. ¹³ Ngamoq a gyíng é đông nghut le gi, Garai Gasâng é matú a gyíng é nghut lhê; ngamoq gyíng é đông nghut le gi, nungmoq é matú gyíng é nghut lhê. ¹⁴ Hkâsu mù gâ le, Hkrisduq é chyitdap myit eq ngamoq lé kut nhang nyi é nghut lhê. Haû gi, banshoq bâng é matú rayuq shí hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lhê. ¹⁵ Yhang gi, asak dui nyi é bang, yhangmoq yhumsing gung é matú a duí lô é za, yhangmoq é matú shí hkám byi luí, lhoq dui toq é huí Su é matú duí kó sháng gaq ga, banshoq bâng é matú shí hkám byi bê nghut ri.

¹⁶ Haû mù, ngamoq gi, ahkuí mai, ó yuq eq séng luí le, mingkan hkyam đông mai a wú lô é nghut lhê. Ngamoq gi, hí hkûn Hkrisduq lé haû đông wú é nghut kôlhang, haû su hkâ-nhám le a kut lô é nghut lhê. ¹⁷ Haû nghut mù luí, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haû axau gi, byuq byuq mù, lhunglhang asik dut bu-nhung! ¹⁸ Haû pé banshoq gi, Garai Gasâng chyáng mã é chyat nghut lhê. Yhang gi, Hkrisduq đông mai nga-nhúng lé Yhànggung eq nguingón hkyô xoq yù luí, nguingón hkyô xoq é muzó ngamoq

* 5:1 Mauhkûng htoq má joq é ahtum abyuq é yhûm gâ é gi, nga-nhúng, mauhkûng mingdán má jé é hkûn wó rà gungdu asik lé gâ é nghut lhê.

lé byi bê nghut ri. ¹⁹ Haû gi, Garai Gasang gi, byu pê é mara lé a matsing byi é za, Hkrisduq dông mingkan lé Yhânggùng eq nguingón hkyô xoq yû bê nghut luî, Yhang gi, nguingón hkyô xoq yu é mungdang haû lé, ngamoq lé ap byi to bê nghû nau é nghut lhê. ²⁰ Haû mù luî, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pûn kyíng nyi é nghut lhê. Garai Gasang eq nguingón hkyô xoq yû keq nghû, ngamoq gi, Hkrisduq é gunglik dông nungmoq lé dúng tôngbán nyi lhê. ²¹ Nga-nhúng gi, Hkrisduq dông mai Garai Gasang é dingmán bang wó dut kó sháng gaq ga, Garai Gasang gi, yubak mara a bò Sû lé, nga-nhúng é matú yubak mara hkungga dut nhâng bê nghut ri.

6

¹ Ngamoq gi, Garai Gasang é mù zui byinzùm wuî nghut nyi é eq rajung za, Garai Gasang jeju lé akyû a bo é dông hkâhap yû kó nghû, nungmoq lé wum taî tsuq kat lhê.

² Hkâsu mù gà le,

"Ngò ô nau é ahkyíng má, nang lé ngò gyo byi bê nghut mù, hkyi yû hui râ buinyi má, nang lé ngò garúm bê nghut lhê."*

ga luî, Yhang taî ri. Ngò, nungmoq lé taî kyo kôlé, ahkuî gi, Garai Gasang ô nau é ahkyíng, ahkuî gi, hkyi yu é buinyi nghut ri.

Poluq É Wuîhke Hkyô Pé

³ Ngamoq é hpungmû gi, taî hpoî pyâm é a hui sháng gaq nghû, ngamoq gi, ó yuq é hkyô má le, leqbat jung a to byi é nghut lhê. ⁴ Haû kut râ malaî, ngamoq gi, Garai Gasang é dui-nhâng zoshâng wuî nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuîhke hkyô pé má le, myit myo uhkyí hkyô pé má le shit nyi lhê. ⁵ Nhuq bat huî é pé má le, htóng lúng huî é eq toq gabyông é má htím é huî é má le, mù zui shikut é má le, a myang yhup é myín pé má le, zòmut huî é má le, shit nyi lhê. ⁶ Sân-yúng é má le, sê gyô é hkyô má le, myit hing é eq myit

ge é má le, Chyoiyúng Woi-nyí eq chyitdap myit akying má le, ⁷ tengmán é mungdang hko é má le, Garai Gasang é a-tsam má le, loqyò loqpai má dingmán hkyô nghû é laknak pé dông le, shit nyi lhê. ⁸ Hpungwup shingkang byi é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang taî kôle, shit nyi lhê. Ngamoq gi, tengmán kôlhâng, mhaú zo bang dông sôn yu akô nghut ri. ⁹ Ngamoq lé sé kôlhâng, a sê é dông kut akô nghut ri; shi ló nyi kôlhâng, rû dui nyi é bang nghut lhê; nhuq bat é hui kôlhâng, sat pyâm é a hui shí é bang nghut lhê. ¹⁰ Yón hkyô byíng nhâng kôlhâng, hkâ-nhám le gabú nyi lhê; myùng kôlhâng, byù myo myo lé wó sùt nhang nyi lhê; haî le a wó kôlhâng, jung hkangmó lé sing é dông nghut lhê.

¹¹ Korinhtuq bang ê, ngamoq gi, nungmoq lé san za taî bê nghut luî, ngamoq é myit nhikhum lé, nungmoq é matú làm shoq hpông to byi bê nghut lhê. ¹² Ngamoq gi, ngamoq é chyitdap myit lé, nungmoq chyáng mai lêng taû yu nyi é a nghut, nungmoq sheq, ngamoq chyáng mai lêng taû yu nyi kô é ru nghut lhê. ¹³ Nungmoq le, myit nhikhum lé làm shoq dum taû hpóng keq nghû, ngò gi, ngá zô pé lé dông taî lhê.

A Lumjíng Bang Eq A Nhunghkut Râ Hkyô

¹⁴ A lumjíng bang eq rahá kandang hkâwaq kó. Hkâsu mù gà le, dingmán é hkyô eq agè ashop é hkyô gi, haî sêng lhum lhê lú? Maubó eq mauchut gi, hkâsu wó zùm yap kó râ lú? ¹⁵ Hkrisduq eq Beliala* gi, hkâsu kut myit wó huî lhum kó râ lú? Lumjíng sù rayuq eq a lumjíng sù gi, hkâsu wó pung lhum kó râ lú? ¹⁶ Garai Gasang é noqkuq yhûm eq hparà lhô pé gi, hkâsu wó hùm râ lú? Hkâsu mù gà le, nga-nhúng gi, rû dui nyi é Garai Gasang é noqkuq yhûm nghut lhê. Haû gi, "Ngò gi, yhangmoq eq rahá nyi mù, yhangmoq chyáng sô nyi râ nghut luî, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê."* ga Garai Gasang taî tô é eq rajung za nghut ri.

* 6:2 Esai 49:8 * 6:15 Beliala gà é gi, Tsadán é myíng rajà nghut lhê. * 6:16 Nhung 26:12; Yer 32:38; Ezk 37:27

17 "Haù mù luí, yhangmoq chyáng mai htoq lô mù, gotú san za nyì keq. A sansêng é zè lé hkâzáng kó, haù hkùn, Ngò, nungmoq lé lhom hap yù rà nghut lhê."✠

ga haù Yhumsing taí ri.

18 "Ngò gi, nungmoq é Íwa dut mù, nungmoq gi, Ngá é byizo yuqzô pé dut kó rà nghut lhê."✠

ga haù wum-o a-tsam dik shoq bò Sù Yhumsing taí ri.

7

1 Chyitdap é luzúm wuì ê, nga-nhúng gi, danggidiq haù pé lé wó tô é bang nghut é yanmai, gungdu eq woi-nyí lé agot a-ù dut nhang é jung hkangmó mai, yhumsing gùng yhumsing lhoq sân-yúng yù luí, Garai Gasang lé gyuq hkunggâ é myit èq chyoiyúng hkyô má lhoq gumjup yu nyì sháng.

Poluq É Gabú Hkyô

2 Nungmoq é i-myit unghkaù má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaù zô wú é nghut lhê. 3 Ngò gi, nungmoq lé mara byi rà matú haù su taí é a nghut. Ngamoq gi, asak duì kôle, shí kôle, nungmoq eq rahá wó dut shoq, nungmoq gi, ngamoq é i-myit unghkaù má lúng nyí é nghut lhê nghú, hí hkùn ngò taí wú bê nghut lhê. 4 Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byi é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

5 Hkâsu mù gâ le, ngamoq gi, Makedoni mau má jé é hkùn, ngamoq é gungdu gi, zim za a myang nyi é htoq agó, hkyô hkangmó má ngamoq wuìhke jamjau hui zô é nghut lhê. Shinggan má gi, mabyoq htoq, ahkaù má gi, gyuq kyum nyi é nghut lhê. 6 Nghut kôlhang, nhik ngê bang lé nhik títng é Garai Gasang gi, Tituq lé jé lé nhang é dông mai, ngamoq lé nhik títng byi bê nghut ri. 7 Yhang jé lé é dông mai za a nghut, yhang lé nungmoq nhik títng byi é hkyô dông mai le nghut lhê. Ngá é gabú hkyô gi, gó nám lhê htoq má je myo sháng gaq

ga, yhang gi, nungmoq ngo lé myit tuí nyi é hkyô, nungmoq gyai yhang shut bôn é hkyô, ngá é matú nungmoq gyai myit chiq byi é hkyô pé lé, ngamoq lé taí kyo bê nghut ri.

8 Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. 9 Nghut kôlhang, ngò gi, ahkuí gabú lhê; haù gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lúng nhang é yanmai ru nghut lhê. Nungmoq gi, Garai Gasang ô nau é dông yón huí é bang dut bekô nghut mù, nungmoq lé, ngamoq èq hai akyù le a lhoq yôm byi é nghut lhê. 10 Hkâsu mù gâ le, Garai o é dông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lúng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. 11 Garai o é dông, nungmoq chyáng akyù lhoq htoq byi é yón kuq hkyô lé wú wú keq! Haù gi, gyai yhang myit zuq é hkyô, yhumsing gùng mara a bo é lé tûn shit rà lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byi é hkyô, tengmán hkyô kut rà rì rì nghut é hkyô pé nghut lhê. Nungmoq gi, haù hkyô má mara a bo é lé hkat hkangmó má saksé tûn shit bekô nghut ri. 12 Haù mù luí, ngò, nungmoq lé kâ kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byi é hkyô lé, Garai Gasang hí má nungmoq gùng nungmoq wó myâng rà matú kâ kat é sheq ru nghut lhê. 13 Haù pé banshoq dông mai, ngamoq gi, myit wum byi é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haù mù yhang gabú é gâ lé, nungmoq banshoq bâng èq yhâng é myit lé lhoq nguìngón byi kô é yanmai nghut ri. 14 Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpù

é nghut lhê. Nungmoq lé ngamoq taí é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵ Nungmoq banshoq bang jino gyo kômù, gyuq nán é myit mai yhang lé lhom hap yù kô é lé, yhang myitbùn é hkùn, yhang nungmoq lé chyitdap é myit gi, je riyhang kô dik nyi ri. ¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byi É Hkyô

¹ Gumang wui ê, ahkuí, ngamoq gi, Makedoni mau mâ é noqkuq hpûng pé lé Garai Gasang byi é jeju eq sêng é hkyô, nungmoq lé sé nhâng nau ri. ² Yhangmoq gi, wuîhke jamjau hkyô myo myô eq chyam lik é huí é nghut kôlháng, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byi nau é myit bò nhang ri. ³ Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lhang byi kô é hkyô lé, ngò saksé hkám lhê. Yhangmoq gi, yhangmoq é myit hkaú mai yhang haú su kut kô é nghut ri. ⁴ Yhangmoq gi, haú sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri. ⁵ Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é dông, yhangmoq gùng lé hí haú Yhumsing lé ap byi pyám kômù, hau htâng sheq ngamoq lé ap kô é nghut ri. ⁶ Haú mù luí, Tituq yhang hí kut hí nyi bê nghut é yanmai, ngamoq gi, jeju haú lé nungmoq chyáng le shuí lhoq bying jup byi râ matú, yhang lé wum byi bê nghut lhê. ⁷ Nungmoq gi, lumjing myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekô eq rajung za, nungmoq gi, byi nau é jeju shí má le agùn agó dut râ lé, bün nyi keq.

⁸ Ngò gi, nungmoq lé hkunmó hkyô é a nghut, nghut kôlháng, góbang é myit zuq é hkyô eq whuí wú é dông, nungmoq é

chyitdap myit jet é hkyô lé chyam wú nau luí sheq ru nghut lhê. ⁹ Hkâsu mù gâ le, nungmoq gi, nga-nhung é Yhumsing Yesuq Hkrisduq é jeju lé sê akô nghut ri. Yhang gi, Yhâng é myùng hkyô dông mai nungmoq wó bang dut kó sháng gaq ga, jung hkangmó wó sù nghut kôlháng, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyí byi kólé: A-nhik, nungmoq gi, sâng-hi, byi hí kô é za a nghut, haú su kut nau é myit bo é bang le nghut akô. ¹¹ Nungmoq wó dut é eq rajung za, haú lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haú lhoq pán keq. ¹² Hkâsu mù gâ le, byi nau é myit bo é nghut jáng, chyunghuq haú gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wólai dut, góbang gi, hkyamsâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê. ¹⁴ Nungmoq haí râ tô é lé, yhangmoq agùn agó wó é mâ é wó dum taú htuqbang byi kó sháng gaq, ahkuí lhê é ahkying má, yhangmoq haí râ tô é lé, nungmoq agùn agó wó é mâ é htuqbang byi keq. Haú jáng sheq, wuí wuí za wó dut kó râ nghut lhê. ¹⁵ Haú gi, "Myo myo tsing yu é sù gi, lùm myo shoq wó é a nghut, shau za tsing yu é sù gi, lùm shau shoq wó é a nghut."* ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byi é eq rajung zâ é myit lé, Tituq é i-myit má kat byi é Garai Gasang lé, ngò jeju hkya-ôn lhê. ¹⁷ Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhânggùng yhang myit hpyit yú luí, nungmoq chyáng lé lô gù za nghut ri. ¹⁸ Ngamoq gi, haú gabú danglù lé dojaú é má noqkuq hpûng pé banshoq eq hkya-on huí é gumang hpó haú lé le, yhang eq rahá nhang kat lhê. ¹⁹ Hau htoq agó, ngamoq garúm râ myit bo nyi é hkyô lé tún shit mù, haú Yhumsing lé hkungga râ matú

* 8:15 Htoq Ló 16:18

ngamoq wú gôn nyi hkyô nghut é, alu lé ngamoq yu chung é hkûn, ngamoq é byinzùm kut râ matú, noqkuq hpûng pê eq hkyin yu é sù le yhang nghut lhê. ²⁰ Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq eq le mara hô râ hkyô a htoq shoq sidiq nyi lhê. ²¹ Hkâsu mù gâ le, jô é hkyô kut râ matú ngamoq shikut nyi é gi, haú Yhumsing é myoq hí má za a nghut, byu pê é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotû gumang hpó lé le yhangnhik eq rahá nhang kat lhê. Yhang gi, ahkuí lhang, nungmoq lé gyai yhang myit lum tô é yanmai, shirông myit je riyhang bo nyi ri. ²³ Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mú zui sù nghut ri. Nga-nhùng é gumâng nhik é hkyô ga jáng, yhangnhik gi, noqkuq hpûng pê é gunglik eq Hkrisduq é aróng nghut akô. ²⁴ Haú mù luí, haú noqkuq hpûng pé wó myâng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haú bang lé tân shit keq.

9

¹ Ngò gi, haú sân-yúng bang lé htuqbang râ hkyô eq séng luí, nungmoq lé kâ kat râ a ra nghut ri. ² Hkâsu mù gâ le, nungmoq gyai garúm nau é myit lé ngò sê lhê, haú mù, ngò gi, Makedoni mau bang lé, haú hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaú toq byi bê nghut ri. ³ Nghut kôlhang, shí hkyô má nungmoq eq séng luí ngamoq gumrong é gi, hká dông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wui lé nhang kat é nghut lhê. ⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a

nghut, ngamoq le, nungmoq lé lûm yhang lum pyâm é yanmai, hoq bo hpu râ nghut lhê. ⁵ Haú mù luí, nungmoq danggidiq byí to bê nghut é, chyunghuq lé rago wó lajâng pân to râ matú, gumang wui lé wum taí tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haú hkûn sheq, a nau é dông byí é a nghut é za, byí nau é chyunghuq dông hen tô é dut râ nghut lhê.

Agùn Agó Byí É Hkyô

⁶ Shau za sân hkyó sù gi, shau za shû yù râ nghut mù, agùn agó sân hkyó sù gi, agùn agó shû yù râ nghut lhê gâ é dang lé, myitbûn nyi keq. ⁷ Yuq hkanmó gi, a kâm byí é eq byí nhang é dông a nghut é za, yhumsing myit má byí nau é myhó lé myit hpyit yù mù byí é dông dut râ lhê. Hkâsu mù gâ le, Garai Gasang gi, gabú myit eq byi sù lé chyitdap ri. ⁸ Haú mù, ahkyíng hkanmó jung hkanmó má, nungmoq râ é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhunglhang lé, nungmoq lé wó byí é sù nghut lhê. ⁹ Haú gi,

"Yhang gi, a ha bûn é za myùng bang lé yhang é chyunghuq tsing gam byi bê nghut ri; Yhang é dingmán hkyô gi, ahtum abyuq gíng nyi ri."✠

ga kâ to eq rajung za nghut ri. ¹⁰ Kyô hkyó sù lé kyôshi, zoshuq matú muk byí é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyô é ashi lé myô lò nhâng râ nghut lhê. ¹¹ Nungmoq gi, ayoq abun hkanmó má agùn agó byí é bang wó dut kó râ matú, hkyô hkanmó má sùt wó é bang dut é hui kó râ nghut lhê. Nungmoq agùn agó byí é hkyô lé, ngamoq hai byi mù, Garai Gasang lé jeju hkya-ôn é hkyô dut râ nghut lhê.

¹² Nungmoq dojaú é hkyô shí gi, Garai Gasang é byu pé râ é hkyô lé lajang byí é za a nghut, Garai Gasang lé jeju bûn é dang byíng mui nyi nhang é le nghut lhê.

¹³ Dojaú hkyô hau é yanmai, nungmoq lhumzui hkyô saksé tân shit bekô nghut mù, byu pé gi, Hkrisduq é gabú danglù lé nungmoq yín yù luí jino gyo kô é yanmai le,

yhangmoq eq yuq hkanmó lé, nungmoq é a ha bûn é myit mai shuí gam chûng kô é yanmai le, Garai Gasang lé hkya-on kó râ nghut lhê. ¹⁴ Hau htoq agó, Garai Gasang gi, nungmoq lé jeju lai shoq byi tô é yanmai nungmoq é matú yhangmoq kyûdung byi é u má, yhangmoq é myit nhiklhum gi, nungmoq chyáng htoq jé râ nghut lhê. ¹⁵ A ung htoq taí é Garai Gasang é chyunghuq é yanmai, jeju hkya-on hkyô gi, Yhâng chyáng ru nghut nyi sháng gaq ô!

10

Poluq, Yhâng É Hpungmû Lé Tai Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wám dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pying kat lhê. ² Shí mingkân é nyi yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dá tô lhê. Ngò jé lé é hkûn, nungmoq lé haû sù é myit a shit ra sháng gaq, ngò nungmoq lé dúng tóngbán kat lhê. ³ Hkâsu mù gâ le, ngamoq gi, mingkan shí má asak dui nyi kôhang mingkan byu pé kut é dông majan zân é a nghut. ⁴ Ngamoq majan zân é laknak gi, mingkan shi é laknak a nghut é za, shut shai é dông dang-rháng hkyô nghut é, gingtîng é gyedap pé lé lhoq htên pyám râ matú Garaí é a-tsam byíng é laknak ru nghut lhê. ⁵ Ngamoq gi, dang-rháng rhâng lhûm é hkyô pé eq Garai Gasang lé sé é hkyô lé shut shaí shoq yhumsing gûng yhumsing lhoq myhang mhaû é hkyô hkanmó lé lhoq htên pyám mù, Hkrisduq é jîno gyo râ matú, myit sôn é hkyô hkat hkanmó lé shúm kut yu é nghut lhê. ⁶ Nungmoq é jîno gyo hkyô gi, gumjup é hkûn, jîno a gyô é hkyô hkanmó lé ngamoq dam byi râ rì rì dut râ nghut lhê.

⁷ Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq. ⁸ Hkâsu mù gâ le,

nungmoq lé lâng hkyô râ nó gi, nungmoq lé kô myhâng nhâng râ matú, ngamoq lé haû Yhumsing byi é ahko ahkáng lé gyai gumrong le lháng, ngò gi, hoq hpû é hui râ a nghut. ⁹ Ngò gi, ngá é laiká pê èq nungmoq lé kyuq é su a dut nhâng nau é nghut lhê. ¹⁰ Hkâsu mù gâ le, ra-am gi, "Yhâng é laiká pé gi, gâng bo é eq wum-o bo é nghut ri; nghut kôhang, yhânggûng gi, byuwup a bo é nghut mù, yhang taí é dang pé gi, haí a nghut." ga taí akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí râ nghut é hkyô lé, haû sù é bang sê gyo râ dut lhê.

¹² Ngamoq gi, haû yhumsing gûng yhumsing owaq é bâng é hpúng má bo lom é hkyô nghut nghut, yhangmoq eq whuí é hkyô nghut nghut, a wám kut é nghut lhê. Yhangmoq gi, yhangmoq gûng yhangmoq chîn lhûm wú é eq yhangmoq gûng yhangmoq whuí lhûm wú kô é hkûn, hpaqchyí a bo é bang dut bekô nghut ri. ¹³ Nghut kôhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byi é, nungmoq chyáng lháng hkyit jé shoq nghut é maukyo hkaû má za gumrông râ nghut lhê. ¹⁴ Ngamoq gi, nungmoq chyáng a jé lé wú é dông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lháng lé jé bê nghut lhê. ¹⁵ Dum, ngamoq gi, gôbang kut é muzó lé le, âng é mai lai lui gumrong lai é a nghut. Ngamoq myoqbyu é hkyô gi, nungmoq é lumjîng myit kô myhang jat nyi jáng sheq, nungmoq chyáng ngamoq zui saí é jowò gyai wó lhoq lâm râ nghut lhê. ¹⁶ Haû gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saí to bê loqzó eq séng lui, gumrông nau é a nghut. ¹⁷ Nghut kôhang, "Gumrong é sù gi, haû Yhumsing má gumrông sháng gaq."* ga kê tô ri. ¹⁸ Hkâsu mù gâ le, yhumsing gûng yhumsing owaq é sù gi, hap yù huí é a nghut é za, haû Yhumsing èq owaq byi é sù sheq, hap yù

* 10:17 Yer 9:24

huí é ru nghut lhê.

11

Lagyo Apyoq Pé Eq Poluq

¹ Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haú su kut nyí gù nghut bekô. ² Haí mù gâ le, ngò gi, Garai Gasang mai nungmoq lé magum é myit èq, nungmoq é matú magùm byí lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsíng hpô chyáng za nungmoq lé byi zo râ nghû, danggidiq byí to bê nghut lhê. ³ Nghut kôlhang, Ewaq gi, lhangmuì hpaqchyí dâ é èq mhaú zô é huí é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myt ap nóng é hkyô mai shuí ngoq ló byuq é hui râ lé, ngò myit chiq ri. ⁴ Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haú lé luì luì za lhom hap yu é dut bekô nghut ri. ⁵ Nghut kôlhang, ngò gi, "Ahkyak-lagyô pé" ga bâng é htoq má ratsuí lhang gyamgyi gyó sù a nghut nghû myit ngam é nghut lhê. ⁶ Ngò gi, dang taí hpaqchyí kung sù rayuq a nghut kôlhang, sumsé hpaqchyí bò sù nghut lhê. Ngamoq gi, hkyô hkanmó má, nungmoq lé haú hkyô hkyâng shoq sé nhâng bê nghut lhê.

⁷ Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lú? ⁸ Ngò, nungmoq lé dojaú râ matú, gotû noqkuq hpûng pé mai htuqbâng é lé hap yu é gi, haú bâng chyáng mai ngò zik lú yu é đông dut bê nghut lhê. ⁹ Ngò gi, nungmoq eq rahá nyi mù, rajung jung râ é hkûn, ó yuq lé le wôlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haí râ é lé htuqbang byi kô é yanmai nghut lhê. Hká

đông nghut kôlhang, ngò gi, ngá gùng lé, nungmoq é matú wôlai a dut nhang shoq kut bê nghut mù, xoq luì le haú đông kut nyí râ nghut lhê. ¹⁰ Haú Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lhang, ngò haú su gumrong é hkyô lé wó hkûm zing râ a nghut. ¹¹ Haí mù lú? Ngò, nungmoq lé a chyitdap é yanmai nghut lhê lú? Ngò, nungmoq lé chyitdap é hkyô lé, Garai Gasang sê lhê. ¹² Ngò gi, yhangmoq zui sai é lé gumrong é hkyô pé má ngamoq eq rawuí za sôn byi râ ahko ahkáng ô nau é bang lé ahkáng a byi râ matú, ngò kut nyi é su xoq luì kut shi râ nghut lhê.

¹³ Hkâsu mù gâ le, haú sù é bang gi, lagyo apyoq pé, mhaú zô é mù zui bang, Hkrisduq é lagyo pé đông kut mhaú é bang nghut akô. ¹⁴ Haú gi, maú ra hkyô a joq, hkâsu mù gâ le, Tsadán lhang gi, maubó é maumang lagyo rayuq đông kut mhaú é sù nghut lhê. ¹⁵ Haú mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaú é nghut jáng, maú dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

Yhâng É Wuîhke Jamjau Hkyô Eq Séng Luì, Poluq Gumrong É Hkyô

¹⁶ Ngò puq taí kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq. ¹⁷ Ngò, haú su gumrong é hkyô gi, haú Yhumsíng o é đông ngò taí nyi é a nghut, byù gò rayuq đông taí nyi é ru nghut lhê. ¹⁸ Byù myo myo gi, mingkân é hkyô đông gumrong nyi bum lhê nghut mù, ngò le gumrông râ nghut lhê. ¹⁹ Nungmoq gi, hpaqchyí lùm bo kô é nghut mù, byù go pé lé gabú myit èq jân nyi akô hung! ²⁰ Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyû hô zô yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri. ²¹ Ngamoq gi, nungmoq lé haú hkyô kut râ má wum gyai nyhôm lhê nghû yín yû râ lé, ngò, hoq ri!

Rayuq yuq, haî lé wám gumrong é nghut jáng, ngò le, haû lé wám gumrong lhê nghû, byù gò rayuq đông ngò taî nyi é nghut lhê. ²² Yhangmoq gi, Hebre byu pé nghut akô lúhú? Ngò le nghut lhê. Yhangmoq gi, Israelaq byu pé nghut akô lúhú? Ngò le nghut lhê. Yhangmoq gi, Abraham é awut ashîn pé nghut akô lúhú? Ngò le nghut lhê. ²³ Yhangmoq gi, Hkrisduq é dui-nhâng zoshâng wuì nghut akô lúhú? (Ngò gi, myit a gyîng é sù đông haû su taî é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huì wú bê, shî râ í é adàm dàm huì wú bê nghut lhê. ²⁴ Ngò gi, Yudaq byu pé nuichum eq bat é myi xê dàm byíng rá radàm ra ra dut é, ngo lêng hui zô wú é nghut lhê. ²⁵ Ngò gi, dumbáng eq nhuq huì é sum dàm, shî sháng gaq ga luqgok eq dú huì é radàm, wuì-sanghpo byoq huì é sum dàm, wuimau má myû byôm é ra-nyí ra-myìn hui zô wú bê nghut lhê. ²⁶ Ngò gi, xoq xoq hkyowuì htoq e ló é hkûn, wuì gû é gyuq chiq jung, damyaq huì é gyuq chiq jung, ngá é amyû wuì chyáng má é gyuq chiq jung, tûngbaù pé chyáng má é gyuq chiq jung, myuq hkaû pé má é gyuq chiq jung, yoso pé má é gyuq chiq jung, wuimau má é gyuq chiq jung eq gumang apyoq pé chyáng má é gyuq chiq jung pé huì zô wú bê nghut lhê. ²⁷ Ngò gi, mù lé zui nú zui hkyik mù, anum num a myang yhup shoq dut wú bê nghut lhê. Ngò gi, zòmút wuì shit huì é eq zoshuq a wó é anum num huì laî lo wú bê nghut lhê. Ngò gi, gyoq hpû é eq gùngchîn dut é huì wú bê nghut lhê. ²⁸ Haû pé lhunglhâng htoq má, noqkuq hpûng pé banshoq é matú ngò myit chiq byî é hkyô gi, nyí wuì ngò má wòlai dut nyi ri. ²⁹ Rayuq yuq wum nyhóm le, ngò le wum a nyhóm rá lúhú? Rayuq yuq mara shuí kut shut é hui le, ngò myit a nyé rá lúhú?

³⁰ Ngò gumrông rá dut é nghut le gi, ngò wum nyhóm é hkyô lé tûn shit é pé lé gumrông rá nghut lhê. ³¹ Ngò a mhaû nyi é hkyô lé pyat dedu hkya-on huì é sù, haû Yhumsîng Yesuq é Íwa eq Garai Gasang sê lhê. ³² Damaskuq myuq má, Hkohlkâm

Areta é a-ô mâ é mauzau gi, ngo lé chyup rá matú, myuq lé zúng nhang é nghut lhê. ³³ Nghut kôlhang, ngò gi, manghkoq má lúng mù, myuq xêwâm mâ é hkohot dong mai lhoq hkyô kat é hui luì, yhâng é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rû gumrông nyi rá za nghut lhê. Akyû wó rá a nghut kôlhang, haû Yhumsing chyáng mai lo é myoqwup shing-rán pé eq hpông shit é shing-rán pé lé gumrông rá nghut lhê. ² Ngò gi, laî lò bê raxe myi zân hkûn, mauhkûng sum tsáng nghu é má shuí toq yu huì é, Hkrisduq má é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³ Yhang hparadisu má shuí toq yú huì é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴ Yhang gi, byu pé taî kyô htoq rá ahkáng a wó é hkyô pé nghut é, a wó taî sân kyô é hkyô pé lé wó gyô ri. ⁵ Ngò gi, haû yuq sù é byu é hkyô eq séng luì gumrông rá nghut lhê; nghut kôlhang, ngò gi, ngá é wum nyhóm hkyô eq séng luì, gumrong é mai lai luì, ngá gûng ngò gumrông rá a nghut. ⁶ Ngò gi, gumrông hkyô lé hkyin yù rá dut é nghut jáng lhang, byù gò dut rá a nghut, haî mù gâ le, ngò gi, tengmán hkyô taî nyi rá nghut lhê. Nghut kôlhang, ó yuq le, ngò kut é eq ngò taî é mai myit lum to kô é htoq má, ngo lé, je a myit lo ko sháng gaq nghû, ngò a gumrông kut pyâm nyi lhê.

⁷ Haû laklaí dik é đông ngo lé hpông shit é shing-rán mó pé é yanmai, ngò a nghutbùn byuq sháng gaq ga, ngo lé gunjang rá matú, Tsadán é lagyo nghut é zu lé, ngá é gungsho má kat byî to bê nghut ri. ⁸ Haû lé ngá chyáng mai yu pyám byi rá matú, ngò, Yhumsîng lé sum dâm dúng tóngbán wú bê nghut lhê. ⁹ Nghut kôlhang, Yhang gi, "Ngá é jeju gi, náng é matú luq dun é nghut lhê; hkâsu mù gâ le, Ngá é a-tsam gi, wum nyhóm é hkyô má lhoq gumjup é hui ri." ga

* **12:2** Hkrisduq má é byù rayuq gâ é gi, Poluq yhânggùng yhang lé taî nyi é nghut lhê.

luî, ngo lé taî ri. Haû mù luî, Hkrisduq é a-tsam gi, ngò má wó joq nyi sháng gaq nghû, ngò gi, ngá é wum nyhôm é hkyô pé eq séng luî, gabú myit mai je riyhang gumrông rá nghut lhê. ¹⁰ Haû nghut mù luî, ngò gi, Hkrisduq é yanmai, wum nyhôm é hkyô pé má le, rhoî huî é hkyô pé má le, wuîhke jamjau huî é hkyô pé má le, zing-ri huî é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhôm é hkûn sheq, ngò wúm bo é nghut lhê.

Poluq Chiq Byî É Hkyô

¹¹ Ngò gi, ngá gûng ngò byù gò lhoq kut yû bê nghut ri, nghut kôlhang, haû gi, nungmoq kut nhang é nghut lhê. Ngò gi, nungmoq èq owaq é hui ang sù nghut lhê; hkâsu mù gâ le, ngò gi, haî a nghut kôlhang, "Ahkyak lagyô pé" ga bâng é htoq má ratsuí lhang gyamgyi gyó sù a nghut. ¹² Lagyo rayuq é masat kumlhá nghut é, kumlhá pé, mauhpo muzó pé eq laklaî kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³ Ngò gi, nungmoq é matú, hkâ-nhám le wòlai a dut é nhing, nungmoq gi, hkâsu mù, gotû noqkuq hpûng pé htoq má gyamgyi gyó nyi akô lhú? Ngò, haû hkyô má shut é nghut jáng, mara hkyut pyám byi kó laq!

¹⁴ Ahkuî, ngò gi, nungmoq lé, sum lêng nghû rá dà, lé kum rá rì rì nghut bê mù, nungmoq é matú wòlai gi, a dut rá nghut lhê. Haî mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká đông nghut kôle, zo wuî gi, mó wui é matú sutzè hkong to byi rá dut é a nghut, mó wuî sheq, zô wuî é matú hkong to byi rá dut é nghut lhê. ¹⁵ Haû mù luî, ngò gi, gyai yhang gabú é myit mai, ngò wó é jung hkangmó lé nungmoq é matú chung jai rá nghut mù, ngá gûng lé lhang chûng jai rá nghut lhê. Ngò, nungmoq lé myô chyitdap é yanmai, nungmoq gi, ngo lé shaû chyitdap kó rá lhú? ¹⁶ Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyî haq da sù dut mù, mhaû lhik é đông nungmoq lé chyup yû sù dut byuq bê ga nungmoq ra-am myit akô

myhi-nhung! ¹⁷ Ngò gi, nungmoq chyáng nhang kat byî é byù đông, nungmoq chyáng amyat kut zô yû bê nghut lhê lhú? ¹⁸ Ngò gi, Tituq lé nungmoq chyáng lé rá matú wum taî tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lhú? Nga-nhik gi, rajung zâ é myit đông chyat kut mù, rajung zâ é hkyô lé chyat châng é su nhik nghut lhê, a nghut kó lhú?

¹⁹ Ngamoq gi, nungmoq hí má ngamoq gûng ngamoq taî hung yu nyi ri nghû, ahkuî jé shoq myit nyi akô lhú? Ngamoq gi, Hkrisduq má é byu pé đông, Garai Gasâng hí má taî nyi é nghut lhê. Chyitdap é gumang wui é, ngamoq kut é jung hkangmó gi, nungmoq é akyu matú chyat nghut lhê. ²⁰ Hkâsu mù gâ le, ngo lé jé é hkûn, ngò, nungmoq lé dut nhâng nau é su, nungmoq a wó dut kó rá eq, nungmoq, ngo lé dut nhâng nau é su, ngò a wó dut rá lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbûn é eq atau ahû dut é hkyô pé joq rá lé gyuq ri. ²¹ Ngò dum lé jé é hkûn, ngá é Garai Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut é đông nyi zô lhum nau é i-myit, gungsho zùm yap é yubak mara eq a sân-yung é hkyô kut shut é mai myit a lêng bang myo myô é yanmai, yón kuq é hui zo rá lé, ngò myit chiq ri.

13

Ló Htáng Má Sidiq Byî É Dang Pé

¹ Ahkuî, ngò, nungmoq chyáng lé kum rá gi, sum lêng nghû rá dà, nghut lhê. Haû gi, "Mara hun é hkyô hkangmó lé, í yuq sum yuq saksé hkâm é èq lhoq teng ra rá nghut lhê."* ga kê tô é eq rajung za nghut lhê. ² Ngò gi, í lêng nghû rá dà nungmoq eq rahá nyi é hkûn, nungmoq lé sidiq byi gû bê nghut lhê. Ahkuî le, nungmoq eq wê gâng tô é u lé, dum taî kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo rá nghut lhê. ³ Haû gi, ngò đông mai Hkrisduq dang taî nyi é hkyô

saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuí-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri. ⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm èq dui nyi é gi, hkyak têng lhê. Haù eq rajung za, ngamoq gi, Yhang su wum nyhóm kôlhang, nungmoq lé dojàu râ matú, Garai Gasâng é a-tsâm èq, Yhang eq rahá dui nyi râ nghut lhê.

⁵ Nungmoq gi, lumjínng hkyô má nghut nyi lhê luq, yhumsing gùng yhumsing myi wú keq. Yhumsing gùng yhumsing chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyi bê hkyô lé sé kó râ nghut lhê. ⁶ Ngamoq gi, chyam é má a sùm é hkyô lé, nungmoq wó sé kó râ nghut lhê nghû, ngò hkyak lum tô lhê. ⁷ Ahkuí, ngamoq gi, nungmoq shut é hkyô haí a kut kó râ matú, Garai Gasâng chyáng kyûdung byi lhê. Haù gi, ngamoq chyâm hui luí wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lhê. ⁸ Hkâsu mù gâ le, ngamoq gi, haù tengmán hkyô eq shaí é dông haí le a ge kut é za, tengmán hkyo é matú za kut râ dut é nghut lhê. ⁹ Ngamoq wum nyhóm kôlhang, nungmoq wúm bo é hkûn, ngamoq gabú é nghut lhê; ngamoq kyûdúng é gi, nungmoq gumjup râ matú nghut lhê. ¹⁰ Ngò gi, wê gâng tô é hkûn, haù hkyô pé lé haí mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haù gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haù Yhumsing ngo lé byi é sheq ru nghut lhê.

Ló Htâng É Shi-kyám Dang

¹¹ Ló htáng má ngò taí nau é gi, gumang wui ê, nguínngón yuqyo nyi keq. Gumjup hkyô shut sô nyi keq, ngò dúng tóngbán é dang lé gyo keq, myit rahkat za dut nyi keq, nguínngón shoq asak dui nyi keq. Haù hkûn, chyitdap hkyô eq nguínngón hkyo é Garai Gasang gi, nungmoq eq rahá nyi nyi râ nghut lhê.

¹² Chyoiyúng é bopuq puq é èq, rayuq eq rayuq shi-kyâm lhum keq. ¹³ Sânyúng bang banshoq gi, nungmoq lé shi-kyâm kat akô.

¹⁴ Haù Yhumsing Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyi sháng gaq ô.

GALATIQ

Mau Bâng Chyáng Hun Kat é Laiká (Galatians)

¹ Byu pê chyáng mai le a nghut, ó yuq èq nhang é le a nghut e za, haû Yesuq Hkrisduq lé shî bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi, ² ngò eq rahá nyi é gumang wuì banshoq bang le mú, Galatiq mau mâ é noqkuq hpûng pê chyáng dang kyô kat lê.

³ Nga-nhûng é Íwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyí sháng gaq ô. ⁴ Haû Hkrisduq gi, nga-nhûng é Íwa Garai Gasang ô nau é eq rajung za, agè ashop é ipyat shî mai, nga-nhûng lé xe yù râ ga, nga-nhûng é yubak marâ é matú yhanggùng lé Yhang byí pyám bê nghut ri. ⁵ Haû hpungwup shing kang gi, Garai Gasâng chyáng pyat dedu ahtum abyuq ru joq nyí sháng gaq ô. Amen.

Gotû Gabú Danglù A Joq É Hkyô

⁶ Ngò gi, haû Hkrisduq é jeju mai nungmoq lé ji yù Sù lé, nungmoq haû-í han kâng pyâm to kôluí, shaí é gabú danglù shut lhing ló nyí kô é hkyô lé, gyai yhang maú nyi ri. ⁷ Danglù haû gi, gabú danglù ratsuí lháng a nghut. Byù ra-am mai nungmoq lé lhoq shuk byi luí, haû Hkrisduq é gabú danglù lé, shikut luí lhoq shai nhang pyâm nyi kô é hkyô za nghut lê. ⁸ Nghut kôlháng, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkûng htoq mâ é mau-mang lagyo rayuq nghut nghut, shaí é gabú danglù, nungmoq lé hko kyô é nghut jáng, haû yuq gi, ahtum abyuq dam byí é hui zo sháng gaq ô! ⁹ Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotû hko nyi e nghut jáng, haû yuq gi, ahtum abyuq dam byí é hui zo sháng gaq ô!

* **1:18** Petruq lé Kehpa le gà lê.

¹⁰ Haû su nghu taí é gi, ahkuí, ngò, byù é hí má myoqdong wó râ matú shikut nyi é nghut lê lú? Haû a nghut jáng, Garai Gasâng é hí má myoqdong wó râ matú shikut nyi é nghut lê lú? Byù lé gabú nhâng râ matú, ngò shikut nyi é nghut lê lú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut râ a nghut.

Poluq Lé, Garai Gasang Ji Yu É Hkyô

¹¹ Gumang wuì ê, ngò hko kyô é gabú danglù haû gi, byu èq kut htoq é hkyô a nghut é lé, ngò, nungmoq lé sé nhâng nau ri. ¹² Ngò gi, haû lé, byu chyáng mai wó yu é le a nghut, góyuq èq mhoq byí é le a nghut e za, Yesuq Hkrisduq èq shing-rán byí é dông wó hap yu é ru nghut lê.

¹³ Ngò, Yudaq noqkuq htûng má nghut nyi ashî hkûn, Garai Gasâng é noqkuq hpúng lé ladu lai shoq hkâsu kut zing-ri luí, haû lé lhoq htên shikut wún é, ngá é hí hpyang lê é asak duì hkyô lé, nungmoq wó gyô wú bekô râ nghut lê. ¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htûng lé je cháng sù nghut é htoq agó, ngá é íchyí íwa pê é htûngli lé ladu lai shoq myit zing zuq sù nghut lê. ¹⁵ Nghut kôlháng, ngá nú é unghkaû mai yhang hkyin to luí, Yhang é jeju yanmai ngo lé ji yu é Garai Gasang gi, ¹⁶ haû Yhang Zô é hkyô gabú danglù lé, ngò mai tûngbaù pê chyáng hko kyo sháng gaq ga, Yhang Zo lé ngá chyáng htoq shit nhâng râ matú myit hpyit yu é hkûn, ngò gi, ó yuq eq le a hpyê yù, ¹⁷ Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut ê luí, Damaskuq myuq má dum taú ló bê nghut lê.

¹⁸ Sum zân lai é htâng má, ngò gi, Yerusalem wà mó má doq ló mù, Petruq* lé ló hui luí, yhang eq raxe ngo nyí, ló nyi nyi é nghut lê. ¹⁹ Haû má, Yhumsîng é yhanggu Yakuq mai lai luí, lagyo góbang lé ngò a myàng nghut ri. ²⁰ Nungmoq lé ngò ká byí kat é má, mhaû é hkyô a bò nghú luí, Garai Gasâng hí má, hkyak, ngò taí lê. ²¹ Hau htâng má, ngò gi, Suriq mau

eq Kiliki mau má ê jé é nghut lhê. ²² Haú hkûn, haú Hkrisduq má nghut é, Yuda mau má é noqkuq hpúng byú wui gi, ngo lé myoqno a shú kó nghut ri. ²³ Yhangmoq gi, "Hí hkûn, nga-nhúng lé zing-ri sù gi, yhang mai lhoq hten râ matú radàm shikut wú é lumjúng hkyô haú lé, ahkuî hko nyi ri." gâ é hkyanglù lé wó gyô wú kôluí za, ²⁴ ngá é yanmai, Garai Gasang lé hkyá-ôn bum akô nghut ri.

2

Poluq Lé Lagyô Pé Lhom Hap Yu É Hkyô

¹ Raxe myi zân laí é htàng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê. ² Garai Gasang byí é shing-rán eq rajung za doq ló luí, ngò kut wú bê muzó eq ahkuî kut é muzó pé akôm a dut pyám sháng gaq nghû, tûngbaù pé chyáng ngò hko kyô nyi é gabú danglù lé, haú suwún dut báng é hí má za shap kyô é nghut lhê. ³ Nghut kôlhang, ngò eq rahá nghut é Tituq gi, Grik byú nghut kôle, yhang lé ahpyo-kuq a hpyit nhâng kó nghut ri. ⁴ Haú hkaú wang lo é mhaú é gumang wui gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng râ dá kô é yanmai, haú hkyô gabyông htoq lo é nghut ri.* ⁵ Nghut kôlhang, haú gabú danglù é tengmán hkyô gi, nungmoq chyáng joq gíng nyi sháng gaq nghû, razup za lhang, yhangmoq é dang lé ngamoq gyo byí é a nghut.

⁶ Ahkyak é byú su dut é bang gi, yhangmoq haí jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byú haú bang gi, ngá é mungdang má haí le a jat kat e za, ⁷ Petruq gi, Yudaq byu pé† lé, haú gabú danglù hko kyo râ mù má lum tô é hui bê eq rajung za, ngò gi, tûngbaù pé‡ lé, haú gabú danglù hko kyo râ mù má lum tô é hui bê hkyô lé za, yhangmoq myang akô nghut ri. ⁸ Hkâsu mù gâ le, Yudaq byu pé é matú Petruq lé lagyo ayá dâng byí é sù Garai Gasang gi, tûngbaù pé matú ngo lé le lagyo ayá dâng byi bê nghut lhê. ⁹ Haú hkungmó-zîng su ahkyak

é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq eq shi-kyâm yù kôluí, yhangmoq gi, Yudaq byu pé shut, ngá-nhik lé gi, tûngbaù pé shut é râ lhê ga, myit hui bekô nghut ri. ¹⁰ Yhangmoq gi, ngá-nhik mai myùng bang lé ru bún nyi râ matú za pying kat akô; haú gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku wà mó má Petruq jé lé é hkûn, yhang lé mara hún râ hkyô joq é yanmai, ngò gi, byu hí má yhang, yhang lé lhom htuq htîng é nghut lhê. ¹² Hkâsu mù gâ le, Yakuq chyáng mai lé é bang a jé shí é u lé, yhang gi, tûngbaù pé eq rahá chôm zo chôm shuq lhaq kut ri. Nghut kôlhang, haú bang jé é hkûn, yhang gi, ahpyo-kuq hpyit râ lhê gâ é hpúng má lom é bang lé gyuq é yanmai, tûngbaù pé chyáng mai htoq gang luí, yhang baú nyi tô ri. ¹³ Yhang, gegùn labyoq kut é hkyô má, gotú Yudaq byu pé le bo châng kut akô nghut mù luí, Barnaba lhang yhangmoq kut é gegùn labyoq hkyô má bo châng nghoq ló bê nghut ri. ¹⁴ Haú gabú danglù é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq banshoq bâng é hí má, Petruq lé, "Nàng gi, Yudaq byu nghut to mù luí, Yudaq byu rayuq dông a nyi e za, tûngbaù rayuq dông nyi luí nhîng, tûngbaù pé lé Yudaq byu pé é htûngli hkâsu kut wó cháng nhâng râ lúh?

¹⁵ Ngamoq gi, yubak dap bang gâ é tûngbaù pé a nghut e za, hkû é buinyi mai yhang, Yudaq byu nghut gû bê nghut lhê. ¹⁶ Byu gi, jep é tarâ lé cháng luí mara hkyut san byi huí é a nghut e za, Yesuq Hkrisduq lé lumjúng é yanmai sheq mara hkyut san byi huí é hkyô lé, ngamoq sê lhê. Haú mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjúng é yanmai, mara hkyut sân pyám byí é hui sháng gaq nghû, Yesuq Hkrisduq lé lumjúng bê nghut lhê; hkâsu mù gâ le, ó yuq le, jep é tarâ lé châng é yanmai, mara hkyut san byí é hui râ a nghut.

* 2:4 Yudaq byu pé ra-am gi, hpúng asik wang é bang lé Yudaq htûng tarâ cháng nhâng nau akô nghut ri. † 2:7 Grik má ahpyo-kuq hpyit hkam é bang ga bo tô ri. ‡ 2:7 Grik má ahpyo-kuq hpyit a hkam é bang ga bo tô ri.

17 Ngamoq gi, Hkrisduq má ngamoq é mara hkyut san byi é hui râ hkyô ho nyi é hkûn, yubak dap é bang ngamoq nghut é lé myang é nghut jâng, mara lé gi, Hkrisduq mai kut nhang é nghut lhê lhú? Ratsuí le a nghut. 18 Ngò gi, ngò hpyoq pyám bê hkyô lé dum sai kut é nghut jâng, tarâ lu lai é byù ngò nghut é lé tân shit ri. 19 Ngò gi, jep é tarâ eq sêng é má, jep é tarâ é yanmai shi jâng sheq, Garai Gasâng é matú wó dui nyi râ nghut lhê. 20 Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhanggûng lé Yhang byi pyâm é, haú Garai Gasâng é Yhangzo lé lumjîng é yanmai ru nghut lhê. 21 Ngò gi, Garai Gasâng é jeju lé tô pyâm é a nghut, hkâsu mù gâ le, dingmán é hkyô lé, jep é tarâ dông wó yu é ru nghut le gi, Hkrisduq shi hkâm é gi, akôm dut byuq râ nghut lhê." nghu tai é nghut lhê.

3

Lumjîng Myit Lhú? Jep É Tarâ Lhú?

1 Galatiq mau mâ é byùbâm pé ê! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq eq wá nungmoq lé lîng nghoq yû bekô lhú? 2 Nungmoq gi, haú Woi-nyí lé, jep é tarâ châng luí wó yû kô é nghut lhê lhú? A nghut jâng, nungmoq wó gyô yu é gabú danglù lé lumjîng luí wó yû kô é nghut lhê lhú? Haú rahkat lé za, ngò sê yû nau ri. 3 Nungmoq gi, haú-í yhang bâm akô lhú? Haú Woi-nyí lé lumhkaú mù kut hî kôluí nhîng, ahkuí, gungsho wum-o lé lumhkaú mù, yhumsîng myit tô é hkyô lé lhoq pán râ matú shikut nyi akô lhú? 4 Nungmoq, myo myo hpuzô pyâm é gi, akôm nghut akô lhú? Gè gè yhang, haú gi, akôm nghut byuq bekô lhú? 5 Garai Gasang, nungmoq lé Yhâng é Woi-nyí byi é htoq agó, nungmoq chyáng laklai kumlhá kut é gi, jep é tarâ lé nungmoq châng é yanmai nghut akô lhú?

A nghut jâng, nungmoq wó gyô é gabú danglù lé, nungmoq lumjîng é yanmai nghut akô lhú?

6 "Abraham gi, Garai Gasang lé lumjîng luí, yhang lé dingmán sù ga sôn yu é hui bê nghut ri."* ga, Abraham eq séng luí tai tô é lé myit wú keq. 7 Haú mù luí, lumjîng myit bo é bang gi, Abraham é yhangzô pé* yhang dut bê nghut é hkyô lé sé keq. 8 Lumjîng myit é yanmai, tungbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, "Nang é yanmai, byuhú chângjup gi, shimân jeju wó yû kô râ nghut lhê."* gâ ri. 9 Haú mù luí, lumjîng myit bo é bang gi, lumjîng myit bo é Abraham eq rahá, shimân jeju lé myang hkam yû kô râ nghut lhê.

10 Jep é tarâ châng é hkyô má nè hkau é lhunglhang bang gi, nhîng pyâm é hui bang chyat nghut lhê. Hkâsu mù gâ le, "Tarâ laiká má kâ tô é lhunglhang lé a xoq kut é sù, ó yuq nghut kôle, nhîng pyâm é hui kô râ nghut lhê."* ga luí, kâ tô ri. 11 Haú htoq agó, "Haú dingmán sù gi, lumjîng myit mai asak dui râ nghut lhê."* ga kâ tô é yanmai, ó yuq nghut kôle, Garai Gasâng é hí má jep é tarâ lé châng luí, mara hkyut san byi é a hui é hkyô gi, san za nghut bê nghut ri. 12 Haú jep é tarâ gi, lumjîng myit eq haí a sêng é nghut luí, "Haú pé dông châng é sù gi, haú pé mai asak dui râ nghut lhê."* ga kâ tô ri. 13 Haú Chyúmdang má, "Sik zîng má jén lhang to hui é sù ó yuq nghut kôle, nhîng pyâm é hui sù nghut ri."* ga kâ tô é eq rajung za, Hkrisduq gi, nga-nhûng é matú nhîng pyâm é hui sù dut bê nghut é yanmai, jep é tarâ mâ é nhîng é hkyô mai nga-nhûng lé hkyi yû bê nghut ri. 14 Haú Abraham lé byi tô é shimân jeju gi, Hkrisduq Yesuq é yanmai tungbaù pé chyáng le jé sháng gaq ga, Yhang nga-nhûng lé hkyi yu é nghut ri; haú mù, nga-nhûng gi, danggidiq byi tô é Woi-nyí haú lé, lumjîng myit mai wó yû râ nghut lhê.

Jep E Tarâ Eq Danggidiq

* 3:6 Apûn 15:6 * 3:7 Abraham é yhangzô pé gâ é gi, Garai Gasâng é yhangzô pé lé gâ é nghut lhê. * 3:8 Apûn 12:3 * 3:10 Tarâ Pun 27:26 * 3:11 Hbk 2:4 * 3:12 Nhong 18:5 * 3:13 Tarâ Pun 21:23

¹⁵ Gumang wui ê, nyí wui é asak duì hkyô mâ é lé dangtú yù mù, ngò nungmoq lé taí kôlé, byù mai chòm tô tô é dangshikaq lé, ó yuq èq le wó lhoq hpyoq pyám râ a nghut, ó yuq èq le haú má wó jat kat râ a nghut. ¹⁶ Abraham eq yhâng é awut ashín lé byi tô é danggidiq le haú eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhang, haú Chyúmdang má, haú lé taí nau é a nghut e za, "náng é awut ashín lé" ✧ ga taí nau é ru nghut lhê, haú é lichyúm gi, byù rayuq lé za taí é nghut lhê, haú gi, Hkrisduq nghut ri; ¹⁷ haú mù luí, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haú lé le wó lhoq hpyoq pyám râ a nghut, danggidiq lé le wó lhoq htên pyám râ a nghut. ¹⁸ Hkâsu mù gâ le, haú silí wunlí gi, jep é tarâ eq séng lhúm é nghut jáng, danggidiq eq gi, haí le a sêng lhum lo nghut ri; nghut kôlhang, Garai Gasang gi, Yhâng é jeju yanmai, Abraham lé danggidiq dông silí wunlí haú byi to bê nghut ri.

¹⁹ Haú su nghut jáng, haú jep é tarâ gi, hai akyû bò râ lhú? Haú gi, danggidiq dông lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep é tarâ haú gi, maumang lagyô pé mai gyoro sô xoq byi sù† é loq dông byi tô é ru nghut lhê. ²⁰ Gyoro sô xoq byi sù gi, rahkyam shut mâ é bang eq baú sêng é a nghut, nghut kôlhang, Garai Gasang gi, rayuq za nghut lhê.

²¹ Haú mù luí, jep é tarâ gi, Garai Gasâng é danggidiq pé eq htuoq htíng lhúm lhê lhú? Ratsuí le a nghut. Hkâsu mù gâ le, dui é asak wó byi é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò râ nghut lhê. ²² Nghut kôlhang, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haú mù luí, haú byi to bê danggidiq lé gi, Yesuq Hkrisduq lé lumjínq é bang lé byi râ nghut lhê.

²³ Lumjínq hkyô haú a jé shimá, nga-nhúng gi, haú jep é tara èq htongbyú dông lhúng tô é hui luí, lumjínq hkyô haú htoq

shit é hkûn jé shoq myhí lhúng tô é hui wú bê nghut lhê. ²⁴ Haú mù luí, nga-nhúng gi, lumjínq é yanmai mara hkyut san byi é hui sháng gaq ga, jep é tarâ gi, nga-nhúng lé Hkrisduq chyáng shuí ê râ matú, nga-nhúng é hkyô-u shê sù dut bê nghut ri. ²⁵ Ahkuí kúm gi, haú lumjínq hkyô jé bê nghut é yanmai, nga-nhúng gi, haú jep é tarâ mai hkyô-u shê é loq hkaú má a nghut lo.

Garai Gasâng É Yhangzô Pé

²⁶ Nungmoq lhunglhâng bang gi, Hkrisduq Yesuq lé lumjínq é yanmai, Garai Gasâng é yhangzô pé nghut bê; ²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri. ²⁸ Nungmoq lhunglhâng bang gi, Hkrisduq Yesuq má rading ralhum za nghut é yanmai, Yudaq byù nghú é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashín pé le, haú danggidiq eq rajung za silí wunlí hkam yù bang le, nghut akô nghut ri.

4

¹ Ngò taí nau é lichyúm gi, haú amyú hkúng xoq dut râ sù gi, ikun sutzè ban-shoq lé sîng ang sù nghut kôlhang, yhang, zoshâng nghut ashí hkûn gi, jùn hpó eq haí a shaí nghut ri. ² Yhang gi, yhâng wa masat tô é ahkyínq jé shoq, yhang lé zúng é sù eq yhúm lé up su é a-ô má ru lúng nyi ashí nghut ri. ³ Haú eq rajung za, nga-nhúng le zoshâng* nghut é hkûn gi, mingkan uphkâng tarâ ô má jùn dut nyi é bang nghut lhê. ⁴ Nghut kôlhang, ahkyínq lo ngap jáng, zo dut râ ahkáng lé byínq shoq, nga-nhúng wó yú sháng gaq ga, Garai Gasang gi, jep é tarâ hkaú má é byu pé lé hkyi yù râ matú, ⁵ jep é tarâ hkaú má, myiwe mai hku kat nhang é Yhang Zo lé, nhang kat byi bê nghut ri. ⁶ Hkâsu mù gâ le, nungmoq le, zo wui nghut bê yanmai, "Aba, Áwa ê." ga dat wut é, Yhang Zô é Woinyí lé, Garai Gasang gi, nga-nhúng é i-myit

✧ **3:16** Apûn 12:7; 13:15; 24:7 † **3:19** Gyoro so xoq byi sù gi, Mosheq nghut ri. * **4:3** Bun zo shí má, zoshâng gâ é lichyúm gi, Yesuq lé a lumjínq shí é bang lé gâ lhê.

unghkaû má kat byi bê nghut ri. ⁷ Haû mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyú hkûng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyô

⁸ Hí hkûn, Garai Gasang lé nungmoq a sé shí é u lé, nungmoq gi, nat hparà lháng a nghut bâng é a-ô má jùn dut é bang nghut ri. ⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhîng, nungmoq gi, hkâsu mù, haû wum nyhôm é eq akyû a byí é, mingkan uphkang é tarâ shut dum lhing taû ló nyi akô lhú? Nungmoq gi, haû pê eq jùn zô é dum hui zó nau akô lhú? ¹⁰ Nungmoq gi, buinyi wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashí kó nhung! ¹¹ Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.

¹² Gumang wuì ê, ngò gi, nungmoq su dut bê nghut é yanmai, nungmoq le ngò su dut keq† nghû, nungmoq lé dúng tôngbán kat lhê. Nungmoq gi, ngo lé haí le a kut shut wú kô é nghut lhê. ¹³ Sâng-hí dàm ngò nungmoq lé gabú danglù hko kyo é hkyô gi, nungmoq sé é eq rajung za, ngò nòhpyo huí é yanmai nghut lhê. ¹⁴ Ngá é nòhpyo gi, nungmoq é matú wuìhke hkyô dut kôlhâng, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê. ¹⁵ Haû sù é nhîng, nungmoq é gabú hkyô banshoq gi, haí dut byuq bekô lhú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byí pyám kó râ í dut laí lò bê hkyô lé, ngò saksé wó hkâm lhê. ¹⁶ Ahkuí, ngò gi, nungmoq lé haû tengmán hkyô taí kyô é yanmai, nungmoq é gyè dut to bê nghut lhê lhú?

¹⁷ Haû byù góbang gi, nungmoq lé gyai shirong é hkyô tùn shit ri; nghut kôlhâng, ge

é hkyô haí a bò; yhangmoq ô nau é hkyô gi, yhangmoq lé nungmoq taû shirông kó abe ga, nungmoq lé ngamoq chyáng mai lhoq kâng yù râ matú ru nghut lhê. ¹⁸ Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haû su shirong le ge lhê. ¹⁹ Ngò chyitdap é zo wuì ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su radàm dum hkâm zô nyi luí, ²⁰ nungmoq é hkyô lé myit wuìhkê tô é yanmai, ahkuí, nungmoq eq rahá myang nyi mù, ngò taí é danghtê wó htaí râ matú, gyai yhang myoqbyu nyi lhê ô.

Hagara eq Sarah Nhik É Hkyô

²¹ Haû jep é tarâ ô má nyi nau é bang ê, nungmoq gi, jep é tarâ má taí é hkyô lé a sê gyo kô é nghut lhê lhú? Ngo lé taí kyô wú kó laq. ²² Hkâsu mù gâ le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kâ tô ri. ²³ Haû jùn myhí é yhangzo gi, gungsho dông hku lé é sù nghut kôlhâng, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

²⁴ Haû hkyô pé gi, dangtú ru nghut lhê, myiwe haû í yuq gi, dangshikaq í lhum eq wuì lhê; dangshikaq ralhum gi, Sinaq Bùm mâ é‡ nghut luí, jùn dut râ nghut é zo wuì lé hku kat é Hagara lé taí nau é nghut ri.

²⁵ Hagara haû gi, Arabiq mau mâ é Sinaq Bùm lé taí nau é nghut luí, ahkuí lhê é Yerusalem eq wuì nyi ri. Hkâsu mù gâ le, Yerusalem haû gi, yhang zô pé eq rahá, jep é tara é jùn dut nyi kô é yanmai nghut lhê.

²⁶ Nghut kôlhâng, ahtoq mâ é Yerusalem gi, jùn myhí a nghut sù nghut luí, nga-nhûng é ìnu nghut ri. ²⁷ Hkâsu mù gâ le,

"Zoshâng a hku é baùdung myhí ê, gabú nyí aq. Zo hkû nò a no wú shí é myiwe gi, gabú luí, gabú garû nyi aq;

hkâsu mù gâ le, haû chamchuyiuyi dut é myiwe myhí gi, làng wó é myiwê htoq má zo wuì je myô wó bê nghut ri."

ga kâ tô ri.✧

† 4:12 Ngò su dut keq gâ é lichyúm gi, nungmoq le ngò su jep é tarâ mai lut htoq keq gá nau é nghut lhê. ‡ 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê. ✧ 4:27 Esai 54:1

28 Gumang wuì ê, ahkuì, nungmoq gi, Isak su, danggidiq byì tô é zo wuì nghut bê nghut ri. 29 Haù hkûn lé, haù gungsho đông hku lé lo é sù gi, Woi-nyí wum-o đông hku lé lo é sù lé zing-rî ri. Haù eq rajung za, ahkuì le dut nyi ri. 30 Nghut kôlhang, Chyúmdang má hkâsu ga kê tô ri lhu gà le, "Haù jùn myhí eq yhangzo yuqzo lé hkat htoq pyám aq; hkâsu mù gà le, haù jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chòm hkam yù râ a nghut."* gà ri. 31 Haù mù luí, gumang wuì ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

5

Hkrisduq Mã É Luthkyô

1 Nga-nhúng luthkyô wó râ matú, Hkrisduq gi, nga-nhúng lé lhoq lhut kat bê nghut ri. Haù mù luí, haù má ru gîng nyi mù, yhumsing gùng lé jun é wòlai hkaù má hkâtaù bainaì nyi kó.

2 Ngá dang lé matsîng yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyù le bò kó râ a nghut. 3 Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tarâ lhunglhang lé châng kut râ lhê nghû, ngò kyô kat lhê. 4 Jep é tarâ châng shikut é đông mara hkyut san byì é hui naù bang, nungmoq gi, Hkrisduq eq gâng lhùm to bekô nghut luí, haù Garaì jeju mai le byit gyó byuq bekô nghut ri. 5 Ngamoq kúm gi, myit myoqbyu tô é dingmán hkyô lé, haù Woi-nyí é yanmai lumjîng myit èq gyai yhang lánq nyi é bang nghut lhê. 6 Hkâsu mù gà le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyù a bò nghut ri; chyitdap myit mai htoq lo é lumjîng myit za sheq, akyù bo lhê.

7 Nungmoq gi, rago din wú bekô* nghut é wá, haù tengmán hkyô lé a cháng sháng gaq ga, nungmoq lé ó yuq èq hkùm zing

pyám kô é lhu? 8 Haù su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut. 9 "Mún ratsuí zo gi, muk long gón lé wó lhoq daù lhê."† gà é dang joq lhê. 10 Nghut kôlhang, nungmoq gi, gotù hkyô đông a lhom yù kó râ nghut lhê nghû, Hkrisduq má hkyak ngò myit lum nyi lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za dam byì é hui zo râ nghut lhê. 11 Gumang wuì ê, ahpyo-kuq hpyit é hkyô lé, ngò rû hko nyi ashî nghut le gi, hai mù luí, zing-rî é lé ngò hui zô nyi râ lhu? Haù su kut é nghut jáng, haù tapzîng eq séng luí, manghkáng joq râ a nghut lo. 12 Nungmoq lé lhoq byok nyi é bang gi, hau htoq chyân luí, yhumsing gùng yhumsing banshoq hpyit pyám kó sháng gaq nghû, ngò wó myit ri.

13 Gumang wuì ê, nungmoq gi, luthkyô wó râ matú ji yù huí é bang nghut akô; nghut kôlhang, nungmoq é luthkyô ahkáng lé, yubak gungsho má hkâcháng nhâng kó, chyitdap myit mai kúm gi, rayuq eq rayuq dojaù lhùm nyi keq. 14 Hkâsu mù gà le, "Náng gùng lé nàng chyitdap é su, náng é chyangnâm mã é bang lé le chyitdap aq."* gà é hkunmó má za, jep é tarâ banshoq lo bo to bê nghut lhê. 15 Nungmoq, rayuq eq rayuq ngat lhum myui lhùm nyi kô é nghut le gi, rayuq eq rayuq lhoq htên pyâm lhum kó râ nghut é lé, sidiq nyi keq.

Woi-nyí Èq Asak Dui Râ Hkyô

16 Nghut kôlhang, ngò taí kôlé, Woi-nyí shuí ù é đông asak dui nyi keq; haù hkûn, nungmoq gi, yubak gungsho ô nau é hkyô cháng kó râ a nghut. 17 Hkâsu mù gà le, yubak gungsho ô nau hkyô gi, Woi-nyí eq shai lhùm nyi; Woi-nyí gi, yubak gungsho ô nau hkyô eq shai lhùm nyi, dut ri. Haù í lhum gi, gyè dut lhùm ri; haù mù, nungmoq gi, yhumsing ô nau é đông hkâkut kó. 18 Nghut kôlhang, nungmoq lé Woi-nyí èq hkyô hî é nghut jáng, nungmoq gi, jep é tarâ ô mã a nghut lo nghut ri.

* 4:30 Apûn 21:10 * 5:7 Rago din wú bekô gà é gi, woi-nyí hkyô má kê myhang lai lò bê lé taí nau é nghut lhê.

† 5:9 Shut é đông mhoqshít é hkyô ratsuí gi, muk long gón lé mún èq wó lhoq daù é su, nungmoq banshoq lé wó lhoq nghoq yu pyâm lhê. * 5:14 Nhong 19:18

¹⁹ Yubak gungsho é muzó gi, de de yhang nghut lhê; haú pé gi, ashop é đông gungsho zùm yap é hkyô, a sân-yúng é hkyô, shut é đông nyi zô lhùm nau é myit, ²⁰ hparà noq hkyô, myoqheq mù kut é hkyô, a jú é hkyô, byoq lhùm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô, ²¹ ningsû é hkyô, î shuq wut é hkyô, zo yê shuq yê mù achaq achyut kut é hkyô pé eq haú pé su kut é gotû hkyô pé nghut ri; haú su kut nyi yap é bang gi, Garai Gasâng mingdán é silí wunlí lé wó hkam yù rà a nghut nghû, ngò, hí hkún nungmoq lé taí wú bê eq rajung za, ahkuí lé, nungmoq lé ngò sidiq byi nyi lhê.

²² Nghut kôlhang, Woi-nyí é ashi gi, chyit-dap hkyô, gabú hkyô, nguingón hkyô, myit hîng hkyô, nhik-u nú é hkyô, ge é hkyô, lhumzui hkyô, ²³ nûm é hkyô, yhumsing gùng lé wó hkan é hkyô pé nghut ri. Haú hkyô pé lé hkùm zing pyám rà tarâ haí le a joq nghut ri. ²⁴ Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzîng má jén sat pyám bekô nghut ri. ²⁵ Nga-nhúng gi, Woi-nyí mai asak ùi bê nghut mù, haú Woi-nyí htâng châng nyi sháng. ²⁶ Nga-nhúng gi, akôm gyáng dang taí luí, rayuq eq rayuq jeq ho lhùm é eq manon lhùm é bang, a dut nyi sháng gaq.

6

Lhunglhang Bang Lé, Ge É Hkyô Kut Byi Râ Hkyô

¹ Gumang wui ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit eq haú yuq lé lhoq pun lhoq kyîng yù keq. Nghut kôlhang, nàng gi, gunglaú é a hui sháng gaq, sidiq nyi aq. ² Rayuq eq rayuq é wôlai lé tê byi lhùm nyi keq; haú đông mai, nungmoq gi, Hkrisduq é tarâ lé wó lhoq dik kó rà nghut lhê. ³ Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyâm é sù nghut ri. ⁴ Yuq hkanmó gi, yhumsing nyi yap é hkyô lé taú myit wú keq; haú hkún, yhumsing gùng lé góbang eq whuí nó a rà e za, yhumsing gùng má aróng wó yù rà

nghut lhê. ⁵ Hkâsu mù gà le, yuq hkanmó gi, ó le ô wò lé wùn waq ra rà dut lhê.

⁶ Haú mungdang lé mhoq yu é sù gi, mhoqshit byi sù lé, ge é zè banshoq gàm byi sháng gaq.

⁷ Garai Gasang lé gi, wó rhoi rà a nghut, yhumsing gùng yhumsing mhauzô é hkâhui nhâng kó; byù gi, hô kat é eq rajung za, shù yù rà nghut lhê. ⁸ Haú yhumsing é yubak gungsho lé lhoq ngón rà matú hô kat é sù gi, myit haú mai htên byoq é hkyô lé myang hkam yù rà nghut lhê; haú Woi-nyí lé lhoq ngón rà matú hô kat é sù kúm gi, Woi-nyí haú mai ahtum abyuq é asak lé myang hkam yù rà nghut lhê. ⁹ Nga-nhúng gi, ge é hkyô kut é má nú byuq é bang a dut sháng gaq, hkâsu mù gà le, haú lé nga-nhúng a tô pyâm é nghut jáng, ahkyíng yam-yoq jé é hkún, nga-nhúng gi, akyû myang hkam yù rà nghut lhê. ¹⁰ Haú mù luí, nga-nhúng gi, kut rà ahkyíng wó tô é u lé, byù lunglhang bang lé ge é hkyô kut byi sháng, haú lumjîng hkyô eq séng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq eq hkâ-í kô é laiká cham kê kat byi é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haú su kut é hkyô gi, Hkrisduq é tapzîng é yanmai zing-ri huí é hkyô lé, koi pyám rà matú za nghut ri. ¹³ Hkâsu mù gà le, haú ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri. ¹⁴ Ngò kúm gi, nga-nhúng é Yhumsing Yesuq Hkrisduq é tapzîng eq séng luí gumrong é mai lai luí, haí má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. ¹⁵ Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huí é hkyô za sheq, ahkyak é nghut lhê. ¹⁶ Tarâ haú lé châng é

lhungháng bâng é ahtoq má le, haû Garai Gasâng é Israelaq byu pé* é ahtoq má le, nguingón hkyô eq shogyo nhikmyin hkyô gi, ru joq nyî sháng gaq ô.

¹⁷ Ahkuî mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.

¹⁸ Gumang wui ê, nga-nhông é Yhumsîng Yesuq Hkrisduq é jeju gi, nungmoq é woi-nyí eq ru joq nyî sháng gaq. Amen.

* **6:16** Bun zo shí lhum mâ é Israelaq byu pé gâ é gi, hpúng byû wui banshoq lé taí nau é nghut lhê.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haû sân-yúng bâng chyáng nguingón dang shit kyô kat lhê.

² Nga-nhông é Îwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

Hkrisduq Mâ É, Woi-nyí Hkyô Shimân Jeju Pé

³ Mauhkông htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhông lé shimân byi sù, nga-nhông é Yhumsing Yesuq Hkrisduq é Yhângwa, Garai Gasang gi, hkungsô wó nyi sháng gaq. ⁴ Hkâsu mù gâ le, nga-nhông gi, Garai Gasang é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhông lé hkyin yu to bê nghut ri. ⁵ Hau htoq agó, Yhang, nga-nhông lé chytidap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhông lé masat to bê nghut ri. ⁶ Haû mù, Yhang chytidap é Sù* má, nga-nhông lé laí laí byi bê nghut é, hpungwup shingkan bo é jeju chyunghuq lé, chôm hkya-on sháng. ⁷ Garai Gasang é agùn agó é jeju yanmai, nga-nhông mara hkyut byi é hui lui, Yhang Zô é sui dông mai, nga-nhông gi, Yhang má hkyi yù hkyô wó yu é nghut lhê. ⁸ Jeju haû lé gi, hpaqchyí byéng-yá eq sê gyô é nyan banshoq le kut, Yhang, nga-nhông lé agùn agó byi bê nghut lhê. ⁹ Garai Gasang gi, Yhang myit ngui é eq rajung za, Hkrisduq dông mai kut râ matú hen to bê nghut é, Yhâng é zaú tô é hkyô lé, nga-nhông lé shit bê nghut ri. ¹⁰ Sê gyo wui é hkyô haû gi, lhoq dik râ ahkying jé

jáng, mauhkông htoq eq myigùng htoq mâ é lhunglhang lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhông gi, Yhâng é hpungwup shingkan lé hkya-on kungtôn sháng gaq ga, ¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é dông, hí mai myit hpyit doqdân to bê eq rajung za, nga-nhông lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyo é gabú danglù gâ é tengmán mungdang lé wó gyo kô é hkún, Hkrisduq eq sêng é bang dut bekô nghut ri. Nungmoq gi, Hkrisduq lé lumjing bekô nghut é yanmai, haû gidig byi tô é Chyoiyúng Woi-nyí dizik htung tap byi é hui bekô nghut ri. ¹⁴ Garai Gasang é hpungwup shingkan lé hkya-on râ matú, Yhang eq sêng é byu pé hkyi xe yù hui é hkying jé shoq, Chyoiyúng Woi-nyí haû gi, nga-nhông é muizé lé hkyak wó yù râ nghu é masat nghut ri.

Poluq Kyûdung Byi É Hkyô

¹⁵ Haû mù lui, Yhumsing Yesuq lé nungmoq lumjing é hkyô eq sân-yúng bang lhunglhang lé nungmoq chytidap é hkyô lé, ngò wó gyô é yanmai, ¹⁶ ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-on nyi lhê. ¹⁷ Nga-nhông é Yhumsing Yesuq Hkrisduq é Garai Gasang nghut é, hpungwup shingkan bò sù haû Îwa gi, Yhang lé nungmoq je sé râ matú, hpaqchyí byéng-yá wó byi é eq san za wó sé nhang é Woi-nyí, nungmoq lé byi sháng gaq nghu, ngò, Yhâng chyáng dúng nyi lhê. ¹⁸ Hau htoq agó, Yhang, nungmoq lé ji yu é myit myoqbyù hkyô, hkasú é nghut é lé le, Yhâng é hpungwup shingkan bo é muizé gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi, lumjing bang nga-nhông é matú nghut é lé le, ¹⁹ nungmoq wó sé râ matú, nungmoq é myit myoqjí lhoq gyeng byi é hui sháng gaq nghu, ngò kyûdung byi nyi lhê. A-tsam mó haû gi, Garai Gasang, Hkrisduq lé shi é mai lhoq dui toq yù mù, ²⁰ mauhkông htoq

* **1:6** Yhang chytidap é Sù gâ é gi, Yesuq lé taí nau é nghut lhê.

tsáng myhâng má, Yhâng é loqyò hkyam shut zùng nhang é hkùn, chung é wum-o a-tsam mó eq rajung za nghut ri. ²¹ Hkrisduq gi, uphkang é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhâng é myìng lhunghâng é htoq má le, je gyaú é sù nghut lhê. ²² Hau htoq agó, Garai Gasang gi, lhungháng lé Yhâng é hkyiwa ô má tô to luí, haú noqkuq hpung é matú, Yhang lé, jung hkangmó é ushuq dut râ dông masat to bê nghut ri. ²³ Noqkuq hpung haú gi, Hkrisduq é gungdu nghut luí, hkyô hkangmó má jung hkangmó lhoq byíng Jup é Hkrisduq byíng nyi é nghut ri.

2

Hkrisduq Má Asak Dui É Hkyô

¹ Laí ló bê hkùn, nungmoq gi, tarâ lu laí é eq mara kut shut é hkyô pé é yanmai, shi tô é bang dut kô é nghut lhê. ² Haú hkùn, nungmoq gi, mingkan ngón hkyô pé má lhaq châng nyi kô é htoq agó, haú tarâ a châng bâng é myit má ahkuí mú zui nyi é sobyô nghut é, maulat lé up sù htang châng nyi kô é bang nghut lhê. ³ Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô naú gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dông za châng wú é bang nghut lhê. Haú mù, góbang eq rajung za, nga-nhúng gi, Garai Gasâng é nhikmoyo hkyô eq gingdán wú é bang chyat nghut lhê. ⁴ Nghut kôlhâng, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlhâng, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak dui nhâng bê nghut ri. ⁵ Haú mù, nungmoq gi, Garaí jejú èq za hkyi yu é hui bekô nghut ri. ⁶ Garaí Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga, ⁷ nga-nhúng lé, Hkrisduq eq rahá lhoq dui toq yú mù, mauhkùng htoq tsáng myhâng má, Yhang

eq rahá zùng nhang to bê nghut ri. ⁸ Hkâsu mù gâ le, nungmoq gi, lumjúng é dông mai Garaí jejú èq za hkyi yu é hui bekô nghut ri. Haú gi, nungmoq chyáng má é a nghut, Garaí Gasâng jeju chyunghuq za ru nghut lhê. ⁹ Haú gi, yhumsing é muzó mai wó é a nghut é yanmai, ó yuq le nghutbun râ hkyô a joq. ¹⁰ Hkâsu mù gâ le, nga-nhúng gi, Garaí Gasâng é loqmú pé nghut mù, nga-nhúng zui saí râ matú, hí hí mai, Garaí Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haú mù luí, nungmoq gi, hí hkùn, hku lé lo é mai yhang tungbaú pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhùm tô é bang; Israelaq mingbyú a nghut é bang; danggidiq eq sêng é dangshikaq pé má gó ming byù nghut é bang; mingkan htoq má, myoqbyù jowò a joq é eq Garaí a wó é bang nghut é lé, myitbun keq. ¹³ Nungmoq gi, hí hkùn wê gâng nyi é bang nghut kôlhâng, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.

¹⁴ Hkâsu mù gâ le, Yhânggùng yhang gi, nga-nhúng é nuingón hkyô nghut ri. Yhang gi, gyoro má kyo tô é madin nghut é a naú a wom hkyô lé hpyoq hpyi pyám byi luí, haú í myú* dut nyi é lé, rahú za dut nhâng bê nghut ri. ¹⁵ Haú hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htùm pyám bê nghut ri. Haú mù, Yhang ô nau é hkyô gi, haú í myú dut tô é lé, Yhânggùng má yhang, byù sik ra-myú za hpan to râ matú nghut ri; haú dông, simsaq hkyô kut byi bê nghut ri. ¹⁶ Yhang gi, a naú a wôm lhùm é hkyô lé, haú tapzîng má lhoq htùm pyám byi mù, haú tapzîng dông mai, byù myu í myu é lé ragùng za kut luí, Garaí Gasang eq xoq byi bê nghut ri. ¹⁷ Yhang gi, wê gâng nyi

* **2:14** I myú gâ é gi, Israelaq byu pé eq tungbaú pé lé gâ lhê. † **2:17** Wê gâng nyi é bang gâ é gi, tungbaú pé lé gâ lhê.

‡ **2:17** Chyâng htep nyi é bang gâ é gi, Israelaq byu pé lé gâ lhê.

é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri. ¹⁸ Hkâsu mù gâ le, nga-nhúng í myû gi, Yhang dông mai, Woi-nyí ralhum zâ èq, haû Íwâ chyáng wàng râ hkyô dong bê nghut ri.

¹⁹ Hau é yanmai, nungmoq gi, tungbaù pé eq byù bíng pé a nghut lô é za, Garaí é byu pé eq rahá, mingbyû wuì eq yhumbyû wuì chyat nghut bekô nghut luí, ²⁰ haû lagyô pé eq myiqhtoí pé, hi tô é apûn awang htoq má xuq tô é bang chyat nghut akô; Hkrisduq Yesuq yhang, haú mâ é ahkyak é htungchyûn luqgok dut bê nghut ri. ²¹ Yhang má, wahpang lhum gón xoq lhùm bùm é nghut mù, haû Yhumsîng má chyoiyúng noqkuq yhùm ralhum dut lò bê nghut ri. ²² Woi-nyí dông mai, Garaí Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

3

Poluq, Tungbaù Pé É Tarâ Hkô Sará

¹ Haû su nghut mù, Hkrisduq Yesuq é hkyô lé, nungmoq tungbaù pé chyáng hko kyô é yanmai, htongbyû dut sù, ngò Poluq gi, nungmoq é matú kyûdung byí lhê.

² Nungmoq lé dojaú râ é matú, ngo lé byí tô é Garaí Gasâng jeju ayá shí lé, nungmoq gè gè wó gyô wú bekô râ nghut lhê. ³ Haû gi, hí hkûn, ngò, tot é dông kê tô wú bê eq rajung za, haû zaú tô é hkyô lé, shing-rán dông ngo lé sé nhang é nghut ri. ⁴ Haú hkyô lé, nungmoq nghap wú é hkûn, Hkrisduq eq sêng é zaú tô é hkyô, ngò rago sê é lé, nungmoq wó sé kó râ nghut lhê. ⁵ Haû lé, lai lò bê ipyat pé mâ é byu pé lé a sé nhang é nghut kôhang, ahkuí gi, Garaí Gasâng é chyoiyúng é, lagyô pé eq myiqhtoí pé lé, haû Woi-nyí èq hpông shit bê nghut ri. ⁶ Zaú tô é hkyô haû gi, gabú danglù dông mai, Hkrisduq Yesuq má, Israelaq byu pé eq rahá, tungbaù pé le, hkûng xoq bang wó dut luí, gungdu ralhùm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byí tô é Garaí Gasâng jeju chyunghuq é yanmai, ngò gi, gabú danglù shí tai râ dui-nhâng zoshâng dut é nghut lhê. ⁸ Ngò gi, haû Garaí Gasâng é byu pé mâ é tiq dik sù htoq má lhang je tiq sù nghut kôhang, haû Hkrisduq é a ung htoq taí é wó sùt hkyô lé, tungbaù pé chyáng hko kyo râ matú le, ⁹ haû lunglhang lé hpan é Garaí Gasang má, lai lò bê ipyat pé má zaú tô é, zaú tô é hkyô haû lé hkâsu kut tô é lé, yuq hkangmó lé taí sân kyo râ matú le, jeju shí, ngo lé byi bê nghut ri. ¹⁰ Haû gi, nga-nhúng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹ haû Garaí Gasâng é hpaqchyí mó góng lé, noqkuq hpúng dông mauhkûng htoq tsang myhâng mâ é uphkang bang eq ahkáng ayá wó bang lé, ahkuí sé nhang râ matú nghut lhê. ¹² Nga-nhúng gi, nga-nhúng é Yhumsîng Hkrisduq Yesuq eq rad-ing ralhum za nghut é yanmai le, Yhang lé lumjîng é yanmai le, Garaí Gasang chyáng, wám é myit eq a gyuq a wàm é myit eq wó htep ê é nghut lhê. ¹³ Haû mù luí, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myit hkâgyui kó; haû gi, nungmoq é matú akyû bò râ hkyô nghut lhê.

Ehpesu Myuq Byu Pé Lé Kyûdung Byí É Hkyô

¹⁴ Haú pé é yanmai, ngò gi, haû Íwâ é hí má hkyihput htuq luí kyûdung é nghut lhê. ¹⁵ Mauhkûng eq myigùng htoq mâ é Yhâng é ikun byù lunglhang gi, Yhâng chyáng mai myìng wó yu é chyat nghut lhê. ¹⁶ Nungmoq é lumjîng myit mai, nungmoq é i-myit unghkaû má Hkrisduq wó nyi nyi sháng gaq nghû, ¹⁷ Yhang é hpungwup shingkang bo é agùn agó wó sùt é mai, nungmoq é i-myit unghkaû mâ é sù lé, Yhâng é Woi-nyí dông, hpungwup a-tsâm èq wum-o lhoq kîng byi râ matú, ngò kyûdung byi lhê. Hau htoq agó, nungmoq gi, chyit-dap myit má amyit chin to luí, awang hi to mù, ¹⁸ sân-yúng bang eq rahá, hau é apyí, a-tsung, myhâng, nik, hkâ-í nghut é lé, rago wó sé kôluí, ¹⁹ Garaí Gasâng é gumjup é

hkyô lunglhang êq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé rá matú, ngò kyúdung byi lhê.

²⁰ Ahkuí, nga-nhung é hkaú má mù zuí nyi é, Yhang é wum-o a-tsâm é yanmai, nga-nhung dung é banshoq eq myit é hkyô lunglhang htoq je wó kut byí é Su chyáng, ²¹ haú noqkuq hpúng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shing kang rû bo nyi sháng gaq ô! Amen.

4

Hkrisduq É Gungdu Má Rading Ralhum Za

¹ Haú mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haú Yhumsing é yanmai, htóng lúng sù ngò Poluq gi, nungmoq lé lhoq pun lhoq kyíng kat lhê. ² Hkyô hkat hkangmó má i-myyit lhoq nyhum é eq i-myyit nú-nhâm nyi keq; myit hing é eq chyitdap myit mai rayuq eq rayuq hkam jân lhúm nyi keq. ³ Haú Woi-nyí eq byí é myit hui hkyô lé, ngu-ingón hkyô dông mai châng nyi rá matú, wó dut é í shikut nyi keq. ⁴ Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri. ⁵ Yhumsing rayuq za, lumjín hkyô rahkat za, bapisma ralhum za nghut nyi ri. ⁶ Banshoq bâng é Íwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luí, lunglhang dông mai mù kut é eq lunglhang é ahkaú má lúng nyi sù nghut ri.

⁷ Nghut kôlhang, nga-nhung yuq hkangmó gi, jeju chyunghuq lé, Hkrisduq mai ké byí é dông wó yu é nghut lhê. ⁸ Haú é yanmai,

"Yhang gi, myhang é jowò shut doq ló é hkûn, shúm zung é bang lé gi, shuí chûng mù, byu pé lé gi, chyunghuq tsing gàm byí ri."*

ga, Chyúmdang má taí tô é nghut lhê. ⁹ Haú "doq ló" gâ é lichyúm gi, myigùng é a-o

tsáng má le, Yhang gyó jé bê nghut lhê, gá naú é a nghut lhi? ¹⁰ Haú gyó lé é Sù gi, jungkang jungmó lé lhoq byíng jup rá matú, mauhkúng banshoq é ahtoq má doq ló é Sù yhang nghut lhê. ¹¹ Yhang gi, ram lé, lagyô pé, ram lé, myiqhtoí pé, ram lé, gabú danglù hko kyo rá bang, ram lé, hpúng-up pé eq sará pé kut tsing byí to bê nghut ri. ¹² Haú bang gi, Garai Gasang é byu pé lé wùn waq âng é muzó pé é matú, hen lajâng é bang nghut ri. Haú hkûn sheq, Hkrisduq é gungdu gi, ¹³ haú lumjín hkyô eq Garai Gasang é Yhangzo lé sê é hkyô má, nga-nhung banshoq bang rading ralhum za wó dut mù, kô dîng bang dut luí, Hkrisduq é gumjup é isâm banshoq lé wó yu é hkûn jé shoq, wó kô jat nyi rá nghut lhê.

¹⁴ Haú mù, nga-nhung gi, wuibaù pé eq hí shut htâng shut bat myhû é su dut é eq, byu pé é agè ashop é eq haq dâ é mhoq hpyoq hpaqchyí pé eq mhoqshit hkyô laidun hkangmó eq, shí shut hé shut mut tâng é su dut é lé hui zô é zoshâng wuì su a nghut lô é za, ¹⁵ chyitdap myit mai tengmán é dang lé taí nyi jáng, Hkrisduq nghu é ulhum má hkyô hkangmó kô myhang lò rá nghut lhê. ¹⁶ Yhang dông mai, gungdu gón gi, ralhum eq ralhum htugbâng é gungsho showui showang pé lé xoq byí to bê nghut mù, gungsho showui showang haú pé gi, yhumsing é muzó lé zuí saí nyi é nghut jáng, gungdu haú gi, chyitdap myit má, yhanggùng yhang kô lò myhang lò rá nghut lhê.

Byù Sik Dông Asak Duì Râ Hkyô

¹⁷ Haú mù luí, haú Yhumsing é ahko ahkáng mai ngò nungmoq lé taí nau é hkyô gi, haú tûngbaù pé gi, akyû a bo é lé myit mù, asak duì kô é su, nungmoq gi, hkâkut kó. ¹⁸ Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byí é asak eq wê gâng byuq bekô nghut ri. ¹⁹ Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkangmó lé je wó kut xoq nyi shoq ga, yhumsing

* 4:8 Hkya-on 68:18

gùng lé, gungsho ô nau gadaú é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé haú dông mhoq yú kô é a nghut.

²¹ Nungmoq gi, Yesuq chyáng mâ é tengmán hkyô dông, Yhâng é hkyô lé wó gyô wú é eq mhoq yu wú bekô nghut lhê.

²² Haú mù, nungmoq gi, hí hpyang lhê é nungmoq é nyi yap sâmlai nghut é, ô nau gadaú luí, yhumsing gùng yhumsing mhaú pyám é dông htên byoq ló nyi é nungmoq é byù xau lé tô pyám râ matú mhoq yú bê eq rajung za, ²³ nungmoq é i-myt lé asik htaí pyám nhâng keq; ²⁴ hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haú mù, nga-nhúng banshoq bang gi, gungdu ralhum é gungsho showui showang pé chyat nghut é yanmai, nungmoq yuq hkanmó gi, mhaú é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê.

²⁶ "Nungmoq nhikjum yô é hkún, mara hkâkut kó."* nungmoq gi, bui wàng shoq nhikjum hkâyô nyi kó. ²⁷ Nat Tsadán lé le, jowò hkâbyi kó. ²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyú bo é hkyô pé lé kut nyi luí, muzó zuí shikut ra râ nghut lhê.

²⁹ Nungmoq é nhut mai agè agaú é dang haí le hkâhtoq nhâng kó; wó gyô é bang akyú bò shoq, yhangmoq râ tô é má cháng luí, haú bang kô lam lò râ dang za taí keq. ³⁰ Haú hkyi yù râ buinyi é matú, dizik dông nungmoq lé tap to byi é Garai Gasang é Chyoiyúng Woi-nyí lé hkâlhoq yón kó. ³¹ Haú myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé banshoq lé, nungmoq tô pyám keq. ³² Nungmoq gi, rayuq eq rayuq, ge é hkyô eq shogyo nhikmyin é hkyô tûn shit lhum luí, Garai Gasang gi, Hkrisduq má, nungmoq lé mara hkyut byi é su, nungmoq yhangchang le mara hkyut byi lhúm nyi keq.

5

¹ Haú mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq. ² Hkrisduq gi, Yhânggùng lé namngón jung hkungga eq shigu hkungga dông, nga-nhúng é matú Garai Gasang chyáng Yhânggùng yhang ap byi pyám shoq, nga-nhúng lé chyitdap é su, nungmoq le chyitdap myit èq asak dui nyi keq.

³ Hau htoq agó, ashop é dông gungsho zùm yap é hkyô, a sansêng é hkyô hkanmó eq myoqnoq é hkyô pé lé, nungmoq taí lhang hkâtaí kó; hkâsu mù gâ le, nungmoq gi, Garai Gasang é chyoiyúng byu pé nghut lhê. ⁴ Haú eq rajung za, a taí gíng é, ahoq ahí dang, dangsôm eq hkunchoq dông gyâ é dang pé lé a taí é za, jeju hkya-on dang za taí nyi keq. ⁵ Hkâsu mù gâ le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasang é mingdán má muizè a wó é hkyô lé, nungmoq sê nyi keq. ⁶ Ó yuq nghut kôle, dangsôm* dông mai nungmoq lé a wó mhaú kó sháng gaq; hkâsu mù gâ le, haú hkyô pé é yanmai, Garai Gasang é nhikmo-yo hkyô gi, haú jìno a gyo bâng é ahtoq má jé râ nghut lhê. ⁷ Haú mù luí, haú bâng chyáng hkâbo wang lóm kó.

⁸ Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haú Yhumsing má maubó pé nghut bekô nghut ri. ⁹ Haú Yhumsing ô nau é hkyô haí nghut é lé ho htoq yú mù, maubó é yhangzô pé dông asak dui keq. ¹⁰ Hkâsu mù gâ le, haú maubó é ashí gi, ge é hkyô banshoq, dingmán é hkyô eq tengmán hkyô chyat nghut ri. ¹¹ Haú ashí a zuí é mauchut tuq muzó má a bo wang lom é za, yhangmoq é mara lé tûn shit keq. ¹² Hkâsu mù gâ le, haú jìno a gyo bang haq zaú kut é hkyô lé gi, taí htoq le lhang hoq hpo nghut ri. ¹³ Nghut kôlhang, junghkang jungmó lé, haú maubó èq tûn shit jáng gi, wó byu-myang é chyat dut râ nghut lhê. ¹⁴ Hkâsu mù gâ le, junghkang jungmó lé

* 4:26 Hkya-on 4:4 * 5:6 Dangsôm gâ é gi, Garai Gasang é nhikmo-yo hkyô a jé râ ga taí é dang nghut lhê.

byu-myàng nhang é gi, maubó nghut ri. Hau é yanmai, "Yhup ngón nyi sù ê, toq aq, haù shi é mai dui toq aq hkoi; haù jáng, Hkrisduq gi, nang lé duqbó byi râ nghut lhê."† ga luí taí tô é nghut lhê.

15 Haù mù luí, nungmoq hkâsu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq. 16 Buinyi ahkyíng shí pé gi, agè ashop é yanmai, wó é ahko ahkáng banshoq lé ge dik é dông chung jài keq. 17 Hau é yanmai, byù ngok pé a dut é za, haù Yhumsing ô nau é hkyô gi, haí nghut é lé, sê gyô yu nyi keq. 18 Haù achaq achyut é yubak hkyô lhoq htoq é î lé hkâshuq wut kó; Woi-nyí lé kúm byíng nhang nyi keq. 19 Nungmoq gi, hkya-on kungtôn dang dông le, hkya-on mahkôn dang dông le, woi-nyí eq sêng é mahkôn dông le, rayuq eq rayuq dáng nyo lhum luí, nungmoq é i-myt unghkaù mai, haù Yhumsing lé mahkôn hkôn mù, lhoq ngón nyi keq. 20 Nga-nhúng é Yhumsing Yesuq Hkrisduq é myíng lé lang luí, jung hkanmó é matú, haù Íwa Garai Gasang lé, hkâ-nhám le jeju hkya-ôn nyi keq.

21 Hkrisduq lé hkungga hpautap é myit eq, rayuq eq rayuq hpautap lhúm nyi keq.

Myi Eq Làng

22 Ikun myhí pé ê, haù Yhumsing uphkan é dông châng é su, nungmoq é ikun hpô pé uphkan é dông châng nyi keq. 23 Hkâsu mù gà le, Hkrisduq gi, haù noqkuq hpúng é ulhum nghut é su, haù ikun hpó gi, ikun myhí é ulhum nghut nyi ri; Hkrisduq gi, haù Yhàng gungdu nghut é noqkuq hpúng lé hkyi yù Sù nghut ri. 24 Haù noqkuq hpúng gi, Hkrisduq uphkan é dông châng é su, ikun myhí pé le, hkyô hkat hkanmó má, yhangmoq é ikun hpô pé uphkan é dông châng nyi râ lhê.

25 Ikun hpô pé ê, Hkrisduq gi, haù noqkuq hpúng lé chyitdap luí, hau é matú Yhànggùng lé Yhang ap pyám é su, nungmoq é ikun myhí pé lé chyitdap nyi keq. 26 Yhang haù su kut é gi, haù noqkuq hpúng

lé, mungdang dông wui má chí pyám luí, lhoq sân-yúng yù râ eq, 27 haù noqkuq hpúng gi, agè agáu é eq a-ká akông é hkyô haí le a bo é za, mara hún râ hkyô a bo é eq chyoiyúng é, hpungwup shingkan bo é noqkuq hpúng dông, Yhànggùng lé wó ap byi râ matú nghut lhê. 28 Haù eq rajung za, ikun hpô pé gi, yhangmoq é ikun myhí pé lé, yhumsing gungdu lé su chyitdap râ dut lhê. Yhumsing é ikun myhí lé chyitdap é sù gi, yhumsing gùng lé le, chyitdap é sù nghut bê. 29 Ó yuq le, yhumsing gùng lé a chyitdap a kut é za, Hkrisduq gi, haù noqkuq hpúng lé kut byi nyi é su, yhumsing gùng lé byi tso byi huq luí, rago wú zúng nyi é nghut lhê. 30 Hkâsu mù gà le, nga-nhúng gi, Yhàng é gungdú é gungsho showui showang pé chyat nghut lhê. 31 Haù mù, "Hau é yanmai, yuqgè gi, înu îwa eq gang luí, yhangmyi eq zùm-yap mù, yhangnhik í yuq gi, gungsho ralhum za dut kó râ nghut lhê."* gà tô ri. 32 Haù hkyô gi, gyai yhang zaú tô é hkyô nghut ri. Nghut kôlhàng, ngò gi, haù Hkrisduq é hkyô eq noqkuq hpúng é hkyô lé taí nyi é nghut lhê. 33 Haù mù, nungmoq yuq hkanmó gi, yhumsing gùng lé chyitdap é su, yhumsing é ikun myhí lé le chyitdap râ dut lhê; haù ikun myhí le, yhàng é ikun hpó lé hkungga râ dut lhê.

6

Zo Wuí Eq Mó Wui É Hkyô

1 Zoshàng wui ê, haù Yhumsing má, nungmoq é mó wui é jìno gyo keq; hkâsu mù gà le, haù gi, kut gíng é hkyô nghut ri. 2 "Náng é înu îwa lé hkungga aq. 3 Haù jáng, nàng, nyi ngón yuqyò mù, myidàm htoq má náng é asak chyungxe hing nyi râ nghut lhê."* gà é dang gi, danggidiq lom é sâng-hí lhum hkanmó nghut ri.

4 Íwa pé ê, nungmoq é zo wui lé nhikjum a lhoq yô é za, haù Yhumsing é mhoq kyo hkyô eq mhoqshit lhoq pun hkyô dông yhangmoq lé baú kô nyi keq.

Jùn Pé Eq Junsing Pé É Hkyô

5 Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzuí é

† 5:14 Dang ngho shí gi, hí lhê é noqkuq hpúng pé taí gyó lo é dang nghut lhê. * 5:31 Apùn 2:24 * 6:3 Htoq Ló 20:12

myit mai, nungmoq é myidàm htoq mâ é junsing pé é jìno gyo keq. ⁶ Nungmoq gi, yhangmoq é hí má za, myoqdong ho é dōng kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myt unghkaû mai châng kut nyi keq. ⁷ Byù lé za dojaú é dōng a nghut é za, haû Yhumsing lé dojaú nyi é dōng le, shirông myit èq dojaú nyi keq. ⁸ Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haû Yhumsing gi, yuq hkanmó lé shigyaú râ nghut é lé, nungmoq sê nyi lhê.

⁹ Junsing pé ê, nungmoq le, nungmoq é jùn pé lé haû eq rajung za kut byi nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpó gi, mauhkung htoq má nyi é nghut luí, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

¹⁰ Ló htàng má, taí nau é hkyô gi, haû Yhumsing eq Yhâng é hpungwup a-tsam mó má wum-o bo nyi keq. ¹¹ Haû nat Tsadán wá dâ é hpaqchyí pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq. ¹² Hkâsu mù gâ le, nga-nhung gi, gungsho eq sui lé htuq htíng é bang a nghut é za, haû uphkang bang, ahkáng ayá wó bang, mauchut tuq dut é mingkan shi é a-tsam pé eq mauhkung htoq tsáng myhâng mâ é agè ashop é byò eq sêng é wum-o pé lé, htuq htíng é bang ru nghut lhê. ¹³ Haû mù luí, Garai Gasâng é gyè hking banshoq lé wut to keq; haû hkûn sheq, nungmoq gi, agè ashop hkyô jé é buinyi má, yhumsing jowò má wó yap gíng to mù, hkyô hkat hkanmó lé ban kut jáng, wó yap gíng tít nyi kó râ nghut lhê. ¹⁴ Haû mù, nungmoq é hpyidum má tengmán hkyô hpyihit hit mù, dítmán hkyô wànggò-long lé gò luí, ¹⁵ nungmoq é hkyi má gi, haû simsaq hkyô byi é gabú danglù hkô râ rì rì kut to mù, gíng gíng yap nyi keq. ¹⁶ Hau htoq agó, haû agè ashop su é myiduq é myoshi lhunglhang lé wó sat ung pyám râ matú, lumjít hkyô nghu é golong lé chung to keq. ¹⁷ Hkyi yù hkyô shamtoq muq lé tsung to luí, Garai Gasâng

é mungdang nghut é, haû Woi-nyí é shâm lé wun chùng keq. ¹⁸ Ahkyíng hkanmó má, kyûdung dang eq dúng tóngbán é dang ajung júng èq, haû Woi-nyí má kyûdung nyi luí, machya nyi uchyang, sân-yúng bang banshoq é matú, hkâ-nhám le, xoq xoq kyûdung byi nyi keq.

¹⁹ Haû gabú danglu é yanmai, shamtoqtui hut huí é lagyo rayuq ngò nghut nyi kôlhang, haû gabú danglù nghut é zaú tô é hkyô lé, a gyuq a wàm wó taí kyo luí, ²⁰ ngò taí râ dut é lé, a gyuq a wàm wó taí sân kyo shoq, ngá nhut hpóng hkanmó, ngò taí râ mungdang pé lé byi sháng gaq, ngá é matú le, kyû bo dung byi nyi keq.

Shi-kyám Dang

²¹ Haû Yhumsing má, chyitdap é gumang eq lhumzuí é dui-nhâng zoshâng nghut sù, Tuhkiku gi, nungmoq lé jung hkanmó taí kyo râ nghut luí, ngò hkâsu nghut nyi é hkyô eq haí kut nyi é hkyô lé, nungmoq wó sé kó râ nghut lhê. ²² Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luí, yhang lé, ngò, nungmoq chyáng nhang kat é nghut lhê.

²³ Íwa Garai Gasang eq Yhumsing Yesuq Hkrisduq chyáng má é lumjít hkyô má bo é chyitdap myit eq nguingón hkyô gi, haû gumang wui chyáng ru joq nyi sháng gaq ô! ²⁴ A dat htúm é chyitdap myit mai, nga-nhung é Yhumsing Yesuq Hkrisduq lé chyitdap é lhunglhang bang chyáng, Garaí jeju gi, ru joq nyi sháng gaq ô!

HPILIPÍ Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglháng eq, hpúng-up, hpungte pé lé, dang kyô kat lhê.

² Nga-nhùng é Íwa Garai Gasang eq Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyi sháng gaq ô.

Jeju Hkya-ôn É Hkyô

³ Ngò gi, nungmoq lé myit bûn kat hkangmó, ngá é Garai Gasang lé jeju hkya-ôn nyi lhê. ⁴ Ngò gi, kyûdung hkangmó, hkânám le nungmoq banshoq bâng é matú gabú myit eq dung byi nyi lhê. ⁵ Hkâsu mù gâ le, nungmoq gi, sânghî nyi mai ahkuí jé shoq, gabú danglù má ngò eq chôm zùm yap nyi é yanmai nghut lhê. ⁶ Haú nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haú lé lhoq pán rá nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haú gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê. ⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za, ¹⁰ Garai Gasang é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyi sháng gaq nghû le; ¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹² Gumang wui ê, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ríng jat lò rá matú dut lò bê nghut ri.

¹³ Hau é yanmai, haú hkohkâm-wâng zúng é lhunglháng bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴ Hau htoq agó, ngò htóng lúng é yanmai, haú Yhumsing Yesuq má gumang wui nghut é myo mi-myó gi, myit wum wó yú kômù, Garai Gasang é mungdang lé, je riyhang a gyuq a kyum wám hko kyo bekô nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri. ¹⁶ Ge é myit mai hko é bang gi, gabú danglù lé húng rá matú ngo lé hkyin é hkyô lé, yhangmoq sé kômù, chyitdap myit eq hko kyô é bang nghut akô.

¹⁷ Haú góbang chyaú gi, sanséng é i-myit eq a nghut é za, ngò kyum wut é hkyô má wuîhke jamjau jat byi rá matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko taí nyi bum akô nghut ri. ¹⁸ Nghut kôlhang, haú gi, haí rá ri lú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê. ¹⁹ Hkâsu mù gâ le, nungmoq kyûdung byi é eq Yesuq Hkrisduq é Woi-nyí garúm é yanmai, ngò má dut lai lò bê hkyô gi, ngò wó luthkyô dut rá nghut é lé ngò sê lhê. ²⁰ Ngò myit lánng tô é eq myit myoqbyù tô é má, ngò gi, hoq nó haí a rá é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yú mù luí, Hkrisduq gi, ngá gúng má hkya-on waq toq é hui rá nghut lhê. ²¹ Hkâsu mù gâ le, ngò, asak dui nyi le gi, Hkrisduq é matú, shí jáng gi, ngá e amyat nghut ri. ²² Nghut kôlhang, ngò gi, gungsho má rû dui nyi mù, ngò kut é muzó má ashi zúí lo é nghut le gi, hká lhum lé sheq hkyin yu le gè rá lú? ²³ Ngò gi, hkyô í hkat gyoro má

hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gâ le, haû gi, je ge é hkyô nghut ri. ²⁴ Nghut kôlhang, ngò gungsho má dui nyi le gi, nungmoq é matú akyû je bò râ nghut lhê. ²⁵ Haû mù, ngò gi, shí hkyô lé hkyak myit lum to luí, lumjínng hkyô má nungmoq kô jat lo é eq gabú nyi râ matú, nyi gyó luí, nungmoq lhunglhâng bang eq nyi nyi râ hkyô lé, ngò sê lhê. ²⁶ Haû mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷ Haí wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huí lhûm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhum má za yap gíng to mù, haû gabú danglù lé lumjínng hkyô má, i-myit rahkat zâ èq shikut nyi kô é hkyô lé le; ²⁸ nungmoq gi, hká hkyô má nghut kôlhang, gyè pè èq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê. ²⁹ Hkâsu mù gâ le, Hkrisduq má wó lumjínng râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri. ³⁰ Haû gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq rading ralhum za nghut nyi é yanmai, myit wum byí é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi, ² nungmoq gi, haû i-myit huí é hkyô rahkat za, chyitdap myit rajung za, myit nhiklhum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq. ³ Yhumsing é wuizat é dông le, akôm gyáng pyâm é dông le, haí le a kut é za, myit

lhoq nyhum nyi mù, góbang gi, nungmoq htoq má je gyaú lhê nghû myit yu nyi keq.

⁴ Nungmoq yuq hkangmó gi, yhumsing eq sêng é lé za a nghut, góbang eq sêng é lé le, myit byi râ lhê.

⁵ Hkrisduq Yesuq má bo é myit yhang, nungmoq chyáng bò râ dut lhê.

⁶ Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

⁷ Yhânggùng lé lhoq gôm pyám luí, dui-nhâng zôshang é gunghkyâng lé yu chùng mù, xângzo byù gùng roq lé dut bê nghut ri.

⁸ Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí,

haû tapzîng htoq má lháng tap sat pyâm é hui shoq jîno gyô ri.

⁹ Haû mù luí, Garai Gasang gi, Yesuq é myîng lé mauhkûng htoq mâ é hkyihput,

myidàm htoq mâ é hkyihput eq mom-îng mâ é hkyihput hkangmó htuq paí luí,

¹⁰ haû Íwa Garai Gasâng é hpungwup shingkâng é matú, Yesuq Hkrisduq gi, Yhumsing nghut lhê nghû,

nhut shô hkangmó yín yû sháng gaq ga,

¹¹ myhang htâng é jowò má Yhang lé lhoq toq tô é eq, myîng lhunglhâng é htoq má gyaú é myîng haû,

Yhang lé byí to bê nghut ri.

Kyî Pé Su Duqbó Nyi Râ Hkyô

¹² Haû mù luí, ngò chyitdap é luzúm wuî ê, nungmoq gi, hkâ-nhâm le jîno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyí keq. ¹³ Hkâsu mù gâ le, Garai Gasang gi, Yhang ô nau é hkyô lé, kut naû râ myit èq wó kut râ hkyô lé nungmoq má lhoq htoq byí nyi é sù nghut lhê.

¹⁴ Haí kut kôlhang, taí put lhûm é dông, haû a nghut jáng, dang jet jet lhûm é dông hkâkut kó. ¹⁵ Haû jáng sheq, myit goí é, agè ashop é pyat hkaû má, nungmoq gi, mara

a bo é, sân-yúng é, shut hkyô a bo é, Garai Gasâng é yhangzô pé dut kó râ nghut lhê. ¹⁶ Hau htoq agó, nungmoq gi, asak mungdang lé chung htoq uchyang, mauhkûng mâ é kyî pé su, yhangmoq chyáng wó duqbó nyî kó râ nghut lhê. Haú hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyî má gumrông jowò wó berâ nghut lhê. ¹⁷ Nghut kôlhang, ngò gi, shuq jung hkungga* ralhú su, nungmoq é lumjîng myit mai nhongjaú byî é shigu hkungga ahtoq má hut gyûn pyâm é hui le lháng, gabú luî, nungmoq banshoq bang eq rahá chôm gabú nyi lhê. ¹⁸ Haú eq rajung za, nungmoq le gabú luî, ngò eq rahá chôm gabú nyi râ dut lhê.

Timohti Eq Epahprodi Nhik Lé Nhang Kat Râ Gà É Hkyô

¹⁹ Ngò gi, nungmoq chyáng Timohti lé hân za wó nhang kat râ lé, haú Yhumsîng Yesuq má myit myoqbyu nyi lhê; haú hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê. ²⁰ Nungmoq é hkyô lé, yhang su hkyak za ge myit chiq byî é byù gotû rayuq le ngò a wó. ²¹ Hkâsu mù gà le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akò nghut ri. ²² Yhang kúm gi, zo rayuq mai îwa lé htuqbâng é su, haú gabú danglù hkyô má ngò eq rahá dojaú é yanmai, yhâng lumluq é hkyô tân shit é lé, nungmoq sê nyi lhê. ²³ Haú mù luî, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê. ²⁴ Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haú Yhumsîng má hkyak lum nyi lhê.

²⁵ Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé

nungmoq chyáng dum nhang taú kat byi râ lhê nghû, ngò myit hpyit to bê nghut lhê. ²⁶ Hkâsu mù gà le, yhang gi, nungmoq lhunglhâng bang lé myàng nau nyi é za a nghut, yhang no é hkyô lé nungmoq wó gyo bekò nghut é yanmai, gyai yhang myit myo myit chiq nyi ri. ²⁷ Gè gè yhang, yhang gi, aluq shoí shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri. ²⁸ Haú mù luî, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byi nau ri. ²⁹ Nungmoq gi, gyai yhang gabú é myit èq, haú Yhumsîng má yhang lé lhom hkûlum yù mù, yhang su dut é bang lé hkungga keq. ³⁰ Hkâsu mù gà le, yhang gi, ngo lé nungmoq a wó garúm é hkyô lé garúm râ matú, yhâng é asak lé lháng a ha loshoq kut mù, haú Hkrisduq é muzó é yanmai, aluq shoí shoí shi é hui zô ri.

3

Gungsho Má Lumhkaú Râ Hkyô A Joq

¹ Hau htoq agó, ngá é gumang wuî è, haú Yhumsîng má gabú nyi keq! Rajung zâ é hkyô lé, nungmoq é matú dum puq ká byi râ gi, ngò má wuî é hkyô haî a joq, nungmoq é matú akyû dut râ matú sheq ru nghut lhê.

² Haú, hkuî pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.* ³ Hkâsu mù gà le, Garai Gasâng é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaú é bang, nganhúng gi, ahpyo-kuq hpyit hkam yu é bang akying† nghut lhê. ⁴ Ngò kúm gi, gungsho má lumhkaú râ hkyô wó ang sù nghut lhê.

Góbang rayuq yuq, haú gungsho má lumhkaú râ hkyô wó âng lhê ga myit é nghut le gi, ngò gi, je riyhang wó sù nghut lhê. ⁵ Ngò gi, hkû lé é htâng shit nyi nghû

* **2:17** Shuq jung hkungga gà é gi, tsibiyiq wing ragóm lé myi htoq má hut pyâm é dông Garai lé gyuq hkunggá é hkyô lé tân shit é nghut lhê. Bun zo shî má shî hkâm é hkyô lé taí nau é nghut lhê. * **3:2** Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê. † **3:3** Ahpyo-kuq hpyit hkam yu é bang akying gà é gi, Garai Gasâng é yhangzo hkyak nghut bê bang lé gà lhê.

râ nyí má ahpyo-kuq hpyit bê sù; Israe-laq amyû mâ é, Ben-yamyin é awut ashín nghut sù, Hebre byù má é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; ⁶ shirong é hkyô eq séng luí ga jang, ngò gi, haû noqkuq hpúng lé zing-rî wú bê nghut lhê; jep é tarâ má é dingmán hkyô eq séng luí ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sùm byuq é chyat nghut bê nghû myit yù bê nghut lhê. ⁸ Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gà le, lhunglhang lé ngò tô pyâm é gi, Yhang é yanmai nghut lhê. ⁹ Ngò gi, Hkrisduq lé wó yû râ eq, Yhang eq rahá wó nghut nyí râ matú, haû jung hkangmó lé buzaq nghû myit yu pyâm bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lhê; haû gi, lumjîng myit mai wó é nghut lhê. ¹⁰ Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri. ¹¹ Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

Myit Myoqbyu Tô É Jowò Shut Din Nyí Râ Hkyô

¹² Ngò gi, haû pé banshoq lé wó gû bê le a nghû naù, ngò gumjup gù bê le a nghû naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghû, châng hkat nyi lhê. ¹³ Gumang wuì ê, ngò yhang ngò gi, haû lé wó hap yù bê nghû a myit; nghut kôlhang, ngò kut é muzó ralhum gi, nunghtáng má é lé tô-myhî pyâm mù, myoq hí má é lé wó yû shoq nghû shikut luí, ¹⁴ Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yû râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglhang gi, haû sù é myit bò râ lhê. Rajung jung má

nungmoq myit é hkyô shai nyi kô é nghut le gi, haû lé le, Garai Gasang gi, nungmoq lé san za tân shit râ nghut lhê. ¹⁶ Hká dông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyi sháng.

¹⁷ Gumang wuì ê, nungmoq gi, ngò kut é dông chôm kut nyi keq, ngamoq mai nungmoq lé kut shit é alik eq rajung za châng é bang lé wú yû keq. ¹⁸ Hkâsu mù gà le, hí hkùn ngò, nungmoq lé anum num taí kyô wú luí, ahkuí lhang, ngaù byí eq dum taí kyô é eq rajung za, Hkrisduq é tapzîng lé gye kut é bang myo myo nyi bum akô nghut ri. ¹⁹ Yhangmoq é jiltûm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit gi, mingkan zè htoq má za nghut ri. ²⁰ Nghut kôlhang, nga-nhúng é yhummau gi, mauhkûng mingdán má nghut lhê. Nga-nhúng gi, haû má é Yhumsîng Yesuq Hkrisduq gà é hkyi yù Sù lé, myoqbyu lánng nyi é bang nghut lhê. ²¹ Yhang gi, jung hkangmó lé, Yhang uphkan é a-ô má wó kut tô é Yhâng é a-tsâm eq nga-nhúng é htên byoq sê é gungdu lé htaí lhik pyâm byi luí, Yhâng é hpungwup bo é gungdu su dut nhâng râ nghut lhê.

4

¹ Haû mù luí, chyitdap é luzúm wuì le nghut mù, ngò chyitdap bún nghâm nyi é, ngá é gabú jowò eq janmaù nghut nyi é, ngá é gumang wuì ê, haû gi, Yhumsîng má nungmoq hkâsu kut yap gîng nyi râ hkyô nghut lhê.

Lhoq Pun Lhoq Kyîng É Hkyô

² Ngò gi, Uodia eq Suntuki nhik lé, haû Yhumsîng má rayuq eq rayuq myit huí lhûm nyi râ matú, gyai yhang pying kat lhê. ³ Ngá é mù wùn luzúm kyîng ê, ngò gi, myiwe shí nhik lé garúm yû laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mù wùn luzúm wuì góbang eq le, haû gabú danglù hkyô má ngò eq rahá gyai shikut wú bê sù nhik nghut lhê.

⁴ Haû Yhumsîng má hkâ-nhám le gabú nyî keq! Ngò dum taî lhê, gabú nyî keq!
⁵ Nungmoq nú-nhâm é hkyô, byù banshoq bang lé sé nhâng keq. Haû Yhumsîng gi, chyáng bê nghut ri. ⁶ Haî eq séng luî le, myit hkâ-myo hkâchiq kó; hkyô hkangmó má jeju hkyá-on uchyang, kyûdûng é eq dûng tôngbán é dông, nungmoq dûng é hkyô pé lé, Garai Gasâng chyáng shit kyô nyî keq.
⁷ Haú hkûn, sé gyô é nyan banshoq htoq má gyaú é, Garai Gasâng é nguingón hkyô gi, nungmoq é myit nhiklum eq nungmoq myit é hkyô lé, Hkrisduq Yesuq má upzúng byî nyî râ nghut lhê.

⁸ Jihtûm má, gumang wuî ê, tengmán é, hpautap gíng é, dingmán é, sansêng é, wó chyitdap é, hkungga gíng é, haî má nghut kôlhang, aróng wó dik é hkyô rajung jung, a nghut jáng, hkyá-on gíng é hkyô rajung jung bo é nghut le gi, haû sû é hkyô pé lé myit nyî keq. ⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haî lé le châng kut nyî keq. Haú hkûn, nguingón hkyô byî é Garai Gasang gi, nungmoq eq rahá nyî nyî râ nghut lhê.

Jeju Bûn É Hkyô

¹⁰ Ahkuî kúm gi, ngá é hkyô lé nungmoq dum myit chiq byi kô é yanmai, ngò gi, haû Yhumsîng má gyai yhang gabú nyî lhê; gè gè yhang, nungmoq myit chiq byî nyî kôlhang, haû lé tûn shit râ ahkáng a wó kó nghut ri. ¹¹ Ngò îsu nghû taî nyî é gi, ngò má râ é hkyô bo tô é yanmai taî é a nghut, hkâsu mù gâ le, ngò gi, ngò hui mihui má, nhik dik nyî râ matú mhoq yù bê nghut lhê.
¹² Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkangmó eq dut tô é ahkyo lhum jup má, wam gyi kôlhang, zòmut kôlhang, agùn agó wó tô nyî kôlhang, ra châ to kôlhang, myit dik nyî râ hpaqchyî lé ngò wó mhoq yù bê nghut lhê. ¹³ Ngò gi, ngo lé wum-o a-tsam byi sû Hkrisduq é yanmai, hkyô hkat hkangmó wó kut lhê.

¹⁴ Nghut kôlhang, ngò wuîhke jamjau huî nyî é hkûn, nungmoq garúm yù kô é gi, ge é hkyô kut bekô nghut ri. ¹⁵ Hau htoq agó, Hpilipi byu pé nungmoq sê é eq rajung za,

haû gabú danglù lé, ngò hkô mù nungmoq wó gyô yu hi é buinyî pé má, ngò Make-doni mau mai htoq ló râ hkûn, haû byî é hkyô eq lhom yu é hkyô má, nungmoq mai lai luî, noqkuq hpúng gotû ralhum lhang, ngo lé garúm kat é hkyô a bo é nghut lhê.
¹⁶ Ngò Htesaloni wà mó má nyi tô é hkûn lé lhang, nungmoq gi, ngò ra châ é hkyô lé adàm dâm hûn byi bekô nghut ri. ¹⁷ Ngò gi, chyunghuq chyunghtâng lé ho nyi é a nghut, nungmoq mai ashi je myo zuî jat râ matú lé za sheq ho nyi é nghut lhê. ¹⁸ Ngò gi, haî le gúm shoq myang yu é htoq agó, chyân shoq lhang nghut bê. Ahkuî, haû nungmoq hun kat é chyunghuq lé, Epah-prodi chyáng mai ngò lhom myang yù luî, ngò má agùn agó nghut nyî bê. Haû pé gi, namngón jung hkungga su, Garai Gasang lé gabú nhang é, hap yù gíng é hkungga ralhum nghut ri. ¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

²⁰ Hpungwup shingkang gi, nga-nhûng é Îwa Garai Gasâng chyáng pyat dedu ahtum abyuq ru joq nyî sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuî gi, nungmoq lé shi-kyâm kat akô nghut ri. ²² Sân-yúng bang banshoq gi, nungmoq lé shi-kyâm kat akô; Kehtaq é yhûm mâ é sân-yúng bang gi, je riyhang shi-kyâm kat akô nghut ri.

²³ Yhumsîng Yesuq Hkrisduq é jeju gi, nungmoq banshoq bang eq rahá ru joq nyî sháng gaq ô!

KOLOSE Pê Chyáng Hun Kat é Laiká (Colossians)

¹ Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhông é gumang Timohti gi, ² Kolose và mó má nyi bang nghut é, Hkrisduq má chy-oiyúng bang nghut é, lhumzuí é gumang wui chyáng dang kyô kat lhê. Nga-nhông é Íwa Garai Gasâng chyáng mâ é jeju eq nguingón hkyô gi, nungmoq chyáng ru joq nyi sháng gaq.

Jeju Hkya-ôn É Eq Kyûdung É Dang

³ Ngamoq gi, nungmoq é matú kyûdung byi é hkûn, nga-nhông é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê. ⁴ Haí mù gâ le, Hkrisduq Yesuq má nungmoq lumjing hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. ⁵ Lumjing myit eq chyitdap myit haú gi, nungmoq é matú mauhkung htoq má hkong to byi é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gû nghut lhê. ⁶ Nungmoq gi, gabú danglù haú lé wó gyo lui, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashì zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashì zuí nyi é eq kô myhang nyi bê nghut ri. ⁷ Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng mù wùn sù nghut lhê. ⁸ Yhang gi, haú Woi-nyí eq nungmoq lé byi tô é chyitdap hkyô lé, ngamoq lé tai kyo sù le nghut ri.

⁹ Haú nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyûdung byi nyi lhê. Garai Gasang ô nau é hkyô lé sé rã

hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pying byi sháng gaq nghù, Yhâng chyáng kyûdung byi nyi lhê. ¹⁰ Haú su kut kyûdung byi é gi, haú Yhumsing ô nau é hkyô eq gingdán é dông nungmoq asak wó duí lui, hkyô hkangmó má Yhang lé wó gabú nhâng rã matú nghut lhê. Hau dông mai, nungmoq gi, ge é muzó hkangmó má ashì zuí nyi lui, Garai Gasang lé sê é hpaqchyí má kô myhang nyi kó rã nghut lhê. ¹¹ Hau htoq agó, nungmoq gi, Yhâng é hpungwup a-tsam dông mai a-tsam banshoq eq wum-o lhoq king byi é huí nyi kó rã nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yù kó rã nghut lhê. ¹² Maubó é mingdán má, sân-yúng bang eq sêng é muizè lé wó bo hkam yù rã matú, nungmoq lé gingdán nhang é sù haú Íwa lé le, jeju wó hkya-on kó rã nghut lhê. ¹³ Hkâsu mù gâ le, Íwa haú gi, nga-nhung lé, mauchut eq up é hkaú mai hkyi htoq yù lui, Yhang chyitdap é Yhang Zô é mingdán má shuî hâng é Sù nghut lhê. ¹⁴ Nga-nhung gi, haú Yhang Zo dông mai, hkyi xe yu é huí mù, yubak mara hkyut pyám byi é huí bê nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq eq a byu-myàng é Garai Gasâng é gungghyâng isâm nghut lui, zomún dông hpan tô é lhunglhang htoq má gyaú é sù nghut ri. ¹⁶ Hkâsu mù gâ le, mauhkung eq myigùng htoq má joq é azing zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkang bang, ahkang ayá wó bang nghut kôle, lhunglhang gi, Yhâng eq hpan to huí é chyat nghut lhê. Lhunglhang gi, Yhâng é matú, Yhâng eq hpan to huí é chyat nghut ri. ¹⁷ Yhang gi, lhunglhang é hí mâ é nghut mù, lhunglhang gi, Yhâng é yanmai joq ging bum é chyat nghut lhê. ¹⁸ Yhang gi, noqkuq hpúng nghu é gungdú é ulhum nghut ri; Yhang gi, jung hkangmó má gyaú dik é ushuq dut sháng gaq ga, sâng-hi awang nghut sù eq shi é bang mâ é hí dui toq é zomún dut sù nghut ri. ¹⁹ Hkâsu

* **1:5** Bun zo shí má bo é myit myoqbyù hkyô gi, Yesuq lé tai é nghut lhê.

mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi rá lé myit ngui ô nau é nghut mù, ²⁰ haù tapzîng má htoq byî é Yhang Zô é sui dông mai nuingón hkyô kut byî é eq, myigùng htoq mâ é azíng zê nghut nghut, mauhkûng mâ é azíng zê nghut nghut, lunglhang lé, Yhang Zo dông mai, Yhang eq nuingón simsaq hkyô xoq yû bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlaí é yanmai, nungmoq i-myit má, Yhâng é gyè dut wú bekô nghut lhê.

²² Nghut kôlhang, ahkuí, Garai Gasang gi, nungmoq lé, rá é hkyô a bo é eq mara hûn rá hkyô a bo é za, chyoiyúng é dông Yhâng é hí má shit rá matú, Hkrisduq é gungsho gungdu shî hkâm é dông, nungmoq eq nuingón simsaq hkyô xoq yû bê nghut ri. ²³ Haù gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gíngtîng nyi mù, nungmoq é lumjîng hkyô má xoq nyi nyi é nghut jáng sheq dut rá nghut lhê. Gabú danglù shî gi, nungmoq wó gyô wú bê nghut é htoq agó, mauhkûng ô má hpan tô é jung hkangmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, rá tô ashî nghut é, Yhang hpuzô é hkyô lé, ngá é gùng má ngò lhoq gumjup yu nyi lhê. ²⁵ Ngò gi, Garai Gasang é mungdang lé, nungmoq chyáng gumjup shoq hko kyo rá matú, Garai Gasang, ngo lé hun tô é wò mai, noqkuq hpúng hau é mú wùn sù dut é nghut lhê. ²⁶ Mungdang haù gi, gohkûn mai apyat pyat haq tô gyó lo é zaú tô é hkyô nghut kôlhang, ahkuí gi, haù sân-yúng bang lé hpông shit bê nghut ri. ²⁷ Garai Gasang, haù su kut é gi, zaú tô é hkyô hau é agùn agó hpungwup shingkang, tûngbaù pè chyáng hkâsu nghut é hkyô, yhangmoq lé sé nhâng rá matú nghut lhê. Zaú tô é hkyô haù gi, hpungwup shingkang lé myoqbyù é hkyô

nghut é, nungmoq má Hkrisduq dui nyi bê hkyô lé gâ é nghut lhê.

²⁸ Hkrisduq má gumjup é dông, byù yuq hkangmó lé wó shuí jé sháng gaq nghû, ngamoq gi, Hkrisduq é hkyô lé taí pyô luí, yuq hkangmó lé, hpaqchyí byéng-yá banshoq eq taí pun taí kyîng é eq mhoqshit nyi é nghut lhê. ²⁹ Ngò, haù-í yhang wó wùn waq shikut é gi, ngò má wum-o a-tsam byíng byíng mú zuí nyi Su é wum-o banshoq eq wùn waq shikut nyi é ru nghut lhê.

2

¹ Ngò gi, nungmoq é matú le, Ladoki wà mó bâng é matú le, ngò eq myoqdong hkyûm a huí wú shî é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. ² Haù su awui ahke shikut é hkyô gi, yhangmoq, myit má wum-o byî é huí rá eq chyitdap myit má rading ralhum za wó dut rá matú nghut lhê. Haù hkûn, yhangmoq gi, Garai Gasang é zaú tô é hkyô nghut é, Hkrisduq lé wó sé rá matú, sê gyô é nyan lunglhang é isut byíng shoq lé wó yû kó rá nghut lhê. ³ Haù Hkrisduq má kúm gi, hpaqchyí byéng-yá eq sumsé hpaqchyí gâ é sutzè lunglhang lé tsîng tô ri. ⁴ Nungmoq lé ngò haù hkyô taí kyô é gi, ó yuq le, dang ngón dang ngui eq mhoq hpyoq é dông, nungmoq lé a wó mhaù zo rá matú nghut lhê. ⁵ Hkâsu mù gâ le, ngá gungdu nungmoq eq rahá a nyi kôlhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjîng é má hkâ-í gíngtîng nyi kô é lé myàng mù, ngò gabú nyi lhê.

Hkrisduq Dông Mai Wó É Gumjup É Asak Dui Hkyô

⁶ Haù mù luí, nungmoq gi, Hkrisduq Yesuq lé Yhumsîng nghû hap yù bekô nghut é eq rajung za, Yhang má asak xoq dui nyi keq. ⁷ Yhang má apûn amyit chîn gîng nyi mù, kô myhang lò luí, nungmoq mhoq yù bê eq rajung za, lumjîng hkyô má wum-o lhoq kîng mù, jeju hkya-ôn é hkyô byíng zan nyi keq.

⁸ Hkrisduq chyáng mâ é a nghut é za, mingkan shî mâ é uphkang tarâ pé eq xângzo wui é htungli cháng luí, mhaù zô

é myit sôn hpaqchyî eq akyû a bo é dang dông, ó yuq èq le, nungmoq lé a wó shuí nghoq yû kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù, ¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri. ¹¹ Yhang má, nungmoq gi, byu loq èq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri. ¹² Nungmoq gi, wui-myhup hkâm é hkûn Hkrisduq eq rahá myhup yhûm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjîng kô é yanmai, Yhang eq rahá lhoq dui toq yu é hui bekô nghut ri.

¹³ Nungmoq é yubak mara pê é yanmai le, nungmoq é yubak gungsho mara lé huî sêng pyâm é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhûng é yubak mara lhunglhang lé hkyut pyám byi luî, ¹⁴ nga-nhûng eq shai lhum mù, nga-nhûng lé htuq htîng é, tarâ pé bo é jéyáng râ jihpân lé huî sêng pyám byi bê nghut ri. Yhang gi, haû lé tapzîng htoq má dok tap pyâm é dông yu pyám byi bê nghut lhê.* ¹⁵ Haû dông mai, a-tsam bò bang eq ahkáng ayá wó bang a-tsam lé lang hkyut hkyô pyám mù, Yhang gi, tapzing èq yhangmoq lé ung pyâm é dông, byù pê é hí má yhangmoq lé de de kut to bê nghut ri.

¹⁶ Haû mù luî, nàng haî zo haî shuq é yanmai le, noqkuq htûng eq sêng é poî buinyî, Lhoxan Lhosik poî, Bánno buinyî eq séng luî le, nungmoq lé, ó yuq èq le a wó jéyáng kó sháng gaq. ¹⁷ Haû pé gi, dut lò râ hkyô pê é wupzo chyat nghut lhê; haû gùng gyíng gi, Hkrisduq yhang nghut nyi ri. ¹⁸ Myit lhoq nyhum mhaû é eq maumang lagyô pé lé noqkuq é lé myit ngùi é sù ó yuq

èq le, nungmoq lé, chyunghuq eq a gingdán râ dông hkâkut nhâng kó. Haû su é yuq gi, yhumsîng byu-myang é lé† za taî shikut mù, yhumsing é gungsho myit mai, akôm yhang nghut é lé gyáng dang taî é sù nghut ri. ¹⁹ Yhang gi, Garai Gasang kô myhâng nhang é su, gungdu gón é gungsho showuî showang pé eq shogyi pé lé htuqbang byi mù rahá llang tsing tô é haû ulhum nghut é Hkrisduq eq xoq é hkyô lé byoq ló nhâng bê nghut ri.

²⁰⁻²¹ Nungmoq gi, Hkrisduq eq rahá, mingkan shî mâ é tarâ pé eq shi gang bekô nghut le nhîng, haî mù, haû eq sêng lhum nyi ashî kó lhú? "Hkâzui, hkâchyâm, hkâzàng." gâ é tarâ ô má nyi nyi ashî kó lhú? ²² Haû pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê. ²³ Haû sù é tarâ pé gi, yhumsîng yhang noqkuq shikut é, myit lhoq nyhum mhaû é eq gungdu lé gunjâng é pé nghut luî, hpaqchyî byéng-yá bo é su dut kôlhang, gungshô é agè ashop yut yut ô nau hkyô lé wó hkûm zing pyám râ má, hai akyû a bò nghut ri.

3

Chyoiyúng É Dông Asak Dui Râ Hkyô

¹ Haû mù luî, nungmoq gi, Hkrisduq eq rahá lhoq dui toq é hui bekô nghut jâng, Garai Gasâng é loqyo hkyam* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq. ² Nungmoq gi, myidàm htoq mâ é azíng zê lé myit tuî é a nghut é za, ahtoq mâ é azíng zê lé myit tuî nyi keq. ³ Hkâsu mù gâ le, nungmoq gi, shî bekô nghut luî, ahkuî, nungmoq é asak gi, Hkrisduq eq rahá, Garai Gasang má haq tô é hui bekô nghut ri. ⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shingkan hkaû má htoq shit kó râ nghut lhê.

⁵ Haû mù luî, nungmoq é mingkan hkyô eq sêng é, ashop é dông gungsho zùm yap é

* **2:14** Yhang gi, haû lé tapzîng htoq má dok tap pyâm é dông yu pyám byi bê nghut lhê gâ é gi, Hkrisduq tapzîng má shî hkâm byi é hkûn, nga-nhûng é yubak mara banshoq lé, Garai Gasâng èq hkyut pyám byi é lé taî nau é nghut lhê.

† **2:18** Byu-myang é lé gâ é gi, yhang myit htoq é shing-rán lé gâ lhê. * **3:1** Loqyo hkyam ngû é gi, ahko ahkáng wó é jowò lé gâ é nghut lhê.

hkyô, agot a-û nyi zô lhûm é hkyô, ye lhai nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haî lé le sat pyám keq. ⁶ Haú hkyô pé é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé râ za nghut lhê. ⁷ Laî lò bê hkûn, nungmoq le, haú hkyô pé dông sô wú kô é nghut lhê. ⁸ Nghut kôlhang, ahkuî, nungmoq gi, nhikjum yô é, nhikmo-yô é, agè ashop é dông nô shoq kut é, lumù gansang é eq, nungmoq é nhutwuî mai hkunchoq taî é hkyô shí pé banshoq lé, yhumsing gùng yhumsing tô pyám râ dut lhê. ⁹ Rayuq eq rayuq hkâ-mhaú lhum kó; hkâsu mù gâ le, nungmoq gi, nungmoq é byù xau eq byù xaú é nyi yap hkyô lé hkyut pyám mù, ¹⁰ byù sik lé tû wut yû kô é nghut lhê; byù sik haú gi, sumsé hpaqchyî dông mai, yhang lé hpân Su é gungdu isâm má asik jat lò nhang é huî nyi ri. ¹¹ Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haú mù luî, Garai Gasâng èq hkyin yù huî é bang, Yhâng èq gyai yhang chyitdap é huî é chyoiyúng bang dông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq. ¹³ Nungmoq yhangchang mara kut shut é hkyô joq é nghut jáng, hkam jan byî lhum luî, rayuq eq rayuq mara hkyut byî lhum keq. Haú Yhumsing gi, nungmoq é mara hkyut pyám byî é su, nungmoq le mara hkyut byi keq. ¹⁴ Haú ge é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó tuî zing tô é chyitdap myit lé puq wut to keq.

¹⁵ Nungmoq gi, nguingón hkyô wó râ matú ji yu é huî bekô nghut mù, gungdu ralhum mâ é bang chyat nghut bekô yanmai, Hkrisduq é nguingón hkyô lé, nungmoq é myit má up nhang nyi keq. Haú mù, jeju hkya-ôn nyi keq. ¹⁶ Nungmoq, rayuq eq rayuq, hpaqchyî byéng-yá banshoq èq

mhoqshit é eq lhoq pun lhoq kyíng lhûm é hkûn le, Garai Gasang lé nungmoq jeju bûn é myit mai, jihkyang dang, hkya-on mahkôn, woi-nyí eq sêng é mahkôn pé hkôn é hkûn le, haú Hkrisduq é mungdang lé, nungmoq é myit nhiklhum má agùn agó bò nhang nyi keq. ¹⁷ Nungmoq haî wá kut kut, dang dông nghut nghut, zui saí é dông nghut nghut, banshoq lé Yhumsing Yesuq é myìng mai kut é hkûn, haú Îwa nghut é Garai Gasang lé Yhang dông mai jeju hkya-on keq.

Hkristan Ikun Byu Pé Nyi Yap Râ Hkyô

¹⁸ Ikun myhî pé ê, ikun hpô pé uphkan é ahkaú má nyi keq. Haú gi, Yhumsing é hí má kut gíng é hkyô nghut lhê.

¹⁹ Ikun hpô pé ê, ikun myhî pé lé chyitdap nyi keq. Yhangmoq lé dang htân hkâ-nyô kó.

²⁰ Zo wuî ê, jung hkanmó má nungmoq é mó wui é jìno gyo keq; hkâsu mù gâ le, haú gi, Yhumsing ô nau é hkyô nghut lhê.

²¹ Îwâ pé ê, nungmoq é zo wuî lé myit hkâ-nô nhâng kó, nô nhâng jáng gi, yhangmoq, myit wum gyuî byuq kó râ nghut lhê.

²² Jùn pé ê, hkyô hkanmó má nungmoq é myidàm htoq mâ é jùn sîng bang uphkan é ahkaú má nyi nyi keq; yhangmoq é myoq hí má za zui saí luî, myoqdong ho é dông a nghut é za, haú Yhumsing lé gyuq hkunggâ é eq lhumzuî é myit mai zui saí nyi keq.

²³ Nungmoq haî wá kut kôle, byu é matú kut é a nghut, haú Yhumsing é matú kut nyi é dông, nungmoq é myit nhiklhum banshoq eq zui saí nyi keq. ²⁴ Haî mù gâ le, nungmoq gi, haú Yhumsing chyáng mai, muizè lé chyunghuq dông wó yû kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsing Hkrisduq ru nghut lhê. ²⁵ Kut shut sù gi, yhang kut shut é marâ matú dam byî é hui zo râ nghut lhê, haî mù gâ le, Garai Gasang gi, myoqdong hkyin é hkyô a joq.

4

¹ Jùn sîng bang ê, nungmoq é jùn pé lé, tengmán é eq gíng âng é dông lajang byî nyi keq; haî mù gâ le, nungmoq le, mauhkûng

† 3:6 Jìno a gyo bâng é ahtoq má, gâ é dang, chyúmding ra-am má a bò nghut lhê.

htoq má Yhumsîng rayuq wó é lé sé kô é yanmai nghut lhê.

Xoq Lui Pying Kat É Hkyô

² Nungmoq gi, kyûdûng é má myit zìng zuq nyi mù, machyâ luí, jeju hkya-ôn nyi keq. ³ Ngò, shamtoq-tui hut huí nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq. ⁴ Haú Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó laq. ⁵ Nungmoq gi, a lumjìng bang eq zùm yap é hkûn hpaqchyí bo nyi keq; wó yu é ahkyíng hkangmó lé rago yhang chung jai keq. ⁶ Nungmoq gi, yuq hkangmó lé hkâsu tú taí râ hkyô wó sé kó shoq, dâng nyo é má, xò èq nghám nhang é su, hkâ-nhâm le jeju byíng é dang bo nyi sháng gaq.

Ló Htâng É Shi-kyâm Dang

⁷ Tuhkiku gi, ngá hkyô eq sêng é danglù banshoq, nungmoq lé taí kyo râ nghut lhê. Yhang gi, ngá é chyitdap gumang, haú Yhumsîng má, lhumzui é hpúng mù wùn sù eq byinzùm nghut lhê. ⁸ Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê. ⁹ Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shí má dut nyi é hkyô jung hkangmó lé taí kyo kó râ nghut lhê.

¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aú Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.) ¹¹ Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik tíng byi é bang nghut akô. ¹² Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm

kat ri. Nungmoq gi, Garai Gasang ô nau é hkyô lhunglhang má hkyak lùm to mù, gumjup luí wó gingtìng nyi sháng gaq ga, Yhang gi, ayang nungmoq é matú kyûdung shikut byi nyi ri. ¹³ Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byi é hkyô lé, yhang é matú ngò saksé hkâm lhê. ¹⁴ Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵ Ladoki wà mó mâ é gumang wù lé le, Numhpa eq yhâng yhùm mâ é noqkuq hpúng lé le, bo shi-kyâm byi keq.

¹⁶ Laiká shí lé, nungmoq lé nghap kyô é htâng má, Ladoki byu pé é noqkuq hpúng má le nghap nhâng mù, Ladoki wà bâng chyáng hùn kat é laiká lé le, nungmoq nghap wú keq.

¹⁷ "Haú Yhumsîng chyáng mai nàng hap yù to bê é muzó lé rago za lhoq pán pyám aq." nghû, Arhkipò lé taí kyo keq.

¹⁸ Ngò, Poluq gi, ngá é loq èq yhang shi-kyâm dang shí lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyi sháng gaq ô.

HTESALONI Pê Chyáng Hî Dàm Hun Kat é Laiká (1 Thessalonians)

¹ Ngò Poluq, Sila* eq Timohti pé gi, Íwa Garai Gasang eq Yhumsîng Yesuq Hkrisduq má nghut nyí bê bang, haû Htesaloni wà mó byu pé é noqkuq hpúng lé dang kyô kat lhê. Garaî jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

² Ngamoq gi, hkâ-nhám le, nungmoq banshoq bâng é matú, Garaî Gasang lé jeju hkya-on luí, ngamoq é kyûdung dang má nungmoq lé bo dúng lhôm nyi lhê.

³ Nungmoq é lumjîng myit mai zui saî é nungmoq é muzó lé le; chyitdap myit é yanmai, nungmoq shikut é hkyô lé le; nga-nhûng é Yhumsîng Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhûng é Íwa Garaî Gasang é hí má, ngamoq ru bûn nyi lhê.

⁴ Garaî Gasang chyitdap é gumang wuî ê, Yhang nungmoq lé hkyin yù bê lé, ngamoq sê lhê. ⁵ Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkûn, nungmoq é matú hkâsu kut laí lo é hkyô lé, nungmoq sé gù nghut lhê. ⁶ Nungmoq gi, wuîhke jamjau myo myo hui zo kôlhang, Chyoiyúng Woi-nyí byí é gabú myit mai, danglù haû lé lhom yù kôluí, ngamoq lé le, haû Yhumsîng lé le, alik kut yu é bang dut bekô nghut ri. ⁷ Haû mù, Makedoni mau eq Ahkaia mau mâ é lumjîng bang banshoq é alik, nungmoq dut bekô nghut ri. ⁸ Nungmoq chyáng mai, Makedoni mau eq Ahkaia mau má, haû Yhumsîng é mungdang hû htoq ló e za a nghut, Garaî Gasang má nungmoq lumjîng hkyô gi, jowò hkangmó jam ló bê nghut luí,

* 1:1 Sila lé gi, Salwanu le gâ lhê.

ngamoq gi, haî le taí nó a ra lo nghut ri. ⁹ Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garaî Gasang shut hkâsu kut lhing lò mù, rû dui nyi é eq tengmán é Garaî Gasang lé dojaú nyi é hkyô lé le; ¹⁰ mauhkûng mâ é haû Yhang Zo lé láng nyi é hkyô lé le, yhangmoq taí kyô akô. Yhangzo haû gi, Yhang eq shi é mai lhoq dui toq yu é hui luí, jé lô râ nhikmó yo hkyô mai nga-nhûng lé hkyi yù sù, Yesuq nghut ri.

2

Poluq, Htesaloni Wà Mó Má Garaî Mû Wûn Waq É Hkyô

¹ Gumang wuî ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê. ² Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoi é hui wú bê nghut lhê; nghut kôlhang, nga-nhûng é Garaî Gasang garúm é yanmai, gyaí lhom htuq htîng é hui kôle, Garaî Gasang é gabú danglù lé, a gyuq a kyum nungmoq lé wám taí kyô é nghut lhê. ³ Hkâsu mù gâ le, ngamoq lhoq pun lhoq kyîng é hkyô gi, shut é, a nghut jáng, a sansêng é i-myt đông eq nungmoq lé mhaú zô é đông a nghut e za, ⁴ haû gabú danglù lé chûng gíng é bang ga, Garaî Gasang chyáng mai ahkáng wó é đông za, ngamoq taí é nghut lhê. Ngamoq gi, byu pé lé gabú nhâng râ matú a nghut, ngamoq é myit lé chyam wú nyi é Garaî Gasang lé, gabú nhâng râ matú shikut é ru nghut lhê. ⁵ Hkâsu mù gâ le, nungmoq sê é eq rajung za, ngamoq gi, lhoq ngón mhaú é dang le hkâ-nhám a chûng wú, nghop tô é myoqnoq myit le hkâ-nhám a bò, Garaî Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotû ó yuq mai le hkya-on râ lé ho nyi é a nghut, Hkrisduq é lagyô pé nghut é eq rajung za, nungmoq lé wólai hûn naù jáng wó hun lhê; nghut kôlhang, ⁷ înu rayuq, yhang é zoshâng zô pé lé hku baú é su, nungmoq chyáng nú-nhâm é đông nyi laí lò bê nghut lhê. ⁸ Ngamoq gi, nungmoq lé gyai yhang

chyitdap luî, Garai Gasâng é gabú danglù za a nghut, ngamoq é asak pé nungmoq lé byî pyâm le lhang nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê.

⁹ Gumang wuî ê, nungmoq gi, ngamoq gyai yhang mù zui shikut é hkyô lé, gè gè bun kó râ nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghû, ngamoq gi, nyí lé, myín lé, mù zui é nghut lhê.

¹⁰ Ngamoq gi, lumjínng bê bang nungmoq é hí má, hkâsu chyoiyung é eq dingmán é, mara hùn râ a bo é bang dut lai lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gâ le, ngamoq gi, îwa rayuq mai yhumsing yhangzô pé lé kut byî é su, nungmoq yuq hkangmó lé, myit wum byî nyi é hkyô lé le, nhik taî tîng nyi é hkyô lé le, ¹² Yhang é mingdán eq hpungwup shingkang má, nungmoq lé wut yu é Garai Gasang eq gingdán é dông, nungmoq asak wó dui nyi sháng gaq nghû, nungmoq lé wum byî nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkùn, byu é dang lé lhom yu é dông a nghut e za, lumjínng é bang nungmoq má mù zui nyi é, haû Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkyâ-ôn nyi lhê. ¹⁴ Gumang wuî ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpung pé lé, alik kut yu é bang dut bekô nghut ri. Noqkuq hpung haú pé gi, Yudaq byu pé zing-rî é lé hui zô é su, nungmoq le, yhumsing mau mâ é byu pé zing-rî é lé hui zô akô nghut ri. ¹⁵ Yudaq byu pé gi, haû Yhumsing Yesuq eq myiqhtoî pé lé sat pyâm kôluî, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyè dut é bang nghut akô. ¹⁶ Tungbaù pé hkyi yù hui râ matú, ngamoq hko kyô é hkyô lé, yhangmoq hkùm akô; yhangmoq gi, hkâ-nhám le, yhumsing é mara lé dik shoq haú dông lhoq jat myô yù akô nghut ri. Haû mù, Garai Gasâng é nhikmo-yô é hkyô

gi, yhangmoq ahtoq má jé bê nghut ri.

Htesaloni Byu Pé Lé Poluq Hui Nau Nyi É Hkyô

¹⁷ Gumang wuî ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luî, wó myang hui shoq nghû, ngamoq gyai yhang shikut nyi lhê.

¹⁸ Nungmoq chyáng ngamoq jé lé nau mù luî, ngò Poluq yhang, adàm dâm shikut wú bê; nghut kôlhang, Tsadán gi, ngamoq lé hkùm tang pyâm ri. ¹⁹ Hkâsu mù gâ le, nga-nhung é Yhumsing Yesuq Hkrisduq é hí má, Yhang jé lé é hkùn, ngamoq é myit myoqbyù hkyô, gabú hkyô eq gumrông râ janmaù gi, haí jung wá nghut lhê gâ le, nungmoq yhang nghut nyi lhê a nghut kó lhu? ²⁰ Gè gè yhang, nungmoq gi, ngamoq é gumrông jowò eq gabú hkyô nghut nyi ri.

3

¹ Haû mù luî, ngamoq gi, haû lé a wó jân nyi lo jáng, Ahten myuq má ngamoq baù nyi gyó le je gè râ nghut lhê nghû, myit hpyit yù mù, ² wuîhke jamjau shí pé é yanmai, ó yuq le, myit a hten kó sháng gaq nghû, nungmoq é lumjínng hkyô má, nungmoq lé wum-o byi râ eq myit wum byi râ matú, ³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhung gi, wuîhke jamjau pé hui zo râ matú, hkyin to hui é bang nghut é lé, nungmoq yhang rago sê nyi lhê. ⁴ Nga-nhung gi, zing-ri hui zo râ nghut lhê nghû, ngamoq, nungmoq eq rahá nghut nyi é hkùn, noq mai nungmoq lé ngamoq taî kyô nyi gù nghut bê. Nungmoq rago sê é eq rajung za, haú dông dut bê nghut ri. ⁵ Hau é yanmai, ngò a wó jân nyi lo jáng, haû gunglau sù mai nungmoq lé gunglau yù luî, ngamoq wùn waq bê muzó gi, akôm dut byuq râ lé, myit chiq mù, nungmoq é lumjínng hkyô lé wó sé râ matú, yhang lé ngò nhang kat é nghut lhê. Gunglau sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuî kúm, Timohti gi, nungmoq é lumjínng hkyô eq chyitdap myit eq sêng é

gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taí kyo bê nghut ri. ⁷ Haú mù luí, gumang wui ê, ngamoq myit myo uhkyî é hkyô eq zing-ri huí é hkyô pé banshoq má, nungmoq é lumjínng hkyo é yanmai, nungmoq eq séng luí myit wum byí é hkyô lé ngamoq wó yû bê nghut lhê. ⁸ Ahkuí, ngamoq gi, haú Yhumsíng má nungmoq yap gíng nyi kô é yanmai, gè gè nyi ngón bê nghut lhê. ⁹ Nga-nhúng é Garai Gasang hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju úng hkya-on rá lhú? ¹⁰ Ngamoq gi, nungmoq lé dum myàng rá matú eq, nungmoq é lumjínng myit má langhpyut é hkyô lé wó lhoq hkúm byi rá matú, nyí, myín, gyai yhang lhumzui luí kyúđung nyi lhê.

¹¹ Nungmoq chyáng ngamoq lé rá matú, nga-nhúng é Yhumsíng Yesuq eq nga-nhúng é Íwa Garai Gasang yhang ngamoq lé hkyô hpóng byi sháng gaq. ¹² Nungmoq lé ngamoq chyitdap nyi é su, haú Yhumsíng gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq. ¹³ Nga-nhúng é Yhumsíng Yesuq gi, Yhâng é chyoiyúng bang banshoq eq rahá lé é hkûn, nga-nhúng é Íwa Garai Gasang é hí má, nungmoq gi, mara hûn jowò a joq é eq chyoiyúng é bang dut rá matú, nungmoq é myit nhiklhum má, haú Yhumsíng mai wum-o lhoq kíng byí nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

4

Garai Gasang Ô Nau É Đông Asak Dui Rá Hkyô

¹ Xoq luí taí nau é gi, gumang wui ê, ngamoq gi, ahkuí nungmoq cháng nyi é eq rajung za, nungmoq hká đông nyi yap luí, Garai Gasang lé gabú nhâng rá hkyô

nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat rá matú, Yhumsíng Yesuq má nungmoq lé đung tôngbán luí, myit wum byi kat lhê. ² Hkâsu mù gâ le, nungmoq gi, haú Yhumsíng Yesuq é ahko ahkáng đông, ngamoq mai, nungmoq lé mhoqshit to byí é hkyô pé lé, sê akô nghut ri.

³ Garai Gasang ô nau é hkyô gi, haú nungmoq sân-yúng é hui rá matú le, ashop é đông gungsho zùm yap é hkyô lé koi pyám rá matú le; ⁴ nungmoq yuq hkangmó gi, haú Garai Gasang lé a sê é, a lumjínng bang kut é su, gungsho yut yut ô nau é hkyô a châng e za, ⁵ haú chyoiyúng é eq hkungga gíng é sù wó dut shoq, yhumsing gùng lé wó hkang é hkyô mhoq yû rá matú le; ⁶ shí hkyô eq séng luí, ó yuq le, yhumsing é gumang lé, a ge shut, a ge lhúngzo rá matú le nghut lhê. Ngamoq, nungmoq lé taí kyo mù, lhoq pun lhoq kying gù nghut bê eq rajung za, haú Yhumsíng gi, haú hkyô shut é banshoq lé, dam byi rá nghut lhê. ⁷ Hkâsu mù gâ le, Garai Gasang gi, nga-nhúng lé a sân-yúng é bang dut rá matú wut yu é a nghut, chyoiyúng é đông asak dui nyi rá matú sheq wut yu é ru nghut lhê. ⁸ Haú mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haú nungmoq lé, Yhâng é Chyoiyúng Woi-nyí byí tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chyitdap lhum rá matú, nungmoq yhang, Garai Gasang eq mhoqshit é hui bekô nghut é yanmai, gumang yhangchang chyitdap lhúm é hkyô eq séng luí, ngamoq gi, nungmoq chyáng kâ kat byi a ra lo nghut ri. ¹⁰ Haú eq rajung za, nungmoq gi, Makedoni mau gón mâ é gumang wui banshoq lé chyitdap nyi akô nghut ri. Nghut kôhang, gumang wui ê, haú su je myo kut rá matú nungmoq lé ngamoq wum byí lhê.

¹¹⁻¹² Nungmoq é nyí wui lhê é asak dui hkyô má, gotú byu pé eq hkunggâ é wó yû luí, ó yuq lé le, lumhkaú a ra wó dut sháng gaq, hí hkûn nungmoq lé ngamoq taí kyô tô é eq rajung za, num num byù zè rá hkyô lé le, yhumsíng eq a sêng é hkyô a kut wún rá

lé le, yhumsing loq eq zui saí mù nyì râ lé le, nungmoq é myit myoqbyù jowò kut yù keq.

Haù Yhumsing Gyó Lé Râ Hkyô

¹³ Gumang wuì ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haù yhup ngón byuq é bang eq séng luí, nungmoq a sé râ lé, ngamoq a ô nau é nghut lhê. Yhup ngón byuq é bang gâ é gi, lumjínng luí shi ló byuq é bang lé gâ é nghut lhê. ¹⁴ Hkâsu mù gâ le, Yesuq shí luí, dum dui toq bê hkyô lé nga-nhúng lumjínng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghû, nga-nhúng lumjínng é nghut lhê. ¹⁵ Haù Yhumsing taí é dang eq rajung za, nungmoq lé ngamoq taí kyo kôlé, haù Yhumsing dum lé é hkún, asak dui nyi é eq myit gyo tô é bang nga-nhúng gi, yhup ngón byuq bê bang htoq ratsuí le wó hí râ a nghut. ¹⁶ Hkâsu mù gâ le, haù Yhumsing yhang gi, htê mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkúng mai gyó lé lô luí, haù Hkrisduq má shi ló bê bang hí dui toq râ nghut lhê. ¹⁷ Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haù Yhumsing eq hui râ nghut lhê. Haù hkún, nga-nhúng gi, haù Yhumsing eq ahtum abyuq nyi nyi berâ nghut lhê. ¹⁸ Haù mù luí, nungmoq gi, dang shí pé mai rayuq eq rayuq myit wum byí lhúm nyi keq.

5

¹ Nghut kôlhang, gumang wuì ê, ahkyíng buinyi eq séng luí, nungmoq lé ngamoq kâ hún byi a ra lo nghut ri. ² Hkâsu mù gâ le, haù Yhumsing é buinyi gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsing é buinyi gi, Yesuq dum jé lé râ buinyi lé taí nau é nghut lhê. ³ Byu pé gi, 'Ngingón yuqyo ri.' ga taí nyi bùm kô é u lé, gùng laí é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó h pang lut kó râ a nghut.

⁴ Nghut kôlhang, gumang wuì ê, nungmoq gi, mauchut hkaù má nyi é bang a nghut é yanmai, buinyi haù gi, hkau sù lé é su, nungmoq é matú byodàn tung dut râ a nghut. ⁵ Nungmoq lhunglhang bang gi, maubó é yhangzô pé eq nyi é yhangzô pé nghut lhê. Nga-nhúng gi, myín eq mauchut hkaù eq séng é bang a nghut. ⁶ Haù mù luí, nga-nhúng gi, byù góbang su a yhup nyi e za, machyâ luí, gyíng gyíng kut nyi sháng. ⁷ Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô. ⁸ Nghut kôlhang, nga-nhúng gi, nyi eq séng lhê nghut é yanmai, gyíng gyíng kut nyi luí, lumjínng myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng. ⁹ Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsing Yesuq Hkrisduq mai, hkyi yù hkyô lé nga-nhúng wó yù râ matú hkyin to bê nghut lhê. ¹⁰ Yesuq gi, nga-nhúng yhup bûn nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng é matú shí hkâm byi bê nghut ri. ¹¹ Haù mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byí lhúm mù, htuqluq htuqbáng kut lhúm nyi keq.

Ló Htâng Lhê É Mhoqshit Hkyô

¹² Gumang wuì ê, nungmoq mâ é muzó shikut luí, haù Yhumsing má nungmoq lé up nyi é eq lhoq pun lhoq kyíng nyi é bang lé, nungmoq hkungga râ matú le; ¹³ yhangmoq zui saí é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq ngingón lhúm nyi keq. ¹⁴ Gumang wuì ê, nungmoq lé ngamoq wum byí kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myit hîng byí nyi keq; ¹⁵ ó yuq lé nghut kôlhang, a ge é hkyo é yanmai, a ge é dông a taù kut râ lé lhoq pun lhoq kyíng nyi keq; nungmoq

rayuq eq rayuq le, góbang banshoq eq le, shikut luí, hkâ-nhám le, ge é hkyô kut byí lhum nyí keq.

¹⁶ Hkâ-nhám le, ru gabú nyí keq; ¹⁷ abyit alan kyûdûng nyí keq; ¹⁸ hkyô hkat hkgámó má jeju hkya-ôn nyí keq, hkâsu mù gâ le, haú pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haú Woi-nyí lé hkâlhoq jôm pyám kó; ²⁰ myiqhtoi htoí é lé, haí su a ngàm hkâkut kó. ²¹ Jung hkgámó lé, chyam wú luí, ge é hkyô lé zuí zing nyí mù, ²² agè ashop é hkyô hkgámó lé, koi pyám keq.

²³ Nguingón hkyo é apûn awang nghut é Garai Gasang yhang, nungmoq lé, lunglhang lhoq sân-yúng pyám byi sháng gaq; nga-nhûng é Yhumsîng Yesuq Hkrisduq dum lé é hkûn, nungmoq é woi-nyí, myít nhikhum, gungdu gi, mara hûn râ hkyô a bò sháng gaq. ²⁴ Nungmoq lé ji yu é Sû gi, lhumzuí é Sû nghut lhê mù, Yhang, shí hkyô lé kut râ nghut lhê.

²⁵ Gumang wui ê, ngamoq é matú kyû bo dung byi kó laq. ²⁶ Gumang wui banshoq bang lé, chyoyúng é chytpuq puq é dông bo shi-kyám byi kó laq. ²⁷ Gumang wui banshoq bang lé, hun kat é laiká shí nghap kyo râ matú, haú Yhumsîng é myîng mai, ngò, nungmoq lé pyîng kat lhê.

²⁸ Nga-nhûng é Yhumsîng Yesuq Hkrisduq é jeju gi, nungmoq chyáng ru joq nyí sháng gaq ô!

HTESALONI Pê Chyáng Htang Dàm Hun Kat é Laiká (2 Thessalonians)

¹ Ngò Poluq eq Sila, Timohti pé gi, nga-nhông é Íwa Garai Gasang eq Yhumsing Yesuq Hkrisduq má nghut nyi bê bang, haú Htesaloni wà mó byu pé é noqkuq hpúng lé dang kyô kat lhê.

² Haú Íwa Garai Gasang eq Yhumsing Yesuq Hkrisduq chyáng mã é jeju eq ngu-ingón hkyô gi, nungmoq chyáng ru joq nyi sháng gaq ô!

Jeju Hkya-on É Eq Kyûdung É Hkyô

³ Gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on rá dut ri; haú gi, gíng lhê; hkâsu mù gâ le, nungmoq é lumjín myit gi, je je kô jat lo nyi luí, nungmoq yuq hkanmó é chyitdap myit le, rayuq eq rayuq é ahtoq má je myô jat lo nyi é yanmai nghut lhê.

⁴ Haú mù luí, ngamoq gi, nungmoq zing-ri huí é hkyô pé eq wuîhke jamjau huí é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjín hkyô lé, Garai Gasang é noqkuq hpúng pé é hí má gumrong nyi lhê.

⁵ Shí hkyô banshoq gi, haú Garai Gasang dingmán é dông jéyáng é hkyô lé saksé tân shit é nghut lhê; haú mù luí, nungmoq gi, Garai Gasang é mingdán é matú wuîhke jamjau hui zo bekô nghut é yanmai, mingdán haú eq gíngdán é bang gâ é hui kó rá nghut lhê; ⁶ Garai Gasang gi, tengmán Sû nghut lhê; haú mù, nungmoq lé jamjau byi é bang lé, Yhang mai jamjau byi rá eq, ⁷ jamjau huí nyi é bang nungmoq lé le, ngamoq lé le lhoq lhut byi rá nghut lhê. Shí hkyô gi, haú Garai Gasang lé a sê é bang eq nga-nhông é Yhumsing Yesuq eq sêng é gabú danglú lé a gyo a châng é bang lé, jéyáng rá matú, ⁸ haú Yhumsing Yesuq, wum-o a-tsam bying é Yhâng é maumang lagyô pé eq rahá, myishâm eq mauhkung mai htoq shit é hkún, dut rá nghut lhê.

⁹ Yesuq jé lé lô mù, Yhâng é chyoiyung

bang má hpungwup shingkang wó yu é eq lumjín bang banshoq mai mauhong é huí é buinyi má, yhangmoq gi, htên byoq hkyô lé ahtum abyuq jéyáng é hui zo kó rá nghut lhê. ¹⁰ Hau htoq agó, haú Yhumsing é hí mai le, Yhâng é a-tsam kô làm é mai le, lhoq kâng pyâm é hui kó rá nghut lhê. Ngamoq é saksé dang lé nungmoq lumjín bekô nghut é yanmai, haú lumjín bang má nungmoq le lòm bekô nghut lhê.

¹¹ Haú mù luí, nga-nhông é Garai Gasang gi, nungmoq lé, Yhang ji yu é hkyô eq gíngdán ri ga rá le, haú Yhang é wum-o a-tsam mai, nungmoq myit tô é ge é hkyô hkanmó eq nungmoq é lumjín myit eq sêng é muzó lhumjup lé, lhoq dik byi sháng gaq nghú le, nungmoq é matú, hkâ-nhám le, ngamoq kyûdung byi nyi lhê.

¹² Ngamoq haú su dung byi nyi é hkyô gi, nga-nhông é Garai Gasang eq Yhumsing Yesuq Hkrisduq é jeju yanmai, haú nga-nhông é Yhumsing Yesuq é mying gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó rá matú nghut lhê.

2

A Tara É Sû

¹ Gumang wui ê, haú nga-nhông é Yhumsing Yesuq Hkrisduq dum lé rá hkyô, Yhang eq nga-nhông rahá zup nyi to rá hkyô eq séng luí, nungmoq lé ngamoq pying kat nau é gi, ² haú Yhumsing é buinyi gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng mã é nghut lhê ga nungmoq chyáng jé é nghut jáng, nungmoq é myit lui za hkâduí kó, hkâgyuq dàn kó. ³ Hkâsu mù gâ le, haú htên byoq é yhangzo nghut é a tarâ Sû htoq shit luí, haú gumlau toq é hkyô hí a htoq htoq gi, buinyi haú jé rá a nghut, haú mù luí, nungmoq lé, ó yuq eq, hká dông mai mhaú kôlhang hkâjín kó. ⁴ Haú yuq gi, Garai ga noqkuq huí é zè lhunglhang lé htuq htíng luí, haú pé banshoq é htoq má yhanggung yhang lhoq gyaú yú rá nghut lhê; haú mù luí, Garai Gasang é noqkuq yhúm má zung to luí, yhanggung yhang Garai Gasang nghut lhê ga táí rá nghut lhê.

⁵ Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lú? ⁶ Haú yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê. ⁷ Haú a tara é hkyo é haq dâ é a-tsam gi, mù zui nyi gù nghut bê; nghut kôlhang, haú lé hkûm zing nyi sù gi, hui htot pyám huí é hkûn jé shoq, haú lé hkûm zing nyi shirâ nghut lhê. ⁸ Haú hui htot pyám huí é hkûn, a tarâ Sû htoq shit râ nghut lhê; haú Yhumsíng Yesuq kúm gi, Yhâng nhut mâ é soq èq yhang lé sat pyám râ eq, Yhang gyó lo u lhê é hpungwup mó eq, yhang lé lhoq htên pyám râ nghut lhê. ⁹ Haú a tarâ Sû lé lo é gi, Tsadán a-tsam dông laklaí kumlhá pé, kumlhá pé, mauhpo muzó pé ajung jung kut mhaú é eq, ¹⁰ htên byoq huí nyi é bang lé mhaú zo râ agè ashop é hkyô jung hkangmó lé tûn shit râ nghut lhê. Yhangmoq htên byoq é gi, haú tengmán hkyô lé chyitdap luí hkyi yù hui râ nghut é hkyô lé he-ngik pyám kô é yanmai nghut ri. ¹¹ Hau é yanmai, Garai Gasang gi, haú tengmán hkyô lé a lumjíng e za agè ashop hkyô má ô nau é lhunglhang bang mara byí é hui kó sháng gaq ga, ¹² mhaú é dang lé jíng kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

Mhoqshit é hkyô má gíng nyi râ hkyô

¹³ Nghut kôlhang, haú Yhumsíng chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haú Woi-nyí èq lhoq sân-yúng nyi é muzó dông le, tengmán hkyô lé lumjíng é dông le, hkyi yù hui râ matú, Garai Gasang gi, nungmoq lé, sâng-hi mai hkyin yù bê nghut ri. ¹⁴ Yhang gi, nga-nhûng é Yhumsíng Yesuq Hkrisduq é hpungwup shingkang má, nungmoq wó bo lòm shoq ga, ngamoq é gabú danglù dông nungmoq lé shí hkyô má ji yù bê nghut lhê. ¹⁵ Haú mù luí, gumang wui ê, nhutdang dông nghut nghut, laiká dông nghut nghut, nungmoq lé ngamoq lai byi é mhoqshit hkyô lé zúí gíng nyi luí, gíng gíng yap nyi keq.

¹⁶ Yhâng é jeju yanmai, nga-nhûng lé, ahtum abyuq é myit wum byi hkyô eq ge é

myit myoqbyù hkyô lé byí é, nga-nhûng lé chyitdap é, nga-nhûng é Íwa Garai Gasang eq nga-nhûng é Yhumsíng Yesuq Hkrisduq gi, ¹⁷ nungmoq é i-myit má wum byi luí, ge é muzó eq ge é nhutdang lhumjup má, nungmoq lé wum-o lhoq kíng byi sháng gaq ô!

3

Kyû Dung Byi Râ Matú Lung Kat É Hkyô

¹ Gumang wui ê, je htâng má pying kat nau é hkyô gi, nungmoq chyáng dut wú bê eq rajung za, haú Yhumsíng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq. ² Yuq hkangmó gi, lumjíng myit bo é a nghut é yanmai, haú achag achyut agè ashop é byu pè chyáng mai ngamoq wó lut râ matú le, kyû bo dung byi kó laq. ³ Nghut kôlhang, haú Yhumsíng gi, lhumzui é sù nghut é yanmai, Yhang nungmoq lé wum-o lhoq kíng byi mù, haú agè ashop su chyáng mai nungmoq lé hung yù râ nghut lhê. ⁴ Nungmoq gi, ngamoq pying tô é dang pé lé kut nyí mù, xoq luí le kut nyí râ nghut lhê nghû, haú Yhumsíng má ngamoq hkyak myit lum tô lhê. ⁵ Haú Yhumsíng gi, nungmoq lé Garai Gasang é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mù Zui Shikut Râ É Hkyô

⁶ Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a nyi yap é eq lagôn é gumang ó yuq eq le, we we nyi keq nghû, haú Yhumsíng Yesuq Hkrisduq é myíng mai nungmoq lé hkunmó hkyô kat lhê. ⁷ Hkâsu mù gâ le, ngamoq kut é alik lé hká dông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó, ⁸ ó yuq é zoshuq lé le, ngùn a byí é a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wuihke hkyô má, nyí lé, myín lé, zui saí é nghut lhê. ⁹ Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq, haú su kut é

ru nghut lhê. ¹⁰ Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

¹¹ Hkâsu mù gâ le, nungmoq chyáng mã é byù ra-am lagon luí, haí mù le a zuí e za, mù châng lhoq gyô byí wún akô gâ é hkyô lé, ngamoq wó gyô é yanmai nghut lhê. ¹² Ngamoq gi, haú su kut é bang lé, zim za nyi mù zui saí luí, yhumsing é zoshuq ho nyi kó sháng gaq nghû, haú Yhumsing Yesuq Hkrisduq é mying lé lang luí, hkunmó hkyô kat mù, wum byí kat lhê. ¹³ Gumang wui ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴ Byù rayuq yuq gi, laiká shí má ngamoq mhoqshit é hkyô lé, a châng é nghut jáng, haú yuq lé rago chôm matsing yù mù, yhang hoq bun sháng gaq, yhang eq hkâzùm yap kó. ¹⁵ Nghut kôlhang, yhang lé gyê rayuq dông a sôn e za, gumang rayuq dông lhoq pun lhoq kyíng nyi keq.

Ló Htâng Lhê É Shi-kyám Dang

¹⁶ Haú nguingón hkyô é Yhumsing yhang gi, ahkyíng hkangmó eq hkyô hkat hkangmó má, nungmoq lé nguingón hkyô byí nyi sháng gaq. Haú Yhumsing gi, nungmoq banshoq bang eq ru nyi nyi sháng gaq.

¹⁷ Ngò, Poluq gi, ngá é loq mai yhang shi-kyám dang shí lé kê kat lhê; shí gi, ngò kê é laiká banshoq má kumlhá nghut lhê. Ngò kê é gi, shí dông chyat nghut lhê.

¹⁸ Nga-nhông é Yhumsing Yesuq Hkrisduq é jeju gi, nungmoq banshoq bang chyáng ru joq nyí sháng gaq ô!

TIMOHTI Chyáng Hî Dàm Hun Kat é Laiká (1 Timothy)

¹ Nga-nhông é hkyi yù Sû Garai Gasang eq nga-nhông é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, ² haù lumjìng hkyô má ngá zo sîng nghut sù, Timohti lé dang kyô kat lhê; haù Íwa Garai Gasang eq nga-nhông é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguingón hkyô gi, náng chyáng ru joq nyí sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le, ⁴ myit htoq mhô-myi dang eq a dat htûm é byù xik labaù má yhangmoq a ap nóng râ matú le, haù bang lé hkunmó wó hkyô râ nghut lhê. Haù hkyô pé gi, lumjìng myit mai kut htoq é Garai Gasâng é muzó lé lhoq htoq râ malaì, mabyoq jishûm za sheq lhoq htoq nyi é nghut lhê. ⁵ Haù hkunmó hkyô luì myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bûn é myit eq lumjìng myit akying mai lo é nghut lhê. ⁶ Byù ra-am gi, haù hkyô pé mai htoq ló kôluì, dangsôm taì é hkyô shut lhing ló byuq bekô nghut ri. ⁷ Haù bang gi, jep é tarâ sará pé dut naù kôlhang, yhangmoq haì taì nyi é hkyô lé le, hkyak, haì lé mhoqshit é hkyô lé le, a sé kó nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhông sê lhê. ⁹ Haù jep é tarâ gi, dingmán bâng é matú tô tô é a nghut e za, tarâ lu laì é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjìng hkyô a cháng bâng é matú, yhangmoq é yhangwa lé nghut nghut, yhangnu lé

nghut nghut, sat pyám bâng é matú, byù sat bâng é matú, ¹⁰ ashop é đông gungsho zùm yap é bang eq yuqgè yhangchang nyi zo lhum bâng é matú, jùn đông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhûm é lhunglhang bâng é matú sheq, jep é tarâ tô tô é nghut é lé, nga-nhông sê lhê. ¹¹ Tengmán mhoqshit hkyô haù gi, hkungsô wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsing É Jeju Joq Nyi É Hkyô

¹² Ngò gi, ngo lé wum-o byi é, nga-nhông é Yhumsîng Hkrisduq Yesuq lé jeju hkyâ-ôn lhê; hkâsu mù gâ le, Yhang gi, ngo lé lhumzui sù rayuq đông sôn yù luì, Yhâng é muzó jizó má hkyin kat yu é yanmai nghut lhê. ¹³ Hí hkûn, ngò gi, Garai Gasang lé taì hpoi sù, zing-ri sù eq byù rhoì sù nghut wú kôlhang, a sé shi mù lumjìng myit a bo e za kut é yanmai, shogyo nhikmyin yu é hkyô lé ngò wó yu é nghut lhê. ¹⁴ Nga-nhông é Yhumsîng é jeju lé le, Hkrisduq Yesuq eq sêng é lumjìng myit eq chyitdap myit lé le, ngá chyáng agùn agó hut hkyô kat byi bê nghut ri.

¹⁵ Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lungíng é mungdang nghut luì, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê. ¹⁶ Nghut kôlhang, Hkrisduq Yesuq gi, Yhang lé lumjìng luì ahtum abyuq é asak lé wó yù râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tûn shit sháng gaq ga, Garai Gasang gi, ngo lé shogyo nhikmyin yu ri. ¹⁷ Haù mù, haù aróng eq hpungwup shingkang gi, ahtum abyuq é, a dat htên byoq é, myoq eq a byu-myang é Hkohkâm nghut sù, rayuq zâ é Garai Gasâng chyáng pyat dedu ahtum abyuq ru joq nyí sháng gaq ô! Amen.

¹⁸ Ngá zo Timohti ê, nàng eq séng luì myiqhtoi dang joq wú é eq rajung za, ngò gi, nang lé haù đông mhoqshit kat lhê; haù

mù, nàng gi, haú pé lé chung nyi luí, ge é majan zan mù, ¹⁹lumjǐng myit eq mara a bò bûn é myit bo nyi sháng gaq. Byù ra-am gi, haú hkyô pé lé he-ngik pyám kô é nghut luí, yhangmoq é lumjǐng myit gi, wuì-sanghpo htên byoq ló é su htên byoq byuq bekô nghut ri. ²⁰ Haú bang má, Humenu eq Alesander le bò kômù, Garai Gasang lé taí hpoí é dang a taí rá matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

2

Noqkuq Hkyô Eq Séng Luí Mhoqshit Byi É Hkyô

¹ Haú mù luí, ngò, hí pying kat nau é gi, tarâ hkunggâ é eq hkungga gíng é hkyô banshoq má, nga-nhúng wó ngu-ingón yuqyo nyi sháng gaq, hko hkâm pé eq ahkáng ayá wó bang banshoq é matú le, ²yuq hkanmó é matú le, dúng tóngbán byi, kyûdung byi, dúng xoq byi, jeju hkya-on byi, kut aq nghû nau ri. ³ Haú gi, ge é hkyô nghut mù, nga-nhúng é hkyi yù Sû Garai Gasang ô nau é hkyô nghut ri. ⁴ Yhang gi, byù lhunglhâng bang hkyi yu é hui mù, tengmán é mungdang lé sê gyo rá lé, ô nau nyi ri. ⁵ Hkâsu mù gâ le, Garai Gasang gi, rayuq za nghut luí, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri. ⁶ Yhang gi, byù lhunglhâng bâng é matú shíhtaí gunglik hkungga dông Yhânggùng lé byi pyám bê nghut ri; haú gi, ahkyíng yam-yoq jé é hkûn, saksé htoq shit bê nghut lhê. ⁷ Ngò gi, tûngbaù pé lé, tengmán é lumjǐng hkyô mhoqshit rá matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haú su taí é gi, mhaù taí é a nghut, têng é hkyô lé za taí nyi é ru nghut lhê.

⁸ Yuqgè wuì gi, nhikjum yô é hkyô eq dang htíng htíng lhùm é hkyô a bo e za, jowò hkanmó má chyoyúng é loq tû mù kyûdung rá lé, ngò ô nau ri.

⁹ Myiwe wuì gi, xâm nik nik é, hîng zè, palhé, hpaù jung mebù èq a mhôn chung e za, siri bo é mebu wut chùng mù, tap tap za, shuq shuq za kut luí, ¹⁰ Garai Gasang

lé noqkuq é myiwe wuì eq gíng shoq, ge é muzó èq yhumsing gùng lé mhôn nyi rá lé le, ngò ô nau ri.

¹¹ Myiwe gi, uphkang tô é dông châng nyi mù, zim za mhoq yû kó sháng gaq. ¹² Myiwe gi, yuqgè lé mhoqshit rá hkyô lé le, yuqgè lé uphkâng rá hkyô lé le, ngò ahkáng a byi; myiwe gi, zim za kut nyi ra rá nghut lhê. ¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê. ¹⁴ Hau htoq agó, Adam gi, mhaù é hui zo sù a nghut; haú myiwe sheq mhaù é hui zo luí, mara kut shut é ru nghut lhê. ¹⁵ Nghut kôlhâng, myiwe wuì gi, lumjǐng myit, chyitdap myit eq chyoyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é dông mai hkyi yu é hui kó rá nghut lhê.*

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumgíng é dang nghut nyi ri. ² Haú mù luí, hpúng-up rayuq gi, mara hûn rá hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkan é sù, hkungga gíng é sù, byù bíng lé dat hkulum é sù, dat mhoqshit é sù, ³îhpê é jùn a dut é sù, byoq lhum byoq cheq a kut e za nûm é sù, mabyoq jishûm a lhoq htoq é sù, ngunzè lé a chyitdap é sù, nghut rá lhê. ⁴ Yhang gi, yhâng é ikun lé rago dat uphkâng luí, yhang zô pé mai hkungga myit bo é èq yhâng dang lé gyo byi é sù le, nghut rá lhê. ⁵ Rayuq yuq, yhumsing é ikun lé lháng a dat uphkang é nghut le gi, Garai Gasang é noqkuq hpúng lé gi, hkâsu kut wó wú gon rá lhú? ⁶ Chángzo dut é a myáng shi é sù gi, hpúng-up wó kut rá a nghut, kut é nghut jáng, yhang gi, nghutbûn lò luí, jéyáng é hkyô lé nat Tsadán hui zô é su hui zo abe. ⁷ Hpúng-up rayuq gi, tûngbaù pé hí má ge é myíng wó é sù le dut rá lhê; haú jáng, yhang gi, taí hpoí pyám é lé le a hui, nat Tsadán é tuihkyó má le a myí, dut rá nghut lhê.

* 2:15 Apûn 3:16

⁸ Haû eq rajung za, hpungtê pé gi, hkungga gíng é bang, shô-kó a xân é bang, îhpê é jùn a dut é bang, a tengmán é amyat lé a ho é bang, nghut râ lhê. ⁹ Yhangmoq gi, lumjíng hkyô mâ é nik é mauhpo tengmán hkyô pé lé, sansêng é i-mytit eq châng nyi ra râ nghut lhê. ¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hûn râ hkyô haí a bò lo jáng, hpungtê mù lé wùn kó sháng gaq.

¹¹ Haû eq rajung za, yhangmoq é yhumsíng myhî pé le, myit no nhang é dang a taí e za, dat sidiq é eq hkyô hkangmó má lumjíng luí, hkungga gíng é myiwe wui, nghut ra râ dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê. ¹³ Hpungtê mù lé rago za wùn waq bê bang gi, yhumsíng é matú aróng lé le, Hkrisduq Yesuq lé yhangmoq lumjíng hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴ Ngò gi, hkâ-myháng a myáng má náng chyáng lé jé râ matú, myit myoqbyu to kôlhang, ahkyíng du myáng pyâm le, ¹⁵ Garai Gasâng é ikun hkaû má, byu pé hká dông nyi yap râ é hkyô lé, nàng sé sháng gaq nghú, pying kat é dang shi pé lé ká byí kat lhê; ikun haû gi, rû dui nyi é Garai Gasâng é noqkuq hpúng nghut luí, tengmán hkyo é hkungmó-zíng eq apûn awang nghut ri. ¹⁶ Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haû gi, Yhang, byù gungsho má htoq shit mù, haû Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri; byuhú ahú hú má Yhâng é hkyô lé hko kyo mù, Yhang lé mingkan byu pé lumjíng luí, hpungwup shingkang eq Yhang lé mauhkûng shut shuí toq yú bê nghut ri.

4

Timohti Lé Mhoqshit É Hkyô

¹ Jihtûm buinyi pé má, byù ra-am gi, lumjíng hkyô mai htak htoq ló luí, mhaú zô é woi-nyí pé htâng cháng kó râ eq nat gang

mai lo é mhoqshit hkyô pé lé gyo byi kó râ nghut lhê ga, haû Woi-nyí gi, san za taí ri. ² Haû sù é mhoqshit hkyô pé gi, gegùn labyoq kut é byù-mhaû pé chyáng mai lo é nghut lhê; haú bâng é myit nhiklhum gi, nyhê nhe tô é shamtoq eq nyhê man tô é su dut byuq bê nghut ri. ³ Haú bang gi, hâng lhúm é hkyô lé hkúm tang é hkyô lé le, haû lumjíng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akô nghut ri. ⁴ Garai Gasang hpan tô é lhunglháng gi, ge é chyat nghut ri; Garai Gasâng é mungdang eq kyúdüng é dang dông haú pé lé lhoq sân-yúng nyi é nghut é yanmai, ⁵ jeju hkya-on luí hap yu é nghut le gi, haí jung lé lháng he-ngik pyám râ hkyô a bò nghut ri.

⁶ Haû gumang wui lé, nàng haú hkyô pé lhoq pun lhoq kyíng é nghut le gi, nàng gi, haû nàng cháng bê ge é mhoqshit hkyô eq lumjíng hkyô mâ é tengmán hkyô má, kô myhâng sù nàng nghut râ htoq agó, Hkrisduq Yesuq é ge é hpungmù wùn sù le dut râ nghut lhê. ⁷ Garai a bo é myit htoq mhô-myi dang eq hpô-myhí mâng pê é mhô-myi dangsôm lé koi pyám luí, tarâ hkunggâ é hkyô má yhumsíng gùng lé lhoq kûng yù aq. ⁸ Hkâsu mù gâ le, gungsho lé lhoq kûng é hkyô gi, akyû shau za htoq é nghut lhê; nghut kôlhang, tarâ hkunggâ é hkyô kúm gi, jung hkangmó é matú akyû bo lhê nghut mù luí, shí ipyat má le, htang pyat má le, akyû bo nyi ri.

⁹ Haû gi, banshoq hap yù gíng é, lumjíng é mungdang nghut lhê. ¹⁰ Haû mù luí, xângzo byù banshoq bâng é hkyi yù Sù nghut é, je riyhang, lumjíng bâng é hkyi yù Sù nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

¹¹ Haú pé lé, hkunmó hkyó luí mhoqshit byí nyi aq. ¹² Náng é zorâm pyat lé, ó yuq eq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjíng hkyô má le, sansêng é hkyô má le, lumjíng bâng é matú alik kut shit nyi aq. ¹³ Náng chyáng ngò jé lé é buinyi jé shoq, nàng gi, Chyúmdang nghap kyô é má le, hko

kyô é má le, mhoqshit é má le, ap nóng nyi aq. ¹⁴ Nàng gi, hpúng suwún wuî nàng é ahtoq má loq ke byî é hkûn, myiqhtoi dang đông nang lé Garai Gasang byî tò bê nghut é, woi-nyî hkyô eq sêng é chyunghuq lé, haî su a ngàm hkâkut pyám.

¹⁵ Haú hkyô pé lé, myit zìng zuq luî zui saî nyi aq; nàng kô myhang lo é hkyô lé, yuq hkangmó byu-myàng kó sháng gaq, náng gûng banshoq haú pé má ap nóng nyi aq. ¹⁶ Náng é asak duì hkyô má le, nàng mhoqshit é hkyô má le, rago sidiq nyi aq. Haú pé má ru gîng nyi aq, hkâsu mù gâ le, nàng haú su kut é nghut jáng, náng é asak lé le, náng chyáng mai gyô yu é bang lé le, nàng wó hkyi yù rà nghut lhê.

5

Suwún Wuî, Chuimó Pé, Jùn Pé Eq Séng Luî Hpaqchyî Byî É Hkyô

¹ Asak kô sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wuî lé gi, gumang wuî lé su, ² asak kô é myiwe wuî lé gi, înu pé lé su zùm yap luî, zomyi wuî lé gi, nhammó wuî lé su sansêng é i-myit banshoq eq zùm yap nyi aq.

³ Gè gè yhang garúm rà dut é chuimó myhî pé lé, hkunggâ nyi keq. ⁴ Nghut kôlhang, chuimó myhî rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luî, înu îwa eq îchyî îwhoî pé lé jeju taû é đông, yhangmoq é lumjîng hkyô lé, zui saî é má lhoq mhán nhâng rà lé hí mhoq yû ra rà nghut lhê; hkâsu mù gâ le, haú gi, Garai Gasang ô nau é hkyô nghut ri. ⁵ Haú lùm rà ó yuq le a wó mù, gè gè yhang rà tô é chuimó myhî gi, Garai Gasâng chyáng myit myoqbyu nyi luî, nyi, myín xoq xoq kyûdung mù, Garai Gasang garúm rà hkyô lé dúng nyi ri. ⁶ Nghut kôlhang, ngón hkyô za cháng luî asak dui é chuimó myhî gi, asak dui nyi kôlhang, shî gù nghut bê nghut ri. ⁷ Yhangmoq lé, ó yuq eq le mara a hûn kó sháng gaq, haú hkyô pé lé le mhoqshit byî nyi aq. ⁸ Rayuq yuq, yhâng é buinùm ji-myi wuî lé a baú é htoq agó, je luî yhumsing é ikun byù lé a baú é nghut

le gi, haú lumjîng hkyô lé he-ngik pyám bê nghut luî, a lumjîng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhî za a nghut jáng, chuimó jihpán má wó kat rà a nghut; hau htoq agó, yhang gi, yuqgè rayuq za wó wú é sù; ¹⁰ zoshâng wuî lé hku baú é sù, bíng lé rago dat hkulum é sù, sân-yúng bê bang é hkyô lé chi byî é sù, wuîhke huî tô é bang lé garúm luî, ge é muzó junghkang jungmó má yhumsing gùng yhang ap nóng nyi ri ga, yhang kut é ge é muzó má mying hû é sù le, nghut rà lhê.

¹¹ Asak tiq é chuimó myhî pé lé, jihpán haú má hkâkat. Hkâsu mù gâ le, gungsho ô nau é hkyô eq Hkrisduq chyáng yhangmoq ap nóng tô é hkyô lé ung pyám é hkûn, yhangmoq gi, myi ló nau kó rà nghut lhê.

¹² Haú mù, yhangmoq gi, sâng-hi lé yhangmoq tô tô é danggidiq lé lhoq hpýoq pyám kô é yanmai, tarâ darâ é hui zo kó rà nghut lhê. ¹³ Hau htoq agó, yhangmoq gi, rayhûm htâng rayhûm châng wang wún kômù, lagôn mán byuq kó rà nghut lhê. Lagôn é bang za dut kó rà a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mù má châng wang nyo wún é bang le, dut kó rà nghut lhê.

¹⁴ Haú mù luî, gyè pé mai lumù gansâng dang a wó taí pyám kó sháng gaq, asak tiq é chuimó myhî pé gi, myi ló mù, zoshâng hkû luî, yhangmoq é ikun lé gôn lajang rà matú, ngò, yhangmoq lé hpaqchyî byî kat lhê. ¹⁵ Hkâsu mù gâ le, ra-am gi, lhing taû ló kôluî, Tsadán é htâng châng nyi lugù nghut bekô nghut ri.

¹⁶ Lumjîng é myiwe rayuq yuq gi, yhâng é ikun má chuimó myhî wó é nghut le, haú yuq é matú noqkuq hpúng lé wôlai a hun e za, yhang mai garúm yû ra rà nghut lhê; haú hkûn sheq, noqkuq hpúng gi, gè gè yhang rà tô é chuimó myhî pé lé wó garúm rà nghut lhê.

¹⁷ Haú noqkuq hpúng lé rago za shuî ù é hpúng suwún wuî gi, akyû í tú hkam yù gíng lhê; haú mungdang hko é hkyô eq mhoqshit é hkyô má shikut é suwún wuî gi, je riyhang hkam yù gíng lhê. ¹⁸ Hkâsu mù gâ le, "Guq nâng nyi é no lé, nhuttsung

hkâ-tsông to byi."✧ ga le, "Mû zui sù gi, yhâng é zuihpau wó yû gíng lhê."✧ ga le, Chyúmdang má taí tô ri. ¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhóm yù. ²⁰ Nghut kôlhang, lhoq pun lhoq kyíng é hkyô lé góbang wó yû kó sháng gaq, mara kut shut é bang lé, shiwa byu pé hí má tân mhoqshit aq.

²¹ Pyíng kat é dang shi pé lé, gamhkui myit a bo e za châng nyi rá eq, myoqdong hkyín luí haí le a kut rá matú, Garai Gasang eq Hkrisduq Yesuq é hí má le, hkyin yù huí é maumang lagyô pé é hí má le, ngò, nang lé pyíng kat lhê.

²² Ó yuq é ahtoq má le loq ke* byi rá lé hkâhân; góbang é mara hkaú má le hkâbo lóm. Yhumsíng yhang yhumsíng sân-yúng shoq kut nyi aq.

²³ Náng é wamdau ra luí, anum num nó nó dut é yanmai, nàng gi, wuì za shuq é hkyô lé nó pyám luí, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luí, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri. ²⁵ Haú eq rajung za, ge é muzó pé gi, de de nghut nyi luí, haú su de de a nghut é pé lé le, wó zaú to rá a nghut.

6

¹ Jùn dut é wólai hkaú má nyi é lhunglhang bang gi, yhangmoq é yhumsíng wuì lé gyai yhang hkungga gíng lhê nghú, myit yù rá dut lhê; haú hkûn sheq, Garai Gasâng é myíng eq nga-nhúng é mhoqshit hkyô gi, lumù gansang é a hui rá nghut lhê. ² Lumjíng é yhumsíng wuì é jùn gi, gumang wuì nghut é yanmai, yhangmoq lé a wú myuq é za, yhangmoq dojaú luí akyú myang hkâm zô é bang gi, lumjíng bang eq chyitdap gíng é bang nghut é yanmai, yhangmoq lé je ge é dông dojaú rá lhê. Shí hkyô pé lé, nàng gi, yhangmoq lé mhoq byi nyi é eq lhoq pun lhoq kyíng byi nyi aq.

Ngùn Lé Chyitdap É Hkyô

✧ **5:18** Luk 10:7 * **5:22** Haú hkun lhê bang gi, hpúng suwún kut rá matú hkyin to bê bang lé, loq ke kyúdung byi é nghut lhê.

³ Rayuq yuq gi, shut é lumjíng hkyô lé mhoqshit luí, nga-nhúng é Yhumsíng Yesuq Hkrisduq é tengmán mhoqshit hkyô eq tarâ hkungga é mhoqshit hkyô lé a myit huí é nghut jáng, ⁴ haú yuq gi, nghutbún é sù eq haí lé le a sê gyô é sù nghut ri. Yhang gi, htuq htíng lhúm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haú mai, manon é hkyô, byoq lhóm byoq cheq é hkyô, lumù gansang é hkyô, agè ashop é dông myit ngam pyám é hkyô eq, ⁵ haú tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyám bê bang é gyoro má, byin a huí é hkyô pé lé, lhoq htoq kat ri.

⁶ Nghut kôlhang, tarâ hkungga hkyô má nhik dik é hkyô bo é nghut le gi, amyat mó nghut nyi ri. ⁷ Hkâsu mù gâ le, nga-nhúng gi, mingkan htoq má haí jung le a yu wang lé, haú mai le haí wó yu htoq ló rá a nghut. ⁸ Haú mù luí, nga-nhúng gi, wutbu wutmè eq zoshuq wó é nghut jáng, hau eq nhik dik nyi sháng. ⁹ Wó naú sùt nau é byu pé gi, gunglaú hkyô eq tuihkyó má le, haú byoq yeq hkyô eq htên byoq hkyô má, byu pé lé myup shí nhang é, ngha é hkyô myo myo eq myit nó nhâng nau é hkyô má le, byit gyó wâng kó rá nghut lhê. ¹⁰ Hkâsu mù gâ le, ngùn lé chyitdap é hkyô gi, agè ashop hkyô ajung jûng é apûn awang nghut nyi ri. Byù ra-am gi, ngùn lé ô nau luí, haú lumjíng hkyô mai sô nghoq ló mù, yhumsíng gùng lé yhumsíng, haú yón kuq hkyo eq htaú rot pyám bekô nghut ri.

Timohti Lé Pyíng Kat É Dang

¹¹ Nghut kôlhang, Garai Gasâng é byù nàng gi, haú pé banshoq lé koi pyám luí, dítngmán hkyô, tarâ hkungga hkyô, lumjíng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyi aq. ¹² Lumjíng hkyô eq sêng é ge é majan le zân nyi aq. Hap yù lumjíng bê ga, saksé myo myô pé é hí má, ge é dông nàng yín yu é hkûn, wut yu é hui luí wó é ahtum abyuq é asak lé, zuí zing nyi aq. ¹³ Haú lhunglhang lé asak byi é Garai Gasâng é hí má le, Pontu Pilat chyáng saksé hkâm

nyi é hkûn, ge é dông yín yu é Hkrisduq Yesuq é hí má le, ngò, nang lé pying kat lhê: ¹⁴ Yhâng é ahkyíng yam-yoq jé jáng, Garai Gasang htoq shit nhâng râ nghut é sù, nga-nhông é Yhumsíng Yesuq Hkrisduq htoq shit é buinyì jé shoq, ¹⁵ nàng gi, agot a-u é hkyô eq mara hùn râ hkyô a bo e za, hkunmó shî lé châng nyì aq. Garai Gasang gi, hkungsô wó sù, Yhang za up sù, hkohkam pê é Hkohkâm, yhumsing pê é Yhumsíng, ¹⁶ Yhang za ahtum abyuq dui nyì sù, a ge chyâng htep e é maubó má dui nyì sù, ó yuq eq le a myang wú é, a wó myang é sù nghut nyì ri. Aróng eq hpungwup a-tsam gi, Yhâng chyáng ahtum abyuq ru joq nyì sháng gaq ô! Amen.

¹⁷ Shí ipyat má wó sùt é bang gi, a gumrông râ eq a gîng é sutzè má yhangmoq é myit myoqbyù hkyô a tô e za, nga-nhông nguingón yuqyo nyì râ matú junghkang jungmó lé agùn agó byì é sù, Garai Gasâng chyáng za, yhangmoq myit myoqbyu nyì râ matú, hkunmó hkyó aq. ¹⁸ Ge é hkyô kut luì, ge é muzó má wó sùt nyì mù, a chum e za, gam chûng nau é myit bò râ matú, yhangmoq lé hkunmó hkyó aq. ¹⁹ Haú dông mai, yhangmoq gi, jé lô râ ipyat é matú gîng é apûn awang dông, yhangmoq é matú sutzè wó tsîng to kó râ nghut lhê; haú hkûn sheq, yhangmoq gi, asak kyîng nghut é asak haú le wó zuì zîng to kó râ nghut lhê.

²⁰ Timohti ê, nang lé ap to bê hkyô lé, zúng nyì aq. Tarâ a hkunggâ é poming ming bâng eq hpaqchyì nghut lhê ga myhîng shut é htuq htîng lhum lhum kut é hkyô lé, koi pyám aq. ²¹ Byù ra-am gi, haú lé hpaqchyì nghut lhê ga yín yû kôluì, haú lumjîng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyì sháng gaq ô.

TIMOHTI Chyáng Htang Dàm Hun Kat é Laiká (2 Timothy)

¹ Hkrisduq Yesuq chyáng mâ é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chytidap é ngá zo Timohti lé, dang kyô kat lhê.

² Haù Íwa Garai Gasang eq nga-nhông é Yhumsing Hkrisduq Yesuq chyáng mâ é jeju eq shogyo nhikmyin hkyô, nguingón hkyô gi, ru joq nyí sháng gaq ô!

Lumlug Râ Matú Myit Wum Byí É Hkyô

³ Ngò gi, ngá é kyûdung dang má, nyí, myín, abyit alan nang lé bún nyi uchyang, sân-yúng é i-myt mai, ngá é íchyí íwâ pé dojaú é su, ngò dojaú nyi é Garai Gasang lé, jeju hkyá-ôn nyi lhê. ⁴ Ngò gi, ngò má gabú hkyô byíng jup sháng gaq nghû, náng é ngaubyi lé myit bún nyi mù, nang lé gyai yhang myàng nau nyi ri. ⁵ Ngò gi, nang é gyíng é lumjíng myit lé lhoq pùn yù mù, náng whoí Lu-i eq náng nu U-ni nhik chyáng má hí bo é lumjíng myit, ahkuí, náng chyáng le bo ri nghû, hkyak myit lum nyi lhê. ⁶ Hau é yanmai, ngò loq ke byí é dông, náng má bo tô é Garai Gasang é chyunguq lé, gyúng nhang nyi râ matú, nang lé ngò lhoq pùn kat lhê. ⁷ Hkâsu mù gâ le, Garai Gasang gi, gyuq sê é myit nga-nhông lé a kat byí e za, a-tsam bo é myit, chytidap sê é myit, yhumsing gùng lé dat hkang é myit sheq kat byí tô é ru nghut lhê.

⁸ Haù mù luí, nàng gi, nga-nhông é Yhumsing eq séng luí saksé hkâm é hkyô má le, Yhâng é yanmai htóng byú dut to sù ngá é hkyô má le, hoq myit a bo é za, Garai Gasang é wum-o mai, haù gabú danglu é matú, ngò eq rahá wuñke jamjau chòm hui goq. ⁹ Garai Gasang gi, nga-nhông zui saí é muzó dông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhông lé, hkyi yù luí chyoiyúng é asak duí hkyô má ji yù bê nghut ri. Ahkyíng nghu é lhang a joq shi mai yhang, jeju haù

gi, Hkrisduq Yesuq má nga-nhông lé byi to gù nghut bê. ¹⁰ Nghut kôlhang, nga-nhông é hkyi yù Sù, Hkrisduq Yesuq pô htoq é dông, ahkuí, haù lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haù gabú danglu dông mai, asak lé le, a dat htên byoq é hkyô lé le, lhoq htoq shit bê nghut ri. ¹¹ Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù nghut lhê. ¹² Hau é yanmai, ngò gi, wuñke jamjau shî lé huí nyi é nghut lhê. Nghut kôlhang, ngò gi, ó yuq lé lumjíng bê nghut é hkyô lé, sê é htoq agó, Yhang lé ngò ap tô é pé lé, haù buinyi jé shoq, Yhang wó zúng rá nghut lhê nghû hkyak myit lum tô é yanmai, ngò a hoq.

¹³ Nàng gi, ngá chyáng mai wó gyô yu é tengmán dang pé lé, Hkrisduq Yesuq má, lumjíng myit eq chytidap myit mai alik kut yu nyi aq. ¹⁴ Nang lé ap byí to bê, haù ge é mungdang lé, nga-nhông chyáng bo tô é Chyoiyúng Woi-nyí é wum-o mai zúng nyí aq.

¹⁵ Asia mau mâ é bang yuq hkangmó gi, ngo lé pyám to kô é hkyô lé, nàng sê lhê; haù bang má, Hpugelu eq Heramoge nhik le bo akô nghut ri.

¹⁶ Haù Yhumsing gi, Onesihpurú é yhum-byù lé shogyo nhikmyin é hkyô tân shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuí é yanmai, a hoq e za, ¹⁷ yhang, Romaq myuq má jé nyi é hkùn, ngo lé myang hui shoq, ho shikut é sù nghut ri. ¹⁸ Haù Yhumsing gi, haù buinyi má, yhang lé haù Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nàng rago yhang sê lhê.

2

¹ Haù mù, ngá zo ê, nàng gi, Hkrisduq Yesuq má é jeju hkaú má, wúm bo nyi aq. ² Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq. ³ Hkrisduq Yesuq é ge é gyezo rayuq su, wuñke hkyô lé chòm jan nyi sháng. ⁴ Gyezo rayuq dông gyè mù wùn waq nyi é sù, ó yuq nghut kôle, gotú muzó má a

bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê. ⁵ Haû eq rajung za, shingjông é sù rayuq le, shingjông lhum poî wang é hkûn, tô tô é tarâ dông a châng e nghut le gi, ung é aróng chyunghuq lé wó yû râ a nghut. ⁶ Yo-mû zuî shikut é sù gi, kyôshi lé sâng-hi myang hkam yû râ sù nghut lhê. ⁷ Haû Yhumsing gi, shí pé banshoq lé wó sê é nyan nang lé byi râ nghut é yanmai, ngò taí é hkyô pé lé myit wú aq;

⁸ Haû Dawiq é awut ashín nghut sù, Yesuq Hkrisduq gi, shí é mai dum dui toq bê hkyô lé myit bun aq; haû gi, ngá é gabú danglù nghut lhê. ⁹ Gabú danglù hau é yanmai, mara bò sù rayuq lé su, ngò gi, kyum hut é hui luí, hpuzô nyi é nghut lhê. Nghut kôlhang, Garai Gasâng é mungdang gi, kyum hut huí é a nghut. ¹⁰ Haû mù luí, ngò gi, Hkrisduq Yesuq chyáng mâ é hkyi yû hkyô eq ahtum abyuq é hpungwup shingkang lé wó yû kó sháng gaq nghû, haû hkyin yû hui bâng é matú, jung hkangmó lé hkam jân nyi lhê.

¹¹ A-ô mâ é dang gi, lungíng é dang nghut lhê:

Nga-nhúng gi, Yhang eq rahá shí bê nghut jáng, Yhang eq rahá duì râ nghut lhê.

¹² Nga-nhúng gi, hkam jân é nghut jáng, Yhang eq rahá up râ nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm râ nghut lhê.

¹³ Nga-nhúng gi, lhumzui myit a bò kôlhang, Yhang gi, lhumzuí nyi râ nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

Garai Gasâng Hí Má Myoqdong Wó É Mû Zui Sù

¹⁴ Nang gi, yhangmoq lé, shí hkyô pé xoq luí lhoq pùn nyi aq. Dang pé eq séng luí, a byoq lhum nyi kó sháng gaq, Garai Gasâng hí má yhangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê. ¹⁵ Nang gi, haû tengmán é mungdang lé jo shoq chung jai é eq, hoq nó a râ é mû zui sù rayuq dông Garai Gasâng hí má myoqdong wó shoq, wó dut é myhó shikut aq. ¹⁶ Tarâ a

hkunggâ é po-ming ming bang lé koi pyám aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân ló byuq é bang dut kó râ nghut lhê.

¹⁷ Yhangmoq é mhoqshit hkyô gi, mong ana su byo myín ló râ nghut lhê; haû bang má Humenu eq Hpilitu nhik le bò kôluí, ¹⁸ haû tengmán hkyô mai sô ngoq ló byuq akô. Yhangnhik gi, haû dum dui toq hkyô dut lai bê ga taí kômù, ra-âm é lumjíng hkyô lé lhoq htên pyám byi akô nghut ri. ¹⁹ Nghut kôlhang, "Haû Yhumsing gi, Yhang eq sêng é bang lé sê lhê."* ga luí le, "Haû Yhumsing é myíng lé yín yu é bang yuq hkangmó gi, agè ashop hkyô mai lhing tau ra kó râ nghut lhê." ga luí le, dizik haû htung tap tô é, Garai Gasâng é ging títng é apûn awang gi, ging nyi ri.

²⁰ Yhûm mó ralhûm má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut. ²¹ Haû mù luí, haû pé mai yhumsing gùng lé lhoq sansêng pyâm é sù gi, chyoiyúng luí, haû Yhumsing chung jai gíng é sù, ge é muzó hkangmó kut râ hen tô é sù nghut é yanmai, aróng hkyo é matú chungzè dut râ nghut lhê.

²² Zoram é agè ashop é ô nau hkyô lé koi pyám mù, haû sân-yúng é myit mai, Yhumsing lé wut dúng é bang eq rahá, dingmán hkyô, lhumzui hkyô, chyitdap hkyô, nguínón hkyô pé lé, châng hkat nyi aq. ²³ Go é eq ngok é dông dang jet jet lhum é hkyô gi, mabyoq lhoq htoq é hkyô nghut é lé, nang sê lhê nghut é yanmai, haû hkyô lé koi pyám aq. ²⁴ Haû Yhumsing é dui-nhâng zoshâng gi, mabyoq a lhoq htoq é za, yuq hkangmó lé dat myit tê byi é, wó mhoqshit é, a dat nhik-yô é su dut ra râ nghut lhê.

²⁵ Yhang gi, yhang lé htuoq htíng é bang lé, nú-nhâm é dông mhoqshit byi ra râ nghut lhê; haû hkûn, Garai Gasang gi, yhangmoq lé myit lîng hkyô byi mù, tengmán hkyô lé sê gyo nhâng luí, ²⁶ yhangmoq gi, bûn gyíng lò mù, nat Tsadán ô nau é hkyô lé kut byi râ matú, chyup yû huí é, nat Tsadán é tuihkyó mai wó hfang lut ló kó abe nghû, myit lum kat lhê.

3

Jihtùm Buinyì Pé Má Dut Lò Râ Hkyô

¹ Jihtùm buinyì pé má, wuìhkê é ahkyíng pé joq lò râ nghut é lé, nàng matsíng to aq. ² Hkâsu mù gâ le, haú u lé, byu pé gi, yhumsing gùng lé za chytidap é bang, ngùn lé myoqnoq é bang, gumrong é bang, nghutbùn é bang, góbang lé taí hpoi é bang, ìnu ìwa nyo é lé a gyô é bang, jeju a dat bôn é bang, a chyoiyúng é bang, ³ chytidap myit a bo é bang, mara hkyut byi a sê é bang, lumù gansang é bang, yhumsing gùng lé hkàng a sê é bang, byuwuì pé, ge é hkyô lé a ngui é bang, ⁴ haq gumlaú é bang, a bun a so dut wún é bang, yhumsing gùng lé za hkik bôn é bang, Garai Gasang lé chytidap é bang dut râ malaì ngón kún hkyô lé za chytidap é bang, dut bùm kó râ nghut lhê. ⁵ Yhangmoq gi, tarâ hkunggâ é bang su dut kôlhang, haú pé é a-tsam lé he-ngik pyâm akô nghut ri; haú sù é bang lé, nàng koi pyâm nyi aq.

⁶ Yhangmoq gi, hpaqchyí da mù yhùm pé má wàng kôluí, mara wòlai lé wun é, agè ashop é ô naù hkyô ajung jung má sô nghoq ló byuq é, ⁷ hkâ-nhám le mhoq yu nyi kôlhang, haú tengmán hkyô lé a sê gyô é, myit nyhôm é myiwe wui lé wó lãng nghoq yu é bang nghut akô. ⁸ Yanne eq Yambre nhik gi, Mosheq lé htuq htíng é su, haú bang le, haú tengmán hkyô lé htuq htíng akô nghut ri; yhangmoq gi, myit é hkyô htên byuq kôluí, haú lumjínng hkyô má lhum a zuí é bang nghut akô. ⁹ Nghut kôlhang, haú nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lô râ nghut mù, haú mai lai lui yhangmoq wó kut jat kó râ a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tò é hkyô, ngá é lumjínng hkyô, myit híng hkyô, chytidap hkyô, hkam jan hkyô, ¹¹ zing-ri huí é hkyô eq wuìhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haú Yhumsing gi, haú pé banshoq mai ngo lé xe yù bê nghut ri. ¹² Gè gè yhang, agè ashop é byu pé eq mhaú

kut é bang gi, mhaú zô nyi bum é eq mhaú zô é huí nyi bùm kôluí, a ge é hkyô shut je riyhang myô jat lò kô é hkùn, ¹³ Hkrisduq Yesuq má tarâ hkunggâ é asak dông nyiyap nau é bang yuq hkangmó gi, zing-rí é hui kó râ nghut lhê. ¹⁴ Nghut kôlhang, nàng gi, ô pé chyáng mai nàng mhoq yù bê hkyô lé le, Hkrisduq Yesuq lé lumjínng jáng hkyi yu é hui shoq, ¹⁵ nang lé hpaqchyí byéng-yá wó byi é chyoiyúng Chyúmdang pé lé, zoshàng hkùn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjínng to bê hkyô má, xoq kut nyi aq. ¹⁶ Chyúmdang hkangmó gi, Garai Gasang é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byi é hkyô eq dínngmán hkyô lé tân shit byi é hkyô pé é matú, akyû bo ri; ¹⁷ haú mù lui, haú Garai Gasang é byù gi, ge é muzó jizó hkangmó lé kut râ matú, wó gumjup râ nghut lhê.

4

¹ Garai Gasang é hí má le, dui nyi bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhàng míngdán é yanmai, ngò, nang lé pying kat é gi, ² haú mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaí hing é eq rago za mhoqshit é dông, lhoq jo byi, tân mhoqshit é eq myit wum byi kut nyi aq. ³ Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô naù yut yut é hkyô cháng lui, yhangmoq é no yo bui nau é nohkyap gyô nau é hkyô taí nhàng râ matú, sará pé rajùm rayò lé lhíngkyuq má lhoq tsing to kó râ nghut lhê. ⁴ Yhangmoq gi, haú tengmán hkyô mai yhangmoq é nohkyap lé lhíng pyám mù, myit htoq mhô-myi dang shut lhíng ló kó râ nghut lhê. ⁵ Nghut kôlhang, nàng gi, dut tô é hkyô banshoq má rago sidiq nyi aq; wuìhke jamjau hkyô lé hkam jân nyi aq; gabú danglù hko kyô é muzó kut nyi aq; nàng é hpungmù banshoq lé wùn waq nyi aq.

⁶ Hkâsu mù gâ le, ngò gi, shuq jung hkungga ralhùm dông hut pyâm é huí nyi gù nghut mù lui, míngkan mai ngò htoq

lô râ ahkýing jé bê nghut ri. ⁷ Ngò gi, haù ge é majan le zan bê; din shingjông lhùm é hkyô le bàn bê; haù lumjìng hkyô le chang bê nghut lhê. ⁸ Ahkuí, haù tengmán é tarâ Agyì nghut sù, Yhumsìng gi, haù buinyì má ngo lé ap byi râ nghut é, haù dingmán hkyô é janmaù lé, ngá matú tô to byi bê nghut lhê. Haù gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

Timohti Lé Jì Kat É Hkyô

⁹ Nàng gi, ngá chyáng wó dut é í hân hân lé lô aq. ¹⁰ Hkâsu mù gâ le, Demaq gi, mingkan shì lé chyitdap é yanmai, ngo lé pyám to luí, Htesaloni và mó shut; Krezen gi, Galatiq mau shut; Tituq gi, Dalamati mau shut, e lô byuq bekô nghut é yanmai nghut lhê. ¹¹ Lukaq za ngò eq rahá nghut nyi lhê. Markuq lé, nàng eq rahá shuí lé lò aq; yhang gi, ngá é hpungmù má wó htuqáng rá sù nghut lhê. ¹² Ngò gi, Tuhkiku lé Ehpesu myuq shut nhang kat bê nghut lhê. ¹³ Nàng gi, lé lo é hkùn, Troa myuq má, Karpu chyáng ngò tô tô é buhìng haù lé le, ngá é chyúmding lé le, je luí eq haù shokuq chyúmding pé lé le, yù lé lô byi aq.

¹⁴ Haù ningdup hpó Alesander gi, ngo lé a ge é myo myo kut bê nghut ri; haù Yhumsìng gi, yhang kut é eq rajung za, yhang lé dam byi râ nghut lhê. ¹⁵ Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

¹⁶ Sâng-hì dàm, ngá gùng lé ngò taì hung é hkùn, yuq hkangmó gi, ngá é hkyam shut a bo lom e za, ngo lé pyám tô akò. Nghut kôlhang, haù gi, yhangmoq ahtoq má mara a dut sháng gaq. ¹⁷ Nghut kôlhang, ngò dông mai danglù haù lé rago wó hko pyo kat luí, tûngbaù pé banshoq bang wó gyo kó sháng gaq ga, haù Yhumsìng gi, ngá hkyam shut yap to mù, ngo lé wum-o byi é nghut lhê. Hau htoq agó, ngò gi, hkanghkyi é nhut mai le hkyi yù hui bê nghut lhê.* ¹⁸ Haù Yhumsìng gi, ngo lé agè ashop é hkyô hkangmó mai hkyi yù luí, Yhang é mauhkûng mingdán má ngón za shuí jé râ nghut lhê. Hpungwup shingkang gi, Yhâng

chyáng ahtum abyuq ru joq nyi sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesih-puru yhumbyù wui lé le, bo shi-kyám byi laq. ²⁰ Erastu gi, Korinhtuq myuq má nyi gyó to bê; Trohpimu lé gi, nò luí, Melitu và mó má ngò nyhi pyám to bê nghut lhê. ²¹ Nàng gi, wó dut é í, gyoqmyò a wàng shi lé, shì má jé lé lò aq. Ubulu gi, nàng lé shi-kyám kat ri; haù eq rajung za, Pudén, Linu, Klodia eq gumang wui banshoq bang gi, nàng lé shi-kyám kat akò nghut ri.

²² Haù Yhumsìng gi, náng é woi-nyí eq rahá nghut nyi sháng gaq. Jeju gi, nungmoq chyáng ru joq nyi sháng gaq ô.

* **4:17** Haù hkùn lé, Romaq byu pé, byù sat lé gi, hkanghkyi lé tsô pyám lhê.

TITUQ Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chôm myit myoqbyu é yanmai, Garai Gasang hkyin yu to bâng é lumjínng hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. ² Haù ahtum abyuq é asak hkyô lé, mhaù a sê é Garai Gasang gi, ahkyíng nghu é lhang a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é đông lhoq htoq shit luí, ³ nga-nhông é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhông chôm lumjínng é hkyô đông mai, ngá zo sîng nghut é Tituq lé laiká kâ kat lhê. Íwa Garai Gasang eq nga-nhông é hkyi yù Sù Hkrisduq Yesuq chyáng mã é jeju eq nguínngón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkanmó má hpúng suwún ayá dáng to byi râ matú nghut lhê. ⁶ Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hùn râ jowò a joq é lumjínng bang nghut é sù, nghut râ lhê. ⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myit a lùm tot; íhpê é jùn a dut; mabyoq jishùm a kut; a sansêng é ngùn híng lé a myit ô nau é sù nghut râ lhê. ⁸ Yhang gi, byù bíng lé dat hkulùm sù; ge é hkyô lé chyitdap sù; nùm é sù, dingmán sù; chyoiyúng sù; yhumsing

gùng lé wó hkang é sù; ⁹ mhoq yu to bê hkyô eq rajung za, lumjínng é mungdang lé ging ging zui zing nyi é sù nghut râ lhê. Haù hkùn sheq, yhang gi, góbang lé tengmán é mhoqshit hkyô đông myit wum wó byí é eq, haù eq shai lhum é bang lé, shut é hkyô wó tân shit râ nghut lhê.

¹⁰ Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô. ¹¹ Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é đông sutzè lé wó yù shoq ga luí, mhoqshit a gíng é hkyô pé lé mhoqshit mù, rayhum bang bang lé lhoq hpýoq lhoq htên nyi akô nghut ri. ¹² Kreti byù mã é myiqhtoi rayuq lhang gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô." ga taí wú ri. ¹³ Saksé shí gi, têng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, ¹⁴ haù lumjínng hkyô má ging tîng nyi kó sháng gaq, yhangmoq lé htân htân tân mhoqshit byí nyi aq. ¹⁵ Sân-yúng bâng é matú gi, azíng zê lhunglhang sân-yúng ri; a sân-yúng bang eq a lumjínng bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri. ¹⁶ Yhangmoq gi, Garai Gasang lé sê lhê ga kôlhang, yhumsing zui saí é loq zó đông, Yhang lé he-ngik pyâm é bang nghut akô. Yhangmoq gi, achayut é bang, jìno a gyô é bang eq, ge é mù joq mijoq eq a htuk é bang nghut akô nghut ri.

2

Hká Đông Nyi Yap Râ Hkyô

¹ Nang kúm gi, tengmán é mhoqshit hkyô eq wui é đông mhoqshit nyi râ dut lhê. ² Hpô-mâng pé lé gi, i-myit shirâm sé râ hkyô; hkungga gíng é byù dut râ hkyô; yhumsing gùng lé wó hkang râ hkyô eq, lumjínng myit ging râ, chyitdap myit ging râ, hkam jan hkyô gíng nyi râ hkyô pé lé, mhoqshit byí nyi aq.

³ Haú eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a taí râ hkyô; îhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. ⁴ Haú hkûn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é, ⁵ yhumsing gùng lé wó hkang é, siri bo é, ikun lé dat wùn waq é, ge é myit wó tûn shit é, yhumsing é yhanglâng uphkang é dông dat châng é bang dut râ matú, ge mhoqshit é hpô-myhí mâng pé dut râ nghut lhê.

⁶ Haú eq rajung za, zorâm wui lé le, yhumsing gùng lé wó hkang nyi kó sháng gaq, lhoq pun lhoq kyîng nyi aq. ⁷ Hkyô hkat hkangmó má, yhangmoq lé nàng yhang ge é muzó alik tûn shit nyi aq. ⁸ Nàng lé lhom htua htîng é bang gi, nga-nhûng é hkyô má mara a wó hûn kômù hoq hpû nyi kó sháng gaq, nàng mhoqshit é hkyô má, taí pyám râ hkyô a bò shoq, têng é, siri bo é, eq sansêng é dang taí nyi aq.

⁹⁻¹⁰ Nga-nhûng é hkyi yù Sû Garai Gasang eq sêng é mhoqshit é hkyô pé hkat hkangmó yúng nyi sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyi mù, yhumsing wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹ Hkâsu mù gâ le, hkungsô wó é myit myoqbyù hkyô ga é, nga-nhûng é kô myhang é Garai Gasang eq hkyi yù Sû, Yesuq Hkrisduq gi, hpungwup shingkang eq htoq shit râ hkyô lé lánng nyi é hkûn, ¹² tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkang râ, dingmán râ eq, tarâ hkunggâ é hkyô wó cháng shoq, ¹³ nga-nhûng lé mhoqshit byi râ matú, Garai Gasâng jeju chyunghuq gi, htoq shit bê nghut mù luí, byù lhunglhang bang lé hkyi yù hkyô hpóng byi bê nghut ri. ¹⁴ Haú Yesuq Hkrisduq gi, agè ashop é hkyô banshoq mai nga-nhûng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng

yù shoq ga, nga-nhûng é matú Yhânggùng lé ap byí pyám bê nghut ri.

¹⁵ Nang lé ó yuq èq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyi aq; myit wum byí é eq, tân mhoqshit é hkyô lé le kut nyi aq.

3

Ge É Muzo Zui Saí Râ Hkyô

¹ Nàng gi, lumjîng bang lé, zau wui eq ahko ahkáng wó bâng é a-ô má nyi mù, jîno gyô nyi râ eq, hkâ-nhám le ge é muzó hkangmó zui saí râ lé hen nyi uchyang, ² ó yuq lé le lù a mù râ; nguínón hkyô hô râ; myit tê byí é hkyô tûn shit râ eq; byù banshoq lé nûm é i-myt tûn shit nyi kó sháng gaq, lhoq pun lhoq kyîng nyi aq.

³ Hkâsu mù gâ le, nga-nhûng le, hí hpyang gi, byù ngok pé, jîno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luí, agè ashop é eq manon lhum é hkyô kut nyi mù, rayuq eq rayuq a jú lhum é dông nyi laí lò bê nghut lhê. ⁴ Nghut kôlhang, nga-nhûng é hkyi yù Sû Garai Gasâng jeju eq chyitdap myit htoq shit é hkûn, ⁵ nga-nhûng yhang kut é dingmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhûng lé hkyi yù bê nghut ri. ⁶ Yhang gi, nga-nhûng é hkyi yù Sû Yesuq Hkrisduq é yanmai, nga-nhûng é ahtoq má agùn agó hut hkyó byí é Chyoiyúng Woi-nyí èq nga-nhûng lé chí san chí sêng pyám byi mù, woi-nyí má dum hku é hui nhâng luí, myit sik htaí byí é hkyô dông nga-nhûng lé hkyi yù bê nghut ri. ⁷ Haú mù luí, Yhâng é jeju mai mara hkyut san byí é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhûng gi, silí wunlí wó hkam yu é bang dut lò râ nghut lhê. ⁸ Dang shí pé gi, lumjîng é dang nghut lhê mù luí, Garai Gasang lé lumjîng é bang gi, ge é muzó lé myit lòm luí rago zui saí nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhang bâng é matú ge é eq, akyû bo é hkyô nghut lhê.

⁹ Nghut kôlhang, ana apâ ga luî taî htîng lhûm é hkyô lé le; byùxik labaû gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chûng a ge é hkyô pé nghut ri. ¹⁰ Gam hkuî é myit bò sù lé gi, í dâm mhoqshit wú mù, a wó jáng, yhang lé baú tô pyám aq. ¹¹ Haú su kut sù gi, yhang kut é muzó má mara wó to bê nghut mù, yhumsing gùng lé yhumsîng mara hun é sù nghut é lé, nàng sê to lo aq.

Je Htâng Má Pying É Dang

¹² Ngò gi, Nikopoli wà má gyoqmyò lhoq lhai râ đông myit hpyit tô é yanmai, Artima lé, a nghut jáng Tuhkiku lé, náng chyáng nhang kat byi râ, jé eq yhang, nàng gi, shikut luî, haú wà shut ngá chyáng lé lô aq. ¹³ Nàng gi, tarâ sê é sù Zena eq Apolo nhik lé, yhangnhik é hkyowuî má râ é hkyô banshoq, shikut luî garúm kat aq. ¹⁴ Nganhûng é byu pé gi, nyí wuî râ é hkyô lé wó htuq é eq ashî zuî é bang dut kó sháng gaq, ge é muzó lé myit lòm mù zui saî nyi râ hkyô lé mhoq yû râ lhê.

¹⁵ Ngò eq rahá nyi é bang yuq hkangmó gi, nang lé shi-kyâm kat akô. Lumjîng hkyô má ngamoq lé chyitdap é bang lé, bo shi-kyâm byi aq.

Garaî é jeju gi, nungmoq eq rahá joq nyi sháng gaq ô!

HPILEMON Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyí sù, ngò Poluq eq nga-nhông é gumang Timohti nhik gi, ngá-nhik chyitdap é mù wùn luzúm nghut é sù nang lé le, ² ngá-nhik é gu-nhá Ahpiaq lé le, ngá-nhik é sarhé luzúm Arhkipó lé le, náng é yhùm má huí lhum lhum kut é noqkuq hpúng lé le, dang kyô kat lhê.

³ Nga-nhông é Îwa Garai Gasang eq Yhumsing Yesuq Hkrisduq chyáng mâ é, jeju eq nuingón hkyô gi, nungmoq chyáng ru joq nyí sháng gaq ô!

Jeju Hkya-ôn É Hkyô Eq Kyûdung Dang

⁴⁻⁵ Ngò gi, Yhumsing Yesuq lé nàng lumjing é hkyô lé le, sân-yúng bang ban-shoq lé nàng chyitdap é hkyô lé le, wó gyô é yanmai, ngò kyûdung é hkùn, nang lé myit bûn nyí luí, hkâ-nhám le ngá é Garai Gasang lé jeju hkya-ôn nyí lhê. ⁶ Ngò gi, Hkrisduq é matú nga-nhông chyáng bo tô é ge é mù lhumjup lé sê gyô é hkyô lé, nàng wó yù sháng gaq nghû, náng é lumjing hkyô lé, nàng saksé hkâm é má akyû htoq râ matú, kyûdung byí nyí lhê. ⁷ Náng é chyitdap myit gi, ngo lé gyai gabú nhang é eq wum-o wó yû nhang ri; hkâsu mù gâ le, gumang hpó ê, náng é yanmai, sân-yúng bâng é i-myit má nuingón yuqyo é hkyô wó yû bekô nghut ri.

Onesimu É Matú Tôngbán Byí É Hkyô

⁸ Haû su mù, nàng kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haû wó kut nhang lhê nghut kôhang, chyitdap myit đông za nang lé pying kat lhê. ⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí, ¹⁰ ngò kyum hut huí nyí é u lé ngá zo dut lo é Onesimu é matú nang lé ngò dùng tôngbán kat lhê. ¹¹ Yhang gi, hí hpyang náng é matú akyû a bo é nghut kôhang, ahkuí gi, náng é matú le, ngá é matú le, akyû bò bê nghut ri.

¹² Ngò nhik htông é Onesimu lé náng chyáng dum taû nhang kat lhê. ¹³ Haû gabú danglu é yanmai, ngò htóng lúng nyí é má náng é malaí ngo lé garúm râ matú, yhang lé ngò shuí nyí to naû kôhang, ¹⁴ ngò gi, nàng myit a huí le haí le a kâm kut. Hau é yanmai, ngò, nang lé kut nhang é đông a nghut e za, nàng ô nau é đông kut é san za nghut sháng gaq. ¹⁵ Hkâsu mù gâ le, náng chyáng mai yhang rayoq rabun zo gâng nyí é gi, yhang dum taû lò mù hkâ-nhám le nàng eq rahá dum wó nyí nyí râ matú nghut lhê abe. ¹⁶ Yhang gi, htông hpyang, jùn rayuq đông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsing Yesuq má gumang hpó rayuq đông le, je riyhang chyitdap râ sù dut bê nghut ri.

¹⁷ Haû mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. ¹⁸ Yhang, nang lé rajung jung shut pyâm é nghut le le, chyín dap tô é nghut le le, haû gi, ngá chyáng dap é chyín nghû sôn yù aq. ¹⁹ Ngò, Poluq gi, chyín haû xap râ nghû luí, ngá loq èq yhang kê kat kôhang, nàng yhang lhang, ngo lé asak chyín xap râ sù nghut é lé bûn nham aq. ²⁰ Nghut bê, gumang hpó ê, nang é yanmai, haû Yhumsing má ngò gabú é hkyô wó yu nyí sháng gaq, Hkrisduq má ngá é i-myit lé lhoq ngui lhoq ngón byí é đông, shí, ngò pying kat é dang lé gyo byi laq. ²¹ Nàng gi, ngò taí kat é htoq má je lhom kut râ nghut é lé, hkyak za sé luí, ngò kê kat é nghut lhê.

²² Hau htoq agó, ngá é matú nyí râ gok lajang láng aq. Hkâsu mù gâ le, nungmoq kyûdung byí é yanmai, ngò gi, nungmoq chyáng dum wó jé râ lé myit myoqbyu nyí lhê.

²³ Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. ²⁴ Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

²⁵ Yhumsing Yesuq Hkrisduq é jeju gi, nungmoq é woi-nyí eq rahá za ru joq nyí sháng gaq ô!

HEBRE Pê Chyáng Hun Kat é Laiká (Hebrews)

Garai Yhangzo Gi, Maumang Lagyô Pé Htoq Je Gyaú É Hkyô

¹ Laí ló bê ipyat pé má, Garai Gasang gi, nga-nhúng é íchyí íwâ pé lé myiqhtoí pé dông alhîng lhîng eq adông dông mai dâng nyo wú bê nghut lhê. ² Nghut kôlhang, ló htâng é buinyì shí pé má, Yhang gi, Yhâng Zo dông mai nga-nhúng lé dang nyô bê nghut ri; Yhang gi, lhungháng lé sîng sù dut râ matú haú Zo lé masat to mù, Zo dông mai, nyì mi-nyì, joq mijoq lé hpan to bê nghut ri. ³ Haú Zo gi, Garai Gasang é hpungwup shingkang duqbó é hkyô eq Yhâng é gunghkyâng isâm roq nghut nyì mù, lhungháng lé Yhâng é a-tsam byíng é dâng eq zuí zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkûng htoq má Hkikhkam dik Sù Garai Gasang é loqyo hkyam má zung to bê nghut ri. ⁴ Haú mù luí, Yhang gi, maumang lagyô pé é myìng htoq gyaú é myìng lé wó sing yù bê nghut é eq rajung za, yhangmoq htoq je riyhang gyaú sù dut bê nghut ri.

⁵ Hkâsu mù gâ le, Garai Gasang gi, "Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê."✧

ga le, dum, "Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."✧

ga le, maumang lagyô hká yuq lé hkâ-nhám wá taí wú é nghut lhê lhú? ⁶ Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé noqkuq kó sháng gaq."✧

ga taí ri. ⁷ Maumâng pé eq séng luí Garai Gasang taí é má,

"Yhang gi, Yhâng é maumang lagyô pé lé lai su dut nhâng mù, Yhâng é dui-nhâng zoshâng wui lé, myishâm pé su dut nhang é nghut ri."✧

gâ ri. ⁸ Nghut kôlhang, haú Zo eq séng luí, Yhang gi,

"Garai Gasang ê, Náng é hkohkâm-tanghkuq gi, pyat dedu ahtum abyuq gîng nyì mù,

Náng é dingmán hkyô gi, Náng é mingdán lé uphkang é hkyô dut râ nghut lhê.

⁹ Nàng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xù but byí é dông, Náng é luzúm wui htoq je lhoq gyaú to bê nghut ri."✧

ga taí ri. ¹⁰ Hau htoq agó, Yhang gi,

"Yhumsîng ê, Nàng gi, a-nham sân-hi má myidàm é apùn awang lé hi tô é nghut mù,

mauhkûng pé gi, Náng é loqmú chyat nghut ri.

¹¹ Haú pé gi, htên byoq byuq râ nghut lhê; nghut kôlhang, nàng gi, ru gîng nyì râ nghut lhê; haú pé banshoq gi, mebu su xau byuq râ nghut lhê.

¹² Nàng gi, haú pé lé, bumó lé su dîng yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhang, Nàng gi, rajung za ru gîng nyì râ nghut mù, Náng é zanwut pé gi, hkâ-nhám le htùm râ a nghut."✧

ga le taí ri. ¹³ Garai Gasang gi,

"Ngò, náng é gye pé lé, náng é hkyî nang tanghkuq kut pyám byí é hkyíng jé shoq,

Ngá é loqyo hkyam shut zung nyì shi aq."✧ ga maumang lagyô hká yuq lé hkâ-nhám wá taí wú é lhú? ¹⁴ Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat hui é mú wùn woi-nyí pé chyat za nghut akô, a nghut kó lhú?

2

Sadiq Byí É Hkyô

¹ Haú mù luí, nga-nhúng gi, châng nghoq ló byuq é a hui zo sháng gaq, haú nga-nhúng wó gyô yu to bê hkyô lé je riyhang

rago châng nyi râ dut lâhê. ² Hkâsu mù gâ le, maumang lagyô pê eq taí bê mungdang gi, gîng nyi mù, shut shaí lu laí é hkyô eq jîno a gyô é hkyô hkangmó kut é sù gi, yhumsîng eq gîng é mara dam byí é hui zo kô é nghut le gi, ³ nga-nhúng gi, haú-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hpang lut râ lú? Hkyi yù hkyô haú gi, haú Yhum-sing eq hí taí pyo htoq é nghut mù, Yhâng chyáng mai wó gyô yu é bang gi, haú hkyô têng é lé, ngamoq chyáng saksé shit bekô nghut ri. ⁴ Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gàm byí é dông mai, haú hkyô lé saksé shit bê nghut ri.

Hkyi Yù Hkyô Hpông Byi Sù

⁵ Garai Gasang gi, maumang lagyô pé lé, ngamoq taí nyi é jé lô râ mingkan lé, uphkâng nhâng râ a nghut. ⁶ Rayuq yuq mai, rawò má saksé hkâm tô é gi,

"Byù gi, haí wá nghut mù, Nàng, yhang lé bûn nyi lâhê lú?

Byu Yhangzo gi, haí wá nghut mù, Nàng, yhang lé wú gôn nyi lâhê lú?

⁷ Nàng gi, yhang lé, maumang lagyô pê htoq ratsuí lhoq nyhum to bê nghut ri.

Nàng gi, yhang lé, hpungwup shingkang eq aróng bò nhâng mù,

⁸ jung hkangmó lé, yhâng é hkyiwa ô má tô to bê nghut ri."✧

gâ ri. Jung hkangmó lé yhâng é a-ô má tô to bê gâ é gi, Garai Gasang, haí lháng a myhit to loshoq yhang uphkâng é a-ô má tô to bê nghut é lé gâ lâhê. Nghut kôlhang, yhang é a-ô má tô tô é jung hkangmó lé, ahkuí, nga-nhúng a myàng shí é za nghut lâhê. ⁹ Nghut kôlhang, nga-nhúng gi, maumang lagyô pê htoq ratsuí zo lhoq nyhâm huí é sù Yesuq lé myang é nghut lâhê. Yhang gi, Garai Gasang jeju mai, yuq hkangmó é matú shí hkâm byí é hui zo sháng gaq ga, shí-nò jamjau hkyô lé hkâm zo bê nghut é yanmai, ahkuí, Yhang lé hpungwup shingkang eq aróng bò nhâng bê nghut ri.

¹⁰ Zo wuí myo myo lé hpungwup shingkang wó hkam yù nhâng sháng gaq

ga, jung hkangmó lé Yhang é matú chyat eq Yhang dông mai chyat joq nyi nhang é Garai Gasang gi, wuíhke jamjau hui nhang é dông, yhangmoq é hkyi yù Sù lé lhoq gumjup byi râ matú htuk âng nyi ri. ¹¹ Haú byu pé lé chyoiyúng nhang é Sù eq lhoq chyoiyúng huí é bang gi, ikun ralhum za má é bang chyat nghut lâhê. Haú mù, Yesuq gi, yhangmoq lé, gumang wuí nghú râ lé a hoq é nghut lâhê.

¹² "Ngò gi, Náng myíng lé, Ngá gumang wui chyáng taí pyô râ nghut lâhê;

Ngò gi, shiwa hpông é myoq hí má, Nang lé hkya-on mahkôn hkôn râ nghut lâhê."✧

ga, Yhang taí ri. ¹³ Yhang gi,

"Ngò gi, Yhang lé lumhkau nyi râ nghut lâhê."✧

ga le dum taí ri. Hau htoq agó,

"Ngò gi, Garai Gasang ngo lé byí é zoshâng wuí eq shí má nyi nyi lâhê."✧

ga, Yhang dum taí ri.

¹⁴ Haú zoshâng wuí gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shí-nò hkyô dông mai, shí-nò hkyô é a-tsam lé zú zìng é sù nghut é nat Tsadán lé wó lhoq htên pyám râ eq,

¹⁵ yhangmoq é shí-nò hkyô lé gyuq é eq, yhangmoq é asak gón lé jùn dông zú zìng to huí é bang lé, wó lhoq lhut râ nghut lâhê. ¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lâhê. ¹⁷ Haú nghut é yanmai, Yhang gi, Garai Gasang lé dojaú é má shogyo nhikmyín é eq lhumzú é hkyangjong mó wó dut râ eq,

byu pé é yubak marâ é matú shíhtaí gunglik hkungga wó kut râ matú, hkyô hkangmó má Yhâng é gumang wuí eq dù shoq kut é hui râ dut é nghut lâhê. ¹⁸ Yhang gi, gunglaú huí é hkûn, Yhânggùng yhang jamjau hui zo bê nghut é yanmai, gunglaú huí nyi é bang lé wó garúm yu é nghut lâhê.

3

Yesuq Gi, Mosheq Htoq Gyaú É Hkyô

¹ Haû mù luî, mauhkông mai wut yù huí é, chyoiyúng é gumang wuì ê, lagyo eq hkyangjong mó nghû nga-nhung yín yu é Yesuq é hkyô lé rago myit wú keq. ² Mosheq, Garai Gasâng é yhûm gón má lhumzui é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri.* ³ Yhûm kut sù gi, yhûm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri. ⁴ Hkâsu mù gâ le, yhûm hkgámó gi, rayuq yuq èq saí é chyat nghut ri. Nghut kôhang, Garai Gasang gi, jung hkgámó lé saí é sù nghut lhê. ⁵ Mosheq gi, Garai Gasâng é yhûm gón má dui-nhang zoshâng rayuq dông lhumzui mù, Garai Gasang taí râ nghut é lé saksé hkám bê nghut ri. ⁶ Nghut kôhang, Hkrisduq gi, lhumzui é zo rayuq dông Garai Gasâng é yhûm lé up ri. Nga-nhung kúm gi, nga-nhung lé wám é myit bò nhang é hkyô eq nga-nhung gumrong nyi é myoqbyu hkyô lé myhik zing nyi é nghut jáng, Yhâng é yhûm nghut nyi bê.

A Lumjúng Bang Lé Sidiq Byí É Hkyô

⁷ Haû mù luî, haû Chyoiyúng Woi-nyí taí é eq rajung za, "Hkû-nyí, nungmoq gi, Yhâng é danghtê lé wó gyo kô é nghut jáng, ⁸ yoso má Yhang lé chyâm kô é u lé, gumlau toq é hkûn nungmoq é îchyí îwâ pé kut kô é su, nungmoq é i-myt lé hkâlhoq htan to kó. ⁹ Nungmoq é îchyí îwâ pé gi, myi xê zàn yhang Ngò kut é muzó lé myàng kôle, yoso haû má Ngo lé chyam lik bekò nghut ri. ¹⁰ Haû nghut é yanmai, Ngò gi, ipyat haû lé nhikjum yo mù, 'Yhangmoq é myit nhikhum gi, hkâ-nhám le hkyô ngoq byuq akô; yhangmoq gi, ngá é hkyô pé lé a sé kômù nghut ri.' nghû taí é nghut lhê. ¹¹ Haû mù, 'Ngá é bánno jowò má yhangmoq hkâ-nhám le wó wâng kó râ a nghut.' nghû, Ngò, nhikjum yô é eq dakâm dang taí bê nghut lhê."*

* **3:2** Bun zo shí eq bun zo 5, 6 lhum má é Garai Gasâng é yhûm gâ é gi, Garai Gasâng é byu pé lé gâ é nghut lhê.

✧ **3:11** Hkya-on 95:7-11 ✧ **3:15** Hkya-on 95:7-8

gâ ri.

¹² Gumang wuì ê, nungmoq mâ é ó yuq le, haû rû dui nyi é Garai Gasâng chyáng mai, lhing taû lô byuq sê é, yubak mara byíng é, a lumjúng é i-myt a bò sháng gaq, sidiq nyi keq. ¹³ Nungmoq gi, ó yuq le, yubak marâ é mhaú zô é hkyo èq i-myt lhoq htan pyâm é a hui kó sháng gaq, "hkû-nyí" nghû ru wó taí nyi nyi gi, nyí wuì, rayuq eq rayuq myit wum byí lhûm nyi keq. ¹⁴ Nga-nhung gi, sâng-hi mai wó to bê myit lùm hkyô lé, lô htáng shoq zui gíng nyi é nghut jáng, Hkrisduq eq chôm zùm yap nyi é bang dut bê nghut ri. ¹⁵ Haû gi, "Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é îchyí îwâ pé kut kô é su, nungmoq é i-myt lé hkâlhoq htan to kó."*

ga taí é eq rajung za nghut ri.

¹⁶ Wó gyô yù mù, gumlau toq é bang gi, ô pé nghut akô lhú? Haû bang banshoq gi, Egutuq ming mai Mosheq èq shuí htoq lo é bang nghut bum lhê, a nghut kó lhú? ¹⁷ Myi xê zàn yhang Garai Gasang lé nhikjum yô nhang é bang gi, ô pé nghut akô lhú? Haû bang gi, mara kut shut mù, yoso má shí leq byuq é bang nghut bum lhê, a nghut kó lhú? ¹⁸ Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng èq dakam é bang gi, ô pé nghut akô lhú? ¹⁹ Haû mù, yhangmoq a lumjúng kô é yanmai, a wó wâng kô é lé, nga-nhung myang é nghut lhê.

4

Garai Gasâng É Byu Pé É Matú Bánno Buinyi Dông Nghut É Bánno Jowò

¹ Haû nghut mù luî, Garai Gasâng é bánno jowò má wàng râ danggidiq ru gíng nyi ashí nghut é yanmai, nungmoq mâ é ó yuq le, haû má a hkyit hkap é a dut râ matú, nga-nhung sidiq nyi sháng. ² Hkâsu mù gâ le, yhangmoq lé gabú danglù haû hko kyo bê su, ngamoq lé le hko kyo bê nghut lhê; nghut kôhang, yhangmoq wó gyô é mungdang gi, yhangmoq é matú akyú a bò,

haî mù gâ le, haû wó gyô é bang gi, lumjîng myit mai a lhom hap yù kô é yanmai nghut ri. ³ Nga-nhúng lumjîng bê bang za, bánno jowò haû má wó wang é nghut lhê. Haû hkyô gi,

"Haû mù, 'Ngá é bánno jowò má yhangmoq hkâ-nhám le wó wâng ko râ a nghut.' nghû, Ngò, nhikjum yô é eq dakâm dang taí bê nghut lhê."✧

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê. ⁴ Hkâsu mù gâ le, "Garai Gasang gi, nyhit nyí nghû râ buinyi má Yhâng é muzó banshoq mai bánno bê nghut ri."✧ gâ é dang pé má, haû nyhit nyí nghû râ buinyi eq sêng é hkyô lé rawò má Yhang taí tô ri. ⁵ Bánno jowò joq é eq sêng luî, Yhang dum taí tô é gi, "Ngá é bánno jowò má yhangmoq hkâ-nhám le wó wâng kó râ a nghut."✧ gâ ri.

⁶ Bánno jowò haû má wàng râ bang ram nyi é danggidiq joq tô ashî nghut ri; hí hkûn, gabú danglù haû wó gyô wú bê bang kúm gi, yhangmoq jîno a gyo kô é yanmai, a wàng kô é nghut lhê. ⁷ Haû mù luî,

"Hkû-nyí, nungmoq, Yhâng é danghtê lé wó gyo kô é nghut jáng, nungmoq é i-myit lé hkâlhoq htân kó."✧

gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq dông mai taí é hkûn, "Hkû-nyí" gâ é buinyi ra-nyí dum masat to bê nghut ri. ⁸ Hkâsu mù gâ le, yhangmoq lé, Yoshuq eq bánno jowò byi bê ru nghut le gi, Garai Gasang gi, htâng má, gotû buinyi eq séng luî taí râ a nghut lo. ⁹ Haû mù luî, Garai Gasâng é byu pê é matú gi, Bánno buinyi dông nghut é bánno jowò ru joq tô ashî nghut lhê.

¹⁰ Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno râ nghut lhê. ¹¹ Haû nghut mù, yhangmoq é jîno a gyo hkyô é alik lé cháng mù leqbat é, ó yuq le a bò sháng gaq, nga-nhúng gi, bánno jowò haû má wó wâng shoq, a-tsam bo é í shikut sháng.

¹² Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut

lhê. Haû gi, shamsó íshut dap é sham htoq má je htoq é nghut mù, myit nhiklum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. ¹³ Hpan tô é lhunglhang gi, Garai Gasâng é hí mai wó haq pyâm é haî le a joq é nghut lhê. Jung hkangmó gi, nga-nhúng, jihpán shit ra râ Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haû mù luî, nga-nhúng gi, Garai Gasâng é Yhangzo Yesuq nghut sù, mauhkûng pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjîng hkyô lé ging ging myhik zing nyi sháng.

¹⁵ Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkangmó má gunglau é huí wú kôlhang mara a bo é sù hkyangjong mó lé sheq wó é ru nghut lhê. ¹⁶ Haû mù luî, nga-nhúng gi, shogyo nhikmyîn é hkyô wó yù râ eq, nga-nhúng ra châ é u má nga-nhúng le wó garúm râ jeju lé myang hô sháng gaq, hkyak lum é myit mai Garaî jeju tanghkuq shut chyâng htep ê sháng.

5

¹ Hkyangjong mó yuq hkangmó gi, byu pê chyáng mai hkyin htoq yù huí é nghut mù, mara pê é matú, chyunghuq pé eq hkungga pé nhông byi hkyô nghut é, Garai Gasang eq séng é muzó pé má, yhangmoq é gunglik dông, hkyin masat to huí é bang nghut akô. ² Yhânggùng yhang gi, wum nyhôm hkyô é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-û é nghut lhê. ³ Wum nyhôm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi râ dut é nghut lhê.

⁴ Ó yuq le, yhumsing gùng yhumsing aróng haû lé wó yu é a nghut; Arun lé su, Garai Gasâng eq wut yu é hui jáng sheq wó

é nghut lhê. ⁵ Haû eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé, "Nàng gi, Ngá Zo nghut ri; Ngò, hkû-nyí Náng Wa dut bê nghut lhê."✧
ga taí é nghut lhê. ⁶ Hau htoq agó, "Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri."✧
ga, gó wô má le, Yhang taí to ashî nghut ri.

⁷ Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yù Su chyáng, ngaubyi ngau-nhap eq wut garú é èq, kyûdung é eq dung tôngbán bê nghut mù, Yhâng é hkungga ging é ap nóng hkyo é yanmai, gyo byí é hui bê nghut ri. ⁸ Yhang gi, Zo rayuq nghut to kôle, Yhang hui zô é wuîhke jamjau hkyô mai jìno gyo hkyô wó mhoq yù bê nghut ri. ⁹ Yhang gi, lhoq gumjup huí é hkûn, Yhang é jìno gyo bang banshoq é matú, ahtum abyuq é hkyi yù hkyo é awang dut byuq bê nghut é eq. ¹⁰ Melahkizedek wó é hkyangjong ayá hkyô dông mai hkyangjong mó dut râ matú, Garai Gasâng èq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí taí râ gyai joq lhê; nghut kôlhang, nungmoq gi, ra luí za a sê gyô é bang nghut kô é yanmai, taí sân kyo wuî ri. ¹² Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq èq nungmoq lé dum taû mhoq byí râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashî kó myhi-nhung! ¹³ Naú wing shuq râ é sù ó yuq le, zonú nghut nyi ashî mù, dingmán é hkyô lé mhoqshit é má a mán shi nghut ri. ¹⁴ Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yù shoq, hkâ-nhám le yhumsing gùng yhumsíng lhoq mhân yu nyi é, kô dîng bê bâng é matú ru nghut lhê.

✧ 5:5 Hkya-on 2:7 ✧ 5:6 Hkya-on 110:4

6

¹ Haû mù luí, nga-nhúng gi, Hkrisduq eq sêng é mhoqshit hkyô awang lé tô to mù, myit kô dîng é hkyô shut xoq sô é sháng. Nga-nhúng gi, shí-nò hkyô shut shuî jé é muzó mai myit lhîng hkyo é, Garai Gasang lé lumjîng hkyo é, ² baptisma pé, loq ke byí hkyô, shi é mai dum dui toq hkyô eq ahtum abyuq jéyáng hkyô eq sêng é mhoqshit hkyo é, apûn awang dum hî nó a ra lô é nghut lhê. ³ Garai Gasang gyô é nghut jáng, nga-nhúng gi, myit kô dîng hkyô shut xoq so râ nghut lhê.

⁴ Myoq lhoq bóng é radàm hui bê bang, mauhkûng chyunghuq lé myang hap yù bê bang, haû Chyoiyúng Woi-nyí lé chôm hkam yù bê bang, ⁵ Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang, ⁶ yhangmoq hpuq lhik ló byuq é nghut le gi, hká dông lé myit lhîng dum ge wó râ a nghut lo, haí mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyâm kô é nghut lhê.

⁷ Yhâng ahtôq má wo gyûn é mau wuî lé shuq yù mù, yò mù saí bâng é matú akyû bo é hôwa nuqhyí lhoq htoq byí é maumyî gi, Garai Gasâng é shimân jeju myang hap yu é nghut ri. ⁸ Nghut kôlhang, zu gâm eq myoq gâm yuq htoq nhang é maumyî gi, akyû a bò mù, nhîng pyâm é hui zo râ lé chiq râ ri. Haû gi, ló htáng má nyhê hkyô pyâm é hui râ nghut lhê.

⁹ Nghut kôlhang, chyitdap é gumang wuî ê, ngamoq gi, haû su nghû taí é nghut kôlhang, nungmoq é hkyi yù hkyô eq séng é je ge é jung pé, nungmoq wó bekô râ nghû hkyak myit lum tô lhê. ¹⁰ Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é dông, Yhang lé nungmoq chyitdap é myit shit kô é hkyô lé le, a tô-myhí râ nghut lhê. ¹¹ Ngamoq gi, nungmoq é i-myit myoqbyù hkyô wó byíng jup râ matú, nungmoq yuq hkangmó ipyat htum shoq xoq shikut nyi kó râ lé gyai ô nau ri. ¹² Ngamoq gi, nungmoq lagon bang dut byuq râ lé a ô nau é

za, Garaî danggidiq byî to bê é lé, lumjîng myit eq myit hîng hkyô dông mai hkam yu é bang su châng kut kô râ lé ô nau é ru nghut lhê.

Garai Gasâng É Danggidiq Gîng Nyi É Hkyô

¹³ Garaî Gasang gi, Abraham lé danggidiq tô é hkûn, Yhâng htoq gyaú é dakâm myîng lang râ rayuq lháng a nyi é nghut mù, Yhânggùng lé Yhang lang luí dakâm é gi, ¹⁴ "Ngò gi, nang lé teng yhang shimân byi mù, nang lé awut ashîn myo myo byi râ nghut lhê."* gâ ri. ¹⁵ Haû mù, Abraham gi, myit hîng hîng láng yu é htâng má, byî tô é danggidiq lé wó yû bê nghut ri.

¹⁶ Byu pé gi, yhangmoq htoq gyaú su é myîng lé lang luí, dakâm kô é eq, yhangmoq dakâm é dang lé saksé kut mù, dang-rháng é hkyô pé banshoq lé lhoq pân pyâm akô nghut ri. ¹⁷ Garaî Gasang gi, Yhang myit hpyit tô é hkâ-nhám le a htaî lhik é hkyô lé, danggidiq byî tô é lé hkam yû râ bâng chyáng san za shit nau ri; haû mù luí, dakâm dang eq lhoq gîng to bê nghut ri. ¹⁸ Garaî Gasang gi, mhaú a ge é yanmai, hkâ-nhám le a htaî lhik é hkyô í hkat nghut é danggidiq eq dakâm dang joq é nghut mù, Yhang haû su kut é gi, nga-nhûng hí má tô to byî é myit myoqbyù hkyô lé myhik zîng râ matú gaû é jowò shut h pang wàng bê bang nga-nhûng lé wum mó byî é dut râ matú nghut lhê. ¹⁹ Nga-nhûng gi, myit nhiklhûm é shamtoq goknghe dông myit myoqbyù hkyô haû lé wó é nghut mù, haû gi, gîngtîng é eq gaû é hkyô nghut ri. Myit myoqbyù hkyô haû gi, mauhkûng noqkuq yhûm mâ é pân-gyang ahkaû mâ é sân-yúng gok má jé wang é nghut ri. ²⁰ Jowò haû gi, nga-nhûng é akyu é matú, nga-nhûng é hí má wàng byî é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

¹ Melahkizedek gi, Salem myuq é hkohkâm eq Myhang Htâng é Garaî Gasâng

* 6:14 Apûn 22:17

é hkyangjong nghut ri. Yhang gi, hkohkâm pé lé sat ûng pyám luí dum taû lo é Abraham lé hui mù, shimân byi bê nghut ri. ² Haû mù, Abraham gi, wó lo é jung hkangmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é myîng lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nguingón hkyo é hkohkâm" gâ é nghut lhê. ³ Yhâng é înu îwa é hkyô eq byùxik labaû le, hi é buinyi eq asak htûm é hkyô le a kê to nghut ri. Yhang gi, Garaî Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghû é lé, myit wú keq. Haû îchyí îwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung! ⁵ Hkyangjong dut bang Lewiq é awut ashîn pé gi, yhangmoq é gumang wui, Abraham mai nyi gyó lo é bang nghut kôle, tarâ má bo é eq rajung za, haû bâng chyáng mai xê gambùm mâ é ragambùm lé hkyui yû râ dut é bang nghut akô. ⁶ Nghut kôlháng, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yû mù, shimân byi ri. ⁷ Shimân byi sù gi, shimân byi é lé hkam yû sù htoq je gyaú sù nghut é lé, ó yuq le úng-áng râ hkyô a joq é nghut lhê. ⁸ Hkyangjông pé eq séng luí ga jang, shi byuq sê é byu eq, xê gambùm mâ é ragambùm lé hkyui yu é nghut lhê; nghut kôlháng, Melahkizedek eq séng luí nghut jáng, asak dui nyi é ga taî pyô byi é hui su eq hkyui yu é nghut lhê. ⁹ Xê gambùm mâ é ragambùm hkyui yû sù, Lewiq lháng gi, Abraham dông mai xê gambùm mâ é ragambùm byi bê nghû wó taî ri. ¹⁰ Haî mù gâ le, Melahkizedek gi, Abraham lé hui é hkûn, Lewiq gi, yhâng é îchyí îké é gungdu hkaû má ru bo tô ashî nghut ri.

Melahkizedek Eq Dù É Yesuq

¹¹ Haû Lewiq hkyangjong amyû pê é ipyat má, byu pé gi, jep é tarâ lé wó yu bùm kô é nghut mù, hkyangjong ayá haû mai gumjup hkyô wó yû kô é nghut le gi, haî mù luí, Arun wó é hkyangjong ayá

hkyo đông a nghut é za, Melahkizedek wó é hkyangjong ayá hkyo đông lo é sù gotù hkyangjong rayuq ra shirâ lhu? ¹² Hkâsu mù gâ le, hkyangjong amyù htaí é hkûn gi, tarâ le htaí yang htaí râ dut é nghut lhê. ¹³ Haù su nghù taí é hkyô pé eq sêng é Sù gi, gotù byuhù mâ é sù nghut mù, byuhù haù mai gi, ó yuq le hkungga gyap má dojaú wú é a nghut. ¹⁴ Hkâsu mù gâ le, nga-nhúng é Yhumsing gi, Yudaq byuhù mai gyó lo é awut ashín nghut é hkyô, san za nghut nyi ri. Mosheq kúm gi, byuhù haù eq sêng é hkyô má, hkyangjong pé eq séng luí haí lé a taí é nghut lhê. ¹⁵ Melahkizedek eq dù é gotù hkyangjong rayuq pô htoq bê nghù, ngamoq taí bê hkyô gi, je riyhang san za dut bê nghut ri. ¹⁶ Yhang gi, îwa rayuq é awut ashín pé nghut râ lhê gâ é tarâ đông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. ¹⁷ Hkâsu mù gâ le,

"Nàng gi, Melahkizedek wó é hkyangjong ayá hkyô đông mai, ahtum abyuq hkyangjong rayuq nghut nyi ri."*
ga Yhang eq séng luí taí pyo tô é nghut lhê.

¹⁸ Haù hí lhê é cháng râ tarâ gi, wum nyhôm é eq akyù a bo é yanmai, tô pyám bê nghut lhê. ¹⁹ Hkâsu mù gâ le, haù jep é tarâ gi, gumjup hkyô haí a wó kut byí é nghut lhê. Haù mù, je ge é myit myoqbyù hkyô lajang byí é nghut luí, nga-nhúng gi, myit myoqbyù hkyô haù mai Garai Gasâng chyáng wó chyâng htep ê é nghut lhê.

²⁰ Myit myoqbyù hkyô haù gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjong pé wó dut bekô nghut ri. ²¹ Nghut kôlhang, Yesuq kúm gi,

"Nàng gi, ahtum abyuq hkyangjong rayuq nghut lhê."

ga haù Yhumsing dakâm bê nghut mù, Yhang myit é hkyô htaí râ a nghut."*
ga, Yhang eq séng luí Garai Gasang taí é hkûn, dakâm dang haù mai hkyangjong rayuq dut bê nghut ri. ²² Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

²³ Hkyangjong pé myo myo nyi râ dut é gi, yhangmoq é muzó a wó xoq zui shoq shi

byuq hkyô eq hkûm zing pyám kô é yanmai nghut ri. ²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zuí nyi râ nghut lhê. ²⁵ Haù mù luí, Yhang gi, Yhang đông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haí mù gâ le, Yhang gi, yhangmoq é matú dúng tóngbán byi nyi râ matú, rú dui nyi é sù nghut lhê.

²⁶ Yesuq gi, chyoiyúng é sù, mara hùn râ hkyô a bo é sù, sân-yúng é sù, yubak dap bang eq rahá a nghut shoq gotù san kut huí é sù, mauhkúng pè ahtoq má lhoq toq lhoq gyaú yu huí é sù nghut ri. Haù sù é hkyangjong mó gi, nga-nhúng râ é lé lajang byi râ htuk ang ri. ²⁷ Nyi nyi bui bui, yhumsing é marâ é matú hí hkungga nhông byi mù, byu pé é mara matú le hkungga nhông byí é gotù hkyangjong mó pé su, Yhang gi, a kut râ é sù nghut lhê. Yhang gi, Yhânggùng lé Yhang nhông byi é hkûn, yhangmoq é yubak marâ é matú banshoq radàm za hkungga nhông byi pyám bê nghut ri. ²⁸ Hkâsu mù gâ le, haù jep é tarâ gi, wum nyhôm é byu pé lé hkyangjong mó pé đông masat é nghut ri. Nghut kôlhang, Garai Gasang gi, haù jep é tarâ é htâng má lé jé é dakâm dâng eq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkâng gi, shí đông nghut lhê: Nga-nhúng gi, haù sù é hkyangjong mó lé wó é bang nghut lhê. Yhang gi, mauhkúng htoq má, Hkikhkam dik Sù Garaí é hkohkâm-tanghkuq é loqyò hkyam shut zùng to mù, ² byu eq saí é a nghut é za, haù Yhumsing eq saí é saksé zúm akying hkaù mâ é, sân-yúng dik gok má dojaú é sù nghut ri.

³ Hkyangjong mó hkangmó gi, chyunghuq pé eq hkungga pé lé nhông byi râ matú wò hun to huí é chyat nghut lhê. Haù mù luí, hkyangjong mó shí yuq le, rajung jung nhông byi ra râ nghut lhê. ⁴ Yhang

gi, mingkan htoq má nyi tô é ru nghut le gi, hkyangjong dut râ a nghut; hkâsu mù gâ le, jep é tarâ dông ga jang, chyunghuq nhông jaú é byu pé nyi to gù bê nghut lhê. ⁵ Yhangmoq, sân-yúng dik gok má dojaú é hkyô gi, mauhkung htoq má joq é azông eq wupzo dông nghut ri. Haú nghut é yanmai, Mosheq gi, saksé zúm saí râ nghut é hkûn, "Nang lé, bùm má tân shit é azông eq rajung za jung hkangmó wó saí shoq kut aq."* ga sidiq byi huí é nghut lhê. ⁶ Nghut kôlhang, Yesuq, gyoro sô xoq byí é dangshikaq gi, axaú lhúm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut lhê. Haú mù, dangshikaq haú gi, je ge é danggidiq pê htoq má awang hi tô é nghut lhê.

⁷ Hkâsu mù gâ le, sân-hi lhê é dangshikaq má râ é hkyô haí a bo é ru nghut le gi, gotû ra râ a nghut lo. ⁸ Nghut kôlhang, Garai Gasang gi, byu pé chyáng mara bo é myàng mù, taí é gi,

"Haú Israelaq é yhumbyù wuè eq le, Yudaq é yhumbyù wuè eq le,
Ngò, dangshikaq asik to râ ahkyíng jé lo nyi ri ga haú Yhumsîng taí pyo ri.

⁹ Haú gi, Ngò, yhangmoq é îchyí îwâ pé lé loq èq zui mù, Egotuq ming mai shuí htoq lo é hkûn,

yhangmoq eq tô tô é dangshikaq su dut râ a nghut.

Haí mù gâ le, yhangmoq gi, Ngá é dangshikaq lé a xoq cháng kô é nghut mù, Ngò gi, yhangmoq chyáng mai lhing ló byuq é nghut lhê ga haú Yhumsîng taí pyo ri.

¹⁰ Shî gi, ahkyíng haú laí é htâng má, Israelaq é yhumbyù wuè eq Ngò to râ nghut é dangshikaq nghut lhê ga haú Yhumsîng taí pyo ri.

Ngò gi, Ngá é tarâ pé lé, yhangmoq é i-myt má kat byi mù, yhangmoq é myit nhiklhum má kê to byi râ nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.

¹¹ 'Haú Yhumsîng lé sé keq.' ga, yhâng é gumang hpó lé nghut nghut, yhâng é chyangnâm mâ é sù lé nghut nghut, mhoqshit é byù nyi râ a nghut lo,

haí mù gâ lé, yhangmoq lhunglhang bang gi, tiq htáng sù mai kô htáng sù jé shoq Ngo lé sé kó râ nghut lhê.

¹² Hkâsu mù gâ le, Ngò gi, yhangmoq é agè ashop hkyô lé mara hkyut pyám byi mù, yhangmoq é mara pé lé dum a bun byi lo râ nghut lhê.*

gâ ri.

¹³ Dangshikaq haú lé, Yhang "asik" gâ é gi, sân-hi lhum lé, axau kut pyâm é nghut ri; xau ló byuq é haí le, hkâ-myháng a myáng má byuq ló byuq râ nghut lhê.

9

Myidàm Saksé Zúm Má Noqkuq É Hkyô

¹ Sân-hi lhê é dangshikaq gi, noqkuq râ htungtarâ pé eq noqkuq râ myidàm sân-yúng dik gok bo é nghut ri. ² Saí tô é saksé zúm é sân-hi gok má gi, haú myibung tsúng jang, siboí eq haú nhông byí é muk joq mù, haú gok lé gi, Chyoiyúng Jowò ga myhîng ri. ³ Í dang nghû râ gok pán-gyang é ahkaú mâ é gok lé gi, Chyoiyúng Htâng é Jowò gâ é nghut lhê. ⁴ Gok haú má gi, namngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haú má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri. ⁵ Dangshikaq sidek é ahtoq má gi, shîhtaí gunglik hkungga byi jang htoq má wup tô é, Hpungwup shing kang bò Sù é hkerubim* pé joq tô ri. Nghut kôlhang, ngamoq gi, ahkuí haú pé lé jihkúm nuqguq a wó taí san kyo é nghut lhê.

⁶ Haú dông jung hkangmó ban lajang tô é hkûn, hkyangjong pé gi, ayang sân-hi gok má wàng mù, yhangmoq é dojaú muzó lé wùn waq bekô nghut ri. ⁷ Nghut kôlhang, ahkaú gok má gi, hkyangjong mó za, yhânggùng é matú le, a sé é za byu pé kut shut é marâ é matú le, nhông byi râ sui chûng mù, razàn má radàm za wang

* 8:5 Htoq Ló 25:40 * 8:12 Yer 31:31-34 * 9:5 Hkerubim gâ é gi, byù su su, dusak su su dut é, dùng dap é maumang lagyo rahú nghut lhê.

é nghut lhê. ⁸ Haû Chyoiyúng Woi-nyí gi, haú pé dông mai, sâng-hi é saksé zúm ru joq nyí nyí, haû Chyoiyúng Htâng é Jowò wàng hkyô a hpông shit shi é lé, tûn shit nyi ri. ⁹ Haû gi, ipyat shi é matú tûn shit é azông nghut mù, nhông byí é chyunghuq pé eq shigu hkungga pé gi, dojaú sù é i-myt lé a wó lhoq sân-yúng byí é hkyô lé taí nau é nghut lhê. ¹⁰ Haú pé gi, zojung, shuqjung eq chî san chî séng hking ahú hú eq za sêng é nghut mù, htûngli asik, lé joq é ahkýng jé shoq za tô tô é gungsho eq sêng é tarâ pé nghut ri.

Hkrisduq É Sui

¹¹ Hkrisduq gi, shî má joq to gù nghut é gè hkyô pé é hkyangjong mó dông lé jé é hkûn, hpan tô é má a lom nghû nau é, byu èq saí é a nghut é, je kô é eq je gumjup é saksé zúm mai wang lai bê nghut lhê. ¹² Yhang gi, Chyoiyúng Htâng é Jowò má wang é hkûn, bainám eq nojûng zo pé é sui lé chûng mù wang é a nghut é za, Yhâng é suí èq yhang banshoq é matú radàm za ahtum abyuq é hkyi yù hkyô wó yù bê nghut ri. ¹³ Htûngli dông agot a-û dut é bang lé lhoq sân-yúng râ matú, bainám eq nohtó zo pé é sui eq no-pyâ é myi-mhop lé, yhangmoq é ahtoq má hpyun gyun é hkûn, yhangmoq gi, ahtoq gungsho pyâm wó lhoq sansêng é hui kô é nghut lhê. ¹⁴ Haû nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí dông mai nhông byí é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuí jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhaí!

¹⁵ Haû nghut é yanmai, Hkrisduq gi, danggidiq byi tô é ahtum abyuq é muizè lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haû su wó kut é gi, sâng-hi lhê é dangshikaq ahkaû má mara kut shut é bang lé lhoq lhut yù râ matú, yubak chyîn xap zè ralhum dông, Yhang shî hkám byi yanmai nghut ri.

¹⁶ Madat dang eq séng luí ga jang, madat dang taí sù haû shî bê hkyô saksé shit râ

lhê. ¹⁷ Haî mù gâ le, madat dang gi, rayuq yuq shî jáng za sheq lichyúm htoq é nghut lhê. Madat dang taí sù rû dui nyi nyi, haû gi, hkâ-nhám le lichyúm htoq râ a nghut. ¹⁸ Haû nghut é yanmai, sâng-hi lhê é dangshikaq lháng gi, sui a bo lòm jáng lichyúm a htoq é nghut lhê. ¹⁹ Mosheq gi, haû jep é tarâ má bo é hkunmó hkangmó lé, shiwa byù banshoq bang lé ban taí pyo é hkûn, zam zam ne é saumaú eq jàm kyâng lé yù mù, nojûng zô é sui eq bainám sui eq wuì nyhò tô é lé, chyúmding má le, shiwa byù banshoq bang lé le, hpyun gyûn é nghut ri. ²⁰ Yhang gi, "Sui shî gi, nungmoq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lhê."✧ ga taí ri. ²¹ Yhang gi, saksé zúm eq dojaú é má chung é zè pé má le, haû eq rajung za sui haû hpyûn gyûn ri. ²² Gè gè gi, haû jep é tarâ má bo é dông ga jang, azíng zê aluq banshoq gi, suí èq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haû mù, mauhkûng zè pé é azông pé gi, hkungga haú pé èq lhoq sân-yúng é hui râ é nghut lhê. Nghut kôlhang, mauhkûng zè pé yhang gi, haú pé htoq je ge é hkungga pé èq lhoq sân-yúng é hui râ dut é nghut lhê. ²⁴ Hkâsu mù gâ le, akying lhûm é azông za nghut é, byu èq saí é chyoiyúng dik é jowò má Hkrisduq wang é a nghut é za, Yhang gi, mauhkûng má yhang wang é nghut mù, ahkuí gi, nga-nhúng é matú Garai Gasâng é hí má bo yap byi nyi é nghut lhê. ²⁵ Yhang gi, haû hkyangjong mó mai yhumsíng é sui a nghut é sui lé chûng mù, Chyoiyúng Htâng é Jowò má zàn wuì wàng luí kut é su, yhânggùng lé dum nhông byi byi kut râ matú mauhkûng má wang é le a nghut. ²⁶ Haú dông ru nghut le gi, Hkrisduq gi, mau htoq xâng hkûn mai shî hkám é adàm myo myo nghut berâ nghut lhê. Nghut kôlhang, ahkuí, Yhang gi, yubak mara huí séng pyâm byi râ matú, yhânggùng lé hkungga nhông byi râ ga ipyat pé ló htâng ló nyi é má, banshoq é matú radàm za htoq shit bê nghut ri. ²⁷ Byù gi, radá za shî râ nghut mù, hau htâng má tarâ jéyáng é hui râ nghut é eq rajung za,

²⁸ Hkrisduq gi, byù myo myô é yubak mara lé yu pyám byi râ matú, radá za hkungga nhông é hui bê nghut ri. Haù mù, Yhang gi, yubak mara wun pyám byi râ a nghut lo é za, Yhang lé láng nyi é bang lé hkyi yù hkyô yu lé byi râ matú, htâng má í dâm nghû râ dàm htoq shit râ nghut lê.

10

Hkrisduq É Gùng Lé, Banshoq É Matú Radàm Za Nhông Byi É Hkyô

¹ Haù jep é tarâ gi, jé lô râ nghut é gè hkyô pê é akyîng a nghut é za, wupzo za nghut ri. Haù nghut é yanmai, jep é tarâ gi, zàn wuì ru nhông byi byi kut nyi é eq rajung zâ é shigu hkungga pé dông mai, noqkuq râ matú chyâng lé é bang lé hkâ-nhám lé wó lhoq gumjup é a nghut. ² Tarâ haù wó lhoq gumjup byi é ru nghut le gi, yhangmoq nhông byi é hkyô nô pyám kó râ a nghut lí? Hkâsu mù gâ le, haù noqkuq é bang gi, banshoq é matú radàm za lhoq sanséng huì é nghut jáng, yhangmoq é yubak marâ é matú, hkâ-nhám le mara a bò bun lo kó râ nghut lê. ³ Nghut kôlhang, shigu hkungga haù pé gi, zàn wuì yubak mara pé lé lhoq pun byi é zè nghut ri. ⁴ Haì mù gâ le, nohtó pé eq bainám pê é sui gi, yubak mara lé huì séng pyâm é hkyô wó dut é a nghut.

⁵ Haù mù luì, Hkrisduq, mingkan má lé jé é hkùn, Yhang taì é gi,

"Shigu hkungga eq hkungga lé Nàng a o é nghut mù,
Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang ê, Ngò eq séng luì chyúmding má kê tô é eq rajung za,

Nàng ô nau é hkyô kut râ matú, Ngò, shi má nyi lê.' nghû taì é."*

gâ ri. ⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haù pé lé Nàng a gabú é nghut lê." ga taì ri. Haù jep é tarâ dông

haù pé lé kut râ dut kôlhang taì é nghut ri. ⁹ Hau htâng má, Yhang gi, "Nàng ô nau é hkyô kut râ matú, Ngò, shi má nyi lê." ga taì ri. Haù gi, Yhang, htang lhum dangshikaq lé htaì masat to râ matú, sâng-hi lhum lé tô pyâm é nghut ri. ¹⁰ Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byi é dông mai, nga-nhúng gi, lhoq chyoiyúng é hui bê nghut ri. ¹¹ Hkyangjong hkangmó gi, nyi nyi buì buì, yap mù, yhâng é hkyangjong muzó lé zui saì é nghut lê. Yhang gi, yubak mara lé hkâ-nhám lhang a wó huì séng pyám byi é, rajung zâ é shigu hkungga lé, dum nhông byi byi kut é nghut lê. ¹² Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkyíng banshoq é matú ban nhông byi é hkùn jáng, Garai Gasang é loqyo hkyam shut zung to bê nghut ri. ¹³ Haù hkùn mai, Yhang gi, Yhâng é gye pé lé, Yhâng é hkyi nang jang kut byi râ lé láng nyi é nghut ri. ¹⁴ Haì mù gâ le, Yhang gi, lhoq chyoiyúng é huì nyi bang lé, hkungga ralhum eq za, pyat dedû é matú lhoq gumjup byi bê nghut ri.

¹⁵ Haù Chyoiyúng Woi-nyi le, haù hkyô eq séng luì nga-nhúng lé saksé hkâm kyô ri. Sâng-hi má, Yhang taì é gi,

¹⁶ "Haù Yhumsîng taì ri, shi gi, ahkyíng haù laì htâng má, Ngò, yhangmoq eq to râ dangshikaq nghut lê.

Ngò gi, Ngá é tarâ pé lé, yhangmoq é myit nhiklhum hkaù má kat byi mù, yhangmoq é i-myt má kê to byi râ nghut lê."*

gâ ri. ¹⁷ Hau htâng, Yhang taì jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut."*

gâ ri. ¹⁸ Haù mù, mara haù pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haù mù luì, gumang wuì ê, nga-nhúng gi, Yesuq é suì eq, haù Chyoiyúng Htâng é Jowò má wàng râ matú hkyak wó lum to

bê nghut lhê. ²⁰ Haû gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rú dui nyi é hkyô nghut lhê. ²¹ Haû nghut é yanmai le, Garai Gasâng é yhûm lé up é gyaú é hkyangjong lé nga-nhúng wó é yanmai le, ²² nga-nhúng gi, gingtîng é lumjîng hkyô mai sansêng é i-myt èq, Garai Gasâng chyáng è mù, mara bò bûn é myit sôn sê é hkyô mai, nga-nhúng lé lhoq sansêng râ matú nga-nhúng é i-myt lé hpyun gyûn é hui nhâng luí, nga-nhúng é gungdu gi, sân-yúng wui èq chi byi é hui yù sháng. ²³ Nga-nhúng gi, nga-nhúng yín yu é myit myoqbyù hkyô lé zuí gingtîng nyi sháng; hkâsu mù gà le, danggidiq byi to bê Sû gi, lhumzui Sû nghut lhê. ²⁴ Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaû toq byi lhum râ hkyô lé, dat myit nyi sháng. ²⁵ Chôm huí zup lhûm nyi é hkyô lé, ra-am lhaq tô pyâm nyi kô é su, nga-nhúng gi, a tô pyâm é za, haû Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byi lhûm nyi sháng.

²⁶ Nga-nhúng gi, tengmán hkyô lé sê yu é htâng má, shi-ngé ngé mara dum kut shut kut é nghut jáng, mara hkyut byi râ hkungga a joq lo. ²⁷ Tarâ jéyang hkyô eq Garai Gasâng é gye pé lé nyhê hkyô pyâm râ nghut é nhikmo-yô é myi lé za, gyuq chiq myit mai láng nyi râ dut bê nghut lhê. ²⁸ Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê. ²⁹ Haû jáng, Garai Gasâng é Yhangzo lé hkyiwa ô má nâng pyeq bê sù, yhumsîng lé lhoq sân-yúng byi bê nghut é dangshikaq é sui lé a chyoiyúng é zè dông kut pyâm bê sù eq, jeju byi é Woi-nyi lé rhoi é sù gi, hkâ-í yhang gyaú é mara dam byi é hui gîng râ nghut lhê nghû, nungmoq wó myit akô lhú? ³⁰ Hkâsu mù gà le, "Lató hpuq râ gi, Ngò ru nghut lhê; Ngò lató hpuq râ."* ga le, "Haû Yhumsîng gi, Yhâng é byu pé lé tarâ jéyang râ nghut lhê."* ga le, taí é Sû lé, nga-nhúng sê lhê. ³¹ Haû rú dui nyi sù Garai Gasâng é loq hkaú má byit gyó wang é gi,

gyuq chiq jung yhang nghut ri.

³² Nungmoq, haû maubó lé hap yu é* htâng, wuîhke jamjau huí é má gyai yhang shikut kôluí wó jân pyám bê nghut é, hí lhê buinyi pé lé myit bun keq. ³³ Ra-u u má, nungmoq gi, byu pé hí má de de rhoi shit é eq zing-rí é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri. ³⁴ Nungmoq yhang, je ge é eq ru gîng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byi é bang lé, gabú myit eq jân pyám bekô nghut ri.

³⁵ Haû mù luí, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó râ nghut lhê. ³⁶ Nungmoq gi, Garai Gasâng é ô naù hkyô lé kut é hkûn, Yhâng danggidiq byi tô é lé wó hap yù râ matú, nungmoq hkam jan râ dut é nghut lhê. ³⁷ Hkâsu mù gà le, razup zo nghut jáng,

"Haû lé lô râ Sû gi, jé lé râ nghut mù, ahkyíng lhoq myáng râ a nghut.

³⁸ Nghut kôlhang, Ngá é dingmán sù gi, lumjîng myit mai asak dui râ nghut lhê.

Yhang nungzut zut é nghut le gi, Ngò, Yhang lé myit nguì râ a nghut."* ga tô ri. ³⁹ Nghut kôlhang, nga-nhúng gi, nungzut zut mù htên byoq huí é bang a nghut é za, lumjîng mù hkyi yù huí é bang ru nghut lhê.

11

Lumjîng Myit Mai

¹ Lumjîng myit nghu é gi, nga-nhúng myit myoqbyu tô é lé hkyak wó râ nghu é eq nga-nhúng a myàng shí é lé joq lhê nghû hkyak sê é hkyô nghut lhê. ² A-nham lhê bang gi, lumjîng myit haû mai Garaí èq owaq é hui kô é nghut lhê.

³ Lumjîng myit mai, nga-nhúng gi, nyi mi-nyi, joq mijoq lhunglhang lé Garai Gasâng é hkunmó èq hpan tô é hkyô sê gyô é nghut lhê. Haû mù, myoq èq wó myang é pé gi, byu-myang é pé mai saí htoq tô é a nghut.

* 10:30 Tarâ Pun 32:35 * 10:30 Tarâ Pun 32:36

* 10:32 Haû maubó lé hap yu é gà é gi, gabú danglù lé sân-hi

wó hap yu é lé gà lhê. * 10:38 Hbk 2:3-4

⁴ Lumj́ing myit mai, Abelaq gi, Ka-in kut é htoq je ge é hkungga, Garai Gasang lé nhông byí é nghut ri. Lumj́ing myit mai, yhang gi, yhâng é hkungga eq séng luí Garai Gasang hkya-ôn é hkûn, dingmán sù rayuq đông owaq é hui bê nghut ri. Haû mù, lumj́ing myit mai, yhang gi, shi byuq bê nghut kôlhang, dang rû nyo nyi ashí nghut lhê.

⁵ Lumj́ing myit mai, Enuq gi, shi é a hui zo shoq, asak shí mai mauhkûng shut shuí yu é hui bê. Yhang lé, Garai Gasang shuí ló byuq bê nghut é yanmai, yhang lé a wó myàng lo nghut ri. Hkâsu mù gâ le, yhang gi, shuí yu é a hui shí é hí má, Garai Gasang lé nguì nhâng sù rayuq đông owaq é hui sù nghut ri. ⁶ Lumj́ing myit a bo é nghut le gi, Garai Gasang lé a wó nguì nhang é nghut lhê. Haí mù gâ le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng eq shigyaú é lé le, lumj́ing râ dut é nghut lhê.

⁷ Lumj́ing myit mai, Noaq gi, a myang wú shí é hkyô pé eq séng luí sidiq byi huí é hkûn, yhâng é yhumbyù wuì lé hkyî râ matú, gyuq hkunggâ é đông mai wuì-sanghpo saí bê nghut ri. Yhâng é lumj́ing myit mai, mingkan lé mara byí é nghut mù, lumj́ing myit mai lo é dingmán hkyo é jeju lé hkam yù sù dut bê nghut ri.

⁸ Lumj́ing myit mai, Abraham gi, yhâng é muizè đông, htâng má yhang hap yù râ nghut é, Garai Gasang byí é jowò shut e ló râ matú ji yu é huí é hkûn, jìno gyo mù, yhang hká shut e ló é a sé kôlhang, ê bê nghut ri. ⁹ Lumj́ing myit mai, yhang gi, gó ming má nyi é byù bíng rayuq su, danggidiq byí tô é mau má nyi bê nghut ri. Yhang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri. ¹⁰ Hkâsu mù gâ le, Abraham gi, Garai Gasang eq azông hên mù saí tô é, gíng é apûn awang pé eq mu é myuq lé myit myoqbyu nyi é nghut ri.

¹¹ Lumj́ing myit mai, Abraham gi, yhâng é asak ipyat laí ló byuq é eq, Sarah le baùdung nghut to kôlhang, haû danggidiq byi Sù, lhumzui sù nghut lhê ga myit sôn

yu é yanmai, îwa rayuq wó dut é hui bê nghut ri. ¹² Haû mù luí, yhang gi, shí gùng đông nghut kôle, yhang rayuq mai lo é awut ashín pé gi, mauhkûng mâ é kyí pé eq wuimau yàm mâ é a ung nghap é semuì myhó myô lò bê nghut ri.

¹³ Byù haú bang banshoq gi, yhangmoq shi é hkûn jé shoq lumj́ing myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlhang, haú pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yú bekô nghut ri.

¹⁴ Haû su yín yu é byu pé gi, yhangmoq yhumsing é ming lé ho nyi é bang nghut é lé tûn shit é nghut akô. ¹⁵ Yhangmoq htoq lo é ming lé, yhangmoq myit tui nyi kô é ru nghut le gi, dum tau ló râ ahkáng wó kó râ nghut lhê. ¹⁶ Ahkuì kúm, yhangmoq gi, je ge é ming nghut é, mauhkûng mingdán lé myit tui nyi akô nghut ri. Haû mù luí, Garai Gasang gi, yhangmoq é Garai Gasang nghu é hui râ lé a hoq é nghut lhê. Hkâsu mù gâ le, Yhang gi, yhangmoq é matú myuq ralhum lajâng to byi bê yanmai nghut ri.

¹⁷ Lumj́ing myit mai, Abraham gi, Garai Gasang eq yhang lé chyam é hkûn, Isak lé hkungga ralhum đông nhông byi bê nghut ri. Haû gi, danggidiq pé lé hap yu to bê sù gi, yhâng é yuqzo zote lé nhông byi râ dâ é nghut lhê. ¹⁸ Garai Gasang gi, "Isak đông mai lo é lé, náng é awut ashín nghu sôn byi râ nghut lhê."* ga yhang lé danggidiq byi to bê nghut kôle, yhang haû su kut é nghut ri. ¹⁹ Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

²⁰ Lumj́ing myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

²¹ Lumj́ing myit mai, Yakup gi, yhang shi ló râ u má, Yosep é yhangzô nhik lé shimân byi mù, yhâng é dumbáng-u má nè luí, noqkuq bê nghut ri.

²² Lumj́ing myit mai, Yosep gi, yhâng asak htûm ló râ u lé, Israelaq byu pé Egotuq ming mai htoq lò râ eq séng luí taí mù,

* 11:18 Apûn 21:12

yhâng é showui pé eq séng luí hkâsu kut râ hkyô lé pying to bê nghut ri.

²³ Lumjínj myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haî mù gâ le, yhangnhik gi, zoshâng haû yúng é myàng kômù, hkohkam é mungdang lé a gyuq kó nghut ri.*

²⁴ Lumjínj myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri. ²⁵ Yhang gi, yubak marâ é ngón hkyô má rayoq zo ngón kún râ malaî Garai Gasâng é byu pé eq rahá hpuzô é hui râ lé sheq hkyin yù bê nghut ri. ²⁶ Yhang gi, haû Hkrisduq é matú rhoî huí é lé, Egutuq ming mâ é sutzè htoq má je riyhang hpauđap lhê ga myit sôn yu ri. Haî mù gâ le, yhang gi, yhâng é shigyau chyunghuq lé myit myoqbyu nyi sù nghut ri. ²⁷ Lumjínj myit mai, yhang gi, hkohkâm hpó nhikjum yô é lé a gyuq é za, Egutuq ming mai htoq ló byuq bê nghut ri. Yhang gi, myoq èq a wó myang é sù Garai lé wó myang é sù dông, hkam jân é nghut ri. ²⁸ Lumjínj myit mai, yhang gi, haû zomún lé sat é maumang lagyô èq Israelaq byu pé é zomún lé a wó záng sháng gaq ga, Lhoqlhai Poî eq sui hpyûn é hkyô le kut hí bê nghut ri.

²⁹ Lumjínj myit mai, haû shiwa byu pé gi, Nhông Nè lé kyuq huí é myigùng htoq mai su lai byit bekô nghut ri; nghut kôlhang, Egutuq byu pé le, haû dông lai shikut wú kô é hkûn, yhangmoq gi, myup shi byuq bekô nghut ri.

³⁰ Lumjínj myit mai, shiwa byu pé, Yerihko myuq xêwâm lé nyhit nyi sô lhing é htâng má, xêwâm haû leq gyop byuq bê nghut ri.

³¹ Lumjínj myit mai, shiwa myhí Rahap gi, haû Israelaq jó wú bang lé nguingón é eq lhom hkulum yu é yanmai, jìno a gyo bang eq rahá sat pyâm é a huí é nghut lhê.

³² Haû htoq lai luí, ngò haî taí jat ra shirâ lhu? Gidon, Barak, Samson, Yephta, Dawiq, Samuelaq pé eq myiqhtoî pé é hkyô lé taí râ ahkyíng ngò a wó. ³³ Haû bang gi, lumjínj myit mai mingdán pé lé wó

zân ung yù bekô, tengmán hkyô lé chung jaí bekô, danggidiq byí to bê lé wó hap yù bekô, hkanghkyi pé é nhut lé wó myhí pyám bekô, ³⁴ myiduq myishâm lé wó sat pyám bekô, shamsó mai le wó hfang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê. ³⁵ Myiwe wuî gi, yhangmoq eq séng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui râ lé he-ngik pyám kômù, zing-rî é gyai yhang hui zo bekô nghut ri. ³⁶ Ra-am gi, wuîzui kut pyám byí é eq nhuq bat é hui bekô, góbang gi, shamtoq kyum hut huí é eq htóng lhung é hui bekô nghut ri. ³⁷ Yhangmoq gi, luqgok eq dú sat é, í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rî é eq rhoi pyâm é hui bekô nghut ri. ³⁸ Yhangmoq lhumzuí nyi kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyûng pé eq myìdong pé má nyi lhing wún bekô nghut ri.

³⁹ Haû bang banshoq gi, yhangmoq é lumjínj myit é yanmai, owaq é hui bê nghut kôle, yhangmoq ó yuq le, danggidiq byí tô é lé a myang hkam yù kó nghut ri. ⁴⁰ Haî mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

12

Garai Gasang, Zo Wuí Lé Mhoqshit É Hkyô

¹ Haû mù luí, nga-nhúng gi, haû myhó é saksé pé mhutdùm su nga-nhúng é lhinghkyuq má joq to bê nghut é yanmai, nga-nhúng lé hkûm tang é hkyô pé jung hkangmó eq, lui za lhoq nhúng byí é yubak mara lé dú pyám mù, nga-nhúng òn râ

* 11:23 Haû-u lé, hkohkâm hpó gi, Israelaq pé é yuqzo zonú wuî lé sat pyám râ hkunmó hkyô tô é nghut lhê.

matú tô tô é hkyô lé, hkam jan luí din e ló sháng. ² Nga-nhúng gi, nga-nhúng é lumjǐng hkyo é apún awang lé hí sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé hai su a ngam é za, tapzǐng má shí hkâm é hkyô lé jân pyám luí, Garai Gasâng é hkohkâm-tanghkuq é loqyo hkyam shut zung to bê nghut ri. ³ Nungmoq gi, a ngu byuq râ eq myit wum a gyuí byuq kó sháng gaq, yubak dap bâng chyáng mai haú su htúq htǐng é hkyô lé jân pyám é Yesuq chyáng mai myit wum yú keq.

⁴ Nungmoq gi, yubak mara lé htúq htǐng shikut é hkyô má, nungmoq é sui shun pyám shoq yhang a kut shi kó nghut ri. ⁵ Hau htoq agó, nungmoq gi, zo wuí lé dǒng Garai Gasang nungmoq lé wum byí é dang lé tô-myhí pyám bekô lhú? Wum byi dang haú gi,

"Ngá zo ê, haú Yhumsǐng mhoqshit é hkyô lé agya alhá hkâkut pyám, Yhang, nang lé tân é hkûn, myit wum hkâgyuí,

⁶ hai mù gâ le, haú Yhumsǐng gi, Yhang chyítap é bang lé mhoqshit mù, zo rayuq lé dǒng, Yhang hap yu é bang yuq hkangmó lé dam byí é nghut lhê."[☆]

gâ é nghut ri.

⁷ Mhoqshit huí é hkyô má, wuíhkê é lé hkam jan keq. Garai Gasang gi, nungmoq lé, zo wuí lé dǒng kut é ru nghut lhê. Hkâsu mù gâ le, yhumsǐng é yhângwâ èq a mhoq é zo gi, ó wá nyi lhê lhú? ⁸ Nungmoq gi, yuq hkangmó huí lai é mhoqshit hkyô lé, a hui kô é nghut jáng, dezô pé dǒng nghut byuq mù, zo sǐng wuì a nghut lo kó. ⁹ Nga-nhúng banshoq bang gi, nga-nhúng lé mhoqshit é xângzo íwâ pé wó é bang chyat nghut mù, yhangmoq lé hkunggâ é nghut lhê. Haú nghut jáng, je riyhang, nga-nhúng é woi-nyí eq sêng é Íwâ é a-ô má nyi mù, asak duì râ dut ri myhi-nhung! ¹⁰ Nga-nhúng é xângzo íwâ pé gi, yhangmoq je ge dik bún é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é

chyoiyúng hkyô má nga-nhúng wó bo lóm shoq, nga-nhúng é gè hkyô é matú, nga-nhúng lé mhoqshit ri. ¹¹ Mhoqshit é hkyô hkangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haú lé hkam yù bê bâng é matú gi, htâng má, nguingón hkyô eq dingmán hkyo é ashi lhoq htoq byí ri.

¹² Haú mù luí, myúng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kǐng keq. ¹³ Hkyí hten bang a wó sô é a dut shoq, lhoq gè byí é wó hui kó sháng gaq, nungmoq so râ matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguingón shoq nyi râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haú Yhumsǐng lé myàng râ a nghut. ¹⁵ Ó yuq le, Garai Gasâng jeju lé a tô pyám râ matú, sidiq keq. Haú, yuq htoq lô mù, wuíhke hkyô lhoq htoq é eq byù myo myo lé agot a-û dut nhang é nuì hko su, ó yuq lé le hkâdut nhâng kó. ¹⁶ Ó yuq le, ashop é dǒng gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyám é, Garai a lom é Eso su nghut nghut, a kut râ matú sidiq keq. ¹⁷ Nungmoq sê é eq rajung za, Eso gi, htâng má, shimân jeju haú lé hkam yù nau é hkûn, he-ngik pyám é hui bê. Yhang gi, shimân jeju haú lé ngaubyi ngau-nhap èq hô kôlhang, yhang kut é hkyô lé a wó htaí byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyí dut é eq laidun lo é má le, ¹⁹ tut htê mying é eq, dang taí htê mying é má le, a jé é kó nghut ri. Dang htê haú lé wó gyô é bang gi, yhangmoq lé, dang a taí jat lo râ matú dung tôngbán akô nghut ri. ²⁰ Hai mù gâ le, yhangmoq gi, "Bùm haú má dusak pé záng jáng lháng, luqgok èq dú sat râ dut lhê."[☆] ga Garai Gasang hkyô tô é hkunmó lé a wó hkâm kô é yanmai nghut ri. ²¹ Haú byu-myàng hkyô gi, lúm wú gyuq hpo dut

[☆] 12:6 Sânghkyang 3:11-12 [☆] 12:20 Htoq Lô 19:12-13

[☆] 12:21 Tarâ Pun 9:19

é yanmai, Mosheq lháng gi, "Ngò, gyuq nán ri."* ga taí é nghut ri.

²² Nghut kôlhang, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, maumang lagyô pé ajùm ayò gabú ratung zup zîng é jang eq, ²³ mauhkûng htoq má myìng kâ to huí é, zomún pê é noqkuq hpúng joq jang má, jé lé bekô nghut ri. Haù mù, nungmoq gi, byù banshoq é tarâ agyì nghut sù Garai Gasâng chyáng le, lhoq gumjup huí é dingmán bâng é woi-nyí pê chyáng le, ²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyùn gyùn é sui má le, jé lé é nghut bekô.*

²⁵ Nungmoq gi, dang nyô Sù lé a gyo a kut râ matú, sidiq keq. Myidàm htoq má sidiq byí é sù lé he-ngik pyâm é bang, a lut kô é nghut lhê. Haù mù, mauhkûng mai nga-nhúng lé sidiq byí é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó lhi? ²⁶ Haù Garaí dang taí é u má, Yhâng é htê gi, mingkan lé lhoq nhùn kat ri, ahkuí kúm gi, "Ngò, mingkan lé za a nghut, mauhkûng pé lé le radàm dum lhoq nhùn râ nghut lhê."* ga Yhang danggidiq byí to bê nghut ri. ²⁷ "Radàm dum" gâ é dang gi, haù a wó lhoq nhùn é pé wó myit to sháng gaq ga, hpan to huí é zè pé nghut é, wó lhoq nhùn é pé lé huí sêng pyám râ lé gâ é nghut lhê.

²⁸ Haù mù luí, nga-nhúng gi, a wó lhoq nhùn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é dông noqkuq sháng. ²⁹ Hkâsu mù gâ le, nga-nhúng é "Garai Gasang gi, nyhê jôm é myi nghut ri".*

13

Ló Htáng Má Lhoq Pun Kyîng É Hkyô

¹ Rayuq eq rayuq, gumang yhangchang dông chyitdap lhùm nyi keq. ² Byù bíng pé lé hkulúm râ hkâtô-myhí kó, hkâsu mù gâ le, ra-am gi, haù su kut nyí kô é yanmai, a sê é

za maumang lagyô pé lé hkulum záng bekô nghut ri. ³ Nungmoq gi, htóng lúng bang eq rahá htóng lúng luzúm wuí dông, htóng lúng bang lé le, nungmoq yhang jamjau hui zô nyi é dông, hpuzô é bang lé le, myit bun keq.

⁴ Myiháng hkyô gi, lhunglhang bâng èq hpautap é hui rà dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é dông gungsho zùm yap é bang banshoq lé jéyáng râ nghut lhê.

⁵ Nungmoq é asak dui hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haù mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."*

ga taí é nghut lhê. ⁶ Haù mù, nga-nhúng gi, hkyak lum é myit mai,

"Haù Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé haù wó kut râ lhu?"* nghù taí é nghut lhê.

⁷ Nungmoq lé Garai Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi laí lo é sâmlai lé myit wú mù, yhangmoq é lumjîng myit lé alik kut yù keq. ⁸ Yesuq Hkrisduq gi, a-nyí nap, hkû-nyí, htàngnùng pyat dedu rajung za nghut nyi ri.

⁹ Maú nhô zâ é mhoqshit hkyô ajung jung maí èq shuí nghoq huí é bang hkâdut kó. Zo bang lé hai akyû a byí é, htungli zoshuq èq a nghut é za, Garaí jejû èq nga-nhúng é myit nhiklum lé wum-o lhoq kîng yu é gi, gè hkyô nghut lhê. ¹⁰ Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

¹¹ Haù hkyangjong mó gi, dusak pê é sui lé, yubak mara hkungga dông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri. ¹² Haù eq rajung za, Yesuq le, Yhâng é sui dông mai byu pé lé wó lhoq chyoyúng râ matú, myuq hkum shinggan má jamjau hpuzo mù shí hkám bê nghut ri. ¹³ Haù mù luí, nga-nhúng gi,

* **12:24** Abelaq lé gi, yhangmang Ka-in èq sat é nghut luí, yhâng é sui gi, lató-hpuq râ matú nghut ri; nghut kôlhang, Hkrisduq é sui kúm gi, hkyi yù hkyô lajang byí ri. * **12:26** Hagi 2:6 * **12:29** Tarâ Pun 4:24 * **13:5** Tarâ Pun 31:6 * **13:6** Hkya-on 118:6-7

byù nyì jowò shinggan má Yhâng chyáng ê mù, Yhang hui zô é rhoi hkyô lé ê bo hui zo sháng. ¹⁴ Hkâsu mù gà le, nga-nhúng gi, mingkan shî má ru gîng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haû mù luî, nga-nhúng gi, Garai Gasâng é myìng lé yín yu é nhutwui é ashi nghut é, hkya-on hkungga lé, Yesuq dông mai, Garai Gasâng chyáng xoq xoq nhông byí nyì sháng. ¹⁶ Ge é hkyô kut râ eq góbang lé shuí gam chûng râ hkyô lé, hkâtô-myhí kó; hkâsu mù gà le, Garai Gasang gi, haû sù é hkungga pé lé ô ngui nyi ri.

¹⁷ Nungmoq é hkyô-u shê bâng é jìno gyo mù, yhangmoq é ahko ahkáng ô má nyì keq. Yhangmoq gi, jihpán shit râ dut é bang dông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wòlai a dut é za, gabú hkyô ralhum wó dut sháng gaq, yhangmoq é jìno gyô nyì keq.

¹⁸ Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dông asak ùi râ lé ô nau lhê nghû, hkyak wó myit ri. ¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taî tsuq kat lhê.

²⁰ Sau hpúng pê é sau zúng Sû mó nghut é, nga-nhúng é Yhumsîng Yesuq lé, haû ahtum abyuq é dangshikaq é sui dông, shî bê mai dum lhoq ùi toq é sù, nguingón hkyo é Garai Gasang gi, ²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhúng chyáng kut nyì sháng gaq. Hpungwup shingkan gi, Yesuq Hkrisduq chyáng pyat dedu ahtum abyuq ru joq nyì sháng gaq. Amen.

²² Gumang wui ê, ngò lhoq pûn kyîng é dang lé nungmoq wó hkam jan kó sháng gaq nghû, wum taî tsuq kat lhê; hkâsu mù gà le, ngò gi, nungmoq lé, laiká ratot za kê kat é nghut lhê.

²³ Ngò gi, nga-nhúng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shî má myap jé lé

é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shuí-u bang banshoq eq Garai Gasâng é byu pé banshoq lé bo shi-kyám byi keq. Itali ming mâ é gumang wui gi, nungmoq lé shi-kyâm kat akô nghut ri.

²⁵ Jeju gi, nungmoq banshoq bâng chyáng ru joq nyì sháng gaq ô.

YAKUQ Hun Kat é Laiká (James)

¹ Garai Gasang eq Yhumsing Yesuq Hkrisduq é jùn, ngò Yakuq gi, byo myín tô é Israelaq raxe í myû lé, ngingón dang shit kyô kat lhê.

Lumjng Myit Lé Chyam É Hkyô Eq Hpaqchyî Byéng-yá

² Ngá gumang wuê ê, nungmoq é lumjng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù, ³ wuîhke jamjau ajung jung lé htung huî é hkûn, gaù jowò mó nghut nyi lhê nghu luî myit yù keq. ⁴ Hau htoq agó, nungmoq banshoq gúm gumjup jup dut mù luî, haî le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyî byéng-yá langhpyut tô é nghut le gi, haû banshoq bang lé, mara a hun é za, agùn agó byí nyi é Garai Gasang chyáng dúng nyi sháng gaq, haû jáng, Garai gi, yhang lé byi râ nghut lhê. ⁶ Nghut kôlhang, lum shut é myit a bo é za, lumjng é myit èq dúng nyi sháng gaq, hkâsu mù gâ le, lum shut é sù gi, laidûn èq hik luî toq lo é nhông mâ é wuîheng eq wuî nyi ri. ⁷ Haú yuq gi, Yhumsing Garaî chyáng mâ é haî le wó yû râ su a ngam nyi sháng gaq. ⁸ Yhang gi, myit-kó xan sù nghut luî, yhang é hkyô hkat hkangmó má, mù htang a nyang é sù nghut nyi ri.

Myùng Sù Eq Wó Sù

⁹ Myung é gumang hpó gi, waq toq huî é má, wó sù gi, lhoq nyhûm huî é má, gabú gumrong nyi sháng gaq. ¹⁰ Hkâsu mù gâ le, wó sù gi, wàhu banbó su woî byuq lô râ nghut lhê. ¹¹ Bui gi, nyé é lai èq toq lô jáng, haû wàhu nyhuî byuq lô mù, abó le yoq gyó byuq é eq, hau é yung sâm pé gi, htên byuq é su; wó sù le haû eq rajung za, yhang kut nyi é muzó má woî byuq lô râ nghut lhê.

Gunglaú É Hkyô

¹² Wuîhke jamjau huî le, wó shikut shirang nyi sù gi, hkungsô wó nyi ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byí tô é danggidiq asak janmaú lé, wó yû râ nghut lhê.

¹³ Gunglaú huî é sù ó yuq nghut kôlhang, gunglaú huî é hkûn lé, "Garai Gasang, ngo lé gunglaú nyi ri." nghu luî, a taí sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut. ¹⁴ Nghut kôlhang, ó yuq nghut le le, yhumsing é gungsho ô nau é dúng, shuî láng nghoq lô é nghut le gi, agúng alaú hui bê. ¹⁵ Gungsho ô nau é hkyô kúm gi, zogúng dut jáng, mara lé hku htoq lo ri. Mara kô dúng jáng, shi é má jé râ nghut lhê.

¹⁶ Ngò chyitdap é gumang wuê ê, i-myit hkyô nghoq hkâ-nghoq nyi kó. ¹⁷ Gè réng é eq byíng jup é chyunghuq lhunglhang gi, ahtoq shut mâ é nghut mù luî, maubó gung pê* é Yhangwa Garaî chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut. ¹⁸ Yhang hpan tô é amyû pé má, nga-nhúng gi, sâng-hi myhîng é ashî pé dut lo sháng gaq ga, Yhang gi, Yhang ô nau é hkyô cháng luî, haû tengmán é mungdang mai, nga-nhúng lé hkû to bê nghut ri.

Gyo Yu É Eq Cháng Kut É Hkyô

¹⁹ Ngò chyitdap é gumang wuê ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang taí râ lé a hân sháng gaq; nhik-yo râ lé le hkâhân kó. ²⁰ Hkâsu mù gâ le, byù nhik-yô é hkyô gi, Garai Gasang ô nau é dingmán é dúng asak dui hkyô wó lhoq htoq râ a nghut. ²¹ Haû mù luî, achay achyut é banshoq eq ladu laî agè ashop é pé lé lhoq san lhoq sêng pyám luî, nungmoq é i-myit lé wó hkyi yù râ matú, i-myit unghkaû má Garai Gasang hô tô é mungdang lé, nú-nhâm é myit èq hkam yu nyi keq.

²² Nungmoq gi, yhumsing gùng lé a mhaû pyám sháng gaq, haû mungdang lé wó gyô yu é bang za a nghut, haû dúng châng kut é bang le nghut nyi sháng gaq. ²³ Mungdang

* **1:17** Maubó gung pé gâ é gi, bui, kyî, lhamó lé gâ lhê.

haû lé wó gyô yù mù, a châng kut é sù ó yuq le, yhumsing é gungdu lé myoqjàm má wú sù eq wuí ri. ²⁴ Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyâm ri. ²⁵ Nga-nhúng lé wó lhoq lhut yu é gumjup é tarâ má, rago za wú tsuq nyî sù kúm gi, wó gyô yù mù tô-myhî pyâm é sù a nghut, muzó eq tân shit é sù nghut é yanmai, haû yuq gi, yhang cháng kut é muzó má shimân jeju wó râ nghut lhê.

²⁶ Byù rayuq yuq, "Ngò gi, noqkuq htung lé lhoq dik sù nghut lhê." ga luí, myit to kôhang, yhumsing nhut shô lé a wó hkàng mù, yhumsing myit lé mhaû pyâm é nghut le gi, haû yuq é noqkuq htung gi, akôm za nghut nyi ri. ²⁷ Íwa Garai Gasâng é hí má sansêng é eq, râ é hkyô a bo é noqkuq htung gi, wuîhke jamjau huí é chuimó chuizô pé lé, châng wú garúm é hkyô eq, mingkan htoq mâ é achâq achyut é hkyô lé koi pyâm é hkyô nghut ri.

2

Myoqdong A Wó Hkyin Lhum

¹ Ngá é gumang wuí ê, hpungwup shingkang bo é nga-nhung é Yhumsing Yesuq Hkrisduq lé lumjîng hkyô má, byu é myoqdong lé hkâhkyin lhum kó. ² Dangké, hîng loqchyop chyop luí, réng é mebu wut é sù rayuq eq ajeq amyha é mebu wut é asho awuí é sù rayuq gi, nungmoq é tarajong má wang lò kô é nghut le, ³ haû réng é mebu wut é sù lé, nungmoq lhom wú mù je hkunggâ é eq, "Shî aróng wó é jowò má zùng aq." dum, haû asho awuí é sù lé nghut jáng gi, "Mhó má yap to aq." haû su a nghut jáng, "Ngá é hkyî htâng má zùng aq." ga taí kô é nghut le gi, ⁴ nungmoq rayuq eq rayuq gamhkuí lhum luí, a ge é i-myit eq doqdân é bang dut lò bekô a nghut kó lhú?

⁵ Ngò chyitdap é gumang wuí ê, gyô yù keq, lumjîng hkyô má wó sùt nyi luí, gidig tô tô é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuí é bang lé hkyin yù bê a nghut kó lhú?

⁶ Nungmoq kúm gi, asho awuí é sù lé a hpau

a yùm kut pyâm bekô hung; wó bang sùt bang kúm gi, nungmoq lé zik zo mù luí, yhumsing é loq eq yhang, tarâ tingnyâng shut she hkyut lò bekô, a nghut kó lhú? ⁷ Nungmoq eq sêng é kô dik é myîng lé lhang, yhangmoq yhang rhoi dang taí bum akô, a nghut kó lhú?

⁸ Haû mù luí, Chyúmdang má, "Náng gung lé náng chyitdap é su, náng é chyangnâm mâ é bang lé le chyitdap aq." ✧ ga luí, taí tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê. ⁹ Nghut kôhang, byu é myoqdong lé nungmoq hkyin nyi kô é nghut le gi, nungmoq mara kut nyi gû nghut bê yanmai, haû tarâ lé shut é bang lé su tarâ jéyâng é huí nyi bekô râ nghut lhê. ¹⁰ Byù ó yuq nghut le le tarâ banshoq lé cháng kôhang, haû mâ é ralhum lhum lé shut pyâm jáng gi, tarâ banshoq lé shut pyâm sù dut byuq râ nghut lhê. ¹¹ Hkâsu mù gâ le, "Su-myî sulàng hkâlú." ✧ ga luí, hkang tô é sù gi, "Byù lé hkâsat." ✧ ga luí le, taí tô ashî. Náng su-myî sulàng a lú kôhang, byù sat é sù nghut le gi, tarâ lé shut é sù nghut bê.

¹² Haû su mù luí, nungmoq lé lhoq lhut kat é tarâ dông jéyâng doqdân é hui râ bang su, ru taí nyi keq; ru châng kut nyi keq.

¹³ Hkâsu mù gâ le, shogyo myit a bò sù gi, a shogyô é dông jéyâng doqdân é hui râ nghut lhê. Shogyo nhikmyî é hkyô kúm gi, jéyâng doqdân é hkyô lé wó ông lut râ nghut lhê.

Lumjîng Myit Eq Zui Sai É Hkyô

¹⁴ Ngá gumang wuí ê, byù rayuq yuq, "Ngò gi, lumjîng myit bo lhê." ga taí nyi kôhang, muzó a bo lom é nghut le gi, haî akyû bò râ lhú? Lumjîng myit haû gi, yhang lé wó hkyi yù râ lhú? ¹⁵ Gumang, gu-nhá rayuq yuq a chîn dut nyi é eq, nyi wui é zoshuq langhpyut tô é nghut le, ¹⁶ nungmoq chyáng mâ é rayuq yuq gi, yhangmoq é gungsho má râ é hkyô haî le a byi é za, yhangmoq lé, "Nungmoq wut é gung lúm sháng gaq, zô é ûng gyi sháng gaq, ngui ngui ngón ngón lò keq." ga taí é nghut le gi, hai akyû bò kó râ lhú? ¹⁷ Haû eq rajung za, lumjîng myit má muzó a bo é nghut le gi, shi é eq rajung za nghut nyi ri.

18 Dum rahkyô gi, "Nàng gi, lumjîng myit bo ri, ngò gi, muzo bo lhê. Muzo a bo é nâng é lumjîng myit ngo lé tân shit wú aq, haú hkûn, ngá muzo èq ngá lumjîng myit lé, nang lé ngò tân shit râ nghut lhê." ga luí, rayuq yuq tái râ nghut lhê. 19 Garai Gasang rayuq za nghut é lé nàng lumjîng ri-nhung! Nghut bê, haú gi, jô é hkyô nghut nyi ri, nat gâng pé le haú su yhang lumjîng mù gyuq nân nyi akò nghut ri.

20 Kyoq a bo é byù bam ê, lumjîng myit má muzo a bo le akôm za nghut é hkyô lé, nàng sé nau lhê a nghut lhú? 21 Nga-nhûng é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzo mai dingmán é sù gâ é lé wó yû bê a nghut lhú? 22 Haú mù luí, yhang é lumjîng myit gi, yhang é muzo eq rahá za e ló é yanmai, lumjîng myit gi, jup byíng lo é lé, nàng wó myâng bê nghut ri. 23 Haú su mù, "Abraham gi, Garai Gasang lé lumjîng é nghut mù luí, yhang lé dingmán sù ga són byi bê."* ga luí, kê tô é Chyúmdang gi, dik to bê. Dum, yhang lé Garai Gasang é buinùm hpó ga luí le myhíng byi bê. 24 Haú mù luí, byù gi, lumjîng é myit èq baú za a nghut, zui saí é muzo èq mara hkyut san byi huí é lé, nungmoq bún sê nyi akò.

25 Haú eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat đông nhang kat pyâm é hkûn le, yhang zui saí é muzo mai dingmán é sù gâ é wó yû bê a nghut lhú? 26 Haú su mù, gungdu má woi-nyí a bo le gi, shi é eq rajung za, haú lumjîng myit má muzo jizó a bo le gi, shí gû nghut bê nghut ri.

3

Mhé Wuí É Shô

1 Ngá é gumang wuí ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é đông jéyang doqdân é hui zo râ nghut lhê. 2 Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkgang é sù nghut ri.

* 2:23 Apûn 15:6

3 Nga-nhúng myang lé nhutkyáng kyáng byi jâng, myang hau é gungdu gón lé, nga-nhúng ô nau é đông wó cháng nhang lhê.

4 Haú mai gotû, wuí-sanghpo pé lé wú wú keq, haú-í kê é sanghpo lé htan é laidûn èq mut é hui kôhang, sanghpo hkâng sù gi, gyai tiq é sanghpo shap èq za, yhang ô nau é đông, haú pé lé wó hkgang yu ri.

5 Haú eq rajung za, shô gi, tiq é gungsho za nghut kôhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. 6 Shô haú gi, myi eq wuí nyi ri. Nga-nhúng é gungsho má, shô haú gi, agè ashop é mingkan dut lò mù, nga-nhúng é gungsho asak lé achâq achyut dut nhâng luí, gungsho asak lé nyhê tuq kat ri. Haú gi, ngaraí myí èq nyhê tuq kat é nghut bê.

7 Dusak ajung jung, nghoq ahú hú, myí má yê é jung eq wuí hkaú má nyi jung banshoq gi, wó mhê yu é jung chyat nghut mù, byu pé gi, haú pé lé mhê yu nyi akò.

8 Nghut kôhang, shô lé kúm gi, byù ó le a wó mhê yù kó nghut ri. Haú gi, apyí abat, agè ashop, uphkâng a wó é eq, shi é jung duq èq byíng tô é jung nghut nyi ri.

9 Nga-nhúng gi, shô hau èq nga-nhúng é Yhumsing eq Íwa Garai lé hkya-on nyi lhê; hau èq za, Garai Gasang é gunglhô đông hpan tô é waxâng zo wuí lé le nhîng pyâm nyi ri. 10 Nhut ralhum za mai, hkya-ôn é dang eq nhîng é dang htoq lo ri. Ngá é gumang wuí ê, haú su kut é gi, a gè. 11 Wuíbúm radong za mai, chuí nghâm é wuí eq hkô é wuí wó htoq râ lhú? 12 Ngá gumang wuí ê, maihpáng gâm mai tsanlun shi, tsibyiq nuí mai maihpáng shi, wó zui râ lhú? Haú eq rajung za, xô ngam é wuí gi, chuí nghâm é wuí lé wó lhoq htoq byi râ a nghut.

Ahtoq Mai Lo É Hpaqchyí

13 Nungmoq má, hpaqchyí byéng-yá bo é sù eq sê é dat é sù, ó nghut lhê lhú? Haú yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsing zui saí é ge é muzo đông tân shit nyí sháng gaq. 14 Nghut kôhang, nungmoq é myit má ladu lai é manon é i-myit eq,

lú lhum bat zik é i-myt bo é nghut le gi, hkâ-nghutbun kó, haû tengmán hkyô lé le hkâ-mhaû pyám kó. ¹⁵ Haû sù é hpaqchyî byéng-yá kúm gi, mauhkûng htoq mai gyó lo é hpaqchyî byéng-yá a nghut, haû gi, myigùng htoq mâ é, gungsho ô nau é eq, nat é hpaqchyî byéng-yá chyat nghut nyi ri. ¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agé ashop é mù ajung jung jup hkûm nyi ri.

¹⁷ Mauhkûng htoq mâ é hpaqchyî byéng-yá kúm gi, sâng-hi awang má sansêng nyi ri; hau htâng má gi, nguingón hkyô lé ô nau é, myit nùm é, jino gyô é, shogyo nhikmyin sê é eq ge é ashi zuî nyi mù luî, gamhkuí a bò, ahpuq alik a dut é eq, kut mhaú a sê é hpaqchyî byéng-yá nghut nyi ri. ¹⁸ Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yû kó râ nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

¹ Nungmoq má gyè dut lhûm é eq mabyoq jishûm gi, hkâmai htoq lo é lhú? Nungmoq ahkaû má gungsho ô nau é hkyô pé ngón hkyô hô mù, majan zân lhûm é yanmai, dut htoq lo é a nghut kó lhú?

² Nungmoq yut yut myit ô nau nyi kôlhang, haí le a wó yû kó. Nungmoq sat nyi é eq manon nyi kôlhang, a wó yû kó. Nungmoq byoq lhûm nyi é eq majan htoq lhûm nyi kôlhang, haí le a wó yû kó; hkâsu mù gâ le, nungmoq, Garai Gasang lé a dung kô é yanmai nghut ri. ³ Nungmoq dung kôlhang, a myang yù kó nghut ri; hkâsu mù gâ le, nungmoq é ngón kún hkyô má jai chûng langsâ pyám râ matú, shut é dông dúng nyi kô é yanmai nghut ri.

⁴ Su-myi sulàng lú é bang su gidíq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lhú? Haû mù luî, mingkan ô nau é hkyô eq buinùm dù naù sù ó nghut kôlhang, Garai Gasâng é gyè nghut nyi ri. ⁵ Dum ralhum, nga-nhúng má Garai Gasang kat lhûng tô é woi-nyí gi, manon é myit lúng nyi ri ga luî, Chyúmdang má taí

é gi, akôm nghut ri nghû, nungmoq myit ngam nyi akô lhú? ⁶ Nghut kôlhang, Yhang gi, je kô é jeju ru byí nyi lhê. Haû eq rajung za, Chyúmdang má,

"Garai Gasang gi, nghutbûn é bang lé hkûm zing pyám kôlhang, myit lhoq nyhum é bang lé jeju byí ri."*

ga taí tô ri.

⁷ Haû mù, Garai uphkan é a-ô má ru nyi nyi keq; Nat Tsadán lé hkûm tang pyám keq; haú hkûn, yhang nungmoq chyáng mai hpanq byuq râ nghut lhê. ⁸ Garai Gasâng chyáng huí ê keq, haú hkûn, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhum lé lhoq chyoi lhoq yúng to keq. Yudaq htûng dông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyám é lé gâ lhê. ⁹ Nungmoq gi, myit yón é, iyon yón é eq ngaubiyi ngau-nhap é kut nyí keq. Nungmoq é wuihâ é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq. ¹⁰ Haû Yhumsing Garaí é hí má i-myt lhoq nyhum nyi keq, haú hkûn, Yhang gi, nungmoq lé lhoq toq râ nghut lhê.

¹¹ Gumang wui ê, nungmoq yhangchang a ge é dông hkâtaí hpoi lhum kó. Yhumsing é yhanggu yhangmang lé a ge é dông taí hpoi nyi é sù, haû a nghut jáng, jéyáng é sù gi, haû tarâ lé a ge é dông taí hpoi nyi mù luî, jéyáng é sù nghut nyi ri. Haû tarâ lé náng jéyáng nyi é nghut le gi, tarâ lé châng é sù a nghut é za, tarâ jéyáng sù náng dut nyi ri. ¹² Garai Gasang za tarâ byí tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù náng gi, ó yuq wa nghut lhê lhú?

Gyáng Dang A Tai Râ Hkyô

¹³ "Ngamoq, hkû-nyí napmá ra-nyí nyí, wà rawà wà shut ê mù, haû má razàn kô é nyí luî, hpugá wuiloq gá mù amyat wó myang yù râ." ga taí nyi é bang ê, gyô wú keq. ¹⁴ Napmá haí dut lô râ lé lhang, nungmoq gi, a sé ko. Nungmoq é asak gi, haí nghut nyi lhê lhú? Haû gi, razup

* 4:6 Sânghkyang 3:34

rahtâng za htoq shit luî dum byuq byuq lô mù é, nghansoq eq rajung za nghut nyi ri. ¹⁵ Haû mù luî, nungmoq haû su ga taí nyi râ malaí gi, "Yhumsîng Garai đông é nghut le gi, ngamoq le ru wó dui nyi mù, shî le, mhô le, wó kut râ nghut lhê." nghû luî, wó taí râ nghut lhê. ¹⁶ Ahkuî kúm gi, nungmoq é gyáng é dang đông gumrong nyi akô; haû su gumrong é hkyô banshoq gi, agè ashop é jung chyat nghut nyi ri. ¹⁷ Haû mù luî, ge é mù sê kut to luî, a kut é sù gi, mara kut sù dut bê nghut ri.

5

Sùt Wó Bang Lé Sidiq Byî É Dang

¹ Sùt wó é bang ê, gyo keq, nungmoq chyáng jé lé lô râ é wuîhke jamjau hkyo é yanmai, ngau garû nyi keq. ² Nungmoq é sutzè gi, htên bup byuq bê nghut ri; nungmoq é wutbu wutmè le manot èq zô pyám bê nghut ri. ³ Nungmoq é hîng eq ngùn má lhang, jogyik zuî byuq mù luî, haû jogyik gi, nungmoq é mara hkyam shut saksé dut byî é eq, nungmoq é gungsho lé myi su zô pyám râ nghut lhê. Nungmoq gi, jihtûm buinyi shí pé má, sutzè lé za hkong to bekô hung! ⁴ Wú keq, nungmoq é yohtung dùng yò yam nhâng mù luî, ahpau a byî é za, nungmoq mhaû zô tô é ahpau pé garû nyi é htê pé eq, mù zui bang garû é htê pé lé gi, haû a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyi é eq, i-myt ô nau é đông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶ Haû dingmán é sù* lé, nungmoq mara hûn mù, sat pyám bekô. Yhang kúm gi, nungmoq lé a lhom hkâm zìng nghut ri.

Myit Hîng Hîng Hkam Jan Ra Râ Hkyô

⁷ Haû mù luî, gumang wuî ê, haû Yhumsîng dum jé lé é buinyi jé shoq myit hîng é èq lánng nyi keq ô! Hkyâm saí sù lé wú wú keq, yhang gi, myihpún mai ahpau dán é ashi lé wó yú shoq ga mau mún eq wò htáng htâng é mau wo gyûn é jé shoq myit hîng hîng lánng nyi ri. ⁸ Haû eq rajung za, nungmoq le, Yhumsîng Yesuq dum jé

lé râ gi, chyâng lo nyi bê nghut é yanmai, myit hîng é èq, i-myt lé lhoq ging lhoq tîng to keq. ⁹ Gumang wuî ê, nungmoq jéyáng a hui sháng gaq, nungmoq yhangchang hkânyung nyâng lhûm nyi ko. Wú keq, Tarâ agyi gi, hkúmdong má jé nyi to bê nghut ri.

¹⁰ Gumang wuî ê, haû Yhumsîng Garai é myîng eq hko kyô é myiqhtoí pé wuîhke jamjau huî é hkûn, jân pyâm é myit lé, nungmoq gi, ge é alik agàn kut yú keq. ¹¹ Wú keq, shikut shirang é bang lé, nganhung gi, hkungsô wó é bang nghu é nghut lhê. Yobaq hkâm jân é yanmai, Yhumsîng Garai gi, yhang lé htâng má myo myo dum shimân byî é hkyô lé, nungmoq wó gyô wú bê nghut lhê. Haû mù gâ le, haû Yhumsîng Garai gi, gyai shogyo nhikmyîn é sù nghut nyi ri.

¹² Ngá é gumang wuî ê, banshoq má ahkyak dik é gi, haû le le hkâdakâm kó. Mauhkûng lé a nghut jáng, myigùng lé lang luî le hkâdakâm kó. Dakam é dang gotû lé le hkâtaí nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, taí keq.

Lumjîng Myit Eq Kyûdung Râ Hkyô

¹³ Nungmoq má rayuq yuq wuîhke jamjau huî é nghut le gi, kyûdung nyi sháng gaq; rayuq yuq myit ngón nyi é nghut le gi, hkyâ-on mahkôn hkon nyi sháng gaq. ¹⁴ Nungmoq má rayuq yuq nõhpyo huî é nghut le gi, nõqkuq hpúng mâ é nhik bô suwún wuî lé ji yù mù, haû bang gi, Yhumsîng Yesuq é myîng mai yhang lé xû but byi luî, kyûdung byi kó sháng gaq. ¹⁵ Haû su mù, lumjîng myit èq kyûdung é dang gi, haû nõ sù lé lhoq gê luî, Yhumsîng Garai gi, haû yuq lé lhoq toq yú râ nghut lhê. Yhang gi, yubak mara kut shut é nghut kôlhang, hkyut pyám byî é hui râ nghut lhê. ¹⁶ Haû mù luî, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhûm nyi keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

* 5:6 Dingmán é sù gâ é danghkun lé, Chyûmlaiká ra-am má gi, dingmán é bang gâ ri.

¹⁷ Eliyaq gi, nga-nhúng su i-myt unghkaú bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê. ¹⁸ Kyû dum dúng kat jáng, mauhkûng gi, maú wo hkyô kat byi mù, myigùng gi, yhâng é kyô shi mui shi lé lhoq htoq byi wú bê nghut lhê.

¹⁹ Ngá é gumang wui ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taú lo é nghut le kúm gi, ²⁰ haû shuí taú yù sù gi, yubak mara kut é sù lé, shut shai é hkyô mai tengmán hkyô shut shuí taú yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuí nghop pyám byi é sù dut berâ lé, bûn nyi keq ô!

PETRUQ Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí eq hpyùn gyùn é hui* râ matú le, haù Woi-nyí é lhoq sân-yúng nyi é muzó dông mai, Íwa Garai Gasâng é hî te sê tô é hpaqchyí má cháng luí, hkyin yù huí é bang nghut é, ² Garai Gasâng eq hkyin htoq yù luí, mingkân é byùbìng dut bâng chyáng dang kyô kat lhê. Jeju eq ngingón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhùng é Yhumsing Yesuq Hkrisduq é Yhângwa nghut sù Garai Gasang chyáng nghut nyí sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyín é yanmai, nga-nhùng lé, asik hku é dum hui nhâng mù, rù dui nyi é myit myoqbyù hkyô lé wó nhang é htoq agó, ⁴ nungmoq é matú mauhkúng htoq má tô to byi bê nghut é, hkâ-nhám le, a hten a byoq é, agot a-ù a dut é, a hpoi byuq é muí lé le wó nhang é nghut lhê. ⁵ Nungmoq gi, lumjìng kô é yanmai, ló htâng é ahkyíng má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm eq upzúng é hui bang nghut akô. ⁶ Haù mù, nungmoq gi, ahkuí razup zo, wuìhke hkyô jungkang jungmó má yón hpuzô é hui kó râ nghut kôlhang, gyai yhang gabú nyí keq. ⁷ Wuìhke hkyô haù pé mai, nungmoq é lumjìng myit gi, jet é hkyô lé wó chyam htoq mù, myi mai jên yù kôlhang htên byoq sê é hìng htoq je gyaú luí, Yesuq Hkrisduq htoq shit é hkùn, hkya-on kungtôn hkyô, hpungwup shingkang eq aróng sitang lé, nungmoq wó kó râ nghut lhê. ⁸ Nungmoq gi, Yesuq lé a myang wú kôlhang, Yhang lé chyitdap bum akô; Ahkuí, nungmoq,

Yhang lé a myàng kôlhang, Yhang lé lumjìng kô é nghut mù, a ung htoq taí é eq hpungwup bo é gabú hkyô gi, nungmoq chyáng byíng jup nyi ri. ⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjìng myit é akyù lé wó yu nyi kô é nghut ri.

¹⁰ Hkyi yù hkyô haù eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sidiq myit eq jí jí chyun chyun ho gon wú bekô nghut ri.

¹¹ Yhangmoq gi, Hkrisduq wuìhke jamjau hui luí, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkùn, hkâ-nhám nghut râ eq hkasú é u má nghut râ hkyô lé ho gôn wú bekô nghut ri. ¹² Mauhkúng mai nhang kat é Chyoiyúng Woi-nyí eq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lhang gi, haù hkyô pé lé gyai wú nau bum akô nghut ri.

Chyoiyúng Nyi Râ Hkyô

¹³ Haù mù luí, zui saí râ matú nungmoq é i-myit lé hen to keq; yhumsing gùng yhumsing hkang nyi keq; Yesuq Hkrisduq htoq shit é hkùn, nungmoq lé byi râ nghut é jeju lé, hkyak za myit myoqbyu nyi keq.

¹⁴ Jìno gyô é zoshâng wuì su, myoq a bóng shí é pyat má nungmoq nyi tô é hkùn, nungmoq é agè ashop ô naù hkyô lé a châng kut é za, ¹⁵ haù nungmoq lé jì yu é Sù gi, chyoiyúng é su, nungmoq zui saí é hkyô banshoq má chyoiyúng nyí keq. ¹⁶ Hkâsu mù gâ le, "Ngò gi, chyoiyúng Sù nghut é yanmai, nungmoq le chyoiyúng nyí keq."* ga kâ tô ri.

¹⁷ Byù yuq hkangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbìng dông shí má nyi é u lé, Garai lé gyuq hkunggâ é myit mai asak dui keq. ¹⁸ Hkâsu mù gâ le, nungmoq gi, nungmoq é íchýí íwâ

* **1:1** Yhâng é suí eq hpyùn gyùn é hui gâ é gi, Yhâng é suí eq mara chí sân pyám byí é lé gâ lhê. ✧ **1:16** Nhong 11:44-45; 19:2; 20:7

pê chyáng mai bo gyó lo é hpau a dap é asak ðui hkyô mai, htên byoq sê é ngùn, hing èq hkyi yù huí é a nghut é za, ¹⁹ gumjup é eq mara a bo é sauzo nghut sù, Hkrisduq é hpaû dik é suí èq sheq hkyi yù huí é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bê nghut kôlhang, jiltûm ahkyíng shí pé má sheq, nungmoq é matú htoq shit nhang é hui bê nghut ri. ²¹ Yhang lé, shi é mai lhoq ðui toq yû mù, hpungwup shing kang bò nhang é Garai Gasang lé, nungmoq gi, Hkrisduq ðông mai lumjíng kô é nghut luí, nungmoq é lumjíng myit eq myit myoqbyù hkyô gi, Garai Gasang chyáng nghut nyí bekô nghut ri.

²² Ahkuí kúm, nungmoq gi, haû tengmán hkyô lé châng é ðông mai, yhumsing gùng yhumsíng lhoq sân-yúng yû bekô nghut mù, nungmoq é gumang wuì lé, lhumzuí é ðông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq. ²³ Hkâsu mù gâ le, nungmoq gi, htên byoq sê é amyui mai dum hkû huí é a nghut é za, Garai Gasang é, rû ðui nyi é eq ru gíng nyi é mungdang ðông, htên byoq a sê é amyui mai dum hku é hui bang ru nghut lhê. ²⁴ Hkâsu mù gâ le, "Byù lhunglhang bang gi, wàhu mhan eq pung ri, yhangmoq banshoq bâng é hpungwup shing kang gi, yò mã é banbó pé eq pung ri; wàhu mhan gi, nyhuí kyuq byuq luí, banbó pé gi, yoq gyó byuq lhê;

²⁵ nghut kôlhang, haû Yhumsing é mungdang gi, ahtum abyuq gíng nyi lhê."*
gâ tô ri. Haû gi, nungmoq lé hko kyo bê mungdang nghut lhê.

2

¹ Haû mù luí, i-myit ðu é hkyô banshoq eq mhaú zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkangmó pé lé tô pyám keq. ² Asik hku é zonú pé naú lé ô naù gadaú é su, woi-nyí eq sêng é jet é naú* lé ô naù gadaú nyí keq, haû jáng, nungmoq gi, hau

é yanmai, nungmoq é hkyi yù hkyô má wó kô myhâng kó râ nghut lhê. ³ Hkâsu mù gâ le, haû Yhumsing gi, gè sù nghut é lé, nungmoq chyam wú bekô nghut ri.

Rû Dui Nyi É Luqgok Eq Hkyin Yù Huí É Byù Myù

⁴ Byu pé mai hkyin htoq pyám kôlhang, Garai Gasang é matú hpaudap luí, Yhang èq hkyin yù huí é, rû ðui nyi é Luqgok nghut sù, haû Yhumsing chyáng nungmoq jé lé é hkûn, ⁵ nungmoq le, rû ðui nyi é luqgok pé su, woi-nyí eq sêng é yhûm† saí nyi é hui luí, Yesuq Hkrisduq ðông mai, Garai èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyú dut bekô nghut ri. ⁶ Hkâsu mù gâ le, Chyúmdang má,

"Wú keq, hkyin yù huí é eq hpaudap é htungchyûn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpû é hui râ a nghut."*

ga taí tô ri. ⁷ Haû mù, lumjíng bang nungmoq é matú gi, luqgok haû hpaudap é nghut lhê. Nghut kôlhang, a lumjíng bâng é matú gi,

"Haû yhûm saí bang hkyin htoq pyám é luqgok gi, htungchyûn mã é ahkyak dik é luqgok‡ dut bê nghut ri."*

ga le,

⁸ "Byu pé lé, htûng leng râ luqgok eq myit leqbat nhâng râ luq mó cham dut bê nghut ri."*

ga le, taí tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

⁹ Nghut kôlhang, nungmoq gi, mauchut hkaû mai Yhang é mauhpo maubó shut nungmoq lé wut htoq yû Su é mauhpo muzó lé wó taí pyô kó sháng gaq ga, hkyin yù huí é byuhú, hkohkâm hkyangjong amyú, chyoiyúng é byù myù, Garai Gasang eq sêng é byu pé nghut akô nghut ri.

¹⁰ Nungmoq gi, hí lé byù ra-myù a nghut wú kôlhang, ahkuí gi, Garai Gasang é byù

* 1:25 Esai 40:6-8 * 2:2 Woi-nyí eq sêng é jet é naú gâ é gi, Garai Gasang é mungdang lé taí é nghut lhê. † 2:5 Woi-nyí eq sêng é yhûm gâ é gi, noqkuq hpúng lé taí nau é nghut lhê. * 2:6 Esai 28:16 ‡ 2:7 Ahkyak é luqgok gâ é gi, Hkrisduq lé taí é nghut lhê. * 2:7 Hkya-on 118:22 * 2:8 Esai 8:14

myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

11 Chyitdap é luzúm wuî ê, nungmoq é asak woi-nyí lé majan zân nyi é, yubak mara byíng Jup é ô naù gadaú hkyô lé koi pyám keq nghû, gó ming byu pé eq byùbing pé dông mingkan htoq má nyi é bang nungmoq lé, ngò, wum taí tsuq kat lhê. 12 Haù a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng èq lé kùm é buinyi má Garai lé shigyaú kó sháng gaq, a lumjíng shí é byu pé é ahkaù má haù su ge é asak duì hkyô dông nyi yap keq.

Uphkâng Bang Eq Yhumsîng Wui É A-ô Má Nyi Râ Hkyô

13 Haù Yhumsîng é yanmai, byu pé mâ é ahko ahkáng wó bang banshoq é a-ô má nyi keq: kô dik é ahkáng ayá wó é hkosêng é a-ô má nghut kôle, 14 shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng èq nhang tô é mauzaú pé é a-ô má nghut kôle, nyi nyi keq. 15 Hkâsu mù gà le, ge é hkyô kut é dông, byù nâ pé é a sé a dat é dang lé nungmoq lhoq zîm pyâm é gi, Garai Gasang ô nau é hkyô nghut lhê. 16 Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkáchúng kó; Garai Gasâng é duì-nhâng zoshâng wuì dông nyi keq. 17 Yuq hkgangmó lé rago za hkunggâ é hkyô shit keq; lumjíng é gumang wuì lé chyitdap keq; Garai Gasang lé gyuq hkunggâ nyi keq; hkosêng lé hkungga keq.

18 Dui-nhâng zoshâng wuì ê, hkungga myit banshoq èq, nungmoq é yhumsîng wuì é a-ô má nyi keq; ge é eq nú-nhâm bâng é a-ô má za a nghut, byuwuì pé é a-ô má lé nyi keq. 19 Hkâsu mù gà le, byù rayuq gi, Garai Gasang lé bûn nyi sù nghut é yanmai, mara dông a nghut kôlhang, wuîhke jamjau huí é hkyô lé hpuzô é lé, jân pyâm é nghut le gi, hkya-on gíng é sù nghut lhê. 20 Nghut

kôlhang, nungmoq gi, mara kut shut é yanmai, nhuq bat é hkâm zo luí, haù lé jân nyi é nghut le gi, hai aróng wó kó râ lúhú? Nghut kôlhang, nungmoq gi, ge é hkyô kut luí, wuîhke huí zô é lé jân pyâm é nghut jáng, haù gi, Garai Gasâng hí má hkya-on gíng é hkyô nghut lhê. 21 Nungmoq gi, haù hkyô é matú ji yù huí é nghut lhê; haù mù gà le, Hkrisduq gi, nungmoq é matú wuîhke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyî-kám pé lé cháng râ dut lhê.

22 "Yhang gi, hai mara le a kut shut, Yhâng é nhut mai mhaù é lé a myàng."*

23 Yhang gi, rhoi é huí é hkûn, yhangmoq lé a dum taù rhoi; wuîhke hkyô huí é hkûn, kyuq é dang a taí. Haù kut râ malaí, tengmán é dông jéyáng é Su chyáng, Yhânggùng lé ap pyâm ri. 24 Nga-nhúng gi, yubak mara eq wó shi gang mù, dingmán hkyô é matú asak wó duì kó sháng gaq ga, Yhang gi, sik zîng má, Yhânggùng èq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dam pé é yanmai, nungmoq gi, lhoq gê byi é huí bekô nghut ri. 25 Hkâsu mù gà le, nungmoq gi, hkyô nghoq byuq é sau pé su dut wú kôlhang, ahkuí, nungmoq gi, haù sau zúng Sù eq nungmoq é asak woi-nyí lé upzúng Su chyáng lhing taù lò bekô nghut ri.

3

Ikun Myhî Pé Eq Ikun Hpô Pé

1 Ikun myhî pé ê, haù eq rajung za, yhum-sîng é ikun hpô uphkang é a-ô má nyi keq; haù hkûn, yhangmoq mâ é rayuq yuq, haù mungdang lé a lumjíng kôlhang, 2 yhumsîng é asak duì hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsîng myhî é nyi yap é sâmlai dông mai yhang lé wó lhoq lhik yû râ nghut lhê. 3 Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut é dông mai lo é a ge nghut. 4 Hau é malaí, haù gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoí é yúng hkyô nghut é nungmoq é i-myit unghkaù mâ é su é yúng hkyô sheq dut râ lhê. 5 Hkâsu

* 2:22 Esai 53:9

mù gâ le, gó hkûn, Garai Gasâng chyáng myit myoqbyù bang nghut é, chyoiyúng é myiwe wuì gi, yhangmoq gùng lé haù dông mhôn yù yù kut kô é nghut lhê. ⁶ Sarah gi, Abraham é jìno gyo luì, yhang lé yhâng é yhumsîng ga wut é su, yhangmoq gi, ó le ô é yhumsîng é ikun hpó uphkan é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haù eq rajung za, yhumsîng é ikun myhí eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haù hkûn, nungmoq é kyûdung dang lé a he-ngik pyám byi rá nghut lhê.

Ge É Kut Luì, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huì lhûm nyi keq; myit wú nô mù, gumang nhiktâng wuì su chyitdap lhûm nyi keq; shogyo nhikmyin myit bò luì, i-myit nyhum nyi keq. ⁹ Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haù mù gâ le, nungmoq gi, haù pé é matú, shimân jeju muì wó hkam yù kó sháng gaq ga, ji yu é hui kô é ru nghut lhê. ¹⁰ Hkâsu mù gâ le,

"Asak duì rá lé chyitdap é eq ge é buinyi pé lé myàng nau é sú ó yuq le, yhâng é shô lé, agè ashop é mai, yhâng é nhutwuì lé, mhaù dang taí é mai, lhoq kâng pyám ra rá nghut lhê.

¹¹ Yhang gi, agè ashop hkyô mai lhing tau mù, ge é kut rá rá nghut lhê; yhang gi, nguínón simsaq hkyô lé hô mù, châng hkat nyi rá rá nghut lhê.

¹² Hkâsu mù gâ le, haù Yhumsîng é myoqjí gi, dingmán bang lé wú nyi é nghut luì, yhangmoq é kyûdung dang lé, Yhâng é nohkyap èq gyo byi ri;

nghut kôhang, haù Yhumsîng é myoqdong gi, agè ashop hkyô kut bang lé gyê dông myang pyám ri."*

gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang rá lhú? ¹⁴ Nghut kôhang, dingmán hkyo é matú, nungmoq wuìhke jamjau huì le lháng, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dàn kó."* ¹⁵ Nungmoq kúm gi, myit nhiklum má, Hkrisduq lé, Yhumsîng dông jowò byi keq. Nang wó é myit myoqbyù hkyô lé myi é sú yuq hkanmó lé, haù mù wó é hkyô tú taí kyo rá matú, ayang hen to aq. Nghut kôhang, nú-nhâm é eq hkunggâ é dông haù lé kut nyi aq; ¹⁶ nungmoq é unghkaù myit san za dut nyi keq, haù hkûn, Hkrisduq dông mai nungmoq wó é ge é a-kyang lé rhoi dang taí é bang gi, yhangmoq lumù gansang é yanmai hoq hpû é hui kó rá nghut lhê. ¹⁷ Garai Gasang ô nau é nghut le gi, agè ashop kut luì jamjau hkâm rá htoq má, ge é kut luì jamjau hkam le gi, je ge é nghut lhê. ¹⁸ Hkâsu mù gâ le, nungmoq lé Garai Gasâng chyáng shuí jé shoq, Hkrisduq gi, byu pé é yubak marâ é yanmai, radâm za shí hkâm pyám bê nghut ri; haù gi, dingmán Sû, a dingmán bâng é matú shí hkâm byi é nghut lhê. Yhang gi, gungdu shí bê nghut kôhang, haù Woi-nyí má lhoq dui é hui bê nghut ri. ¹⁹ Yhang gi, Woi-nyí dông, htóng lúng tô é woi-nyí pé lé ê hko kyô ri. ²⁰ Woi-nyí haù pé gi, a-nham lé, Noaq é ipyat má wuì-sanghpo lé Noaq tsuq nyi é hkûn Garai Gasang myit hîng hîng lánng nyi é u lé, jìno a gyô é bang nghut akô. Wuì-sanghpo má wàng mù, wuì mai hkyi yù huì é byù shau luì, shit yuq za nghut akô. ²¹ Wuì haù gi, ahkuì nungmoq lé le hkyi yu é nghut é baptisma é azòng nghut ri; haù gi, gungdu mâ é agot a-û lé huì sêng pyám byi é a nghut é za, sansêng é unghkaù myit mai Garai Gasâng é hí má gidíq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luì, hkyi yu é hui kô é nghut lhê. ²² Yesuq Hkrisduq gi, mauhkûng má doq ló luì, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkan é a-ô má nghut nyi bum akô.

* 3:12 Hkya-on 34:12-16 * 3:14 Esai 8:12

4

Garai Gasâng É Matú Asak Dui Râ Hkyô

¹ Haû mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau èq yhumsing gùng má gyehking dông wut to keq, haí mù gâ le, yhâng é gungdu má hpuzo bê sù gi, mara eq gang bê nghut ri. ² Haû nghut é yanmai, yhang gi, yhang nyi tùm tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê. ³ Hkâsu mù gâ le, nungmoq gi, laí lò bê ahkyíng má, a lumjíng shí é byu pé hkyin kut nau é hkyô nghut é, shut é dông nyi zô lhúm nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achag achyut kut é hkyô, ye hai rá wut jung zoshuq lé yut yut ô nau é hkyô, achag achyut é hparà noq hkyô pé má, ahkyíng luq shoq nyi laí lò bê bang nghut akô. ⁴ Nungmoq gi, ladu lai shoq achag achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, máu byuq luí, nungmoq lé lumù gansang pyâm akô nghut ri. ⁵ Nghut kôlhang, yhangmoq gi, dui nyi é bang eq shí bê bang lé tarâ jéyáng rá rì rì nghut to Sù lé jihpán shit kyo ra kó rá nghut lhê. ⁶ Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haû gi, gungdu eq séng luí ga jang, yhangmoq gi, byù dông mai tarâ jéyáng é hui rá eq, woi-nyí eq séng luí ga jang, Garai Gasang dông mai asak wó dui rá matú nghut lhê.

⁷ Lhunglhang htum rá ahkyíng gi, chyáng bê nghut ri. Haû mù luí, nungmoq kyû wó dung kó sháng gaq, bûn gyíng luí, yhumsing gùng yhumsing hking nyi keq. ⁸ Banshoq htoq má ahkyak é gi, rayuq eq rayuq gyai yhang chyitdap lhúm é hkyô nghut lhê, haí mù gâ le, chyitdap myit gi, yubak mara myo myo lé wó nghop pyâm é nghut lhê. ⁹ Rayuq eq rayuq, taí nyung nyâng é hkyô a bo é za, rago hkulum lhum keq. ¹⁰ Yuq hkingmó gi, yhumsing wó hkam yù bê chyunghuq eq rajung za, góbang lé dojaú rá lhê; Garai Gasâng jeju

chyunghuq ajung jung lé, lhumzui é èq rago chung jaí rá lhê. ¹¹ Rayuq yuq taí é nghut jáng, Garai Gasâng é mungdang haû eq yhang rajung za taí ra rá nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú ra rá nghut lhê. Haû hpungwup shingking eq a-tsam gi, Yesuq Hkrisduq chyáng pyat dedu ah-tum abyuq joq nyi sháng gaq ô. Amen.

Hkristan Dut É Yanmai Jamjau Huí É Hkyô

¹² Chyitdap é luzúm wuí ê, wuíhke hkyô dông chyam é lé nungmoq hkâm zô nyi é hkûn, nungmoq chyáng máu nhô zâ é hkyô dut htoq bê dông, hkâgyuq dàn kó. ¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haû hkûn sheq, Yhang é hpungwup shingking eq rahá Yhang htoq shit é hkûn, nungmoq gi, gabú dik é hui kó rá nghut lhê. ¹⁴ Hkrisduq é myíng yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gâ le, hpungwup shingking bo é Woi-nyí nghu é, Garai Gasâng é Woi-nyí gi, nungmoq chyáng nyi nyi ri. ¹⁵ Nungmoq mâ é rayuq yuq jamjau huí é nghut le gi, byù sat sù, hkau sù, gotú agè ashop kut sù, góbâng é mú má cháng gunjang sù dông jamjau huí é a dut sháng gaq. ¹⁶ Nghut kôlhang, Hkristan rayuq dông nungmoq jamjau huí é nghut le gi, hkâhoq nyi kó, Garai Gasang lé kúm gi, myíng hau é yanmai hkya-ôn nyi keq. ¹⁷ Hkâsu mù gâ le, tarâ jéyáng rá ahkyíng gi, jé bê nghut luí, Garai Gasâng é ikun byu pé mai hí rá nghut lhê; haû gi, nga-nhúng mai hí é nghut jáng, Garai Gasâng é gabú danglù lé a châng é bang gi, hkâsu wá dut lò rá nghut lhê lhú?

¹⁸ "Haû dingmán sù, hkyi yù hui rá wuí é nghut le gi, tarâ a hkunggâ é eq yubak dap é sù gi, hkâsu wá dut rá nghut lhê lhú?"*

gâ tô ri.

¹⁹ Haû nghut mù luí, Garai Gasang ô nau é dông jamjau huí é bang gi, yhumsing gùng

* 4:18 Sângkyang 11:31

lé, lhumzuí é Hpân Su chyáng ap byi mù, ge é lé xoq kut nyi ra râ nghut lhê.

5

Suwún Wuí Éq Zorâm Wuí

¹ Nungmoq mâ é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pé é saksé nghut sù eq lhoq htoq shit râ nghut é Yhâng é hpungwup shingkang lé bo hkâm râ nghut sù dông mai sang kat kôlé: ² Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang dông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsîng kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê. ³ Nungmoq é loq má ap byí to bê bang lé a up zô é za, yhangmoq é hí má alik dut nyí keq. ⁴ Haú jáng, Sau zúng Agyí mót† htoq shit é hkûn, nungmoq gi, hpungwup shingkang bo é, hkâ-nhám le a shum a byuq é janmaú lé myang hap yù kó râ nghut lhê.

⁵ Zorâm wuí ê, nungmoq le, nungmoq htoq ipyat ko bâng é a-ô má nyí keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyí keq, hkâsu mù gâ le, "Garai Gasang gi, nghutbûn é bang lé hkûm zing pyám kôlhang, myit lhoq nyhum é bang lé jeju byí ri."✱

ga tô ri. ⁶ Haú mù luí, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaú má, yhumsîng myit lé yhumsîng lhoq nyhum nyí keq. ⁷ Nungmoq é myit chiq hkyô banshoq lé, Yhâng htoq má dú kê pyâm to keq, haí mù gâ le, Yhang gi, nungmoq é matú chiq byí nyí sù nghut lhê.

⁸ Yhumsîng gùng lé yhumsîng hkâng mù, machya nyí keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri. ⁹ Yhang lé htuq htîng pyám mù, lumjîng myit má gingtîng nyí keq, haí mù gâ le, mingkan gón mâ é nungmoq

é gumang wuí le, rajung zâ é jamjau hkyô pé hui zô nyí kô é lé, nungmoq sê lhê.

¹⁰ Haú mù, jeju banshoq é Garai Gasang gi, Hkrisduq má ahtum abyuq joq nyí é Yhâng é hpungwup shingkâng matú nungmoq lé ji yù bê nghut luí, nungmoq razup zo jamjau huí é htâng má, Yhang yhang nungmoq lé gumjup nhâng mù, wum bô nhâng luí, ging ging tîng tîng dut nhâng râ nghut lhê. ¹¹ Haú hpungwup a-tsam banshoq gi, Yhâng chyáng pyat dedu ahtum abyuq rû joq nyí sháng gaq. Amen.

Ló Htâng É Shi-kyâm Dang

¹² Lhumzuí é gumang nghû ngò sôn yu é Sila èq garúm luí, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap ging nyí keq.

¹³ Babelon má nyí é, nungmoq eq rahá hkyin yù huí é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm kat ri. ¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyí é nungmoq banshoq bâng chyáng ru joq nyí sháng gaq ô.

* 5:2 Sau hpúng gâ é gi, lumjîng bang lé gâ lhê. † 5:4 Sau zúng Agyí mó gâ é gi, Hkrisduq lé gâ é nghut lhê. ✱ 5:5 Sânghkyang 3:34

PETRUQ Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhúng é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaù dik é lumjúng hkyô lé hap yù bê bâng chyáng dang kyô kat lhê.

² Garai Gasang eq nga-nhúng é Yhumsing Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyi sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô

³ Yhâng é hpungwup shingkang eq ge é hkyô dông nga-nhúng lé ji yù Sù lé nga-nhúng sê é dông mai, Garai Gasang é hpungwup a-tsam gi, asak duì hkyô eq tarâ hkungga hkyô é matú nga-nhúng râ é jung hkanmó lé byi bê nghut ri. ⁴ Haù pé dông mai, Yhang gi, Yhâng é kô dik, hpaù dik é danggididí pé nga-nhúng lé byi bê nghut ri; haù hkùn, nungmoq gi, haù danggididí pé dông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjúng hkyô má ge é hkyô lé jat yù keq; ge é hkyô má sumsé hpaqchyí lé, ⁶ sumsé hpaqchyí má yhumsing gùng yhumsing hkan é hkyô lé, yhumsing gùng yhumsing hkan é hkyô má jân shirang é hkyô lé, jân shirang é hkyô má tarâ hkunggá é hkyô lé, ⁷ tarâ hkunggá é hkyô má gumang chyitkâng myit lé, gumang chyitkâng myit má chyitdap myit lé, jat yù keq. ⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhúng é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut. ⁹ Nghut kôlháng, rayuq yuq gi, hau pé lé a wó é nghut jáng,

chyâng é lé za myang é eq myoqjit é sù nghut luí, lai lò bê yhâng é yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

¹⁰ Haù mù luí, ngá é gumang wui ê, nungmoq lé ji yu é hkyô eq hkyin yu é hkyô lé, je riyháng lhoq gíngtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut; ¹¹ hau htoq agó, nga-nhúng é Yhumsing eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

Chyúmdang Mâ É Myiqhtoi Dang

¹² Haù mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gíngtíng nyi kô é nghut kôlháng, ngò, nungmoq lé hkâ-nhám le hau pé lé ru lhoq pùn nyi râ nghut lhê. ¹³ Shí gungdu má ngò rû dui nyi nyi gi, nungmoq lé lhoq pùn kying byí le ge ri nghù, ngò wó myit ri; ¹⁴ haù mù gâ le, nga-nhúng é Yhumsing Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyám to râ nghut é lé sê lhê. ¹⁵ Ngò htoq ló byuq é htâng má, nungmoq, hkâ-nhám le haù pé lé ru wó bûn nyi râ lé myàng naù mù, ngò, wó dut é í shikut nyi râ nghut lhê.

¹⁶ Nga-nhúng é Yhumsing Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkùn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq èq myang é saksé pé nghut lhê. ¹⁷ Hkâsu mù gâ le, haù Kô Làm Hkikhkâm Hkyô é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."✧ ga taí é htê, Yhâng chyáng jé é hkùn, haù Íwa Garai Gasang chyáng má é aróng eq hpungwup shingkang lé Yhang wó hap yù bê nghut ri. ¹⁸ Ngamoq yhang, chyoiyúng bùm má Yhang eq rahá nyi tô é hkùn, htê haù mauhkung mai htoq lo é lé wó gyô é nghut lhê.

✧ 1:17 Mht 17:5; Mrk 9:7; Luk 9:35

¹⁹ Haû mù luî, myiqhtoî pê dang lé je lhoq ging bê hkyô, ngamoq wó é nghut lhê; haû mù, maubó lô luî, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoî dang haû lé, nungmoq gyo mù rago châng kut râ dut lhê. ²⁰ Banshoq htoq má, Chyúmdang mâ é myiqhtoî dang gi, haû myiqhtoî pé mai ó le ó lichyúm lhoq htoq yu é đông a nghut é lé, nungmoq sê to râ dut lhê. ²¹ Hkâsu mù gâ le, myiqhtoî dang gi, byù ô nau é đông hkâ-nhám lé a htoq wú é za, haû Chyoiyúng Woi-nyí eq shuí u huí é bang mai, Garai Gasâng chyáng mâ é dang taí é ru nghut lhê.

2

Sará Apyoq Pê É Hkyô

¹ Nghut kôlhang, myiqhtoî pyoq pé gi, Israelaq byù haû bâng é ahkaû má nyi wú bê nghut lhê, haû eq rajung za, nungmoq é ahkaû má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsing lé lháng he-ngik pyám kó râ nghut lhê. Haû mù, yhangmoq gi, yhum-sing gùng yhumsing byòdàn tung htên byoq hkyô jé nhâng bekô râ nghut lhê. ² Byù myo myo gi, haû bâng é ahoq ahî hkyô má cháng kó râ eq, tengmán hkyô lé taí hpoi pyám nhâng kó râ nghut lhê. ³ Sará apyoq haû bang gi, yhangmoq myoqnoq é hkyô má, yhangmoq kut htoq tô é mhô-myi đông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lháng to gù bê nghut é htoq agó, yhangmoq é htên byoq hkyô gi, yhup myhî tô nyi é a nghut.

⁴ Hkâsu mù gâ le, Garai Gasang gi, mara kut shut é maumâng pé lé lháng a ha bûn é za, ngaraí ming má hkyô pyám luî, tarâ jéyáng é hui râ hkûn jé shoq, yhangmoq lé tuq tuq chut é dong hkaû má kat tô é nghut lhê. ⁵ Yhang gi, tarâ a hkunggâ é byu pé lé dowuî tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é nghut ri; ⁶ Yhang gi, Sodom eq Gomoraq myuq lé, myi-mhop

dut shoq nyhê hkyô pyâm é đông mara dam byi luî, tarâ a hkungga bâng chyáng dut lò râ hkyô é azông kut tô é nghut ri; ⁷ nghut kôlhang, tarâ a chûng bâng é achâq achyut asak duì hkyô é yanmai myit wui myit hke huí é, haû dingmán sù Lot lé hkyi htoq yu é nghut ri; ⁸ (hkâsu mù gâ le, dingmán sù haû gi, nyi hkangmó yhangmoq ahkaû má nyi nyi é nghut luî, tarâ a chûng é muzó hkyô lé, yhang wó myâng wó gyô é yanmai, yhang é dingmán myit má gunjâng é hui sù nghut ri.) ⁹ Haû su nghut é nghut jáng, Yhumsing gi, tarâ hkunggâ é byu pé lé, wuîhke hkyô mai hkâsu kut hkyi htoq yû râ eq, a dingmán é bang lé, tarâ jéyáng é buinyi jé shoq, dam byi é hkyô lé xoq kut nyi é u má hkâsu kut zui zing to râ lé sê lhê. ¹⁰ Haû yubak gungshô é htên byoq sê é yut yut ô nau hkyô châng é eq ahko ahkáng lé wú tiq bâng chyáng, haû hkyô hkyak dut râ nghut lhê.

Byù haû bang gi, ngegáng-htu é eq nghutbûn é bang nghut kôluî, mauhkûng bang lé lumù gansâng râ lé a gyuq kó nghut ri; ¹¹ nghut kôlhang, maumang lagyô pé lháng gi, wum je bo é eq a-tsam je bo é nghut kôle, haû Yhumsing é hí má, haû mauhkûng bang lé mara hun é đông lumù gansâng hkyô a wám kut kó nghut ri. ¹² Nghut kôlhang, haû sará apyoq pé gi, yhumsing a sê gyô é hkyô pé lé rhoi dang taí akô. Yhangmoq gi, haû chyup yu é hui luî, lhoq htên pyâm é hui râ matú za hku lé lo é, nhik a bo é tân jung dusak đông nghut akô; dusak haû pé su, yhangmoq le, htên byoq byuq kó râ nghut lhê.

¹³ Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyi mó káng lé lháng gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poi kut kô é hkûn, mhaû é lé yhangmoq é ngón hkyô kut kômù, agè agáu é eq achâq achyut é bang nghut akô. ¹⁴ Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtîng é bang lé mhoq hpyoq yu akô; yhangmoq gi, myoqnoq é hkyô má kûng é bang nghut

kômù, nhing pyâm é hui bang nghut akô.

¹⁵ Yhangmoq gi, haû dîng é hkyô lé tô pyâm to kômù, Beora é yhangzo nghut é, agè ashop hkyo é ahpau lé chyitdap sù Balam é hkyô má châng yông wún bekô nghut ri.

¹⁶ Nghut kôlhang, Balam gi, yhang kut shut é hkyo é yanmai, logúng eq tân mhoqshit é hui ri; dang a dat nyo é logúng haû gi, byu é htê đông dang taí lò mù, myiqhtoî hpó a gyîng é hkyô lé hkûm tang pyâm ri.

¹⁷ Byù hau bang gi, wuî a bo é wuîhtung eq, laidûn eq mut tâng ló é nghansoq eq pûng kômù, yhangmoq é matú gi, tuq tuq chut é mauchut hkaû lé lajang to bê nghut ri. ¹⁸ Hkâsu mù gâ le, yhangmoq gi, asôm gyáng dang lé taí mù, yubak gungshô é yut yut ô nau é hkyô đông mai, haû shut shai é hkyô má asak dui nyi é mai asik za hfang htoq lo é bang lé, mhoq hpyoq yù akô nghut ri. ¹⁹ Yhangmoq gi, haû bang lé luthkyô byi râ gidîq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; haî mù gâ le, byù rayuq gi, yhumsîng lé hai eq up sing le, hai é jùn nghut lhê. ²⁰ Byu pé gi, nga-nhûng é Yhumsîng eq hkyi yù Sù nghut é Yesuq Hkrisduq lé sê é đông mai, mingkân é agè ashop hkyô mai wó hfang lut htoq bê nghut kôle, yhangmoq lé hau eq tuí yup tô é dum hui luî, ung pyâm é hui kô é nghut jáng, yhangmoq é matú, hí lhê htoq má je wuî byuq kó râ nghut lhê. ²¹ Haû dîngmân é hkyô lé yhangmoq sé luî, yhangmoq lé ap byi to bê nghut é chyoiyúng hkunmó lé tô pyâm to mù lhing taú ló byuq kô é htoq má, haû hkyô lé a sê é gi, yhangmoq é matú je gè kó râ nghut lhê. ²² "Hkui gi, yhang hpat tô é lé dum taû zô lhê." gâ é eq, "Waq gi, chî pyám byi é htâng, yhâng é galhu htum má dum taû lhû lhê."* gâ é sanghkyang gi, yhangmoq chyáng dik bê nghut ri.

3

Haû Yhumsîng Jé Lé Râ Buinyi

¹ Chyitdap é luzúm wuî ê, shî gi, nungmoq lé ngò í dá nghû râ dâm kâ byi kat é laiká nghut lhê. Laiká shî í lhum má, nungmoq é sansêng é i-myit lé lhoq toq râ matú taí pûn kat é laiká nghut lhê. ² Haû gi,

* 2:22 Sânghkyang 26:11

chyoiyúng myiqhtoî pé mai lai lò bê hkûn taí tô é dang pé eq, nga-nhûng é Yhumsîng eq hkyi yù Sù mai, nungmoq é lagyô pé đông byi to bê nghut é hkunmó lé, ngò, nungmoq lé bun nhâng nau luî nghut lhê.

³ Sâng-hi má, ló htâng é buinyi pé má yhumsîng é agè ashop ô nau hkyô má châng luî taí hpoi bang htoq lô râ nghut é lé, nungmoq sê gyô to ra râ nghut lhê. ⁴ Haû bang gi, "Dum jé lé râ' ga Yhang gidîq byi é gi, hkâmá lhú? Nga-nhûng é îchyî îwâ pé gi, shi byuq ló bekô nghut mù, jungkhàng jungmó gi, mau htoq xâng hkun mai dut é su roq dut nyi ri." ga taí kó râ nghut lhê.

⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkûng pé joq é eq, myigùng gi, wuî mai dut htoq nhâng mù, wuî đông hpan tô é hkyô lé, a sé gûn kut pyâm akô nghut ri. ⁶ Wuî hau eq sheq, haû hkun lhê é mingkan lé dowuî tîng mù, lhoq htên pyâm é nghut lhê. ⁷ Ahkui lhê é mauhkûng pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyi jé shoq, myi má nyhé râ matú, hkunmó hau eq Yhang hkong to bê nghut ri.

⁸ Nghut kôlhang, chyitdap é luzúm wuî ê, haû Yhumsîng é hí má, ra-nyî gi, zanwut rahkyîng đông, zanwut rahkyîng gi, ra-nyî đông nghut é hkyô shî lé, hkâtô-myhí kó. ⁹ Haû Yhumsîng gi, Yhâng é danggidîq lé hân a lhoq dik ga byù ra-am myit ngam pyâm é su, nyhâm é Sù a nghut. Yhang gi, ó yuq le htên byoq byuq râ lé a ô nau é yanmai, yuq hkanmó myit lhîng râ lé za ô nau mù, nungmoq lé myit hîng byi nyi é nghut lhê.

¹⁰ Nghut kôlhang, haû Yhumsîng é buinyi gi, hkau sù su a bûn nùng má jé râ nghut lhê. Haû buinyi má, mauhkûng pé gi, mying hum htê eq byuq byuq râ nghut lhê; duqbó-gûng pé gi, myi eq lhoq htên pyâm é hui luî, myigùng eq haû má é joq mijoq gi, nyé gyó byuq râ nghut lhê.

¹¹⁻¹² Joq mijoq gi, haû hkyô đông lhoq htên pyâm é hui râ nghut é yanmai, nungmoq gi, hkasû é byu pé dut ra râ lhú? Nungmoq gi, haû Garai Gasâng é buinyi lé ho nyi é eq buinyi haû hân za jé râ

lé ô nau nyi é hkûn, chyoiyúng é eq tarâ hkunggâ é asak duì hkyô dông nyi ra râ nghut lhê. Buinyi haû gi, mauhkûng pé lé, myi èq lhoq htên pyám luî, duqbó-gûng pé le, lûm nyé luî, nyé yui pyâm é buinyi dut râ nghut lhê. ¹³ Nghut kôlhang, nga-nhúng gi, Garaî é danggidiq nghut é, dingmán hkyô é yhûm, mauhkûng asik eq myigùng asik lé, myoqbyu nyi é bang nghut lhê.

¹⁴ Haû nghut mù luî, chyitdap é luzúm wuî ê, nungmoq gi, haû hkyô lé myoqbyu é bang nghut kô é yanmai, Yhang é hí má achayut a dut é eq mara hûn râ hkyô a bo é za, Yhang eq nguingón nyi râ hkyô lé gyai yhang shikut nyi keq. ¹⁵ Nganhûng é chyitdap gumang Poluq gi, yhang lé, Garai Gasang byi tô é hpaqchyî byéng-yá èq, nungmoq chyáng ká byi bê eq rajung za, nga-nhûng é Yhumsing é myit hîng hkyô gi, hkyi yù hkyô nghut é lé matsing to keq.

¹⁶ Poluq gi, yhang kâ é laiká pé banshoq má, haû hkyô pé eq séng luî rajung za kâ shit tô ri. Yhang é laiká hkaû pé má, ram gi, sê gyo wuî é hkyô pé bo é yanmai, a mhoq wú é bang eq a gingtîng é bang gi, gotû Chyúmdang pé lé lichyúm htaî lhik pyám kô é su, yhangmoq lichyúm htaî lhik pyám kômù, yhumsing htên byoq hkyô kut yu nyi akô nghut ri.

¹⁷ Haû mù luî, chyitdap é luzúm wuî ê, nungmoq gi, shí hkyô lé sê to gù nghut é yanmai, tarâ a chûng bâng é shut shaî hkyo èq nungmoq lé a wó shuî nghoq yû râ eq, nungmoq é gaû é jowò mai a wó byit gyó byuq sháng gaq, yhumsing gùng yhumsing upzúng nyi keq. ¹⁸ Nganhûng é Yhumsing eq hkyi yù Sû nghut é Yesuq Hkrisduq é jeju eq hpaqchyî hkyô má, nungmoq kô myhang lò kó sháng gaq. Hpungwup shîngkang gi, Yesuq Hkrisduq chyáng, ahkuî le, ahtum abyuq le, ru joq nyi sháng gaq ô! Amen.

YOHAN Hî Dàm Hun Kat é Laiká (1 John)

Asak Mungdang

¹ Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê. ² Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shit bê nghut é ahtum abyuq é asak haù lé nungmoq lé taí kyô lhê. ³ Ngamoq eq zùm yap é hkyô lé, nungmoq le wó sháng gaq nghú, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê. ⁴ Ngamoq é gabú hkyô byíng jup sháng gaq nghú, ngamoq gi, nungmoq lé shí hkyô ká byí kat lhê.

Maubó Hkaù Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê. ⁶ Nga-nhúng gi, Yhang eq zùm yap nyi lhê nghú taí kôlháng, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô dông asak a dui é bang nghut ri. ⁷ Nghut kôlháng, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sâng-yúng pyám byi râ nghut lhê.

⁸ Mara a bò nghú nga-nhúng taí é nghut le gi, yhumsing gùng yhumsing mhaù pyám luí, haù tengmán hkyô gi, nga-nhúng chyáng a bò nghut ri. ⁹ Nghut kôlháng, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng

é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sâng-yúng byi râ nghut lhê. ¹⁰ Nga-nhúng gi, mara a kut shut nghú taí é nghut jáng, nga-nhúng mai Yhang lé mhaù sù nghú chyô pyám é nghut luí, Yhâng é mungdang gi, nga-nhúng má a bò nghut ri.

2

Hkrisduq Gi, Nga-nhúng Lé Garúm Sù

¹ Ngò chyitdap é zo wuí ê, ngò gi, nungmoq mara a kut shut kó sháng gaq nghú, nungmoq lé shí hkyô ká byí kat lhê. Nghut kôlháng, rayuq yuq mara kut shut é nghut le gi, nga-nhúng é matú haù Íwâ chyáng bo taí xoq byí é, Yesuq Hkrisduq gâ é Dingmán Sù lé, nga-nhúng wó lhê. ² Yhang gi, nga-nhúng é yubak marâ é matú, shíhtaí gunglik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pê é yubak marâ é matú le nghut nyi ri.

³ Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri. ⁴ Byù rayuq yuq mai, "Ngò gi, Yhang lé rago sé lhê." ga taí kôlháng, Yhang hkyô tô é hkunmó lé a châng kut é nghut jáng, haù yuq gi, byù mhaù nghut luí, tengmán hkyô gi, yhang má a bò nghut ri. ⁵ Ó yuq nghut kôlháng, Garai Gasang é mungdang lé châng kut nyi é nghut jáng, Yhang lé chyitdap é myit gi, haù yuq má gè gè byíng jup bê nghut ri. ⁶ Yhang má asak dui nyi lhê ga taí é sù ó yuq nghut kôlháng, Yesuq kut bê eq rajung za, châng kut râ lhê. Haù hkùn sheq, nga-nhúng gi, Yhang má nghut nyi bê hkyô lé, wó sé lhê.

Hkunmó Asik

⁷ Chyitdap é luzúm wuí ê, ngò gi, nungmoq lé hkunmó asik ká byí kat é a nghut é za, haù sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut nyi ri. ⁸ Nghut kôlháng, ngò gi, nungmoq lé hkunmó asik ká byí kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haù mauchut gi, lai ló byuq luí, haù

tengmán é maubó gi, duq nyi gù bê nghut ri.

⁹ Ngò gi, maubó hkaû má nghut nyi lhê ga luí, yhumsing é gumang lé a jú é sù ó yuq nghut kôlhang, haû mauchut hkaû má ru nghut nyi ashí. ¹⁰ Yhumsing é gumang lé chyitdap é sù ó yuq nghut kôlhang, haû maubó má asak dui nyi é nghut mù luí, yhang má myit leqbat nhâng râ hkyô haí le a bò nghut ri. ¹¹ Nghut kôlhang, yhumsing é gumang lé a jú é sù kúm gi, haû mauchut hkaû má nghut nyi luí, haú má sô lhing jón wún ri; haû mauchut gi, yhang lé myoq lhoq chit to byí é yanmai, yhang gi, hká shut e ló nyi é hkyô lé a sé nghut ri.

¹² Chyitdap é zo wuí ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò kê kat é nghut lhê.

¹³ Íwâ pé ê, nungmoq gi, haû sâng-hi mai nyi é Sù lé sé bekô nghut é yanmai, nungmoq lé ngò kê kat é nghut lhê.

Zorâm wuí ê, nungmoq gi, haû agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Chyitdap é zo wuí ê, nungmoq gi, haû Íwâ lé sé bekô nghut é yanmai, nungmoq lé ngò kê kat é nghut lhê.

¹⁴ Íwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê.

Zorâm wuí ê, nungmoq gi, wum-o bo é eq, haû Garai Gasâng é mungdang nungmoq chyáng dui nyi é nghut mù, haû agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Mingkan Lé A Chyitdap Râ Hkyô

¹⁵ Mingkan eq mingkan htoq mâ é haí le lé, hkáchyitdap kó. Byù rayuq yuq, mingkan lé chyitdap é nghut le gi, haû Íwâ lé chyitdap é myit, yhâng chyáng a bò nghut ri.

¹⁶ Hkâsu mù gà le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haû gi, Íwâ chyáng mai htoq lo é a

nghut, haû mingkan mai htoq lo é ru nghut lhê. ¹⁷ Mingkan eq mingkan ô nau hkyô pé gi, laí ló byuq râ nghut lhê; nghut kôlhang, haû Garai Gasang ô nau é hkyô lé kut é sù gi, ahtum abyuq dui nyi râ nghut lhê.

Hkrisduq É Gye Pé

¹⁸ Chyitdap é zo wuí ê, shí gi, ló htâng é ahkyíng nghut bê; haû anti-hkrisduq* gi, lé lo nyi ri gà é lé, nungmoq wó gyô wú bê eq rajung za, ahkuí lhang, anti-hkrisduq myo myo gi, jé lé bekô nghut ri. Hau é yanmai, nga-nhung gi, ló htâng é ahkyíng nghut bê hkyô lé wó sé bê nghut ri. ¹⁹ Yhangmoq gi, nga-nhung é hpúng mai htoq ló byuq bê bang nghut kôle, gè gè ga jang, nga-nhung eq a sêng é bang nghut akô. Hkâsu mù gà le, nga-nhung eq sêng é nghut jáng, yhangmoq gi, nga-nhung eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhang nga-nhung eq a sêng é hkyô lé tún shit bê nghut ri.

²⁰ Nghut kôlhang, nungmoq gi, haû Chyoiyúng Sù mai xù but byí é hui† bekô nghut mù luí, nungmoq banshoq bang haû tengmán hkyô lé sé akô nghut ri. ²¹ Haû tengmán hkyô lé nungmoq a sé kôluí, nungmoq lé ngò kê kat é a nghut; haú hkyô lé nungmoq sé gù nghut luí le, haû mhaú é hkyô gi, tengmán hkyô mai lo é a nghut é lé nungmoq sé gù nghut luí le, nungmoq lé ngò kê kat é nghut lhê. ²² Mhaú é sù gi, ó yuq nghut lhê lú? Haû Yesuq gi, Hkrisduq a nghut ga he pyám é sù nghut ri. Haû Íwâ eq Yhangzo lé he-ngik é sù gi, anti-hkrisduq yhang nghut nyi ri. ²³ Haû Yhangzo lé he-ngik sù ó yuq nghut kôle, haû Íwâ lé sé sù a nghut. Haû Yhangzo lé hap yu é sù kúm gi, haû Íwâ lé le sé bê sù nghut lhê.

²⁴ Haû sâng-hi mai nungmoq wó gyô wú bê é hkyô pé lé, nungmoq i-myit má ru bo nyi keq. Haû nghut jáng, nungmoq gi, haû Yhangzo eq Íwâ chyáng nyi nyi râ nghut lhê. ²⁵ Haû gi, nga-nhung lé Yhang byí

* **2:18** Anti-hkrisduq nghú é lichyúm gi, Hkrisduq lé gyê kut é sù lé gà lhê † **2:20** Xù but byí é hui gà é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gà lhê.

tô é ahtum abyuq é asak wó yû râ gà é danggidiq nghut ri.

²⁶ Ngò gi, nungmoq lé hkyô shuí nghoq shikut nyi bâng é hkyô eq séng luí, nungmoq lé shí gû kê kat é nghut lhê.

²⁷ Nungmoq chyáng kúm gi, Yhâng chyáng mai xû but jeju lé nungmoq wó yù bekô nghut mù luí, mhoqshit râ góyuq a ra lo nghut ri. Nghut kôlhang, haû Yhâng é xû but jeju gi, hkyô hkangmó má nungmoq lé mhoqshit byi mù, haû gi, tengmán nyi é nghut luí, mhaû é hkyô haí le a bo é za, nungmoq lé mhoqshit byi nyi é eq rajung za, Yhâng chyáng nungmoq nyi nyi keq.

²⁸ Chyitdap é zo wuî ê, nga-nhúng gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

²⁹ Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sê akô nghut ri.

3

Garai Gasâng É Yhangzô Pé

¹ Nga-nhúng gi, haû Garai Gasâng é yhangzô pé ga wut râ hui bê nghut é yanmai, haû Íwâ é chyitdap myit gi, nga-nhúng ahtoq má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Mingkan gi, Yhang lé a sê é yanmai, nga-nhúng lé le a sé nghut ri.

² Chyitdap é luzúm wuî ê, ahkuî, nga-nhúng gi, Garai Gasâng é yhangzô pé nghut nyi to kôlhang, nga-nhúng hkâsu dut râ hkyô lé, a tûn shit shi nghut ri. Nghut kôlhang, Hkris-duq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sê lhê; hkâsu mù gà le, Yhang hkâsu nghut é hkyô lé roq yhang, nga-nhúng myàng râ nghut lhê. ³ Myit myoqbyù hkyô shí lé, Yhâng chyáng má wó tô é bang ó yuq nghut kôle, Yhang sân-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu laí é sù nghut ri; gè gè ga jang, mara gi, tarâ lu laí é hkyô nghut nyi ri. ⁵ Nghut kôlhang, Yhang gi, nga-nhúng é yubak mara

lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bò nghut ri. ⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wuî ê, nungmoq lé ó yuq eq le hkyô a shuí nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri. ⁸ Mara kut nyi é sù gi, nat Tsadán chyáng mâ é nghut nyi ri; hkâsu mù gà le, Tsadán haû gi, sâng-hi mai yhang mara kut nyi bê nghut ri. Haû Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê. ⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haû yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut. ¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum râ lhê gà é hkyô haû gi, sâng-hi mai nungmoq wó gyô yù bê danglù nghut ri.

¹² Haû agè ashop sù eq le sêng é, yhanggu lé sat pyâm é Ka-in su a ge kut. Yhang gi, haí mù luí yhanggu lé sat pyâm lhê lú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. ✧ ¹³ Ngá é gumang wuî ê, nungmoq lé mingkân eq a ngui a jú kut kôlhang, hkâmaú kó. ¹⁴ Nga-nhúng gi, nga-nhúng é gumang wuî lé chyitdap é yanmai, shi byuq é mai wó lut luí asak ðui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashí nghut ri. ¹⁵ Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq

chyáng nghut kôle, ahtum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhung é matú Yhang é asak byi pyám bê lé wú jáng, chyitdap myit hkasú é nghut é hkyô lé, nga-nhung wó sê ri. Nga-nhung le, gumang wui é matú, nga-nhung é asak lé byi pyám gíng ri. ¹⁷ Ó yuq nghut kôlhang, mingkan sutzè wó to luí, yhang gumang hpó asho awui dut nyi é lé myàng kôlhang, a shogyô yu é nghut jáng, haú Garai Gasang é chyitdap myit gi, yhang chyáng hkâsu wó bô rá lúh? ¹⁸ Chyitdap é zo wuí ê, nga-nhung gi, dang nhut shô mai za a nghut, muzó eq tengmán é đông le chyitdap nyi sháng. ¹⁹ Haú hkûn, nga-nhung gi, tengmán hkyô eq séng bê bang nghut é lé wó sê é eq, nga-nhung é i-myt mai nga-nhung lé mara hun lò hkangmó, Garai Gasang é hí má nga-nhung i-myt wó ngón nyi bê nghut ri. ²⁰ Hkâsu mù gâ le, Garai Gasang gi, nga-nhung myit é htoq má je kô é sù nghut mù, jung hkangmó lé sê nyi ri.

²¹ Chyitdap é luzúm wuí ê, nga-nhung é i-myt mai nga-nhung lé mara a hun é nghut le gi, Garai Gasang hí má nga-nhung gyuq kyúm rá hkyô a joq lo nghut ri. ²² Nga-nhung gi, Yhang hkyô tô é hkunmó pé lé châng kut é eq Yhang lé gabú nhang é hkyô haí lé le kut é yanmai, nga-nhung dúng é hkyô lhunglhang lé, Yhang chyáng mai wó yú rá nghut lhê. ²³ Yhang hkunmó hkyô tô é eq rajung za, Yhang zo Yesuq Hkrisduq é mying má lumjíng é eq, rayuq eq rayuq chyitdap lhúm é hkyô gi, Yhang hkyô tô é hkunmó yhang nghut bê. ²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haú bang chyáng dui nyi bê nghut ri. Yhang nga-nhung chyáng dui nyi bê hkyô lé, nga-nhung lé Yhang byi tô é Woi-nyí đông nga-nhung wó sê yu é nghut lhê.

4

Woi-nyí Pé Lé Gôn Wú Rá Hkyô

¹ Chyitdap é luzúm wuí ê, woi-nyí hkangmó lé hkálumjíng ko, woi-nyí haú pé gi, Garai Gasang chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan

htoq má jón wún bekô nghut ri. ² Garai Gasang é Woi-nyí lé nungmoq wó sê yú rá hkyô gi, shí đông nghut lhê: haú Yesuq Hkrisduq gi, gungsho đông jé lé bê ga, yín yu é woi-nyí hkangmó gi, Garai Gasang chyáng mâ é nghut lhê. ³ Nghut kôlhang, Yesuq Hkrisduq lé a yín yu é woi-nyí hkangmó gi, Garai Gasang chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wuí ê, nungmoq gi, Garai Gasang chyáng mâ é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sù gi, mingkan má nyi to su htoq je kô ri. ⁵ Yhangmoq gi, mingkan eq séng é bang nghut lhê mù luí, mingkan hkyam đông taí bum akô; mingkan zo wuí le yhangmoq é dang lé gyo byi akô nghut ri. ⁶ Nga-nhung gi, Garai Gasang eq séng é bang nghut lhê; Garai Gasang lé sê é sù ó yuq nghut kôle, nga-nhung é dang lé gyô ri; nghut kôlhang, Garai Gasang eq a séng é sù gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí ngoq é woi-nyí lé, nga-nhung sê gam hkoq yú bê nghut ri.

Garai Gasang Gi, Chyitdap Myit

⁷ Chyitdap é luzúm wuí ê, nga-nhung gi, rayuq eq rayuq chyitdap lhúm nyi sháng; hkâsu mù gâ le, chyitdap myit gi, Garai Gasang chyáng mâ é nghut ri. Chyitdap myit bô sù ó yuq nghut kôle, Garai Gasang chyáng mai hku kat é hui bê sù nghut luí, Garai Gasang lé sé sù nghut ri. ⁸ Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê. ⁹ Garai Gasang gi, Yhang Zô é yanmai nga-nhung asak wó duí sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhung lé, Yhang é chyitdap myit tân shit é hkyô nghut ri. ¹⁰ Nga-nhung gi, Garai Gasang lé chyitdap é a nghut, Garai Gasang sheq nga-nhung lé chyitdap luí, nga-nhung é yubak marâ é matú, shíhtái gunglik hkungga dut sháng gaq ga, Yhang

Zo lé nhang kat byî é nghut ri; haû gi, chyitdap myit yhang nghut bê. ¹¹ Chyitdap é luzúm wuî ê, Garai Gasang gi, nga-nhúng lé haû-í yhang chyitdap é nghut jáng, nga-nhúng le rayuq eq rayuq chyitdap lhum râ dut lhê. ¹² Garai Gasang lé ó yuq eq le, hkâ-nhám lháng myang wú é a nghut; nghut kôlhang, nga-nhúng rayuq eq rayuq chyitdap lhum nyi é nghut jáng, Garai Gasang gi, nga-nhúng má nyi nyi bê nghut luî, Yhâng é chyitdap myit gi, nga-nhúng má gumjup râ nghut lhê.

¹³ Garai Gasang gi, nga-nhúng lé, Yhâng é Woi-nyí byî to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri. ¹⁴ Haû Íwa gi, Yhang Zo lé mingkân é hkyi yù Sû dut sháng gaq ga nhang kat é hkyô lé, ngamoq myàng luî, saksé hkâm lhê. ¹⁵ Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luî, yhang le Garai Gasâng chyáng dui nyi bê nghut ri. ¹⁶ Nga-nhúng gi, Garai Gasâng eq nga-nhúng lé chyitdap é hkyô lé, sé luî lumjúng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut luî, Garai Gasang le haû yuq má nyi nyi bê nghut ri. ¹⁷ Haû dông mai, chyitdap myit gi, nga-nhúng chyáng gumjup bê nghut luî, nga-nhúng gi, tarâ jéyáng é buinyi má a gyuq a kyum é myit wó yú râ nghut lhê; hkâsu mù gâ le, nga-nhúng gi, mingkan shí má Yhang su dut nyi bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byî é hkyô eq sêng é nghut mù luî, gumjup é chyitdap myit gi, gyuq é hkyô lé hkat htoq pyâm ri. Haû gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê. ²⁰ Byù rayuq yuq gi, "Ngò, Garai Gasang lé chyitdap lhê." ga taí kôlhang, yhâng é gumang lé a jú é nghut jáng, haû yuq gi, byù mhaû rayuq nghut ri; hkâsu

mù gâ le, yhumsing byu-myang é gumang lé lháng a chyitdap é sù gi, a byu-myang é Garai Gasang lé wó chyitdap râ a nghut. ²¹ Garai Gasang lé chyitdap é sù ó yuq le, yhumsing gumang lé le chyitdap râ lhê gâ é dang haû gi, nga-nhúng é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjúng Hkyô

¹ Yesuq gi, haû Hkrisduq nghut ri ga lumjúng é sù ó yuq nghut kôle, Garai Gasâng chyáng mai hku kat bê sù nghut ri; íwa lé chyitdap é sù ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sê yu é yanmai, ³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut. ⁴ Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhúng é lumjúng myit gi, mingkan lé nga-nhúng ung pyâm é ong-dang hkyô nghut ri. ⁵ Yesuq gi, Garai Gasâng é Yhangzo nghut é lé lumjúng é sù mai lai luî, mingkan lé wó ung pyâm é sù gi, ó yuq wá nghut lhê lú?

⁶ Haû yuq gi, wuî eq sui* mai lé é sù, Yesuq Hkrisduq yhang nghut nyi ri. Yhang gi, wuî mai za lé é a nghut, wuî mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byî ri. ⁷ Hkâsu mù gâ le, Woi-nyí le, wuî le, sui le, haû sùm lhum é saksé hkâm akô nghut ri; ⁸ haû sùm lhum gi, rajung za nghut akô. ⁹ Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi, haû htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byî é yanmai nghut ri. ¹⁰ Garai Gasâng é Yhangzo lé lumjúng é sù gi, saksé haû lé yhâng é i-myit má wó bê nghut ri; Garai Gasang lé a lumjúng é

* 5:6 Wuî eq sui nghu é gi, Yesuq baptisma hkam yu é hkyô eq shí hkâm é hkyô lé taí nau é nghut ri.

sû kúm gi, Yhang lé byù mhaú rayuq ga chyo pyâm bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjîng é yanmai nghut ri. ¹¹ Nga-nhúng lé, Garai Gasang byî é ahtum abyuq é asak gi, saksé haû nghut nyi ri. Asak haû gi, Yhang Zô chyáng bo ri. ¹² Garai Gasâng é Yhangzo lé wó sù gi, asak haû lé wó bê; Yhang Zo lé a wó sù gi, asak haû lé le a wó nghut ri.

Ahtum Abyuq Asak

¹³ Garai Gasang é Yhangzô é myîng lé lumjîng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghû, shî hkyô pé lé ngò ká byî kat é nghut lhê. ¹⁴ Nga-nhúng haî dîng le le, Garai Gasang ô nau é dông nghut jáng gi, Yhang gyo byi râ nghut lhê; haû gi, Yhâng é hí má nga-nhúng a gyuq a kyum wó wâng râ matú nghut ri. ¹⁵ Haû mù, nga-nhúng haî dung kôlhang, Yhang gyo byî é lé nga-nhúng sê é nghut le gi, Yhâng chyáng nga-nhúng dîng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhumsing é gumang hpó mai shî a gîng é mara kut shut é lé, myang é nghut le gi, haû yuq é matú kyûdung byi râ lhê. Haû hkûn, Garai Gasang gi, haû yuq lé asak byi râ nghut lhê. Haû gi, shî a gîng é mara wó bâng é matú taî é nghut lhê. Shî gîng é mara le joq lhê; nghut kôlhang, hau é matú dung râ lhê nghû, ngò taî nyi é a nghut. ¹⁷ A dingmán é hkyô lhunglhang gi, mara nghut lhê; nghut kôlhang, shî a gîng é mara le joq lhê.

¹⁸ Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haû Garai Gasâng é Yhangzo gi, haû yuq lé wú zúng nyi é nghut mù luî, haû agè ashop sù gi, haû yuq lé wó záng htung râ a nghut. ¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haû agè ashop su eq up tô é hkyô lé le, sê lhê. ²⁰ Hau htoq agó, Garai Gasâng é Yhangzo jé lé luî, haû tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyî bê eq rajung

za, haû tengmán Sù má le nyi nyi bê nghut lhê. Yhang gi, haû tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wuî ê, hparà lhó pé lé koi pyâm nyi keq.

YOHAN Htang Dàm Hun Kat é Laiká (2 John)

¹ Ngò suwún hpó gi, tengmán hkyô má ngò chytđap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí, ² nga-nhúng eq ahtum abyuq ru joq nyí râ nghut é tengmán hkyô é yanmai, haú tengmán hkyô lé sê é lhunglhang bang le, nungmoq lé chytđap nyi lhê.

³ Haú Íwa Garai Gasang eq Íwâ é Yhangzo Yesuq Hkrisduq chyáng mâ é jeju, shogyo nhikmyin hkyô eq nguingón hkyô gi, haú tengmán hkyô eq chytđap hkyô má, nga-nhúng eq rahá joq nyi sháng gaq.

⁴ Haú Íwa mai nga-nhúng lé hkunmó hkyô tô é eq rajung za, nung zô pé ram gi, haú tengmán hkyô má châng nyi é hkyô lé, ngò wó sê é yanmai, gyai yhang gabú nyi lhê. ⁵ Chytđap é hpô-myhí ê, nga-nhúng rayuq eq rayuq chytđap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhum a nghut. ⁶ Yhang hkyô tô é hkunmó eq rajung za, nga-nhúng châng kut é nghut jáng gi, chytđap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chytđap myit bo nyi râ matú nghut lhê.

⁷ Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haú sù é byù gi, haú mhaú zo sù eq anti-hkrisduq dut râ nghut lhê. ⁸ Nungmoq zui saí bê muzó é akyû lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhumsing gùng sidiq nyi keq. ⁹ Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri. ¹⁰ Mhoqshit é dang haú lé a wun é byù

rayuq yuq, nungmoq chyáng jé lé é nghut le gi, haú yuq lé nungmoq é yhúmhmaú má hkâwâng nhâng kó; yhang lé hkâlhom xoq yù kó. ¹¹ Hkâsu mù gâ le, haú yuq lé lhom xoq yu é sù gi, yhâng é agè ashop é muzó má lóm bê sù nghut ri.

¹² Ngò gi, nungmoq lé ká byí kat râ hkyô myo joq kôlhang, laiká hkyap eq kajung-chi lé a kâm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum râ lé myit myoqbyu nyi lhê.

¹³ Hkyin yù huí é náng nhâ é yhangzô pé gi, nang lé shi-kyâm kat akô nghut ri.

YOHAN Súm Dam Dám Hun Kat é Laiká (3 John)

¹ Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

² Chyitdap é luzúm hpó ê, ngò gi, haù náng é asak woi-nyí nyi-ngón yuqyo nyi é eq rajung za, nàng nguingón wángzán râ eq hkyô hkat hkangmó má, nyi-ngón yuqyo nyi sháng gaq nghû, kyûdung byi kat lhê.

³ Hkâsu mù gâ le, ngò gi, gumang wui ram, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai nghut lhê. ⁴ Haù tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotú gabú hkyô a wó lo nghut ri.

⁵ Chyitdap é luzúm hpó ê, haù gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri. ⁶ Yhangmoq gi, haù noqkuq hpúng má é bang lé, náng é chyitdap myit eq séng luí taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm luí, dé kat é nghut jáng, ge é muzó jizó kut é nghut bê. ⁷ Hkâsu mù gâ le, yhangmoq gi, Hkrisduq é myìng hau é matú htoq ló kôluí, a lumjìng bâng chyáng mai haí lháng a hap yù kó nghut ri. ⁸ Haù mù luí, nga-nhúng gi, haù tengmán hkyô é matú rahá za wó chôm zui saí sháng gaq, haù sù é byu pé lé lhom hkûlum yù râ lhê.

⁹ Ngò gi, haù noqkuq hpúng lé laiká ká byi kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù nghut ri. ¹⁰ Haù mù luí, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyi kyo râ nghut lhê; yhang gi, haù hkyô lé myit a dik shi é nghut mù luí, yhang yhang le gumang wui lé a lhom hkûlum yù, lhom hkûlum yù naù bang lé le, yhang mai hkûm

zing pyám luí, yhangmoq lé haù noqkuq hpúng mai hkat htoq pyâm ri.

¹¹ Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasang lé a myàng shi é sù nghut ri.

¹² Demetri ge é hkyô lé, yuq hkangmó mai le, haù tengmán hkyô eq le, saksé hkám byi akô nghut ri; ngamoq le, yhang ge é hkyô lé saksé hkám byi lhê; haù ngamoq hkâm é saksé gi, têng é hkyô nghut é lé, nàng sê lhê.

¹³ Ngò gi, nang lé kâ kat ra hkyô myo myo joq kôlhang, kâjung eq kâjung-chi dông a kâ kat naù lo. ¹⁴ Ngò gi, a myáng má, nàng eq myang huí lhum râ lé myit myoqbyu tô lhê. Haù hkûn sheq, ngá-nhik myoqdong hkyûm myang nyo lhum râ nghut lhê.

¹⁵ Nàng nguingón yuqyo nyi sháng gaq; shi má é luzúm wui gi, nang lé shi-kyâm kat akô nghut ri. Nàng le, haù má é luzúm wui lé, myìng du htau luí bo shi-kyám byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng eq ji yù mù, chyitdap é hui luí, Yesuq Hkrisduq eq upzúng é hui bâng chyáng dang kyô kat lhê.

² Shogyo nhikmyin hkyô, nuingón hkyô eq chyitdap hkyô gi, nungmoq chyáng agùn agó joq nyi sháng gaq ô!

Garai A Wó Bâng É Yubak Mara

³ Chyitdap é luzúm wuî ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjúng hkyo é matú nungmoq htuq htíng râ dut é lé, myit wum byi râ hkyô ká râ dut é lé, ngò byu-myang ri. ⁴ Hkâsu mù gâ le, haù mara dam byí é hui zo râ hkyô lé, a-nham pyat mai kê matsing tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo eq htaí lhik pyám kê é htoq agó, Yhang za nga-nhúng é Yhumsing nghut sù eq Ahko ahkáng lhunglháng wó sù, Yesuq Hkrisduq lé he-ngik pyâm akô nghut ri.

⁵ Nungmoq kúm gi, shí pé banshoq lé sê to gù nghut kôhang, ngò mai nungmoq lé taí pún nau é hkyô gi, a-ô mâ é pé nghut lhê: Haù gi, Yhumsing Garai mai, Yhâng é byu pé lé, Egotuq ming mai hkyi htoq yù kôhang, a lumjúng é bang lé gi, htâng má dum lhoq htên pyâm é nghut lhê. ⁶ Hau htoq agó, haù yhumsing é ayá lé tô pyám luí, yhumsing é nyi jowò lé pyâm tô é maumâng pé lé, Yhang gi, haù tarâ jéyáng é hui râ Buinyi mó jé shoq, ahtum abyuq é toqjâng tuí eq tui luí, mauchut hkaù má lhùng tô é nghut lhê. ⁷ Haù eq rajung za,

Sodom eq Gomoraq myuq eq hau é awui ayám mâ é wà pé mâ é bang gi, ashop é đông gungsho zùm yap é hkyô shut é eq myiwe yhangchang yuqgè yhangchang nyi zô lhùm é hkyô kut kê é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkung bang lé lumù gansang akô nghut ri. ⁹ Nghut kôhang, haù maumang lagyo agyi Mihkaelaq lháng gi, Mosheq é gùng eq séng luí, haù nat zau eq dang rhâng lhùm é hkùn, yhang lé rhoi é đông mara hùn dang a wám taí é za, "Nang lé, haù Yhumsing nhik-yo sháng gaq!" ga za taí ri. ¹⁰ Nghut kôhang, byù haù bang gi, yhangmoq a sê gyô é hkyô pé lé rhoi dang taí pyâm akô nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé má lháng, yhumsing gùng lé lhoq htên yu akô nghut ri.

¹¹ Yhangmoq gi, dingnyé wó râ! Hkâsu mù gâ le, yhangmoq gi, Ka-in* kut é agè ashop é hkyô đông cháng kê é yanmai le, akyù wó râ matú, Balam† shut é đông bo shut kê é yanmai le, Kora‡ é gumlau toq hkyô kut kômù, yhang su htên byoq byuq é hui kê é yanmai le nghut ri.

¹² Yhangmoq gi, nungmoq é chyitdap zoshuq poí má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kê é hkùn, yhumsing gùng lé za yhumsing lhoq gyi yu é sau zúng bang nghut akô; yhangmoq gi, lai eq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é sikgâm pé su nghut akô. ¹³ Yhangmoq gi, yhumsing é hoq jung lé, tsû-myup su htoq nhang é, haù wuimau mâ é kê é wuilhêng pé eq, tuq tuq chut é mauchut hkaù má tarâ jéyáng hui râ matú, ahtum abyuq tô to huí é, yông wún é kyí pé su nghut akô.

* **1:11** Ka-in gi, yhanggu lé sat sù nghut lhê. Apùn 4:1-8 † **1:11** Balam gi, myiqhtoi nghut lhê, nghut kôhang, ngunzè lé myoqnoq mù, Garai lé shut sù nghut lhê. Gyung So 22:1-35 ‡ **1:11** Kora gi, Garai byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

¹⁴ Byù haú bang eq séng luí, Adam mai byùxik nyhit xik má nyi é E nuk, myiqhtoi htoi tô é gi, "Wú keq, haú Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri. ¹⁵ Yhang gyó lé lo é gi, yuq hkangmó lé tarâ jéyáng râ matú eq, haú tarâ a hkunggâ é lhunglhâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htân pé banshoq lé le, mara byi râ matú nghut lhê." gâ ri. ¹⁶ Byù haú bang gi, put dang taí é bang eq mara hân dang taí é bang nghut akô; yhangmoq gi, yhumsing ô nau é agè ashop hkyô châng kô é htoq agó, yhumsing gùng yhumsing nghutbùn é dang taí é eq yhumsing maiwáng zat é dông, góbang lé owaq é bang nghut akô.

Hkam Jân Râ Hkyô

¹⁷ Nghut kôlhang, ngò chyitdap é luzúm wuê ê, nungmoq gi, haú nga-nhông é Yhumsing Yesuq Hkrisduq é lagyô pé mai te taí tô é dang lé, bân nyi keq. ¹⁸ Hkâsu mù gâ le, yhangmoq gi, "Haú ló htâng é ahkýing pé má, tarâ a hkunggâ é yhumsing ô nau é hkyô dông châng é, rhoijap-dap dang taí é byu pé nyi to râ nghut lhê." ga, nungmoq lé taí wú kô é nghut lhê. ¹⁹ Byù haú bang gi, nungmoq lé gam hkoq é bang, mingkan hkyô lé baú za châng é bang, haú Woi-nyí a bo é bang nghut akô.

²⁰ Nghut kôlhang, ngò chyitdap é luzúm wuê ê, nungmoq gi, haú Chyoiyúng Woi-nyí má kyûdúng é dông, nungmoq é chyoiyúng é lumjúng hkyô má, yhumsing gùng yhumsing lhoq kô yu nyi keq. ²¹ Ahtum abyuq é asak lé wó yú râ matú, haú nga-nhông é Yhumsing Yesuq Hkrisduq é shogyo nhikmyin hkyô lé lánq uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

²² Lumjúng hkyô má úng-âng é bang lé, shogyo nhikmyin nyi keq; ²³ góbang lé gi, myi mai she htoq yú mù, hkyi yú keq; dum, góbang lé gi, sidiq myit èq shogyo nhikmyin hkyô tân shit mù, haú gungshô é achag achyut dap é yhangmoq é mebu lé chaq nyí keq.

²⁴⁻²⁵ Nungmoq lé, a lingbat shoq wó upzúng luí, nungmoq lé, mara hân râ hkyô a bo é za, gabú dik é dông mai Yhang é hpungwup shingkang bo é myoq hí má wó shuí shit é, nga-nhông é hkyi yú Sú, rayuq za nghut é Garai Gasâng chyáng, hpungwup shingkang, hkikhkam hkyô, hpungwup a-tsam eq ahkáng ayá gi, nga-nhông é Yhumsing Yesuq Hkrisduq dông mai, laí lò bê ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

Hkya-on Kungtôn Dang

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shî gi, adé myáng má dut lò râ hkyô pé lé, Yhâng é dui-nhâng zoshâng wui lé tân shit nhâng râ matú, Garai Gasâng eq Yesuq Hkrisduq Yhang lé byî tô é nghut lhê. Yhang gi, Yhâng é maumang lagyo lé nhang kat lui, Yhâng é dui-nhâng zoshâng Yohan lé, shing-rán haû sé nhang ri. ² Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri. ³ Haû ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù lui, haû má kê tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyí chyáng mai le, ⁵ lhumzui é saksé nghut sù, shí byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai le, jeju eq nguóngón hkyô gi, nungmoq chyáng joq nyí sháng gaq.

Nga-nhúng lé chyitdap lui, Yhâng é suí eq, nga-nhúng lé, nga-nhùng é mara pé mai lhoq lhut byî é eq, ⁶ Yhâng é Garai Gasang eq Îwa lé dojaú râ matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shing kang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

* **1:6** Htoq Lô 19:6 † **1:7** Htau rot bang gâ é gi, Yesuq tapzîng má jén to huí é hkûn, Yhâng é namcham má lham eq htau é bang lé gâ lhê. ‡ **1:8** Alhpa eq Omega gi, Grik laiká myhí mâ é sâng-hî cham eq lô htâng cham nghut lhê; haû taí nau é gi, rû dui nyi sù gâ é nghut lhê. § **1:10** Yhumsing é Buinyi gâ é gi, yuban nyi lé gâ lhê.

⁷ Wú keq, Yhang gi, mhut mai lé lo nyi é nghut lui, myoqjí hkangmó gi, Yhang lé myàng kó râ nghut lhê; haû Yhang lé htau rot bang† lháng, myàng kó râ nghut lhê; haû myidàm htoq mâ é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haû đông nghut sháng gaq! Amen.

⁸ "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê." ga, haû Yhumsing Garai Gasang taí ri.

Byu Yhangzo Su Dut Su É Hkyô

⁹ Yesuq é, wuîhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê.

¹⁰ Haû Yhumsing é Buinyi§ má, ngò gi, Woi-nyí eq shuí moq byuq ló é nghut mù, "Nàng myang é eq rajung za, chyúmding ralhum má ká lui, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é, ¹¹ noqkuq hpúng nyhit lhum chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haû ngo lé nyo nyi é htê yhumsing lé wú râ matú, ngò, gùng lhing kat é nghut lhê. Ngò gi, gùng lhing kat é hkûn, hîng myi-kok tsungjang nyhit lhum lé le, ¹³ myi-kok tsungjang haû pé é agùng má, byu yhangzo su dut é Sù rayuq nyi tô é lé le, myang kat ri; haû yuq gi, hkyigoq htoq jé é buhîng wut to lui, wànggàng má hîng wànggò le wut tô ri.

¹⁴ Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjí gi, myishâm su duq nyi ri. ¹⁵ Yhâng é hkyí gi, myi bungghkyûng má jên yu é jet é gyi su dut ri; Yhâng é htê gi, wui myo myo mying hûm é htê su gâ ri. ¹⁶ Yhâng é loqyo loq má gi, kyí nyhit cham chung tô ri; Yhâng é nhut mai gi, shamsó í shut dap é shâm htoq lo ri.

Yhâng é myoqdong gi, htan dik é nyí gûng bui su tso nyi ri.

¹⁷ Yhang lé myang é hkûn, ngò gi, shí gùng su, Yhâng é hkyî wang má lêng leq tô é nghut lhê. Haú hkûn, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtûm nghut lhê. ¹⁸ Ngò gi, dui nyi Sû le nghut lhê; Ngò gi, shí bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq momîng é zoqshi pé lé chûng Su nghut lhê.

¹⁹ Haú mù, nàng myang é lé le, ahkui dut é hkyô eq htângnùng le dut lò rá hkyô lé le, kê to aq. ²⁰ Nàng myang é, Ngá é loqyo loq má é kyî nyhit cham eq hîng myi-kok tsungjang nyhit lhûm é zaú tô é hkyô é lichyúm gi, isu nghut lhê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lum gi, noqkuq hpúng nyhit lum nghut ri.

2

Ehpesu Myuq Mâ É Noqkuq Hpúng Lé Kâ Kat É Laiká

¹ Ehpesu myuq mâ é noqkuq hpúng é maumang lagyo lé isu nghû kê kat aq:

Haú yhâng é loqyo loq má kyî nyhit cham chûng luí, hîng myi-kok tsungjang nyhit lhûm é gyoro má sô nyi Su é dang gi, ² Ngò gi, nàng é a-kyang, nàng shikut é hkyô, nàng hkam jân é hkyô pé lé, sê lhê. Agé ashop é byu pé lé, nàng a jân pyâm é hkyô lé le, haú lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê. ³ Nàng gi, shikut shirâng bê nghut é htoq agó, Ngá myîng é yanmai, wuîhke hkyô lé hkam jan bê nghut kôle, nú byuq é hkyô a bò nghut ri.

⁴ Nghut kôlhang, nàng gi, nàng é sâng-hi lhê é chyitdap myit lé tô pyâm é yanmai, ngò, nang lé mara hûn rá hkyô joq ri. ⁵ Nàng hká mai byit gyó é lé, myit bun aq! Myit lhîng luí, sâng-hi nàng kut é muzó pé lé, kut aq. Nàng myit a lhîng é nghut jáng,

ngò, nàng chyáng lé jé mù, nàng é myi-kok tsungjang lé, hau é jowò mai huí pyám byi rá nghut lhê. ⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, nàng chyáng ge é hkyô ralhum bo ashí nghut ri.

⁷ Gyo rá nohkyap dap sù gi, haú Woinyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haú Garai Gasâng é hparadisu má joq é asak sîkgâm mâ é ashi zo rá ahkáng, Ngò byi rá nghut lhê.' gâ ri.

Samurna Myuq Mâ É Noqkuq Hpúng Lé Kâ Kat É Laiká

⁸ Samurna myuq mâ é noqkuq hpúng é maumang lagyo lé isu nghû kê kat aq:

Haú Sâng-hi eq Jihtûm nghut é eq, shi byuq luí, asak dum dui Su é dang gi, ⁹ 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lhê gâ é bang taí hpoí é hkyô lé le, Ngò sê lhê. ¹⁰ Nàng hui zo rá nghut é wuîhke hkyô lé, hkâgyuq. Ngò, nungmoq lé taí kyo kôlé, haú nat Tsadán gi, nungmoq lé chyam wú é dông, nungmoq chyáng mâ é ra-am lé, htóng má hkyô pyám rá nghut lhê; hau htâng, nungmoq gi, raxê nyi tup zing-rí é hui zo kó rá nghut lhê. Shí shoq lumzuí nyi aq, haú hkûn, Ngò, nang lé, asak janmaú byi rá nghut lhê.

¹¹ Gyo rá nohkyap dap sù gi, haú Woinyí mai noqkuq hpúng pé lé taí é hkyô lé, gyô yù sháng gaq. Í dâm nghû rá shi é hkyô* gi, wó ung é sù lé, wó záng htung rá a nghut.' gâ ri.

Pergamu Myuq Mâ É Noqkuq Hpúng Lé Kâ Kat É Laiká

¹² Pergamu myuq mâ é noqkuq hpúng é maumang lagyo lé isu nghû kê kat aq:

Haú shamsó í shut dap é shâm wó Su é dang gi, ¹³ 'Nàng nyi é jowò lé, Ngò sê lhê; haú gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myîng má lumhkau nyi é nghut

* **2:11** Í dâm nghû rá shi é hkyô gâ é gi, ngaraí ming wang é lé gâ lhê.

luí, Tsadán nyi é jang nghut é nungmoq é myuq má, Ngá é lhumzuí é saksé hpó Antipa sat huí é hkûn lhang, nàng Ngo lé lumjǐng é hkyô lé, a he-ngik pyám nghut ri.

¹⁴ Nghut kôlhang, Ngò, nang lé mara hûn râ hkyô ratsuí joq ashî; hkâsu mù gâ le, hparà lhô pé lé tǐng byî é zoshuq zô é eq, ashop é dōng gungsho zùm yap é mara kut shut râ matú, Israelaq byu pé lé mhoq hpyoq râ hpaqchyî, Balak lé mhoq byî é Balam é mhoqshit hkyô lé myhik zing é byu pé, náng chyáng nyi ri. ¹⁵ Haú eq rajung za, haú Nikola é chángzô pé mhoqshit é hkyô lé myhik zing é byu pé le, náng chyáng nyi ri. ¹⁶ Haú mù luí, myit lǐng aq! Haú a nghut jáng, Ngò gi, náng chyáng hân jé lé mù, haú Ngá nhut mai htoq é sham èq yhangmoq lé zan râ nghut lhê.

¹⁷ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myǐng asik kâ tô é luqgok hpyû racham lé le, Ngò byi râ nghut lhê, lhom hap yu é sù za sheq, myǐng haú lé sé râ nghut lhê.' gâ ri.

Htuatira Myuq Mã É Noqkuq Hpûng Lé Kâ Kat É Laiká

¹⁸ Htuatira myuq mã é noqkuq hpûng é maumang lagyo lé isu nghû kâ kat aq:

Haú myishâm su duq nyi é myoqjí eq jet é gyi su dut é hkyí dap é Sù, Garai Gasâng é Yhangzô é dang gi, ¹⁹ 'Náng é a-kyang, chyitdap myit, lumjǐng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui saí é hkyô lé le, Ngò sê lhê.

²⁰ Nghut kôlhang, yhumsing gùng yhumsing myiqhtoi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wui lé, ashop é dōng gungsho zùm yap râ eq hparà lhô pé lé tǐng byî é zoshuq zo râ hkyô lé mhoqshit luí, yhangmoq lé hkyô shuí nghoq ri. ²¹ Ngò gi, yhang lé, ashop é dōng gungsho zùm yap é hkyô mai myit

lǐng râ ahkyíng byi kôlhang, yhang gi, a myit lǐng nau nghut ri. ²² Haú mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lǐng kô é za a nghut jáng, wuǐhke jamjau mó hui zo nhâng râ nghut lhê. ²³ Ngò gi, yhang zô pé lé sat pyám râ nghut lhê; haú hkûn, Ngò gi, myit nhikhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi râ nghut é lé le, haú noqkuq hpûng pé banshoq wó sé kó râ nghut lhê. ²⁴ Mhoqshit hkyô haú lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotû wòlai Ngò jat byi râ a nghut. ²⁵ Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷ Wó ung é eq Ngò ô nau é hkyô lé jihtûm jé shoq châng é sù lé gi,

"Yhang gi, yhangmoq lé, shamtoq dumbáng èq up† râ nghut lhê; Yhang gi, tso-au hkoq pé lé su, yhangmoq lé bat hkyop pyám râ nghut lhê."[☆]

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. ²⁸ Ngò gi, yhang lé, haú bó-myhû byi râ nghut lhê. ²⁹ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

3

Sardi Myuq Mã É Noqkuq Hpûng Lé Kâ Kat É Laiká

¹ Sardi myuq mã é noqkuq hpûng é maumang lagyo lé isu nghû kâ kat aq:

Haú Garai Gasâng é woi-nyí nyhit woi-nyí eq kyí nyhit cham lé chûng Su é dang gi, 'Ngò gi, náng é a-kyang lé sê lhê; nàng gi, asak dui nyi sù ga kôlhang, shi byuq sù nghut ri. ² Gyǐng lò aq! Myit gyó tô é, shi byuq râ za nghut é pé lé, wum-o lhoq kǐng yù aq; hkâsu mù gâ le, Ngá é Garai

† 2:26-27 Shamtoq dumbáng èq up gâ é gi, ahko ahkáng banshoq wó luí, up é lé gâ lhê. ☆ 2:26-27 Hkya-on 2:9

Gasâng é hí má, náng é a-kyang a gumjup é hkyô lé, Ngò myang ri. ³ Haú mù, nàng hkâsu kut wó hap yu é eq wó gyô yu é hkyô lé, myit bun aq; haú đông cháng luí, myit lhing aq. Nàng a bûn gyîng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

⁴ Nghut kôlhang, Sardi myuq má, yhumsing é mebu lé agot a-û a kut é byù ra-am nyi akô. Haú bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô. ⁵ Wó ung é sù gi, haú bang su, hpyu é mebu myang wut râ nghut lhê. Ngò gi, haú yuq é myîng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyô pé é hí má le, haú yuq é myîng lé, Ngò yín yû râ nghut lhê. ⁶ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Hpiladehpi Myuq Mâ É Noqkuq Hpûng Lé Kâ Kat É Laiká

⁷ Hpiladehpi myuq mâ é noqkuq hpûng é maumang lagyo lé isu nghû kâ kat aq:

Haú chyoyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhí é Su é dang gi, ⁸ 'Nàng kut é muzó pé lé, Ngò sê lhê. Wú aq, ó yuq le a wó myhí é hkum ralhum, Ngò náng hí má hpông to byî lhê. Nàng gi, wum-o ratsuí za bò kôlhang, Ngá é dang gyo luí, Ngá é myîng lé a he-ngik pyâm é hkyô lé, Ngò sê lhê. ⁹ Haú tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gâ é byù mhaú pé lé, Ngò, náng é hkyí wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê. ¹⁰ Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yû râ nghut lhê.

¹¹ Ngò gi, a myáng má jé lé lô râ nghut lhê. Náng é janmaú lé, ó yuq èq le a wó yu pyám byi sháng gaq, nàng wó tô é pé lé myhik zing nyi aq. ¹² Wó ung é sù lé gi, Ngá é Garai Gasâng é noqkuq yhûm mâ é hkungzing mó dut nhâng râ nghut lhê. Haú yuq gi, hkâ-nhám le haú mai dum htoq ló râ a nghut. Ngò gi, Ngá é Garai Gasâng é myîng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myîng lé le, Ngá é myîng sik lé le, yhâng chyáng kâ tap byi râ nghut lhê. ¹³ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Ladoki Myuq Mâ É Noqkuq Hpûng Lé Kâ Kat É Laiká

¹⁴ Ladoki wà mó mâ é noqkuq hpûng é maumang lagyo lé isu nghû kâ kat aq:

Haú lhumzuí é eq tengmán é saksé nghut é, Garai Gasang hpan tô é lé up é, Amen gá Su é dang gi, ¹⁵ 'Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jáng gú, nye jáng jáng nye dut râ lé, Ngò ô nau ri. ¹⁶ Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê. ¹⁷ "Ngò gi, wó sù nghut lhê; ngò gi, sutzè gyai wó bê nghut luí, haí lháng a ra lo." ga nàng taí ri. Nghut kôlhang, nàng gi, wuîhke jamjau hui sù, asho awui dut sù, myùng sù, myoqjit sù eq achîn dut sù nghut é lé, nàng a sé myhi-nhung. ¹⁸ Haú mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyû lé le, nàng myoq wó myâng sháng gaq, náng é myoqjí má kat râ matú, myoq chi lé le, nàng, Ngá chyáng mai wui yù râ matú, Ngò, nang lé hpaqchyí byî lhê.

¹⁹ Ngò chyitdap é bang lé gi, tan luí, mhogshit lhê. Haú mù, nàng gi, hân bûn gyîng luí, myit lhing aq. ²⁰ Wú aq! Ngò gi, hkum yâm má yap tô luí, hkum lé kok nyi lhê. Rayuq yuq, Ngá é htê lé wó gyo

luí, hkum hpóng byí é nghut jáng, Ngò gi, wàng mù, haú yuq eq rahá zo shuq râ nghut lhê; haú yuq le, Ngò eq rahá zo shuq râ nghut lhê.

²¹ Ngò gi, ùng luí, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng râ ahkáng, Ngò byi râ nghut lhê. ²² Gyo râ nohkyap dap é sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ é nghut ri." gâ ri.

4

Mauhkûng Htoq Má Hkohkâm-tanghkuq Joq É Hkyô

¹ Hau htâng má, ngò wú kat le, mauhkûng má hkum ralhum bóng tô é lé myang ri. Ngò sâng-hî dàm wó gyô é tut htê su gâ é danghtê ngo lé taí é gi, "Shí má doq lò aq, htàngnùng má dut lò râ hkyô pé lé, Ngò, nang lé tûn shit bá." gâ ri. ² Haú hkûn jáng yhang, ngò gi, Woi-nyí má moq byuq ló luí, mauhkûng htoq má hkohkâm-tanghkuq ralhum joq é lé myàng ri; tanghkuq haú má, byù rayuq zung tô ri. ³ Haú má zung to Su é isâm gi, huhpé eq ne yúng lungsêng su dut ri. Huí nyuì lungsêng su dut é woq-gan síng-yang gi, haú hkohkâm-tanghkuq má hkông lhíng tô ri. ⁴ Hkohkâm-tanghkuq hau é lhíngkyuq má, hkohkâm-tanghkuq gotú í xe myí lhum le joq to luí, hpyu é mebu wut mù, ulhum má hîng janmaú tsûng tô é suwún í xe myi yuq gi, haú má zung tô bum akô. ⁵ Haú hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haú hkohkâm-tanghkuq hí má, myi-kok nyhit lhum le duq tô ri; haú pé gi, Garai Gasâng é woi-nyí nyhit woi-nyí nghut ri. ⁶ Hau htoq agó, san zâ é myoqjàm su dut mâ é wuì-nhông le, haú hkohkâm-tanghkuq hí má dítng tô ri.

Haú hkohkâm-tanghkuq agùng má le, lhíngkyuq má le, hî-u nunghtáng lhíngkyuq myoqjí dap é dui é dusak myí du nyi tô ri. ⁷ Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sùm du nghû râ dû é myoqdong gi, byu myoqdong su dut ri; myí du nghû râ du gi, dâng wún é zunbung su

dut ri. ⁸ Dui é dusak myí du haú gi, du hkangmó dùng hkyuq lhum lhum dap é htoq agó, lhíngkyuq má myoqjí kôm dap luí, dùng hkaú má lháng dap ri. Yhangmoq, nyí myín hkâ-nhám a no loshoq taí nyi kô é gi,

"A-nham pyat le, ahkuí pyat le, htang pyat má le, rû nyi nyi é, haú wum-o a-tsam dik shoq bò Sù Yhumsîng Garai Gasang gi,

chyoiyúng, chyoiyúng, chyoiyúng nyi ri." gâ akô. ⁹ Haú dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpung-wup shingkang, aróng eq jeju bun hkyô byí é hkangmó, ¹⁰ haú suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haú hkohkâm-tanghkuq hí má hkyut to mù, taí kô é gi,

¹¹ "Ngamoq é Yhumsîng eq Garai Gasang é, nyi mi-nyí, joq mijoq lé, Nàng hpan to bê nghut luí,

haú pé gi, Nàng ô nau é dông hpan tô é hui bê nghut mù, nyi to joq tô bùm bê nghut é yanmai,

Nàng gi, hpungwup shingkang, aróng eq hpungwup a-tsam lé, hap yù gíng Sù nghut ri."

gâ akô.

5

Chyúmding Eq Sauzo

¹ Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri. ² Hau htoq agó, a-tsam mó bo é maumang lagyo rayuq gi, "Haú dizik pé lé hí pyám râ eq chyúmding lé hpóng râ gi, ó yuq wá gíngdán lhê lú?" ga luí, htê mó èq wut taí nyi é lé le, ngò myang ri. ³ Nghut kôhang, mauhkûng htoq má le, myigùng htoq má le, myigùng ô má le, haú chyúmding lé wó hpóng râ eq ahkaú má wó wú râ byù rayuq lháng a nyi nghut ri. ⁴ Haú chyúmding lé hpóng mù, ahkaú má wú râ gíngdán é byù rayuq hkâlháng a nyi é yanmai, ngò gyai yhang ngau pyâm é

nghut lhê. ⁵ Haú hkûn, haú suwún wuî mã é rayuq, ngo lé taí é gi, "Hkâ-ngaû! Wú aq, haú Yudaq byuhú mã é Hkanghkyi nghu é, haú Dawiq é Amyit nghut Sû gi, ûng bê nghut luî, haú chyúmding eq haú mã é dizik nyhit lhum lé wó hpông lhê." gâ ri.

⁶ Hau htâng, haú dui é dusak myî du eq suwún wuî é agùng mã é, hkohkâm-tanghkuq agùng mã, sat hui bê su dut é Sauzo radu yap tô é lé, ngò myang ri. Sauzo haú gi, hkyuî nyhit lhum eq myoqjí nyhit lhum dap ri. Myoqjí haú nyhit lhum gi, myidàm htoq gón mã nhang htoq kat é, Garai Gasâng é woi-nyí nyhit woi-nyí nghut ri. ⁷ Haú Sauzo gi, lé mù, hkohkâm-tanghkuq mã zung to Su é loqyò mã é chyúmding lé yu ri. ⁸ Haú chyúmding lé yu é hkûn jâng, haú dui é dusak myî du eq suwún í xe myi yuq gi, Sauzô é hí mã ngóm gop akô. Yhangmoq yuq hkangmó gi, tíng eq sân-yúng bâng é kyûdung dang gâ é namngón jung byíng mui tô é hîng góm pé le chung bum akô nghut ri. ⁹ Yhangmoq gi,

"Nàng gi, haú chyúmding lé yù râ eq hau é dizik pé lé hpông râ gingdán Sû nghut ri.

Haí mù gâ le, Nàng gi, sat hui bê nghut luî, byuhú hkangmó mai le, myíng hkangmó mai le,

byù myû hkangmó mai le, mingdán hkangmó mai le, Garai Gasâng é matú,

Náng é suî eq byù pé lé wui hpyit yû bê nghut ri.

¹⁰ Nga-nhûng é Garai Gasang lé dojaú râ matú, Nàng gi, yhangmoq lé, mingdán byu pé eq hkyangjông pé dut nhâng bê nghut luî,

yhangmoq gi, myidàm htoq mã up kó râ nghut lhê."

ga luî, mahkôn sik ralhum hkon akô nghut ri.

¹¹ Haú hkûn, ngò wú kat le, haú hkohkâm-tanghkuq lhîngkyuq mã le, dui é dusak pé eq suwún wuî é lhîngkyuq mã le, nyi tô bum é maumang lagyo ajùm ayò mun mun sen sên é htê lé wó gyô ri.

¹² Yhangmoq gi,

"Haú sat hui bê Sauzo gi, hpungwup a-tsam, sutzè, hpaqchyî byéng-yá, wum-o, aróng sitang,

hpungwup shingkang eq hkya-on kungtôn hkyô lé, hap yù gíng ri."

ga luî, htê mó eq ton bum akô nghut ri.

¹³ Hau htoq agó, mauhkûng htoq mã nyi é, myigùng htoq mã nyi é, myigùng ô mã nyi é, wuiming mã nyi é, hpan to huí é lhunglháng gi,

"Hkya-on kungtôn hkyô, aróng sitang, hpungwup shingkang eq hpungwup a-tsam gi,

haú hkohkâm-tanghkuq mã zung tô é Sû eq Sauzô chyáng,

pyat dedu ahtum abyuq ru joq nyí sháng gaq ô!"

ga luî, ton yù bùm kô é lé, ngò wó gyô ri.

¹⁴ Haú dui é dusak myî du gi, "Amen" ga taí jang, haú suwún wuî gi, ngóm gop luî noqkuq akô nghut ri.

6

Dizik Nyhit Lhûm É Hkyô

¹ Haú Sauzo gi, dizik nyhit lhum mã é sânghî lhum lé hpông kat é hkûn, ngò myang é nghut lhê. Hau htâng, haú dui é dusak myî du mã é radu gi, maugum su gâ é htê mó eq, "Lé aq." gâ é lé, ngò wó gyô ri. ² Ngò wú kat é hkûn, ngá é myoq hí mã myang hpyû radu nyi tô é lé myang ri! Haú mã jî to sù gi, lai rahpu chung tô é htoq agó, yhang lé, janmaú ralhum tsûng to byî luî, ûng budang wó râ matú ûng sù rayuq dông htoq ló ri.

³ Haú Sauzo gi, í lhum nghû râ dizik lé hpông kat é hkûn, haú í du nghû râ dui é dusak gi, "Lé aq." ga taí é lé, ngò wó gyô ri. ⁴ Hau htâng, myang nè radu htoq lo ri; haú mã jî tô é sù gi, myidàm htoq mã é nguóngón simsaq hkyô lé wup yù râ eq, byù yhangchang rayuq eq rayuq sat lhum nhâng râ a-tsam byî é hui sù nghut luî, yhang lé shâm mó rahkyam le byî to bê nghut ri.

⁵ Haú Sauzo gi, sùm lhum nghû râ dizik lé hpông kat é hkûn, haú sùm du nghû râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí mã nyi tô é lé myang ri! Haú mã jî tô é

sû gi, yhâng é loq má jàng rahpu chung to ri. ⁶ Haú hkûn, "Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut lhê; haú tsanlun xû eq tsibiyiq wing lé kúm gi, hkâlhoq hten kó." gâ é htê, haú dui é dusak myí du hkaú mai htoq ló é su gâ é lé, ngò wó gyô ri.

⁷ Haú Sauzo gi, myí lhum nghû râ dizik lé hpông kat é hkûn, haú myí du nghû râ dui é dusak gi, "Lé aq." ga taí é lé, ngò wó gyô ri. ⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é mying gi, Shí hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsing hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri. ¹⁰ Yhangmoq gi, "Choyiýung é eq tengmán é, ahko ahkáng lhunglháng wó é Yhumsing ê, myidàm htoq má nyi é byu pé lé, ngamoq é sui manglat dam a byí é eq tarâ a jéyáng é za, hkâ-myháng jé shoq nyi nyi râ lhú?" ga, htê mó èq garu bum akô. ¹¹ Haú hkûn, yhangmoq yuq hkangmó gi, bu hpyû hîng radung dung hut é hui luí, yhangmoq su sat hui râ bang, yhangmoq é byinzùm dui-nhâng zoshâng wui nghut é gumang wui sat huí ngap é hkûn jé shoq, razup zim za nyi shi keq ga taí é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq èq woq é pán su noq byuq ri; haú lhamó lhum gón gi, sui su ne byuq ri; ¹³ maihpáng gâm lé, lai mó èq lo mut nhun kat é hkûn, a myhíng shí é maihpáng-shi yoq gyó é su, mauhkûng mâ é kyí pé gi, myidàm htoq má byit gyó lo bum ri. ¹⁴ Haú mauhkûng gi, laiká lé dîng lhûm é su htot pyám é hui luí, bùm hkang bùm mó eq zinlóng lhumjup pé gi, yhâng é jowò mai huí pyám é huí ri.

¹⁵ Haú hkûn, haú myidàm htoq mâ é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang, ¹⁶ haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq. ¹⁷ Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lhú?" ga garû taí bum akô nghut ri.

7

144,000 Yuq Masat Lhô Tap Hui Kô É Hkyô

¹ Hau htâng má, maumang lagyo myi yuq gi, maumyí myi chyûn má yap to mù, myigùng htoq má le, wui ming htoq má le, siggâm pé má le, lai a hik sháng gaq ga, myi shut mâ é lai lé zuí zing to kô é lé, ngò myang ri. ² Haú hkûn, haú dui nyi é Garai Gasâng é masat lhô chung é maumang lagyo gotû rayuq gi, buihotoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé, ³ "Nga-nhûng é Garai Gasâng dui-nhâng zoshâng wui é ngelang má, ngamoq mai masat lhô a tap byi byi gi, haú myigùng, wui ming eq siggâm pé lé hkâlhoq hten shí kó." ga htê mó èq wut taí kat ri. ⁴ Haú hkûn, masat lhô tap huí é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

⁵ Masat lhô tap huí yu é,
Yudaq up mâ é bang gi, 12,000 yuq,
Rubin up mâ é bang gi, 12,000 yuq,
Gat up mâ é bang gi, 12,000 yuq,
⁶ Ashe up mâ é bang gi, 12,000 yuq,
Nahtali up mâ é bang gi, 12,000 yuq,
Manase up mâ é bang gi, 12,000 yuq,
⁷ Simeon up mâ é bang gi, 12,000 yuq,
Lewiq up mâ é bang gi, 12,000 yuq,
Yishahka up mâ é bang gi, 12,000 yuq,
⁸ Zebulun up mâ é bang gi, 12,000 yuq,
Yosep up mâ é bang gi, 12,000 yuq,
Ben-yamyin up mâ é bang gi, 12,000 yuq,

nghut bum akô.

Bu Hpyû Hîng Wut Bâng É Hkyô

⁹ Hau htâng, ngò wú kat é hkûn, mingdán hkangmó mai le, byuhú hkangmó mai le, byù myû hkangmó mai le, myíng chângjup mai le, lé é bang, ó yuq lháng a ung nghap é byù moq mó gi, haû hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hîng wut luí, yhangmoq é loq má byùm-haq chung tô bùm kômù,

¹⁰ "Hkyi yù hkyô gi, haû hkohkâm-tanghkuq má zung tô é nga-nhûng é Garai Gasang eq Sauzo chyáng má é nghut ri ô!"

ga luí, htê mó èq garû bum akô nghut ri.

¹¹ Haû maumang lagyo lhunglhâng bang gi, haû hkohkâm-tanghkuq é lhîngkhyuq má le, suwún wuî eq dui é dusak myí du é lhîngkhyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹² "Amen! Hkya-on kungton hkyô eq hpungwup shingkang, hpaqchyî byéng-yá eq jeju bun hkyô, aróng, hpungwup a-tsam eq wum-o gi, nga-nhûng é Garai Gasâng chyáng pyat dedu ahtum abyuq ru joq nyí sháng gaq ô!

Amen!"

ga taí bum akô.

¹³ Haû hkûn, suwún wuî má é rayuq gi, "Shí bu hpyû hîng wut é bang gi, ô pé lhú? Yhangmoq gi, hkâmai lé é bang nghut akô lhú?" ga ngo lé myí ri.

¹⁴ Ngò gi, "Suwún hpó ê, nàng sê lhê." nghû tû taí jáng, yhang gi, "Shí bang gi, haû wuîhke jamjau mó mai wó lut htoq lô luí, yhangmoq é bu hîng lé, haû Sauzô é sui má chí hpyû yù bê bang nghut akô.

¹⁵ Haû mù, yhangmoq gi, Garai Gasâng é hkohkâm-tanghkuq hí má nyi mù, Yhâng é noqkuq yhûm má, nyí, myín Yhang lé dojaú nyí kô é nghut lhê; haû hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi râ* nghut lhê. ¹⁶ Yhangmoq gi, hkâ-nhám le,

zòmut wuîshit hui râ a nghut lo; buí lhap é le, hkyíng hkyíng nyé é le, yhangmoq lé wó záng râ a nghut. ¹⁷ Hkâsu mù gâ le, haû hkohkâm-tanghkuq agùng má é Sauzo gi, yhangmoq é sau-rém sù dut râ nghut luí, Yhang gi, yhangmoq lé, asak wuîbúm jé shoq shuí é râ nghut lhê. Hau htoq agó, Garai Gasang gi, yhangmoq é ngaubyí sháng shoq sut pyám byi râ nghut lhê." ga taí ri.

8

Nyhit Lhum Nghû Râ Dizik Eq Namngón Jung Nyhê É Hîng Góm

¹ Haû Sauzo gi, nyhit lhum nghû râ dizik lé hpông kat é hkûn, mauhkûng htoq má hkyíng hkum rawuí kô zím byuq ri.

² Haû hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byí tô ri.

³ Namngón jung nyhê é hîng góm chung é maumang lagyo gotû rayuq gi, haû hkungga gyap yám má lé yap tô ri. Haû hkohkâm-tanghkuq hí má é hîng hkungga gyap má, sân-yúng bang banshoq é kyûdung dang eq rahá nhông byi râ matú, namngón jung gyai myo shoq, yhang lé byí tô ri. ⁴ Haû namngón jûng é myihkau gi, sân-yúng bâng é kyûdung danghtê eq rahá, maumang lagyo haû yuq é loq mai Garai Gasâng chyáng hkyang rot ló bê nghut ri.

⁵ Hau htâng, maumang lagyo haû yuq gi, góm lé yù mù, hkungga gyap má é myi lhoq pyíng yù luí, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut râ hen akô nghut ri.

⁷ Sâng-hí yuq nghû râ maumang lagyo gi, yhâng é tut lé mut kat ri; haû hkûn, sui nyó é likwò eq myi htoq lô mù, haû lé myidàm htoq má lhoq hkyô kat jáng, maumyí sum tú má é ratú eq sîkgâm sum tú má é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

* **7:15** Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyi mù, yhangmoq lé upzúng nyí râ gâ é nghut lhê.

⁸Í yuq nghû râ maumang lagyo gi, yhâng é tut lé mut kat ri; haú hkûn, myi dap tô é bùm mó su é lé, wuìshuq lung-aû má dú hkyô kat ri. Wuìshuq lung-aû sum tú mâ é ratú gi, sui dut byuq bê nghut ri; ⁹wuìshuq lung-aû mâ é duì jung sum tú mâ é ratú gi, shi byuq luî, wuì-sanghpo pé sum tú mâ é ratú gi, htên byuq bê nghut ri.

¹⁰Sum yuq nghû râ maumang lagyo gi, yhâng é tut lé mut kat ri; haú hkûn, myihu dùm su duq é kyî mó racham gi, mauhkûng mai byit gyó lô mù, wuìlàng sum tú mâ é ratú eq wuìbúm pé htoq má lo gyó záng ri.

¹¹Kyî hau é myíng gi, Kyî Kyî Hko gà é nghut ri. Wuìlàng sum tú mâ é ratú hkô byuq luî, wuì haú hkô byuq é yanmai byù myo myo shi byuq bekô nghut ri.

¹²Myi yuq nghû râ maumang lagyo gi, yhâng é tut lé mut kat ri; haú hkûn, buì sum tú ratú, lhamó sum tú ratú, kyî sum tú ratú gi, hten luî, haú pé é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³Ngò wú nyi le, zunbung radu gi, maulat má dâng wún mù, "Gotû maumang lagyo sum yuq eq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luî, htê mó eq garû taí ri.

9

¹Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham lé, ngò myang ri. Haú nik dik htûm é Lasang-dông é zoqshi gi, kyî haú lé byi tô ri. ²Kyî haú gi, nik dik htûm é Lasang-dông lé hpông kat é hkûn, myi bunghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dông haú mâ é myihkau dum é yanmai, buì eq maulat gi, mauchut byuq bê nghut ri. ³Myihkau dùm haú mai dinggám pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byi to bê nghut ri. ⁴Myidàm htoq mâ é wàhu pé lé le, mhan-haq hpoqnoq pé lé le, siggâm pé

lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taí tô ri. ⁵Nghut kôlhâng, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shî-nò jamjau gi, gogok eq pat hkûn no hpû é su yhang nghut ri. ⁶Haú buinyi pé má, byu pé gi, shî hkyô hô kôlhâng, myàng kó râ a nghut; shî nau dik kôlhâng, haú shî hkyô gi, yhangmoq chyáng mai hpang byuq râ nghut lhê.

⁷Dinggám haú pé gi, majan zan râ matú bui tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri.

⁸Yhangmoq é xâm gi, myiwe wui é xâm su dut luî, yhangmoq é zuì gi, hkanghkyi zuì su dut ri. ⁹Yhangmoq é wànggò-long gi, joqtoq wànggò-long su dut ri; yhangmoq é dùng myíng é htê gi, majan pá shut din yán wang ló é myang jûm eq myanglhêng pé myíng hûm é htê su gà ri. ¹⁰Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri. ¹¹Yhangmoq é hkohkâm gi, nik dik htûm é Lasang-dông mâ é maumang nghut ri; haú é myíng gi, Hebre myíng dong Abadon ga, Grik myíng dông Apolion* gà ri.

¹²Sâng-hî lhum dingnyé gi, laí ló byuq bê nghut ri; nghut kôlhâng, dingnyé í lhum jé lô shirâ nghut lhê.

¹³Haú hkyuq yuq nghû râ maumang lagyo gi, yhâng é tut mut kat ri. Haú hkûn, Garai Gasâng é hí má joq é hîng hkungga gyap é hkyuí myi lhum mai htê htoq lo é gi, ¹⁴"Uhprat wuì mó lâng má tuí lhung tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taí é lé, ngò wó gyô ri. ¹⁵Haú hkûn, xângzo byù sum tú mâ é ratú lé sat pyám râ matú, ahkyíng, buinyi, lhôhkyap, zanwut lé, rì rì hen to bê nghut é haú maumang myi yuq lé nhang kat bê nghut ri. ¹⁶Myang ji jî é gyè jum gi, byù du

* **9:11** Apolion gà é lichyúm gi, lhoq hten lhoq hpyoq sù gà é nghut ri.

sen í hkyîng bo é hkyô lé, ngò wó gyô ri.

¹⁷ Ngò, shing-rán myang é má, myang jûm eq haú pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyî pê é ulhum su dut luî, yhang-moq é nhut mai, myi, myihkau eq hang pé htoq lo ri. ¹⁸ Haú yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri. ¹⁹ Myang haú jum é sho-myi gi, lhangmuì su dut luî, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haú sùm jung mai wó lut luî, myit gyó tô é xângzo byu pé gi, yhang-moq é loq pé èq zui saî é muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luqgok, sik pé é alhô lé le, noqkuq é hkyô lé a tô pyám shi kó nghut ri. ²¹ Hau htoq agó, yhangmoq gi, byù sat é mù mai le, myoqheq hpaqchyî mù mai le, ashop é dông gungsho zùm yap é hkyô mai le, hkaú é mai le, myit a lhîng shi kó nghut ri.

10

Maumang Eq Laiká Ding É Hkyô

¹ Hau htâng, ngò gi, wum-o bo é mau-mang lagyo gotú rayuq, mauhkûng mai gyó lé lo é lé myang é nghut lhê. Yhang lé gi, mhut èq htup yup to luî, yhâng é u htoq má woqgan síng-yang gyân tô ri; yhâng é myoqdong gi, buì su dut luî, yhâng é hkyî gi, myi zîng su dut ri. ² Yhâng é loq má gi, hpông tô é laiká ding zo ralhum chung tô ri; yhâng é loqyo hkyî gi, wuìshuq lung-aú má nang, yhâng é loqpaî hkyî gi, myigùng htoq má nang to luî, ³ hkanghkyi mying é htê su ga, htê mó èq garû kat ri. Yhang garu kat jáng, maugum htê nyhit lhum tú gûm kat ri. ⁴ Haú maugum htê nyhit lhum tú gûm kat é hkûn, ngò ká râ da jáng, "Haú maugum htê nyhit lhum tú gûm é hkyô lé zaú pyám aq; haú pé lé hkâkâ to." ga, mauhkûng mai danghtê htoq lo é lé ngò wó gyô kat ri.

⁵ Haú hkûn, wuìshuq lung-aú eq myigùng htoq má nang yap tô é lé, ngò myang é maumang lagyo haú gi, yhâng é loqyo loq lé mauhkûng shut tu toq kat ri. ⁶ Haú

mù, yhang gi, mauhkûng eq haú má nyi é lhunglháng lé le, myidàm htoq eq haú má nyi é lhunglháng lé le, wuìshuq lung-aú eq haú má nyi é lhunglháng lé le, hpan tô é, pyat dedu ahtum abyuq dui nyi Su é mying lé lang luî, dakam é gi, "Ahkyíng ratsuí le, lhoq myáng nyi lo râ a nghut! ⁷ Nghut kôhang, Garai Gasang mai Yhâng é dui-nhâng zoshâng wui nghut é myiqhtoî pé lé taí to bê é danglù eq rajung za, Yhâng é zaú tô é hkyô gi, nyhit yuq nghû râ maumang lagyo èq yhâng é tut lé mut myhîng é buinyi pé má, shit râ nghut lhê." gâ ri.

⁸ Hau htoq agó, ngò wó gyô wú bê mauhkûng mâ é htê, ngo lé dum taí é gi, "Haú wuìshuq lung-aú eq myidàm htoq má nang yap tô é maumang lagyo loq má hpông tô é laiká ding lé, è yù aq." gâ ri.

⁹ Haú mù, ngò gi, è luî, laiká ding zo haú, ngo lé byi râ matú maumang lagyo haú lé è dung le, yhang gi, "Shî lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-î su yhang chui râ nghut lhê." gâ ri. ¹⁰ Haú mù, ngò gi, laiká ding zo haú lé, maumang lagyo é loq mai yù mù, zô é nghut lhê; haú hkûn, ngá é nhut má gi, byo-î su yhang chuî nghâm ri; nghut kôle, bàn zô kat é hkûn, ngá é wam hkaú má hkô bê nghut ri. ¹¹ Haú hkûn, "Nàng gi, byù myû myo myo eq séng luî le, mingdán myo myo eq séng luî le, myíng ahú hú eq séng luî le, hkohkam pé myo myo eq séng luî le, myiqhtoî dum htoi ra râ nghut lhê." ga, ngo lé taí kyô ri.

11

Saksé Í Yuq É Hkyô

¹ Ké râ jung dumbáng su dut é jàm-yang rahkat ngo lé byi luî, ngo lé taí é gi, "È mù, haú Garai Gasâng é noqkuq yhùm lé le, hkungga gyap lé le, kê wú luî, haú má noqkuq é bang lé nghap wú aq. ² Nghut kôhang, shinggan mâ é wâng lé gi, a kê é za lhaî pyâm to aq; hkâsu mù gâ le, haú gi, tûngbaù pé lé byi to bê nghut lhê. Yhang-moq gi, haú chyoiyúng myuq lé, lhamó myixe í hkyap tup chôm nang kó râ nghut lhê. ³ Hau htoq agó, ngò gi, ngá é saksé í yuq lé a-tsam byi râ nghut luî, yhangnhik gi, jì

mebu wut* mù, buinyì 1260 nyí tup myiqh-toi htoi kó râ nghut lhê." gâ ri. ⁴Yhangnhik gi, haú myidàm Yhumsing é hí má yuq tô é tsanlun gâm í gâm eq myibung tsungjang í lhum nghut ri. ⁵Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám râ nghut lhê. Yhangnhik lé kâm zing-ri é sù gi, haú su kut sat pyám é hui zo râ nghut lhê. ⁶Yhangnhik gi, yhangnhik myiqh-toi htoi nyi é buinyì pé má mau a wò râ matú, mauhkûng lé myhî pyám râ a-tsam wó akô; hau htoq agó, wui pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyô byi râ a-tsam le, wó akô nghut ri.

⁷Yhangnhik gi, saksé ban hkâm é hkûn, haú nik dik htûm é Lasang-dong mai htoq lo é tân jung dusak gi, yhangnhik lé htim mù, ûng luí, sat pyám râ nghut lhê. ⁸Yhangnhik é mâng lé gi, danghîng dông Sodom eq Egutuq gâ é, yhangnhik é Yhumsing lé le, tapzîng má jén sat pyám é myuq mó é hkyô gûng má, leq to râ nghut lhê. ⁹Haú hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang gi, yhangnhik é mâng lé myhup pyám râ matú a gyo kô é za, sum nyí èq rahkyuí tup chôm wú nyí kó râ nghut lhê. ¹⁰Myidàm htoq má nyi é bang gi, yhangnhik shi byuq é yanmai gabú nguîngón luí, rayuq eq rayuq chyunghuq byi lhûm é dông ngón poí kut kó râ nghut lhê. Hkâsu mù gâ le, myiqh-toi haú nhik gi, myidàm htoq má nyi nyi é bang lé, wúhke jamjau byi lai bê su nhik nghut akô.

¹¹Nghut kôhang, sum nyí èq rahkyuí tup lai é htâng má, Garai Gasâng chyáng má é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bûm bekô nghut ri. ¹²Haú hkûn, "Shî má doq lò keq." ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq ló bekô nghut ri.

¹³Haú u lé yhang, layàng mó nún lô luí, myuq hkaú raxê tú mâ é ratú gi, htên gyop

byuq bê nghut ri. Hau htoq agó, byù nyhit hkyîng yuq shi byuq bê nghut luí, myit gyó tô é bang gi, gyai yhang gyuq nán bûm kômù, mauhkûng mâ é Garai Gasang lé hkya-on shigyaú bum akô nghut ri.

¹⁴Í lhum nghû râ dingnyé gi, lai byuq bê nghut ri; sùm lhum nghû râ dingnyé gi, jé râ za nghut bê.

Nyhit Lhum Nghû Râ Tut Mut É Hkyô

¹⁵Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi, "Mingkan htoq mâ é mingdán gi, nganhûng é Yhumsing eq Yhâng é Hkris-duq é mingdán dut bê nghut luí, Yhang gi, pyat dedu ahtum abyuq up nyi râ nghut lhê."

gâ ri. ¹⁶Haú hkûn, yhumsing é hkohkâm-tanghkuq má zûng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang taí kô é gi,

¹⁷"Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsing Garai Gasang é!

Nàng gi, hpungwup a-tsam mó chûng mù, up nyi bê nghut é yanmai, ngamoq, Nang lé jeju hkya-on lhê.

¹⁸Byù myû pé gi, nhikjum yo bûm kôluí, Náng é nhikmo-yo hkyô gi, jé bê nghut ri.

Shî bê bang lé, tarâ jéyáng râ eq, Náng é dui-nhâng zoshâng myiqh-toi pé lé le,

Náng é sân-yúng bang lé le, Náng é myîng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri."

gâ akô.

¹⁹Haú hkûn, mauhkûng htoq má, Garai Gasâng é noqkuq yhûm hpông tò luí, Yhâng é noqkuq yhúmkaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myîng hûm é, maugum gûm é, layàng nún é, likwò mó gyó é pé dut htoq lo ri.

* 11:3 Ji mebu wut gâ é gi, iyon yôn é lé gâ lhê.

12

Myiwe Myhí Eq Manjung É Hkyô

¹ Hau htoq agó, mauhkûng má limik kumlhá mó htoq shit é gi: myiwe myhí rayuq gi, bui lé wut chûng mù, lhamó má hkyí ke luí, kyí raxe í cham dap é janmaú lé, yhâng é ulhum má tsûng tô ri. ² Yhang gi, zogûng dut tô é nghut luí, zo hkû râ matú, zohkû-nò no nyi é yanmai, gyai yhang ngau garû nyi ri. ³ Hau htâng, mauhkûng má gotû kumlhá dum htoq shit é gi: gyai kô é manjung nè mó* radu gi, ulhum nyhit lhum eq hkyuí raxê lhum dap luí, yhâng é ulhum hkangmó má janmaú tsûng tô ri. ⁴ Yhâng é sho-myi gi, mauhkûng mâ é kyí sum tú mâ é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má láng yap tô ri. ⁵ Myiwe myhí haú gi, mingdán banshoq lé shamtoq dumbáng èq up râ nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri. ⁶ Myiwe myhí haú gi, yhâng é matú Garai Gasang lajâng to byí é yoso hkaú má h pang wang ê bê nghut ri; haú jowò má, yhang gi, 1260 nyí tup lhom baú é hui râ nghut lhê.

⁷ Mauhkûng htoq má majan htoq bê nghut ri. Mihkaelaq eq yhâng é maumang lagyô pé gi, manjung lé majan ê zan kôluí, haú manjung eq yhâng é maumâng pé le, tau zân akô. ⁸ Nghut kôlhang, yhangmoq gi, a ûng kômù, mauhkûng mâ é yhangmoq nyí jowò lhoq hpyuq pyám bekô nghut ri. ⁹ Haú mingkan gón lé hkyô shuí nghoq é, natzau eq Tsadán ga é, a-nham lhê é lhangmuí nghut é manjung mó haú gi, yhâng é maumang pé eq rahá myidàm htoq má dú hkyô pyám é hui bê nghut ri.

¹⁰ Haú hkûn, mauhkûng htoq má htê mó dông tai é lé, ngò wó gyô é gi, "Ahkuí gi, nga-nhûng é Garai Gasâng é hkyí yù hkyô, hpungwup a-tsam eq mingdán le,

Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wui lé, nyí, myín mara hun nyi é sù gi, dú hkyô pyám é hui bê nghut ri.

¹¹ Yhangmoq gi, haú Sauzô é suí é yanmai le, yhangmoq saksé hkâm é mungdâng é yanmai le,

yhang lé ung pyám bekô nghut luí, shi byuq é jé shoq yhumsing asak lé a ha kô nghut ri.

¹² Haú mù luí, mauhkûng eq haú má nyi é bang ê, gabú nyí keq!

Nghut kôlhang, myidàm htoq eq wuìshuq lung-aú gi, dingnyé wó ri;

hkâsu mù gâ le, haú natzau gi, yhâng é ahkyíng yàm-yoq tot za ru joq alô nghut é lé sê é yanmai, nhikmo-yô é èq, nungnhik chyáng gyó lé lô bê nghut ri."

gâ ri.

¹³ Haú manjung gi, myidàm htoq má dú hkyô kat huí é lé myàng luí, haú yuqzo hku é myiwe myhí lé zing-rî ri. ¹⁴ Myiwe myhí haú gi, lhangmuí chyáng mai wó lut luí, yhang é matú lajâng tô é yoso má wó dang jé mù, ahkyíng ralhûm, ahkyíng í lhum, ahkyíng rawuí hkup† lhom baú nyi é hui sháng gaq ga, zùn mó é dùng í lhum byí é huí ri. ¹⁵ Haú hkûn, haú lhangmuí gi, myiwe myhí haú lé wó lhoq myhú pyám shoq ga, myiwe myhí é nunghtáng má, yhâng é nhut mai wui mó láng í é wui lhoq htoq kat ri. ¹⁶ Nghut kôlhang, manjung nhut mai lhoq htoq kat é wui mó láng haú lé, myigùng gi, yhâng é nhut há mù myui pyám byí é dông, myiwe myhí haú lé garúm yu ri.

¹⁷ Haú mù, manjung haú gi, myiwe myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri.

¹⁸ Manjung haú gi, wuìshuq lung-aú yàm má yap tô ri.

* **12:3** Manjung nè mó gâ é gi, Tsadán lé tai nau é nghut lhê. † **12:14** Ahkyíng ralhûm, ahkyíng í lhum, ahkyíng rawuí hkup gâ é gi, "razân, í zân, lhamó hkyuq hkyap" lé gâ é nghut lhê; haú gi, 1260 nyí nghut ri.

13

Tân Jung Dusak Radu Wuishuq Lung-aû Mai Htoq Lo É Hkyô

¹ Haú hkûn, haú wuìshuq lung-aû mai tân jung dusak radu htoq lo é lé, ngò myàng ri. Dusak haú má, hkyuî raxê lhum eq ulhum nyhit lhum dap to luî, yhâng é hkyuî pé má gi, janmaú raxê lhum tsûng to mù, ulhum hkangmó má gi, Garaî aróng lhoq hpoi é myìng dap tô bum ri. ² Ngò myang é tân jung dusak haú gi, bauze-lo su dut ri; nghut kôlhang, hkyî gi, wàm hkyî su dut luî, nhut gi, hkanghkyî nhut su dut ri. Haú manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haú lé ap byî ri. ³ Tân jung dusak hau é ulhum ralhum gi, shî râ î é dàm dap huî é su dut kôlhang, damhkô haú gi, yâ ge pyám bê nghut luî, mingkan gón gi, mauhong byuq kômù, yhâng htâng châng bùm bekô nghut ri. ⁴ Manjung gi, tân jung dusak lé ahko ahkáng ap byî é yanmai, byu pé gi, manjung haú lé noqkuq é htoq agó, tân jung dusak haú lé le, noqkuq kômù, "Ó yuq wá, tân jung dusak shí du su dut ri lúh? Ó yuq wá, yhang lé wó zan ûng râ lúh?" ga bum akô.

⁵ Gyáng dang taí râ eq Garaî aróng lhoq hpoi dang taí râ nhut gi, tân jung dusak haú lé byi to bê nghut é htoq agó, lhamó myí xe í hkyap tup, yhâng é ahko ahkáng lé chûng râ ahkáng wó bê nghut ri. ⁶ Yhang gi, yhâng nhut hpóng mù, Garaî Gasâng aróng lé lhoq hpoi dang taí é htoq agó, Garaî Gasâng é myìng eq nyì jowò lé le, mauhkûng htoq má nyi é bang lé le, lumù gansang é sù nghut ri. ⁷ Haú sân-yúng bang lé majan zân ung yù râ a-tsam, yhang lé byi bê nghut ri. Hau htoq agó, byuhú hkangmó lé le, byù myû hkangmó lé le, myíng hkangmó lé le, mingdán hkangmó lé le, up râ ahkáng, yhang lé byi bê nghut ri. ⁸ Haú sat hui bê Sauzo eq sêng é asak jihpán laiká buk má, mau htoq xâng hkun mai, myìng a kê lhôm é, myidàm htoq má nyi é lhunglhâng bang gi, haú tân jung dusak lé noqkuq kó râ nghut lhê.

* **13:10** Chyúmding ra-am má gi, Byù rayuq yuq lé, shúm kut é sù gi, shúm zung é hui râ nghut lhê. Sham èq byù sat é sù gi, sham èq sat é hui râ nghut lhê, ga bo tô ri. † **13:11** Tân jung dusak gotú radu gâ é shî gi, myiqhtoi pyoq lé gâ nau é nghut lhê.

⁹ Gyo râ nohkyap dap sù gi, gyô yù sháng gaq.

¹⁰ Shúm zung é hui râ sù gi, shúm zung é hui râ za nghut lhê.

Sham èq sat é hui râ sù gi, sham èq sat é hui râ za nghut lhê.*

Haú mù, sân-yúng bang gi, hkam jân é hkyô eq lhumzui hkyô bò kó râ nghut lhê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotú radu† myigùng mai htoq lo é lé myang ri. Yhang gi, sauzô é hkyuî su dut é hkyuî í lhum yuq ri; nghut kôlhang, yhang gi, manjung su ga dang nyo ri. ¹² Yhang gi, tân jung dusak hí lhê dû é ahko ahkáng lhunglhâng lé, haú du é hí má chûng mù, shî râ î é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri. ¹³ Hau htoq agó, yhang gi, byu pé é myoq hí má, mauhkûng mai myigùng shut myi lé lhang wó lhoq hkyô é, limik kumlhá mó kut shit ri. ¹⁴ Yhang gi, tân jung dusak hí lhê dû é hí má, kumlhá haú pé kut râ ahkáng wó é yanmai, myidàm htoq má nyi é bang lé mhoq hpyoq yù luî, haú shâm damhkô dap kôlhang, dui nyi é tân jung dusak haú lé, hkunggâ é đông, yhangmoq lé, yhâng é alhô saí nhang ri. ¹⁵ Yhang gi, haú tân jung dusak hí lhê dû é alhô lé, soq wó mut kat byi é a-tsam lé wó yù sù nghut ri; haú mù, alhô haú gi, dang wó taí luî, yhang lé a noqkuq é bang lé, sat hui nhang ri. ¹⁶ Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yù nhang ri. ¹⁷ Haú hkûn, haú tân jung dusak é myìng, a nghut jáng, yhâng myìng é masat námbat dap sù mai lai luî, ûng é, wui é hkyô, ó yuq le wó kut râ a nghut.

¹⁸ Hpaqchyî byéng-yá gi, shî má bo râ ri. Hpaqchyî bò sù gi, haú tân jung dusak é námbat lé sôn wú sháng gaq; hkâsu mù gâ le, haú gi, byù rayuq é námbat nghut lhê. Yhâng é námbat gi, 666 nghut ri.

14

Sauzo Eq 144,000 Yuq É Hkyô

¹ Hau htâng, ngò wú kat le, haù Sauzo gi, Zi-un bùm má yap tô é lé myang ri; Yhâng mying eq Yhâng Wâ é mying lé, yhumsing é ngelang má kê tap tô é byù 144,000 yuq le, Yhang eq rahá yap tô bùm ri. ² Haù hkûn, ngò gi, wuì pé mying hûm é htê eq maugum mó gûm é htê su gâ é htê, mauhkûng mai htoq lo é lé wó gyô ri. Ngò wó gyô é htê haù gi, tíng bat bang, yhangmoq é tíng lé bat myhîng é htê su gâ ri. ³ Yhangmoq gi, haù hkohkâm-tanghkuq é hí má le, dui é dusak myî du eq suwún wui pé hí má le, mahkôn sik lé hkon akô nghut ri. Haù myidàm htoq mai hkyi yù huí é byù 144,000 yuq mai lai luí, ó yuq le, mahkôn haù lé a wó mhoq sê yù kó nghut ri. ⁴ Haù bang gi, myiwe wuì eq gungsho a zum é bang nghut luí, yhangmoq gi, zorâm jet pé nghut bum akô. Yhangmoq gi, haù Sauzo hká shut é le hká shut châng é bang nghut akô. Yhangmoq gi, byu pé chyáng mai wui yu é hui luí, sâng-hi myhîng é ashi lé su, haù Garai Gasang eq Sauzo lé ap byî é hui akô nghut ri. ⁵ Yhangmoq é nhut má, mhaù é hkyô haí le a taí kó; yhangmoq chyáng mara hûn râ hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotû rayuq gi, maulat má dâng wún é lé ngò myang ri; yhang gi, haù mingkan htoq má nyi é, mingdán hkanmó mâ é bang, byuhú hkanmó mâ é bang, mying hkanmó mâ é bang, byù myû hkanmó mâ é bang lé, hko kyo râ ahtum abyuq é gabú danglù wó ri. ⁷ Yhang gi, "Garai Gasang, tarâ jéyáng râ ahkyíng jé bê nghut é yanmai, Yhang lé gyuq hkungga luí, Yhâng é hpungwup a-tsam lé shigyaú keq. Haù mauhkûng eq myigùng, wuìshuq lung-aù eq wuìbúm pé hpan tô é Sû lé, noqkuq keq." ga luí, htê mó eq taí ri.

⁸ Í yuq nghû râ maumang lagyo gi, htâng má châng lé mù, "Haù mingdán pè* lhunglhang lé, yhang kut shut é ashop é dông gungsho zùm yap é hkyô, nhik lhoq

yo é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

⁹ Sum yuq nghû râ maumang lagyo gi, yhangnhik é htâng má châng lé mù, "Haù tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle, ¹⁰ Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haù chyoyúng maumang lagyo pé hí má le, Sauzô é hí má le, yhang gi, duq nyi é myi eq hang eq zing-rî é hui zo râ nghut lhê. ¹¹ Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haù tân jung dusak eq yhâng é alhô lé, noqkuq é bang eq yhâng mying é masat lhô tap yu sù é matú gi, nyi, myín, no râ ahkyíng wó râ a nghut." ga luí, htê mó eq taí ri. ¹² Garai Gasâng é jep é tarâ châng luí, Yesuq lé lhumzuí nyi é bang nghut é, sân-yúng bang gi, hkam shirang é hkyô bò râ lhê.

¹³ Hau htâng, "Ahkuí mai gi, haù Yhumsing má shí é sù, hkungsô wó nyi ri nghû kê to aq." gâ é htê, mauhkûng mai htoq lo é lé, ngò wó gyô ri.

Haù hkûn, haù Woi-nyí gi, "Nghut rô, yhangmoq kut é muzó é akyû gi, yhangmoq htâng châng râ nghut é yanmai, yhangmoq gi, yhumsing zuí ngu é muzó mai myang hkying bekô râ nghut lhê." ga taí ri.

Myidàm Htoq Mâ É Kyôshi Shû É Hkyô

¹⁴ Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haù má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsung to luí, Yhâng é loq má gi, htoq é zaiyik ralhûm chung tô ri. ¹⁵ Haù hkûn, gotû maumang lagyo gi, noqkuq yhûm mai htoq lô mù, "Haù myidàm htoq mâ é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq." ga, haù mhut htoq má zung tô é Sû lé, htê mó eq taí garû kat ri. ¹⁶ Haù mù, mhut htoq má zung tô é Sû gi, Yhâng é

* 14:8 Mingdán pé gâ é gi, a lumjîng bang lé gâ é nghut lhê.

zaiyik lé, myigùng htoq má dú hkyô kat luí, myidàm htoq mâ é kyôshi lé, ban shû yù bê nghut ri.

¹⁷ Maumang lagyo gotû rayuq gi, mauhkùng htoq mâ é noqkuq yhùm mai htoq lo ri; haú yuq le, htoq é zaiyik ralhum chung tô ri. ¹⁸ Haú, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chùng sù lé, "Myidàm htoq mâ é tsibiyiq shi gi, myhíng bê nghut é yanmai, náng é htoq é zaiyik yù mù, tsibiyiq shipaú haú pé lé, yâm tsíng yù aq." ga, htê mó èq taí garû kat ri. ¹⁹ Maumang lagyo haú gi, yhâng é zaiyik lé, myidàm htoq má dú hkyô kat mù, haú mâ é tsibiyiq shi pé lé yâm tsíng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri. ²⁰ Myuq shinggan mâ é tsibiyiq wing pyik jang haú má, tsibiyiq shi haú pé lé náng nyhoq luí, tsibiyiq wing pyik jang haú mai suí yui htoq lo é gi, myang lunghtúng myháng jé shoq jé lô mù, 180 déng† kô we shoq yui lô bê nghut ri.

15

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

¹ Ngò gi, mauhkùng má gotû limik kumhá joq é lé, dum byu-myang ri; haú gi, wúm nyhit lhum chung é maumang lagyo nyhit yuq nghut ri; wúm haú pé gi, lô htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haú gû mai bàn râ nghut lhê. ² Hau htoq agó, myi eq nyhô tô é myoqjâm wui-nhông su dut é lé le, ngò myang ri; haú tân jung dusak eq yhâng é alhô lé le, yhâng myíng é námbat lé le, wó ung pyám bê bang gi, wui-nhông yàm haú má yap tô bum akô; yhangmoq gi, Garai Gasang byî é tíng pé lé chung tô kôluí, ³ Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsîng Garai Gasang ê, Nàng kut é muzó gi, hkik é eq mauhpo yhang nghut ri. Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

⁴ Yhumsîng ê, Nàng lé a gyuq a hkungga râ eq Náng myíng lé a lhoq gyaú râ gi, ó yuq wá nyi râ lhú?

Hkâsu mù gâ le, Nàng za chyoiyúng é Sû nghut ri.

Nàng kut é dingmán hkyô gi, tân shit bê nghut é yanmai,

byù myû lhunglhang gi, Náng hí má lé noqkuq kó râ nghut lhê."

gâ akô nghut ri.

⁵ Hau htâng, ngò wú kat le, mauhkùng má, saksé zúm joq é noqkuq yhùm bóng tô é lé, myang ri. ⁶ Haú wúm nyhit jung chung é maumang lagyo nyhit yuq gi, noqkuq yhùm haú mai htoq lo ri; yhangmoq gi, sân-yúng duqbó é nú nám mebu wut luí, yhangmoq é wànggàng má hîng hpyihit baíyup tô akô nghut ri. ⁷ Haú hkûn, haú dui é dusak myî du mâ é radu gi, pyat dedu ahtum abyuq dui nyi é Garai Gasâng é nhikmo-yo hkyô byíng tô é hîng góm nyhit lhum, haú maumang lagyo nyhit yuq lé byî ri. ⁸ Garai Gasâng é hpungwup shingkang eq hpungwup a-tsâm é yanmai, haú noqkuq yhùm gi, myihkau byíng zan to bê nghut luí, haú maumang lagyo nyhit yuq é wúm nyhit jung za a bàn bàn gi, noqkuq yhùm haú má ó yuq le a wó wâng kó nghut ri.

16

Garai Gasâng É Nhikmo-yo Hkyô Bo É Góm Nyhit Lhum

¹ Hau htâng, maumang lagyo nyhit yuq lé, "Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhùm mai htê mó èq taí é lé, ngò wó gyô ri.

² Haú hkûn, sân-hî yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haú tân jung dusak é masat lhô dap é eq yhâng é alhô lé noqkuq é bâng chyáng, achayut é eq hkê-nho dik é, yapjeq ana dap tô bùm bê nghut ri.

³ Í yuq nghû râ maumang lagyo gi, yhâng é góm lé, wuìshuq lung-aú má hut hkyô kat ri; haú gi, shî bê byù rayuq é sui su dut

† 14:20 180 déng gi, Grik pé é stadia 1600 kô bo ri.

byuq é htoq agó, haú má lúng é dui jung lunglhang gi, shi byuq bê nghut ri.

⁴ Sum yuq nghú rã maumang lagyo gi, yhang é góm lé, wuìlàng pé eq wuìbúm pé má hut hkyô kat jáng, haú pé gi, sui dut byuq bê nghut ri. ⁵ Haú hkûn, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rû nyi nyi é Chyoiyúng Sû é,

Nàng haú su kut jéyáng bê nghut é yanmai, Nàng gi, tengmán Sû nghut ri;

⁶ hkâsu mù gâ le, yhangmoq gi, Nàng é sân-yúng bang eq myiqhtoí pé é sui lé, lhoq htoq pyám bekô nghut luí,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri."

gâ ri. ⁷ Haú hkûn, haú hkungga gyap mai, "Nghut rô! Wum-o a-tsam dik shoq bò Sû Yhumsing Garai Gasang é, Nàng jéyáng é hkyô pé gi, tengmán é eq dingmán é nghut ri."

ga le, taí kat é htê lé, ngò dum wó gyô ri.

⁸ Myi yuq nghú rã maumang lagyo gi, yhang é góm lé, bui é ahtoq má hut hkyô kat é hkûn, bui gi, byu pé lé myi éq nyhê kyuq rã ahkáng wó bê nghut ri. ⁹ Haú mù, yhangmoq gi, nyé dik é eq nyhê kyuq é hui zo luí, wúm shí pé lé up nyi é Garai Gasang é mying lé nhing akô; haú-í yhang hpuzo kôlhang, yhangmoq gi, myit le a lhing kó, Garai Gasang lé le a shigyaú kó nghut ri.

¹⁰ Ngo yuq nghú rã maumang lagyo gi, yhang é góm lé, tân jung dusak é hkohkâm-tanghkuq htoq má hut hkyô kat jáng, yhang é mingdán gi, mauchut tuq dut byuq bê nghut ri. Mingbyû wuì gi, yhumsing é shô lé lhang, ngat tân bùm shoq shî-nò jamjau hui zo kôluí, ¹¹ yhangmoq no hpû é eq jeq é ana dap é yanmai, mauhkûng mâ é Garai Gasang lé nhing akô; haú-í yhang hpuzo kôlhang, yhangmoq gi, yhangmoq kut é hkyô mai myit a lhing shi kó nghut ri.

¹² Hkyuq yuq nghú rã maumang lagyo gi, yhang é góm lé, Uhprat wuì mó lãng má hut hkyô kat jáng, wuìlàng haú gi, kân byuq luí, haú buihotoq hkyam mâ é hkohkam pé, lé lô rã hkyô dong bê nghut ri. ¹³ Haú hkûn,

po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoí pyoq pé é nhut mai htoq lô kô é bang nghut akô. ¹⁴ Woi-nyí haú pé gi, nat gâng pé é woi-nyí nghut luí, limik kumlhá pé kut shit kômù, haú wum-o a-tsam dik shoq bò Sû Garai Gasang é buinyi mó má majan zan rã matú, mingkan gón mâ é hkohkam pé lé lhoq tsing yù rã ga, htoq e lô akô nghut ri.

¹⁵ "Wú keq, Ngò gi, hkau sù su jé lé é nghut lhê! Su hí má gungchîn a so rã eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luí, gyíng gyíng kut nyi é sù gi, hkungsô wó nyi ri."*

¹⁶ Haú mù, nat haú bang gi, hkohkam pé lé, Hebre mying dông Armagedon gâ é jowò má, rahá ji tsing tô akô nghut ri.

¹⁷ Nyhit yuq nghú rã maumang lagyo gi, yhang é góm lé, maulat má hut hkyô kat ri; haú hkûn, haú noqkuq yhùm mâ é hkohkâm-tanghkuq mai, "Bàn bê!" gâ é htê mó htoq lo ri. ¹⁸ Hau htoq agó, lhap hpyat é, mying hùm é, maugum gùm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haú su nún é eq haú-í htan é gi, a joq wú shí é nghut lhê. ¹⁹ Haú mù, haú myuq mó gi, sùm hkyam byak goq byuq luí, mingdán pé mâ é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhang é nhikmo-yô é tsibiyiq wing byíng shoq bo é góm lé shuq nhâng bê nghut ri. ²⁰ Zinlóng hkangmó gi, hpanq byuq bê nghut luí, bùm pé le byuq byuq bê nghut ri. ²¹ Haú hkûn, myi xê joí kô lai é likwò mó gi, mauhkûng mai byu pé htoq má wo gyó gyûn ri; likwò wúm gi, gyai yhang wuìhke jamjau é wúm nghut é yanmai, byu pé gi, Garai Gasang lé nhing bum akô nghut ri.

17

Shiwa Myhí Mó É Hkyô

¹ Haú góm nyhit lhum chung tô é mau-mang lagyo nyhit yuq mâ é rayuq gi, lé lô mù, "Lé aq, haú wuì myo myô pé htoq má zung tô é shiwa myhí mó lé dam byi rã

* **16:15** Dang shí hkun gi, Yesuq taí é dang nghut lhê.

hkyô, ngò, nang lé tân shit bá. ² Myidàm htoq mã é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidàm htoq mã nyi é bang gi, yhang kut shut é myiwe yuqgè nyi zô lhum hkyô é tsibiyiq wing lé shuq wut bùm bekô nghut ri." ga luí, ngo lé taí ri.

³ Haú mù, maumang lagyo haú gi, Woinyí má, ngo lé yoso shut shuí wang e ló ri. Haú ulhum nyhit lhum eq hkyuí raxê lhum dap luí, taí hpoi é myìng kôm dap tô é, zam zam ne é tân jung dusak htoq mã zung tô é myiwe myhí rayuq lé, ngò myang ri. ⁴ Myiwe myhí haú gi, me me dut é eq zam zam ne é mebu wut luí, hìng, lungsêng, palhé pé èq mhôn chung ri; yhâng é loq má gi, yhâng é myiwe yuqgè nyi zô lhum hkyô é agot a-û hkyô eq achay achyut é zè pé byíng tô é hìng góm ralhuma chung tô ri.

**5 NIK DIK É HKYÔ, MYIDÀM HTOQ MÀ É
ACHAQ ACHYUT HKYÔ PÉ EQ SHIWA
MYHÍ PÈ É YHÂNGNU, BABELON MYUQ
MÓ.**

gâ é myìng gi, yhâng é ngelang má kê tap tô ri. ⁶ Myiwe myhí haú gi, sân-yúng bâng é sui eq Yesuq é saksé hkâm bâng é sui shuq wut tô é lé, ngò myang ri.

Haú mù, ngò gi, gyai yhang maú byuq é nghut lhê. ⁷ Haú hkûn, maumang lagyo haú ngo lé taí é gi, "Nàng, haí mù maú lhê lú? Myiwe myhí haú eq, yhang jî tô é, ulhum nyhit lhum eq hkyuí raxê lhum dap é tân jung dusak é zaú tô é hkyô lé, ngò, nàng lé taí kyo rá nghut lhê. ⁸ Nàng myàng é tân jung dusak haú gi, hí hkûn nyi wú bê, ahkuí a nyi lo, nghut kôlhang, nik dik htâm é Lasang-dong mai htoq lô mù, htên byoq é hui rá nghut lhê. Mau htoq xâng hkun mai, asak jihpán laiká buk má myìng a kê tô é, myidàm htoq mã nyi é bang gi, tân jung dusak haú lé myàng kô é hkûn, maú byuq bùm kó rá nghut lhê. Hkâsu mù gâ le, haú gi, nyi wú bê, ahkuí a nyi lo, nghut kôlhang, dum lé rá nghut é yanmai nghut ri.

⁹ Hpaqchyí byéng-yá bo é nyan gi, shí má rá ri. Haú ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri. ¹⁰ Ngo yuq gi, byit gyó byuq bê; rayuq gi, ahkuí nyi to ashí; myit tô é rayuq gi, a jé lé

shi nghut ri; haú yuq jé lé é hkûn, yhang gi, ahkyíng razup zo za wó nyí rá nghut lhê. ¹¹ Hí hkûn nyi wú bê, ahkuí a nyi lo dut é tân jung dusak haú gi, shit yuq nghú rá hkohkâm nghut ri. Yhang gi, haú nyhit yuq eq sêng é yanmai, yhâng é htên byoq hkyô shut e ló rá nghut lhê.

¹² Haú nàng myàng é hkyuí raxê lhum gi, mingdán a myang yù shí é hkohkâm raxê yuq nghut ri; nghut kôlhang, yhangmoq gi, haú tân jung dusak eq rahá za, hkyíng hkum rahkum kô hkohkâm ayá lé wó yù kó rá nghut lhê. ¹³ Yhangmoq gi, myit myoqbyù hkyô ralhuma za nghut kômù, yhangmoq é a-tsam eq ahko ahkáng lé, haú tân jung dusak lé byi kó rá nghut lhê. ¹⁴ Yhangmoq gi, haú Sauzo lé majan chôm zan kó rá nghut lhê; nghut kôlhang, Sauzo haú gi, yhumsing pé é Yhumsíng eq hkohkam pé é Hkohkâm nghut é yanmai, yhangmoq lé ung pyám rá nghut lhê. Haú Sauzo eq rahá nghut é bang gi, jì yù huí é bang, hkyin yù huí é bang eq lhumzúí é bang nghut akô." gâ ri.

¹⁵ Hau htâng, maumang lagyo haú ngo lé dum taí é gi, "Nàng myang é, shiwa myhí zung tô é wui pé gi, byù myú pé, byù ajùm ayò pé, mingdán pé eq myíng lhumjup nghut ri. ¹⁶ Haú nàng myang é tân jung dusak eq hkyuí raxê lhum gi, shiwa myhí haú lé a jú kut kó rá nghut luí, yhâng é sutzè banshoq shang yu pyám byi mù, mebu lhang a dap loshoq achindum kut to kó rá nghut lhê; hau htoq agó, yhâng é sho lé zo luí, myí èq nyhê hkyô pyám kó rá nghut lhê. ¹⁷ Hkâsu mù gâ le, Garai Gasang gi, haú bang mai, i-myit rahkat zâ èq, yhumsing é a-tsam, haú tân jung dusak lé byi rá myit, yhangmoq lé kat byi Sû nghut ri. Haú mù, yhangmoq gi, Garai Gasang é mungdang lhoq dik é hkûn jé shoq, haú su kut kó rá nghut lhê. ¹⁸ Nàng myang é myiwe myhí haú gi, myidàm htoq mã é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

¹ Hau htâng, maumang lagyo gotù rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut luí,

haû myidàm htoq lé, yhâng é hpungwup èq duqbó to byî ri. ² Yhang, htê mó o mó èq garû taî kat é gi,

"Babelon myuq mó gi, lêng gyop bê, lêng gyop bê!

Myuq haû gi, nat gâng pê é yhûm eq agè ashop é nat hkangmó é hkyûng dut byuq é htoq agó,

a sansêng é eq achay achyut é nghoq pé nyi é sùt dut byuq bê nghut ri.

³ Hkâsu mù gà le, haû byû myû lhunglháng gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haû myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhâng é ladu lai shoq ngón kùn é hkyo é yanmai, sutzè wó bôm bekô nghut ri."

gâ ri.

⁴ Hau htâng, mauhkûng mai htoq lo é htê gotû lé ngò dum wó gyô é gi,

"Ngá é byu pé ê, myuq hau é mara pé má nungmoq a bo lôm râ matú le, yhâng é wúm pé lé nungmoq a hui zo kó râ matú le, haû mai hân hfang htoq lò keq;

⁵ hkâsu mù gà le, yhâng é mara gi, mauhkûng htung shoq bum zang to bê nghut luí,

Garai Gasang gi, Yhâng é a dingmán é hkyô lé myit bun bê nghut ri.

⁶ Yhang kut byî é eq rajung za, yhang lé tau kut byi keq; Yhang kut bê muzó eq rajung za, yhang lé í tú taû kut keq.

Yhang nyhó byî é góm má, í tú taû nyhó byi keq.

⁷ Yhang gi, yhumsing gùng lé yhumsîng lhoq gyaú yû luí, ladu lai shoq ngón kùn nhang é í,

wuîhke jamjau hkyô eq iyon hkyô myo myo, yhang lé taû byi keq.

Hkâsu mù gà le, yhang gi, yhâng é myit má, 'Ngò gi, hkohkâm myhí nghut lhê; ngò gi, chuimó a nghut;

hkâ-nhám le iyon hui râ a nghut.' ga gumrong nyi ri.

⁸ Haû mù luí, yhâng é wúm ngu é shî hkyô, iyon hkyô eq mutmó gyó hkyô gi, ra-nyî bui má za, yhâng chyáng jé râ nghut lhê.

Hau htoq agó, yhang gi, myî èq nyhê hkyô pyâm é lé hui râ nghut lhê;

hkâsu mù gà le, yhang lé jéyáng é, haû Yhumsîng Garai Gasang gi, wum-o a-tsam bò Sû nghut ri.

⁹ Haû yhang eq rahá myiwe yuqgè nyi zô lhum hkyô kut shut é eq yhâng é ladu lai shoq ngón kùn hkyô má bo lom é, haû myidàm htoq mâ é hkohkam pé gi, yhang lé nyhê hkyô é myihkau lé myàng kôjáng, ngaubyi ngau-nhap eq iyon yôn é huí bùm kó râ nghut lhê. ¹⁰ Yhangmoq gi, yhang no jamjau nyi é lé wú gyuq kôluí, we we má yap to kômù,

'Hkik é myuq mó, a-tsam bo é Babelon gi, dingnyé wó ri-nhung!

Dingnyé wó ri-nhung! Hkyíng hkum ral-hum má za, dam byî é hkyô gi, náng chyáng jé bu-nhung!

ga luí, taî garu kó râ nghut lhê.

¹¹ Myidàm htoq mâ é hpugá byu pé gi, yhang é yanmai, ngaubyi ngau-nhap é eq iyon yôn é hui kó râ nghut lhê; hkâsu mù gà le, yhangmoq é gài zè lé, ó yuq le a wuî byi lo kô é yanmai nghut ri. ¹² Gài zè haú pé gi, hîng, ngùn, lungsêng eq palhé, nú-nhâm é pán, me me dut é pán, laí hkyíng eq zam zam ne é pán; namngón jung sik ajung jung, maguí zuí lé saî é, gùloq hpaû jung sik lé saî é, gyi lé saî é, shamtoq lé saî é, luq hpyû lé saî é jung ajà jà nghut ri.

¹³ Hau htoq agó, changhpyik gâm, xunmân, namngón jung, mura, loban, tsibiyiq wing, tsanlun xû, mún eq sungso, nojûng eq sau, myang eq myanglhêng pé; byû é gungdu eq asak pé nghut ri.

¹⁴ Yhangmoq gi, 'Nàng myit ô nau nyi é hkyô pé gi, náng chyáng mai gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhám le dum wó taû yû râ a nghut.' ga taî kó râ nghut lhê.

¹⁵ Gài zè haú pé lé ung luí, yhâng chyáng mai sutzè wó yu é byû pé gi, yhang hpuzô é jamjau hkyô lé wú gyuq kô é yanmai, we

we má yap to kômù, ngaubyi ngau-nhap eq
iyon yon uchyang,

¹⁶ 'Nú-nhâm é pán, me me dut é pán eq
zam zam ne é mebu wut luí, hîng,
lungsêng eq palhé pé lé
mhôn tô é myuq mó gi, dingnyé wó ri-
nhung! Dingnyé wó ri-nhung!

¹⁷ Hkyíng hkum rahkum má za, haû-í
yhang wó é sutzè pé htên byoq byuq
bu-nhung!"

ga taí kó rá nghut lhê.

Wuì-sanghpo agyì yuq hkanmó eq wuì-
sanghpo mai jón wún é bang banshoq, wuì-
sanghpo hkâng bang eq wuìshuq lung-aû
mai wam baú hkyô wó yu é bang banshoq
gi, we we má yap to kômù, ¹⁸ myuq haû
nyé gyó nyi é myihkau lé myàng kôjáng,
'Myuq mó shî eq pûng é myuq gi, hkâmá
joq shirâ lhú?' ga taí garu kó rá nghut
lhê. ¹⁹ Yhangmoq gi, yhumsing é ulhum má
hpuilhup kyaq gyun mù, ngaubyi ngau-
nhap eq iyon yon uchyang,

'Myuq mó gi, dingnyé wó ri-nhung!
Dingnyé wó ri-nhung!

Wuìshuq lung-aû má wuì-sanghpo pé wó é
bang gi, yhâng é sutzè pé é yanmai,
sutzè wó bum akô.

Nghut kôlhâng, hkyíng hkum rahkum má
za, htên byoq hkyô gi, yhâng chyáng
jé bu-nhung!

²⁰ Mauhkûng ê, yhang é yanmai hkye gabú
aq! Sân-yúng bang, lagyô pé eq my-
iqhtoí pé ê, hkye gabú keq!

Hkâsu mù gâ le, yhang, nungmoq lé kut é
eq rajung za, Garai Gasang gi, yhang
lé jéyáng bê nghut ri.'

ga taí kó rá nghut lhê." gâ ri.

²¹ Hau htâng, wum-o a-tsam mó bo é
maumang lagyo rayuq gi, luqluí long mó sú
é luqgok racham waq toq yû mù, wuìshuq
lung-aû má dú hkyô kat luí, taí é gi,

"Haû Babelon myuq mó gi, haû su kut wum
kat dú hkyô pyâm é hui rá nghut luí,
hkâ-nhám le dum myàng rá a nghut lo.

²² Haû tíng bat é bang, dat gó dat ye é bang,
sampyí mut é bang eq tut mut é bâng
é htê lé,

náng chyáng hkâ-nhám le dum wó gyo
lo rá a nghut.

Loq hpaqchyí ajung jung kûng é byù
lé, náng chyáng hkâ-nhám le dum
myàng lo rá a nghut.

Luqluí luí é htê lé, náng chyáng hkâ-nhám le
dum wó gyo lo rá a nghut.

²³ Haû myibung duq é myishâm lé, náng
chyáng hkâ-nhám le dum wó duq lo
rá a nghut.

Myisik lusik é htê lé, náng chyáng hkâ-nhám
le dum wó gyo lo rá a nghut.

Náng é hpugá byû pé gi, mingkân é byù mó
pé nghut ri.

Náng é myoqheq hpaqchyí eq mingdán
banshoq má é bang lé, hkyô shuí
nghoq bê nghut ri.

²⁴ Haû myiqhtoí pé é sui, sân-yúng bâng é
sui eq myidàm htoq má sat hui bang
banshoq é sui pé gi,
yhâng chyáng chyat byu-myàng bê
nghut ri."

gâ ri.

19

Haleluya!

¹ Hau htâng, mauhkûng htoq má, byù
ajùm ayò garú é htê mó su gâ é lé, ngò wó
gyô é gi,

"Haleluya!*

Hkyi yù hkyô eq hpungwup shingkang, a-
tsam gi, nga-nhûng é Garai Gasang
eq sêng é nghut lhê.

² Hkâsu mù gâ le, Yhang tarâ jéyáng é hkyô
gi, tengmán é eq dingmán é yanmai
nghut ri.

Yhang gi, myidàm htoq má é bang lé, haû
yhâng é ashop é dông gungsho zùm
yap é hkyo eq mara kut shut nhang
é shiwa myhí mó lé, mara byi luí,

Yhâng é dui-nhâng zoshâng wuì é sui
yuichyín dam byi bu-nhung ô!"

gâ ri.

³ Dum radàm, yhangmoq taí garu kô é gi,
"Haleluya!

Myuq hau é myihkau gi, pyat dedu ahtum
abyuq ru íng doq nyi sháng gaq ô!"
gâ bum akô nghut ri.

⁴ Haû suwún í xe myi yuq eq dui é dusak
myí du gi, haû hkohkâm-tanghkuq má zung

* **19:1** Haleluya gâ é gi, Hebre myíng dông, "Yhumsing Garai Gasang lé hkyá-on kungton lhê" gâ é dang nghut ri.

tô é Garai Gasang lé paí gop luí, noqkuq
uchyang,
"Amen, Haleluya!"
ga, taí garú bum akô.

⁵ Haú hkûn,

"Garai Gasang é dui-nhâng zoshâng wui
nghut é, yhang lé gyuq hkunggâ é tiq
ko banshoq bang é!

Nga-nhông é Garai Gasang lé, hkya-on
kungtôn keq ô."

gâ é htê, haú hkohkâm-tanghkuq mai htoq lo
ri.

⁶ Hau htâng, byù ajùm ayo é htê su ga, wui
myo myo mying hûm é htê su ga, maugum
mó é htê su ga, taí garú é htê lé ngò wó gyô
é gi,

"Haleluya!

Hkâsu mù gâ le, wum-o a-tsam dik shoq
bò Sû nga-nhông é Yhumsing Garai
Gasang gi, up nyi ri.

⁷ Nga-nhông gi, ngon gabú luí, Yhâng é
hpungwup shing kang lé lhoq gyaú
sháng ô!

Hkâsu mù gâ le, haú Sauzo myiháng poí gi,
jé bê nghut luí, Yhâng é myisik gi, rì
rì mhôn to bê nghut ri.

⁸ Sân-yúng duq wik nú-nhâm é mebu le, wut
râ matú, Yhang lé byí to bê nghut ri."
gâ ri. (Nú-nhâm é mebu haú gi, sân-yúng
bang kut é dîngmán é muzó nghut ri.)

⁹ Hau htâng, maumang lagyo gi, ngo lé,
"Haú Sauzô é myiháng zoshuq poí má ji yu
é hui bang gi, hkungsô wó nyi ri.' nghû ká
aq." ga taí luí, "Dang shí pé gi, Garai Gasang
é tengmán mung dang yhang nghut lhê." ga
xoq taí ri.

¹⁰ Haú hkûn, ngò gi, yhang lé noqkuq
râ nghû, yhâng é hkyí wang má paí gop
kat é nghut lhê. Nghut kôlhang, yhang gi,
"Haú su hkâkut! Ngò gi, nàng eq haú Yesuq
é saksé lé hkâm é náng gumang wui eq
rahá, byinzùm dui-nhâng zoshâng ru nghut
lhê. Garai Gasang lé noqkuq aq! Hkâsu
mù gâ le, Yesuq é hkyô lé saksé hkâm é gi,
myiqhtoi htoí é Woi-nyí é myit dông nghut
ri." ga, ngo lé taí hkûm ri.

Myang Hpyû Jí To Su É Hkyô

¹¹ Hau htâng, ngò gi, mauhkûng bóng tô é
lé le, ngá é myoq hí má myang hpyû radu
nyi tô é lé le, myang ri. Myang hpyû haú

má ji tô é gi, Lhumzui eq Tengmán gâ é Sû
nghut ri. Yhang gi, tengmán é dông tarâ
jéyáng luí, majan zan Sû nghut ri. ¹² Yhâng
é myoqjí gi, myishâm su dut mù, Yhâng é
ulhum má gi, janmaú myo myo tsung tô
ri. Yhang mai lai luí, ó yuq le a bo sê é
mying, Yhâng chyáng kê tap tô ri. ¹³ Yhang
gi, sui má jum yù bê nghut é buhîng radung
wut to luí, Yhâng é mying gi, Garai Gasang
é mung dang gâ ri. ¹⁴ Haú mauhkûng gyè
pé gi, hpyu é eq sanséng nú-nhâm é mebu
wut mù, myang hpyû ji kôluí, Yhâng htâng
má châng bum akô nghut ri. ¹⁵ Byù myû
haú pé lé zan râ matú, htoq é shâm gi,
Yhâng é nhut mai htoq lo ri. Yhang gi,
yhangmoq lé, shamtoq dumbáng èq up râ
nghut lhê. Yhang gi, wum-o a-tsam dik
shoq bò Sû Garai Gasang é nhikmo-yô é
tsibiyiq shi pyik jang má, yhangmoq lé pyik
râ nghut lhê. ¹⁶ Hkohkam pé é Hkohkâm
eq yhumsing pé é Yhumsing gâ é mying gi,
Yhâng é buhîng eq Yhâng é tangbaú má kê
tap tô ri.

¹⁷ Dum, maumang lagyo rayuq gi, bui má
yap tô é lé ngò myang ri; yhang gi, maulat
mâ é nghoqzô pé banshoq lé, "Lé keq, Garai
Gasang é zoshuq poí mó matú, lé zup zing
keq; ¹⁸ haú hkûn, nungmoq gi, hkohkam pé
é, gyezaú pé é, wum-o a-tsam mó bò bâng
é, myang jûm eq ji bâng é gungsho, luthkyô
wó bang eq jùn pé é, byù mó byù zo pé
lhunglhâng é gungsho pé lé, myàng zo kó râ
nghut lhê." ga, htê mó èq wut garú taí ri.

¹⁹ Hau htâng, haú tân jung dusak eq
myidàm htoq má é hkohkâm eq yhangmoq
é gyezô pé gi, haú myang htoq má ji to
Sû eq Yhâng é gyezô pé lé, majan zan râ
matú chôm zîng bùm kô é lé, ngò myang
ri. ²⁰ Nghut kôlhang, haú tân jung dusak gi,
chyup yu é hui bekô nghut ri; hau htoq agó,
haú tân jung dusak é masat lhô lé hkam
yù luí, yhâng é alhô lé noqkuq é bang lé,
mhaú zo râ matú, tân jung dusak hau é
gunglik dông limik kumlhá pé kut shit é
myiqhtoi pyoq le, chyup yu é hui bê nghut
ri. Yhangnhik gi, hang myi duq nyi é myi
nhông má duì gù dú hkyô kat é hui bekô
nghut ri. ²¹ Haú myit gyó tô é bang gi,
myang gûng má ji to Su é nhut mai htoq
lo é sham èq sat pyâm é hui bekô nghut

luí, ngoq pé lhungháng gi, haú bâng é gungsho lé, gyi gyi dau dau myàng zô bùm bekô nghut ri.

20

Rahkyîng Zàn

¹ Dum, maumang lagyo rayuq gi, nik dik htûm é Lasang-dông é zoqshi eq joq-toq tui mó lé, yhâng é loq má chûng mù, mauhkûng mai gyó lé lo é lé, ngò myang ri. ² Yhang gi, natzau eq Tsadán nghut é, a-nham lhê é lhangmuì gâ é manjung lé, zanwut rahkyîng lhûng to râ matú, chyup tuí yù bê nghut ri. ³ Haú mù, maumang lagyo haú gi, rahkyîng zàn a byíng shî é gyoro má, manjung haú, byù myû pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luí, zoq myhî to mù, hau é ahtoq má dizik htûng tô ri. Haú rahkyîng zàn lai eq, yhang lé, ra yoq zo hpông htoq kat ra râ nghut lhê.

⁴ Ngò gi, haú tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haú Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haú tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yù bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri. ⁵ Haú gi, sâng-hî dâm dum dui toq é hkyô nghut ri. (Shi byuq bê myit gyó tô bang gi, rahkyîng zàn haú a byíng byíng wó dum dui toq kó râ a nghut.) ⁶ Sâng-hî dâm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû râ shi é hkyô gi, haú bang lé up râ ahkáng wó é a nghut; haú bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lhê.

Tsadán Htên Byoq Huí É Hkyô

⁷ Rahkyîng zàn haú lai jáng, Tsadán gi, htóng mai nhang htoq kat é hui luí, ⁸ majan zan râ matú, myidàm htoq myi chyùn má

nyi é, Goga eq Magoga gâ é byù myû pé lé mhaú shuî tsíng yù râ ga, htoq é râ nghut lhê. Byù haú bang gi, wuìshuq lung-aú yàm má é semuì myhó myo kó râ nghut lhê. ⁹ Yhangmoq gi, maumyî htunghtáng hkap shoq chôm yán doq lò kômù, haú Garai Gasâng é byu pé nyi é dap nghut é, Garai Gasang chyitdap é myuq lhînghkyuq má, lé lóm tô bùm bekô. Nghut kôlhâng, mauhkûng mai myi gyó lô luí, yhangmoq lé nyhê hkyô pyám bê nghut ri. ¹⁰ Haú tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haú le dú hkyô pyâm é hui bê nghut ri. Yhangmoq gi, nyí, myín, pyat dedu ahtum abyuq wuìhke jamjau hui zô nyi kó râ nghut lhê.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq hpyû mó ralhum eq haú má zung tô é Sû lé, ngò myang ri. Haú mauhkûng eq myigùng gi, Yhâng é hí mai hpang lô bê nghut mù, yhangnhik é matú jowò a joq lo nghut ri. ¹² Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotû laiká buk le, hpông tô ri. Haú shi byuq bê bang gi, yhumsîng kut é eq rajung za, laiká buk pé má kê tô é dông, tarâ doqdan é huí bùm bekô nghut ri. ¹³ Haú hkûn, wuìshuq lung-aú gi, yhang má lúng tô é, shi byuq bê bang lé ap byi luí, haú shi é hkyô eq Moming le, yhangnhik chyáng lúng tô é, shi byuq bê bang lé ap byi akô nghut ri; yuq hkangmó gi, yhumsîng kut é eq rajung za tarâ doqdan é hui bekô nghut ri. ¹⁴ Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haú gi, í dâm nghû râ shi é hkyô nghut lhê. ¹⁵ Asak jihpán laiká buk má, myìng a bo é sù ó yuq nghut kôle, myi nhông haú má dú hkyô kat é hui bekô nghut ri.

21

Yerusalem Asik

¹ Hau htâng, mauhkûng asik eq myigùng asik lé, ngò myang ri; hkâsu mù gâ le, hí lhê é mauhkûng eq myigùng gi, lai lô byuq bê

nghut luí, wuìshuq lung-aú le, dum joq râ a nghut lo. ² Haú hkûn, Chyoiyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yù luí, Garai Gasâng chyáng mâ é nghut mù, mauhkûng mai gyó lé lo é lé, ngò myang ri. ³ Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuí, Garai Gasâng é nyì jowò gi, xângzo byu pé eq rahá nghut luí, Yhang gi, yhangmoq eq rahá nyì nyì râ nghut lhê. Yhangmoq gi, Yhâng é byu pé dut râ nghut luí, Garai Gasang yhang, yhangmoq eq rahá nyì mù, yhangmoq é Garai Gasang dut râ nghut lhê. ⁴ Garai Gasang gi, yhangmoq é myoq mâ é ngaubyi lunglhang lé, sut pyám byi râ nghut lhê. Htàngnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô nghû é joq râ a nghut lo; hkâsu mù gâ le, hí lhê é hkyô pé gi, laí ló byuq bê nghut ri." gâ ri.

⁵ Haú hkohkâm-tanghkuq má zung to Sû gi, "Wú aq, jung hkanmó lé, Ngò asik kut nyí bê nghut lhê." ga taí luí, "Shí lé kê to aq, hkâsu mù gâ le, dang shí pé gi, lungíng é dang eq tengmán é dang nghut lhê." ga taí ri.

⁶ Hau htoq agó, Yhang gi, "Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htáng Sû le nghut lhê. Wuì shit sù lé gi, ahpaú a dúng é za, asak wuìbúm mâ é uchyam lé, Ngò byi huq râ nghut lhê. ⁷ Wó ung é sù ó yuq nghut kôle, Garaí é silí wunlí haú pé banshoq lé sîng râ nghut mù, Ngò gi, yhâng é Garaí Gasang dut luí, yhang gi, Ngá zo dut râ nghut lhê. ⁸ Nghut kôlhang, gyuq myit bò bang, a lumjîng bang, achag achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lunglhang é jowò gi, haú hang myi duq nyi é nhông nghut râ nghut lhê. Haú gi, í dâm nghû râ shi é hkyô nghut ri." ga ngo lé taí ri.

⁹ Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq mâ é rayuq gi, lé mù, "Lé aq, haú Sauzô é yhangmyi gâ é myisik lé, ngò tân

shit râ nghut lhê." ga ngo lé taí ri. ¹⁰ Hau htâng, yhang gi, ngo lé Woi-nyí mai bùm myhâng mó ralhum má shuí jé luí, Garaí Gasâng chyáng mâ é nghut mù, mauhkûng mai gyó lé lo é, haú Chyoiyúng Myuq gâ é Yerusalem lé tân shit ri. ¹¹ Myuq haú gi, Garaí Gasâng é hpungwup shingkang hû é htoq agó, haú maubó gi, hpaú dik é huhpé lungsêng su dut luí, myoqjâm su sân-yúng ri. ¹² Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myú raxe í hu é myíng lé, hkum haú pé má kê tap to bum ri. ¹³ Hkum haú pé gi, buihtoq hkyam shut sùm lhum, buiwàng hkyam shut sùm lhum, maupyí shut sùm lhum, mautsûng shut sùm lhum kut hpông tô ri. ¹⁴ Myuq xêwâm haú gi, awang raxe í lhùm èq hi tô é nghut luí, awang haú pé má, Sauzô é lagyo raxe í yuq é myíng dap tô bum ri.

¹⁵ Haú ngo lé nyo é maumang lagyo gi, myuq lé le, hau é hkum pé lé le, xêwâm pé lé le, kê râ matú, kê é jung híng jâm-yang ralhum chung tô ri. ¹⁶ Myuq haú gi, myí chyûn dut mâ é nghut luí, híng hpyang làm hpyang rawuí wuí za dut mâ é nghut ri. Maumang haú gi, myuq lé jâm-yang hau èq kê wú é hkûn, híng hpyang, làm hpyang, myhâng hpyang banshoq 1400 déng* kô bo ri; ¹⁷ yhang gi, haú byù kê é jung eq wuí é maumang lagyo é kê jung lé chùng mù, myuq xêwâm lé kê wú é hkûn, rasho myí xê myi dúng bo ri. ¹⁸ Myuq xêwâm haú gi, huhpé lungseng èq saí é nghut ri; myuq gi, híng gyíng èq saí é nghut mù, myoqjâm su yhang sân-yúng ri. ¹⁹ Myuq xêwâm haú é awang pé gi, hpau jung lungsêng ajung jûng èq mhôn tô é nghut ri. Sâng-hí lhum gi, huhpé lungseng èq, í lhum nghû râ gi, nila (mauhkûng nyuì su dut jung) lungseng èq, sùm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyuì nyuì é jung) lungseng èq, ²⁰ ngo lhum nghû râ gi, nyhaú myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung

* 21:16 1400 déng gi, Grik pé é stadia 12000 kô nghut ri.

lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaù lhum nghû râ gi, utohpaya (bó hui hui é jung) lungseng èq, raxê lhum nghû râ gi, mahuya nyuì lungsêng èq, raxe ralhum nghû râ gi, wakintu (mhan-haq nyuì eq mauhkûng nyuì nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri. ²¹ Haù myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saí é nghut ri. Haù myuq é hkyô mó gi, hîng jet èq saí é nghut luí, myoqjâm su duq san é hkyô nghut ri.

²² Ngò gi, myuq haù má noqkuq yhûm joq é lé a myàng, hkâsu mù gà le, haù wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noqkuq yhûm nghut nyi é yanmai nghut ri. ²³ Haù Garai Gasâng é hpungwup shing kang gi, myuq haù má duqbó byí é htoq agó, Sauzo gi, myuq hau é myibung nghut é yanmai, myuq haù má gi, bù eq lhamó tsô byi a ra nghut ri. ²⁴ Haù byù myû pé gi, myuq haù duqbó é hkaù má hkyô wó so kó râ nghut lhê; haù myidâm htoq mâ é hkohkam pé gi, yhangmoq é hkikhkâm hkyô lé, myuq haù má yù lé kó râ nghut lhê. ²⁵ Myuq haù má gi, myín nghû é a joq é yanmai, myuq hkum myhí é le joq râ a nghut lo. ²⁶ Haù byù myû pé é hpungwup shing kang eq aróng lé, myuq haù má yu lé kó râ nghut lhê. ²⁷ Myuq haù má, a sansêng é hkyô haí le wó wàng râ a nghut é htoq agó, hoq hpu hkyô eq mhaù zô é hkyô kut é sù ó yuq le wó wàng râ a nghut; haù Sauzô é asak jihpán laiká buk má myìng bo é bang za wó wàng râ nghut lhê.

22

Asak Wuì Mó Lâng

¹ Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaù má é hkyô mó gûng đông yui lô é, myoqjâm su sân-yúng é asak wuì mó lâng lé, maumang lagyo haù, ngo lé tân shit ri. ² Wuilàng í hpoq é má, ashi raxe í myû zúi é asak shigâm yuq tô é nghut luí, lhoqkyap hkangmó ashi zúi ri. Hau htoq agó, shigâm

haù pé mâ é ahaq pé gi, byù myû pé lé yâ gè râ matú nghut ri. ³ Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaù haù má joq nyi râ nghut mù, Yhâng é dui-nhâng zoshâng wuì gi, Yhang lé noqkuq dojàu kó râ nghut lhê. ⁴ Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é myìng kâ tap é hui kó râ nghut lhê. ⁵ Myín nghû é le joq râ a nghut lo. Myibung duqbó byí é le, bù tsô byí é le, yhangmoq ra kó râ a nghut lo, hkâsu mù gà le, haù Yhumsîng Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

⁶ Maumang haù gi, ngo lé, "Dang shí pé gi, lungíng é dang eq tengmán é dang nghut lhê. Myiqhtoí pé é woi-nyí lé up é Yhumsîng Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri." ga taí ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô râ nghut lhê! Laiká shí má bo é myiqhtoí dang pé lé châng kut é sù gi, hkungsô wó nyi ri."* gâ é lé, ngò wó gyô ri.

⁸ Haù hkyô pé lé wó myàng wó gyô é sù gi, ngò Yohan nghut lhê. Ngò gi, haù hkyô pé lé wó myàng wó gyô é hkûn, ngo lé, shí hkyô pé tân shit é maumang lagyo é hkyí wang má noqkuq râ matú paí gop é nghut lhê. ⁹ Nghut kôhang, yhang gi, ngo lé, "Haù su hkâkut! Ngò gi, nàng eq le, náng é gumang myiqhtoí pé eq le, laiká shí má é mung dang pé lé châng kut é lhunghâng bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

¹⁰ Hau htâng, yhang gi, "Laiká shí má bo é myiqhtoí dang pé lé, hkâzaú to lo, hkâsu mù gà le, haù ahkyíng gi, chyâng lò bê nghut ri. ¹¹ A dingmán é sù gi, a dingmán é đông xoq kut nyí sháng gaq; a sansêng é sù gi, a sansêng é đông xoq dut nyí sháng gaq; dingmán é sù gi, dingmán é đông xoq

* 22:7 Dang shí hkun gi, Yesuq taí é nghut lhê.

kut nyí sháng gaq; chyoiyúng é sù gi, xoq chyoiyúng nyí sháng gaq." ga ngo lé taí kyô ri.

¹² "Wú keq, ngò gi, a myáng má jé lé lô râ nghut lhê! Ngò gi, yuq hkangmó lé, yhumsíng kut é eq rajung za byi râ shigyaú chyunghuq chung tô lhê. ¹³ Ngò gi, Alhpa eq Omega nghut lhê, Sâng-hi eq Jihtûm nghut lhê, Sâng-hi Awang eq Lô Htáng Sù le nghut lhê.

¹⁴ Asak shigâm má jé râ eq myuq hkaû shut hkúmdong mai wó wang jé râ ahkáng wó yû shoq, yhumsing é buhîng lé chî sân é bang gi, hkungsô wó nyi ri. ¹⁵ Shinggan má gi, hkui dông nyi é bang, myoqheq hpaqchyî kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaû é hkyô lé ô nàu luí châng kut é bang lhungháng nyi bum akô nghut ri.

¹⁶ Ngò, Yesuq gi, haû noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haû

duqbo é Bó-myhû le nghut lhê."† gâ é lé, ngò wó gyô ri.

¹⁷ Haû Woi-nyí eq myisik gi, "Lé aq!" gâ akô. Haû wó gyô é sù gi, "Lé aq!" ga sháng gaq. Wuì shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wuì lé, shuq sháng gaq.

¹⁸ Laiká shî má bo é myiqhtoi dang pé lé wó gyô é bang yuq hkangmó lé, ngò sidiq byí é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shî má kê tô é wúm pé lé jé nhâng râ nghut lhê. ¹⁹ Myiqhtoi laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kê tô é asak shigâm eq chyoiyúng myuq mâ é yhang eq sêng é gû lé, yu pyám byi râ nghut lhê.

²⁰ Shí hkyô pé lé saksé hkâm byí é Sù gi, "Nghut bê, Ngò gi, a myáng má jé lé lô râ nghut lhê." ga taí ri.

Amen. Yhumsíng Yesuq ê, lé lô aq ô!

²¹ Haû Yhumsíng Yesuq é jeju gi, Garai Gasâng é byu pê chyáng joq nyí sháng gaq ô! Amen.

† 22:16 Dang shí hkun gi, Yesuq taí é nghut lhê.